


Itlajtol Totajtsi Dios



New Testament in Nahuatl, Southeastern Puebla
(MX:npl:Nahuatl, Southeastern Puebla)

Itlajtol Totajtsi Dios

New Testament in Nahuatl, Southeastern Puebla (MX:npl:Nahuatl, Southeastern Puebla)
copyright © 2011 Wycliffe Bible Translators, Inc.

Language: Nahuatl, Southeastern Puebla

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Southeastern Puebla

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 20 Dec 2018

4d269f11-cca1-521d-b89a-6683fffdc9c2

Contents

San Mateo	1
San Marcos	51
San Lucas	83
San Juan	135
Hechos	173
Romanos	220
1 Corintios	239
2 Corintios	257
Gálatas	269
Efesios	276
Filipenses	283
Colosenses	288
1 Tesalonicenses	293
2 Tesalonicenses	297
1 Timoteo	300
2 Timoteo	306
Tito	310
Filemón	313
Hebreos	314
Santiago	328
1 San Pedro	333
2 Pedro	339
1 Juan	342
2 Juan	347
3 Juan	348
Judas	349
Apocalipsis	351

N Kualtlájtoli non Okijuilo San Mateo

*Yejwah ninteh intokah iwejkatatawah n Cristo Jesúz
(Lc. 3:23-38)*

- ¹ Ninteh iwejkatatawah n Cristo Jesúz, non walewatok itech David iwa noijki walewatok itech Abraham.
- ² Abraham ita n Isaac.
Isaac ita n Jacob,
iwa Jacob ita n Judá iwan oksikimeh ikniyah.
- ³ Ipilwah n Judá non okímpixki iwan Tamar, omonotsayah Fares iwa Zara.
Fares ita n Esrom,
iwa n Esrom ita n Aram.
- ⁴ Aram ita n Aminadab.
Aminadab ita n Naasón.
Naasón ita n Salmón.
- ⁵ Salmón iwa n Rahab okipixkeh inkone non itoka Booz.
Booz iwa n Rut okipixkeh inkone non itoka Obed.
Obed ita n Isaí.
- ⁶ Isaí ita n rey David.
N rey David ita n Salomón. Imamá n Salomón okatka isiwa n Urías.
- ⁷ Salomón ita n Roboam.
Roboam ita n Abías,
iwa Abías ita n Asá.
- ⁸ Asá ita n Josafat.
Josafat ita n Joram,
iwa Joram ita n Uzias.
- ⁹ Uzias ita n Jotám.
Jotám ita n Acaz,
iwa Acaz ita n Ezequías.
- ¹⁰ Ezequías ita n Manasés.
Manasés ita n Amón,
iwa Amón ita n Josías.
- ¹¹ Josías ita n Jeconías. Jeconías iwan ikniyah otlakatkeh itech tonatijmeh ijkuak n israelitas okinwikatokah kan tlali de Babilonia.
- ¹² Satepa de okinwikakeh Babilonia,
Jeconías ita n Salatiel,
iwa Salatiel ita n Zorobabel.
- ¹³ Zorobabel ita n Abiud.
Abiud okatka ita n Eliaquim,
iwa Eliaquim ita n Azor.
- ¹⁴ Azor ita n Sadoc.
Sadoc ita n Aquim,
iwa Aquim ita Eliud.
- ¹⁵ Eliud ita n Eleazar.
Eleazar ita n Matán,
iwa Matán ita n Jacob.
- ¹⁶ Jacob ita n José.
José omonamikti iwan María.
María okatka imamá n Jesúz non tejwah tikixmatih kemi Cristo.
- ¹⁷ Opanokeh májtlaktli iwa n nawi (14) iwejkaixwiwah n Abraham asta otlakatiko David. Iwa satepa májtlaktli iwa n nawi (14) iwejkaixwiwah ijkuak ok onemia n David asta ijkuak okinwikakeh kan tlali de Babilonia. Iwa satepa ok májtlaktli iwa n nawi (14) iwejkaixwiwah ijkuak okinwikakeh n Israelitas kan tlali de Babilonia asta ijkuak otlakatiko n Cristo.

*Otlákatki Cristo Jesús
(Lc. 2:1-7)*

¹⁸ Ijkí otlamochi ikuak otlákatki n Cristo Jesús. María, imamá Jesús, yokichixtoka tonati para monamiktis iwan José. Pero ikuak ayamó omonamiktiyah, María yokatka kókoxki ika konetl ika iweletilis n Espíritu Santo. ¹⁹ José ya monamiktiskia iwan María,* iwa kemi kuali tlakatl, ye amo okinek kipijpinatis n María, yika okimoli kikajkawas san ichtaka. ²⁰ Ye okimoliaya ijkó kichiwas, pero se iángel n Totajtsi Dios okimonextili ikuak otejtemiktoka iwa okili:

—José, iwejkaixwi n David, amo ximawi tikselsi n María kemi mosiwa. N konetl non kichixtok wits ika iweletilis Espíritu Santo. ²¹ María kipias se konetl, iwa te tiktlalilis itoka JESÚS, Ye kinmakixtis itlakaikniyah de intlajtlakolwah.

²² Nochi ni opanok para mamochiwa tlan okijo Totajtsi Dios ikuak okikuilo n tiotlajto:

²³ Se íchpochtli kipias ijtk se konetl,
iwa kitlakatilis,
iwa kitlalilis itoka Emanuel.
Emanuel kijtosneki: Dios kajki towah.

²⁴ Ikuak José oisak, okichi tlan okinawati iángel Totajtsi Dios, iwa okiseli n María kemi isiwa. ²⁵ Yejwah mach okochiah sansikah, asta ikuak yotlákatki n konetl.

Iwa José okitlalili itoka Jesús.

2

Sikimeh ixtlamatkeh ovalajkeh okitlajpalokoh n Cristo

¹ Jesús otlákatki itech altepetl de Belén non kajki kan tlali de Judea. Itech nonteh tonatijmeh Herodes* ye n rey. Ikuakó ovalajkeh kan ik kisa tonati sikimeh ixtlamatkeh. Yewah okalakikoh Jerusalén, ² iwa otlajtlankeh:

—¿Kanin kajki inrey n judíojteh non yotlakatiko? Kan ik kisa tonati otiktakeh isitlal, yika otonwalajkeh otikweyijkachiwakoh.

³ Ikuak n rey Herodes okikak nochi ni, omomojti, iwa nochteh n tlakah de Jerusalén noiwa omomojtijkeh. ⁴ Ikuakó n rey Herodes okinmoololo nochteh n tiopixkeh non tlayakantokeh iwa non kitemachtiah n tlanawátili, iwa okintlajtlani kani tlakatis n Cristo. ⁵ Iwa yejwah okilijkeh:

—Tlakatis itech altepetl de Belén, non kajki kan tlali de Judea, ijkó okikuilo n profeta:

⁶ Te Belén non tika itech tlali de Judá,
te maya titsijskitsi, te okachi tiweyijkatitos.

Motech kisas se weyi tlanawati,
non kinyakanas nopolwah, n tlakah de Israel. *Mi. 5:2*

⁷ Ikuakó Herodes san ichtaka okínnotski n ixtlamatkeh, iwa okinyektlajtlani tlan tonati oneski non sítlali. ⁸ Otlanki okintítlanki mawiah Belén, iwa okinmili:

—Xiwah ompa, iwa xiyecktlajtanikah kanin kajki non konetl, iwa ikuak nonkajsiskeh, sanima technawatikih ne noiwa nias nikweyijkachiwati.

⁹ Ikuak n ixtlamatkeh okikakeh tlan okinnawati n Herodes, oonewakeh Belén. Iwa n sítlali non okitakeh kan ik kisa tonati, otlayakantia iwa omoketsato kan kajki n konetl.

¹⁰ Ikuak n ixtlamatkeh okitakeh n sítlali, satlawel oyolpakeh. ¹¹ Iwa ikuak okalakeh itech kali, okitakeh n konetl iwan imamá María. Omotoljkeh inawak iwa okiweyijkachijkeh n konetl. Satepa okintlapojkeh inkaxajtsitsiwh iwa okitliokolijkeh oro, kópali iwa ajwiálistli non itoka mirra. ¹² Satepa, Dios okinnawatih ikuak otejtemiktakah, iwa

* ^{1:19} Ikuak n judíojteh kisentlaliah monamiktiskeh mokawah kemi yomonamiktiyah. Yika, tla ayakmó monamiktiah kipiah mokajkawaskeh ika se amatl, maya ayamó omonamiktiyah, porke nin compromiso weyi kijtosneki para n judíojteh. Xikamapoa Mateo 19:3-9. * ^{2:1} Non okachi wejweyijtikeh tlanawatijkeh itech nin tlali kintokayotiah ‘Herodes’, non kijtosneki ‘se weyi tlanawati’.

okinmili ayakmó mamokopakah kan Herodes, iwa n ixtlamatkeh omokopkeh incha itech ok se ojtil.

José, María iwa n konetl Jesús, choloah para Egipto

¹³ Ijkuak n ixtlamatkeh yomokopkeh incha, se iángel Toteko Dios okimonextili n José ijkuak otejtemiktoka, iwa okili:

—José, ximewa, xikonana n konetl iwa imamá, iwa xicholo kan tlali de Egipto. Ompa ximokawakah asta ijkuak ne nimitsnawatis xiwalmokopakah. Herodes kitemojtinemis n konetl para kimiktis.

¹⁴ San nima non yúali, José omejtewak, okónanki n konetl iwa imamá, iwa okinwík Egipto. ¹⁵ Iwa ompa omokajkeh asta ijkuak Herodes omikki. Ijkó otlamochi kemi okijo n Toteko ijkuak okikuilo n profeta, iwa okijo: “De Egipto oníknotski Nokone.” *Os. 11:1*

Herodes otlanawati makinmiktikah n kokoneh

¹⁶ Ijkuak Herodes okitak okikajkayajkeh n ixtlamatkeh, satlawel okuálanki, iwa otlanawati makinmiktikah nochteh n kokoneh non sakin otlakatkeh iwa asta non ya kipiah ome xiwitl, nochteh non ochantitokah Belén iwa non ik ompa ochanchiwayah. Herodes ijkó okijejyekoliaya ika tlan okiljkeh n ixtlamatkeh. ¹⁷ Ijkó otlamochi kemi okikuilo n profeta Jeremías:

¹⁸ Nochteh non ochantitoka Ramá okikakeh ijkuak chikawak ochokayah iwa omoyolkokoayah.

Raquel okojsajtsitokah,
iwa amo okinekia moyolsewis,
ken okinmiktilijkeh ipilwah.

Jr. 31:15

José mokopa Nazaret

¹⁹ Ijkuak Herodes yomikki, se iángel Toteko okimonextili n José ijkuak otejtemiktoka ompa Egipto iwa okili:

²⁰ —Ximewa, xikwika n konetl iwa imamá, iwa ximokopa kan tlali de Israel, porke yomikeh non okinekiah kimiktiskeh n konetl.

²¹ Ijkuakó José omejki, okiwík n konetl iwa imamá para Israel. ²² Ijkuak José okima Arquelao otlanawatijtoka Judea ipatka ita n Herodes, omaujki yas ompa. Iwa oyá Galilea kemi okinawatijkeh ijkuak otejtemik. ²³ Ijkuak ompa okalakitoh, omochantitoh Nazaret. Ijkó omochi tlan okikuilojkeh n profetas, Jesús kitokayotiskeh Nazareno.

3

Juan Bautista tlamachtia kan tlaltejtéyinki

(*Mr. 1:1-8; Lc. 3:1-9, 15-17; Jn. 1:19-28*)

¹ Itech nekateh tonatijmeh, Juan Bautista owala kan tlaltejtéyinki de Judea, otetlapowiko itlajtol Dios, ² iwa okimiliaya n tlakah:

—Ximoyolpatla inawak Dios, ya walajsi n tonati ijkuak Dios pewas tlanawatis.

³ Isaías okitene Juan iwa okijo:

Se tlájtoli tsajtsi kan tlaltejtéyinki:
“Xikmajmanilikah se ojti n Toteko,
Xiktlapokah se ojti milaktik.”

Is. 40:3

⁴ Itlakeh n Juan ochijchitoka ika itsojmio n kameyo, iwa omotlajkoilpiaya ika se kuítlahtli. Okinkuaaya chapulimeh iwa nékuitli non onka itech tepetl.* ⁵ Miakeh okonkakiah n Juan. Iwa amo oyaya san de Judea, noíwa non ochajchantitokah inakastla n río Jordán. ⁶ Iwa ijkuak okinmokuitiayah intlajtlakolwah, Juan okinkuaatekiaya ijtit río Jordán.

* ^{3:4} Se nasareo amo oweletia okikuaya san de nochí nion okoniaya vino. Xikamapa Nm. 6:1-5, Jue. 13:4,7-14. Juan nasareo iwa Jesús nazareno. Xikamapa Mt. 11:18,19.

⁷ Ijkuak Juan okitak miakeh fariseos[†] iwa saduseos[‡] owalayah inawak makinkuaateki, ye okinmili:

—¡Nomejwah kemi nonkoameh! ¡Akin onomechili noncholoskeh de n temohti tlaijy-owílistli non wits nomopah! ⁸ Xikchiwakah tlan kuali ijkó motas milák yononmoyolkopkeh. ⁹ Iwa amo xikyejyekolikah weletis nonkijtoskeh: “Tejwah titepilwah de Abraham.” De milajka nomechilia asta ninteh temeh, Dios weletis kinkopas ipilwah n Abraham. ¹⁰ N acha ya tlatentitok iwa sa mochixtok para nomechnelwayotsontekis. Porke nomejwah amo kuali tlakilo nonkitemakah, yika nomechtsontekiskeh iwa nomechtlamotlaskeh ijtk tletl. ¹¹ Milák, ne nomechkuaatekia ika atl porke yononmoyolkopkeh, pero wal-muikas ok se Akin okachi weletini ke ne, iwa ne amo ni tlawel kuali para nikkaktojtomas. Ye nomechkuaatekis ika Espíritu Santo iwa ika tletl. ¹² Akin wits satepa, kinxexelos n kualteh iwa non amo kualteh. N kualteh kinmakixtis, pero non amo kualteh kinkajkawas ijtk tletl non amayik sewis.

Juan Bautista kikuaatekia n Jesús

(Mr. 1:9-11; Lc. 3:21-22)

¹³ Se tonati Jesús okiski de Galilea iwa okalakito kan río Jordán, para makikuaateki n Juan. ¹⁴ Pero Juan amo okinekia kikuaatekis n Jesús, iwa okili:

—¿Tikneki ne manimitskuaateki? ¡Amó, yej tejwatsi techkuaateki!

¹⁵ Pero Jesús okinankili:

—Axa ijkó xikchiwa, moneki tiktlakitaskeh tlan Dios otlanawati.

Ijkuakó Juan okili kualiká, ¹⁶ iwa okikuaateki. Ijkuak Jesús okiski de ijtk atl, okitak owalmotlapo n ilwikak iwa Iespíritu n Dios owaltemok ipan Jesús kemi se palomatsi.

¹⁷ Iwa itech ilwikak omokak se tlájtoli non okijtoaya:

—Ye nin Nokone non saikpanoa niklasojtla, iwa satlawel nechyolpaktia.

4

Namokualitlakatl okinekia matlajtlakolchiwa n Jesús

(Mr. 1:12-13; Lc. 4:1-13)

¹ Satepa, n Espíritu okiwík n Jesús kan amaka chanti para n amokualitlakatl kitoktis matlajtlakolchiwa.

² Jesús amo otlakua ome pójali tonati iwa ome pójali yúali, ompa kan amaka chanti, iwa satepa owalxitlatlak. ³ Ijkuakó n amokualitlakatl tekajkaya omikuani inawak Jesús iwa okili:

—Tla milák Te Ikone Dios, xikinnawati ninteh temeh mamokopakah paj.

⁴ Pero Jesús okinankili:

—Itlajkuilol Dios kijtoa: “N tlakatl amo san ika paj yolitok, yej noiwa ika nochí tlájtoli non Dios kijtoa.”

⁵ Satepa n amokualitlakatl okiwík n Jesús kan Jerusalén, okitlejkolti ikpak n Weyi Tiopa

⁶ iwa okili:

—Tla milák Te Ikone Dios, ximotlamotla, porke itlajkuilol Dios kijtoa:

Dios kinnawatis iangelwah mamitsmatsakuilikah,
para amo tikkomakati ika itla teltl.

Sal. 91:11

⁷ Jesús okili:

—Itlajkuilol Dios noiwa kijtoa: “Amo xikyejyeko Moteko Dios.”

Dt. 6:16

⁸ Sa iksemi n amokualitlakatl okiwík n Jesús ipan se tepetl non okachi wejkapa, iwa ompa okimititi nochteh n tlalmeh kan tlanawatiah n tlaltikpaktlakah ika nochí inweyilis,

⁹ iwa okili:

—Nochi ni nimitsmakas, tla techweyijkachiwas iwa timotlankuaketsas nonawak.

¹⁰ Ijkuakó Jesús okili:

[†] 3:7 Fariseos: se partido de akimeh okitlakitayah iwa satlawel okimopantiyah itlanawatil Moisés iwa nochí tlan yejwah okajxitilijkah. Iwa okintoktiyah n oksikimeh makitlakitakah tlan yejwah otlamachtiyah. [‡] 3:7 Saduseos: se partido non amo okineltokayah ke non yomikkeh oksepa moyolitiskeh.

—¡Xio, satanás!, porke itlajkuilol Dios kijtoa: “Xikweyijkachiwa Moteko Dios, iwa sanwel Ye tiktekichiwilis.”

¹¹ Ijkuakó n amokualitlakatl okikakajte n Jesús, iwa sikimeh ángelteh omijkuanijkeh okitekichiwilikoh.

*Jesús pewa kitemachtia n kualitláltoli kan tlali de Galilea
(Mr. 1:14-15; Lc. 4:14-15)*

¹² Ijkuak Jesús okima n Juan Bautista otsaktoka, oyá kan tlali de Galilea. ¹³ Okiski de Nazaret, iwa oyá ochanchiwato kan se altepetl non itoka Capernaúm, non kajki itempa n weyi atl de Galilea, itech tlalmeh de Zabulón iwa de Neftalí. ¹⁴ Ijkó otlamochi tlan Dios okijo ijkuak okikuilo n tiotlajto Isaías:

¹⁵ Tlalmeh de Zabulón iwa Neftalí,
ojtli non panotok inakastla n atl,
ik nepa lado de n río Jordán,
tlali de Galilea kan chanchiwah non amo judíojteh.

¹⁶ N tlakah non ochanchiwayah kan tlatleyua,
okitakeh se weyi tlawili.
Akimeh omokajkeh iwa okinmokemih itlasekawilo n mikílistli,
axa se tlawili okinmonextili.

Is. 9:1-2

¹⁷ Ijkuakó, Jesús opé tlamachtia, iwa okimiliaya:

—Ximoyolpatlakah, porke ya waljsi n tonati ijkuak Dios pegas tlanawatis.

*Jesús kinnotsa nawi michmajkeh
(Mr. 1:16-20; Lc. 5:1-11)*

¹⁸ Se tonati Jesús onejnentiaya itempa n atl de Galilea, iwa okinmitak ome iknimeh, Simón akin okinotsayah Pedro iwa ikni Andrés. Yejwah omichmajtokah porke yejwah michmajkeh, ¹⁹ iwa Jesús okinmili:

—Xiwikih nowa, iwa ya nonkinmichmaskeh tlakah.

²⁰ Yejwah sa nima okinkajtejkeh inmichayawah iwa oyajkeh iwan Jesús.

²¹ Jesús ok onejnentiaya itempa n atl, iwa okachi tlayakapa okinmitak ome iknimeh, Jacobo iwa Juan, itelpochwah n Zebedeo. Yejwah okintlajtlamanilijtokah inmichayawah ijtk se barka iwan inta. Jesús okinnotski, ²² iwa yejwah sa nima okikakajtejkeh inbarka iwa inta, iwa oyajkeh iwan Jesús.

*Jesús kinmachtia miakeh tlakah
(Lc. 6:17-19)*

²³ Jesús onemia itech nochteh n altepemeh de Galilea, otlamachtijtiaya itech sinagogas iwa okinmatiltiaya n kualitláltoli de Dios iwa okimiliaya kenomi moneki timoyekuikaskeh. Iwa okimpajtiaya n tlakah de nochí kokólistli iwa de nochí tlan okinkokoaya. ²⁴ Itech nochí tlali de Siria, omoma tlan Jesús okichiwaya, okwalinwikilijkeh nochteh akimeh otlaijyowiayah ika miak kokólistli:

non satlawel okinkokoaya inkuerpo,
akimeh okimpiyah espíritus amokualteh,
akimeh omimikiah
iwa akimeh amo oweletiah onejnemiah.

Jesús nochteh okimpajtiaya. ²⁵ Opé yawih iwan Jesús miakeh tlakah de Galilea, Decápolis, Jerusalén, Judea iwa akimeh ochanchiwayah ik nepa lado de río Jordán.

*Jesús tlamachtia ipan tepetl
(Lc. 6:20-23)*

¹ Ijkuak Jesús okinmitak omoololojkeh miakeh tlakah, otlejkok ipan tepetl iwa ompa omotlali. Ijkuakó itlamachtijkawah omijkuanijkeh inawak. ² Ye opé kinmachtia:

³ —Mapakikah non yolyámankeh, porke yejwah kinmaxkataliskeh kan Dios tlanawatis.

- ⁴ 'Mapakikah akimeh tlaijyowiah, porke Dios kinyolsewisi.
⁵ 'Mapakikah non moikneliah, porke Dios kinmaxxatilis n tlaltípkaktli.
⁶ 'Mapakikah akimeh kinekih ika noch iinyolo nochi mamochiwa ika milajkachi-wálistli, porke Dios kinmakas tlan kitlajtlanih.
⁷ 'Mapakikah non teiknomatih, porke Dios noiwa kimiknomatis.
⁸ 'Mapakikah non yolchipawakeh, porke yejwah kitaskeh Totajtsi Dios.
⁹ 'Mapakikah non teyolsewiah, porke yejwah kinnotsaskeh impilwah Dios.
¹⁰ 'Mapakikah akimeh kintotojtokah por kichiwha tlan Dios kineki, porke inmaxka n ilwikak kan Dios tlanawatia.
¹¹ 'Mapakikah ikuak fiero kintenewah, kintotojtokaskeh iwa kinwikaltiskeh por nechtlatitah. ¹² Ikuakó xipakikah porke nonkiseliskeh se weyi tlatliokólili kan ilwikak. Ijkó noiwa okintlaijyowiltjkeh n profetas non yonenkeh ikuak nomejwah ayamó ononkatkah.

*N istatl iwa n tlawili
(Mr. 9:50; Lc. 14:34-35)*

¹³ 'Nomejwah yononmochijkeh istatl itech nin tlaltípkaktli. Pero tla n istatl ayakmó tlapuyeya, ¿tlan ika tlapuyeyas? Mach ok kuali, sa kitepewah kala iwa nochteh kitlajtlaksah.

¹⁴ 'Nomejwah non tláwilteh itech nin tlaltípkaktli. Amo weletis motlaatis se altepetl non kajki ipan se tepetl. ¹⁵ Amaka kimilintia se kandil iwa kitlaatis itlampa se kajo, yej kitlalia tlakpak para makintlawili nochteh non kateh ijtk kali. ¹⁶ Ijkó noiwa, nomejwah xikintlawilikah n tlakah para makitakah nomejwah nonkichiwha tlan kuali, ijkó n tlakah kitaskeh tlan kuali nonkichiwha. Ijkó yejwah kiweiyijkachiwaskeh Nomotajtsi Dios non kajki ilwikak.

Jesús kitemachtia itlanawatil Moisés

¹⁷ 'Amo xikmolikah oniwala onikpojpoloko n tlanawatílistli noso intlajkuilol n profetas. Amo oniwala onikimpojpoloko, yej oniwala para mamochiwa tlan kijtoa. ¹⁸ De milajka nomechilia, n ilwikak iwan tlaltípkaktli pojpolewiskeh, pero noch tlan ikuilitok, maya tlan okachi tsjitsikitsi, saman mochiwas. ¹⁹ Yika, akin amo kintlakita seme de ninteh tlanawátilteh, maya amo okachi ipati, iwa ijkó kitemachtia, non tlakatl kitaskeh kemi se non amo okachi ipati kan Dios tlanawatia. Pero tla aka kintlakitas nochteh n tlanawátilteh iwa kinmachtis oksikimeh makintlakitakah, yetos weyi kan Dios tlanawatia. ²⁰ Ne nomechilia, tla amo nonkichiwha tlan Dios kineki, amo nonkalakiskeh ilwikak kan Dios tlanawatia. Moneki nonkiyekchiwaskeh nochi ni, iwa amo tlan okitemachtijkeh n fariseos iwa non kitemachtiah intlanawatil.

Jesús tlamachtia ikuak se kualani

(Lc. 12:57-59)

²¹ 'Xikilnamikakah yowejka Moisés okinmilijkah nomotatawah: "Amo xitemiki, porke akin temiktis trato kitlajtlakolmakaskeh." ²² Ne nomechilia: Nochi akin kikualankaita se ikni, moneki makitlajtlakoltikah. Iwa akin kilia ikni amo kipia ikuatetex, kitlajtlakol-makaskeh kan Sanedrín.* Noiwa akin kinotsa ikni tikuatlapolojtok, yas miktla ijtk tletl.

²³ 'Noiwa, tla ya tio tiktemakati motlamanal itech artal iwa tikilnamiki amo timowika iwan mokni, ²⁴ ompa xikkawa motlamanal iyakapa n artal iwa achto xio ximotlapo-jpolwiti iwa mokni. Ikuakó ya weletis tiwalmokopas kan artal iwa tityektemakas motlamanal.

²⁵ 'Tla aka mitsteilia iwa kijtoa itla tikwikilia, ximoyekkawa íwa, para amo mamit-stemakti imak tekiwa, tlamó n tekiwa tlanawatis mamitsakuakah. ²⁶ De milajka nimitsilia, amo tikisas de ompa asta ikuak yotktlaxtla nochi tlan mitstlajtlanilia.

Amo matimomekatikah

* 5:22 Sanedrín: nin grupo kemi de 50 tlayakankeh okimajmanayah n tetajmeh non tlaixkomakah ikuak kinteiliah akimeh amo okitlakitayah itlanawatil Moisés.

²⁷ *'Nomejwah yononkikakeh tlan achto omijto: “Amo xikinpatla siwameh.” Ex. 20:14; Dt. 5:18* ²⁸ *Ne nomechilia, nochi tlakatl non kelewia se siwatl non amo iaxka, kijtosneki yokimomekati itech iyolo.*

²⁹ *'Noiwa, tla moixtololo non kajki moyekma mitstoktia xitlajtlakolchiwa, wejka xiktlamotla. Okachi kuali xikpolo itla de mokuerpo, iwa amo nochi mokuerpo makontlamotlakah mikta. ³⁰ Iwa tla momayekma mitstoktia xitlajtlakolchiwa, xikmotekili iwa wejka xikontlamotla. Okachi kuali xikpolo itla de mokuerpo, iwa amo nochi mokuerpo makontlamotlakah mikta.*

Amo matimosiwakajkawakah

(Mt. 19:9; Mr. 10:11-12; Lc. 16:18)

³¹ *'Moisés okikuilo: “Akin mosiwakajkawa, moneki makimaka isiwa se amatl non makichijto kikajkawa isiwa.”* ³² *Ne nomechilia: tla se tlakatl kikajkawa isiwa, maya isiwa amo kema omomekati, non tlakatl kitopejtok isiwa mamomekatijtinemi. Iwa akin monamiktia iwa non siwatl, san kimomekatijtok.*

Matikchiwakah tlan tiksentaliah

³³ *'Nomejwah yononkikakeh yowejka Dios okinmili nomotatawah: “Tla itla yotsent-lalili Dios, moneki tikchiwas.”* ³⁴ *Axa Ne nomechilia, amitla xiksentalalikah: nion por ilwikak, porke Dios ompa yayantitok.* ³⁵ *Nion xiksentalalikah por nin tlaltípkaktli, porke ompa kan Dios kinsewijtok ikxiwah. Nion xiksentalalikah por Jerusalén, porke non altepetl iaxka n Weyi Rey.* ³⁶ *Nion amo ximotlajtolsentlali por motsonteko, porke amo tiweletis tiktlilewiltis nion tikistayaltis nion se motsonkal.* ³⁷ *Tla itla nonkichiwaskeh san xikijtokah tla “ejé”, “ejé”, noso tla “amó”, “amó”, porke nochi tlan amo milák nonkajxtiliskeh, walewatok itech amokualitlakatl.*

Amo matikmokopilikah ikuak techtoktiah tlan amo kuali

(Lc. 6:29-30)

³⁸ *'Nomejwah yononkikakeh kan Moisés okikuilo: “Tla aka mitskopinilia moixtololo, makikopinilikah ye noiwa. Tla aka tetlantepewa, makitlantepewakah ye noiwa.”* ³⁹ *Ex. 21:23-25; Lv. 24:20*

Pero axa Ne nomechilia: Amo xikmokopilikah ikuak itla amo kuali nomechtoktiah. Yej, tla aka mitsixtlatsinia xikkawili mamitsixtlatsini iojkatia moixko.

⁴⁰ *Tla aka mitsteilia para mitskixtilis motlake, xikkawili noiwa mamitskixtili mokoto.*

⁴¹ *Iwa tla aka mitstoktia xikwikili itlamamal se kilómetro, te xikwikili ome kilómetro.*

⁴² *Akin mitstlajtlanilis itla, xikmaka. Iwa akin mitstlanewilis itla, xiktlaneti.*

Matikintlasojtlakah non techkokoliah

(Lc. 6:27-28, 32-36)

⁴³ *'Noiwa yononkikakeh tlan yomijto: “Xiktlasojtla non mitstlasojtla, iwa xikkokoli non mitskokolia.”* ⁴⁴ *Pero Ne nomechilia: Xikintlasojtlakah akimeh nomechkokoliah, iwa xiktlajtlanilikah Dios makintiochiwa akimeh nomechtotojtokah.*

⁴⁵ *Ijkó nomejwah nonyetoskeh ipilwah n Totajtsi Dios non kajki ilwikak. Ye kichiwa makisa n tonati impa non kichiwh tlan kuali iwa kichiwh tlan amo kuali. Iwa kualtitlani n kiawitl impa n kualteh tlakah iwa n tlakah non amo kualteh.* ⁴⁶ *Porke tla nomejwah nonkintlasojtla sanwel akimeh nomechtasojtla, ¿tlan tlaxtláwili nonkiseliskeh ika noni? N tominooololojkeh noijkó kichiwh. ⁴⁷ Iwa tla san nonkintajpalolah nomokniwh, ¿amo nonkichiwh tlan oksikimeh kichiwh? Non amo kixmatih Dios, noijkó kichiwh.*

⁴⁸ *Nomejwah xiyetokah non milajkameh, ijkó kemi Nomotajtsi Dios non kajki ilwikak.*

Kenomi tikchiwaskeh ikuak titetlatliokoliah

¹ *'Ikuak nomejwah nonkichiwaskeh itla kuali, amo xiktematiltikah ixpa n tlakah, porke tla ijkó nonkichiwh, Dios ayakmó nomechmakas nomotlatliokolil kan ilwikak.*

² *Yika, ikuak itla tikintliokolis n próbesteh, amo xiktematiltijtinemi kemi kichiwh non kipiah ome imixko. Yejwah kinekih makinmitakah itech sinagogas iwa itech ojtli yejwah*

milák kitemoah Dios, iwa ijkó kuali matlajtokah de yejwah. Pero de milajka nomechilia, Dios mach ok itla kintliokolis nonteh tlakah.³ Pero ikuak te itla tiktetliokolis, amaka xiktlapowi.*⁴ Ijkó motlatliokolil yetos san ichtaka, iwa Dios n Teta non kita nochi tlan tikchiwa san ichtaka, Ye mitsmakas motlatliokolil.

Jesús tlamachtia kenomi timotrotsajtsiliskeh

(Lc. 11:2-4)

⁵ Ikuak nomejwah nonmotrotsajtsiliskeh, amo xikchiwakah tlan kichiwah n íxkopkeh, yejwah kiwilitah makinmitakah ikuak motrotsajtsiliah. Yika motrotsajtsiliah moke-tokeh itech sinagogas iwa itech ojmeh kan panoah miakeh tokniwah. Kuali xikmatikah, san ijkó kipiaskeh intlatliokolil.⁶ Ikuak timotrotsajtsilis, xikchiwa moselti. Xikalaki mocha, ximokaltsakua iwa ompa ximotlapowi san ichtaka iwa n Dios Motajtsi, iwa Ye mitsmakas tlan tiktajtlanilis san ichtaka.

⁷ 'Iwa ikuak nonmotrotsajtsiliskeh, amo san ompa xikojpatilijtokah nomotlajtol kemi kichiwah non amo kixmatih Dios, yejwah kimoliah tla san ompa kojpatilijtoskeh intlajtol, Dios okachi kinkakis.⁸ Nomejwah amo xikchiwakah kemi yejwah kichiwah, porke Totajtsi Dios ya kimatok tlan nomechpoloa achto de nonkitlajtlaniliskeh.⁹ Yika, nomejwah ijkí moneki ximotrotsajtsilikah:

Totajtsi Dios non timoitstika ilwikak,
nochipa makiyektenewakah motoka.

¹⁰ Xiwalmuika xitlanawatiki,
mamochiwa tlan Tejwatsi tkmonekiltia itech nin tlaltíkpaktli,
ijkó kemi mochiwa kan ilwikak.

¹¹ Techmaka nochi tonati tlan tikmomajsewiskeh.

¹² Techintlapojpolwili totlajtlakolwah,
ijkó kemi tejwah noiya tikintlapojpolwiah akimeh techtoktiah tlan amo kuali.

¹³ Amo xiktekawili matechyoltilana n tlajtlácoli,
yej techmakixti imak n amokualitlakatl.

¹⁴ 'Tla nomejwah nonkintlapojpolwiah non nomechtoktiah tlan amo kuali, Nomotajtsi non kajki ilwikak noiya nomechtlapojpolwih. ¹⁵ Pero tla amo nonkintlapojpolwiah n tlakah, noiya Nomotajtsi amo nomechtlapojpolwih.

Jesús tlamachtia keniki se mosawas

¹⁶ Ikuak nomejwah nonmosawaskeh, amo xiiknotlachiakah kemi kichiwah non íxkopkeh. Yejwah iknotlachiah san para makinmitakah mosaujtokeh. Ne nomechilia, sanwel noni yetos intlatliokolil.¹⁷ Yika, ikuak te timosawas, ximotejtema iwa ximixami,¹⁸ para amaka makimati kox timosaujtok. Sanwel Dios Motajtsi, Akin kimiati nochi tlan se kitlatijtok itech iyolo, Ye kimiati timosaujtok iwa mitsmakas motlatliokolil.

Tlan milák ipati

(Lc. 12:33-34)

¹⁹ Amo xikoololokah miak tomi itech nin tlaltíkpaktli kan tlakuakualoa iwa tlapoxkawi, iwa n ichtekeh techankalakih iwa tetlachtekiah.²⁰ Yej xikoololokah itech ilwikak tlan milák ipati. Ompa amo weletis kuakualos iwa amo poxkawi, nion ichtekeh weleti kalakih.²¹ Kan kajki tlan momejwah nonkimoliah ipati, ompa kajki nomoyolo.

Toixtololowah kitlawiliah tokuerpo

(Lc. 11:34-36)

²² Nomoixtololowah kateh kemi se tláwili non kitlawiliah nomokuerpo. Yika, tla nomoixtololowah chipawatokeh, kuali kitlawilijtoskeh nochi nomokuerpo. ^{Job 31:1}

²³ Pero tla nomoixtololowah tlajtlakolchiwah, nochi nomokuerpo kajki kan tleyua. Iwa tla motlawil ayakmó tlawia, kijtosneki nonkateh kan sentleyua, jsaikpanoa tliliktit yetos non sentleyálistli nomotech!

* 6:3 N griego kijtoa: Amo makimati moopochma tlan kichiwa momayekma.

*Amo matikimpiakah ome toteko
(Lc. 16:13)*

²⁴ 'Amaka tlakatl weletis kintekitilis ome inteko, porke se kitlawelitas iwa non ok se kitlasoijtas, noso se kitlakitas iwa non ok se mach kitlakitas. Amaka weletis kimopantis Dios tla satlawel momijmiktia para kitlawelpias tomi.

*Dios kinmokuitlawia ipilwah
(Lc. 12:22-31)*

²⁵ 'Yika nomechilia: Amo ximotekipachokah por tlan nonkimomajsewiskeh noso tlan nonkoniskeh para ika nonyolitoskeh, noso tlan nonkonakiskeh. ¿Amo okachi ipati nomoyolilis ke nomotlakual, iwa amo okachi ipati nomokuerpo ke nomotlakeh? ²⁶ Xikinmitakah n totomeh non patlantinemih, yejwah amo tookah nion pixkah, iwa nion amitla kitlaatiah. Iwa Nomotajtsi Dios non kajki ilwikak kintlakualtia. ¡Iwa nomejwah okachi nomopati ke n totomeh! ²⁷ ¿Tla aka de nomejwah satlawel motekipachoa, yolitos ok se tonati?

²⁸ ¡Iwa tleka nomejwah saikpanoa nonmotekipachoah por nomotlakeh? Xikinmitakah kenomi moskaltiah n xochimeh, yejwah amo tekith iwa nion motlajtsomiah.

²⁹ Iwa Ne nomechilia nion rey Salomón non saikpanoa omoyektlakentiaya, owéletki omotlakenti kemi ninteh xochimeh. ³⁰ Iwa tla Dios ijkó kitlakentia se xochitl non axa selistok tlajtlala iwa mostla kichichinoah ijtk tletl, jokachi miak kichiwas por nomejwah akimeh nonkipiah achitsi tlaneltokálistli! ³¹ Yika, amo ximotekipachokah nion xikmolikah: “¿Tlan tikmomajsewiskeh? noso ¿tlan tikoniskeh? noso ¿tlan tikonakiskeh?” ³² Porke nochteh non amo kixmatih Dios kitemolijtinemih kenomi kipiaskeh noch ni, pero nomejwah nonkipiah se Nomotajtsi non kajki ilwikak, iwa Ye ya kimatok tlan nomechpoloa. ³³ Nomejwah moneki achto xikchiwakah tlan Dios nomechnawatia iwa xikchiwakah tlan Ye kimonekiltia. Iwa ijkó Dios nomechmakas noch tlan nomechpolos. ³⁴ Yika, amo ximotekipachokah kenomi nontlanexiliskeh, porke mostla ok se welta nonmotekipachoskeh. Nochi tonati saman yetos itla tlan ika weletis nonmotekipachoskeh.

*Amo xitepojpoakah
(Lc. 6:37-38, 41-42)*

¹ 'Amo xikimpojpoakah oksikimeh, ijkó noiva amo manomechpojpoakah nomejwah. ² Porke ijkó kemi nomejwah nonkimpojpoaskeh oksikimeh, ijkó nomechpojpoaskeh. Iwa ijkó kemi nomejwah nontlatamachiwah, noiva ijkó nomechtamachiwaskeh. ³ ¿Tleka tiktilia n tlajsoltsintli non kajki ijtk iixtololo mokni, iwa amo tikita n tláktsonli non kajki ijtk moixtololo? ⁴ ¡Kenijke weleti tikilia mokni: “Techkawili manimitskixtili n tlajsoltsintli non tikpixtok ijtk moixtololo,” iwa te ok tikpixtok se tláktsonli ijtk moixtololo! ⁵ ¡Íxkoptli! Achto xikmokixtili n tláktsonli non tikpixtok ijtk moixtololo, iwa ijkó weletis tiyektlachias iwa weletis tikkixtilis n tlajsoltsintli non kipixtok mokni ijtk iixtololo.

⁶ 'Tlan tiochitok iwa chipawak, amo xikinmakakah n chichimeh, amo kichiwa onewaskeh nomopah iwa nomechkuajkuaskeh. Nion xikinmakakah n koskameh patiojkeh n pitsomeh porke san kintlajtlaksaskeh.

*Xiktlajtlanilikah Dios tlan nomechpoloa iwa Ye nomechmakas
(Lc. 11:9-13; 6:31)*

⁷ 'Xiktlajtlanilikah tlan nomechpoloa iwa nomechmakaskeh. Xiktemokah tlan nomechpoloa iwa nonkajsiskeh, xitenotsakah kan kaltentli iwa nomechtlatlapoliskeh. ⁸ Yika, akin itla kitlajtlani, kiselia. Iwa akin itla kitemoa, kajsi. Iwa akin tenotsa kan kaltentli, kitlatlapoliah.

⁹ '¿Akin tlakatl weletis kimakas ikone se tetl ikuak kitlajtlanilis se paj? ¹⁰ Noso, ¿weletis kimakas se koatl ikuak kitlajtlanilis se michi? ¹¹ Maya nomejwah amo nonkualteh, nonweleti nonkinmakah nomopilwah tlan kuali, jokachi Nomotajtsi Dios non kajki ilwikak, weletis nomechmakas tlan kuali tla nonkitlajtlaniliskeh!

¹² 'Xikchiwakah iwan oksikimeh ijkó kemi nomejwah nonkinekih makichiwakah nomowah, ye tlan moneki xikchiwakah. Ye ni itlanawatil Moisés iwa nochi tlan okijkuijokeh n profetas.

N kaltentli non tsopijtik

(Lc. 13:24)

¹³ 'Xikalakikah kan ik kaltentli non tsopijtik, porke patlawak n kaltentli iwa kuyawak n ojtlí non tewika kan moixpoloah, iwa miakeh ik ompa yajtokeh. ¹⁴ Pero n kaltentli iwa n ojtlí non tewika kan nochipa se yolitos, saikpanoa tsopijtik iwa san sikimeh kajsi non ojtlí.

Se kuawitl moixmati ika tlan kitlakiltia

(Lc. 6:43-44)

¹⁵ 'Ximotlachilikah inmak nekateh tiotlajtolteh tekjkayajkeh, non motlakentiah kemi yetoskiah ichkameh, pero ik inmijtik kokoyomeh tekuanimeh. ¹⁶ Nomejwah weletis nonkinmixmatiskeh ika tlan kichiwah, porke amo motekih uvás itech witsmeh, nion se tlátsmoli weleti kitemakas igos. ¹⁷ Ijkó kiné, nochi kuali kuawitl, kitemaka kuali itlakilo, iwa n kuawitl non ayakmó kuali, amo kuali itlakilo kitemaka. ¹⁸ Se kuali kuawitl amo weletis kitemakas amo kuali itlakilo, iwa se kuawitl non ya palantok amo weletis kitemakas kuali itlakilo. ¹⁹ Nochi kuawitl non amo kitemaka kuali itlakilo, motsojtson-teki iwa se kitlamotla ijtk tletl. ²⁰ Yika nomejwah weletis nonkinmixmatiskeh ika tlan kitlakiltiah.

Amo nochteh kalakiskeh kan Dios tlanawatia

(Lc. 13:25-27)

²¹ 'Amo nochteh akimeh nechiliah: "¡Noteko, Noteko!", kalakiskeh kan Dios tlanawatia. Sanwel akimeh kichiwah tlan kimonekiltia Notajtsi non kajki ilwikak. ²² Itech neká tonati, miakeh nechiliskeh: "¡Noteko, Noteko!, tejwah otitetlapowijkeh ika Motoka iwa ika Motoka otikinkixtijkeh espíritus amokualteh, noiva ika Motoka otikinchijkeh miakeh milagros." ²³ Ikuakó Ne nikinmilis: "¡Ayik onomechixma! ¡Ik nepa xiwiah, tlajtlakolchijkeh!"

Ome tlakah non okichijchijkeh inkal

(Lc. 6:47-49; Mr. 1:22)

²⁴ 'Ijkó kiné, akin nechkaki iwa nechtakita, ye kemi se tlakatl non kipia kuali itlalnamikilis, iwa okichijchi ikal itech tetl. ²⁵ Owala chikawak kiawitl, iwa opé motleloa miak atl iwa se ejekatl temohti omotlawitekia ipan non kali, pero amo owetski, porke kuali otlakxilitoka itech tetl. ²⁶ Iwa akin nechkaki iwa amo nechtakita, ye kemi se tlakatl amo ixtramati iwa okichijchi ikal san itech xali. ²⁷ Owala chikawak kiawitl, iwa opé motleloa miak atl iwa se ejekatl temohti omotlawitekia ipan non kali, iwa non kali owetski iwa nochi opojpoliwik.

²⁸ Ikuak Jesúz otlanki okintlapowi, n tlakah san omotlajtlachialtijkeh kenomi ok-inmachtia. ²⁹ Porke itlajtol n Jesúz otlanawatiaya de milajka, iwa amo kemi non kitemachtiah intlanawatil.

Jesús okipajti se tlakatl non okipiaya lepra

(Mr. 1:40-45; Lc. 5:12-16)

¹ Ikuak Jesúz otemok de kan tepetl, miakeh tlakah oyajkeh íwa. ² Ikuakó se tlakatl non okipiaya lepra owalmikuani inawak Jesúz, omotlankuaketski iwa okili:

—Noteko, tla tikmonekiltia, techchipawa.

³ Jesús okitlali ima ipan non kókoxki iwa okili:

—Nikmonekiltia. ¡Ximochipawa!

Ijkuak Jesús ijkó okijto, owalpajtik n kókoxki de ikokolis. ⁴ Jesús okili:

—Xikkaki, amaka xikmatilti, sanwel xio kan tiópixki, iwa xiktemaka motlatliokolil kemi kijtoa itlanawatil Moisés, para ijkó makimatikah yotimochipa de mokokolis.

Jesús kipajtia itlákau se kapita romano

(Lc. 7:1-10)

⁵ Ijkuak Jesús okalak kan altepetl de Capernaúm, ompa owalmijkuani se kapita romano, ⁶ iwa okili:

—Noteko, se notlakewal sa wetok nocha, yotitikak iwa kualo noch ikuero.

⁷ Jesús okinankili:

—Nias nikpajtiti.

⁸ N kapita okinankili:

—Tejwatsi, ne amitla nopati kemi para tikalakis nocha. Sanwel xikijo, “mapajti,” iwa notlakewal walpajtis. ⁹ Porke ne noiya nikpia akin nechnawatia, iwa ne noiya nikinnawatia sikimeh soldadojteh. Iwa tla aka niknawatia mawia, yawi. Iwa tla ok se niknawatia mawiki, wits. Noiya tla se notlakewal niknawatia makichiwa itla, kichiwa.

¹⁰ Ijkuak Jesús okikak tlan okili n kapita, omotlajtlachialti iwa okinmili non íwa oyayah:

—De milajka nomechilia, amo nikkajsitika nion se tlakatl itech nochi n tlali de Israel, non satlawel manechneltoka kemi nin tlakatl nechneltoka. ¹¹ Ne nomechilia miakeh walewaskeh de kan ik kisa tonati iwa de kan ik kalaki tonati, iwa motlamajsewiskeh iwan Abraham, Isaac iwa Jacob ompa ilwikak kan Dios tlanawatia. ¹² Pero n tepilwah non ompa moneki yetoskiah, kinkixtiskeh kala kan sentleyua, iwa ompa chokaskeh iwa tlannetsoniskeh.

¹³ Ijkuak Jesús okili n kapita:

—Ximokopa mocha, iwa mamochiwa kemi otikneltokak.

Iwa non ora itlakewal n kapita owalpajtik.

Jesús kipajtia imona n Pedro

(Mr. 1:29-31; Lc. 4:38-39)

¹⁴ Jesús oyá icha n Pedro, iwa ompa okajsito imona n Pedro wetok ika miak totonik.

¹⁵ Jesús okimakitski, iwa n totonik okiski. San nima n siwatl omej iwa opé kitekichiwilia.

Jesús kimpajtia miakeh kokoxkeh

(Mr. 1:32-34; Lc. 4:40-41)

¹⁶ Ijkuak otleyuak, okwalinwikilijkeh n Jesús miakeh non okimpiayah espíritus amokualteh. Iwa ika itlajtol okinkixti n espíritus amokualteh iwa okimpajti nochteh non omokokoayah. ¹⁷ Ijkó otlamochi tlan okikuilo n tiotlajto Isaías, ijkuak okijto: “Ye otechpajti de noch tokokolis iwa de noch tlan otechkokoaya.” ¹⁸ Is. 53:4

Non kinekih nemiskeh iwan Jesús

(Lc. 9:57-62)

¹⁸ Ijkuak Jesús okitak miakeh tlakah okiyawalojtokah, okinnawati itlamachtijkawah makikojchalwikah n lago. ¹⁹ Pero se tlamachti omikuani ixpa Jesús iwa okili:

—Tlamachti, nias mowa san kan ik tejwatsi tias.

²⁰ Jesús okinankili:

—N ostomeh mochantiah ijtik inkuyok, iwa n totomeh kipiah intepajsol, pero Ne Non onimochi ni tlakatl amo nikpia kan nimosewisi.

²¹ Iwa seme de itlamachtijkawah okili:

—Noteko, achto techonikawili maniktooka nota.

²² Pero Jesús okili:

—Xiliki nowa, iwa xikinkawa non miktokeh makintookakah inmikenwah.

Jesús kitlakawaltia n ejekatl iwa n atl

(Mr. 4:35-41; Lc. 8:22-25)

- ²³ Jesúis iwa itlamachtijkawah otlejkokeh itech barka iwa oyajkeh.
²⁴ San nima owala se ejekatl chikaktik iwa n atl opé motlatlawiteki itech barka iwa opé atemi. Pero Jesúis okochtoka.
²⁵ Ijkuakó itlamachtijkawah okijxititoh, iwa okilijkeh:
—¡Toteko, techmakixti! ¡Tiapolak tokeh!
²⁶ Ye okinmili:
—¿Tleka nonmomojtiah? ¡Wel achitsi nomotlaneltokalis!
Jesúis owalmóketski iwa okitlakawalti n ejekatl iwa n atl, iwa san owaltlamoka.
²⁷ Omotlajtlachialtijkeh iwa okijoayah:
—¡Akí nin tlakatl, porke asta n ejekatl iwa n atl kitlakitah!

*Jesúis kimpajtia ome tlakah non okimpiayah espíritus amokualteh
(Mr. 5:1-20; Lc. 8:26-39)*

²⁸ Jesúis okalakito inakastla n lago, itech tlalmeh de gadarenos. Ome tlakah non okimpiayah demóniojteh owalkiskeh kan ik tooktokeh non yomikeh iwa okinamikikoh. Yejwah saikpanoa otemomojtiyah, yika amaka opanoaya itech neká ojtli. ²⁹ Iwa opé tsajtsih:

—¿Tlan tikneki towah Jesúis Tekone de Dios? ¿Otiwala otechtlijyowiltiko maya ayamó walajsi n iksemi tonati?

³⁰ Ik ompa okintlakaultijtokah sikimeh pitsomeh. ³¹ Iwa n espíritus amokualteh okitlatlautijkeh n Jesúis:

—Tla techkixtis, techtitlani inmijtik pitsomeh.

³² Ijkuakó Jesúis okinmili:

—Xiwiah.

N espíritus amokualteh okiskeh iwa okalakeh inmijtik nekateh pitsomeh. Iwa n pitsomeh omokajkawatoh ijtk atl iwa omijmikeh.

³³ Non okintlakaultijtokah n pitsomeh ocholojkeh, iwa ijkuak okalakitoh kan altepetl opé tetlapowiah de noch iwan otlamochi, iwa nekateh ome tlakah non okimpiayah espíritus amo kualteh. ³⁴ Ijkuakó nochteh n tlakah de Gadara okitatoh n Jesúis, iwa ijkuak okitakeh, okitlatlautijkeh makinkajtewa intlalwah.

9

*Jesúis kipajtia se tlakatl non oikximijmiktoka
(Mr. 2:1-12; Lc. 5:17-26)*

¹ Ijkuakó Jesúis otlejkok itech se barka iwa okojchalwi n lago, iwa owalmókopki kan altepetl de Capernaúm kan Ye ochantitoka. ² Sikimeh tlakah okiwalikiliayah se tlakatl n Jesúis. Ye owetotiwalaya ipan ikochpetl porke oikximijmiktoka. Ijkuak Jesúis okimitak kenjki otlaneltokayah nonteh tlakah, okili n kókoxki:

—Ximoyolchikawa nokone, motlajtlakolwah ya tlapojpolwitokeh.

³ Ijkuakó sikimeh non kitemachtiah itlanawatil Moisés okimolijkeh: “Kixpanawia Dios ika tlan okijo. Ye tlajtoa kemi yetoskia Dios.” ⁴ Jesúis okimatia tlan okimoliayah itech inyolo, yika okinmili:

—¿Tleka nonkimoliah tlan amo kuali itech nomoyolo? ⁵ ¿Tlan okachi amo owi se kijtos: “Motlajtlakolwah ya tlapojpolwitokeh”, noso: “Ximewa iwa xinejnemi”? ⁶ Pero xikmatikah, Ne Non onimochi ni tlakatl, nikpia tekiwajyotl itech nin tlaltíkpaktli para nikintlapojpolwis intlajtlakolwah n tlakah.

Ijkuakó okili n tlakatl non oikximijmiktoka:

—Ximewa, xikajkokui moperli iwa xio mocha.

⁷ N kókoxki owalmóketski iwa oyá icha. ⁸ Ijkuak n tlakah okitakeh ya nejnemi n kókoxki, omomojtijkeh iwa opé kiweiyikachiwah Dios, porke okimák tekiwajyotl n tlakah.

*Jesús kinotsa Mateo mayeto itlamachtijkau
(Mr. 2:13-17; Lc. 5:27-32)*

⁹ Ijkuak Jesús yokistiyaya de Capernaúm, okitak se tlakatl non itoka Mateo. Ye okololoaya impuesto para n tekiwa de Roma. Jesús okili:

—Xiwiki nowa.

Mateo owalmóketski, iwa oyá iwan Jesús.

¹⁰ Satepa, Jesús iwa itlamachtijkawah otlakuajtokah icha n Mateo. Miakeh tominooololojkeh iwa oksikimeh tlajtlakolejkeh noiva ompa otlakuajtokah inwah. ¹¹ Ijkuak sikimeh fariseos okitakeh n Jesús otlakuajtoka inwah, okinmilijkeh itlamachtijkawah:

—¿Tleka nomotlamachti tlakua iwan tominoololojkeh iwan tlajtlakolejkeh?

¹² Jesús okinkak iwa okinmili:

—Akimeh amo mokokoah mach kinekih se tepajti, yej non mokokoah. ¹³ Xiwiah iwa kuali xikkajsikamatikah tlan kijtosneki itlajkuilol Dios: “Ne nikneki xiteknomatikah iwa amo techinmiktilikah yolkameh.” ^{Os. 6:6} Porke amo onikinnotsako n yolchipawakeh, yej n tlajtlakolejkeh para ayakmó matlajtlakolchiwakah.

*Kitlajtlaniah n Jesús tleka sikimeh mosawah iwa oksikimeh amó
(Mr. 2:18-22; Lc. 5:33-39)*

¹⁴ Ijkuakó itlamachtijkawah n Juan Bautista omijuanikeh inawak Jesús iwa okitlajtlanijkeh:

—¿Tleka tejwah iwa n fariseos timosawah iwa motlamachtijkawah, amó?

¹⁵ Jesús okinmili:

—¿Kox weletis moyolkokojtoskeh itlatlalwilwah n novio ikuak ye ok kajki inwah? Wits tonati ikuak n novio ayakmó yetos inwah, ikuakó mosawaskeh.

¹⁶ 'Amaka kitlamania se itlake non ya wewe ika se yankuik tsótсоли, porke n yankuik tsótсоли mokototsoa iwa kitsomonia n tlakemtl non ya wewetsi, iwa okachi weyi tsomoni. ¹⁷ Nion amaka kitlalia n yankuik vino itech se kuilambre ya wewetsi, porke tla ijkó nonkichiwah n kuilambre tsomonis. Ijkuakó n vino toyawi iwa n kuilambre sa motlamotla. Yika, xiktlalikah n yankuik vino itech se yankuik kuilambre, ijkó san ken ome wejkawaskeh.

*Ichpoch n Jairo iwa n siwatl non okitelkoli itlake n Jesús
(Mr. 5:21-43; Lc. 8:40-56)*

¹⁸ Ijkuak Jesús ijkó okinmilijtoka n tlakah, owala se tlayákanki de se sinagoga,* omotlankuaketski ixpa n Jesús, iwa okili:

—Nochpoch tlamitsi omikki, pero tla tejwatsi tiwits nochta iwa tiktlalis moma ipa, moyolitis.

¹⁹ Jesús omóketski, Ye iwa itlamachtijkawah oyajkeh icha non tlayákanki.

²⁰ Ijkuakó se siwatl non yokipiaya májtlaktli iwa n ome xiwitl kókoxki ika esmi-lawálistli, omijuani ik ikuilapa n Jesús iwa okitempantelkoli itlakeh. ²¹ N siwatl okimoliaya: “Tla san niktempantelkolis itlake, niwalpajtis.” ²² Jesús omókopki, okitak n siwatl iwa okili:

—Ximoyolchikawa nokone, motlaneltokalis omitspajti.

Itech non ora n siwatl opajtik.

²³ Ijkuak Jesús okalakito icha n tlayákanki, okinmitak n tlapitskeh, iwa non otetlajpalotoh sa tlawel omopajsolotokah. ²⁴ Ijkuakó Jesús okinmili:

—Xikisakah, nin takotsi amo omikki, san kochtok.

N tlakah san okiwetskakeh n Jesús. ²⁵ Pero ikuak Jesús okinkixti nochteh, okalak iwa okonmakitski n takotsi, iwa ye owalme. ²⁶ Iwa tlan otlamochi omoma itech nekateh tlalmeh.

Jesús kimpajtia ome tlakah non amo tlachiah

* 9:18 Sinagoga: se kali kan omoololoayah n judíojeteh nochí sábado

²⁷ Ijkuak Jesús okistiaya de ompa, ome tlakah non amo tlachiah okitokayah iwa okitsajtsilijtiayah:

—Techiknomati ikone n rey David!

²⁸ Ijkuak Jesús okalak itech kali, nonteh tlakah non amo otlachiayah okajsitoh. Jesús okintlajtlani:

—Nonkineltakah weletis nomechpajtis?

Yejwah okilijkeh:

—Ejé Tejwatsi.

²⁹ Ijkuakó Jesús okintelkoli inmixtololowah iwa okinmili:

—Mamochiwa ijkó kemi nomejwah nonkineltakah.

³⁰ Iwa yejwah owaltlachixkeh. Jesús kuali okinnajnwati:

—Xikkakikah, amaka xikilikah.

³¹ Pero ijkuak owalkiskeh, opé sentetl tetlapowiah tlan Jesús okichi inwah.

Jesús kipajtia se tlakatl non amo tlajtoa

³² Ijkuak yejwah okistiayah, sikimeh tlakah okwalikiljkeh n Jesús se tlakatl non amo otlajtoaya. Ye okipiaya se espíritu amokuali. ³³ Ijkuak Jesús okikixti n espíritu amokuali, n tlakatl owaltlajto. N tlakah sa tlawel omotlajtlachialtijkeh iwa okimoliayah:

—Amayik ijkó motikah itech tlali de Israel.

³⁴ Pero n fariseos okijtoayah:

—Kinkixtia espíritus amokualteh ika itekiwajyo n amokualitlakatl.

Jesús kinmiknomati n tlakah

³⁵ Jesús onentinemia itech nochteh n wejweyi altepemeh iwa itech altepetsitsinteh iwa okinmachtiaya n tlakah itech insinagogas. Okitematiltiaya n kualitlajtoli, iwa okimpajtiaya n tlakah de nochí inkokolis iwa inkualolis. ³⁶ Ijkuak Jesús okimitak n tlakah, okimiknama ken sa tlawel osotlawatokah iwa oyetokah inselti kemi ichkameh non amo kipiah tlajpixki non kinyakanas. ³⁷ Ijkuakó okinmili itlamachtijkawah:

—Onkateh miakeh tlakah non moneki makikakikah notlajtol, pero amo onkateh miakeh tlakah akimeh moneki makitematiltikah notlajtol. Onka miak tekitl para mopixkas, pero amo onkateh miakeh akimeh pixkaskeh. ³⁸ Yika, xiktlajtlanilikah Dios n Tekowa de kan se pixkas, makintitlani miakeh tekitkeh para mapixkakih.

10

Jesús kimpejpena májtlaktli iwa n ome itlamachtijkawah

(Mr. 3:13-19; Lc. 6:12-16)

¹ Jesús okínnotski májtlaktli iwa n ome (12) itlamachtijkawah iwa okinmák tekiwajyotl para makinkixtikah espíritus amokualteh iwa para makimpajtikah n tlakah de nochí kokólistli iwa kualólistli. ² Yejwah ninteh intokah n májtlaktli iwa ome itlamachtijkawah.

Achto okínnotski n

Simón non nojwa itoka Pedro

iwa ikni Andrés,

Jacobo itelpoch Zebedeo

iwa ikni Juan,

³ Felipe,

Bartolomé,

Tomás,

Mateo n tominooololo,

Jacobo ipiltsi n Alfeo,

Tadeo,

⁴ Simón, non tewa Kananista, iwa

Judas Iscariote non satepa okitemakti n Jesús.

Jesús kintitlani itlamachtijkawah

(Mr. 6:7-13; Lc. 9:1-6)

⁵ Jesúś okintítlanki ninteh májtaktli iwa ome itlamachtijkawah iwa okinnajnawati:
—Amo xiwiah kan amo judíojteh, nion xikalakikah kan altepemeh de Samaria.
⁶ Sanwel xikintemojtiwiah n tlakah de Israel non moixpolojtinemih kemi ichkameh.
⁷ Xiwiah, iwa xikinmatiltijtiwiah yoajsiko n tonati ikuak Dios pewas nomechnawatis.
⁸ Xikimpajtikah n kokoxkeh, xikinyolitikah non yomikkeh, xikinchipawakah akimeh kipiah lepra, iwa xikinkiktigah espíritus amokualteh. San iki ononkiselijkeh, san iki xiktemakakah.

⁹ 'Amo xikwikakah tomi, ¹⁰ nion nomotlaxkal. Sanwel se nomotlakeh xikwikakah. Amo xikinwikakah oksikimeh nomokakkuah, nion nomobasto, porke akin tekiti kimotlanilia itlakual.

¹¹ Ikuak nonkalakitiweh itech se weyi altepetl noso altepetsintli, xiktemokah aka kuali tlakatl non manomechyekseli icha. Ompa ximokalotijtokah asta ikuak nonyaskeh ok se altepetl. ¹² Iwa ikuak nonkalakiskeh itech se kali, xontetlajpalokah. ¹³ Tla n chanejkeh nomechyekseliah, kiselskeh nomoyolsewilis, pero tla amo nomechyekseliah, nomoyolsewilis mokopas nomowah. ¹⁴ Iwa tla amo nomechseliah nion kikah nomotlajtol, xikisakah de non kali noso de non altepetl iwa ximoikxitsejtselokah. ¹⁵ De milajka nomechilia, itech iksemi tonati, Dios okachi kitlaijyowiltis non altepetl ke non ochantitokah itech altepemeh de Sodoma iwa Gomorra.

*Non kineltokah Dios kintlawelitah
(Mr. 13:9-13; Lc. 21:12-19)*

¹⁶ 'Techkakikah! Ne nomechtitlani kemi ichkameh intsalko kokoyomeh. Kuali xijsatokah kemi koameh pero noiva xiyetokah non yolyamankeh kemi palomajtsitsinteh.

¹⁷ Kuali ximotlachilikh, porke n tlakah nomechtemaktiskeh inmak tekiwajkeh, iwa nomechtsonwitekiskeh kan sinagogas. ¹⁸ Por non nechneltokah, nomechkawatiweh ipan wejweyi tekiwajkeh iwan wejweyi tlanawatijkeh. Ijkó nomejwah nonkitetlapowiskeh notlajtol inmixpah, iwa inmixpa non amo judíojteh. ¹⁹ Pero ikuak nomechtemakaskeh inmak tekiwajkeh, amo ximotekipachokah tlan nontlajtoskeh noso tlan nonkijtoskeh. Porke itech non ora Dios momechilis tlan nonkijtoskeh. ²⁰ Amo nomejwah nontlajtoskeh, yej Iespíritu Nomotajtsi akin tlajtos nomotech.

²¹ 'N teikni kitemaktis ikni makimiktikah, iwa n teta kitemaktis ikone makimiktikah. N tepilwah kinmixnamikiskeh intajwah iwa kintemaktiskeh makinmiktikah. ²² Nochteh nomechkokoliskeh por nonkitematiltiah Notoka, pero akin kixikos noch, Dios kimakixtis. ²³ Ikuak nomechtotojtokaskeh itech se altepetl, xicholokah iwa xiwiah kan ok se. De milajka nomechilia: mach tlamic nonpapanotinemiskeh itech nochteh n altepemeh de Israel, porke acho nikalakiki Ne Non onimochi ni tlakatl.

²⁴ 'Se momachti amo kixpanawia itlamachi iwa se tlakéwali amo kixpanawia iteko. ²⁵ Se momachti yolpaki ikuak motlami kemi itemachti, iwa n tlakéwali kemi iteko. Tla itech se kali, n teta kitokayotiah beelzebú, jnoiva ichantlakawah ijkó kinnotsaskeh!

*Akin moneki tikmawiliskeh
(Lc. 12:2-9)*

²⁶ 'Yika, amo xikinmawilikah n tlakah. Porke noch tlan tlatitok satepa nesis, iwa noch tlan amo momati saman momatis. ²⁷ Tlan nomechilia de yuak, nomejwah xiktematiltikah ikuak tlanestok. Iwa tlan Ne nomechilia ichtaka, xiktematiltikah chikawak. ²⁸ Amo xikinmawilikah akimeh weletis nomechmiktiskeh, porke maya manomechmiktikah, mach weletis kixpoloskeh nomoalma. Yej xikiimakajsikah Dios Akin weletis kixpolos nomokuerpo iwa nomoalma kan miktlá.

²⁹ 'Omeh tototsitsinteh monamakah ika se tomi, pero nion se de yejwah weleti wetsi ixko tlali tla Totajtsi Dios amo kitekawilia. ³⁰ Noiva Dios kuali kimatok kech tsónkali nonkipiah itech nomotsonteko. ³¹ Yika, amo ximomojtkah, porke nomejwah okachi nomopatih ke miakeh tototsitsinteh.

*Moneki se matlajito de Cristo teixpa
(Lc. 12:8-9)*

³² 'Tla aka kijtos inmixpa n tlakah, Ne Iteko, Ne noiwa nikijtos ye noaxka ixpa n Notajtsi non kajki ilwikak. ³³ Iwa tla aka kijtos teixpa, amo nechixmati, Ne noiwa nikijtos ixpan Notajtsi non kajki ilwikak amo nikixmati.

N tlakah moxexeloskeh por Cristo Jesús

(Lc. 12:51-53; 14:26-27)

³⁴ 'Amo xikmolikah Ne onikwalík yolsewílistli. Amó, yej Ne onikwalík tlanetéwili. ³⁵ Ne oniwala para n tepiltsi kixnamikis ita, n teichpoch kixnamikis ina, iwa n montli kixnamikis imona. ³⁶ Nomokokolikniyah yetoskeh non chanchiwah nomowah. *Miq. 7:6*

³⁷ 'Akin kitlasojtla ita noso ina okachi ke Ne, amo makimoli nika íwa. Iwa akin kitlasojtla ipiltsi noso ichpoch okachi ke Ne, amo makimoli nika íwa. ³⁸ Iwa akin amo kinekis kiselis tlaijywílistli itech inemilis iwa amo kinekis nowan yas,* mach keman yetos noaxka. ³⁹ Akin kimalwia inemilis kixpolos, pero akin kipolos inemilis por nechneltoka, kajsis n milája nemílistli.

Tlatliokólilteh
(Mr. 9:41)

⁴⁰ 'Akin nomejwah nomechsilia, Ne nechsilia, iwa akin Ne nechsilia, noiwa kiselia Akin onechaltítlanki. ⁴¹ Akin kiselia se tiotlajto, kiselis itlatliokolil kemi non kiselia n tiotlajto. Iwa akin kiselia se tlakatl non kichiwa tlan Dios kineki, kiselis itlatliokolil kemi ye. ⁴² Iwa akin kitliokolis maya san siki atl, seme de ninteh notlamachtijkawah tsitsikitikeh, de milajka nomechilia amo kipolos itlatliokolil.

11

Juan Bautista kintitlani ome itlamachtijkawah kan Jesús
(Lc. 7:18-35)

¹ Ijkuak Jesús yokinnajnawati tlan kichiwaskiah n májtlaktli iwa ome itlamachtijkawah, oyajki de ompa. Iwa kan okalakito opé tetlapowia de itlajtol Dios itech nonteh altepemeh. ² Ijkuak Juan otsaktoka, okima tlan okichiwaya n Cristo iwa okintítlanki ome itlamachtijkawah. ³ Iwa okitlajtlanitoh:

—¿Tejwatsi non tiwalaskia, noso tikchiaskeh ok se?

⁴ Jesús otlanankili:

—Xiwiah iwa xikilikah n Juan nochí tlan nonkitah iwa nonkikakih. ⁵ Xikilikah, non amo tlachiah ya tlachiah,
n koxomeh, ya kuali nejnemih
iwa non okipiayah lepra, yochipawakeh.
Non amo otlakakiah, ya tlakakih,
non omikkeh, yomoyolitijkeh,
iwa n próbesteh kinmatiltiah n kualitlátjoli de Dios.

⁶ Miak pakílistli kipias non kimawistetepewa por Ne.

⁷ Ijkuak itlamachtijkawah n Juan oyajkeh, Jesús okintlapowi de Juan non ompa okatkah, iwa okinmili:

—¿Tlan ononkitatoh kan amaka chantí? ¿Se akatl non kolinia n ejekatl? ⁸ ¿Tlan para ononyajkeh? ¿Ononkitatoh se tlakatl non okonakiaya itlake non kuali? Nomejwah kuali nonkimatokeh, n tlakah non konakiah kuali intlakéh kateh incha n reyes. ⁹ Pero ¿tleka ononkiskeh? ¿Ononkitatoh se tiotlajto? Milák, ye okachi weyi ke se tiotlajto. ¹⁰ Itlajkuilol Dios tlajtoa de Juan ijkuak kijtoa:

Ne niktitlani notlatematilti sa matlayakana,
para mamitsmajmanili n ojli.

Mal. 3:1

¹¹ De milajka nomechilia asta axa itech nin tlaltípkaktli amo onka ok se tlakatl kemi Juan Bautista. Pero non okachi tsjitsikitsi non kajki ilwikak kan Dios tlanawatia, ye okachi weyi ke Juan.

* 10:38 N griego kijtoa: Xikonana mokrus iwa xiwiki nowa.

¹² Ijkuak owala Juan Bautista iwa asta axa, itlajtol Dios chikawak nejnentok itech nin tlali. Iwa non okachi mochijchikawah yejwah kalakih kan Dios tlanawatia. ¹³ Nochteh n profetas iwa itlajkuilol Dios otlajtojkeh de Juan. ¹⁴ Iwa tla nonkinekih nonkineltokaskeh, Juan ye n profeta Elías non walaskia.

Mal. 4:5

¹⁵ 'Akin de milajka kipia inakas, makajsikamati!

¹⁶ 'Nomejwah axa nonnemih kemi n pípilteh non motlaliah iwa nonmawiltiah tiánkistli, iwa kintsajtsiliah oksikimeh, ¹⁷ iwa kinmiliah: "Otomechtlapichilijkeh iwa amo ononmijtotijkeh. Otomechtluakuilijkeh se tlakuikali teyolkoko iwa amo ononchokakeh." ¹⁸ Porke owala Juan, non amo otlakuaya nion okonia vino, iwa nomejwah ononkijtojkeh kipia se espíritu amokuali. ¹⁹ Otlanki Ne oniwala Non onimochi ni tlakatl. Ne nitlakua iwa nikoni vino iwa nomejwah nonkijtoah tlawel niápistli iwa nitláwanki. Noiwa nonkijtoah nimowika iwan tlajtlakolejkeh iwa n tominooololojkeh. Pero ixtlamatilis Dios moixmati ika tlan kichiwah ipilwah akimeh kitlakitah.

jNon miálmasteh!

(Lc. 10:13-15)

²⁰ Ijkuakó Jesús opé kinmajwa n tlakah non ochantitokah itech altepemeh kan okinchi miakeh milagros. Porke n tlakah non ompa ochantitokah mach omoyolpatlayah inawak Dios.

²¹ —¡Miálmasteh tlakah de altepetl de Corazín! ¡Nonpróbesteh tlakah de Betsaida! Tla n milagros non omochijkeh nomonawak mochiwaskiah itech altepemeh de Tiro iwa Sidón, yowejka moyolpatlaskiah, iwa nonmotlakentiskiah ika nomotlakeh wapaktik iwa nonmokuatlekexwiskiah. ²² Pero ijkuak ajsiki n iksemi tonati ijkuak Dios kintlajtlakoltis, nomejwah tlakah de Corazín iwa Betsaida, okachi nontlaijyowiskeh ke non de Tiro iwa Sidón. ²³ Iwa nomejwah tlakah de Capernaúm, ¿non kimoliah nonyaskeh ilwikak? ¡Sanenka! Nomejwah nonyaskeh miktla. Porke tla kan altepetl de Sodoma mochiwaskiah n milagros non omochijkeh nomonawak, non weyi altepetl asta axa yetoskia. ²⁴ Pero Ne nomechilia, ijkuak kalakiki n iksemi tonati ijkuak Dios kintlaijyowiltis, nomejwah tlakah de Capernaúm okachi nomechtlaijyowiltiskeh ke n tlakah de Sodoma.

Xiwikh nonawak iwa ximosewika

(Lc. 10:21-22)

²⁵ Non tonati, Jesús okijo:

—Tlasojkamati miak Notajtsi, Tejwatsi Ti Tekowa de ilwikak iwa de nin tlaltíkpaktli, porke nochi ni otikintlaatili n ixtlamatkeh iwan teajsikamatkeh iwa otikinnextili non tsitsikitikeh. ²⁶ Ijkó Notajtsi, ijkó Tejwatsi satlawel omitspakti.

²⁷ 'Notajtsi yonechmactili maniknawati nochi tlan onka. Amaka nechixmati kemi Ikone Dios, sanwel Notajtsi. Nion amaka kixmati Notajtsi, sanwel Ne iwa nekateh tlakah akimeh Ne niknekis makixmatikah. ²⁸ Xiwikh nonawak nonnochteh akimeh tekith chikawak iwa yononsotlawakeh, iwa Ne nomechsewis. ²⁹ Xikwikakah notlamamal, iwa xikchiwakah tlan Ne nikchiwa, porke Ne niyolyámanki iwa niteiknoma. Iwa nonkajsiskeh yolsewfílistli itech nomoyolo. ³⁰ Porke n tektil non Ne nikneki xikchiwakah amo owi se kitlakitas, iwa tlan Ne nomechnawatia, noiwa amo tesotla.

12

Itlamachtijkawah n Jesús miawatekih itech sábado ijkuak mosewia n judíos

(Mr. 2:23-28; Lc. 6:1-5)

¹ Se sábado ijkuak mosewia n judíos, Jesús iwa itlamachtijkawah opajpanotiayah kan ik tlatoooktok. Itlamachtijkawah owalkitlatlaked iwa opé miawatekih, okoxkeh n xinatsintli iwa opé kikuah. ² Ijkuak n fariseos okimitakeh, okilijkeh n Jesús:

—Xikinmita, motlamachtijkawah kichijtokeh tlan amo techkawilia totlanawatil matikchiwakah itech sábado.

³ Pero Jesús okinmili:

—¿Ayamó nonkiamapoah tlan okichi n rey David keman owalxitlatlak ye iwa non oyayah íwa? ⁴ Okalakeh ikal Dios, iwa David iwa non iwa oyayah okinkuajkeh n pameh tlatiochíwalteh non okinmanilijkah Dios. Nonteh pameh mach para kinkuaskia yejwah, yej sanwel n tiopixkeh.* ⁵ ¿Noso ayamó nonkiamapoah tlan kijtoa itlanawatil Moisés, n tiopixkeh noiya itech nochí sábado ijkuak moneki se mamosewi, tekitih kan Weyi Tiopa? Yejwah mach mosewiah non tonati, iwa maya tekitih, amo kichiwah tlajtlácoli. ⁶ Pero Ne nomechilia, axa nika nika Ne Non okachi niweyijkatitok ke n Weyi Tiopa. ⁷ Nomejwah amo nonkajsikamatih tlan kijtosneki itlajkuilol Dios: “Ne nikneki xiteiknomatikah iwa amo san xipewakah techinmiktilikah yokameh.” ^{Os. 6:6} Amo nonkintlajtlakoltiskiah non amo tlajtlakolejkeh. ⁸ Kuali xikmatikah Ne Non onimochi ni tlakatl nitlanawatia itech sábado.

Jesús kipajtia se tlakatl non omapitswak

(Mr. 3:1-6; Lc. 6:6-11)

⁹ Jesú斯 oyá de ompa iwa okalakito kan se sinagoga. ¹⁰ Ompa okatka se tlakatl non omapitswak, iwa kemi n fariseos okitlajtoltemoliyah n Jesú斯 para ika weletis kiteiliskeh, okitlajtlanijkeh:

—¿Motekawilia mamotepajti itech n sábado ijkuak moneki se mamosewi?

¹¹ Jesú斯 okinnankili:

—Tla aka de nomejwah kipia se ichka non mopo soywia itech sábado, ¿amo konkixtia?

¹² ¡Okachi ipati se tlakatl ke se ichka! Yika, tejwah kema weletis tikchiwaskeh tlan kuali ipan sábado.

¹³ Ijkuakó Jesú斯 okili n tlakatl:

—Xikmilawa moma.

Iwa ijkuak okimila ima, opajtik iwa omoka kuali kemi non ok se ima. ¹⁴ N fariseos okiskeh iwa opé motlatlalwiah para kipojpoloskeh n Jesú斯.

Dios kipejpena n Jesú斯

¹⁵ Ijkuak Jesú斯 okima tlan okinekiah kitoktiskeh, oyá de ompa, iwa miakeh tlakah oyajkeh íwa. Jesú斯 okimpajtiaya nochteh non omokokoayah, ¹⁶ iwa okinnajnawatiaya amo makijtokah Akin Ye. ¹⁷ Ijkó otlamochi kemi okijuilo n tiotlajto Isaías:

¹⁸ Nika kajki notékipano Akin Ne onikpéjpenki, notlasoj Akin kiyolpaktia noalma.

Niktlalis Noespíritu itech Ye, iwa Ye kinmatiltis nochteh n tlaltikpaktlakah keniji kipiah de yeknemiskeh.

¹⁹ Amo mokualanijtos nion tsatsajtsis, nion amaka kikakis itlajtol itech ojtli.

²⁰ Nion se akatl non yoxámanki kipostekis, iwa n tláwili non san achitsi xotlatok, amo kisewis, asta mamochiwa nochí tlan kuali kemi Ye kineki.

²¹ Iwa itech Itoka, nochteh non amo judío jteh inawak moyolchikajtoskeh. ^{Is. 42:1-4}

Kiteiliah n Jesú斯 iweletilis walewatok de beelzebú

(Mr. 3:19-30; Lc. 11:14-23; 12:10)

²² Ijkuakó okwalikilijkeh n Jesú斯 se tlakatl non amo otlachiaya nion otlajtoaya iwa okipiaya se espíritu amokuali. Jesú斯 okipajti, iwa n tlakatl owatláchixki iwa owatlajto.

²³ Nochteh n tlakah omotlajtlachialtijkeh iwa okijoayah:

—¿Yetos ni, ikone n rey David?

²⁴ Keman n fariseos ijkó okikakeh, okijojkeh:

—Nin tlakatl kinkixtia n espíritus amokualteh ika iweletilis beelzebú, non kinnawatia n espíritus amokualteh.

²⁵ Jesú斯 okimatia tlan yejwah okimoliayah, yika okinmili:

* 12:4 pameh tlatiochíwalteh: Nochi sábado n tiopixkeh okinkuayah n pameh non olaatitokah itech Weyi Tiopa iwa okintlaliyah oksikimeh yankuikeh.

—Tla n tlakah de se país pewas momijmiktiskeh san yejwah, non país pojpoliwis. Iwa tla se altepetl noso se familia noiwa pewa moxexeloa, sa nima xitinis. ²⁶ Ijkó noiwa, tla satanás iselti kinkixtijtok n espíritus amokualteh, san ye inewia moixnamiki iwa san nima pojpoliwis. ²⁷ Tla nomejwah nonkijtoah Ne nikinkixtia espíritus amokualteh ika iweletilis beelzebú, ¿akin kinmaka weletílistli nomotlamachtijkawah ikuak kinkixtiah espíritus amokualteh? Yika, yejwah makijtokah kox milák noso amo milák tlan nomejwah nonkijtoah. ²⁸ Pero tla Ne nikinkixtia n espíritus amokualteh ika iweletilis iespíritu Dios, noni kijtosneki Dios yopé tlanawatia nomonawak.

²⁹ '¿Weletis aka kalakis icha n se tlakatl non chikaktik iwa kikixtilis tlan kipia? Sanwel tla acho kijlpia, ikuakó ya weletis kitlachtekis.

³⁰ 'Akin amo kajki nowa, nechixnamiki. Iwa akin amo nowa pixka, tlaxixitsa.

³¹ 'Yika nomechilia, Dios nomechintlapojpolwilis nochteh nomotlajtlakolwah iwa nochí tlan fiero nonkijtoskeh. Pero akin fiero kitnewas n Espíritu, Dios ayik kitlapojpolwis. ³² Iwa akin fiero nechtenewa Ne Non onimochi ni tlakatl, kitlapojpolwiskeh, pero akin fiero kitnewas n Espíritu Santo, ayik kitlapojpolwiskeh, nion axa, nion satepa.

*Se kuawitl moixmati ika tlan kitemaka
(Lc. 6:43-45)*

³³ 'Se kuali kuawitl kitemaka kuali itlakilo, tla n kuawitl amo kuali, noiwa kitemaka itlakilo amo kuali. Nochi kuawitl moixmati ika tlan kitemaka. ³⁴ ¡Nomejwah nonkichiwah ken koameh! ¿Konomi weletis nonkijtoskeh tlan kuali, tla nomejwah amo non kualteh? Porke tlan kitemitijtok toyolo ye tlan tikijtoah. ³⁵ Se kuali tlakatl kikixtia tlan kuali kitlaatitok itech iyolo. Pero n tlakatl amo kuali, kikixtia tlan amo kuali kitlaatitok itech iyolo. ³⁶ Ne nomechilia, itech iksemi tonati, ikuak Dios tlaixkomakas, nochteh nomejwah nonkimokuitiskeh nochí tlájtoli tlan amo kuali ononkijtokeh. ³⁷ Porke ika tlan tikijtoah mitslajtlakolmakaskeh, iwa kijtoskeh kox titlajtlakole noso amó.

*Kitlajtlaniliah Jesús se milagro
(Mr. 8:11-12; Lc. 11:29-32)*

³⁸ Ikuakó sikimeh tlamachtijkeh iwa n fariseos okilijkeh n Jesús:

—Tlamachti, tiknekih tikitaskeh se milagro.

³⁹ Jesús okinnankili:

—N tlakah tlajtlakolchijkeh kitlajtlanih se milagro. Pero mach ok nikinmititis ok se, sanwel tlan yopanok n profeta Jonás. ⁴⁰ Iwa ijkó kemi Jonás okatka eyi tonati iwa eyi yúali ijistik se weyi michi, noiwa Ne Non onimochi ni tlakatl, niyetos eyi tonati iwa eyi yúali ijistik tlali. ⁴¹ N tlakah non ochantitokah Nínive moyolitiskeh itech iksemi tonati, iwa nomechtajtlakoltiskeh porke yejwah okikajkeh n Jonás iwa omoyolpatlakeh ikuak okinmatilti tlajtol Dios. Axa Ne Non nika nika, okachi weyi ke Jonás. ⁴² Noiwa n reina non walewatok kan tlali de Sabá moketsas itech iksemi tonati iwa nomechtajtlakoltis, porke wejka owalewak okikakiko n Salomón, non satlawel ixtlamati, pero nika ka se non okachi weyi ke Salomón.

*N espíritu amokuali non walmokopa
(Lc. 11:24-26)*

⁴³ Ikuak se espíritu amokuali kisa ijistik se tlakatl, nentinemi kan tlawakah kitemojtinemi kan mosewis, iwa ken amo kajsi ⁴⁴ kimolia: "Nimokopas oksepa itech neká tlakatl kan oníkiski." Iwa ikuak mokopa, konajsi n tlakatl kemi se kali kan amaka chanchiwa, kuali ichpantok iwa tlaajachitok. ⁴⁵ Satepa yawi kualinnotsat chikome espíritus non okachi amokualteh, iwa nochteh kalakih ijistik non tlakatl iwa mochantiah. Satepa non tlakatl mokopa okachi amokuali. Ijkó mochiwaskeh n tlajtlakolejkeh non axa nentinemih.

*Imamá iwa iknihwah n Jesús
(Mr. 3:31-35; Lc. 8:19-21)*

⁴⁶ Jesúś ok okintlapowijtoka n tlakah, imamá iwan ikniwah oajsito kan Ye okatka pero omokajkeh kala, porke okinekiah motlapowiskeh íwa. ⁴⁷ Ijkuakó se tlakatl okilito:

—Jesúś, momamá iwa mokniwah kateh kala iwa kinekih motlapowiskeh mowa. [Mt. 13:55](#)

⁴⁸ Pero Jesúś okinankili:

—¿Akin nomamá, iwa akimeh nokniwah?

⁴⁹ Okinmajpilwi itlamachtijkawah iwa okijo:

—Yejwah ninteh nomamá iwa nokniwah. ⁵⁰ Akin kichiwa tlan kimonekiltia Notajtsi Dios non kajki ilwikak, ye nokni, nowelti iwa nomamá.

13

Se tlakatl non otook (Mr. 4:1-9; Lc. 8:4-8)

¹ Non tonati Jesúś okiski kan okalotitoka iwa omotlalito itempa n lago. ² Ken miaktikeh omoololojkeh, Jesúś omonek tlejkos ipan se barka iwa omotlali, iwa nochteh n tlakah omokajkeh itempa n lago. ³ Jesúś opé kinmachtia ika tlapoálishteh, iwa okinmiliaya:

—Se tlakatl oyá iwa otook. ⁴ Ijkuak otook, siki xínachtli owetski ojtentli, iwa ovalajkeh n totomeh iwa okikuajkeh. ⁵ Oksiki owetski kan tlateyo, kan san pánixko okipiaya tlali. Non xínachtli sa nima oixwak porke n tlali amo tilawak. ⁶ Pero ijkuak okiski n tonati, okuitlawik, iwa ken amo wejkatla omonelwayoti, owaki. ⁷ Oksiki owetski kan tlawitstla, omoskalti n witstli iwa n tlátoktli oijyomik. ⁸ Pero siki xínachtli owetski kan kuali tlali, iwa kuali otlaki. Siki tlátoktli okitemák se siento, oksiki eyi póali (60), iwa oksiki sempóali iwa n májtlaktli (30) por se xínachtli. ⁹ Akin kipia inakas, makajskamatí.

Jesúś kinmilia tleka ijkó tlamachtia

(Mr. 4:10-12; Lc. 8:9-10)

¹⁰ Ijkuakó itlamachtijkawah n Jesúś omíkuanijkeh inawak, iwa okitlajtlanijkeh:

—¿Tleka tikintlapowia n tlakah ika tlapoálishtli?

¹¹ Jesúś okinnankili:

—Dios nomechkawilia xikmatikah kenomi tlanawatia kan ilwikak, pero n oksikimeh amo kinkawilia makimatiyah. ¹² Yika, akin kipia okachi, okachi kimakaskeh, iwa akin amitla kipia, nochi kikixtiliskeh. ¹³ Yika, Ne nikintlapowia ika tlapoálishteh, porke maya tlachiah amo kitah, iwa maya tlakakih amo kikakih nion kajskamatih. [Ez. 12:2](#) ¹⁴ Yika, intech mochiwa tlan okijo n profeta Isaías:

Maya miak matlakakih, amo kajskamatish;

maya kuali matlachiakah amitla kajskatih.

¹⁵ Porke ninteh tlakah oyoltlakuawakeh,

omonakastsajtsakeh para amo tlakakiskeh,

iwa okintsajtsakeh inmixtololowah

para amo matlachiakah

nion matlakakih ika innakaswah,

nion kajskamatih ika inyolo,

para moyolpatlaskeh nonawak

iwa manikimpajti.

Is. 6:9-10

¹⁶ 'Mapakikah nomoixtololowah porke tlachiah, mapakikah nomonakaswah porke tlakakih. ¹⁷ De milajka nomechilia, miakeh profetas iwa tlakah yolchipawakeh okinekiah kitaskeh tlan axa nomejwah nonkitah, iwa amo okitakeh. Okinekiah kikakiskeh tlan axa nonkikakih, iwa amo okikakeh.

Jesúś kinmajsikamatiltia keman se tooka

(Mr. 4:13-20; Lc. 8:11-15)

¹⁸ 'Kuali xikkakikah tlan kijtosneki ijkuak otook se tlakatl. ¹⁹ Akimeh kikakih itlajtol Dios iwa amo kajskamatih, nonteh kemi n xínachtli non owetski itempa ojtli, wits n diablo iwa kinkixtilia itlajtol Dios non omotook itech inyolo. ²⁰ N xínachtli non

owetski intsalko temeh, yejwah non kikakih itlajtol Dios iwa sa nima kiseliah ika miak pakílistli. ²¹ Pero ken amo omonelwayoti, amo tlaxikoah. Ijkuak pewah tlaijyowiah noso kintotojtokah por okiselijkeh itlajtol Dios, walmosotlawah iwa kikawah. ²² N xínachtli non owetski kan tlawitstla, kijtosneki non kikakih itlajtol Dios, pero okachi kintekipachoa tlan onka itech nin tlaltíkpaktli iwa n tomi pewa kinmixkajkayawa. Nochi ni kijyomiktia itlajtol Dios iwa ayakmó kikawilia matlaaki. ²³ Pero n xínachtli non omotook itech kuali tlali, noni kijtosneki akin kikakih itlajtol Dios iwa kajsikamatih, iwa miak tlaakih. Siki xínachtli kitemaka mákuili poali (100) xínachtli, oksiki eyi póali (60), iwa oksikimeh kitemakah sempóali iwa n májtlaktli (30), por se xínachtli.

N sasaliksakatl non moskaltia itsalko tlátoktli

²⁴ Jesús okinmili ok se tlapoálistli:

—Ijkó noiva tlamochiwa ilwikak kan Dios tlanawatia, kemi se tlakatl non okitook itlala kuali xínachtli. ²⁵ Pero ijkuak itlakawah okochtokah, owala se tlakatl non okikokoliaya n tekowa, iwa okitookili sasaliksakatl itsajtsalko n trigo, iwa ocholo. ²⁶ Ijkuak n tlátoktli omoskalti iwa omiawatik n trigo, noiva omoskalti miak sasaliksakatl. ²⁷ Ijkuakó itlakawah okilitoh n tekowa: “Tejwatsi otikontook kuali xínachtli motlala. ¿kan ik okiski n sasaliksakatl?” ²⁸ N tekowa okinmili: “Se tlakatl non nechkokolia ijkí okichi.” Ijkuakó itlakawah okilijkeh: “¿Tikneki matikwiwitlatih n sasaliksakatl?” ²⁹ Pero inteko okinmili: “Amó, porke tla nonkiwiwitlaskeh n sasaliksakatl, weletis noiva nonkiwiwitlaskeh notrigo. ³⁰ Okachi kuali xikkawakah mamoskaltikah sansikah asta ijkuak motlatekis. Ijkuakó nikinnawatis n tlatekeh: “Achto xikololokah n sasaliksakatl, xikijilpikah para mochichinos; iwa n trigo kuali mamotlaati.”

Se xinatsintli de mostaza

(Mr. 4:30-32, Lc. 13:18-19)

³¹ Jesús noiva okinmili ok se tlapoálistli:

—Itech ilwikak kan Dios tlanawatia, noiva kemi se xinatsintli de mostaza non se tlakatl okitook itlala. ³² Nin xinatsintli ye n okachi tsjitskitsi itech nochteh n xínachteh, pero ijkuak moskaltia, okachi weyi ke se tlátookali, iwa motlami kemi se kuawitl iwa n tototsitsinteh motepajsooltiah itech.

N levadura

(Lc. 13:20-21)

³³ Jesús okinmili ok se tlapoálistli:

—Kan Dios tlanawatia noiva kemi n levadura non se siwatl okinenelo ika eyi tlatamachíwali* arina, iwa kualtsi okisama noch i textli. ^{1 Co. 5:6}

Jesús okijo tleka otlamachtiaya ika tlapoálisteh

(Mr. 4:33-34)

³⁴ Nochi ni Jesús okintlapowiaya n tlakah ika tlapoálisteh, iwa tla amo ika tlapoálisteh, amo okintlapowiaya. ³⁵ Ijkó omochi tlan okikuilo n profeta: Nitlajtos ika tlapoálisteh, niktematiltis tlan amaka okimatia desde ijkuak Dios okichijchi n tlaltíkpaktli. ^{Sal. 78:2}

Tlan kijtosneki itlapoalis n sasaliksakatl

³⁶ Jesús okinmakah nochteh non ompa okatkah. Ijkuakó okalak itech kali iwa sanima omijkuanijkeh itlamachtijkawah iwa okilijkeh:

—Techajskamatiltih tlan kijtosneki itlapoalis n sasaliksakatl.

³⁷ Ijkuakó Jesús okinnankili:

—Ne Non onimochi ni tlakatl, Ne oniktook n kuali xínachtli. ³⁸ N tetlala ye n tlaltíkpaktli. N kuali xínachtli kijtosneki yejwah iaxkawah Dios, iwa n sasaliksakatl, yejwah ipilwah n diablo. ³⁹ Non tekokolia ye n diablo akin okitook n sasaliksakatl. N tlapixkalo kijtosneki n iksemi tonati. Iwa akimeh tlatekiskeh yejwah n ángelteh.

* 13:33 eyi tlatamachíwali kemi omepóali (40) litro

⁴⁰ Yika, ijkó kemi mowiwitla n xiwitl non amo kuali iwa mochichinoa, ijkó tlamochiwas ikuak tlamic nin tlaltípkaktli. ⁴¹ Ne Non onimochi ni tlakatl nikintitlanis noangelwah, iwa kinmoololokiweh kan kateh noaxkawah akimeh kichiwah tlajtlácoli iwa akimeh kintoktiah oksikimeh makichiwakah noiwah. ⁴² Iwa kinkajkawaskeh ijtik tletl kan chokaskeh iwa tlannetsoniskeh. ⁴³ Ikuakó non yolchipawakeh, tsotlaniskeh kemi n tonati ompa kan tlanawatia Totajtsi. ¡Akin kipia inakas, makajsikamat!

N tomi non tlalpachitok

⁴⁴ 'Itech ilwikak kan Dios tlanawatia, noiwa kemi se xoktsi non kipia tomi non tlalpachitok tetlala. Ikuak se tlakatl konajsi non tomi oksepa kitlaatia, iwa ika miak pakílistli yawi kinamaka nochi tlan kipia iwa kikoa n tlali kan okajsik non xoktsi.

N perla non miak ipati

⁴⁵ 'Noiwa itech ilwikak kan Dios tlanawatia kemi se tlasémanki non kintemojtinemi perlas non patiojkeh, ⁴⁶ iwa ikuak kaksi se perla non patio, motlanajnamakia iwa kikoa non perla.

N michayatl

⁴⁷ 'Noiwa itech ilwikak kan Dios tlanawatia kemi se michayatl non michmajkeh kontlamotlah ijtik atl iwa kinmoololoa nochi michimeh. ⁴⁸ Ikuak n michayatl yotenki, n michmajkeh kikixtiah itempa n atl iwa pewa kimpejpenah n michimeh. Non kualteh michimeh konintlalah ijtik chikimeh, iwa non amo kualteh kontlamotlah. ⁴⁹ Ijkó tlamochiwas ikuak ajsiki n iksemi tonati. Kisaskeh iangelwah Dios iwa kinxexeloskeh n tlajtlakolejkeh iwan yolmilajkameh. ⁵⁰ Iwa n tlajtlakolejkeh kontlamotlaskeh ijtik tletl, kan chokaskeh iwa tlannetsoniskeh.

Tlan yankuik iwa tlan ya wewe

⁵¹ Ikuakó Jesús okintlajtlani:

—¿Nonkajsikamatih nochi tlan nomechilijtok?

Yejwah okilijkeh:

—Ejé, tikkajsikamatih.

⁵² Ikuakó Jesús okinmili:

—Ikuak se tlamachtia non kitemachtia n tlanawátili kimomachtia kenomi Dios tlanawatia kan ilwikak, mochiwa kemi se chane, ika tlan kitlatijtok kimati kikixtia itla yankuik iwa itla ya wewe.

⁵³ Ikuak Jesús otlanki okintlapowi nochi ni, oyá de ompa.

Jesús kan altepetl de Nazaret

(Mr. 6:1-6; Lc. 4:16-30)

⁵⁴ Okalakito kan ialtépeu. Ompa opé tlamachtia kan sinagoga, iwa n tlakah omotlajtachialtiyah iwa okimoliayah:

—¿Kan okajsik nochi non ixtlamatílistli? ¡Kenomi weleti kinchiwa ninteh milagros!

⁵⁵ ¿Amo ye ipiltsi n kuaujxinki? ¿Amo imamá itoka María? ¿Amo ye ikni n Jacobo, José, Simón iwa n Judas? ⁵⁶ Amo nika chanti iweltiawah. ¿Kan okikuito nochi tlan kimati?

⁵⁷ Yika, n tlakah omokuejsoayah. Pero Jesús okinmili:

—San kan yetos kitlakitah se profeta, pero itech ialtépeu iwa icha, amaka kitlakita.

⁵⁸ Iwa amo okinchi miakeh milagros itech ialtépeu, porke amo nochteh okineltokaya.

14

Kimiktiah n Juan Bautista

(Mr. 6:14-29; Lc. 9:7-9)

¹ Itech nekateh tonatijmeh Herodes* Antipas n Tetrarca non otlanawatijtока Galilea, okima tlan Jesús okichiwaya, ² iwa okinmili itlakawah:

* 14:1 Non okachi wejweyijtikeh tlanawatijkeh itech nin tlali kintokayotiah Herodes, non kijtosneki 'se weyi tlanawati', nochteh non otlanawatijtivalayah omonotsaya Herodes.

—Neká tlakatl, ye n Juan non otlakuaatekiaya, non yomoyoliti, yika weleti kinchiwa wejweyi milagros.

³ Herodes yotlanawatijka makikitskikah n Juan iwa makijilpikah ika kadena. Ijkó okitokti n Juan porke okiliaya mach kuali tlan okichijtoka iwan ikuñada Herodías, isiwa ikni Felipe. ⁴ Juan okiliaya n Herodes:

—Tlajtlákoli tinepanitos iwan mokuñada.

⁵ Herodes okinekia kimiktis n Juan, pero okinmawiliaya n tlakah porke nochteh okimatiah Juan profeta. ⁶ Pero ikuak omoxiujtili Herodes Antipas, ichpoch n Herodías, omijtoti inmixpa nochteh n tlatlálwilteh, iwa satlawel okiwelitak n Herodes. ⁷ Ompa Herodes okimák itlajtol, kimakas san tlan ye kitlajtlanilis. ⁸ Ikuakó n íchpochtli achto omotlapowi iwan imamá iwa sanima okili n Herodes:

—Techmaka itsonteko n Juan Bautista itech se tlakualkaxitl.

⁹ Semi omoyolkoko n rey ikuak okikak tlan okitlajtlanili n íchpochtli. Pero ken okimák itlajtol inmixpa nochteh itlatlalwilwah, otlanawati makimakakah tlan okitlájtlaniki. ¹⁰ Iwa otlanawati makikechtsontekitih n Juan kan otsaktoka, ¹¹ sanima okualikilijkeh itsonteko n Juan itech se tlakualkaxitl iwa okimaktilijkeh n íchpochtli, iwa n íchpochtli okimaktili ina.

¹² Satepa ovalajkeh itlamachtijkawah n Juan iwa okiwikakeh ikuerpo. Okitookatoh, iwa otlanki okimatiltitoh n Jesús.

Jesús kintlakualtia mákuili mil tlakah

(Mr. 6:30-44; Lc. 9:10-17; Jn. 6:1-14)

¹³ Ikuak Jesús okima tlan okitoktijkeh n Juan, otleykok itech se barka iwa oyá iselti kan amaka kikuejsoskia. Pero ikuak n tlakah okimatkeh, owalkiskeh iwa oyajkeh okajsitoh nejnentiwihi. ¹⁴ Ikuak Jesús otemok itech barka, okinmitak miakeh tlakah, okimiknomá iwa okimpajti n kokoxkeh. ¹⁵ Ikuak opé tiotlati, itlamachtijkawah omikuaniijkeh iwa okilijkeh:

—Yotiotlatik, iwa ik nika amaka chanti. Xikintitlani nochteh mawiah itech altepemeh, makimokowitih tlan kikuaskeh.

¹⁶ Jesús okinmili:

—Mach moneki mawiah, xikintlamakakah nomejwah.

¹⁷ Yejwah okilijkeh:

—Sanwel tikpiyah mákuili pameh iwa ome michimeh.

¹⁸ Jesús okinmili:

—Nika techalinwikilikah.

¹⁹ Otlanawati mamotlajtlalikah ipan xiwitl. Jesús okinmónanki n mákuili pameh iwa n ome michimeh. Ontlachixki ilwikak iwa omotlasojkama inawak Dios, okintlajkotlápanki n pameh iwa okinmaktili itlamachtijkawah makinxejxelilikah. ²⁰ Nochteh otlakuajkeh iwa kuali oijixwikeh. Iwa okintetemitijkeh májtlaktli iwa ome chikimeh ika patlatlapanali. ²¹ Kemi mákuili mil tlakah otlakuajkeh, ijkoya n siwameh iwa n pípilteh.

Jesús nejnemi ixko atl

(Mr. 6:45-52, Jn. 6:16-21)

²² Satepa, Jesús okinnawati itlamachtijkawah matlejkokah itech barka iwa sa matlayakanakah makikojchalwikah n lago, ikuak Ye ok kinmakawaskia n tlakah. ²³ Satepa, ikuak yokinmaakah n tlakah, Jesús otleykok ipan tepetl omototsajtsilito iselti. Ikuak otleyuak ompa okatka iselti. ²⁴ N barka yotlantiaya itlajko n lago. N atl omotlawitekia itech barka porke n ejekatl okimixnamikiwalaya. ²⁵ Sa kualka ikuak ok tleyua, Jesús onejnentiaya ixko atl iwa okinmajisito itlamachtijkawah. ²⁶ Iwa ikuak itlamachtijkawah okitakeh nejnentiwits ixko atl, omomojtijkeh iwa otsajtsikeh:

—¡Se ekawit!

²⁷ Pero Jesús okínnotski iwa okinmili:

—¡Ximoyolchikawakah, Ne Ni Jesús!

²⁸ Ikuakó Pedro okili:

—Noteko, tla milák Tejwatsi, xitlanawati maninejnemi ixko atl iwa manimitsajsiti.

²⁹ Iwa Jesús okili:

—Xiwiki.

Ijkuakó Pedro owaltemok de kan barka iwa opé nejnemi ixko atl, iwa konajskia n Jesús. ³⁰ Pero ijkuak okimachili chikawak oejekatoka, omaujki iwa opé apolaki. Ijkuakó otsajtsik:

—¡Noteko, techmakixti!

³¹ Sannima Jesús okimakitskijitiwetski iwa okili:

—¡Amo tiyektlaneltokal!, ¿amo techneltoka?

³² Ijkuak otlejkokeh itech barka, n ejekatl omóketski. ³³ Ijkuakó, itlamachtijkawah omotlankuaketskeh iyakapa n Jesús iwa okilijkeh:

—Milák, Tejwatsi Ikone Dios.

Jesús kimpajtia kokoxkeh itech Genesaret

(Mr. 6:53-56)

³⁴ Ijkuak otlankeh okojchalwijkeh n lago de Galilea, oajsito kan tlali de Genesaret.

³⁵ Ijkuak n tlakah non ik ompa ochantitokah okixmatkeh n Jesús, sentetl okitematiltijkeh iwa okwalinwikilijkeh nochteh n kokoxkeh. ³⁶ Okitlatlaujtiayah makinkawili maya san makitempantelkolikah itlakeh, iwa akimeh okitempantelkoayah itlakeh opajtiah.

15

Tlan kiyolijtlakoa se tlakatl

(Mr. 7:1-23)

¹ Ijkuakó sikimeh fariseos iwa non kitemachtiah n tlanawatílistli non owalajkeh de Jerusalén, omíkuanijkeh inawak Jesús iwa okilijkeh:

² —Motlamachtijkawah kixpanawiah tlan otechititijkeh totatawah. Yejwah amo momajtekiah ijkuak kikuah paj kemi otechmachtijkeh totatawah.*

³ Pero Jesús okintlajtlani:

—¿Tleka noiwa nomejwah nonkixpanawiah itlanawatil Dios, iwa okachi nonkimopantiah tlan yowejka okichiwayah nomotatawah? ⁴ Dios okijo: “Xiktlakita mota iwa mona”, iwa “akin fiero kitewas ita noso ina, kuali makimiktikah.” *Éx. 21:17* ⁵ Pero nomejwah nonkijtoah se tlakatl weletis kilis ita noso ina: “Mach weletis nimitspalewis, porke tlan nikpixtok, yonikxelo para Dios.” ⁶ Ijkuak nomejwah ijkó nonkijtoah, kijtosneki mach ok moneki se kimpalewis n tetajmeh. Nomejwah ijkó nonkijtlakoa itlanawatil Dios porke nonkichiwayah tlan yowejka okichiwayah nomotatawah. ⁷ ¡Íxkopeteh! Yompa tlan onomechilih n profeta Isaías ijkuak okijo:

⁸ Ninteh tlakah ika inkamak kijtoah nechtlakitah, pero amo nechtlakitah ika inyolo.

⁹ Sanenka nechweyijklataliah, porke tlan kitemachtiah, san intlanawatil n tlakah.

Is. 29:13

¹⁰ Ijkuakó Jesús okínnotski n tlakah iwa okinmili:

—Techkakikah iwa xikkajskamatikah tlan nomechilis: ¹¹ Amo kiyolijtlakoa n tlakatl tlan kalaki itech ikamak, yej teyolijtlakoa tlan kisa itech ikamak n tlakatl.

¹² Ijkuakó itlamachtijkawah n Jesús omíkuanijkeh inawak iwa okilijkeh:

—¿Yotikma n fariseos okualankeh ijkuak okikakeh tlan otikijo?

¹³ Pero Ye okinnankili:

—Nochi tlatoockali non amo okitookak Notajtsi non kajki ilwikak, kiwiwitlaskeh ika nochi inelwayo. ¹⁴ Xikinkawakah, yejwah noiwa amo tlachiah iwa kinyakanah oksikimeh kemi yejwah. Tla se non amo tlachia kiyakanas ok se kemi ye, san ken ome wetsiskeh itech tékochtli.

* 15:2 N fariseos okajxitilijkeh itlanawatil Moisés se tlanawátili: achto de se tlakuas kipia se momajtekis miak welta.

¹⁵ Ijkuakó Pedro okili n Jesús:
—Techajsikamatilti non tlapoálistli.

¹⁶ Jesús okijo:
—¿Namejwah noiva ayamó nonkajsikamatih? ¹⁷ ¿Amo nonkajsikamatih nochí tlan kalaki ijtit ikamak se tlakatl, kalaki san ijtit itlalax, iwa satepa kisa kala? ¹⁸ Pero tlan kisa ijtit ikamak se tlakatl, kisa ijtit iyolo, iwa ye tlan kijtlakolia iyolo. ¹⁹ Porke ijtit iyolo n tlakatl kisa tlan amo kuali kiyeyekolia, ijkuak

temiktia, noso
momekatia, noso
tlajtlakolchijtinemi ika ikuerpo,
tlachteki,
kisentlalia tlan amo milák,
noso tepojpoa.

²⁰ Nochi ni ye tlan kinmijtlakolia inyolo n tlakah, pero tla se tlakatl amo moyekmapa-jpaka ijkuak tlakua, noni amo kiyolijtlakoa.

Se siwatl de Canaán kineltoka n Jesús
(Mr. 7:24-30)

²¹ Ijkuakó Jesús okiski de ompa, iwa oyá kan tlalmeh de Tiro iwa Sidón. ²² Se siwatl de Canaán non ik ompa ochantitoka owala kojtsajtsitiwits inawak Jesús iwa okili:

—¡Noteko, tekone de David, techiknomati! Nochpoch kipia se espíritu amokuali iwa sa ik panoa kitlajjywiltia.

²³ Jesús mach okinankili. Ijkuakó itlamachtijkawah omijkuanijkeh inawak iwa okitlat-lautijkeh:

—Xikpalewi neká siwatl porke kojtsajtsitiwits tokuitlapah.

²⁴ Jesús okijo:

—Dios onechaltítlanki sanwel manikimpalewiki n tlakah de Israel non moixpolojtine-mih kemi ichkameh.

²⁵ Pero n siwatl omijkuaní iwa omotlankuaketski ixpa n Jesús iwa okili:

—¡Noteko, techpalewi!

²⁶ Iwa Jesús okili:

—Amo kuali se kinkixtilis intlakual n pípilteh iwa makinmakakah n chichimeh.

²⁷ N siwatl okinankili:

—Milák tlan tikitja Noteko, asta n chichimeh kikuah n kamapáyaxtli non wetsi itlampa mesa keman tlakuajtokeh intekowajkeh.

²⁸ Ijkuakó Jesús okili:

—¡Siwatl, kema weyi motlaneltokalis! Mamochiwa kemi te tikneki.

Ijkuakó, ichpoch non siwatl owalpajtik non ora.

Jesús kimpajtia miakeh kokoxkeh

²⁹ Jesús okiski de ompa iwa oyá itempa n lago de Galilea. Otlanki otlejkok ipan se tepetl iwa ompa omotlali. ³⁰ Ijkuakó, miakeh tlakah okalakitoh inawak Ye, iwa okinwikilijkeh non koxomeh,

non amo tlachiah,
non oikximijmiktakah,

non amo otlajtoayah,
iwa miakeh oksikimeh kokoxkeh.

Okintlalijkeh ikxitla n Jesús, iwa Ye okimpajti. ³¹ Ijkuakó n tlakah omotlajtlachialtiyah ken okitakeh akimeh amo otlajtoayah otlajtojkeh, non oikximijmiktakah opajtikeh, non koxomeh onejnenkeh iwa non amo otlachiayah otlachixkeh. Iwa nochteh opé kiweyijkatlaliah iwa motlasojkamatih inawak Dios de Israel.

Jesús kintlakualtia nawi mil tlakah

(Mr. 8:1-10)

³² Ijkuakó Jesús okonínnotski itlamachtijkawah iwa okinmili:

—Semi nikinmiknomati ninteh tlakah, porke yopanokeh eyi tonati nowa iwa amo kipiah tlan kikuaskeh. Amo nikneki nikintitlanis incha maapismikiwiah, amo kichiwa wetsitiweh itech ojtli.

³³ Ijkuakó itlamachtijkawah n Jesús okilijkeh:

—Ik nika amaka chanchiwa. ¿Kan tikkuitiweh tlákuali para tikintlakualtiskeh nochteh ninteh tlakah?

³⁴ Jesús okintlajtlani:

—¿Kech paj nonkipiah?

Yejwah okinankilijkeh:

—Chikomeh pameh iwa kanaj kechmeh michintsitsinteh.

³⁵ Ijkuakó Jesús okinnawati mamotlajtlalikah ipan tlali. ³⁶ Jesús okinmónanki n chikome pameh iwa n michimeh iwa omotlasojkama inawak Dios. Otlanki okintlatlajkotlapanki iwa okinmajmák itlamachtijkawah makinxejxelilikah nochteh n tlakah.

³⁷ Nochteh otlakuajkeh iwa kuali oixwikeh. Iwa tlan ayakmó okikuajkeh okoololojkeh iwa okintetemijkeh chikome chikimeh. ³⁸ Kemi nawi mil tlakah otlakuajkeh, ixkoya n siwameh iwa n pípilteh. ³⁹ Satepa Jesús okinmaaka nochteh n tlakah, otlejkok itech se baska iwa oyá kan tlali de Magdala.

16

N fariseos iwa n saduseos kitlajtlaniliah n Jesús makinnextili se milagro

(Mr. 8:11-13; Lc. 12:54-56)

¹ N fariseos iwa n saduseos okinekiah kitlajtoltlapololtskeh n Jesús, yika okitatoh iwa okitlajtlanilijkeh makinnextili se milagro de ilwikak. ² Pero Ye okinmili:

—Ijkuak waltiotlati, nomejwah nonkjtoah: “Mostla kualtsi tonas ken tlachichilewi itech ilwikak”, ³ iwa ijkuak tlanesi nonkjtoah: “Axa ejekas iwa kiawis, ken tlachichilewi iwa tlamixtentok.” ¡Íxkopteh! Nomejwah nonweletih nonkiyejyekolah tlan nonkitah itech ilwikak, pero amo nonweletih nonkitah tlan tlamochijtok itech ninteh tonatijmeh. ⁴ Ninteh tlakah amo kualteh iwa mekatánajteh kinekih kitaskeh se milagro, pero amo kitaskeh ok se milagro, sanwel tlan yopanok n profeta Jonás.

Okinkakajte iwa oyá.

Jesús kijtoa intlamachtilis n fariseos mach milák

(Mr. 8:14-21)

⁵ Ijkuak itlamachtijkawah n Jesús otlankeh okojchalwijkeh n lago, okualilnamikeh kiwikaskiah itla paj. ⁶ Ijkuakó Jesús okinmili:

—Techkakikah, ximotlachilikah de inlevadura n fariseos iwa n saduseos.

⁷ Itlamachtijkawah opé kimoliah:

—Ijkó techilia porke amo otikwalikakeh paj.

⁸ Pero Jesús san nima okajsikama iwa okinmili:

—¿Tleka nomechtekipachoah amo nonkipiah paj? ¡Nomejwah amo miak nomotanel-tokalis! ⁹ ¿Ayamó nonkajsikamatih nion ayakmó nonkilnamikih n mákuili pameh non onikinxejxelili n mákuili mil tlakah, iwa ok kech chikiwitl ononkoololojkeh? ¹⁰ ¿Noiwa ayakmó nonkilnamikih n chikome pameh non onikinxejxelili n nawi mil tlakah, iwa ok kech chikiwitl ononkoololojkeh? ¹¹ ¿Tleka amo nonkajsikamatih amo onitlajtojtoka de paj, ijkuak onomechili ximotlachilikah de inlevadura n fariseos iwa n saduseos?

¹² Ijkuakó yejwah okajsikamatkeh Jesús amo okinmilija mamotlachilikah de ilevadura n paj, yej de intlamachtilis n fariseos iwa n saduseos.

Pedro kijtoa Jesús Ye n Cristo

(Mr. 8:27-30; Lc. 9:18-21)

¹³ Ijkuak Jesús okalakito kan tlali de Cesarea de Filipo, okintlajtlani itlamachtijkawah:

—¿Tlan kimoliah n tlakah de Ne Non onimochi ni tlakatl?

¹⁴ Yejwah okinankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías, iwa oksikimeh kijtoah Tejwatsi ti Jeremías noso aka ok se profeta.

¹⁵ Ijkuakó Jesús okinmili:

—Iwa nomejwah, ¿tlan non kimoliah, Akin Ne?

¹⁶ Simón Pedro okinankili:

—Tejwatsi Ti Cristo, Ikone Dios non yolitok.

¹⁷ Ijkuakó Jesús okili:

—Xiyolpaki te, Simón, ipiltsi Jonás, porke amaka de nin tlaltípkaktli omitsnextili, yej Notajtsi Dios non kajki ilwikak. ¹⁸ Iwa Ne nimtsilia, te ti Pedro, iwa ipan non tetl* nikchijchiwas notiopa, iwa nion ichikawalis non tlanawatia kan kateh non yomikkeh weletis kitlanis. ¹⁹ Ne nimtsinmakas n yabejteh† de ilwikak kan Dios tlanawatia. Iwa nochi tlan tiklpis itech nin tlaltípkaktli ya ilpitok kan ilwikak, iwa nochi tlan tiktojtomas itech nin tlaltípkaktli, ya tojtontok kan ilwikak.

²⁰ Ijkuakó Jesús okinnawati itlamachtijkawah amaka makilikah Ye n Cristo.

Jesús kinmilia kenomi mikkis

(Mr. 8:31–9:1; Lc. 9:22-27)

²¹ Ijkuakó Jesús opé kinmilia itlamachtijkawah omonekia yas Jerusalén, iwa ompa chikawak kitlaijyowiltiskeh n tetajmeh tlayakankeh n tiopixkeh tlayakankeh iwa non kitemachtiah n tlanawatilistli. Noiwa okinmili kimiktiskeh, pero ipan eyi tonati moyolitis. ²² Ijkuakó Pedro okiwík n Jesús ixkoya, iwa opé kajwa:

—¡Noteko, amo Dios makimonekilti! ¡Ayik ijkó ximochiwa!

²³ Pero Jesús omókopki iwa okili n Pedro:

—¡Xio kan ayakmó nimtsitas, sataná! ¡San techtsatsakuilia! Porke amo mitstekipachoa tlan Dios kimonekiltia, yej mitstekipachoa tlan kinekih n tlakah itech nin tlaltípkaktli.

²⁴ Satepa Jesús okinmili itlamachtijkawah:

—Tla aka kineki wits nonawak, ayakmó makichiwa san tlan ye kineki. Yej, makixiko nochi tlan panos iwa mawiki nowa, maya makimiktikah itech se krus. ²⁵ Porke akin kinekis kipalewis inemilis, kipolos. Tla aka kipoloa inemilis por ne, kajsis inemilis.

²⁶ Porke mach itla ipati tla se tlakatl kimotlanilia nochi tlan onka itech nin tlaltípkaktli, iwa satepa mikki iwa kipolos ialma. Porke mach itla onka itech nin tlaltípkaktli tlan ika weletis kitlaxtlawas ialma. ²⁷ Porke Ne Non onimochi ni tlakatl niwits ika iweyijkachiwalis Notajtsi iwa n ángelteh, ijkuakó sejse niklaxtlawis ika tlan okichi. ²⁸ De milajka nomechilia, sikimeh non nika kateh amo mikiskeh asta ijkuak nechitaskeh Ne Non onimochi ni tlakatl, iwa pewas nitlanawatis.

17

Jesús moixpatla

(Mr. 9:2-13; Lc. 9:28-36)

¹ Chikwase tonati satepa, Jesús okiwík n Pedro, iwa ome iknimeh, Jacobo iwa n Juan kan se tepetl wejkapa. ² Ompa inyakapah, Jesús omoixpatlak. Ixkotsi otsotlania kemi n tonati iwa itlake omókopki istak kemi tláwili. ³ Sa nima owalmoneextijkeh Moisés iwa n Elías. Omotlapowijtokah iwan Jesús. ⁴ Ijkuakó Pedro okili n Jesús:

—Noteko, ¡san kuali nika tikateh! Tla tikmonekiltia tikinchijchiwas-keh eyi akákalteh, se para Tejwatsi, se para Moisés iwa ok se para Elías.

⁵ Pedro ok otlajtojtoka ijkuak se mextri okinmokenti ika itlasekawilo. Iwa de kan mextri omokak se tlájtoli non okijo:

—Ye ni Nokone non niklasojtla, non Ne onikpejpenki xikkakikah itlajtol.

* ^{16:18} Is. 28:16 Kipia: Xikitakah, Ne niktlalia itech Sión se tetl non ika moikxitlanwiskeh, se tetl non kintoktis mawetsikah; akin tlaneltokas inawak, ayik mopijpinatis. † ^{16:19} Mateo 18:18: Ne nomechilia, tlan nomejwah nonkilpiskeh itech nin tlaltípkaktli, noiwa ilpitok kan ilwikak, iwa tlan nomejwah nonkitojtomaskeh itech nin tlaltípkaktli, noiwa tojtontos kan ilwikak.

⁶ Ijkuak itlamachtijkawah okikakeh, saikpanoa omomojtijkeh iwa omotlankuaketskeh asta okitelkoto n tlali ika inmixkuak. ⁷ Ijkuakó Jesúś owalmikuani innawak, okonnintelko iwa okinmili:

—Ximoketsakah, amo ximomojtikah.

⁸ Ijkuak owaltlajtlachixkeh ayakmaka okitakeh, sanwel Jesúś iselti.

⁹ Ijkuak owaltemotiwalayah itech tepetl Jesúś okinnawati:

—Amaka xikmatiltikah tlan ononkitakeh, asta ijkuak Ne Non onimochi ni tlakatl, nimikis iwa oksepa nimoyolitis.

¹⁰ Ijkuakó itlamachtijkawah okitlajtlanjkeh:

—¿Tleka non kitemachtiah n tlanawatílistli kijtoah Elías achto wits?

¹¹ Jesúś okinnankili:

—Milák, Elías achto wits iwa ye kiyektlalis noch. ¹² Pero Ne nomechilia Elías yowitsa, iwa n tlamachtijkeh mach okineltokakeh porke amo okiyekixmatkeh, yej okitoktijkeh san tlan yejwah okinekeh. Ijkó noiya nechtlaityowiltiskeh Ne Non onimochi ni tlakatl.

¹³ Ijkuakó itlamachtijkawah okajsikamatkeh Jesúś okintlapowiaya de Juan Bautista.

Jesúś kipajtia se télpochtli non omimikia

(Mr. 9:14-29; Lc. 9:37-43)

¹⁴ Ijkuak okalakitoh kan omoololojkah n tlakah, owalmikuani se tlakatl inawak Jesúś, omotlankuáketski iyakapa iwa okili:

¹⁵ —Noteko, xikiknomati nopoltsi, mimiki iwa saikpanoa tlaijyowia, ya miak welta wetsi itech tletl iwa ijtik atl. ¹⁶ Onikinwalikili motlamachtijkawah, iwa mach weletih kipajtiah.

¹⁷ Jesúś okinnankili:

—¡Nomejwah mach nontlaneltokah iwa mach nontetlakitakeh! ¡Asta kemania niyetos nomowah iwa nomechxikojtos! Techalikilikah nika n télpochtli.

¹⁸ Ijkuakó Jesúś okajwak n amokuali espíritu iwa okinawati makikajkawa n télpochtli, iwa sa nima n télpochtli owalpajtik.

¹⁹ Satepa itlamachtijkawah omotlapowitoh ixkoya iwa n Jesúś. Iwa okitlajtlanjkeh:

—¿Tleka tejwah amo otiweletkeh otikkixtijkeh non espíritu amokuali?

²⁰ Jesúś okinmili:

—Porke ayamó miak nontlaneltokah. De milajka nomechilia tla nonkipiaskiah tlaneltokálistli maya san kemi se xínatsintli de mostaza, nonkiliskiah nin tepetl: “Ximoachiwa iwa nepa ximomanati.” N tepetl moiikuaniskia. Nochi weletiskiah nonkichiwaskiah.

²¹ *

Jesúś oksepa kinmilia kenomi mikkis

(Mr. 9:30-32; Lc. 9:43-45)

²² Se tonati keman omoololojkeh kan tlali de Galilea, Jesúś okinmili itlamachtijkawah: Ne Non onimochi ni tlakatl nechtemaktiskeh inmak tekiwajkeh, ²³ iwa yejwah nechmikiskeh, pero ipan eyi tonati nimoyolitis. Ninteh tlájtolteh okinyolkoko itlamachtijkawah.

Jesúś kitlaxtlawa impuesto para n Weyi Tiopa de Jerusalén

²⁴ Ijkuak Jesúś iwa itlamachtijkawah okalakitoh Capernaúm, non tlakobraroah impuesto para n Weyi Tiopa oyajkeh okitatoh n Pedro iwa okitlajtlanjkeh:

—¿Nomotlamachti kitlaxtlawa impuesto para n Weyi Tiopa?

²⁵ Pedro otlanankili:

—Ejé, kitlaxtlawa.

Iwa ijkuak Pedro okalak ijtik kali, Jesúś okitlajtlani:

—¿Kenomi tikita, Simón? ¿N wejweyi tlanawatijkeh kintlaxtlawaltiah impuesto non nika chantitokeh noso non amo nika chanti?

²⁶ Pedro okinankili:

—Non amo de nika.

* ^{17:21} Itech non okachi yowejkajkeh tlajkuíolteh mach nesi nin bersíkulo. Kijtoa: v 21 Nin amokuali espíritu sanwel weleti mokixtia ijkuak se mosawa (ayuna) iwa ijkuak se motiotsajtsilia. Mr. 9:29.

Jesús okili:

—Ijkó kiné non nika chanchiwa amo kipiah kitlaxtlawaskeh. ²⁷ Ijkó para amo matikinkualanikah, xio kan lago, ximichma iwa n michi non achto tikkixtis, xikkamatlapo iwa ompa tikajsis se tomi non ika xiktlaxtlawa noimpuesto iwa moimpuesto.

18

¿Akin okachi weyijkatitok?

(Mr. 9:33-37; Lc. 9:46-48)

¹ Ijkuakó itlamachtijkawah n Jesús omikuanikeh inawak, iwa okitlajtlanijkeh:

—¿Akin okachi weyi itech ilwikak kan Dios tlanawatia?

² Jesúz okínotski se chokotsi, iwa okontlali tlatlajkotia, ³ iwa okijto:

—De milajka nomechilia, tla amo nonmokopah kemi ninteh pípilteh iwa nonkichiwah kemi yejwah, amo nonkalakiskeh ilwikak kan Dios tlanawatia. ⁴ Yika, akin yetos yolyámanki kemi nin chokotsi, ye okachi yetos weyi itech ilwikak kan Dios tlanawatia.

⁵ Iwa akin kiselia se chokotsi kemi ni itech Notoka, kijtosneki Ne nechselia.

Ximotlachilikah amo kichiwa nontlajtlakolchiwaskeh

(Mr. 9:42-48; Lc. 17:1-2)

⁶ 'Tla aka kitoktis mawetsi itech tlajtlákoli, seme de ninteh tsitsikitikeh akin nechnel-takah, okachi kuali makilpilikah itech ikech se weyi tetl iwa makonkajkawakah kan weyi atl kan okachi tlawejkatla. ⁷ ¡Miálmasteh tlaltikpaktlakah! Ken sa tlawel onka miak tlan ika se wetsis itech tlajtlákoli, nochipa ijkó yetos. Pero ¡mialma!, neká tlakatl akin kitoktis aka ok se mawetsi itech tlajtlákoli.

⁸ 'Yika, tla moma noso mokxi mitstoktia xiwetsi itech tlajtlákoli, xikmotekili iwa wejka xikontlamotla. Okachi kuali tla tikalakis ilwikak tiixkitepo noso timatepo iwa amo ika ome momawah noso ika ome mokxiwah mamitsonkajkawakah ijtk tletl non ayik sewis. ⁹ Iwa tla moixtololo mitstoktia xiwetsi itech tlajtlákoli, xikmokixtili iwa wejka xikontlamotla. Okachi kuali xikalaki ilwikak san ika se moixtololo, iwa amo tiajsitok ika ome moixtololowah mamitsontlamotlakah miktla kan mimilitatok tletl.

N ichka non opolika

(Lc. 15:3-7)

¹⁰ 'Amo xikintlawelitakah seme de ninteh pípilteh. Ne nomechilia, kan ilwikak iangelwah ninteh pípilteh nochipa kateh ixpan Notajtsi non kajki ilwikak. ¹¹ *

¹² ¿Kenomi nonkitah? Tla se tlakatl kimpia se siento iichkawah, iwa kipoloa se, ¿amo kinkajtewa n nawi póali iwa n káxtoli iwa n nawi (99) ichkameh kan tepeyo iwa kontemoa non opoliwik? ¹³ Iwa tla okajsk iichkatsi non opolika, okachi paki ke por non oksikimeh ichkameh non amo opolikah. ¹⁴ Ijkó noiwa Totajtsi non kajki ilwikak amo kineki mapoliwi nion se de ninteh pípilteh.

Kenomi tiktlapojpolwiskeh se tokni

(Lc. 17:3)

¹⁵ 'Tla mokni itla mitstoktis, xiktlapowi iselti iwa xikkajskamatilti itlajtlakol. Tla omitskak, yotikmotlanili iwa timoyekwikas oksepa íwa. ¹⁶ Pero tla amo kineki mitskakis, xiknotsa ok se noso ome tokniwah, iwa ijkuak non moyekkawaskeh yejwah makikakikah tlan ye omitstokti. ¹⁷ Tla nion yejwah kinkaki, xikinmoololo nochteh n tokniwah, iwa tla nion tokniwah kinkaki, xikita mokni kemi non amo kineltoka Dios noso kemi se non koololoa impuestos para roma.

¹⁸ 'Ne nomechilia, tlan nomejwah nonkilpiskeh itech nin tlaltíkpaktli, noiwa ilpitox kan ilwikak, iwa tlan nomejwah nonkitojtomaskeh itech nin tlaltíkpaktli, noiwa tojton-tos kan ilwikak.

Mt.

16:19

* 18:11 Nin bersíkulo amo nesi itech non okachi yowejkajkeh tlajkufolteh iwa nesi kan Lucas 19:10 Porke Ne Non onimochi ni tlakatl, oniwala onikinmakixtiko non moixpolojtinemih.

¹⁹ 'Noiwa nomechilia: tla itech nin tlaltípkaktli non momeh nonmoyektlapowiah para nonkitlajtlaniskeh itla Notajtsi non kajki ilwikak, Ye nomechmakas tlan nonkitlajtlaniskeh. ²⁰ Porke kan ome noso eyi moololoah ika Notoka, ompa nika inwah.

²¹ Ijkuakó Pedro omikuani inawak Jesús iwa okitlajtlaní:

—Noteko, ¿kech welta moneki maniklapojpolwi nokni, tla itla nechtoktia? ¿Asta chikome welta?

²² Jesús okinankili:

—Amo nimitsilia xiklapojpolwi san chikome welta, yej eyipóali iwan májtlaktli iwa chikomeh welta xiklapojpolwi.†

Se tetlakéwale non amo okinek tetlapojpolwis

²³ 'Yika, itech ilwikak kan Dios tlanawatia, kemi se rey, non okinekia makikopilah tlan okiwikiliyah itlakawah. ²⁴ Okualikiljkeh se itlakewal non okiwikiliaya sien sentenario.‡ ²⁵ Kemi non tlakéwale amo okipiaya tlan ika kitlaxtlawilis tlan okiwikiliaya, n rey otlanawati makinamakah non tetlakéwale sansikah iwa isiwa, ipilwah iwa nochi tlan okipiaya para ika makimokopili tlan okiwikiliaya. ²⁶ Ijkuakó itetlakewal omotlankuaketski iyakapa n rey iwa okitlatlauti: "Noteko, techonmochiali iwa nimitstlaxtlawilis nochi tlan nimitswikilia." ²⁷ N rey okiknoma, iwa okitlapojpolwili nochi tlan okiwikiliaya iwa okikawili mawia. ²⁸ Pero ijkuak okiski non tetlakéwale, okinamik se itlakaikni non okiwikiliaya tlan se kitlani itech se tonati. Okikitski kan itoskak iwa opé kitoskapatska iwa okiliaya: "¡Techtlaxtlawili tlan techwikilia!" ²⁹ Ijkuakó itlakaikni omotlankuáketski iyakapa iwa okitlatlauti: "Techonchia iwa nimitstlaxtlawilis tlan nimitswikilia." ³⁰ Pero ye mach okinek kichias, yej okitsakuato para makitlaxtlawili nochi tlan okiwikiliaya. ³¹ Ijkuak n oksikimeh tekitkeh okimatkeh, miak okinyolkoko iwa okilitoh n rey nochi tlan otlamochi. ³² Ijkuakó n rey otlatítlanki makinotsatih itlakewal iwa okili: "¡Semi amo tikuali! Ne onimitstlapojpolwili nochi tlan otechwikiliaya por otimotlatlauti nonawak. ³³ Omonekia te noiwa tikiknomatiskia neká tokni, ijkó kemi ne onimitsiknoma." ³⁴ Ijkuakó n rey sa tlawel okuálanki, iwa otlanawati makitsakuatih iwa makikajkawakah asta ijkuak nochi makitlaxtlawili.

³⁵ Jesús noiwa okinmili:

—Notajtsi non kajki ilwikak, noiwa ijkó kitoktis akin amo kinekis kitlapojpolwis aka ikni ika nochi iyolo.

19

Amo se mamosiwakajkawa

(Mr. 10:1-12; Lc. 16:18)

¹ Ijkuak Jesús otlanki okintlapowi, oyá de Galilea, okikojchalwi n río Jordán iwa okalakito kan tlali de Judea. ² Miakeh okitokakeh n Jesús, iwa ompa okimpajti non omokokoayah.

³ Ijkuakó sikimeh fariseos omikuani jkeh inawak Jesús porke okinekiah kitlajtoltlapololtiskeh iwa okitlajtlanijkeh:

—¿Kuali kajki tla se tlakatl kikajkawa isiwa san por ayakmó kuali mowikah?

⁴ Jesús okinnankili:

—¿Ayamó nonkiamapoah itlajkuilol Dios?, itech ipewaya n tlaltípkaktli, Dios okinchijchi "tlakatl iwa siwatl." ⁵ Noiwa okinmili: "Yika n tlakatl kikawas ita iwa ina iwa moseitilis iwa isiwa, iwa yejwah ome mochiwaskeh san se." ⁶ Ijkó kiné, yejwah ayakmó ome, yej sanwel se. Yika, tlan Dios yokiseitili, amaka makinxexelo.

⁷ Ijkuakó n fariseos okitlajtlanijkeh:

—¿Tleka kiné Moisés okitekawili mamosiwakajkawa se tlakatl, iwa makimajmanili isiwa se amatl kan makijto kikajkawa?

† 18:22 N griego kijtoa: 'eyi pójali iwa n májtlaktli chikome welta'. Para yejwah kijtosneki: nochipa. ‡ 18:24 se sentenario ipati mil samano de tekitl.

8 Jesús okinmili:

—Moisés okitekawili ximosiwakajkawakah, porke yokixmatiah tlakuawak nomoyolo; pero acharto amo ijkó okatka. **9** Ne nomechilia, sanwel tla isiwa omomekati, weletis itlákau kikajkawas isiwa. Porke akin mosiwakajkawa iwa monamiktia iwan ok se siwatl kijtosneki san kimomekatijtok.

10 Itlamachtijkawah n Jesús okilijkeh:

—Tla milák amo kuali se mosiwakajkawas, okachi kuali amo se mamonamikti.

11 Ijkuakó Jesús okinnankili:

—Amo nochteh weletih kajsikamatih nin tlájtoli, yej sanwel non Dios kimpalewia makkajsikamatikah. **12** Onkateh tlakah otlakatkeh eunucos.* Oksikimeh okintoktijkeh eunucos. Iwa oksikimeh nemih kemi eunucos porke kinekih tekitiskeh para Dios. Akin kinekih kiselis nin tlájtoli, makiseli.

Jesús kintiochiwa n kokoneh

(Mr. 10:13-16; Lc. 18:15-17)

13 Ijkuakó okwalinwikilijkeh n Jesús sikimeh kokoneh para makintlali imawah impah iwa makintiochiwa, pero itlamachtijkawah opé kinmajwah non okwalinwikayah. **14** Pero Jesús okinmili:

—Xikinkawilikah n kokoneh mawikh nonawak iwa amo xikintsakuilikah, porke akimeh yolyamankeh kemi kokoneh kalakiskeh ilwikak kan Dios tlanawatia.

15 Jesús okintlali imawah ipan kokoneh iwa satepa oyá de ompa.

Se télpochtli tominyo motlapowia iwan Jesús

(Mr. 10:17-31; Lc. 8:18-30)

16 Se télpochtli omijkuani inawak Jesús iwa okitlajtlani:

—Kuali tlamachti, ¿tlan moneki manikchiwa, para nikpias nemílistli non ayik tlami?

17 Jesús okinankili:

—¿Tleka techtlajtlania tlan kuali? Sanwel onka se non de milajka kuali, iwa Ye Dios. Pero tla tikneki tiyolitos, xikintlakita n tlanawátilteh.

18 N télpochtli okili n Jesús:

—¿Katliejmeh?

Jesús okinankili:

—Amo xitemikti,
amo ximomekati,
amo xitlachtekí,
amo xixolopijti.

19 Xiktlakita mopapá iwa momamá,

iwa xiktlasojtla mokni ijkó kemi te timotlasojtla.

20 N télpochtli okinankili:

—Nochi noni nikchijtiwits, ¿tlan okachi nechpoloa manikchiwa?

21 Jesús okili:

—Tla de milajka tikneki ti yetos ti kuali tlakatl, xiknamaka nochi tlan tikpia iwa n tomi xikintliokoli n próbesteh. Ijkó tiktlawelpias weyi tlaxtlawili kan ilwikak. Iwa tias nowa.

22 Keman n télpochtli okikak tlan Jesús okili, oyá omoyolkokojtia porke okitlawelpiaya.

23 Ijkuakó Jesús okinmili itlamachtijkawah:

—De milajka nomechilia, okachi owi kalakis itech ilwikak kan Dios tlanawatia se non kitlawelpia tomi. **24** Oksepa nomechilia, okachi amo owi panos se “kameyo”† kan ik ixtololo n akuxa, iwa amo se non kipia tomi maweleti makalaki kan Dios tlanawatia.

25 Ijkuak itlamachtijkawah okikakeh nin tlájtoli, omotlajtlachialtijkeh iwa okimoliyah:

* 19:12 Eunuco: se tlakatl non amo weleti kimpia ipilwah † 19:24 Sikimeh tlajkuíolteh kipiah n tlájtoli ‘de kameyo’ porke n michmajkeh kipiah se tomawak riata non okichijchijkeh ika itsojmio n kameyo. Nawi itlamachtijkawah acharto yejwah michmajkeh iwa okitekitiltiayah non riata non yejwah okitokayotijkeh kameyo.

—Tla ijkó, ¿akin weletis momakixtis?

²⁶ Jesúś okintlajtlatak iwa okinmili:

—N tlaltikpaktlakah amo weleti kichiwah, pero Dios nochí weleti kichiwah.

²⁷ Ijkuakó Pedro okili:

—Noteko, tejwah otikkajtejkeh nochí tlan otikpiayah iwa mowah tikateh. ¿Tlan tikpiaskeh?

²⁸ Jesúś okinnankili:

—De milajka, nomechilia, ijkuak ajsiki n tonati ijkuak nochí moyankuilis, Ne Non onimochi ni tlakatl nimoyayantis, iwa ompa nitlanawatis ika mawistílistli. Ipan non tonati nomejwah akimeh nonwitseh nowah, noiwa nonmoyayantiskeh itech májtlaktli iwa ome (12) siyajteh. Ompa nonkinmixkomakaskeh n májtlaktli iwa n ome (12) tribus de Israel. ²⁹ Iwa nochteh akimeh okikakajtejkeh incha, inmikniwah, inweltiwhah, intajwah, impilwah noso intalalwah por tetlapowijtinemih notlajtol, kiseliskeh okachi de nochí tlan okikakajtejkeh, iwa mach ayik mikiskeh yej nochipa yolitoskeh. ³⁰ Pero non axa tlayakantokeh, yejwah yetoskeh iksemi, iwa non axa kateh sa iksemi, yejwah tlayakantoskeh.

20

Sikimeh tetlakéwalteh

¹ 'Itech ilwikak kan Dios tlanawatia, noiwa kemi se tekowa non okiski san kualka okintlakewato sikimeh tlakah makitlatekilitih itlala. ² Iwa omoyekka iwan tetlakéwalteh kintlaxtlawiskia se denario* itech non tonati, iwa okintítlanki matekititih.

³ 'Satepa n tekowa okiski kemi las nueve de kuinal, iwa okinmitak tiánkistli sikimeh tlakah non omajxilijtokah. ⁴ Iwa okinmili: "Xiwiah notlala xitekititih iwa nomechyektlaxtlawis." Iwa yejwah oyájkeh.

⁵ 'Oksepa okiski kemi tlajko tonati, noiwa kemi las tres de tiotlak, iwa okintlakewato oksikimeh.

⁶ 'Iwa kemi las sinko de tiotlak, oksepa okinmajsik oksikimeh non omajxilijtokah, iwa okintlajtlani: "¿Tleka nika ononmokajkeh interohtonati iwa amo onontekititoh?"

⁷ Yejwah okinankilijkeh: "Porke amaka otechtlakeh." Ijkuakó ye okinmili: "Nomejwah noiwa xitekititih kan nouvaskuauyjo."

⁸ Ijkuak otleyuak, inteko okili itlakewal non okinnawatiaya n tlakah: "Xikinnotsa n tlakéwalteh iwa xikintlaxtlawi. Achto xikintlaxtlawi non okalakeh sa iksemi, iwa satepa non achto okalakeh." ⁹ Ijkuakó ovalajkeh n tetlakéwalteh non okalakeh kemi las sinko de tiotlak, iwa sejse okiseli se denario. ¹⁰ Satepa, ijkuak ovalajkeh akimeh kuinal opé tekitih, yejwah okimolijkeh chamo okachi kintlaxtlawiskiah. Pero yejwah noiwa okiselijkeh se denario.

¹¹ 'Yika, ijkuak okiselijkeh intlaxtlawil opé mokuejsoah iwan tekowa, ¹² iwa okilijkeh: "Nekateh tlakah non otekitekeh sanwel se ora, otikintlaxtlawi kemi tejwah, non otikxikolijkeh nochí n tekitl ixko tonati." ¹³ Pero n tekowa okonili se de yejwah: "Noknitsi, ne amo nimitstlachtekijtok. ¿Amo otimokajkeh tiktlaniskia se denario itech nin tonati? ¹⁴ Xikonana modenario iwa xajti. Ne nikneki niktlaxtlawis non sa iksemi okalak tlan te onimitsmák. ¹⁵ ¿Mach amo weletis nikchiwas ika tlan noaxka tlan ne niknekis? Noso, ¿tixikojmiki por kuali ni tlakatl?" ¹⁶ Pero non axa amitla impati, satepa kinweyijkatlaliskeh, iwa non axa kinweyijkatlaliah, ijkuakó kinmitaskeh kemi amitla impati.

Jesúś oksepa kinmilia kenomi mikkis

(Mr. 10:32-34; Lc. 18:31-34)

¹⁷ Ijkuak Jesúś oyaya Jerusalén, ijkoya okinwík n májtlaktli iwa ome (12) itlamachtijkawah iwa okinmili:

* 20:2 Denario: se tomi non okitlaniah ijkuak otekitia se tonati.

¹⁸ —Xikkakikah, axa tiawih Jerusalén, iwa Ne Non onimochi ni tlakatl nechtemak-tiskeh inmak tiopixkeh non tlayakantokeh, iwa n tlamachtijeh de intlanawatil non nechtlaajtlakoltiskeh para manechmiktakah. ¹⁹ Nechtemaktiskeh inmak n tlakah non amo judíojteh para manechpijpinawikah iwa manechwitekikah. Yejwah nechmiktiskeh itech krus, pero ipan eyi tonati nimoyolitis.

Imamá n Jacobo iwa n Juan motlatlaujtia inawak Jesús

(Mr. 10:35-45)

²⁰ Ijkuakó isiwa n Zebedeo iwa itelpochwah, omikuanikeh ixpa Jesús iwa omot-lankuaketskeh. N siwatl omotlatlaujti inawak. ²¹ Jesús okitlajtlani:

—¿Tlan tikmonekiltia?

N tena okili:

—Nimitstlatlaujtia xitlanawati ninteh ome nopilwah mamoyayantikah monakastla, se ik moyekma iwa ok se kan ik moopochma, keman tejwatsi pewas titlanawatis.

²² Jesús okinankili:

—Nomejwah amo nonkimatih tlan nonkitlajtlanih. ¿Weletis nontlaijyowiskeh kemi ne nitlaijyowis?

Yejwah okinankilikah:

—Ejé, tiveletiskeh.

²³ Jesús okinmili:

—Milák, nomejwah nontlaijyowiskeh, pero sanwel Notajtsi weletis kijtos akin moyayantis ik noyekma noso noopochma, iwa amo Ne. Porke Ye yokimpéjpenki akimeh ompa moyayantiskeh.

²⁴ Ijkuak n májtlakteh itlamachtijkawah ijkó okikakeh, okualankeh iwan nonteh ome iknimeh. ²⁵ Pero Jesús okínnotski iwa okinmili:

—Nomejwah kuali nonkinmatih n tekiwajkeh non tlanawatiah itech nin tlaltípkaktli, kinnawatiah n tlakah, iwa n wejweyi tlanawatijkeh kinmapixtokeh ika intlanawatilis.

²⁶ Pero nomejwah amo ijkó nonkichiwaskeh. Akin kinekis nomowa moweyijkatlalis, achto makintekitili oksikimeh. ²⁷ Akin kinekis tlayakantos, achto mamochiwa nomot-lakewal. ²⁸ Ijkó kemi Ne Non onimochi ni tlakatl amo oniwala manechtektilikah, yej oniwala onitekitiko iwa nimotemakas manechmiktakah iwa ijkó miakeh mamomakix-tikah.

Jesús kimpajtia ome tlakah non amo tlachiah

(Mr. 10:46-52; Lc. 18:35-43)

²⁹ Ijkuak yejwah yokistaiyah de Jericó, miakeh tlakah oyajkeh iwan Jesús. ³⁰ Itempa n ojtli oewatokah ome tlakah non amo otlachiayah. Ijkuak yejwah okikakeh Jesús ik ompa opanotiaya, okitsajtsilijkeh chikawak:

—¡Tejwatsi, ikone n David, techiknomati!

³¹ N tlakah okoninmajwayah pero yejwah okachi otsajtsiah:

—¡Tejwatsi, ikone n David, techiknomati!

³² Ijkuakó Jesús omóketski, okínnotski n tlakah non amo otlachiayah iwa okintlajtlani:

—¿Tlan nonkinekih manomechchiwili?

³³ Yejwah okilijkeh:

—Tejwatsi, tiknekih titlachiaskeh.

³⁴ Jesús okinmiknoma, iwa okintelcoli immixtololowah. San nima owaltlachixkeh, iwa okitokakeh n Jesús.

Jesús kalaki Jerusalén kemi Rey

(Mr. 11:1-11; Lc. 19:29-40; Jn. 12:12-19)

¹ Ijkuak ya onkalakiah Jerusalén, okalakitoh kan altepetl de Betfagé, non kajki inakastla n olivostepetl. Jesús okintítlanki ome itlamachtijkawah, ² iwa okinmili:

—Xiwiah kan neká altepetl non kajki tlayakapa. Ompa nonkajsitiweh se burra ilpitok iwa ikonetsi. Xikintojtomakah iwa techalinwikilikah.³ Iwa tla aka nomechtlaajtlania tleka nonkintojtomah, xikilikah Toteko Jesús kintekitiltis, iwa san nima kintekopilis.

⁴ Ijkó otlamochi para mamochiwa tlan okijto n profeta Zacarías:

⁵ Xikinmilikah n tlakah de Sión:

“Xikitakah, Nomorey wits nomonawak,
yolyámanki, iwa tlejktiwits ipan se burrojtsi,
ikonetsi se yolkatl non tlamama.”

Zac. 9:9

⁶ Ijkuakó itlamachtijkawah oyajkeh iwa okichijkeh kemi Jesús okinnawati.

⁷ Okualikakeh n burra iwa ikonetsi, iwa ika intlakenwah okipejpechtijkeh. Iwa Jesús otlejkok ipan burrojtsi.⁸ Iwa miakeh tlakah oyayah iwan Jesús, okinsoayah intlakenwah itech ojtli. Oksikimeh okintekiah imamayowah n kuameh iwa okinsoayah itech ojtli.⁹ N tlakah non otlayakanayah, iwa non oyayah tlakuitlapa otsajtsitiayah chikawak:

—¡Hosanna! ¡Matechmakixti ikone n rey David! ¡Tiochitok akin wits itech Itoka n Toteko Dios! ¡Hosanna kan ilwikak!

¹⁰ Ijkuak Jesús okalak Jerusalén, nochteh n tlakah omopajsolokeh, iwa okijoayah:

—¿Akin nin tlakatl?

¹¹ Iwa n tlakah okijoayah:

—Ye n profeta Jesús, non de Nazaret de Galilea.

Jesús okwalinkixti n tlasemankeh itech Weyi Tiopa

(Mr. 11:15-19; Lc. 19:45-48; Jn. 2:13-22)

¹² Jesús okalak kan Weyi Tiopa iwa okinkixti nochteh non otlakojtokah iwa non otlanamakatokah. Okinxitronkopili inmesajwah non okipatlayah tomi, iwa non okin-namayah palomajtsitsinteh.¹³ Iwa okinmili:

—Itech itlajkuilol Dios kijtoa: “Nocha kinotsaskeh kali kan motiotsajtsiliah.” Is. 56:7

'Pero nomejwah yononkikopkeh se kali kan motlaatiah ichtekeh. Jr. 7:11

¹⁴ Kan Weyi Tiopa omijkuanikeh inawak non amo otlachiayah iwa non amo oweletiah onejnemiah, iwa Jesús okimpajti.¹⁵ Pero ijkuak n tiopixkeh non tlayakantokeh iwa non kitemachtiah n tlanawatili, okimitakeh n milagros non okinchiyawa Jesús, iwa okinkakeh otsajtsiah n chocokomeh: “¡Hosanna ikone n David!”, okualankamikeh.¹⁶ Iwa okilijkeh n Jesús:

—¿Tikkaki tlan kijtoah ninteh?

Jesús okinnankili:

—Ejé, nikinkaki, pero ¿mach ayamó nonkiamapoah itlajkuilol Dios kan kijtoa?
Otikchi mamitsweyilikah n pípilteh,

iwa n kokoneh non ok chichih.

Sal. 8:2

¹⁷ Ijkuakó Jesús okiski de Jerusalén iwa oyá kan altepetl de Betania iwa ompa omoka non yúali.

Jesús iwa se igoskuawitl

(Mr. 11:12-14, 20-26)

¹⁸ Kuinal, ijkuak otlejkoaya Jerusalén, owalxitlatlak.¹⁹ Ijkuakó okitak se igoskuawitl non okatka iselti itempa n ojtli, Ye okitlatemolito pero amo okajsik nion se igos, yej san tekil omoxiujyoti. Ijkuakó Jesús okili n igoskuawitl:

—¡Ayik xiktemaka igos!

Iwa n igoskuawitl sa nima owaki.²⁰ Ijkuak itlamachtijkawah okitakeh, omotlajt-lachialtijkeh iwa okitlajtlanijkeh n Jesús:

—¿Kenomi n igoskuawitl sa nima owaki?

²¹ Jesús okinnankili:

—De milajka nomechilia, tla nonkipiah tlaneltokálistli, amo sanwel nonkichiwaskeh ijkó, yej noiya weletis nonkiliskeh nin tepetl: “Ximoachiwa iwa ximotlamotlati ijtik weyi

atl”, iwa ijkó tlamochiwas. ²² Iwa nochí tlan nonkitlajtlaniliskeh itech nomotrotsajtsilis, nonkiseliskeh tla nonkineltokah ijkó mochiwas.

Itlanawatilis Jesús

(Mr. 11:27-33; Lc. 20:1-8)

²³ Ijkuakó Jesús okalakito kan Weyi Tiopa de Jerusalén iwa ijkuak otlamachtijtoka, owalmijkuanijkeh inawak sikimeh tiopixkeh non tlayakantokeh iwa sikimeh tetajmeh non tlayakantokeh kan Weyi Tiopa iwa okitlajtlanijkeh:

—¿Akin omitstekiwiatlali?

²⁴ Jesús okinnankili:

—Ne noiwa nomechtajtlanis, iwa tla nonnechnankiliskeh, ijkuakó Ne noiwa nomechilis akin onechtekwiatlali. ²⁵ Techilikah, ¿akin okinawati n Juan matlakuaateki? ¿Okinawati Dios noso okinawatijkeh n tlakah?

Ijkuakó yejwah opé moichtakatlalpowiah:

—Tla tikijtoskeh Dios okinawati, Ye techilis: “¿Tleka kiné amo ononkineltokakeh?”

²⁶ Iwa tla tikijtoskeh san tlakah okinawatijkeh, matikinmawilikh n tlakah, porke nochteh kimatokeh Juan se profeta.

²⁷ Iwa okinankilijkeh n Jesús:

—Mach tikmatih.

Jesús noiwa okinnankili:

—Ne noiwa mach nomechilis akin onechnawati ijkó manikchiwa.

N tlakatl iwa ome itelpochwah

²⁸ Jesús okinmili:

—Kenomi nonkitah. Se tlakatl okimpiaya ome itelpochwah, iwa se okili: “Nokone, xitekititi kan uvaskuajyo.” ²⁹ Itelpoch okinankili: “¡Amo nias!” Pero satepa omoyolkopki iwa oyá. ³⁰ Otlanki n teta noiwa okinawati non ok se itelpoch, iwa ye okinankili: “Ejé, nias.” Pero mach oyá. ³¹ ¿Akin okichi tlan okinekia n teta?

Nochteh okijtojkeh:

—Non okitlakitak.

Ijkuakó Jesús okinmili:

—De milajka nomechilia n tominooololojkeh iwa n awilsiwameh, yejwah achto kalakiskeh kan Dios tlanawatia. ³² Porke Juan Bautista owala onomechmachtiko keniji kineki xinemikah Totajtsi Dios, iwa nomejwah amo ononkineltokakeh. Pero n tominooololojkeh non achto otlachtekiah iwa n awilsiwameh okineltokakeh. Iwa maya ijkó ononkitakeh, nomejwah amo ononmoyolpatlakeh nion satepa ononkineltokakeh.

Sikimeh tetlakéwalteh amo kualteh

(Mr. 12:1-12; Lc. 20:9-19)

³³ 'Xikkakikah ok se tlapoálistli: Se tekowa okintookak uvas itech itlala iwa nochí okikorralti. Okichijchi se atékochtli kan kimpatskas n uvas, noiwa okichijchi se torre wejkapa kan tlejcos iwa kimokuitlawis iuvaskuajyo.

'Satepa okinkajtewili sikimeh impartidariojwah iwa oyá wejka. ³⁴ Ijkuak oajsiko n tonati para motlatekis, okintítlanki sikimeh itlakawah para makikuitih tlan ye iaxka.

³⁵ Pero impartidariojwah okinmokitskilijkeh itlakawah n tekowa. Se de yejwah okiwitekeh, ok se okimiktijkeh iwa ok se okimojmotlakeh ika tetl. ³⁶ Satepa n tekowa okintítlanki okachi miakeh itlakawah, pero n partidarios noiwa ijkó okintoktijkeh.

³⁷ 'Sa iksemi, okintitlanili ipiltsi iwa okimoli: “Nopiltsi moneki kitlakitaskeh.” ³⁸ Pero ijkuak n partidarios okitakeh ipiltsi n tekowa okimolijkeh: “Ye ni akin kimokawis tlan iaxka ita, matikmiktikah iwa tkmokawiskeh tlan kiaxkatiskeh.” ³⁹ Iwa n partidarios okikitskijkeh ipiltsi n tekowa, okwalkixtijkeh de itlal iwa okimiktijkeh. ⁴⁰ Ijkuak wits n tekowa de non uvas, ¿tlan kintoktis nonteh partidarios?

⁴¹ Yejwah okinankilijkeh:

—Kinmijmiktis nonteh amo kualteh partidarios, iwa ilawerta kinmaktilis oksikimeh partidarios non kiyekmakaskeh tlan iaxka ikuak motekis n uvas.

⁴² Jesú okinmili:

—¿Ayamó nonkiamapoah itlajkuilol Dios kan kijtoa?:
N tetl non kalchijchijkeh ik nepa lado okitlakaltechojkeh,
yomókopki non okachi tetlakxilia.

Ijkó okichi Toteko,
iwa techtlajtlachialtia.

Sal. 118:22-23

⁴³ 'Yika, ayakmó nonkalakiskeh kan Dios tlanawatia, yej axa kinkawiliskeh makalakikah non de wejka nonkichiwah tlan kimonekiltia Dios. ⁴⁴ Akin wetsis ipan nin tetl mopopostekis, pero tla n tetl wetsis ipan se, san semi kikuejkuechos.

⁴⁵ Ikuak n tiopixkeh non tlayakantokeh iwa n fariseos okinkakeh ninteh tlapoálisteh, okajskamatkeh yejwah okinmilijtoka. ⁴⁶ Ikuakó okinekiah kikitsiskeh n Jesú, pero okinmawiliyah n tlakah, porke n tlakah okineltokayah Jesú Ye profeta.

22

Kan monamiktiah (Lc. 14:15-24)

¹ Jesú oksepa opé kintlapowia ika tlapoálistli iwa okinmili:

² —Itech ilwikak kan Dios tlanawatia, noiva kemi tlan okichi se rey itech se ilwitl ikuak okinamiki itelpoch. ³ N rey okintítlanki itlakawah makinnotsatih itlatlalwilwah, pero yejwah mach okinekeh oyajkeh. ⁴ Oksepa okintítlanki oksikimeh itlakawah iwa okinnawati: “Xikinmilakah notlatlalwilwah ya kajki n tlákuali. Yonikinmiki notorojwah iwa oksikimeh noyolkawah non okachi tojtomawakeh, iwa yotlatetekakeh, sa mawalmuikakah nika itech ilwitl.” ⁵ Pero yejwah mach ovalajkeh. Se otekitito itlala, ok se otlasemanato. ⁶ Iwa oksikimeh okinkitskijkeh itlakawah n rey, okinwitekeh iwa okinmiktijkeh. ⁷ Ikuakó n rey sa tlawel okuálanki, iwa okinnawati isoldadojwah makinnimiktitih nekateh temiktijkeh iwa makinchichinilikah inmaltépeu. ⁸ Otlanki okinmili itlakawah: “Nochi ya kajki, pero notlatlalwilwah non achto onikintlalwi amo yejwah walaskiah. ⁹ Xiwiah itech ojtli iwa xikintlalwikah nochteh akimeh nonkinmajsiskeh, iwa mawikih nika itech ilwitl.” ¹⁰ Itlakawah n rey okinmoololojkeh nochteh n tlakah non okinmajsikeh itech ojtli, non kualteh iwa non amo kualteh. Ijkó nochí n kali kan monamiktilo otenki.

¹¹ Ikuakó n rey okinmitato non otlakuajtokah. Okitak se tlakatl non amo otlakentitoka kemi omonekia matlakentito itech non ilwitl. ¹² Iwa n rey okitlajtlani: “Noknitsi, ¿kenijki otikalak iwa amo titlakentitiwits kemi moneki itech nin ilwitl?”

Pero n tlakatl amo otlanankili. ¹³ Ikuakó n rey okinmili n tetlamakakeh: “Xikijilpikah iwa xikontlamotlakah kan tleyua, ompa chokas iwa tlannetsonis.” ¹⁴ Porke Dios kinnotsa miakeh tlakah, pero san sikimeh kimpejpenah.

Kitlajtlaniah n Jesú kox kuali se kitlaxtlawilis impuesto n César (Mr. 12:13-17; Lc. 20:20-26)

¹⁵ Ikuakó n fariseos oyajkeh iwa omotlatlalwitoh kenijki kichiwaskeh mamotlapololti itech tlan kijtoa n Jesú iwa ijkó weletis kiteiliskeh. ¹⁶ Yika n fariseos okintítlankeh itlamachtiyawah iwa sikimeh non omowikayah iwan Herodes para makilitih:

—Tlamachti, tikmatokeh Tejwatsi tiktemachtia tlan milák, iwa titlamachtia kenomi moneki se yetos kemi Dios kineki. Amo timotlachilia nion mitstekipachoa mamitsakikah. ¹⁷ Techonili: ¿Kox kuali se kitlaxtlawilis impuesto para n weyi tlanawati César, noso amó?

¹⁸ Pero Jesú okimatiah san okiyejyekojtokah iwa okinmili:

—Íxkopteh, ¿tleka nonnechyeyekoah? ¹⁹ Techititikah se tomi non ika nonkitlaxtlawah impuesto.

Yejwah okititijkeh se denario. ²⁰ Iwa Ye okintlajtlani:

—¿De akin ixko iwa tlan ijkuitlito?

²¹ Yejwah okinankilijkeh:

—De César.

Ijkuakó Jesús okinmili:

—Xikmakakah n César tlan iaxka n César, iwa xikmakakah Dios tlan iaxka Dios.

²² Ijkuak okikakeh tlan okinmili, omotlajtlachialtijkeh. Ayakmitla okilijkeh iwa oyayajkeh.

N saduseos kitlajtlaniah n Jesús kox moyolitiskeh non yomikkeh

(*Mr. 12:18-27; Lc. 20:27-40*)

²³ Non tonati sikimeh saduseos non kijtoah ke non yomikkeh ayakmó moyolitiah, omijkuanijkeh inawak Jesús iwa okitlajtlanjkeh:

²⁴ —Tlamachti, Moisés okijito tla se tlakatl mikki iwa amo kinkajitewa ipilwah iwan isawa, n teikni moneki monamiktis iwan iknosiwatl iwa ijkó ijkuak kimpiaskeh impilwah, yetoskeh inmaxka non yomikki. ²⁵ Towah ochanchiwayah chikome iknimeh tlakah. Non teteachka omonamikti iwa omikki. Kemi amo okimpixkeh impilwah, okika isawa, iwa ok se ikni non kualtoka omonamikti iwan iknosiwatl. ²⁶ Pero ye noiya omikki, iwa non ipan eyi iknimeh noiya omonamikti iwan iknosiwatl, pero noiya omikki. Ijkó n chikomeh iknimeh omonamikti jkeh iwan non siwatl, pero nochteh omiktiajkeh. ²⁷ Sa iksemi noiya omikki n siwatl. ²⁸ Axa, keman moyolitiskeh non yomikkeh, ¿de akin yetos tesiva, tla iwa n chikome iknimeh omonamikti?

²⁹ Jesús okinmili:

—Nomejwah nonmotlapololijtokeh porke amo nonkajsikamatih itlajkuilol Dios nion iweletilis. ³⁰ Ijkuak moyolitiskeh, n tlakah iwa n siwameh mach ok monamiktiskeh, porke yetoskeh kemi iangelwah Dios ompa ilwikak. ³¹ Pero ken ya timotlapowijtokeh moyolitiskeh n mikemeh, ¿mach ayamó nonkiamapoah tlan Dios onomechili? Ye okijito: ³² “Ne Dios de Abraham, Dios de Isaac iwa Dios de Jacob.” Ye amo Dios de non yomikkeh, Ye Dios de akimeh yolitokeh.

Ex. 3:6

³³ Ijkuak nochteh okikakeh, omotlajtlachialtijkeh de kenomi okinmachtiaya.

Non okachi weyi itlanawatil Dios

(*Mr. 12:28-34*)

³⁴ N fariseos omoololojkeh ijkuak okimatkeh n Jesús okinkamatsak n saduceos. ³⁵ Seme de yejwah non okitemachtiaya n tlanawátili okinekia kiyeyekos n Jesús iwa okitlajtlani:

³⁶ —Tlamachti, ¿katlie tlanawátili okachi weyi kijtosneki?

³⁷ Jesús okili:

—“Xiklasojtla Moteko Dios ika nochí moyolo, ika nochí moalma iwa ika nochí motlalnamikilis.” ³⁸ Ye nin tlanawátili non okachi tlayakantok iwa okachi weyi kijtosneki. ³⁹ Iwa onka ok se tlanawátili non kimoiknitia iwa kijtoa: “Xiklasojtla mokni kemi te timotlasojtla.” ⁴⁰ Ninteh ome tlanawátilteh kitlakxiliah itlanawatil Moisés iwa intlamachtilis n profetas.

Jesús kintlajtlania n fariseos akin ikone n Cristo

(*Mr. 12:35-37; Lc. 20:41-44*)

⁴¹ Ijkuak n fariseos ok omoololojkeh, ⁴² Jesús okintlajtlani:

—¿Tlan nonkimati de Cristo? ¿Cristo akin ikone? ¿Akin ita Cristo?

Yejwah okilijkeh:

—Walewatok de n rey David.

⁴³ Ye okinmili:

—Tla ijkó, ¿kenijki David por n Espíritu okínotski Noteko? Porke n rey David okijito:

⁴⁴ Toteko Dios okili Noteko:

“Ximotlali noyekma,

asta manikintlali akimeh mitskokoliah itlampa mokxiwah.”

Sal. 110:1

⁴⁵ Tla inewia David kinotsa Noteko n Cristo, ¿kenomi Cristo weletis yetos ikone n David?

⁴⁶ Iwa amaka owéletki okinankili nion se tlájtoli, iwa desde non tonati, mach ok aka omixewi itla okitlajtlani.

23

*Jesús kintlajtlakoltia n tlamachtijkeh iwa n fariseos
(Mr. 12:38-40; Lc. 11:37-54; 20:45-47)*

¹ Ijkuakó Jesús okinmili n tlakah iwa itlamachtijkawah:

² —Non kitemachtiah n tlanawátili iwa n fariseos kimoliah san yejwah weleti ka-sikamatih tlan kijtoa itlanawatil Moisés. ³ Ijkó kiné, xikchiwakah nochí tlan nomech-machtiah, pero amo xikchiwakah tlan yejwah kichiwah. Porke yejwah mach kichiwah tlan kitemachtiah. ⁴ Yejwah kinmamaltiliah n tlakah miakeh tlanawátilteh non satlawel owijkeh non yejwah okajxitilijkeh. Iwa kintoktiah n tlakah makimamajtiwah, pero yejwah nion ika se inmajpil kinekih kinwikaskeh. ⁵ Teixpa kichiwah tlan kuali san para makinmitakah n tlakah. Iwa ijtk sikimeh kajajtsitsinteh okinwikayah n májtlaktli tlanawatilteh (diez mandamientos) iwa okinmopiltiliyah itech inmixkuak iwa itech inmawah. Noiwa okiwilitayah motlakentiskeh ika intlakeh weyak. *Ex. 13:1-16; Dt. 6:4-9, 11:13-21*

⁶ Kimpaktiah moyantiskeh tlayakapa kan tlatlakualo, noiwa kan sinagogas kiwilitah moyantiskeh kan nochteh makinmitakah. ⁷ Kinekih makinyektlajpalokah iwa makin-notsakah “tlamachtijkeh” itech ojtli iwa itech tiánkistli.

⁸ 'Pero nomejwah amo xikmokawilikah manomechnotsakah tlamachti, porke non nochteh nonmiknimeh iwa nonkipiah san se Nomotlamachti. ⁹ Iwa amaka xik-ilikah padre itech nin tlaltípkaktli, porke nonkipiah san se Padre non kajki il-wikak. ¹⁰ Nion xikmokawilikah manomechnotsakah “tlayakankeh”, porke sanwel Cristo nomechyakana. ¹¹ Akin kinekih tlayakantos nomonawak, achto manomechtekichiwili. ¹² Porke akin inewia moweyilia, satepa moiknomatinemis, pero akin amo moweyilia, kiweyijkatlaliskeh.

¹³ '¡Miálmasteh, tlamachtijkeh iwa fariseos, íxkopeteh!, porke nonkintsakuiliah n tlakah para amo makalakikah itech ilwikak kan Dios tlanawatia. Nomejwah amo nonkalakih nion nonkinkawiliah makalakikah akimeh kinekih kalakiskeh. ¹⁴*

¹⁵ '¡Miálmasteh tlamachtijkeh iwa fariseos, íxkopeteh! Nomejwah non nentinemih itech nochí n tlaltípkaktli para aka nonkichiwaltiskeh makitlakita nomotlamachtilis, iwa ijkuak yononkimotlanilijkeh, nonkikopah ome welta okachi amokuali ke nomejwah iwa ijkó makimotlanili n mikta.

¹⁶ '¡Miálmasteh, tlayakankeh ipoipoyakteh! Nomejwah nonkijtoah: “Akin motlaj-tolsentlalia por n Weyi Tiopa amitla ipati, pero tla motlajtolsentlalia por n ‘oro’ non kajki itech Weyi Tiopa, moneki makichiwa tlan yokijto.” ¹⁷ ¡Tsontewewemeh ipoipoyakteh! ¿Tlan okachi ipati: N oro, noso n Weyi Tiopa, non kitiochiwa n oro? ¹⁸ Noiwa nonkijtoah: “Akin motlajtolsentlalia por n artal, amitla ipati, pero tla motlajtolsentlalia por n tlámanali non kajki ipan artal, moneki makichiwa tlan yokijto.” ¹⁹ ¡Tsontewewemeh ipoipoyakteh! ¿Tlan okachi ipati, n tlámanali non kajki ipan artal, noso n artal non kitiochiwa n tlámanali? ²⁰ Akin motlajtolsentlalia por n artal, noiwa motlajtolsentlalia por nochí tlan kajki itech. ²¹ Iwa akin motlajtolsentlalia por n Weyi Tiopa, noiwa motlajtolsentlalia por Akin chantitok itech. ²² Iwa akin motlajtolsentlalia por n ilwikak, motlajtolsentlalia por iyayan Totajtsi Dios, iwa por Akin ewatok itech.

²³ '¡Miálmasteh, tlamachtijkeh iwa fariseos, íxkopeteh! Nomejwah nonkiaxkatiliah Dios nomodiesmo de nomomenta, nomoanis iwa nomokomino, pero mach nonkichiwah tlan okachi weyi kijtosneki inawak Dios, kemi xiyeñkemikah, xiteiknomatikah iwa

* ^{23:14} Nin bersíkulo amo nesi itech non okachi yowejka jeh tlajkuíolteh iwa kijtoa: ¡Miálmasteh de nomejwah tlamachtijkeh iwa fariseos íxkopeteh!, nomejwah nonteixkajkayajkeh porke nonkinkixtiliah tlan inmaxka n iknosiwameh, iwa satepa satlawel nomotrotsajtsiliah para manomechitakah nik satlawel non kichiwah tlan kuali. Yika nomejwah okachi nomechtlaijyowiltiskeh.

xikneltokakah Dios. Ye ni tlan moneki nonkichiwaskeh, pero tlan nonkitemakatiwitseh ijkó xiktemakatiwiah. ²⁴ ¡Teyakankeh ipoipóyakteh, nomejwah nonkitsejtseloah n atl para makitseko n moyotl pero nonkitoloah se kameyo!

²⁵ '¡Miálmasteh, tlamachtijkeh iwa fariseos, íxkopته!, porke nonkipopoah san ixko nomovaso iwa nomoplató, pero ik tlajtik tentokeh ika tlan amokuali, ika tlachtekílistli iwa n tominápistli. ²⁶ Fariseo ipoipóyaktli, achto xikijtipopoa n vaso iwa n plato, ijkó noiva mochipawas kala.

²⁷ '¡Miálmasteh, tlamachtijkeh iwa fariseos, íxkopته!, porke nomejwah kemi miketéköchtek non kinmistayaliah pero ik tlajtik tentokeh ika iomiwah n miketl iwa nochí tlan yoijtlakawik. ²⁸ Ijkó nomejwah inyakapah n tlakah nonmotah nonyekmila-jkameh, pero ijtk nomoyolo non íxkopته iwa non pitsotikeh.

²⁹ '¡Miálmasteh, tlamachtijkeh iwa fariseos íxkopته!, nomejwah nonkinchijchiwiliah intekoch n profetas iwa nontlayekmajmanah kan tooktokeh n kualteh tlakah non yomikkeh. ³⁰ Iwa nonkijtoah: "Tla tejwah tiyetoskiah ikuak onemiah totatawah, amo tikimpalewiskiah makinniktikah n profetas." ³¹ Ika tlan nonkijtoah, nomonewiah nonkinextiah nontepilwah de akimeh okinmiktikah n profetas. ³² ¡Iwa axa sa poliwi xikyakatlamikah tlan okipewaltijkeh nomotatawah!

³³ '¡Koameh! ¡Nomejwah ken tilkoameh! ¿Kenikki nonkicholiliskeh nomotlaxtlawil non nomechmakaskeh miktla? ³⁴ Yika, Ne nikintitlanis, profetas, ixtlamatkeh iwa tlamachtijkeh. Pero nomejwah sikimeh nonkinmiktiskeh iwa nonkinkrusifkaroskeh, iwa oksikimeh nonkinwitekiskeh kan nomosinagogas iwa nonkintotojtokatinemiskeh itech se noso ok se altepetl. ³⁵ Yika, nomechtatlajtlakoltiskeh de inmikilis nochteh n tlakah yolchipawakeh, desde Abel asta Zacarías ikone n Berequías, akin nomejwah ononkimiktikah itlajkotia n Weyi Tiopa iwa n artal. ³⁶ De milajka nomechilia, nochí nin tlajyyowílistli wetsiki itech ninteh tlakah.

Jesús kichokilia n Jerusalén

(Lc. 13:31-35)

³⁷ '¡Jerusalén, Jerusalén, te tikinmiktia n profetas iwa tikinmojmotla ika tetl non kintitlani Dios! ¡Miak welta oniknekia nikinmoololos mopilwah kemi n siwapio kin-moololos ipiotsitsiwh itlampa iajaswah, pero amo otiknek! ³⁸ Yika, axa nomo Weyi Tiopa mokawas sajki iwa iselti. ³⁹ Porke ayakmó nonnechitaskeh asta maajsiki n tonati ikuak nonkijtoskeh: "Matiochito Akin wits itech Itoka n Toteko Dios."

24

N Weyi Tiopa de Jerusalén kixixitsaskeh

(Mr. 13:1-2; Lc. 21:5-6)

¹ Ikuak Jesús okiski de kan Weyi Tiopa, itlamachtijkawah omikuaniykeh inawak iwa opé kiititiah kenomi omajmantoka n Weyi Tiopa. ² Jesús okinmili:

—¿Nonkitah nochí ni? De milajka nomechilia, mach ok mokawas nion se tetl ipan ok se tetl. Nochi kixixitsaskeh.

Ijkí tlamoche was ikuak ya pojpoliwi tli tlaltíkpaktli

(Mr. 13:3-23; Lc. 21:7-24; 17:22-24)

³ Ikuak Jesús oewatoka kan Olivostepetl, itlamachtijkawah omikuaniykeh inawak iwa okitlajtlanijkeh:

—Techili, ¿kemania ijkó tlamoche was, iwa tlan monextis ikuak ya tiwalmuikas iwa kemania ya tlajtlamis nin tlaltíkpaktli?

⁴ Jesús okinnankili:

—Ximotlachilikah, amaka manomechkajkayawa, ⁵ porke miakeh witseh itech Notoka iwa kijtoskeh: "Ne Ni Cristo", iwa miakeh kinkajkayawaskeh. ⁶ Nomejwah nonkikakiskeh onka guerra iwa motlapowiskeh yetos guerra. Pero amo ximomojistikah, porke ijkó tlamoche was, pero ayamó tlamis n tlaltíkpaktli. ⁷ Porke se país momakas iwa n ok se,

iwa se altepetl momakas iwa n ok se. Yetos apisotl, iwa sentetl tlalolinis. ⁸ Pero ikuak ijkó tlamochiwas, sakin peva n tlaijyowílistli.

⁹ Ikuak nomechtemaktiskeh para manomechtlaifyowiltikah iwa nomechmiktiskeh. Nochteh n tlaltipaktlakah nomechkokoliskeh por nonnechneltokah. ¹⁰ Ikuak miakeh ayakmó kineltokaskeh Dios, mokokoliskeh iwa motejtemaktiskeh. ¹¹ Monextiskeh miakeh profetas tekajkayajkeh iwa miakeh kinkajkayawaskeh. ¹² Momiakilis n tlajtlákoli, yika miakeh ayakmó tetlasojtlaaskeh. ¹³ Pero akin nochi kixikos, momakixtis. ¹⁴ Iwa ikuak nin kualitlátoli non techilia kenomi Dios tlanawatia, motetlapowis itech nochi n tlaltípkaktli para nochteh makimaticah. Iwa ikuakó, tlamis n tlaltípkaktli.

¹⁵ Ikuak nomejwah nonkitaskeh tlan pitsotik moketos kan Weyi Tiopa. Makajsikamatí akin kiama poa tlan okikuilo n profeta Daniel, —akin kikaki makajsikamatí—,* ¹⁶ akimeh yetoskeh kan tlali de Judea, macholojtiwetsikah kan tepemeh. ¹⁷ Akin yetos ikpak ikal, amo mawaltemo makikixtiki itla, ¹⁸ iwa akin yetos itlala amo mawalmokopa icha makikuiki ikoto. ¹⁹ ¡Miálmasteh n siwameh non itech non ora makichixtokah konetl noso matlachichitjtokah! ²⁰ Ximotiotajsatsilikah tla noncholoskeh, amo mayeto itech sewaya nion itech sábado, ²¹ porke n tlaijyowílistli yetos satlawel temohti non ayamaka ijkó okitak desde ikuak omonexti n tlaltípkaktli, iwa ayik oksepa ijkó tlamochiwas. ²² Iwa tla nonteh tonatijmeh amo motsikitsintiliskiah, amaka yolitoskia, pero Dios kintsikitsintilis nonteh tonatijmeh por akimeh Ye yokinmopejpeni.

²³ Ikuakó tla se nomechilis: “Xikitakah, nika kajki n Cristo” noso, “nepa” amo xikneltokakah. ²⁴ Porke monextiskeh cristos iwa profetas tekajkayajkeh, iwa kinchibawaskeh wejweyi señales iwa milagros non ayik motikateh, kinkajkayawaskeh n tlakah iwa kinekiskiah asta akimeh Dios yokimpéjpenki. ²⁵ Xikilnamikikah tlan Ne yonomechmatiltjika. ²⁶ Yika, tla se nomechilia: “Xikitakah nepa ka kan tlaltejtéyinki”, amo xiwiyah, noso: “Xikitakah, nepa tlaatitok”, amo xikneltokakah. ²⁷ Porke ijkó kemi ikuak tlalmijmilini mota kan ik kisa tonati asta kan kalaki tonati, ijkó tlamochiwas ikuak niwalmokopas Ne Non onimochi ni tlakatl. ²⁸ Iwa san kan ik yetos n miketl ompa moololoskeh n tsojpilomeh.

Jesús walmokopas

(Mr. 13:24-37; Lc. 21:25-33, 17:26-30, 34-36)

²⁹ Sa nima ikuak yopanokeh nonteh tonatijmeh de tlaijyowílistli temohti, n tonati walsewis, n metsi ayakmó tlawis. *Is. 13:10* N sítlalteh wetsiskeh, iwa n chikawálistli non kajki ilwikak bibiokas. *Is. 34:4* ³⁰ Ikuakó motas itech ilwikak noneskayo Ne Non onimochi nitlakatl. Iwa nochteh n tlaltipaktlakah mawiskeh. Iwa nechitaskeh Ne Non onimochi nitlakatl, niwits ipan mextli de ilwikak ika miak weletiflistli iwa mawistílistli.

³¹ Iwa ikuak kipitsaskeh n trompeta kintitlanis iangelwah iwa kinmoololos nochteh n tlakah non Ye yokinmopejpenili itech nochi n tlaltípkaktli.

³² Xikkajksikamatikah tlan kijtosneki nin tlapoálistli: Ikuak imamayowah n igoskuaw-itl seliah iwa peva moxiuyotiah, nomejwah nonkimatokeh ya pevas n tonala. ³³ Yika, ikuak nochi ni nonkitaskeh, xikmatikah ya tlamochiwas. ³⁴ De milajka nomechilia, nochi ni tlamochiwas achto de maixpoliwkah n tlakah non yolitokeh itech ninteh tonatijmeh. ³⁵ N ilwikak iwa n tlaltípkaktli pojpoliwiseh, pero notlajtol mach pojpoliwi.

³⁶ Pero n tonati iwa n ora ikuak ijkó tlamochiwas amaka kimi, nion ángelteh non kateh ilwikak, nion Ne, yej sanwel Notajtsi kimatok.

³⁷ Iwa ijkó kemi opanok ikuak onemia n Noé, ijkó yetos noiva ikuak niwits Ne Non onimochi ni tlakatl. ³⁸ Itech nekateh tonatijmeh ikuak ayamó owalaya n chikawak kiawitl, n tlakah otlakuayah, okoniah, omonamiktiayah iwa okinmijtlaniah ichpokameh, asta n tonati ikuak Noé okalak kan weyi arka. ³⁹ Mach okajksikamatkeh asta ikuak okinmajisiko non kiawitl temohti iwa nochteh okinwík. Ijkó noiva tlamochiwas ikuak niwalmuikas, Ne Non onimochi ni tlakatl. ⁴⁰ Itech non tonati, ome tlakah yetoskeh

* *24:15 Xikitakah Dan. 9:27.*

intlala. Se kiwikaskeh iwa ok se kikajtewaskeh. ⁴¹ Ome siwameh testoskeh. Se kiwikaskeh iwa ok se kikajtewaskeh.

⁴² 'Xiijsatokah, porke amo nonkimatih kemania walmuikas Nomoteko. ⁴³ Pero xikkajsikamatikah tlan nomechilia: tla se chane kimatischia tlan oras kalakiki n ichtek, ye ijsatoschia iwa amo kitekawiliskia aka makalaki icha para makitlachteki. ⁴⁴ Ijkó nomejwah noiwa xiijsatokah, porke Ne Non onimochi ni tlakatl niwalkalakiki ikuak nomejwah mach nonnechchiah.

*N tetlakéwali tetlakitak iwa non amo tetlakita
(Lc. 12:41-48)*

⁴⁵ 'N tekowa kipejpena se tetlakéwali yekmilajka iwa tetlakitani, ye kinawatia makin-mokuitlawi n oksikimeh tlakéwalteh iwa makintlakualti ipan ora. ⁴⁶ ¡Miak pakílistli kipianeká tlakéwale non iteko kualajsi kichijtok tlan okinawatil! ⁴⁷ De milajka nomechilia, iteko kitlalis makinawati nochi tlan kipia. ⁴⁸ Pero tla se amo kuali tetlakéwale, kimolia: "Noteko ok wejkawas", ⁴⁹ iwa pewa kintlaijyowiltia n tetlakéwalteh, iwa tlakuajtinemi iwa konitinemi iwan tlawankeh. ⁵⁰ Ikuak n tekowa walmokopa itech tonati ikuak itlákau amo kichia, iwa itech se ora ikuak ye amo kimati, ⁵¹ kitlaijyowiltis chikawak iwa kititlanis kan kateh n íxkopteh. Ikuakó chokas iwa tlannetsonis.

25

N májtakteh ichpokameh

¹ 'Itech ilwikak kan Dios tlanawatia, ye kemi omochijkeh májtakteh ichpokameh non okinmonankeh intlawilwah iwa okinamikitoh n novio. ² Mákuili ichpokameh kuali intlalnamikilis iwa mákuili amó. ³ Non amo tlalnamikilisejkeh, okinwikakeh intlawilwah pero mach okiwikakeh oksiki aseite. ⁴ Pero n ichpokameh tlalnamikilisejkeh, ixkoya okiwikakeh oksiki aseite para intlawilwah. ⁵ Kemi n novio owejkawaya, nochteh n ichpokameh okinkitski kochílistli, iwa okochtlamilajkeh. ⁶ Kemi ik tlajkoyuak aka owaltsajtsik: "¡Ompa wits n novio, xikonnamikitih!" ⁷ Ikuakó nochteh n ichpokameh nomejtewakeh iwa opé kinyektlaliah intlawilwah. ⁸ Iwa n mákulteh ichpokameh non amo tlalnamikilisejkeh okinmilijkeh non tlalnamikilisejkeh: "Techonmakakah siki nomoaseite, porke totlawilwah ya sejseujtokeh." ⁹ Pero n ichpokameh non tlalnamikilisejkeh okinmilijkeh: "Amó, porke tla tomechmakaskeh, mach ok techajxilis nion nomejwah mach nomechajxilis. Okachi kuali xiwiah kan monamaka iwa xikmokowikah." ¹⁰ Pero ikuak n mákulteh okikoatoh inmaseite, n novio owalkalakiko. N ichpokameh non omotlatlalijkah okalakeh iwa n novio kan monamiktilo iwa owalmotsak n kaltentli. ¹¹ Satepa okalakikoh non amo tlalnamikilisejkeh iwa omotlatlautiayah: "¡Noteko, Noteko, techtlatlpoli!" ¹² Pero ye okinnankili: "De milajka nomechilia, ne amo nomechixmati."

¹³ Ikuakó Jesús okinmili:

—Xiijsatokah nomejwah, porke amo nonkimatih tlan tonati nion tlan ora niajsiti.

Tlapoálistli itech tomi

(Lc. 19:11-27)

¹⁴ 'Itech ilwikak kan Dios tlanawatia, noiwa tlamoche iwa kemi se tlakatl non ya onewaskia wejka. Okínnotski itlakawah iwa okinmajmakatewak itomi makitekitilikah.

¹⁵ 'Seme de yejwah okimák mákuili sentenario, ok se okimák ome sentenario, iwa non ok se okimák san se sentenario. N tekowa okinmajmaktili itomi kemi ye okiyeyekoli weletis kitekitiltiskeh, iwa oonewak. ¹⁶ Non okinseli mákuili sentenarios, opé tlasemana ika non tomi iwa okíntlanki ok mákuili sentenario. ¹⁷ Noiwa non okimakakeh ome, okíntlanki ok ome sentenario. ¹⁸ Pero non okimakakeh sanwel se sentenario, okitlalpacho iwa okitlaati n tomi non okimák iteko.

¹⁹ 'Miakeh tonatijmeh satepa, omokopato inteko, iwa okintlajtlani itlakawah tlan okichijkeh ika itomi. ²⁰ Achto okalak non okiselijka mákuili sentenario, iwa okimaktili iteko ok mákuili sentenario iwa okili: "Noteko, tejwatsi otechmák mákuili sentenario,

xikita onikíntlanki ok mákuili.” ²¹ Iteko okili: “Kuali otikchi, te kuali tlakéwale iwa titetlakitak. Te kuali otiktektilti tlan san achitsi onimitsmák, ne nimitsmakas okachi miak. Axa, xikalaki iwa xiyolpaki nowa.” ²² Noiwa omíjkuani non okiselijka ome sentenario iwa okijo: “Noteko, tejwatsi otechmák ome sentenario, xikita onikíntlanki ok ome sentenario.” ²³ Iteko okili: “Kuali otikchi, te kuali tlakéwale iwa titetlakitak. Te kuali otiktektilti tlan san achitsi onimitsmák, ne nimitsmakas okachi miak. Axa, xikalaki iwa xiyolpaki nowa.” ²⁴ Omíjkuani noiwa non okiseli sanwel se sentenario, iwa okili: “Noteko, nikmatok tikuejsi iwa tipixka kan amo titooka, iwa titlaoololoa kan amo otitlatepe. ²⁵ Yika, onímaujki iwa onikthalpacho motomi. Axa nika ka tlan moaxka.” ²⁶ Iteko okinankili: “Amo tikuali tlakéwale iwa titlátsijki, kuali yotikmatoka nipixka kan amo nitooka, iwa nitlaoololoa kan amo nitlatepewa. ²⁷ Okachi kuali tikonkawaskia notomi kan banko, iwa ikuak nimokopaskia, nikselskia notomi ika ikoneyo. ²⁸ Xikkixtilakah n tomi, iwa xikmactilikah non kimpia májtlaktli sentenario.” ²⁹ Porke akin kipia, kimakaskeh okachi, iwa okachi kitlawelpias. Pero akin achitsi kipia, nochi kikixtiliskeh tlan san achitsi kipia. ³⁰ Iwa nin tlakéwale non amitla iteki, xikixtikah kala kan tleyua. Ompa chokas iwa tlannetsonis.

Dios kinmixkomakaki nochteh n tlaltikpaktlakah

³¹ Ikuak Ne Non onimochi ni tlakatl niwalmuikas ika nomawistilis iwan nochteh noangelwah, ikuakó nimoyayantis ika nochi nomawistilis. ³² Iwa nochteh n tlaltikpaktlakah moololoskeh noyakapa, iwa Ne nikinxexelos ijkó kemi se tlájpixki kinxexeloa n ichkameh iwa n tentsomeh. ³³ Nikintalnis n ichkameh ik noyekma iwa n tentsomeh ik noopochma. ³⁴ Ikuakó Ne n Rey nikinmilis non kateh ik noyekma: “Xiwikih nomejwah, non Notajtsi onomechtiochi. Xikselikah nochi tlan nomechaxkataliskeh kan ilwikak non Dios onomechmajmanili desde ikuak okichijchi n tlaltípkaktli. ³⁵ Porke onixitlatlak iwa ononnechtlakualtijkeh, oniamijmik iwa ononnechatlitijkeh, iwa maya amo ononnechixmatiah, ononnechkalotijkeh. ³⁶ Amo onikpiaya notlake iwa ononnechtlakentijkeh, onimokokoaya iwa ononnechtlajpalotoh. Ikuak onitsaktoka, ononnechitatoh.” *Is. 58:6-10; Ez. 18:7; He. 13:3; Stg. 1:27, 2:15-16*

³⁷ Ikuakó tlanankiliskeh n yolmilajkameh iwa kijtoskeh: “Toteko, ¿kemanía otimitsitakeh otixitlatlak iwa otimitstlakualtijkeh?, noso ¿otiamikkia iwa otimitsatlitijkeh? ³⁸ Noso ¿maya amo otimitsixmatiah, otimitskalotijkeh, noso amo otikpiaya tlan tikonakis iwa otimitsatlakentijkeh? ³⁹ Noso, ¿kemanía otimokokoaya, noso otitsaktoka iwa otimitsontlajpalotoh?” ⁴⁰ Ikuakó nikinnankilis: “De milajka nomechilia, ikuak nomejwah ijkí ononkinchiwilikeh nokniwah non okachi amitla impati, Ne ononnechchiwilikeh.”

⁴¹ Ikuakó nikinmilis non kateh ik noopochma: “Ximoachiwakah nonawak, nomejwah amo nonkualteh, xiwiah ijtk tletl non ayik sewis, non Dios okichijchi para n diablo iwa iangelwah. ⁴² Porke onixitlatlak iwa amo ononnechtlakualtijkeh, oniamijmik iwa amo ononnechatlitijkeh. ⁴³ Amo ononnechixmatiah iwa amo ononnechkalotijkeh, amo onikpiaya tlan nikonakis iwa mach ononnechtlakentijkeh, onimokokoaya iwa onitsaktoka iwa amo ononnechtlajpalotoh.” ⁴⁴ Ikuakó yejwah nechiliskeh: “Toteko, ¿kemanía otimitsitakeh otixitlatlak noso otiamikia, noso amo otikpiaya kan timokalotis, noso amo otikpiaya motlake, noso otimokoko, noso otitsaktoka iwa amo otimitspalewijkeh?” ⁴⁵ Ikuakó nikinnankilis: “De milajka nomechilia, ikuak nomejwah amo ononkinchiwilikeh nokniwah non okachi amitla impati, Ne amo ononnechchiwilikeh.”

⁴⁶ Ninteh kintitlaniskeh kan nochipa tlaijywitoskeh, iwa n yolmilajkameh yolitoskeh semijkak.

² —Nomejwah ya nonkimatekeh, poliwi sa ome tonati pewas n ilwitr de Paskua. Ne Non onimochi ni tlakatl nechtemaktiskeh manechkrusifikarokah.

³ Ijkuakó n tiopixkeh non tlayakantokeh, non kitemachtiah n tlanawátili, iwa n tetajmeh non tlayakantokeh kan Weyi Tiopa, omoololojkeh icha n Caifás. ⁴ Ompa omotlatlalwijkeh kenomi kitlajtlakolmamaltiskeh n Jesús iwa ijkó kikitskiskeh iwa kimiktiskeh. ⁵ Noiwa okimoliayah:

—Amo tikkitskiskeh itech ilwitr de Paskua, porke san tikimpajsoloskeh n tlakah.

Se siwatl kikuaxawilia ajwiálistli n Jesús

(*Mr. 14:3-9; Jn. 12:1-8*)

⁶ Kan altepetl de Betania, Jesús okatka icha n Simón non achto okipiaya lepra. ⁷ Ijkuakó se siwatl okualikaya se itekontsi tentok ika ajwiálistli non satlawel patio. Omijkuani kan otlakuajtoka Jesús iwa okitekili ajwiálistli ipan itsonteko. ⁸ Ijkuak ijkó okitakeh itlamachijkawah okualankeh iwa okijtokeh:

—¿Tleka san okawilti? ⁹ Weletiskia monamakaskia patio, iwa n tomi tikanmakaskiah non próbesteh.

¹⁰ Jesús okinkak iwa okinmili:

—Amo xikkuejsokah nin siwatl, ye okichi tlan kuali. ¹¹ N próbesteh nochipa yetoskeh nomowah, pero Ne, amo nochipa nonnechpixtoskeh. ¹² Nin siwatl, ijkuak onechtlilili ajwiálistli itech nokuerpo, yotlayektlali para ijkuak nechtookaskeh. ¹³ De milajka nomechilia, itech nochi n tlaltíkpaktli kan motetlapowis nin kualitlájtoli, noiwa motlapowiskeh tlan okichi nin siwatl, iwa ijkó se kilnamikis.

Judas Iscariote kitemaktia Jesús

(*Mr. 14:10-11; Lc. 22:3-6*)

¹⁴ Ijkuakó Judas Iscariote seme de n májtlaktli iwa n ome itlamachijkawah, oyá kan tiopixkeh non tlayakantokeh ¹⁵ iwa okinmili:

—¿Kech nonnechmakaskeh tla nomechmaktilis n Jesús?

Yejwah okitamachijkeh sempóali iwa n májtlaktli (30) platajtomi. ¹⁶ Ijkuakó, Judas Iscariote okitemoliaya kenomi kitemaktis Jesús.

N tlamachijkkeh kimajmanah n tlákuali de Paskua

(*Mr. 14:12-25; Lc. 22:7-23; Jn. 13:21-30; 1 Co. 11:23-26*)

¹⁷ Itech ipewaya n ilwitr de Paskua ijkuak mokua n paj non amo kipia levadura, itlamachijkawah n Jesús omijkuanijkeh inawak, iwa okitlajtlanijkeh:

—¿Kani tkmonekiltia matikchijchiwatih n tlákuali de Paskua?

¹⁸ Ye okinmili:

—Xiwiah Jerusalén icha n se tlakatl iwa xikilikah: “N Tlamachti kijtoa: Noora ya walajsitiwits, iwa mocha nikmomajsewis n tlákuali de Paskua iwan notlamachijkawah.”

¹⁹ Itlamachijkawah okichijkeh kemi Jesús okinnawati, iwa okimajmankeh n tlákuali de Paskua.

²⁰ Ijkuak otleyuak, Jesús omotlali inakastla n mesa iwa n májtlaktli iwa ome itlamachijkawah. ²¹ Ijkuak otlakuajtokah okinmili:

—De milajka nomechilia, seme de nomejwah nechtemaktis.

²² Yejwah tlawel omoyolkokojkeh, iwa sejse opé kitlajtlania:

—Noteko, ¿kox ne nimitstemaktis?

²³ Jesús okinnankili:

—Akin tlapaloa nowa, ye akin nechtemaktis. ²⁴ Milák, Ne Non onimochi ni tlakatl nikpia de nimochiwas kemi kijtoa itlajkuilol Dios, pero jmalma n tlakatl non nechtemaktis! Okachi kuali non tlakatl amo tlakatiska.

²⁵ Ijkuakó Judas non kitemaktis n Jesús okili:

—Rabí*, ¿kox ne nimitstemaktis?

Jesús okinankili:

* 26:25 Rabí kijtosneki tlamachti

—Te yotikijto.

²⁶ Ijkuak otlakuajtokah, Jesús okónanki paj iwa omotlasojkama inawak Dios, iwa ijkuak yokitlajtlápangki, okinmák itlamachtijkawah iwa okinmili:

—Xikmomajsewikhah, ye nin nokuerpo.

²⁷ Ijkuakó okónanki n kopa, iwa omotlasojkama inawak Dios. Okimpanoltli itlamachtijkawah iwa okinmili:

—Nonnochteh xikonikah, ²⁸ ye nin noesso non ika nimotlajtolsenkawa nomowah, nin noesso moyawas para miakeh makintlapojpolwilakah intlajtlakolwah. ²⁹ De milajka nomechilia: Ayakmó nikonis iayo n uvas, asta neká tonati ijkuak oksepa tikmosepanmajsewiskeh n yankuik vino, nepa ilwikak kan Notajtsi tlanawatia.

Jesús kijtoa Pedro kijtos amo kixmati

(Mr. 14:26-31; Lc. 22:31-34; Jn. 13:36-38)

³⁰ Satepa, ijkuak yotlankeh okitlakuikakeh se salmo oyájkeh kan Olivostepetl.

³¹ Ijkuakó Jesús okinmili:

—Nin yúali nochteh nonkikawaskeh nomotlaneltokalis, porke itech itlajkuilol Dios ijkuilitok: “Nikmiktis n tlájpixki, iwa ichkameh moxexeloskeh.” *Zac. 13:7* ³² Pero keman nimoyolitis, Ne nitlayakanas Galilea.

³³ Ijkuakó Pedro okinankili:

—Maya nochteh mamitspinawilakah ne amo nipinawas.

³⁴ Ijkuakó Jesús okili:

—De milajka nimitsilia, axa itech nin yúali achto de tlakuikas n kaxtil, te yotikijto eyi welta amo techixmati.

³⁵ Pedro okijto:

—Maya mowa manechmiktikah, amayik nikijtos amo nimitsixmati.

Iwa nochteh itlamachtijkawah noiva ijkó okijtokeh.

Jesús motiotsajtsilia kan werto de Getsemaní

(Mr. 14:32-42; Lc. 22:39-46)

³⁶ Satepa Jesús oyá iwan itlamachtijkawah kan se werto non itoka Getsemaní, iwa okinmili:

—Nika ximotlajtlalikah, Ne nepa nio nimotiotsajtsiliti.

³⁷ Iwa okiwík n Pedro, iwa itelpochwah n Zebedeo, Jacobo iwa n Juan iwa opé moyolkokoa iwa yoltelini. ³⁸ Iwa Jesús okinmili:

—Satlawel nimoyolkokoa mach ok nikxikoa, nikmachilia kemi nimikis, nika ximokawakah xijsatokah nowa.

³⁹ Jesús oyá ok achitsi tlayakapa, ompa omotlankuáketski asta okitelko n tlali ika ixkuak iwa omotiotsajtsiliaya:

—Notajtsi, tla weletis amo manitlaijyowi. Pero amo mamochiwa kemi Ne nikneki, yej kemi Tejwatsi tikmonekiltia.

⁴⁰ Satepa omókopki kan itlamachtijkawah, iwa okinmajsito kochtokeh, iwa okili n Pedro:

—¿Nion se ora ononweletkeh ononmijsatokah nowa? ⁴¹ Xijsatokah iwa ximotiotsajtsilikah, para amo xiwetsikah itech tlajtlákoli. De milajka nomechilia, nomoespíritu mochikajtok, pero nomokuerpo amo chikawak.

⁴² Jesús oksepa omotiotsajtsilito iwa okijto:

—Notajtsi, tla weletis tikachiwas nin tlaijywílistli xikachiwa, pero mamochiwa tlan Tejwatsi tikmonekiltia.

⁴³ Ye oyá kan itlamachtijkawah, iwa okinmajsito kochtokeh porke satlawel okochmikiah iwa inmixtololowah omotsakuayah. ⁴⁴ Ok se welta okinkajteh iwa oyá omotiotsajtsilito ya eyi welta, iwa oksepa omotiotsajtsili ijkó kemi achto. ⁴⁵ Otlanki okinmajsito itlamachtijkawah iwa okinmili:

—Xikochikah iwa ximosewikah. Yoajsiko n ora, iwa Ne Non onimochi ni tlakatl nechtemaktiskeh inmak tlajtlakolejkeh. ⁴⁶ ¡Ximewakah, tiawih! ¡Ompa wits akin nechtemaktis!

Kikitskiah n Jesús

(*Mr. 14:43-50; Lc. 22:47-53; Jn. 18:2-11*)

⁴⁷ Jesús ok otlajtojtoka ijkuak okalakiko n Judas, seme de itlamachtijkawah. Miakeh okinyakantiwalaya ika espadajteh iwa kuameh. Ninteh okwalintitlankeh n tiopixkeh non tlayakantokeh iwa n tetajmeh non tlayakantokeh kan Weyi Tiopa.

⁴⁸ Judas non okitemakti n Jesús, yokinmilika:

—Akin ne nikixtennamikis, Ye n Jesús, ¡xikkitskikah!

⁴⁹ Sannima omikuani inawak Jesús iwa okili:

—¡Panolti Rabí!

Iwa okiixtennamik. ⁵⁰ Jesús okinankili:

—Noknitsi, xikchiwa tlan otikchiwako.

Ijkuakó n tlakah omijkuanijkeh inawak Jesús iwa okikitskijkeh.

⁵¹ Ijkuakó Pedro okwalkixti iespada iwa okinakastek itlákau n weyi tiópixki Caifás.

⁵² Ijkuakó Jesús okili:

—Xiklaati moespada, porke akimeh kiwakah iespada, noiwa ika espadá kinmiktiskeh.

⁵³ ¿Mach amo tikmati weletis niktlajtlanilis Notajtsi iwa axa Ye nechalintitlanilis eyipóali iwa n májtlaktli mil ángeles? ⁵⁴ Tla ijkó, ¿kenomi mochiwas tlan ijkuitlak, kan kijtoa ijkó tlamochiwas?

⁵⁵ Ijkuakó Jesús okinmili n tlakah:

—¿Tleka ononnehkitskikoh ika espadá iwa ika kuawitl kemi niyetoskia ni tlajtlakole?

Nochi tonati onitlamachiaya nomonawak kan Weyi Tiopa, iwa ayik ononnehkitskijkeh.

⁵⁶ Pero nochteh itlamachtijkawah n Jesús okikakajtejkeh iwa ochocholojkeh.

Kiwikah n Jesús kan Sanedrín

(*Mr. 14:53-65; Lc. 22:54-55, 63-71; Jn. 18:12-14, 19-24*)

⁵⁷ Akimeh okikitskijkeh n Jesús okiwikakeh ixpa n weyi tiópixki Caifás, kan omoololokeh non kitemachtiah n tlanawatílistli iwa n tetajmeh non tlayakantokeh kan Weyi Tiopa. ⁵⁸ Pedro san wejka okitokaya n Jesús asta kan patio icha n Caifás, okalak iwa omotlalito iwan tlamokuitlawijkeh de n Weyi Tiopa iwa ijkó kitas tlan tlamochiawaska.

⁵⁹ N tiopixkeh non tlayakantokeh, iwa nochteh non de Sanedrín[†] okitemoliayah kenomi kitlajtlakolmamaltiskeh, iwa ijkó weletis kitlajtlakoltiskeh iwa kimiktiskeh.

⁶⁰ Pero amitla okajsikeh tlan ika kiteiliskeh, maya miakeh okijtokoh tlan amo milák. Pero sa iksemi ovalajkeh ok ome, ⁶¹ non okijtokoh:

—Nin tlakatl okijo: “Ne niweletis nikxijxitinis itiopa n Dios, iwa ipan eyi tonati oksepa nikajkokuis.”

⁶² Ijkuakó n weyi tiópixki Caifás omóketski, iwa okitlajtlani n Jesús:

—¿Amo titlanankilis? ¿Milák tlan ninteh kijtojtokeh?

⁶³ Pero Jesús amo otlanankili. Ijkuakó n Caifás oksepa okitlajtlani:

—Nimitsnawatia ika itoka Totajtsi Dios non yolitok, techili kox Te Ti Cristo, Ikone Dios.

⁶⁴ Jesús okinankili:

—Ejé, te yotikijo. Iwa Ne nomechilia nomejwah nonnechitaskeh Ne Non onimochi ni tlakatl niewatos iyekma Dios Weletini, iwa nonnechitaskeh niwaltemotiwiits de ilwikak ipan mextli.

⁶⁵ Ijkuakó n weyi tiópixki Caifás, omotlakentsomoni iwa okijo:

—Nin tlakatl okixpanawi Dios ika itlajtol! Mach ok moneki aka makiteili, nomonewiah yononkikakeh kenijki okixpanawi Dios. ⁶⁶ ¿Tlan nonkijtoah?

[†] 26:59 Sanedrín: nin grupo kemi de 50 tetajmeh non tlaixkomakah ijkuak kinteiliah akimeh amo kuali kitlakitah itlanawatil Moisés.

Yejwah okijtokeh:

—Tlajtlakole, moneki mamikki.

⁶⁷ Ijkuakó okiixchijchawijkeh, okitekilmakakeh, iwa oksikimeh okixtlajtlatsinijkeh
⁶⁸ iwa okijtoayah:

—Tla Te Ti Cristo, ¡xikyejyekoli akin omitsmák!

Pedro okijto mach kixmati n Jesús

(*Mr. 14:66-72; Lc. 22:56-62; Jn. 18:15-18, 25-27*)

⁶⁹ Pedro oewatoka kala, ijkuakó se iteska n Caifás omijuani iwa okili n Pedro:

—Te noiya otinemia iwan Jesús non de Galilea.

⁷⁰ Pedro amo okimokuiti iwa inmixpa okijto:

—Amo nikmati tlan tikjtoa.

⁷¹ Pedro yokistiaya itech kaltentli, iwa ok se iteska okitak, iwa okinmili n oksikimeh:

—Nin tlakatl noiya onemia iwan Jesús de Nazaret.

⁷² Pedro oksepa amo okimokuiti, iwa asta okisentlali itlajtol:

—Mach nikixmati non tlakatl.

⁷³ Satepa sikimeh omijuani jkeh inakastla n Pedro iwa okilijkeh:

—Milák, te seme de yejwah, porke ijkó titlajtoa.

⁷⁴ Ijkuakó n Pedro opé tlawikaltia iwa okisentlali:

—De milajka, ne mach nikixmati non tlakatl.

Sanima otakuik n kaxtil. ⁷⁵ Ijkuakó Pedro okilnamik tlan Jesús yokilijka: “Keman ayamó tlakuika n kaxtil, te yotikijo eyi welta amo techixmati.”

Otlanki Pedro okiski iwa otlawelchokak.

27

Jesús ixpa n Pilato

(*Mr. 15:1; Lc. 23:1-2; Jn. 18:28-32*)

¹ Ijkuak otláneski, nochteh n tiopixkeh non tlayakantokeh iwa n tetajmeh non tlayakantokeh kan Weyi Tiopa, omoololojkeh iwa okisepantlalijkeh kitemaktiskeh n Jesús para makimiktakah. ² Okijilpijkeh iwa okiwikakeh kan Poncio Pilato n gobernador non walewa de Roma.

Mikki n Judas

³ Ijkuak Judas non okitemakti n Jesús, okima okitlajtlakoltijkeh n Jesús, okiyolkua iwa oyá innawak n tiopixkeh non tlayakantokeh iwa n tetajmeh non tlayakantokeh kan Weyi Tiopa, iwa okinkopilito n sempóali iwa n májtlaktli (30) platajtomí, ⁴ iwa okinmili:

—Onikchi se weyi tlajtlácoli porke onomechmactili se tlakatl iwa amitla okitewikiliaya.

Pero yejwah okinankilijkeh:

—¡Tejwah amo toteki! ¡Ompa te xikita!

⁵ Ijkuak Judas okitlamotlak n tomi ijtit n Weyi Tiopa, iwa omokechpilotó.

⁶ N tiopixkeh non tlayakantokeh okoololojkeh n tomi iwa okijtokeh:

—Mach weletis tiktaliskeh nin tomi ijtit kaxa kan kitlaliah n tomi, porke ika okitlaxtlajkeh imikilis se tlakatl.

⁷ Satepa omoyekkajkeh kikoaskeh ika non tomi se tlali, non itoka Xoktsinchijchi para kipiaskeh se lojar kan kintookaskeh non amo de ompa. ⁸ Yika, non tlali asta axa kinotsah Éstlali. ⁹ Ijkó omochi tlan okijto n profeta: “Okonankeh n sempóali iwa n májtlaktli (30) platajtomimeh. Ijkó kemi n judíojeteh okitlalilijkeh ipati.” *Zac. 11:12-13*

¹⁰ Iwa ika non tomi, okikojkeh n tlali non itoka Xoktsinchijchi, ijkó kemi onechnawati n Toteko.” *Jr. 19:1-13*

Pilato kitlatsintokia n Jesús

(*Mr. 15:2-5; Lc. 23:3-5; Jn. 18:33-38*)

¹¹ Okiwikakeh n Jesús ixpa n gobernador Pilato, iwa ye okitlajtlani:

—¿Te ti Rey de judíos?

Jesús okinankili:

—Ejé, ijkó kemi yotikijto.

¹² N tiopixkeh non tlayakantokeh iwa n tetajmeh non tlayakantokeh kan Weyi Tiopa opé kiteiliah, pero Jesús mach itla okijo. ¹³ Ijkuakó n Pilato okili:

—¿Amo tikkaki nochí tlan yejwah mitsteiliah?

¹⁴ Pero Jesús amitla okinankili, yika n gobernador Pilato mach okimatiá tlan kijtos.

Kitemaktiah n Jesús para makimiktakah

(Mr. 15:6-20; Lc. 23:13-25; Jn. 18:38—19:16)

¹⁵ Nochi xiwitl itech ilwtl de Paskua n gobernador okikajkawaya seme de non tsaktokeh, san akin okipejpenayah n judíojeteh. ¹⁶ Itech nonteh tonatijmeh, otsaktoka se tlakatl non itoka Barrabás non sentetl okixmatiah. ¹⁷ Iwa ken miakeh oolololitokah, Pilato okintlajtlani:

—¿Akin nonkinekih manikkajkawa, Barrabás noso n Jesús, non kinotsah Cristo?

¹⁸ Pilato okimatiá okimaktilijkeh porke oxikojmikiah inawak Jesús.

¹⁹ Ijkuak Pilato oewatoka kan tlaixkomaka, isiwa otlatítlanki makilitih: “Amitla xiktokti non tlakatl yolchipawak, porke axa onitlaijyowi keman oniktejtemik.”

²⁰ Pero n tiopixkeh non tlayakantokeh iwa n tetajmeh okintlatlalwijkeh n tlakah makitlajtlanilikah n Pilato, makikajkawa n Barrabás iwa makimikiá n Jesús. ²¹ Pilato okintlajtlani:

—¿Katlíe de ninteh omeh nonkinekih manikkajkawa?

Yejwah okilijkeh:

—¡N Barrabás!

²² Pilato oksepa okintlajtlani:

—¿Iwa tlan niktoktis n Jesús, non kinotsah Cristo?

Nochteh otlanankilijkeh:

—¡Xikkrusifikaro!

²³ Pilato okinmili:

—¿Tleka, tlan okichi?

Pero yejwah okachi okojsajtsiah:

—¡Xikkrusifikaro!

²⁴ Ijkuak Pilato okitak amo oweletia kintlakawaltis n tlakah, iwa okachi opé mokuej-soah, otlatítlanki makualikilikah atl iwa omomapajpak inyakapah nochteh iwa okijo:

—Ne mach nitlajtlakole tla nonkimiktiah nin tlakatl yolchipawak, ompa nomejwah xiktakah.

²⁵ Iwa nochteh n tlakah otlanankilijkeh:

—¡Mawetsi iesso topah iwa ipan topilwah!

²⁶ Ijkuakó Pilato okinkajkawili n Barrabás, iwa otlanawati makitsonwitekikah n Jesús, iwa okinmaktili n tlakah para makikrusifikarokah.

N soldados kipijpinawiah n Jesús

²⁷ Satepa isoldadojwah n Pilato okiwikakeh n Jesús kan palasio, iwa ompa okiyayawalojkeh. ²⁸ Niman okitlakenkixtijkeh, iwa okikentilijkeh se kapa chichilikitik.

²⁹ Okichijchijkeh se korona ika witstli iwa okitlalilijkeh itech itsonteko. Noiwa okimakitskiltijkeh se akatl kan imayekma. Omotlankuaketsayah iyakapa, okipijpinawiayah, iwa okijtoayah:

—¡Timitsweyijkatlaliah Rey de judíos!

³⁰ Noiwa okichijchawiayah, iwa ika n akatl non okimakitskiltijkeh, okikuawijwitekiah.

³¹ Ijkuak otlanki okipijpinawijkeh, okikixtilijkeh n kapa chichilikitik iwa okikonakiltijkeh itlake iwa okiwikakeh okikrusifikarotoh.

Kikrusifikaroah n Jesús

(Mr. 15:21-32; Lc. 23:26-43; Jn. 19:17-27)

³² Ijkuak yokistiyah de Jerusalén, okinamikeh itech ojtli se tlakatl de Cirene, non itoka Simón, iwa okitoktijkeh makimamali ikrus n Jesús.

³³ Okalakitoh kan se lojar non itoka Gólgota non kijtosneki: Miketsontekomatl.

³⁴ Ompa okimakakeh makoni vino nelitok ika chichik xiwitl. Pero ijkuak Jesús okiyeko, mach okonik. ^{Sal. 69:22}

³⁵ Satepa, okikrusifikarojkeh n Jesús, n soldadojteh okimolijkeh matikawiltakah itlake, san akin kitlanis. Ijkó otlamochi tlan okijto n tiotlajto: okimotlatlanilijkeh notlakenwah iwa okinmoxexelilijkeh. ³⁶ Otlanki ompa omotlajtlalijkeh iwa okimokuitlawijtokah.

³⁷ Iwa ik ikuatsontla okikuilojkeh tleka okimiktijkeh: “Ye ni n Jesús, Rey de Judíos.”

³⁸ Noiwa okinkrusifikarojkeh ome ichtekeh inajnakastla, se kan iyekma iwa n ok se kan iopochma. ³⁹ Iwa non ik ompa opanoayah fiero okitenewayah iwa omokuawiwiyoayah,

⁴⁰ iwa okiliayah:

—¿Amo te, otikijto tikxijxitinis n Weyi Tiopa, iwa ipan eyi tonati oksepa tikajkokuis? ¡Monevia ximopalewi! ¡Tla milák Te Ikone Dios, xitemo de kan krus!

⁴¹ Noiwa n tiopixkeh non tlayakantokeh, n tetajmeh non tlayakantokeh kan tiopa iwa non kitemachtia n tlanawátili, okipipinawiayah iwa okiliayah:

⁴² —Okinmakixti oksikimeh, pero Ye inewia amo weleti momakixtia. Tla milák Ye n Rey de Israel, matemo de kan krus iwa tikneltokaskeh. ⁴³ Omosenmák imak Dios, axa Dios makimakixti tla de milajka kitlasojtla, porke Ye okijto: “Ne Ikone Dios.” ⁴⁴ Nichtekeh non okinkrusifikarojkeh iwan Jesús noiwa fiero okitenewaya.

Mikki n Jesús

(Mr. 15:33-41; Lc. 23:44-49; Jn. 19:28-30)

⁴⁵ Ijkuakó otleyuak itech nonteh tlalmeh, ik tlajko tonati iwa asta las tres. ⁴⁶ Kemi las tres Jesús otsajtsik chikawak:

—Elí, Elí ¿lama sabaktani? —noni kijtosneki: Notajtsi, Notajtsi, ¿tleka otechkajte noselti?

⁴⁷ Sikimeh non ompa okatkah, okikakeh iwa okijtojkeh:

—Nin tlakatl kinotok n profeta Elías.

⁴⁸ Ijkuakó seme de yejwah omotlelo okipolakito siki esponja itech vinagre, iwa ika se akatl okonmák makoni n Jesús. ⁴⁹ Pero oksikimeh okijtojkeh:

—Xikkawa, tikitaseh kox wits kimakixtiki n profeta Elías.

⁵⁰ Jesús oksepa otsajtsik chikawak, iwa omikki. ⁵¹ Iwa sa nima otlajkotsáyanki n tsótсолi non kajki ijtik Weyi Tiopa iwa owatlalólinki, iwa n temeh otlajtlapankeh. ⁵² N tékochteh owalmotlapojkeh iwa miakeh non yomikkeh non okitlakitakeh Dios, omoyolitijkeh.

⁵³ Iwa ijkuak Jesús omoyoliti, noiwa miakeh omoyolitijkeh iwa okalakeh Jerusalén, iwa miakeh okimitakeh.

⁵⁴ Ijkuak n kapita iwa nochteh non iwa okimokuitlawijtokah n Jesús, okimachilijkeh otlatlólinki iwa okitakeh noch iwa opanotoka, sa tlawel omomojtijkeh iwa okijtojkeh:

—¡Milák, nin tlakatl okatka Ikone Dios!

⁵⁵ Noiwa ompa okatkah sikimeh siwameh non san wejka okonitokah. Ninteh siwameh ovalajkeh de Galilea iwa okipalewijtiwalayah n Jesús. ⁵⁶ Ompa inwah okatkah n María de Magdala, María inmamá n Jacobo iwa n José, noiwa ompa okatka inmamá itelpochwah n Zebedeo.*

Kitookah n Jesús

(Mr. 15:42-47; Lc. 23:50-56; Jn. 19:38-42)

⁵⁷ Ijkuak yotleyuatoka, okalakiko José non owalewatoka de Arimatea. Ye okipiaya miak tomi. Nin tlakatl okineltokaya n Jesús. ⁵⁸ Nin José okitato n Pilato iwa okitlajtlanili ikuerojkeh Jesú. Iwa Pilato otlanawati makimaktilikah. ⁵⁹ José okontemowi ikuerojkeh n Jesús, okimemelo ika se tlakemil chipawak ⁶⁰ iwa okitlalito kan se yankuik tékochtli non okikoyonijkeh itech tetl. Satepa, okitentsak ika se weyi tetl tankachtik iwa oyá.

* 27:56 inna itlamachtijkawah n Jesús, yejwah n iknimeh Jacobo iwa n Juan

⁶¹ Ompa oewatokah iyakapa n tékochtli, María non owalewatoka de Magdala iwa non ok se María.

Kiyekmokuitlawiah n tékochtli kan okitookakeh n Jesús

⁶² Non ok se tonati, n tiopixkeh non tlayakantokeh sansikah iwa n fariseos, okitatoh n Pilato ⁶³ iwa okiljeh:

—Otimitsonitakoh tejwatsi, porke otikilnamikeh ikuak oyolitoka neká tekajkaya, okijto ipan eyi tonati moyolitis. ⁶⁴ Yika tejwah tiknekih xitlanawati makimokuitlawijtokah eyi tonati n kúyoktli kan okitookakeh n Jesús. Amo kichiwa itlamachtijkawah yaskeh yuak kikixtitiwel, iwa satepa kijtojtinemiskeh yomoyoliti. Tla ijkó tlakajkayawaskeh okachi techijtlakos.

⁶⁵ Pilato okinmili:

—Nomejwah nonkimpiah nomotlamokuitlawijkeh, xikinwikakah iwa xikmokuitlawitih n tékochtli.

⁶⁶ Yejwah okiyektentsakuatoh n miketékochtli, iwa itech non tetl okipepechilijkeh se seyo. Iwa ompa okinkajtejkeh sikimeh intlamokuitlawilwah.

28

Jesús moyolitia

(Mr. 16:1-8; Lc. 24:1-12; Jn. 20:1-10)

¹ Ikuak yopanok n sábado ikuak mosewia n judíos, iwa yotlanestiwalaya n domingo, ipewaya n samano, María de Magdala iwa non ok se María ovalajkeh okitakoh n miketékochtli. ² Sannima chikawak otlalólinki, porke se iángel Toteko Dios owaltemok de ilwikak, iwa okalakito kan miketékochtli, okaachi n tetl non ika otentsaktoka iwa ipan omotlali. ³ Ixko n ángel otsotlania kemi ikuak tlamijmilini, iwa itlake satlawel istaktik kemi tesiwitl. ⁴ Ikuak n tlamokuitlawijkeh okitakeh, sa tlawel omomojtijkeh iwa asta opé bibiokah iwa omokajkeh kemi yetoskia yomikkeh.

⁵ Pero n ángel okinmili n siwameh:

—Amo ximomojtikah. Ne kuali nikmatok nomejwah nonkitemoah Jesús, non okikrusifikarojkeh. ⁶ Mach ok nika kajki, Ye yomoyoliti ijkó kemi okijtoja. Xiwikh, xikitakih kan achto owlantoka. ⁷ Xajtiwetsikah, xikinmilitih itlamachtijkawah Ye yomoyoliti de kan kateh non yomikkeh. Iwa Ye tlayakanas Galilea iwa ompa nonkitaskeh. Ye nin tlan omonekia nomechilis.

⁸ Ikuakó n siwameh owalkikistiwetskeh de kan tékochtli, majmautiwiher pero noiwa ika pakílistli. Omotlelojkeh okinmatiltitoh itlamachtijkawah. ⁹ Ikuakó Jesús okinmonextili iwa okintlajpaloo. N siwameh omikuanikeh inawak, okikxinawajtekeh iwa okiweyijkachikeh. ¹⁰ Iwa Jesús okinmili:

—Amo ximawikah. Xikinmilitih nokniyah mawiah Galilea, iwa ompa nechitaskeh.

Kiseliah tomi n tlamokuitlawijkeh para matlakajkayawakah

¹¹ Ikuak n siwameh oyayah kinmatiltitiwel itlamachtijkawah n Jesús, sikimeh non okimokuitlawijtokah n miketékochtli, okalakitoh Jerusalén iwa okinmatiltitoh n tiopixkeh non tlayakantokeh nochí tlan otlamochi. ¹² N tiopixkeh non tlayakantokeh omoololojkeh iwa n tetajmeh non tlayakantokeh kan Weyi Tiopa iwa ompa okimolijkeh tlan kichiwaskeh. Okinmakakeh miak platajtomi intlamokuitlawilwah. ¹³ Noiwa okinmilijkeh:

—Nomejwah xikijtokah itlamachtijkawah n Jesús ovalajkeh yuak, iwa ikuak nomejwah ononkochtokah, okichtekikoh n cuerpo. ¹⁴ Iwa tla n gobernador kimatis, amo ximotekipachokah, tejwah timotlapowiskeh iwan ye.

¹⁵ Ikuakó n tlamokuitlawijkeh okiselijkeh tomi iwa okichijkeh kemi okinnawatijkeh. Iwa n judíojteh asta axa ye noni tlan tetlapowiah.

Jesús kintitlani itlamachtijkawah matetlapowikah de n kualitlájtoli

(Mr. 16:14-18; Lc. 24:36-49; Jn. 20:19-23)

¹⁶ Ijkó, n májtlaktli iwa n se (11) itlamachtijkawah oyájkeh Galilea, ipan tepetl kan Jesús okinmili mawiah. ¹⁷ Iwa ijkuak okitakeh n Jesús, okiweyijkatlalijkeh, maya sikimeh mach okineltokayah kox Ye n Jesús. ¹⁸ Jesús omijkuani innawak iwa okinmili:

—Notajtsi onechmaktili nochí para Ne manitlanawati itech ilwikak iwa itech tlaltíkpaktli. ¹⁹ Axa, xiwiah iwa xikinmachtikah nochteh n tlaltíkpaktlakah para mamochiwakah notlamachtijkawah, iwa xikinkuaatekikah itech itoka Totajtsi, itech itoka Ikone, iwa itech itoka n Espíritu Santo. ²⁰ Xikinmachtikah makiyektlakitakah nochí tlan yonomechnawati, iwa xikilnamiktakah Ne nochipa niyetos nomowah, asta matlami n tlaltíkpaktli.

N Kualtlájtoli non Okikuilo San Marcos

*Juan Bautista tlamachtia kan amaka chanti
(Mt. 3:1-12; Lc. 3:1-9, 15-17; Jn. 1:19-28)*

¹ Ijkí opé n kualtlájtoli de Cristo Jesús Ikone Totajtsi Dios.

² N profeta Isaías okikuilo:

Ne niktlayakanaltis akin tlatematiltijtias moyakapa,
mamitsyejyektlaliliti n ojli.

³ Mokaki se tlájtoli chikawak non tetsajtsilia kan amaka chanti:

“Xikyektlalilikah iwa xikmilawakah iojwiu n Toteko.”

Is. 40:3

⁴ Juan otlanonotinemia kan amaka chanti iwa okinmiliaya n tlakah ayakmó makichi-wakah tlan amokuali iwa mamokuaatekikah, para makintlapojpolwilikah intlajtlakol-wah. ⁵ Nochteh non de Judea iwa de Jerusalén, okulkakiah n Juan iwa okinmokuitayah intlajtlakolwah, iwa ye okinkuaatekiaya ijtk río Jordán.

⁶ Itlake n Juan ochijchitoka ika itsojmio n de kameyo, iwa omotlajkoilpiaya ika se kuítlaatl, ye sanwel okinkuaya chapulimeh iwa nékuitli. ⁷ Ikuak otetlapowiaya okijoaya:

—Nokuitlapa wits se tlakatl okachi weletini ke ne, Akin ne mach ni tlawel kuali kemi para nimotolos nikaktojtomás. ⁸ Milák, ne onomechkuáateki ika atl, pero Ye nomechkuáatekis ika n Espíritu Santo.

*Juan kikuáatekia n Jesús
(Mt. 3:13-17; Lc. 3:21-22)*

⁹ Itech nonteh tonatijmeh, Jesús owala de Nazaret, non kajki kan tlali de Galilea, iwa n Juan okikuáateki kan río Jordán. ¹⁰ Ikuak Jesús owálkiski ijtk atl, okitak owalmotlapo n ilwikak iwa n Espíritu owaltemotiwalaya ipan Ye kemi se palomatsi. ¹¹ Iwa kan ilwikak owalmokak se tlájtoli:

—Te Tinokone non niktlasojtla, iwa monawak niyolpaki.

*N satanás okinekia matlajtlakolchiwa n Jesús
(Mt. 4:1-11; Lc. 4:1-13)*

¹² Satepa n Espíritu okiwík n Jesús kan amaka chanti.

¹³ Iwa Jesús ompa omoka ome pójali tonati, kan nentinemih n yokameh tekuanimeh, iwa n amokualtlakatl okinekia matlajtlakolchiwa. Iwa n ángelteh okitekichiwiliayah.

*Jesús pewa kitematiltia itlajtol Dios kan tlali de Galilea
(Mt. 4:12-17; Lc. 4:14-15)*

¹⁴ Satepa ikuak yotsaktoka n Juan, Jesús oyá kan tlali de Galilea, okitematiltito n kualtlájtoli de Dios. ¹⁵ Iwa Jesús okijoaya:

—Yoajsiko n tonati, keman Dios pewas tlanawatis. Xikpatlakah nomonemilis. Ayakmó xikchiwakah tlan amokuali, yej xikneltokakah n kualtlájtoli.

*Jesús kinnotsa nawi michmajkeh
(Mt. 4:18-22; Lc. 5:1-11)*

¹⁶ Se tonati ikuak Jesús opajpanotiaya itempa n weyi atl de Galilea, okitak n Simón iwa ikni Andrés okitlamotlayah inmichayawah porke yejwah michmajkeh. ¹⁷ Jesús okinmili:

—Xiwickih nonawak, axa nonkinmichmaskeh tlakah.

¹⁸ Ikuakó yejwah san nima okualinkakajtekéh inmichayawah iwa oyajkeh iwan Jesús.

¹⁹ Jesús onéjenki okachi tlayakapa iwa ompa okimitak n Jacobo iwa ikni Juan, itelpochwah n Zebedeo. Yejwah okintlamanijtakah inmichayawah itech se barka.

²⁰ Jesús okinnotski, iwa yejwah okikakajtekéh inta Zebedeo ijtk barka iwa itlakawah, iwa oonewakeh iwan Jesús.

*Jesús okipajti se tlakatl non okipiaya se espíritu amokuali
(Lc. 4:31-37)*

²¹ Satepa okalakitoh kan altepetl de Capernaúm, iwa itech sábado keman mosewia n judíos*, Jesús okalak kan sinagoga† iwa opé tlamachitia. ²² N tlakah omotlajtlachialtiyah ijkuak okikakiah itlamachtilis, porke okinmachtiaya ika chikawak itekiwajyo, iwa amo kemi non kitemachtiah n tlanawatílistli. ²³ Ompa kan sinagoga de Capernaúm, se tlakatl non okipiaya se amokuali espíritu, owaltsajtsitewak:

²⁴ —¿Tlan tikneki towah, Jesús de Nazaret? ¿Otiwala otechpojpoloko? Ne nimitsix-mati, Te titiochipawak inawak Dios.

²⁵ Jesús okajwak n espíritu amokuali, iwa okili:

—¡Xiktsakua mokamak iwa xikkawa non tlakatl!

²⁶ Ijkuakó n espíritu amokuali okitokti n tlakatl mamimiki, otlanki owaltsajtsitewak chikawak iwa okikakajte. ²⁷ Nochtek omomojtijkeh iwa omotlatlajtlaniayah:

—¿Tlan kijtosneki ni? ¿Kualika se yankuik tlamachtlisli? ¡Nin tlakatl chikawak tlanawatia porke asta n espíritus amokualteh, kitlakamatih ijkuak Ye kinnawatia!

²⁸ San nima omoma itech nochi n tlali de Galilea tlan Jesúskichi.

Jesús kipajtia imona n Simón Pedro

(Mt. 8:14-15; Lc. 4:38-39)

²⁹ Ijkuak okiskeh de kan sinagoga, Jesús, Jacobo iwa Juan oyajkeh icha n Simón iwa n Andrés. ³⁰ Imona n Simón okipiaya chikawak totonik, yika, okimatiltijkeh n Jesús. ³¹ Jesús oonmikuani kan imona n Simón, okimakitski iwa okewalti. Non ora n siwatl owalpajtik, iwa san nima opé kintekichiwilia.

Jesús kimpajtia miakeh kokoxkeh

(Mt. 8:16-17; Lc. 4:40-41)

³² Ijkuak okalak tonati iwa opé tleyua, okwalinwikilijkeh n Jesús nochtek n kokoxkeh iwa non okimpixtokah espíritus amokualteh. ³³ Iwa nochtek non ochantitokah itech non altepetl, omoololojkeh kaltempa. ³⁴ Jesús okimpajtih miakeh kokoxkeh. Noiwa okinkixti miakeh espíritus amokualteh iwa amo okinkawiliaya matlajtokah, porke yejwah okixmatiah.

Jesús kitemachtia n kualitlátoli innawak n tlakah de Galilea

(Mt. 4:23-25; Lc. 4:42-44)

³⁵ Kualka, ijkuak ok otleyuatoka, Jesús omejki iwa oyá iselti omotrotsajtsilito kan amaka ochantitoka. ³⁶ Simón iwa n tlakah non inwah oyayah, okitemotoh n Jesús. ³⁷ Iwa ijkuak okajsikeh okilijkeh:

—Nochtek mitstemojtinemih.

³⁸ Pero Ye okinmili:

—Tiawih kan oksikimeh altepemeh, matikinmatiltitih n kualitlátoli, porke ika no, Ne oniwala.

³⁹ Yika, Jesús okintlapowiaya de itlajtol Dios itech nochtek n sinagogas de Galilea iwa okinkixtiaya espíritus amokualteh.

Jesús kipajtia se tlakatl non okipiaya lepra

(Mt. 8:1-4; Lc. 5:12-16)

⁴⁰ Se tlakatl non okipiaya lepra itech inakayo omikuani inawak Jesús, omotlankuáket-ski iwa okili:

—Tla tkmonekiltia weletis techchipawas de nokokolis.

⁴¹ Jesús okinoma n kókoxki, okitelko iwa okili:

—Ne nikmonekiltia. ¡Ximochipawa!

⁴² Ijkuak ijkó okijo n Jesús, ikokolis n kókoxki okiski, iwa owalchipawak. ⁴³ Sanima Jesús okimaaka n tlakatl pero okinawati:

* 1:21 Sábado: se tonati ijkuak amitla kichiwa, san omoololoayah kan sinagoga † 1:21 sinagoga: se kali kan omoololoayah n judíojteh nochi sábado

⁴⁴ —Kuali xikkaki tlan nimtsilis, amaka itla xiktlapowi, sanwel xio inawak n tiópixki, iwa xiktemaka por mochipawalis tlan Moisés otlanawati, para n tiopixkeh makimaticah te yotimochipa de mokokolis.

⁴⁵ Pero ikuak oyá n tlakatl, opé kintlapowia nochí tlan omochi. Yika, Jesús ayakmó oweletia okalakia teixpa itech altepemeh, yej san kalpa omokawaya, iwa miakeh tlakah de oksikimeh altepemeh ovalayah inawak.

2

Jesús kipajtia se tlakatl non osentitikak

(Mt. 9:1-8; Lc. 5:17-26)

¹ Kech tonati satepa, Jesús oksepa omókopki Capernaúm. Iwa ikuak omoma ye okalakito ijtk se kali, ² miakeh tlakah omoololojkeh. Iwa ayakmó oakiah n tlakah itech kaltentli, Jesús okinmatiltiaya n kualitlajtoli. ³ Ikuakó nawi tlakah okwalikilijkeh n Jesús se tlakatl non osentitikak. ⁴ Amo oweletkeh okikalakijkeh itech kali kan Jesús okatka, porke miaktikeh tlakah ompa omoololojkeh. N tlakah okikuatlapojojkeh n kali iwa ik ompa okitemowijkeh n kókoxki ika nochí ikuaujtlapech. ⁵ Ikuak Jesús okitak nonteh tlakah milák okineltokayah, okili n kókoxki:

—Nokone, nimitslapojpolwia de motlajtlakolwah.

⁶ Pero sikimeh non kitemachtiah n tlanawatílistli non ompa oewatokah, omokuatlapowijkeh: ⁷ “¿Tleka ijkó tlajtoa nin tlakatl?, tlajtoa kemi Ye yetoskia Dios, porke amaka weleti kintlapojpolwia n tlakah de intlajtlakolwah, sanwel Totajtsi Dios.” ⁸ Inewia Jesús okimatiá tlan okiyeyekoliayah non kitemachtiah n tlanawatílistli, iwa okinmili:

—¿Tleka ijkó nonkiyejyekolah itech nomoyolo? ⁹ ¿Tlan okachi amo owi se kilis n kókoxki: “Yonimitsintlapojpolwili motlajtlakolwah”, noso: “Ximewa, xikonana mokuaujtlapech iwa xio?” ¹⁰ Yika, axa nomechnextilis Ne Non onimochi ni tlakatl, nikpia weletílistli ipan nin tlaltíkpaktli para nikintlapojpolwis n tlakah de intlajtlakolwah.

Ikuakó okili non osentitikak:

¹¹ —Te nimtsilia, ximewa, xikajkokui mokuaujtlapech iwa xajti mocha.

¹² Ikuakó n kókoxki san nima owalme, okónanki ikuaujtlapech iwa inmixpa nochteh, oonewak. Yika, nochteh omotlajtlachialtijkkeh, okiweyijkachijkeh Dios, iwa okijtokeh:

—Ayik otikitakeh itla ijkó!

Jesús kinotsa n Leví

(Mt. 9:9-13; Lc. 5:27-32)

¹³ Okachi satepa Jesús oksepa opajpanotiaya itempa n weyi atl de Galilea. Iwa ikuak nochteh n tlakah omoololojkeh inawak, opé kinmachtia itlajtol Dios. ¹⁴ Ikuak ik ompa opajpanotiaya, okitak n Leví ipiltsi n Alfeo, oewatoka kan okiseliaya impuesto para n tekiwa romano iwa Jesús okili:

—Xiwiki nowa.

Leví owlomóketski iwa oyá iwan Jesús.

¹⁵ Satepa Jesús otakuato icha n Leví, iwa miakeh tominooololojkeh iwa n oksikimeh tlajtlakolchijkeh noiva otakuato, omotlalijkeh kan mesa sansikah iwan Jesús iwa itlamachtijkawah. ¹⁶ Pero ikuak non kitemachtiah n tlanawatílistli iwa n fariseos okitakeh n Jesús otakuajtuka iwan tominooololojkeh iwan tlajtlakolchijkeh, okinmilijkeh itlamachtijkawah:

—¿Tleka nomotlamachti tlakua iwa koni iwan tominooololojkeh iwan tlajtlakolchijkeh?

¹⁷ Ikuak Jesús okinkak okinmili:

—N tlakah non chikawakeh amo kimotlakewiah se tepajti, yej akimeh mokokoah. Ne amo oniwala onikinnotsako non kualteh, yej onikinnotsako n tlajtlakolchijkeh.

Kitlajtlaniah n Jesús keniji se mosawa

(Mt. 9:14-17; Lc. 5:33-39)

¹⁸ Se tonati itlamachtijkawah n Juan iwa itlamachtijkawah n fariseos omosaujtokah. Sikimeh tlakah ovalajkeh okitakoh n Jesús iwa okitlajtlanijkeh:

—¿Tleka itlamachtijkawah n Juan iwa itlamachtijkawah n fariseos mosawah*, iwa motlamachtijkawah amo mosawah?

¹⁹ Jesús okinnankili:

—¿Kox weletis mosawaskeh n tlatlálwilteh itech se monamiktilo ikuak n novio kajki inwah? Tla n novio kajki inwah, n tlatlálwilteh, mach weletis mosawaskeh. ²⁰ Pero ajsiki tonati ikuak n novio mach ok inwah yetos, ikuakó mosawaskeh.

²¹ 'Amaka kitlamanilia itlake non ya wewe ika se yankuik tsótsoli, porke n yankuik tsótsoli mokototsoa iwa kitsomonia n tlakemidl non ya wewe. Ikuakó n tlakemidl, okachi weyi tsomoni. ²² Nion amaka kitlalia n yankuik vino ijtek se kuilambre ya wewetsi. Porke n yankuik vino kitsomonia n kuilambre non ya wewetsi, ikuakó n vino toyawi iwa n kuilambre tsomoni. Yika, n vino non yankuik, moneki mamotlali itech yankuik kuilambre.

Itlamachtijkawah n Jesús miawatekij itech sábado ikuak mosewia n judíos

(Mt. 12:1-8; Lc. 6:1-5)

²³ Se sábado ikuak mosewia n judíos, Jesús iwa itlamachtijkawah opajpanotiayah kan ik otlatoooktoka, iwa itlamachtijkawah opé miawatekij. ²⁴ Ikuakó n fariseos okilijkeh:

—Xikita tlan kichijtokeh motlamachtijkawah, mach para itla kichiwaskeh itech sábado.

²⁵ Jesús okinmili:

—¿Ayamó nonkiamapoah tlan okichi n David ikuak ovalxitlatlak, ye iwa non inwah oyayah? ²⁶ Itech tonatijmeh ikuak Abiatar weyi tiópixki, David okalak ichan Dios iwa okikua n paj non tlatiochíwali, non sanwel n tiópixkeh weleti kikuah. Pero David okikua iwa asta okinmajmák makikuakah non inwa oyayah.

²⁷ Jesús noiva okinmili:

—Dios okichijchi n sábado para makintiochiwa n tlakah, iwa amo okichijchi n sábado para makinnawatikah n tlakah. ²⁸ Yika, Ne Non onimochi ni tlakatl niknawatia n sábado.

3

Jesús kipajtia se tlakatl non omapitswak

(Mt. 12:9-14; Lc. 6:6-11)

¹ Jesús oksepa okalak kan se sinagoga, iwa ompa okalak se tlakatl mapitswak. ² Iwa sikimeh fariseos sa okonitakah n Jesús kox kipajtiskia non tlakatl itech sábado ikuak mosewia n judíos, iwa ijkó weletis kiteiliskeh. ³ Jesús okili n tlakatl non omapitswak:

—Ximoketsa tlayakapa.

⁴ Otlanki okintlajtlani n fariseos:

—¿Techkawilia matikchiwakah tlan kuali itech sábado noso matikchiwakah tlan amokuali? ¿Techkawilia matitepalewikah noso matitemiktiyah?

Yejwah mach otlanankilijkeh. ⁵ Ikuakó Jesús okuálanki iwa omoyolkoko, ken ot-lakuawatokah inyolo n fariseos. Iwa okili n kókoxki:

—Xikmilawa moma.

N kókoxki okimila ima, iwa opajtik. ⁶ Ikuakó n fariseos owalkiskeh de ompa iwa opé motlatlalwiah iwan sikimeh itekitwah n Herodes* para kimiktiskeh n Jesús.

Jesús tlapajtia inakastla n atl de Galilea

⁷ Jesús iwa itlamachtijkawah oyajkeh itempa n atl de Galilea, iwa miaktikeh tlakah oyajkeh inwah. N tlakah owalayah de Galilea iwa de Judea, ⁸ de Jerusalén, de Idumea, ik nepa lado n río Jordán, iwa de n tlalmeh de Tiro iwa Sidón. Ninteh tlakah, ikuak okimatkeh noch ikan Jesús okichiwaya, ovalajkeh inawak. ⁹ Ikuakó Jesús okinnawati

* 2:18 Mosawah kijtosneki ayunar * 3:6 Non okachi wejweyijtikeh tlanawatijkeh de nin tlali kintokayotiah 'Herodes', non kijtosneki 'se weyi tlanawati'.

itlamachtijkawah sa makitlatlalilitih se barka, iwa ijkó amo makipajpatsokah n tlakah.
¹⁰ Porke Jesús miaktikeh yokimpajtjika, yika n kokoxkeh okipajpatsmikiyah ken okinekiah kitelkoskeh. ¹¹ Iwa ikuak n espíritus amokualteh okitayah n Jesús, owetsiah ikxitla iwa otsajtsiah:

—¡Te, Ti Tekone de Dios!

¹² Pero Jesús okinkamatsakuaya para amo makiteixmatiltikah teixpa.

Jesús kimpejpena májtlaktli iwa ome itlamachtijkawah

(Mt. 10:1-4; Lc. 6:12-16)

¹³ Satepa Jesús otlejkok itech se tepetl, iwa ompa okinmopejpenili akimeh Ye okinek, iwa yejwah ovalajkeh inawak. ¹⁴ Ijkó okimpéjpenki májtlaktli iwa ome itlamachtijkawah para mayetokah nochipa iwan Ye, iwa para kintitlanis makitetlapowitih n kualitlátoli. ¹⁵ Iwa okinmák weletílistli para makinkixtikah espíritus amokualteh. ¹⁶ Yejwah ninteh n májtlakteh iwa ome akimeh okimpéjpenki:

Simón akin noiya okitlalili itoka Pedro,

¹⁷ Jacobo iwa ikni

Juan itelpochwah n Zebedeo, akimeh Jesús okintokayoti Boanerges, noni kijtosneki kuejsijkeh,

¹⁸ Andrés,

Felipe,

Bartolomé,

Mateo (noiya itoka Leví),

Tomás,

Jacobo itelpoch Alfeo,

Tadeo,

Simón non onemia iwan Kananistas,[†]

¹⁹ iwa n Judas Iscariote non satepa okitemakti n Jesús.

Kiteiliah Jesús iweletilis walewatok de beelzebú

(Mt. 12:22-32; Lc. 11:14-23, 12:10)

²⁰ Satepa Jesús okalak itech se kali iwa oksepa omooolojkeh miaktikeh tlakah iwa asta ayakmó oweletiah otlakuayah. ²¹ Ikuak okimatkeh non ken okitayah n Jesús, ovalajkeh okinotsakoh, porke okimoliayah chamo yokuatlapolo.

²² Noiya non kitemachtiah n tlanawatílistli akimeh ovalajkeh de Jerusalén, okitoayah:

—Nin tlakatl kipia iweletilis beelzebú iwa ika non weletílistli kinkixtia n espíritus amokualteh.

²³ Ikuakó Jesús okinnotski mawalmíkuaniyah inawak iwa opé kinmajsikamatiltia ika tlapoálistli, iwa okinmili:

—¿Kenomi weletis n satanás san ye inewia kualkixtis n satanás? ²⁴ Tla se país xexelitos, ayik pankisas, ²⁵ iwa tla itech se familia nochteh xexelitokeh, mach wejkawas non familia.

²⁶ Porke tla n satanás inewia moixnamiki iwa moxexeloa, ayakmó kipias weletílistli iwa pojpoliwis.

²⁷ 'Amaka weletis kalakis icha n se tlakatl chikawak para kitlachtekis, tlamo achto kijilpia iwa ikuakó ya weletis kitlachtekis.

²⁸ 'De milajka nomechilia Dios weletis kintlapojpolwis akimeh kichiwah tlajtlákoli,

²⁹ pero akin fiero kitnewas n Espíritu Santo, ayik kitlapojpolwiskeh iwa nochipa yetos tlajtlakole.

³⁰ Jesús ijkó okijo porke yejwah okijokeh Ye kipia se espíritu amokuali.

Imamá iwa ikniyah n Jesús

(Mt. 12:46-50; Lc. 8:19-21)

† ^{3:18} Ninteh Kananistas yejwah de se partido non okinekiah mixkoyantiskeh inawak gobierno romano.

³¹ Ijkuakó imamá iwa ikniwah n Jesúś, okalakikoh kan otlamachtijtoka. Pero san kaltempa omokajkeh iwa otlatitlankeh makinotsatih. ³² Ijkuakó, non okiyawalojtokah n Jesúś, okilijkeh:

—Momamá, mokniwah iwa moweltiwhah kateh kala iwa mitsontemoah.

³³ Pero Ye okinnankili:

—¿Akin nomamá iwa akimeh nokniwah?

³⁴ Otlanki, Jesúś okintlajtlatak non ompa okiyawalojtokah iwa okijo:

—Nikan kateh nomamá iwa nokniwah, ³⁵ nochteh akimeh kichiwhah tlan Dios kimonek-iltia, ye nokni, nowelti iwa nomamá.

4

*Se tlakatl non otook
(Mt. 13:1-9; Lc. 8:4-8)*

¹ Jesúś oksepa opé tlamachtia itempa n atl de Galilea, iwa miakeh tlakah omoololojkeh inawak. Okatkah miaktikeh, yika Jesúś otlejkok itech se barka iwa itech omotlali. N tlakah omokajkeh itempa n atl para kikakiskeh. ² Ijkuakó Ye opé kinmachtia ika miakeh tlapoálisteh. Iwa okinmilia:

³ —Kuali xikakikah tlan nomechilis: Se tlakatl otookato. ⁴ Ijkuak otook, siki xínachtli owetski inakastla n ojli, iwa n totomeh ovalajkeh iwa okikuajkeh. ⁵ Oksiki xínachtli owetski kan tlateyo iwa niman oixwak porke n tlali amo weltilawak. ⁶ Pero ijkuak okiski n tonati, owaki, porke amo wejkatala omonelwayoti. ⁷ Oksiki xínachtli owetski intsalko witsmeh, iwa n witsmeh omoskaltijkeh iwa okijyomiktijkeh, yika n tlataokali mach otlaki. ⁸ Oksikimeh xinachteh owetskeh itech kuali tlali, iwa ijkuak oixwakeh, kualtsi omoskaltijkeh, iwa miak otlaki. Siki okitemák sempóali iwa n májtlaktli (30) por se xínachtli, oksiki okitemák eyi póali (60), iwa oksiki okitlakilti se siento.

⁹ Ijkuakó okinmili:

—¿Akin de milajka kipia inakas, makajsikamati!

*Jesúś kinmachtia itlamachtijkawah ika tlapoálisteh
(Mt. 13:10-17; Lc. 8:9-10)*

¹⁰ Satepa, ijkuak yokikakajtejkah n Jesúś, sikimeh non ok omokajkeh iwan májtlakteh iwa ome itlamachtijkawah, okitlajtlanijkeh tlan kijtosneki n tlapoálistli de non otook.

¹¹ Jesúś okinmili:

—Nomejwah Dios yonomechmatilti tlan yowejkah otlaatitokah, pero n oksikimeh amó. Yejwah okinmachi ika tlapoálisteh. ¹² Yika, maya matlachiakah amo makitakah, iwa maya matlakakikah amo mateajsikamatikah, sanwel kinmajsikamatiltis tla moyol-patlaskeh iwa kitlajtlaniskeh Dios makintlapojpolwi. ¹³ Is. 6:9-10

*Jesúś kinmajsikamatiltia n tlátokti
(Mt. 13:18-23; Lc. 8:11-15)*

¹³ Jesúś noiwá okinmili:

—¿Amo nonkajsikamatih nin tlapoálistli? ¿Kenomi nonkinmajsikamatiseh n okikimeh tlapoálisteh? ¹⁴ Akin tooka ye kemi akin tetlapowia n kualitlátoli. ¹⁵ Onkateh tlakah kemi n xínachtli non owetski inakastla n ojli, kikakih n kualitlátoli iwa keman okikakeh, wits satanás iwa kinyolkixtilia n kualitlátoli. ¹⁶ Oksikimeh tlakah kemi n xínachtli non owetski itech tlateyo, kikakih n kualitlátoli iwa kiseliah ika pakílistli.

¹⁷ Pero kemi amo yektlaxilitokeh, mach wejkawah, porke ijkuak pewe tlaijyowiah por n kualitlátoli, san nima wetsih. ¹⁸ Oksikimeh kemi n xínachtli non owetski itsalko witsmeh, yejwah kikakih n kualitlátoli, ¹⁹ pero okachi kintekipachoa tlan onka itech nin tlaltíkpaktli, iwa kinekih kitlawelpiaskeh tomi. Yika, nochí ni kinyolijtlakoa iwa ayakmó kinkawilia mamotenexti Dios intech yejwah. ²⁰ Pero akimeh kikakih n kualitlátoli iwa kiyekseliah, yejwah kemi n xínachtli non owetski itech kuali tlali, sikimeh kemi n xínachtli non kitemakah sempóali iwa n májtlaktli xínachtli por se xínachtli, oksikimeh

kemi n xínachtli non kitemaka eyi póali, iwa n oksikimeh kemi n xínachtli non kitemaka se siento.

*N tláwili
(Lc. 8:16-18)*

²¹ Jesús noiwa okinmili:

—Ijkuak nonkimilintiah se tláwili, ¿mach nonkitlaatiah itlampa se kama noso itlampa se kajo? Nonkimilintiah iwa nonkitlaliah tlakpak para matlawi. ²² Yika, nochi tlan tlaatitok monextis iwa nochi tlan amo momati saman momatis. ²³ ¡Akin de milajka kipia inakas, makajsikamat!

²⁴ Jesús noiwa okinmili:

—Xikitakah nomejwah akimeh nonkikakih nin tlájtoli. Ijkó kemi nomejwah nonkintlatamachiwiñiskeh oksikimeh, nomechtamachiwiñiskeh iwa okachi nomechmakaskeh.

²⁵ Porke akin kipia, okachi kimakaskeh, iwa akin amo kipia, kikixtiliskeh tlan san achitsi kipia.

*N xínachtli non moskaltia
(Mt. 25:14-30; Lc. 19:11-27)*

²⁶ Jesús noiwa okijto:

—Kan Dios tlanawatia, kemi akin kitepewa xínachtli itech tlali. ²⁷ Tla yas kochiti nochí yúali, iwa tla mewas noso amo mewas nochí kualka, n tlátoktli kisentoka moskaltiji, pero ye mach kimati kenjki moskaltia. ²⁸ Inewia n tlali kiskaltia n tlátoktli, achto ixwa iwa moxiujyotia, tlami miawati iwa iksemi tlaaki. ²⁹ Ijkuak n tlátoktli yochikawak, kitekih porke yoajsiko n tonati para motekis.

*N xinatsintli de mostaza
(Mt. 13:31-32; Lc. 13:18-19)*

³⁰ Satepa Jesús noiwa okinmili:

—¿Ika tlan tlájtoli nomechititis kan Dios tlanawatijtok? Noso, ¿ika tlan tlapoálistli weletis nomechixmatiltis? ³¹ Kan Dios tlanawatia kemi se xinatsintli de mostaza ijkuak kitlapachoah. Nin xinatsintli okachi tsijtsikitsi de nochteh n xinachtsitsinteh. ³² Pero, ijkuak se kitlapachoa, ixwa iwa moskaltia okachi weyi ke nochteh n tlátokteh, iwa itech wejweyijtikeh imamayowah n totomeh motepajsooltiah itlampa itlasekawilo.

*Jesús ijki otémachtiaya
(Mt. 13:34-35)*

³³ Ika miakeh tlapoálisteh Jesús okinmachtiaya n kualitlátoli asta kan yejwah okajsikamatiah. ³⁴ Nochipa okintlapowiayah ika tlapoálisteh, pero ijkuak sa Ye omokawayá iwan itlamachtiyawah, nochi okinmajsikamatiltiaya.

*Jesús kitlakawaltia n atl iwa n ejekatl
(Mt. 8:23-27; Lc. 8:22-25)*

³⁵ Non tonati ijkuak yotlajkajtik Jesús okinmili itlamachtiyawah:

—Matikojchalwikah n lago.

³⁶ Ijkuak yokinmakajkeh n tlakah, itlamachtiyawah okiwakeh n Jesús itech barka, iwa oksikimeh barkas inwah oyajkeh. ³⁷ Ijkuakó owalmokajka se ejekatl chikaktik iwa n atl opé motlatlamotla ijtk barka iwa opé atemi. ³⁸ Jesús okochtoka tlakuitlapa iwa okimokpalti se íkpali, iwa itlamachtiyawah okijxititoh iwa okilijkeh:

—¡Tlamachti! ¡Xiijsa, tiapolakih!

³⁹ Ijkuakó Jesús owalme iwa okitlakawalti n ejekatl, iwa okili n atl:

—Ximoyekmana!

Iwa n ejekatl omóketski iwa nochí san owaltlamoka. ⁴⁰ Otlanki Jesús okinmili itlamachtiyawah:

—¿Tleka satlawel nonmawih? ¡Ayamó nontlaneltakah!

⁴¹ Pero yejwah satlawel omaujtokah iwa omotlajtlaniayah.

—¿Akin nin tlakatl, asta n ejekatl iwa n atl kitlakitah?

*Jesús kinkixtilia espíritus amokualteh se tlakatl de Gadara
(Mt. 8:28-34; Lc. 8:26-39)*

¹ Jesús iwa itlamachtijkawah okalakitoh ik nepa lado de n lago, kan tlali de Gadara. ² Ijkuak Jesús otemok de kan barka, san nima okinamikiko se tlakatl non okipiaya se espíritu amokuali. Nin tlakatl owálkiski intsalko n miketéköchtek, ³ ken ompa ochantitoka. Amaka oweletia okilpiaya nion ika kadena. ⁴ Miak welta yokimaijilpijkah iwa okikxijilpijkah ika kadenajteh, pero ye okinkokototsaya iwa amaka oweletia okitlakawaltiaya. ⁵ Tlajka iwa n yuak otsajtsitinemia ik tepeyo iwa kan tooktokeh non yomikkeh, iwa san ye inewia omokojkojinemia ika tetl. ⁶ Pero ijkuak okonitak n Jesús ok wejka tlantiwits, omotlelojtitikiski iwa omotlankuaketsato inawak, ⁷ iwa chikawak okili:
—¡Tlan tikneki nowa, Jesús Ikone Dios non weyijkatitok! Nimitstlatlaujtia ika Itoka n Dios, amo techtlajyowilti.

⁸ Ijkó okijo porke Jesús yokilijtoka:
—¡Espíritu amokuali, xikkawa nin tlakatl!
⁹ Iwa Jesús okitlajtlani:
—¿Tlan timotoka?
Ye otlanankili:
—Ne notoka Miaktikeh, porke timiakeh.

¹⁰ Iwa n espíritu amokuali okitlatlaujti n Jesús, amo makintitlani wejka. ¹¹ Iwa kemi miakeh pitsomeh ik ompa otlakuajtinemiah ikxitla n tepetl, ¹² n espíritus amokualteh okitlatlautijkeh n Jesús:

—Techtitlani matikalakikah inmijtik nekateh pitsomeh.
¹³ Ijkuakó Jesús okitekawili, iwa n espíritus amokualteh owalkiskeh ijtik non tlakatl iwa okalakeh inmijtik nonteh pitsomeh. N pitsomeh okistewakeh iwa omoatlanwitoh ijtik weyi atl iwa omikkeh. Ninteh pitsomeh okatkah kemi ome mil.

¹⁴ Ijkuakó n tlajpixkeh de nonteh pitsomeh ochocholojtewakeh iwa oyajkeh otetlapowitoh ik tetlala iwa kan weyi altepetl nochí tlan otlamochi. Iwa miakeh tlakah okitakoh tlan otlamochijka. ¹⁵ N tlakah de non altepetl okalakitoh kan Jesús, iwa okitakeh n tlakatl non okimpiaya espíritus amokualteh. Nin tlakatl yoewatoka, yotlakentitoka iwa ika kuali itlalnamikilis, iwa n tlakah omaujkeh. ¹⁶ N tlakah akimeh okitakeh tlan otlamochi, otetlapowijkeh tlan omochi neká tlakatl non okimpiaya espíritus amokualteh, iwa tlan omochijkeh n pitsomeh. ¹⁷ Ijkuakó okitlatlautijkeh n Jesús mawia de ompa.

¹⁸ Ijkuak Jesús otlejkok itech barka, n tlakatl non okimpiaya espíritus amokualteh, okitlatlaujtiaya n Jesús makiwika. ¹⁹ Pero Jesús mach okikawili, yej okili:

—Xajiti mocha, iwa xikinmatilti mochanikniyah nochí tlan Dios okichi mowa, iwa kenjiki omitsiknomá.

²⁰ N tlakatl oyá icha, iwa opé tetlapowia kan altepemeh de Decápolis nochí tlan Jesús okichi por ye, iwa nochteh omotlajtlachialtiayah.

*Ichpoch n Jairo iwa ok se siwatl non okitelkoli itlake n Jesús
(Mt. 9:18-26; Lc. 8:40-56)*

²¹ Ijkuak Jesús oksepa owalmókopki itech barka ik nepa lado de n lago, miaktikeh tlakah okinamikikoh, iwa Ye ompa omoka inwah. ²² Ijkuakó owala se tlayákanki de kan sinagoga, non omonotsaya Jairo. Ijkuak okitak n Jesús omotlankuáketski ikxitla, ²³ iwa okitlatlaujti:

—Nochpoch ya tlatlantok, xiwiki nocha xikintlaliliki momawah ipan nochpoch, ijkó pajtis iwa yolitos.

²⁴ Ijkuakó Jesús oyá iwan Jairo, iwa miakeh tlakah oyayah inwa. Yejwah okipajpatsoayah n Jesús.

²⁵ Noiwa ompa oyaya se siwatl non yokiwikaya májtlaktli iwa ome xiwitl kókoxki ika esmilawálistli. ²⁶ Ye satlawel yotlajyowijka inmak tepajtijkeh, iwa yomotomintlamijka,

pero mach opajtia yej okachi oowijtiaya. ²⁷ Ijkuak okima tlan Jesús okichiwaya, omijkuanijtia ik ikuitlapa, iwa ik intsalko n tlakah okitempantelkoli itlaken n Jesús. ²⁸ Porke okimoliaya: “Tla san niktelkolis itlaken, nipajtis.” ²⁹ Ijkuakó iesmilawalis ovalwak iwa san nima ye okimachili opajtik. ³⁰ Non ora Jesús okimachili ichikawalis aka okipajti, yika oontláchixki ik ikuitlapa iwa okintlajtlani n tlakah:

—¿Akin okitelko notlake?

³¹ Ijkuakó itlamachtijkawah okilijkeh:

—Miakeh tlakah techpajpatsojtwitseh iwa Tejwatsi titlajtlani “¿Akin okitelko notlake?”

³² Pero Jesús okiixtemo akin okitelko. ³³ Ijkuakó n siwatl kemi okimatia ye okitelko, ika mawílistli omotlankuaketsato ikxitla n Jesús, iwa okili tlan omochiwaya. ³⁴ Jesús okili:

—Nokone, motlaneltokalis omitspajti. Xajti ika pakílistli, porke axa yotipajtik de motlaijyowilis.

³⁵ Jesús ok otlajtojtoka, ijkuak okalakikoh sikimeh tlakah de icha n Jairo iwa okilijkeh:

—Mochpotsi yomikki, ¿tlan ok para tikkuejsoa n tlamachti?

³⁶ Pero Jesús san okinkak iwa okili n Jairo:

—Amo ximawi, sanwel xitlaneltoka.

³⁷ Iwa Jesús mach okitekawili mawia aka ok se, sanwel Pedro, Jacobo iwa ikni Juan.

³⁸ Ijkuak okalakito icha n tlayákanki Jairo, Jesús okinmitak n tetlajpalojkeh saikpanoa ochokatokah iwa otsajtsiah. ³⁹ Ijkuakó Ye okalak iwa okinmili:

—¿Tleka nonmopajsoloah iwa nonchokah? N ichpotsintli mach omikki, sanwel kochi.

⁴⁰ Nochteh san okiwetskakeh. Ijkuakó Jesús nochteh okwalinkixti. Sanwel okínnotski íwa itajwah n takotsi iwa itlamachtijkawah. Okalakeh kan okatka n takotsi. ⁴¹ Ijkuakó Jesús okimakitski n takotsi iwa okili:

—Talita, kumi —noni kijtosneki: ¡Takotsi, Ne nimitsilia, ximewa!

⁴² San nima, n takotsi ovalme iwa opé nejnemi, iwa nochteh non okitakeh omotlajtlachialtijkeh. N takotsi okipiaya májtlaktli iwa ome xiwitl. ⁴³ Pero Jesús okinnawati amaka makimatiltikah tlan otlamochi, iwa okinnawati itajwah makitlakualtikah n takotsi.

6

Jesús yawi Nazaret kan omoskalti

(Mt. 13:53-58; Lc. 4:16-30)

¹ Jesús okiski de Capernaúm iwa oyá Nazaret kan omoskalti, iwa itlamachtijkawah oyajkeh íwa. ² Iwa ijkuak oajsiko n sábado ijkuak mosewia n judíos, Jesús opé tlamachtia kan sinagoga. Miakeh tlakah non okikakeh omotlajtlachialtijkeh iwa okijtojkeh:

—¿Kan okikuito nin tlakatl nochi tlan kimati? ¿Iwa kenomi ika imawah weleti kinchiwa milagros? ³ ¿Amo Ye ni n karpintero, ipiltsi n María, iwa ikniyah Jacobo, José, Judas iwa Simón? ¿Iwa amo nika chantitokeh iweltiwh?

N tlakah okitlawelitayah iwa mach okineltokayah. ⁴ Ijkuakó Jesús okinmili:

—Sentetl kiseliah se profeta, pero kan omoskalti noso non ken kita iwa ichanikniyah mach kiseliah.

⁵ Yika, Jesús mach okichi nion se milagro ompa kan omoskalti. Sanwel okintlalili imawah ipan sikimeh kokoxkeh iwa okimpajti. ⁶ Jesús san omotlajtlachialti ijkuak okimitak amo okineltokayah.

Jesús kintitlani itlamachtijkawah matetlapowitih itlajtol Dios

(Mt. 10:5-15; Lc. 9:1-6)

Satepa Jesús otlamachtijtinemia ik nonteh altepemeh. ⁷ Jesús okínnotski májtlaktli iwa ome itlamachtijkawah, iwa ojomeh okintítlanki matetlapowitih de itlajtol Dios iwa okichi makinkixtikah espíritus amokualteh. ⁸ Iwa okinnawati amitla makiwikakah, nion inmantajkostal nion intlaxkal, nion itla tomi, sanwel se kuawitl. ⁹ Iwa inkakkuah, iwa amo makinwikakah oksikimeh intlakenwah. ¹⁰ Noiwa okinmili:

—Ijkuak nonkalakitiweh itech se kali, ompa ximokawakah asta ijkuak nonkikawaskeh non altepetl. ¹¹ Iwa tla kana nonkalakitiweh iwa amo nomechseliah nion kinekih nomechkakiskeh, xikisakah iwa ximoikxitsejtselokah, para makimatikah mach kuali tlan okichijkeh.

¹² Ijkuakó yejwah okiskeh iwa okinmiliyah n tlaltikpaktlakah, makipatlakah innemilis iwa ayakmó matlajtlakolchiwakah. ¹³ Noiwa okinkixtiayah espíritus amokualteh, iwa okinxawiliyah aseite n kokoxkeh iwa okimpajtiyah.

Kimiktiah n Juan Bautista

(Mt. 14:1-12; Lc. 9:7-9)

¹⁴ N rey Herodes Antipas Primero okima tlan okichiwaya n Jesús, ken nochteh omotlapowiayah de Ye. Iwa Herodes okijo:

—Juan Bautista yomoyoliti de kan kateh non yomikkeh, yika kipia non weletílistli.

¹⁵ Oksikimeh okijoayah:

—Ye n profeta Elías.

Oksikimeh okijoayah:

—Ye se profeta kemi non yowejkajkeh profetas.

¹⁶ Ijkuak Herodes ijkó okima, okijo:

—Ye n Juan, akin ne onitlanawati makikechtsontekkah, iwa axa yomoyoliti.

¹⁷ Herodes otlanawatijka makikitskikah n Juan iwa makitsakuakah, ken okilika amokuali kimomekatijtos ikuñada Herodías. ¹⁸ Juan Bautista okiliaya n Herodes:

—Tlajtlácoli tikpixtos isiwa mokni Felipe.

¹⁹ Yika n Herodías okikokoliaya n Juan iwa okinekia makimiktakah, pero mach okimatiá kenomi kichiwas. ²⁰ Noiwa Herodes okimatiá Juan ye kuali tlakatl iwa yolmilajka, iwa okimawiliaya. Yika mach okikawiliaya n Herodías itla makitoki. Maya Herodes amo okiyekajsikamatia tlan Juan otlamachtiaya, okiwelitaya tlan okijoaya.

²¹ Oajsiko se tonati ijkuak Herodes okitlami xiwitl. Iwa okintlalwi matlatlakuakih n tlanawatijkeh de ipalasio, isoldado tlayakanwah noiwa n tekiwajkeh de Galilea.

²² Itech non ilwítl ichpoch n Herodías omijtoti inmixpa n tlatlálwiltéh iwa saikpanoa okiwilitakeh nochteh. Ijkuakó Herodes okili n íchpochtli:

—Techtlajtlanili san tlan tiknekis iwa ne nimitsmaktilis.

²³ Iwa okisentlali kimaktilis san tlan ye kitlajtlaniliskia, maya kitlajtlaniliskia tlajko itekiwajyo. ²⁴ N íchpochtli okitlajtlanito ína:

—¿Tlan niktajtlanilis n Herodes?

Ína okili:

—Xiktajtlanili itsonteko n Juan Bautista.

²⁵ San nima n íchpochtli oyá kan Herodes iwa okili:

—Techmaka axa san nima itsonteko n Juan Bautista itech se teposkaxitl.

²⁶ N rey Herodes satlawel omoyolkoko. Pero kemi ye okisentlali inmixpa nochteh itlatlalwilwah kimaktilis n íchpochtli san tlan ye kinekis, ayakmó owéletki omotlajtolpatlak.

²⁷ Totokatijkak okinawati se soldado, mawia kan otsaktoka Juan makikechtsontekiti iwa makiwalikili itsonteko n Juan. ²⁸ N soldado oyá kan otsaktoka n Juan, okikechtsontek iwa okimaktiliko n íchpochtli itsonteko n Juan itech se teposkaxitl, iwa n íchpochtli okimaktili ína.

²⁹ Ijkuak itlamachtijkawah n Juan okimatkeh tlan otlamochi, okikuitoh ikuerpo n Juan iwa okitookakeh.

Jesús kintlakualtia mákuili mil tlakah

(Mt. 14:13-21; Lc. 9:10-17; Jn. 6:1-14)

³⁰ Ijkuak omokopatoh de okitetlapowito n kualtlájtoli, n itlamachtijkawah omoseitilijkeh iwan Jesú. Okimatiltijkeh tlan okichijkeh, iwa tlan okitemachtijkeh. ³¹ Iwa Jesú okinmili:

—Xiwikih, matimosewitih kan amaka nemí.

Ken miaktikeh ovalayah inawak, iwa asta mach ok omajxiliyah tlakuaskeh. ³² Yika, Jesús iwa itlamachtijkawah oyajkeh itech se barka kan amaka chantitok. ³³ Pero ijkuak yoyayah, miakeh tlakah okimitakeh iwa okimixmatkeh. Ijkuakó miakeh tlakah de nonteh altepemeh okintokakeh iwa okalakitoh achto kan Jesús iwa itlamachtijkawah onajskiah. ³⁴ Ijkuak Jesús ovaltemok de kan barka, okimitak miakeh tlakah non sa okichixtokah iwa okimiknoma, ken okimitak kemi ichkameh non kipiah akin kinyakanas. Iwa san miak opé kinmachtia. ³⁵ Ijkuak yotlajkajtik, itlamachtijkawah n Jesús ovalajkeh inawak iwa okilijkeh:

—Yotlajkajtik, iwa ik nika amaka chanti. ³⁶ Xikinmakawa n tlakah mawiah tetlala iwa kan altepemeh non amo wejka kateh iwa makimokowitih tlan kimomajsewiskeh.

³⁷ Pero Jesús okinnankili:

—Nomejwah xikintlakualtikah.

Yejwah okijtokeh:

—¿Tikneki matikkoatih paj ika ome siento denario*, iwa matikintlamakakah nochteh?

³⁸ Jesús okintlajtlani:

—¿Kechmeh pameh nonkimpiah? Xiwiah xiktatih.

Ijkuak okimatkeh kechmeh pameh okimpiayah, okilikoh:

—Tikimpiah mákuili pameh iwa ome michimeh.

³⁹ Ijkuakó Jesús otlanawati mamoololokah iwa mamotlajtlalikah ipan xiwitl non kualtsi selistok. ⁴⁰ Iwa nochteh n tlakah omooololojkeh de mamajkuili póali iwa oksikimeh de tlatlajko siento. ⁴¹ Ijkuakó Jesús okinmónanki n mákuili pameh iwa ome michimeh, oontláchixki ilwikak iwa omotlaosjkama inawak Dios iwa okintlajtlápanki n pameh, iwa okinmajmák itlamachtijkawah makinxejxelilikah n tlakah. Ijkó noiwa okichi iwa ome michimeh, iwa okinxejxelili nochteh n tlakah. ⁴² Nochteh otlakuajkeh iwa kuali oixwikeh. ⁴³ Satepa okoololojkeh tlan amo okikuajkeh iwa okintetemijkeh májtlaktli iwa ome chikimeh ika pantlapanalteh iwa michimeh. ⁴⁴ Mákuili mil tlakah otlakuajkeh.

Jesús nejnemi ixko atl

(Mt. 14:22-27; Jn. 6:15-21)

⁴⁵ Satepa Jesús okintítlanki itlamachtijkawah itech se barka, iwa okinmili sa makichiati kan altepetl de Betsaida, porke Ye ok kinmakawaskia n tlakah. ⁴⁶ Iwa ijkuak yotlanki okinmaaka, omototsajtsilito kan tepetl. ⁴⁷ Ijkuak otleyuak, n barka yotlajkotlantiaya itech lago. Jesús omoka iselti ixko tlali, ⁴⁸ iwa okimitak satlawel yokinsotla n barka porke n ejekatl okimixnamiktiwalaya. San kualka Jesús okwalintokaya nejnenti ixko atl iwa okinmajsito itlamachtijkawah iwa yokinekia kimpanawis. ⁴⁹ Ijkuak yejwah okitakeh nejnenti ixko atl, okimolijkeh chamo se temomojti okinmonextili iwa otsajtsikeh.

⁵⁰ Nochteh okitakeh iwa omomojtjkeh. Pero Ye okinnotski iwa okinmili:

—¡Ximoyolchikawakah, amo ximomojtikah, Ne Ni Jesús!

⁵¹ Ijkuakó Jesús oontlejkok itech barka kan itlamachtijkawah, iwa n ejekatl san owalmoka. Yejwah satlawel omotlajtlachialtijkeh, ⁵² porke ayamó okajsikamatiah tlan okitakeh ijkuak Jesús okinmiakili n pameh ken oyoltlakuawatokah.

Jesús okimpajti non omokokoayah itech tlali de Genesaret

(Mt. 14:34-36)

⁵³ Ijkuak okalakitoh Genesaret, ompa inakastla n lago okilpijkeh n barka. ⁵⁴ Ijkuak yejwah owaltetemokeh, n tlakah san nima okixmatkeh n Jesús. ⁵⁵ Yika, itech nochí non tlali omotletlelojkeh iwa okwalinwikiliyah inkokoxkawah, kan okikakiah Jesús. ⁵⁶ Iwa sentetl kan Ye oyaya, itech wejweyi noso tsitsikitikeh altepemeh, noso ik tetlala, n tlakah okinkixtiayah inkokoxkawah itech ojli, iwa okitlatlaujtiayah makinkawili maya san makitempantelkolikah itlake para mapajtikah. Nochteh non okitelkoliyah itlake opajtiah.

* 6:37 Denariokijtosneki se tomi tlan tlaxotla itech se tonati

Tlan kijtlakolia iyolo se tlakatl
(Mt. 15:1-20)

¹ Ijkuakó n fariseos iwa sikimeh non kitemachtiah n tlanawatílistli owalajkeh de Jerusalén, omoololojkeh iwa okitatoh n Jesús. ² Yejwah okitakeh sikimeh itlamachtijkawah n Jesús otlakuayah iwa amo omomajtekiyah asta inmatlankwah kemi yejwah okichiwayah. ³ Porke n fariseos iwa nochteh n judíojteh saikpanoa okitlakitayah tlan okinmachtijkah intatawah. Amo tlakuah tla amo acho momapajpakah miak welta asta kan inmatlankwah. ⁴ Keman onmokopayah tiánkistli, amo otlakuayah tla amo acho moyekmapajpakah. Iwa kimpiah oksikimeh tlamachtílisteh, kemi ninneh: trato kimpajpakah n xíkalteh, n káxilteh, iwa n axoktsimeh. ⁵ Yika n fariseos iwa non kitemachtiah n tlanawatílistli owalajkeh okitlajtlanjkeh n Jesús:

—¿Tleka motlamachtijkawah amo kitlakitah n tlanáwatili non otechmachtijkeh totatawah? ¿Tleka ijkuak tlakuah amo momapajpakah kemi tejwah?

⁶ Jesús okinnankili:

—Mach omotlapololti n profeta Isaías ijkuak okijo nomejwah nonmíxkopteh, iwa ijkí okikuilo:

Ninteh tlakah ika inkamak kijtoah nechtlaosjtlah.

Pero amo nechtlakitah ika inyolo.

⁷ Sanenka nechweyijkachiwah,

porke tlan kitemachtiah sanwel intlanawatilwah n tlakah.

Is. 29:13

⁸ Porke nomejwah nonkikawah tlan Dios technawatia matikchiwakah iwa san nonkitlakitah tlan okichiwayah nomotatawah.

⁹ Jesús noiwa okinmili:

—Nomejwah ik nepa nonkontlakaltechoah itlanawatil Dios, iwa okachi nonkimopantiah tlan yowejka okichiwayah nomotatawah. ¹⁰ Moisés okijo: “Xiktlakita mopapá iwa momamá.” Noiwa okijo: “Akin fiero kiteneva ipapá noso imamá, makimiktikah.”

¹¹ Pero nomejwah nonkijtoah kualiká tla aka kilia ita noso ina: “Ayakmó nimitspalewis, porke tlan nimitsmakaskia yonikxelo para niktemakas tiopa.” ¹² Iwa tla aka ijkó kijtoa, nomejwah nonkikawiliah ayakmó moneki makimpalewi itajwah. ¹³ Ijkó kiné, nomejwah nonkixpanawiah itlanawatil Dios, iwa san nonkinchijtiwitseh tlan okichiwayah nomotatawah. Iwa oksiki kemi ni, nonkichiwah.

¹⁴ Jesús oksepa okínnotski n tlakah mawikh inawak, iwa okinmili:

—Techkakikah non nochteh iwa xikajsikamatikah: ¹⁵ Tlan kikua se tlakatl, amo ye tlan kijtlakolia iyolo, yej tlan kisa de itech iyolo n tlakatl, ye noni tlan kijtlakolia iyolo. ¹⁶ Tla nonkinekih nonkajsikamatiskeh, xikkasikamatikah.

¹⁷ Satepa, ijkuak Jesús okinkajteh n tlakah iwa okalak itech kali, itlamachtijkawah okitlajtlanlijkeh makinmajsikamatilti tlan okijtojka. ¹⁸ Ye okinmili:

—¿Nomejwah noiwa amo nonkajsikamatih? ¿Amo nonkajsikamatih tlan kalaki ijtik se tlakatl amo ye tlan kijtlakolia iyolo? ¹⁹ Porke mach kalaki itech iyolo, yej kalaki san kan itlalax, iwa satepa kisa kanik ikuitlaxkolwah.

Ika noni okinek okijo nochí tlákuale chipawak. ²⁰ Noiwa okijo:

—Tlan kisa ijtik iyolo se tlakatl, noni kijtlakolia iyolo. ²¹ Porke de ijtik iyolo n tlakatl, kisa tlan amo kuali,

awilnemi,

tlachteki,

temikta,

²² momekatijtinemi,

tominápitli,

kichiwa tlan amokuali,

tlakajkayawa,

kichiwa tlajtlákoli,

xíkojtlí,

xolópijtli,
moweyijkachiwa iwa mach kimati tlakaki.
²³ Nochteh ninteh amo kualteh tlamachílisteh kisah inmijtik inyolo n tlakah iwa kinyolijtlakoa.

*Jesús kipajtia ichpoch se siwatl de Canaán
(Mt. 15:21-28)*

²⁴ Jesús oyá kan tlalmeh de Tiro iwa Sidón. Okalak kan se kali, iwa amo okinekia aka makimati kan okatka, pero mach owéletki okinmotlatili. ²⁵ Se siwatl non ichpoch okipiaya se espíritu amokuali, okima kan Jesús okatka iwa owala inawak iwa omotlankuáketski ikxitla. ²⁶ Nin siwatl de Grecia iwa itajwah owalewatomah de sirofenicia. Okitlatlaujtitko n Jesús makikixtili n espíritu amokuali non ichpoch okipiaya. ²⁷ Pero Jesús okili:

—Xikinkawa achto maixwikah n tepilwah, porke amo kuali matikinkixtilikah intlakual iwa matikinmakakah n chichimeh.

²⁸ N siwatl okinankili:
—Milák, Noteko, pero noiwa n chichimeh non nemih itlampa mesa kikuah n kamapáyaxtli non kitepewah n tepilwah.

²⁹ Ijkuakó Jesús okili:
—Kuali tlan otikijo, ya weletis tias. N espíritu amokuali yokikakajte mochpoch.
³⁰ Ijkuak n siwatl okalakito icha, okajsito ichpoch wetok itech ipetl, iwa n espíritu amokuali yokikakajte.

Jesús kipajtia se tlakatl non amo otlakakia nion otlajtoaya

³¹ Jesús, oksepa okiski de kan tlali de Tíro, iwa opanok kan tlali de Sidón iwa ijgó okalakito kan weyi atl de Galilea, iwa omoka itech tlalmeh de Decápolis. ³² Ompa okiwilikjeh se tlakatl kamapojojlochtli iwa amo otlakakia, iwa okitlatlautijkeh n Jesús makitlalili ima itech non kókoxki. ³³ Jesús ixkoya okimowikili, okinkalaki imajpilwah ijtit inakaswah, iwa ika ichijcha okitelkoli inenepil n tlakatl. ³⁴ Otlanki oontláchixki ilwikak, oelsijsiwik iwa okijo:

—¡Efató! —noni kijtosneki: ¡Ximotlapo!
³⁵ San nima, inakaswah owalmotlapojkeh, iwa inenepil opajtik iwa opé yektlajtoa.
³⁶ Iwa Jesús okinnawati amaka makitlapowikah, pero yejwah okachi otetlapowiayah.
³⁷ Nochteh san omotlajtlachialtiyah iwa okijoayah:
—Semi kuali nochí tlan okichi, kichiwa matlakakakah non amo otlakakiah, iwa matlajtokah non amo oweletiah otlajtoaya.

8

Jesús kintlakualta nawi mil tlakah

(Mt. 15:32-39)

¹ Se tonati miakeh tlakah omoololojkeh inawak Jesús, iwa amo okipiayah tlan kimomajsewiskeh. Ijkuakó Jesús okínnotski itlamachtijkawah iwa okinmili:

² —Satlawel nikinmiknomati ninteh tlakah, porke ya kipiah eyi tonati nika kateh nowa, iwa mach kipiah tlan kikuaskeh. ³ Tla nikintitlanis mawiah incha iwa ayamó tlakuah, weletis ik nonka wetsitiweh, porke sikimeh ovalajkeh de wejka.

⁴ Itlamachtijkawah okinankiljeh:
—Ik nika amaka chanti, ¿kan tikkuitiweh paj para tikintlakualtiskeh?
⁵ Jesús okintlajtlani:
—¿Kech pameh nonkimpiah?
Yejwah okilijkeh:
—Chikome.
⁶ Jesús otlanawati mamotlajtlalikah nochteh n tlakah itech tlali. Ijkuakó Ye okinmó-nanki n chikome pameh iwa omotlasojkama inawak Dios. Otlanki okintlajtlápangi iwa okinmaktili itlamachtijkawah, iwa yejwah okinxejxeliljeh nochteh n tlakah. ⁷ Noiwa

okimpixtokah sikimeh michintsitsinteh, iwa Jesús okintiochi, iwa otlanawati makinxejx-elokah. ⁸ Nochteh otakuajkeh iwa kuali oixwikeh, iwa tlan ayakmó okikuajkeh okoololojkeh iwa okintetemijkeh chikome chikimeh. ⁹ Non otakuajkeh okatkah kemi nawi mil. Satepa Jesús okinmaaka. ¹⁰ Iwa Ye otlejkok itech se baska iwa itlamachtijkawah, iwa oyajkeh kan tlali de Dalmanuta.

N fariseos kitlajtlaniliah n Jesús makinnexili se milagro

(Mt. 16:1-4; Lc. 12:54-56)

¹¹ Ijkuakó n fariseos ovalajkeh inawak Jesús iwa opé motlatlajtolkopah íwa. Yejwah okitlajtlaniliyah makinnexili se milagro de ilwikak san para kiyejyekoskeh. ¹² Jesús oelsisiwik iwa okinmili:

—¿Tleka nonkitlajtlanih se milagro? De milajka nomechilia nomejwah mach nonkitaskeh nion se milagro de ilwikak.

¹³ Ijkuakó okinkakajte iwa oksepa otlejkok itech baska, iwa opanok ik nepa lado de n lago de Galilea.

Jesús kimmilia intlamachtilis n fariseos mach milák

(Mt. 16:5-12)

¹⁴ Itlamachtijkawah n Jesús okilkajkeh kiwikaskeh n tlákuali itech baska iwa sanwel okiwikayah se paj. ¹⁵ Ijkuakó Jesús okinmili:

—Ximotlachilikah de inlevadura n fariseos iwa de ilevadura n Herodes.

¹⁶ Itlamachtijkawah n Jesús opé kimoliah:

—Ijkí techilia porke amo otikwalikakeh paj.

¹⁷ Pero Jesús okima tlan okimoliayah iwa okinmili:

—¿Tleka non kimoliah amo ononkualikakeh nomopáj? ¿Amo nonkitah nion nonksikamatih? ¿Ok nonyoltlakuawatokeh? ¹⁸ ¿Nonkimpiah nonmoixtololowah iwa nomonakaswah, iwa amo nontlachiah nion nontlakakih? ¿Ayakmó nonkilnamikih?

¹⁹ Xikilnamikikah ijkuak onikintlakualti mákuili mil tlakah san ika mákuili paj, ¿kechmeh chikimeh ononkoololojkeh ika pantlapanalteh?

Yejwah okinankilijkeh:

—Májtlaktli iwa ome chikimeh.

²⁰ —Iwa ijkuak onikintlakualti nawi mil tlakah san ika chikome paj, ¿kech chikimeh ononkoololojkeh ika pantlapanalteh?

Yejwah okijtojkeh:

—Chikome.

²¹ Jesús oksepa okinmili:

—¿Tleka kiné ayamó nonkajsikamatih?

Itech altepetl de Betsaida Jesús kipajtia se tlakatl non amo otlachiaya

²² Satepa okalakitoh Betsaida, ompa okualikilijkeh n Jesús se tlakatl non amo otlachiaya iwa okitlatlautijkeh ipan makintlalili imawah. ²³ Jesús okimatílanki n kókoxki iwa okikixti de altepetl. Ika ichijcha okinsiawili ixtololowah iwa okintlali imawah ipa, iwa okitlajtlaní kox itla okitaya. ²⁴ Ye opé tlachia, iwa okijto:

—Nikinmita tlakah kemi yaskiah miskimeh, pero nejnentiwihi.

²⁵ Jesús oksepa okintlalili imawah ipan ixtololowah iwa okili matlatlachia, san nima n tlakatl oyektláchixki iwa opajtik. Iwa nochí kuali yokitaya. ²⁶ Ijkuakó Jesús okitítlanki icha iwa okili:

—Amo xikalaki kan altepetl, nion aka xikmatilti.

Pedro okijto Jesús Ye n Cristo

(Mt. 16:13-20; Lc. 9:18-21)

²⁷ Satepa Jesús iwa itlamachtijkawah oyajkeh kan altepemeh de Cesarea itech tlali de Filipo. Iwa ijkuak oyayah itech ojtli okintlajtlaní:

—¿Akin Ne, kimoliah n tlakah?

²⁸ Yejwah otlanankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías noso ok se profeta.

²⁹ Ijkuakó Jesús okintlajtlani:

—Iwa nomejwah tlan nonkijtoah, ¿Akin Ne?

Pedro okili:

—Tejwatsi Ti Cristo.

³⁰ Pero Jesús okinnawati:

—Amaka xikmatiltkah.

Jesús kitematiltia imikilis

(Mt. 16:21-23; Lc. 9:22)

³¹ Ijkuakó Jesús opé kinmachtia:

—Ne Non onimochi ni tlakatl nitlaijyowis miak iwa nechixnamikiskeh n tetajmeh non tlayakantokeh kan tiopa, iwa n tiopixkeh non tlayakantokeh iwa non kitemachtiah n tlanawatlistli nechmiktiskeh, pero ipan eyi tonati nimoyolitis.

³² Jesús ijkó okinmili para makajsikamatikah. Ijkuakó Pedro okiwík ixtkoya n Jesús iwa opé kajwa. ³³ Pero Jesús omókopki iwa okintlajtlatak itlamachtijkawah, opé kajwa n Pedro iwa okili:

—¡Xio de nika, satanás!, porke amo mitstekipachoa tlan Dios kimonekiltia, yej tlan kintekipachoa n tlakah.

Kenomi se weletis yetos itlamachtijkau n Jesús

(Mt. 16:24-28; Lc. 9:23-27)

³⁴ Ijkuakó Jesús okínnotski n tlakah iwa itlamachtijkawah iwa okinmili:

—Tla aka kinekis yetos notlamachtijkau, ayakmó makichiwa san tlan ye kineki, yej mawiki nonawak maya makimiktakah por nechtakita. ³⁵ Yika, akin kinekis mopalewis san ye inewia moixpolos. Pero akin kimktiah por nechtakita iwa por kitetlapowia itlajtol Dios, Ye kimakixtis. ³⁶ Porke ¿tlan ipati tla se tlakatl kitlani nochí tlan onka itech nin tlaltíkpaktli iwa kixpoloa ialma? ³⁷ ¿Kech weletis kitlaxtlawas se tlakatl para makimakixti ialma? ³⁸ Yika, akin pinawa de Ne iwa de notlajtol inmixpa nintek tlakah tlajtlakolchijkeh iwa mekatánajteh, noiwa Ne Non onimochi ni tlakatl nipinawas de ye ikuak niwalmuikas itech iweyijkachiwalis Notajtsi iwa iangelwah.

9

¹ Jesús noiwa okinmili:

—¡De milajka, nomechilia: sikimeh akimeh nika kateh mach mikiskeh asta ijkuak kitaskeh ya tlanawatijtok Dios ika nochí iweletilis!

Jesús moixpatla

(Mt. 17:1-13; Lc. 9:28-36)

² Chikwase tonati satepa, Jesús oyá kan se tepetl, iwa sanwel okinwík n Pedro, Jacobo iwa n Juan, iwa ompa inyakapa, Jesús omoixpatlak. ³ Itlake otsótlanke iwa omókopki istaktik kemi tesiwitl non amaka weletiskia ijkó kikawaskia, maya kitlawelpakaskia.

⁴ Noiwa okitakeh Elías iwan Moisés non omotlapowijtokah iwan Jesús. ⁵ Ijkuakó Pedro okili n Jesús:

—Tlamachti, sa kuali nika tikateh. Matikinchijchiwakah eyi akákalteh, se moaxka, se iaxka Moisés iwa ok se iaxka Elías.

⁶ Itlamachtijkawah saikpanoa omomojtjikeh, yika n Pedro mach okimatia tlan okij-toaya. ⁷ Ijkuakó owltemok se mextli iwa okinkemelo. Itech non mextli omokak se tlájtolí non okijoayah:

—Ye ni Nokone non niktlasojtla, xikkakikah.

⁸ San nima otlatlachixkeh ik nowia, iwa ayakmaka okitakeh, sanwel okitakeh n Jesús.

⁹ Iwa ikuak owltemoayah ikpak tepetl, Jesús okinnawati itlamachtijkawah:

—Amaka xikmatiltkah tlan ononkitakeh, asta ijkuak Ne Non onimochi ni tlakatl manimoyoliti.

¹⁰ Yika, okitlaatijkeh nin tlájtoli maya omotlajtlaniayah tlan kijtosneki moyolitis oksepa. ¹¹ Ijkuakó, okitlajtlanijkeh n Jesús:

—¿Tleka kijtoah non kitemachtiah n tlanawatílistli acho wits Elías?

¹² Jesús okinnankili:

—Milák, Elías acho wits, iwa kiyektlalis nochí. ¿Iwa tlan kijtoa itlajkuilol Dios de Ne Non onimochi ni tlakatl? Kijtoa satlawel nitlaijyowis iwa n tlakah nechtlawelitaskeh. *Is. 53:3* ¹³ Pero Ne nomechilia Elías yowitsa, iwa n tlakah okitoktijeh san tlan yejwah okinekeh, ijkó kemi ijkuitlak mochiwaskia.

Jesús kipajtia se télpochtli non okipiaya se espíritu amokuali

(Mt. 17:14-21; Lc. 9:37-42)

¹⁴ Ijkuak okalakikoh kan okatkah miakeh tlakah, okinmajsitoh non oksikimeh itlamachtijkawah. Sikimeh non kitemachtiah n tlanawatílistli non omokualanijtokah iwan yejwah. ¹⁵ N tlakah satlawel omotlajtlachialtijeh ijkuak okitakeh n Jesús iwa omotlelojkeh okitlajpalotoh. ¹⁶ Ijkuakó Jesús okintlajtlani:

—¿Tleka nonmonanankiliah iwa n nekateh?

¹⁷ Iwa se tlakatl okijo:

—Tlamachti, nika onimitswalikili nopoltsi, porke kipia se espíritu amokuali non amo kikawilia matlajto. ¹⁸ Iwa san kan yetos, n espíritu amokuali kitlamotla, iwa kitoktia makamapoposojkisa. Noiwa manejnetsonikah itlanwah iwa kisentititsa. Yonikintlatlaujnih motlamachtijkawah makikixtilikah n espíritu amokuali pero mach oweletkeh.

¹⁹ Jesús okinmajwak itlamachtijkawah:

—¡Nomejwah mach nonnechneltokah! ¿Asta kemania nomechxikojtos? ¡Xikualikakah nika n télpochtli!

²⁰ San nima okiwikakeh n télpochtli inawak Jesús, iwa ijkuak n espíritu amokuali okitak n Jesús, okitoki n télpochtli mamotlalwiteki, omotlalmemelo iwa okitoki makamapoposojkisa. ²¹ Ijkuakó Jesús okitlajtlani n teta:

—¿Yowejka ijkó mochijitiwits mopoltsi?

N teta okinankili:

—Desde chokotsi. ²² Iwa miak welta kitlamotla itech tletl iwa kualchiwa ijtk atl porke kineki kimiktis. Yika, tla Tejwatsi weletis techpalewis, techiknomati iwa techpalewi.

²³ Jesús okili:

—¿Tleka techtlajtlania kox niweletis? Nochi weletis mochiwas para akin nechneltoka.

²⁴ Ijkuakó ita n télpochtli owallsahtsik:

—¡Nitlaneltoka, pero techpalewi para okachi manitlaneltoka!

²⁵ Ijkuak Jesús okitak opé moololoah miakeh tlakah, okijo:

—Te espíritu amokuali non tiktuktia n télpochtli amo matlajto nion matlakaki, Ne nimitsnawatia xikkajkawa n télpochtli iwa ayakmó oksepa xiwalmokopa itech.

²⁶ N espíritu amokuali otsajtsik iwa okitoki n télpochtli oksepa mamimiki, iwa okikakaje n télpochtli kemi non yomikki. N tlakah okijtoayah yomikki n télpochtli.

²⁷ Pero Jesús, okimakitski n télpochtli iwa okipalewi mamoketsa.

²⁸ Otlanki Jesús okalak ijtk se kali, iwa itlamachtijkawah okitlajtlanijkeh.

—¿Tleka tejwah amo otiveletkeh otikkixtijeh n espíritu amokuali?

²⁹ Jesús okinmili:

—Ninteh espíritus amokualteh sanwel mokixtia ika miak tiotsajtsílistli.

Jesús oksepa kinmilia kenomi mikkis

(Mt. 17:22-23; Lc. 9:43-45)

³⁰ Ijkuak oyajkeh de ompa, opanokeh ik Galilea. Pero Jesús mach okinekia aka makimati, ³¹ porke okinmachtijtaka itlamachtijkawah:

—Ne Non onimochi ni tlakatl nechtemaktiskeh inmak n tlaltikpaktlakah, iwa nechmiktiskeh, pero ipan eyi tonati nimoyolitis.

³² Pero itlamachtijkawah mach okajsikamatiah tlan Jesús okinmiliaya, iwa okimawiliyah kitlatlajtlaniskeh.

Non okachi weyijkatitok

(Mt. 18:1-5; Lc. 9:46-48)

³³ Ijkuakó okalakitoh Capernaúm, iwa ijkuak yokatkah ijtik kali, Jesús okintlajtlani itlamachtijkawah:

—¿Tlan ononkimolijtiwalayah itech ojtli?

³⁴ Pero mach okinankilijeh. Itech ojtli omokualanijtiwalayah porke okinekiah kima-
tiskeh akin okachi weyijkatitok. ³⁵ Ijkuakó Jesús omotlali, iwa okínnotski n májtlaktli iwa
ome itlamachtijkawah, iwa okinmili:

—Akin kinekis kinyakanas oksikimeh, achto matetlakita iwa makipalewi san akin
yetos.

³⁶ Satepa Jesús okónnotski se chokotsi iwa okontlali tlatlajkotia, otlanki okimona-
palolti iwa okinmili:

³⁷ —Akin kiselia se chokotsi kemi ni itech Notoka, Ne nechselia, iwa akin nechselia amo
san Ne nechselia, yej noiya kiselia Dios Akin onechaltítlanki.

Akin amo techtlawelita kajki towah

(Mt. 10:42; Lc. 9:49-50)

³⁸ Ijkuakó Juan okili n Jesús:

—Tlamachti, otiktakeh se tlakatl non okinkixtiaya espíritus amokualteh itech Motoka.
Tejwah otikilijeh ayakmó ijkó makichiwa, porke ye amo nemi towah.

³⁹ Pero Jesús okinmili:

—Amo xiktlakawaltikah, porke akin kichiwa se milagro itech Notoka, mach weletis
fiero nechtenejtinemis. ⁴⁰ Porke akin amo techtlawelita, kajki towah. ⁴¹ Akin
nomechtlionkolis maya san se xikali atl itech Notoka nomejwah akimeh iaxkawah n Cristo.
De milajka nomechilia ye kiselis itlaxtlawil.

Matimotlachilikah amo kichiwa tiwetsiskeh itech tlajtlákoli

(Mt. 18:6-9; Lc. 17:1-2)

⁴² 'Akin kitoktis matlajtlakolchiwa se akin nechneltoka, okachi kuali makikechilpilikah
se weyi tetl iwa makontlamotlakah ijtik weyi atl. ⁴³ Tla moma mitstoktia xikchiwa
tlajtlákoli, xikmotekili, okachi kuali xikalaki kan ilwikak timatepo, iwa amo tiajsitok
mamitsontlamotlakah miktla, kan ayik sewis n tletl. ⁴⁴*

⁴⁵ 'Iwa tla mokxi mitstoktia xikchiwa tlajtlákoli, xikmotekili. Okachi kuali xikalaki kan
ilwikak ti ikxitopo iwa amo tiajsitok mamitsontlamotlakah miktla. ⁴⁶†

⁴⁷ 'Iwa tla moixtololo mitstoktia xikchiwa tlajtlákoli, xikmokixtili. Porke okachi kuali
xikalaki ilwikak san ika se moixtololo, iwa amo tiajsitok mamitsontlamotlakah miktla,

⁴⁸ kan okuilimeh ayik mikkih iwa n tletl ayik sewi.

⁴⁹ 'Porke nochteh n tlakah mopuyeliskeh ika tletl. ⁵⁰ N istatl satlawel kuali, pero tla n
istatl mach ok puyak, ¿kenomi weletis ika nontlapuyeliskeh? Nomejwah xiyetokah kemi
n istatl non kuali iwa ximoyekwikakah.

10

Jesús kitemachtia amo se mamosiwakajkawa

(Mt. 19:1-12; Lc. 16:18)

¹ Jesús okiski de Capernaúm iwa oyá kan tlali de Judea ik nepa lado de n río
Jordán. Ompa oksepa omoololojkeh miakeh tlakah inawak, iwa Ye opé kinmachtia
kemi nochipa okichiwaya. ² Ijkuakó sikimeh fariseos omíkuanijkeh inawak Jesús para
kitlajtoltlapololtiskeh iwa okitlajtlanijkeh:

—¿Kox kuali tla se tlakatl kikajkawa isiwa?

* 9:44 N bersíkulo 44 amo nestok itech non okachi yowejkajkeh itlajkuilolwah Dios. † 9:46 N bersíkulo 46 amo
nestok itech non okachi yowejkajkeh itlajkuilolwah Dios.

³ Jesús okinnankili:

—¿Tlan onomechnawati n Moisés?

⁴ Yejwah otlanankilijkeh:

—Moisés okitekawili mamosiwakajkawa n tlakatl tla kimajmanilia se amatl kan kijtoa kikajkawas.

⁵ Ijkuakó Jesús okinmili:

—Moisés onomechmák non tlanawátili porke satlawel ononyoltlakuawatokah. ⁶ Pero itech ipewaya n tlaltípkaktli, Dios okinchijchi “tlakatl iwa siwatl”. ⁷ “Yika n tlakatl kikajtewas ita iwa ina iwa moseitilis iwan isiwa, ⁸ iwa san ken ome mochiwaskeh se.” Yika ayakmó yetoskeh ome, yej san se. ⁹ Yika, tlan Dios yokiseitili, amaka makinxexelo.

¹⁰ Ijkuak yokatkah itech kali, itlamachtijkawah okitlajtlanilijkeh makinmajsikamatilti tlan okimilijka n fariseos. ¹¹ Jesús okinmili:

—Akin kikajkawa isiwa iwa monamiktia iwan ok se, nin tlakatl san kimomekatijtok iwa tlajtlakolchijtok inawak non achto isiwa, ¹² iwa tla n siwatl kikajkawa iokich iwa monamiktia iwa ok se, nin siwatl noienda san momekatijtok.

Jesús kintiochiwa n pípilteh

(Mt. 19:13-15; Lc. 18:15-17)

¹³ Ijkuakó okwalinwikilijkeh n Jesús sikimeh pípilteh, para makintlalili imawah impah, pero itlamachtijkawah opé kinmajwah akimeh okwalinwiliyah n pípilteh. ¹⁴ Ijkuak Jesús okimitak, okuálanki iwa okinmili itlamachtijkawah:

—Xikinkawilikah n pípilteh mawikih nonawak, iwa amo xikintsakuilikah, porke akimeh yolyamankeh kemi pípilteh kalakiskeh kan Dios tlanawatijtok. ¹⁵ De milajka nomechilia, akin amo kikawilis Dios matlanawati itech iyolo kemi se chokotsi kimokawilia, non tlakatl ayik kalakis kan Dios tlanawatijtok.

¹⁶ Jesús okinmonapaloltiaya n pípilteh iwa okintiochiwaya ijkuak okintlaliliaya imawah impah.

Se telpochtli non kitlawelpia tomi motlapowia iwan Jesús

(Mt. 19:16-30; Lc. 18:18-30)

¹⁷ Ijkuak Jesús yoyaya de ompa, okalakiko se tlakatl, omotlankuáketski inawak iwa okili:

—Kuali tlamachti, ¿tlan nikchiwas para nikpias n semijkak nonemilis?

¹⁸ Jesús okili:

—¿Tleka techilia nikuali? Sanwel onka se Akin kuali, iwa Ye Dios. ¹⁹ Ya tikinmixmati n tlanawatílisteh:

“Amo xitemikti,
amo ximomekati,
amo xitlachteki,
amo xixolopijti,
amo xitekajkayawa,
iwa xikintlakita motajwah.”

²⁰ N telpochtli okinankili:

—Tlamachti, nochí noni ya nikchijtiwits desde ni telpochtli.

²¹ Jesús okitlasojkaitak iwa okili:

—Ok se mitspoloa tikchiwas: xiknemakati nochí tlan tikpia, iwa n tomi, xikinxejxelili non amitla kipiah, ijkó tiktlawelpias kan ilwikak, iwa tiwits nowa.

²² Pero ijkuak ijkó okikak, n telpochtli omoyolkokojtia porke saikpanoa okitlawelpiaya.

²³ Ijkuakó Jesús okonimitak non okiyawalojtokah iwa okinmili itlamachtijkawah:

—¡Kema owi kalakiskeh kan Dios tlanawatia akimeh kitlawelpiaya!

²⁴ Ninteh tlájtoltéh san okintlajtlachialti itlamachtijkawah, pero Jesús oksepa okinmili:

—Nopilwah, jowi kalakiskeh kan Dios tlanawatijtok akimeh kintlawelyoltilana n tomi!
²⁵ Okachi amo owi panos kan ixtololo n akuxa se riata* iwa amo se non kitlawelpia tomi makalaki kan Dios tlanawatijtok.

²⁶ Ijkuak okikakeh tlan okijto, okachi omotlajtlachialtijkeh iwa okimoliayah:

—Tla ijkó, ¿akin weletis kalakis ilwikak?

²⁷ Jesús okimixtlajtlatak iwa okinmili:

—N tlakah kimoliskeh ayik weletis kichiwaskeh, pero Dios nochí weleti kichiwa.

²⁸ Ijkuakó Pedro opé kilia n Jesús:

—Noteko, tejwah otikkakajtejkeh nochí tlan otikpiayah, iwa otimitswaltokakeh.

²⁹ Jesús okinankili:

—De milajka nomechilia, akin kikawa icha, ikniyah, iweltiwh, itajwah, ipilwah, noso ialtépeu por kitetlapowia n kualitlátoli, ³⁰ kiselis axa itech nin tlaltípkaktli okachi de se siento: kalmeh, ikniyah, iweltiwh, itajwah, iwa itlalwah, maya noiwa kitotojtokaskeh, iwa itech non ok se tlaltípkaktli, mach ok ayik mikkis yej nochipa yolitos. ³¹ Pero miakeh non axa moweyiliah, satepa ayakmó weyijkatitoskeh, iwa miakeh non axa amo moweyiliah satepa kinweyijkatlatliskeh.

Jesús oksepa kinmilia kenomi mikkis

(Mt. 20:17-19; Lc. 18:31-34)

³² Yoixtlejkotiayah Jerusalén, iwa Jesús okinyakantiaya itlamachtijkawah. Yejwah omotlajtlachaltijkeh iwa oyayah ika miak mawílistli. Ijkuakó Jesús oksepa okintlapowi n májtlaktli iwa ome itlamachtijkawah iwa opé kinmilia tlan mochiwaskia. ³³ Iwa okinmili:

—Xikitakah, axa tiixtlejkotiwhi Jerusalén, kan Ne Non onimochi ni tlakatl nechtemak-tiskeh inmak tiopixkeh non tlayakantokeh iwa non kitemachtiah n tlanawatílistli. Yejwah nechtajtlakoltiskeh iwa nechtemak-tiskeh inmak n tlakah non amo judíojteh para manechmiktikah. ³⁴ Ompa nechpijinawiskeh, nechchijchawiskeh, nechtson-witekiskeh iwa nechmiktiskeh, pero ipan eyi tonati nimoyolitis.

Jacobo iwa n Juan motlatlaujtiah inawak Jesús

(Mt. 20:20-28)

³⁵ Ijkuakó Jacobo iwa n Juan, itelpochwah n Zebedeo, owalajkeh inawak Jesús iwa okilijkeh:

—Tlamachti, timitsontlatlaujtiah techonchiwili tlan timitsontlajtlaniliskeh.

³⁶ Ijkuakó Ye okinmili:

—¿Tlan nonkinekih manomechchiwili?

³⁷ Iwa yejwah okinankilijkeh:

—Techonkawili matimotlalikah monajnakastla kan titlanawatijtos, se ik moyekma iwa ok se ik moopochma.

³⁸ Ijkuakó Jesús okinmili:

—Nomejwah mach nonkimatih tlan nonkitlajtlanih. ¿Weletis nontlaijywiskeh kemi Ne nitlaijywis?, noso ¿weletis nonmokuaatekiskeh kemi Ne nimokuaatekis?

³⁹ Yejwah okinankilijkeh:

—Tiweletiskeh.

Jesús okinmili:

—De milajka nomejwah nontlaijywiskeh iwa nontlaxikoskeh kemi Ne. ⁴⁰ Pero mach Ne Akin kijtos akin motlalis ik noyekma noso ik noopochma, yej Notajtsi kinmaktilis akimeh Ye yokimpéjpenki.

⁴¹ Ijkuak non ok májtlakteh itlamachtijkawah ijkí okikakeh, okulankeh iwan Jacobo iwa n Juan. ⁴² Pero Jesús okínnotski iwa okinmili:

* 10:25 Sikimeh tlajkuíolteh kipiah n tlájtoli ‘de kameyo’ porke n michmajkeh kipiah se tomawak riata non okichijchijkeh ika itsojmio n kameyo. Nawi itlamachtijkawah achto michmajkeh iwa okitekitiltiayah non riata non yejwah okitokayotijkeh ‘kameyo’.

—Nomejwah kuali nonkimatokeh itech wejweyi altepemeh, akimeh kintekiwajtlaliah pewa mosijsiniah innawak n tlakah de nonteh altepemeh, iwa akimeh tlayakantokeh chikawak pewa tlanajnawatiah. ⁴³ Pero nomowah amo ijkó yetos. Akin kinekis nomonawak moweyijkatlalis, moneki achto makimpalewi oksikimeh, ⁴⁴ iwa tla aka de nomejwah kineki tlayakantos nomonawak, moneki makintekitili oksikimeh. ⁴⁵ Porke nonewia Ne Non onimochi ni tlakatl amo oniwala para manechtektilikah yej para nikintekitilis oksikimeh iwa para nimotemakas manechmiktikah para ika noni niktlaxtlawas intemakixtilis miakeh.

Jesús kipajtia n Bartimeo se tlakatl non amo otlachiaya

(Mt. 20:29-34; Lc. 18:35-43)

⁴⁶ Ijkuakó Jesús iwa itlamachtijkawah okalakitoh Jericó. Iwa ijkuak yokistiayah de Jericó, miakeh tlakah oyayah inwah. Ijkuakó se non amo otlachiaya akin itoka Bartimeo, ipiltsi n Timeo, oewatoka itempa n ojtli omotominijtlanijtoka. ⁴⁷ Iwa ijkuak okikak Jesús de Nazaret ik ompa opanotiaya, opé kitsajtsilia:

—¡Jesús, Ikone n David techiknomati!

⁴⁸ Miakeh okajwayah makitsakua ikamak, pero ye okachi otsajtsia:

—¡Ikone n David, techiknomati!

⁴⁹ Ijkuakó Jesús omóketski, iwa olatítlanki makinotsatih.

Yejwah okinotsatoh non amo otlachiaya iwa okilijkeh:

—¡Ximoyolchikawa! Ximoketsa. ¡Jesús mitsnotsa!

⁵⁰ N kókoxki okontlamotlak ikoto, omoketewak iwa omikuani inawak Jesús. ⁵¹ Ijkuakó Jesús okitlajtlani:

—¿Tlan tikmonekiltia manimitstokti?

Ye okinankili:

—Tlamachti, nikneki nitlachias.

⁵² Jesús okili:

—Ya weletis timuikas, por otechneltokak yotipajtik.

San nima non amo otlachiaya owatláchixki iwa oyá iwan Jesús.

11

Jesús kalaki Jerusalén kemi Rey

(Mt. 21:1-11; Lc. 19:28-40; Jn. 12:12-19)

¹ Ijkuak ya onkalakiah Jerusalén, ayakmó wejka de Betfagé iwa Betania, iyakapa n olivostepetl, Jesús okintítlanki ome itlamachtijkawah, ² iwa okinmili:

—Xiwiah Betfagé, non kajki nepa tlayakapa, iwa san nima kan nonkalakitiweh nonka-

jsitiweh ilpitok se burro non ayamaka itech tlejkotika. Xiktojtomakah iwa techalikilikah.

³ Iwa tla aka nomechtlahtlania tleka nonkitojtomah, xikilikah, n Toteko kimonekiltia, iwa

san nima kitekopilis.

⁴ Itlamachtijkawah oyajkeh iwa okajsitoh n burro ilpitok inakastla n kaltentli itech ojtli, iwa okitojtonkeh.

⁵ Iwa sikimeh non ompa okatkah okimilijkeh:

—¿Tlan nonkichiijtokeh? ¿Tleka nonkitojtomah n burro?

⁶ Yejwah okinnankilijkeh kemi Jesús okimilika, iwa okinkawilijkeh mawiah.

⁷ Okiwikakeh n burrojtsi ixpa Jesús, iwa okipejpechtilijkeh ika inkoton wah iwa Jesús otlejkok itech. ⁸ Miakeh okisojkeh intlakeh itech ojtsli, iwa oksikimeh okintsojtsontekiah inmamayowah n kuaujmeh iwa okinsojsóayah itech ojtsli.

⁹ Nochteh non otlayakantiyah iwa non ovalayah tlakuitlapa, opé tsajtsih:

—¡Hosanna!* ¡Tlatichiwali Akin wits itech Itoka n Toteko Dios!

Sal.

^{118:26} ¹⁰ ¡Dios makitiochiwa Akin ya tlanawatis kemi otlanawati n totata David! ¡Hosanna! ¡Maweyijkachito Totajtsi Dios non moitstika ilwikak!

* 11:9 Kijtosneki ¡Techpalewi!

¹¹ Jesúś okalakito Jerusalén iwa milaktik okalakito kan Weyi Tiopa. Satepa ijkuak sentetl yotlajtlachiato, oyá kan altepetl de Betania iwa n májtlaktli iwa ome itlamachti-jkawah porke yotleyuatoka.

Jesúś kitlawelajwa se igoskuawitl non amo otlakia

(Mt. 21:18-19)

¹² Ijkuak owalmostlatik okiskeh de Betania iwa Jesúś ovalxitlatlak itech ojtli. ¹³ Iwa san wejka okonitak se igoskuawitl non kualtsi oxopiawatoka. Oyá okitlatemolito, pero amitla okajsik, sanwel ixiuyyo ken ayamó ovalajsia n tonati ijkuak tlaaki. ¹⁴ Ijkuakó Jesúś okili n igoskuawitl:

—¡Ayik makikuakah motlakilo!

Iwa itlamachtijkawah otlakaktokah.

Jesúś kualinkixtia n tlasemankeh kan Weyi Tiopa

(Mt. 21:12-17; Lc. 19:45-48; Jn. 2:13-22)

¹⁵ Ijkuak okalakitoh Jerusalén, Jesúś oyá kan Weyi Tiopa iwa opé kualinkikixtia akimeh ompa otlanamakatokah iwa otlakojtokah. Okinxitronkopili inmesajwah akimeh otomintlapatlatokah iwa insiyajwah akimeh okinemakatokah palomajtsitsinteh. ¹⁶ Iwa amo okitekawiliaya aka makitlajkomilawa n Weyi Tiopa ika itla itlamamal. ¹⁷ Iwa ijkí okinmachtia:

—Itech itlajkuilol Dios kijtoa: “Nocha kinotsaskeh kali kan motiotsajtsiliskeh nochteh n tlaltikpaktlakah”, pero nomejwah yononkikopkeh se kúyoktli de ichtekeh.

¹⁸ N tiopixkeh non tlayakantokeh iwa non kitemachtiah n tlanawatílistli okimatkeh tlan Jesúś okichi kan Weyi Tiopa, iwa opé kitemoliah kenijki weletis kimiktiskeh. Yejwah okimawiliayah porke nochteh n tlakah de non altepetl omotlajtlachialtiyah de itlamachtilis. ¹⁹ Iwa ijkuak owaltiotlatik, Jesúś iwa itlamachtijkawah okiskeh de Jerusalén.

Waki n igoskuawitl non amo otlakia

(Mt. 21:20-22)

²⁰ Ijkuak owalmostlatik, iwa opanokeh kan igoskuawitl, okitakeh yowaka asta inelwayo. ²¹ Ijkuakó Pedro okualilnamik, iwa okili n Jesúś:

—Tlamachti, xikita, n igoskuawitl non otikajwak yowaki.

²² Jesúś okinnankili:

—Xitlaneltokakah inawak Dios. ²³ De milajka nomechilia, tla aka kilis nin tepetl: “Ximoachiwa iwa ximomanati itech weyi atl”, iwa ika nochí iyolo kineltoka milák mochiwas, ijkó tlamochiwas. ²⁴ Yika nomechilia: Nochi tlan nonkitlajtlaniskeh itech nomotiotsajtsilis, xikneltokakah kemi yaskia yononkiselijkeh, iwa Totajtsi Dios nomech-maktilis. ²⁵ Iwa ijkuak non motiotsajtsiliskeh, tla aka nonkikokoliah, xiktlapojojpolwikah, ijkó noíwa Nomotajtsi Dios non kajki ilwikak manomechtlapojojpolwi. ²⁶ Tla nomejwah amo nontetlapojojpolwiah, Nomotajtsi non kajki ilwikak, noíwa amo nomechtlapojojpolwis de nomotlajtlakolwah.

Iweletilis n Jesúś

(Mt. 21:23-27; Lc. 20:1-8)

²⁷ Satepa oksepa omokopkeh Jerusalén. Iwa ijkuak Jesúś otlajtlachixtinemia itech n Weyi Tiopa, omíjkuanijkeh inawak n tiopixkeh non tlayakantokeh, non kitemachtiah n tlanawatílistli iwa n tetajmeh non tlayakantokeh kan tiopa, ²⁸ iwa okitlajtlanijkeh:

—¿Akin omitsmák tekiwajyotl para ijkó tikchiwas?

²⁹ Jesúś okinnankili:

—Ne noíwa nomechtlapojojpolwiah, iwa tla nonnechnankiliskeh, Ne nomechilis akin onechmák nin tekiwajyotl. ³⁰ ¿Akin okinawati n Juan matlakuaateki, Dios noso n tlakah? Technankilikah.

³¹ Ijkuakó san yejwah opé motlatlajtolkopah, iwa okimoliayah:

- Tla tikiliskeh Dios okinawati, Ye techilis: “Tla ijkó, ¿tleka mach ononkineltokakeh?”
 32 Amo weletis tikiliskeh san tlakah okinawatijkeh.
 Yejwah okinmawiliayah n tlakah porke nochteh okimatiah Juan milák ye se profeta.
 33 Yika, otlanankilijkeh:
 —Amo tikmatih.
 Ijkuakó Jesús okinmili:
 —Ne noiva mach nomechilis akin onechmák nin tekiwajyotl.

12

Sikimeh tekitkeh amokualteh (Mt. 21:33-46; Lc. 20:9-19)

- 1 Ijkuakó Jesús opé kintlapowia ika tlapoálisteh iwa okinmili:
 —Se tlakatl okintojtook uvaskuaujmeh itech itlala iwa nochi okitsatsak. Otlanki okichijchi se tanke kan kimpatskas n uvasteh noiva okichijchi se torre para kimokuitlawis itlatok.
 'Satepa, itlala okinkajtewili makimokuitlawikah sikimeh uvastekitkeh para makitekitilikah, iwa oyá wejka. 2 Ijkuak oajsiko n tonati para motekis n uvas, n tekowa okitítlanki se itlakewal para makintlajtlaniliti n uvastekitkeh tlan iaxka. 3 Pero yejwah okikitskijkeh iwa okiwitekeh, iwa okonewaltijkeh mapijpilkati. 4 N tekowa okontítlanki ok se itlakewal. Pero nin itlakewal okimojmotlakeh ika tetl, okikuatlapankeh iwa okiwijwikaltijkeh. 5 N tekowa oksepa okontítlanki ok se itlakewal, iwa nin itlakewal okimiktijkeh. Satepa okintitlantiah oksikimeh, sikimeh okinwitekeh iwa oksikimeh okinmiktijkeh.
 6 'Iwa iksemi sa ipiltsi omokawaya, non san ye se itlasoj, iwa okintitlanili porke okimoliaya: “Nopiltsi, kema kitlakitaskeh.” 7 Pero nekateh uvastekitkeh okimolijkeh: “Ye ni akin kimokawis nochi; matikmiktikah iwa tejwah tkmokawiskeh tlan kiaxkatiliskeh.”
 8 Iwa okikitskijkeh, okimiktijkeh iwa okontlamotlatoh kala.
 9 Ijkuakó Jesús okintlajtlani:
 —Axa ¿tlan nonkiyejyekolah kichiwas n tekowa de non lawerta? Wits kinmiktiki nonteh tekitkeh, iwa ilawerta kinmaktilis oksikimeh.
 10 'Mach ayamó nonkiamapoah itlajkuil Dios kan kijtoa:
 N tetl non kalchijchijkeh ik nepa okontlakaltechojkeh,
 yomochiwako n tetl non okachi tetlakxili.
 11 Ye nin tlan Toteko okichi, iwa techtlajtlachialtia. *Sal. 118:22-23*
 12 Ijkuakó okitemoliayah kenikki kitsakuaskeh n Jesús, porke okajskamatiah non tlapoálistli yejwah okinmili. Pero yejwah okinmawiliayah n tlakah, yika okikajkeh n Jesús iwa oyajkeh.

Kitlajtoltiah n Jesús kox kuali ka se kitlaxtlawas impuesto (Mt. 22:15-22; Lc. 20:20-26)

- 13 Satepa okintitlanilijkeh n Jesús sikimeh fariseos iwa sikimeh itekitwah n Herodes, para kitlajtoltlapololtiskeh iwa ijkó weletis kitlajtlakoltiskeh. 14 Yejwah okitakoh n Jesús iwa okilijkeh:
 —Tlamachti, tikmatokeh Tejwatsi tinemi ika moyolo chipawak iwa tikijtoa tlan milák iwa amo timotlachilia ijkuak mitskakih, yej titemachtia tlan milák. ¿Kox kuali matiktlaxtlawakah impuesto inawak César? ¿Tikpiyah tiktlaxtlawaskeh noso amó?
 15 Pero ken Jesús yokimatiá íxkopkeh, yika okinmili:
 —¿Tleka nonkinekih manimotlapololte? Techalikilikah se platajtomí manikita.
 16 Yejwah okititijkeh n platajtomí, iwa ijkuak Jesús okitak, okintlajtlani:
 —¿Akin ixko iwa akin itoka nika ijkuilitok?
 Yejwah okilijkeh:
 —De César.
 17 Ijkuakó Jesús okinmili:
 —Xikmakakah n César tlan iaxka n César, iwa xikmakakah Dios tlan iaxka n Dios.

Yejwah san omotlajtlachialtijkeh kenijke otlanankili.

*N saduseos kitlajtlaniah n Jesús kox oksepa se moyolitis
(Mt. 22:23-33; Lc. 20:27-40)*

¹⁸ Ijkuakó owalajkeh sikimeh saduseos inawak Jesús. Ninteh saduseos kijtoah non yomikkeh ayakmó moyolitiah, yika okitlajtlanijkeh:

¹⁹ —Tlamachti, Moisés otechmachti, tla se tlakatl non ya kipia isiya mikki, iwa amo okímpixki ipilwah iwan isiya, se ikni moneki monamiktis iwan iknosiwatl. Ijkó non yomikki ya kimpias ipilwah. ²⁰ Yowejka okatkah chikome iknimeh. Non teteachka omonamikti pero omikki iwa nion se ikone okikajtewili isiya. ²¹ Ijkuakó itsoyo omonamikti iwan iknosiwatl, pero noiva omikki iwa amo okikajtewili nion se ikone n iknosiwatl, iwa noijkó omochi non ipan eyi iknimeh. ²² Ijkó n chikome iknimeh omonamiktiyajkeh iwa non siwatl, pero nion se okikajtewili se ikone. Sa iksemi noiva omikki n siwatl. ²³ Axa, ijkuak moyolitiskeh non yomikeh, ¿de akin yetos tesawa?, porke n chikome iknimeh omonamiktiyajkeh iwa non siwatl.

²⁴ Ijkuakó Jesús okinnankili:

—Nomejwah nonkuatlapolojtokeh, porke mach nonkajsikamatih itlajkuilol Dios nion iweletilis. ²⁵ Porke ijkuak non yomikeh moyolitiskeh, mach ok monamiktiskeh nion kintemakaskeh impilwah mamonomamiktikah, porke yetoskeh kemi ángelteh non kateh ilwikak. ²⁶ Pero tla nomejwah nonnechtlatlaniyajtokeh kox moyolitah non yomikkeh, ¿mach ayamó nonkiamapoah itlajkuilol Moisés, kan techmatiltia kenijke Dios okitlapowi n Moisés itech n tlátsmoli non otlatlatoka? Dios okili n Moisés: “Ne Idios Abraham, Isaac, iwa Jacob.” ²⁷ ¡Dios mach Dios de akimeh yomikkeh, yej de akimeh yolitokeh!, yika nomechilia nomejwah nonkuatlapolojtinemih.

Éx. 3:6

Non okachi weyi itlanawatil Dios

(Mt. 22:34-40)

²⁸ Seme non kitemachtia n tlanawatlistli, keman okikak Jesús kuali okinnankili n saduseos non okinekia mamotlajtoltlapololti. Omikuani inawak Jesús iwa okitlajtlani:

—¿Katlie itlanawatil Dios okachi weyi kijtosneki?

²⁹ Jesús okinankili:

—N tlanawátili non okachi weyi kijtosneki, ye ni: “Xikkaki Israel, n Totajtsi Dios sanwel Ye se.”

³⁰ “Xiktlasojtla Moteko Dios ika nochí moyolo, ika nochí moalma, ika nochí motlánamikilis iwa ika nochí mochikawalis.” ³¹ Iwa non ipan ome tlanáwatili noiva kijtoa: “Xiktlasojtla mokni kemi te timotlasojtla.” Amo oncateh oksikimeh tlanawátilteh okachi wejweiyah kemi ninteh ome.

³² Ijkuakó n tlamachti okili:

—Kuali ka, Tlamachti. Milák tlan tikijtoa: Sanwel onka se Dios, iwa amo onka ok se kemi Ye. ³³ Tikpiyah tiktlasojtla keh Dios ika nochí toyolo, ika nochí totlalnamikilis, ika nochí toalma iwa ika nochí tochikawalis, iwa tiktlasojtla mokni, kemi te timotlasojtla, ika noni okachi tikyolpaktiah Dios iwa amo ijkuak titlamanah noso tikchichinoah se yolkatl.

³⁴ Jesús okikak nin tlamachti otlanankili kemi akin ixtlamati, yika okili:

—Te amo tika wejka kan Dios tlanawatijtok.

Ijkuakó, ayakmaka omixewi kitlajtlanis itla n Jesús.

¿Akin Ikone?

(Mt. 22:41-46; Lc. 20:41-44)

³⁵ Jesús otlamachtijtoka kan Weyi Tiopa iwa okijo:

—¿Kenomi kijtoah non kitemachtia n tlanawatílistli, Cristo Ikone n rey David?

³⁶ Porke inewia n David okijo ijkuak n Espíritu Santo okitlajtolyákanki:

Toteko Dios okili n Noteko:

“Ximotlali ik nomayekma,

asta manikintlali moikxitla akimeh mitskokoliah.”

Sal. 110:1

³⁷ Tla inewia n David kinotsa Noteko n Cristo, ¿kenomi n Cristo weletis yetos ikone n David?

Iwa tlawelmiakeh tlakah okikakiah n Jesús ika pakílistli.

Jesús kinteilia n tlamachtijkeh de itlanawatil Moisés

(Mt. 23:1-36; Lc. 11:37-54; 20:45-47)

³⁸ Itech itlamachtilis n Jesús okijtoaya:

—Ximotlachilikah inmak non kitemachtiah n tlanawatílistli, porke kiwilitah nemiskeh ika kuajkualteh tlakemeh weweyakeh, noiva kiwilitah makintlajpalokah teixpa iwa makintlakitakah miak. ³⁹ Yejwah kiwilitah moyayantiskeh tlayakapa itech sinagogas iwa itech ilwimeh, ⁴⁰ iwa kintlakijkixtiliah n iknosiwameh, iwa para kinmixtlaatiskeh intlajtlakolwah saikpanoa motiotsajtsiliah. Yejwah kiseliskeh okachi weyi tlaijyowílistli.

N iknosiwatl non okitemák nochí tlan okipiaya

(Lc. 21:1-4)

⁴¹ Se tonati Jesús oewatoka iyakapa n kaxajtomi kan Weyi Tiopa de Jerusalén, iwa okintlajtlatoka keniji okontlaliyah tomi ijtk kaxa. Miakeh non okitlawelpiyah, okontlaliyah miak tomi. ⁴² Ijkuakó owala se probe iknosiwatl iwa okonintlali ome tomimeh de kobre, non amo miak impati. ⁴³ Ijkuakó Jesús okínnotski itlamachtijkawah iwa okinmili:

—De milajka nomechilia, nin probe iknosiwatl, okachi okitemák iwa amo kemi ok-sikimeh. ⁴⁴ Porke nochteh okitemakakeh tlan ayakmó kitekitiltiah, pero nin iknosiwatl, okitemák nochí tlan ika panotoskia.

13

Jesús okijo n Weyi Tiopa de Jerusalén kixixitsaskeh

(Mt. 24:1-2; Lc. 21:5-6)

¹ Keman Jesús okistiaya de kan Weyi Tiopa, se itlamachtijkau okili:

—¡Tlamachti, xikoninmita ninteh wejweyi temeh, iwa kuajkualteh n kalmeh!

² Jesús okinankili:

—¿Tikinmita nochteh ninteh wejweyijtikeh kalmeh? Mach ok mokawas nion se tetl ipan ok se. Nochi kixixitsaskeh.

Ijkí tlamochiwas ikuak ya pojpoliwiki n tlaltíkpaktli

(Mt. 24:3-28; Lc. 21:7-24; 17:22-24)

³ Ijkuakó Jesús iwa itlamachtijkawah oyajkeh kan olivostepetl, non mokawa iyakapa n Weyi Tiopa de Jerusalén. Iwa ikuak Jesús omosewijtoka, Pedro, Jacobo, Juan iwa Andrés okiichtakatlajtlanitoh:

⁴ —Weletis techilis, ¿kemania ijkó tlamochiwas? ¿Iwa tlan achto techmonextilis ikuak ya pewas ijkó tlamochiwas?

⁵ Jesús opé kimmilia:

—Kuali ximotlachilikah, amaka manomechkajkayawa. ⁶ Porke miakeh witseh iwa kijtoskeh: “Ne Ni Cristo”, iwa miakeh kinkajkayawaskeh.

⁷ 'Ikuak nonkikakiskeh sentel itech nin tlaltíkpaktli momijmiktilo, amo ximomojtikah saman ijkó tlamochiwas. Pero ayamó tlajtlamis n tlaltíkpaktli. ⁸ Porke se nasión momakas iwa ok se nasión, iwa se gobierno momakas iwa ok se gobierno. Sentel tlalolinis iwa yetos apisol, ijkó pewas n tlaijyowílistli, kemi se siwatl ikuak pewa kitsopitia itlalax iwa ya tlakatis ikone.

⁹ 'Ximotlachilikah nomonewiah, porke nomechtemaktiskeh inmak tekiwajkeh, iwa nomechtsonwitekiskeh kan sinagogas. Nomejwah nonkalakitiweh innawak gobernadormeh iwa reyes por nonnechtlakitah, ijkó weletis nontetlapowiskeh de Ne. ¹⁰ Pero achto moneki mamotematilti n kualitájtoli itech nochí n tlaltíkpaktli. ¹¹ Iwa ikuak nomechtemaktitiweh inawak tekiwajkeh, amo ximotekipachokah nion xikmolikah tlan

nonkijtoskeh. Nomejwah xikijtokah tlan Dios nomechilis, amo nomejwah nontlajtoskeh, yej n Espíritu Santo Akin tlajtos. ¹² N teikni kitemaktis ikni makimiktikah, iwa n teta kitemaktis ipiltsi makimiktikah, iwa n tepilwah kinmixnamikiskeh intajwah iwa kinmixtikiskeh. ¹³ Nochteh nomechkokoliskeh ken nonnechtlakitah, pero akin mochijchikawas iwa kixikos noch, momakixtis.

¹⁴ 'Pero ikuak nonkitaskeh tlan teyolijtlakoa moketos kan Weyi Tiopa, kan amo moneki yetos, ikuakó akimeh yetoskeh Judea, macholokah kan tepemeh. *Dan. 9:27,* ^{12:11} Akin kiamaopas makajsikamat, ¹⁵ iwa itech non tonati, akin yetos ikpak ikal amo mawaltemo makikixtiki itla; ¹⁶ iwa akin yetos itlala amo mawalmokopa icha makikuiki itlake. ¹⁷ ¡Miálmasteh, n siwameh akimeh itech nonteh tonatijmeh yetoskeh kokoxkeh de konetl noso akimeh kimpiaskeh impilwah non ok chichih! ¹⁸ Ximotrotsajtsilikah, para ikuak ijkó tlamochiwas amo mayeto itech sewaya. ¹⁹ Porke itech nekateh tonatijmeh yetos tlaijyowílistli satlawel temohti, kemi ayik motika desde ikuak Dios okichijchi nin tlaltípkaktli, nion mach ayik oksepa ijkó tlamochiwas. ²⁰ Iwa tla Toteko Dios amo kintsiksintiliskia nonteh tonatijmeh de tlaijyowílistli, amaka makisaskia. Pero okintsiksintili porke kintlasojtla iaxkawah, non Ye okimpéjpenki.

²¹ 'Ikuakó, tla aka nomechilia: "Xikitakah nika ka n Cristo", noso "Xikitakah, nepa ka", amo xikneltokakah. ²² Porke monextiskeh tlakah tekajkayajkeh non kijtoskeh yejwah cristos iwa profetas. Yejwah kinchiwaskeh milagros noso kinnextiskeh neskáyolteh para tekajkayawaskeh, iwa tla weletis noiva asta akimeh Dios yokinmopejpenili kinkajkayawaskeh. ²³ Pero ¡kuali ximotlachilikh! Ne yonomechnejmacht.

Jesús oksepa walmokopas

(Mt. 24:29-35, 42-44; Lc. 21:25-36)

²⁴ 'Itech nekateh tonatijmeh, ikuak yopanok n tlaijyowílistli, n tonati walsewis iwa n metsi ayakmó techtlawilis. ²⁵ N sítlalteh walwetsiskeh de ilwikak, iwa n chikawálisteh non kateh ilwikak bibiokaskeh. ²⁶ Ikuakó nonnechitaskeh Ne Non onimochi ni tlakatl niwaltemotiwi itskeh mestli ika weyi weletílistli iwa weylílistli. ²⁷ Tlamis nikwalintitlanis noangelwah makinmoololokih non Ne onikinpéjpenki de n nawi ejekameh itech nin tlaltípkaktli asta n ilwikak.

²⁸ 'Xikajsikamatikah tlan onomechmachti de n igoskuawitl: ikuak imamayowah seliah, iwa peva mokopinah, nomejwah nonkimatiyah ya ajsiki n tonala. ²⁹ Ijkó noiva, ikuak nonkitaskeh ya peva ijkó tlamochiwa, xikmatikah ikone n Totajtsi Dios ya walkalakiki. ³⁰ De milajka nomechilia noch, ni tlamochiwas acho de mijmikiskeh n tlakah de ninteh tonatijmeh. ³¹ N ilwikak iwa n tlaltípkaktli pojpoliwaskeh pero tlan Ne yonikijo saman mochiwas.

³² 'N tonati iwa n ora ikuak ijkó tlamochiwas, amaka kimati, nion ángelteh non kateh ilwikak, nion ikone n Totajtsi Dios. Sanwel Totajtsi kimati.

³³ 'Yika nomejwah xijsatokah, xiyejtlachixtokah iwa ximotrotsajtsilijtokah, porke mach nonkimatiyah kemanía kalakiki non tonati. ³⁴ Ni tlamochiwas kemi ikuak se tlakatl yawi wejka, pero ikuak ya oonewas, acho kinnajnawatijtewah itlakawah makimokuitlawilikhah icha, kinmajmakatewa inteki iwa n kaltentlamokuitlawi kilia mayektlamokuitlawi. ³⁵ Yika nomejwah xijsatokah, porke mach nonkimatiyah kemanía ajsiki n tekowa de non kali, kox tiótlaki, tlajkoyuak noso kualka ikuak tlakuika n kaxtil, ³⁶ amo kichiwa walkalakiki iwa nomechásiki nonkochtokeh. ³⁷ Tlan nomejwah nomechilia, noiva nochteh nikinmilia: Xiijsatokah.

14

Motlatlalwiah kenijke kikitskiskeh n Jesús

(Mt. 26:1-5; Lc. 22:1-2; Jn. 11:45-53)

¹ Sa ome tonati opolitoka para n ilwitl de Paskua, ikuak n judío jteh kikuah n paj non amo kipia levadura. N tiopixkeh non tlayakantokeh iwa n tlamachtijkeh de

itlanawatil Moisés, okitemoliayah kenijki tlakajkayawaskeh para kikitskiskeh n Jesús iwa kimiktiskeh. ² Pero okimoliayah:

—Amo tikkitskiskeh itech ilwítl de Paskua, para amo matikimpajsolokah n tlakah.

Se siwatl kikuaxawilia ajwiálistli n Jesús

(Mt. 26:6-13; Jn. 12:1-8)

³ Jesús okatka Betania icha n Simón non achto okipiayah lepra. Ijkuak Jesús oewatoka kan mesa, owala se siwatl non okwalikaya se tekontsi tentok ika ajwiálistli de nardo non satlawel patío. Okitlápanki n tekontsi iwa n ajwiálistli okikuaxawili n Jesús. ⁴ Sikimeh non ompa okatkah okualankeh iwa okimolijkeh:

—¿Tleka san okixpolo nin ajwiálistli? ⁵ Weletiskia monamakaskia ika eyi siento denariojtomi, para ika se kimpalewiskia n próbesteh.

Iwa okualantokah íwa.

⁶ Pero Jesús okijo:

—Xikkawakah; ¿tleka nonkikuejsoah? Tlan onechchiwili satlawel kuali. ⁷ Porke n próbesteh nochipa nonkimpixtoskeh nomowah, iwa weletis nonkimpalewiskeh san ijkuak nonkinekiskeh. Pero Ne amo nochipa nonnechpixtoskeh nomowah. ⁸ Nin siwatl okichi tlan owéletki, porke yonechajwali para ijkuak nechtookaskeh. ⁹ De milajka nomechilia itech nin tlaltíkpaktli kan motetlapowis n kualitlájtoli de Dios, noiya sentel motetlapowis tlan okichi nin siwatl, iwa ijkó se kilnamikis.

Judas Iscariote kitemaktia n Jesús

(Mt. 26:14-16; Lc. 22:3-6)

¹⁰ Ijkuakó Judas Iscariote, seme de n májtlakteh iwa ome itlamachtijkawah, oyá omotlatlapowitzo iwan tiopixkeh non tlayakantokeh para kinmaktilis n Jesús. ¹¹ Ijkuak okikakeh tlan okimilito, opakeh, iwa omokajkeh kimakaskeh tomi. Ijkuakó Judas opé kitemolia kemanía okachi kuali para kinmaktilis n Jesús.

N tlákuali non mokua itech ilwítl de Paskua

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Itech ipewaya n ilwítl de Paskua ijkuak mokua n paj non amo kipia levadura, ijkuak noiya okimikiyah n ichkakonetl itech ilwítl de Paskua, itlamachtijkawah n Jesús okitlajtlanijkeh:

—¿Kani tkmonekiltia matimitsmajmanilitih n tlákuali de Paskua?

¹³ Ijkuakó okintítlanki ome itlamachtijkawah iwa okinmili:

—Xiwiah kan altepetl, ompa nonkitaskeh se tlakatl non kimamajti se axoktsi. Xiwiah kan ik ye yawi, ¹⁴ iwa kan kalakis, xikilikah n tekowa: “N tlamachti tlajtlani: ¿Katlie n kali kan nikmomajsewis n tlákuali de Paskua iwa notlamachtijkawah?” ¹⁵ Ye nomechititis se weyi kuarto non kajki tlakpak. Non ya tlamajmantok. Ompa xikmajmanakah n tlákuali non tkmomajsewiskeh.

¹⁶ Itlamachtijkawah oyajkeh iwa okalakitoh kan altepetl. Yejwah otlaajsikeh ijkó kemi Jesús okinmili, iwa okimajmankeh n tlákuali de Paskua.

¹⁷ Ijkuak owaltiotlatik, Jesús okalakito iwa n májtlakteh iwa ome itlamachtijkawah itech non kali. ¹⁸ Iwa ijkuak otlakuajtokah kan mesa, Jesús okinmili:

—De milajka nomechilia non seme, akin tlakuajtok nowa, nechtemaktis.

¹⁹ Ijkuakó yejwah omoyolkokojkeh, iwa se por se opé kitlajtlania:

—¿Ne nimitstemaktis?

Iwa ok se noiya okijo:

—¿Noso ne nimitstemaktis?

²⁰ Jesús okinmili:

—Seme de non májtlakteh iwa n ome, akin tlapalojtok itech noplato. ²¹ De milajka nomechilia, Ne Non onimochi ni tlakatl nimochiwas kemi kijtoa itlajkuilol Dios, pero jprobe n tlakatl non nechtemaktis! Okachi kuali amo tlakatiskia.

²² Ijkuak otlakuajtokah, Jesús okónanki n paj, omotlasojkama inawak Dios, okitlajkotlápanki iwa okinmák makimomajsewikhah iwa okinmili:

—Xikmomasesewikhah nin paj, ye ni nokuerpo.

²³ Otlanki okónanki se kopa, iwa ijkuak yomotlasojkama inawak Dios. Okinmaktili itlamachtijkawah iwa nochteh okonikeh. ²⁴ Iwa okinmili:

—Ye ni noesso non ika timotlajtolsenkawa, nin noesso motoyawas para miakeh makintlapojpolwikah. ²⁵ De milajka nomechilia, ayakmó nikonis iayo n uvas, asta neká tonati ijkuak nikonis n yankuik vino kan Dios tlanawatijtok.

Pedro kijtos amo kixmati n Jesús

(Mt. 26:30-35; Lc. 22:31-34; Jn. 13:36-38)

²⁶ Keman okitlakuikakeh se salmo, oyajkeh kan olivostepetl. ²⁷ Iwa ompa Jesús okinmili:

—Nochteh nomejwah nonnechkakajtewaskeh nin yúali, porke itech itlajkuilol Dios kijtoa: “Nikmiktis n tlájpixki, iwa n ichkameh moxexeloskeh.” ²⁸ Pero ijkuak nimoyolitis, nomechyakantias para Galilea.

²⁹ Ijkuakó Pedro okili:

—Malki nochteh mamitskakajtewaskeh, ne amo nimitskakajtewas.

³⁰ Jesús okili:

—De milajka nimitsilia, nin yúali, achto de tlakuikas n kaxtil ome welta, ijkuakó te yotikijo eyi welta amo techixmati.

³¹ Pedro okachi omotlajtolchijchika iwa okili:

—Malki mowa manechmiktikah, mach ayik nikijtos amo nimitsixmati.

Noiwa n oksikimeh itlamachtijkawah ijkó okijtojkeh.

Jesús motiotsajtsilia kan werto de Getsemaní

(Mt. 26:36-46; Lc. 22:39-46)

³² Satepa oyajkeh kan se lojar non itoka Getsemaní, iwa n Jesús okinmili itlamachtijkawah:

—Nika ximotlalikah, Ne nio nimotiotsajtsiliti.

³³ Ijkuak Jesús omotiotsajtsilito okinwík n Pedro, Jacobo iwa n Juan, iwa ompa opé moyolkokoa iwa omotekipachoaya. ³⁴ Niman okinmili:

—Satlawel nimoyolkokoa, asta nikmachilia nomikilis. Nika ximokawakah iwa xijsatokah.

³⁵ Iwa n Jesús onéjnenki okachitsi tlayakapa, omotlankuáketski asta okitelko n tlali ika ixkuak, iwa okitlatlaujti Dios, tla Ye okimonekiltiaya amo makikawili matlaijyowi itech non ora. ³⁶ Iwa itech itiotsajtsilis okijto:

—Abba, Notajtsi, Tejwatsi nochí weleti tikchiwa; xikachiwa nin tlajiyowílistli non wits notech, pero amo mamochiwa kemi Ne nikneki, yej kemi Tejwatsi tkmonekiltia.

³⁷ Otlanki omókopki kan eyi itlamachtijkawah iwa okinmajtsito kojkochokeh, iwa okili n Pedro:

—Simón, ¿tikochtok? ¿Nion se ora amo otikxiko tijsatok? ³⁸ Xisatokah iwa ximotiotsajtsilikah, para amo manomechyoltiana n tlajtlákoli. Nomoespíritu kineki kichiwas tlan kuali, pero nomokuerpo amo tlaxikoa.

³⁹ Jesús oksepa omotiotsajtsilito iwa okojpatili itiotsajtsilis. ⁴⁰ Ijkuak omokopato, oksepa okinmajtsito kojkochokeh, porke okochmíkiah. Iwa amo okimatiah tlan kinankiliskeh.

⁴¹ Omokopato ipan eyi welta iwa okinmili:

—¿Ok non kojkochokeh iwa ok nonmosewiah? ¡Xiijsakah! Yoajsiko n ora, Ne Non onimochi ni tlakatl nechtemaktiskeh inmak tlajtlakolchijkeh. ⁴² ¡Ximewakah, tiawih! Ompa wits akin nechtemaktis.

Kikitskiah n Jesús

(Mt. 26:47-56; Lc. 22:47-53; Jn. 18:2-11)

⁴³ Jesús ok otlajtojtoka ikuak okalakiko n Judas, seme de n májtlakteh iwa ome itlamachtijkawah. Judas okwalinwika miakeh tlakah non okinmakitskijtiwalahay espadas iwa kuajmeh. Ninteh tlakah okwalintitlankeh n tiopixkeh non tlayakantokeh, non kitemachtiah n tlanawatílistli iwa n tetajmeh non tlayakantokeh kan tiopa. ⁴⁴ Judas non yokiichtakatemakatoka yokinmilijka:

—Akin ne nikixtennamikis, ye n Jesús, xikkitskikah iwa kuali xikmokuitlawijtiwiah.

⁴⁵ Ikuak Judas okalakito inawak Jesús, okili:

—Tlamachti.

Iwa okiixtennamik. ⁴⁶ Ikuakó okikitskijkeh n Jesús, iwa okiwikakeh.

⁴⁷ Pero seme de itlamachtijkawah n Jesús, okualkópinki iespada iwa okinakastsontek se itlakewal n tiópixki non okachi otlayakantoka. ⁴⁸ Ikuakó Jesús okinmili n tlakah:

—¿Ononwalajkeh ononnechkitskikoh ika espadajteh iwa ika kuawitl kemi niyetoskia nitlachtek? ⁴⁹ Nochi tonati onitlamachtaya nomonawak kan Weyi Tiopa, iwa ayik ononnechkitskijkeh. Pero moneki tlamochiwas kemi kijtoah n tiotlajkuíloli.

⁵⁰ Ikuakó nochteh itlamachtijkawah n Jesús ochocholojkeh iwa okikakajtejkeh iselti.

Se télpochtli non ocholo xipetstik

⁵¹ Se télpochtli non okikuitlapantokatiaya n Jesús iwa okemelitiaya san ika se mantajtsótsoli, noiva okikitskijkeh, ⁵² pero ye okinmoxolkopinili iwa okinkakajtewili imantajtsótsol iwa ocholo xipetstik.

Jesús inawak Sanedrín

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Ikuakó okiwikakeh n Jesús inawak n tiópixki non okachi tlayakantok. Iwa ompa omoololojkeh nochteh n tetajmeh non tlayakantokeh kan Weyi Tiopa, iwa non kitemachtiah n tlanawatílistli. ⁵⁴ Iwa Pedro san wejka okiichtakatokatia n Jesús asta okalakito kan ipatio n tiópixki non okachi tlayakantok. Ompa omotlali iwan tlamokuitlawijkeh de n Weyi Tiopa, omototonijtokah inakastla n tlékuili.

⁵⁵ N tiopixkeh non tlayakantokeh iwa n nochteh non de n Sanedrín* okitemoliayah tlan ika kitlajtlakolmamaltiskeh n Jesús iwa ijkó weletis kimiktiskeh. Pero amitla okajsiah. ⁵⁶ Miakeh okijtoayah tlan amo milák, iwa mach san se intlajtol okipiayah.

⁵⁷ Ikuakó sikimeh owalmokeketskeh iwa opé kiteiliah n Jesús iwa ijkí okijtoayah:

⁵⁸ —Tejwah otikkakeh ikuak okijto: “Ne nikxixinis nin Weyi Tiopa non okichijchijkeh n tlakah, iwa ipan eyi tonati nikajkokuis ok se Weyi Tiopa non amo aka tlakatl kimachijchiwas.”

⁵⁹ Malki ijkó okijtoayah mach san se intlajtol okipiayah.

⁶⁰ Ikuakó n tiópixki non okachi otlayakantoka omoketsato tlatlajko iwa okitlajtlani n Jesús:

—¿Amitla tikijtos de tlan ninteh mitsteiliah?

⁶¹ Jesús amitla okinankili. Iwa n tiópixki non okachi otlanawatiaya oksepa okitlajtlani:

—¿Te ti Cristo, ikone n Totajtsi Dios Non tiochitok?

⁶² Jesús okinankili:

—Milák, Ne. Iwa nomejwah nonnechitaskeh Ne non onimochi ni tlakatl niewatos iyekma n Dios weletini, iwa satepa niwalmuikas itech mextli de ilwikak.

⁶³ Ikuakó n tiópixki non okachi otlayakantoka omotlakentsomoni iwa okijto:

—¿Tlan ok para tikannekih oksikimeh makijtokih tlan okijto? ⁶⁴ ¡Nomejwah yononkikakeh, Ye tlajtoa kemi yetoskia Dios! ¿Axa, tlan nonkijtoah?

Nochteh okitlajtlakoltijkeh iwa okijtokeh kuali makimiktakah.

⁶⁵ Ikuakó sikimeh opé kiixchijchawiah, okixtsakuayah, okiixwitekiah. Iwa okiliayah: —¿Axa, xikyejyekoli akin omitsmák!

Iwa n tlamokuitlawijkeh de kan tiopa okiixtlatsiniayah.

* ^{14:55} Sanedrín: nin grupo kemi 50 kimajmanah n tetajmeh non tlaixkomakah ikuak kinteliah akimeh amo kitlakitah itlanawatil Moisés.

Pedro okijo mach kixmati n Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Pedro omoketoka tlatsintla kan patio, iwa owala iteska n tiópixki non okachi otlayakantoka. ⁶⁷ Ye okitak n Pedro inakastla n tlékuili, okisentlajtlatk iwa okili:

—Te noiya otinemia iwan Jesús de Nazaret.

⁶⁸ Pedro mach okimokuiti iwa okijo:

—Amo nikixmati, iwa amo nikmati tlan tikijtoa.

Ijkuakó okiski kaltempa, iwa se kaxtil owatlakuikak. ⁶⁹ Satepa, iteska n tiópixki oksepa okitak n Pedro iwa opé kinmilia n oksikimeh:

—Nin tlakatl seme de yejwah.

⁷⁰ Pero n Pedro oksepa mach okimokuiti. Iwa okachi satepa, non ompa okatkah oksepa okilijkeh n Pedro:

—De milajka te seme de yejwah, porke noiya ti galileo, iwa titlajtoa kemi yejwah tlajtoah.

⁷¹ Ijkuakó n Pedro opé tlawijwikaltia, omotlajtolchijchika iwa okijo:

—¡Ne mach nikixmati non tlakatl akin nomejwah nonkitenewah!

⁷² Ijkuakó n kaxtil oksepa owatlakuikak, iwa n Pedro okilnamik tlan Jesús okilijka: “Ijkuak n kaxtil tlakuikas ome welta; te eyi welta yotikijo amo nikixmati.” Nima n Pedro opé senchoka.

15

Jesús inawak Pilato

(Mt. 27:1-2, 11-14; Lc. 23:1-5; Jn. 18:28-38)

¹ Semi san kualka, n tiopixkeh non tlayakantokeh, iwa n tetajmeh non tlayakantokeh kan Weyi Tiopa iwa non kitemachtiah n tlanawatflistli iwa nochteh non okimajmanayah n Sanedrín*, omoololojkeh iwa omotlapowijkeh tlan kitoktiskiah n Jesús. Satepa okimailpijkeh iwa okimaktilitoh n Pilato. ² Pilato okitlajtlani:

—¿Te tirey de judíojteh?

Jesús okinankili:

—Ijkó kemi tejwatsi yotikijo.

³ Pero n tiopixkeh non tlayakantokeh san de miak okiteiliayah. ⁴ Pilato oksepa okitlajtlani Jesús:

—¿Amitla tikijtos de nochitlan yejwah mitsteiliah?

⁵ Pero Jesús amo otlanankili iwa n Pilato san omotlajtlachialti.

Kitemaktiah Jesús makimiktikah

(Mt. 27:15-26; Lc. 23:13-25; Jn. 18:38—19:16)

⁶ Nochi xiwitl itech ilwitl de Paskua, Pilato trato okikajkawa seme de non tsaktokeh, san akin okitlajtlaniliyah. ⁷ Iwa ompa otsaktoka Barrabás iwa sikimeh itlakaikniyah, ningeh okintsakeh ken otemiktijkeh keman omototojtokakeh iwan gobierno. ⁸ Ijkuakó, miakeh oyajkeh kan Pilato iwa okilijkeh makichiwa kemi nochitlan kichijtiwits. ⁹ Iwa Pilato okinmili:

—¿Nonkinekih manikkajkawa n Rey de judíojteh?

¹⁰ Pilato okiyekmatia n tiopixkeh non tlayakantokeh okimaktilijkeh n Jesús porke oxikojmikiah. ¹¹ Pero n tiopixkeh non tlayakantokeh okintlatlalwijkeh n tlakah para makitlajtlanilikah n Pilato makikajkawa Barrabás. ¹² Ijkuakó Pilato oksepa okintlajtlani:

—¿Tlan nonkinekih manikchiwa iwa nin tlakatl akin nomejwah nonkinotsah Rey de n judíojteh?

¹³ Yejwah oksepa otlanankilijkeh iwa okojsajtsikeh:

—¡Xikkrusifikaro!

¹⁴ Pilato okinmili:

* 15:1 Sanedrín: nin grupo kemi de 50 kimajmanah n tetajmeh non tlaixkomakah ijkuak kinteiliyah akimeh amo kitlakitah itlanawatil Moisés.

—¿Tleka? ¿Tlan amokuali okichi?
 Pero yejwah okojtsajtsikeh okachi chikawak:
 —¡Xikkruisifiko!

¹⁵ Pero ken Pilato okinekia mokawas kuali inwa n tlakah, okikajka n Barrabás, otlanki otlanawati makitsonwitekikah n Jesús, iwa okinmactili para makikrusifikarokah.

N soldadojteh kipijpinawiah n Jesús
(Mt. 27:27-31; Jn. 19:1-5)

¹⁶ Ijkuakó n soldadojteh okiwikakeh n Jesús kan ipatio n palasio iwa ompa okin-moololojkeh nochteh n soldadojteh. ¹⁷ Okonakiltijkeh itlake morado, iwa okitlalilijkeh se korona non okichijchiwilijkeh ika witstli. ¹⁸ Otlanki opé kajawiltlajpaloah:

—¡Timitsweyiliah Rey de judío!teh!

¹⁹ Iwa okikuawijwitekiah ika se akatl, okiixchijchawiayah iwa omotlankuaketsayah inawak iwa okiweyiliayah. ²⁰ Ijkuak yotlanki okipijpinawijkeh, okikixtilijkeh n kapa morado iwa okonakiltijkeh itlake. Otlanki okiwikakeh okikrusifikarotoh.

Kikrusifikoah n Jesús
(Mt. 27:32-44; Lc. 23:26-43; Jn. 19:17-27)

²¹ Simón de Cirene inta n Alejandro iwa n Rufo, owalmokopaya de itlala, iwa ijkuak opajpanotia ya ik ompa n soldadojteh okitoktijkeh makiwikili ikrus n Jesús.

²² Okiwikakeh n Jesús kan tepeyotl non okiliayah Gólgota non kijtosneki Miketson-tekomatl. ²³ Ompa okimakakeh vino nelitok ika mirra pero amo okonik. ²⁴ Ijkuak yokikrusifikarojka n Jesús, n soldadojteh okinmotlatlanilijkeh itlakenwah para kitaskeh tlan kimowikiliskiah.

²⁵ Okikrusifikarojkeh kualka, kemi las nueve. ²⁶ Iwa ik ikuatsontla okipepechilijkeh se tlajkuíoli kan onestoka tleka okikrusifikarojkeh, iwa okijoaya: “N Rey de Judíos.”

N ome ichtekah
(Mt. 27:38-44; Lc. 23:39-43)

²⁷ Noiwa okinkrusifikarojkeh ome ichtekah inajnakastla n Jesús, se kan iyekma iwa ok se kan iopochma. ²⁸ †

²⁹ Iwa akimeh ik ompa opanoayah omokuawiwiyoayah, okiwijwikaltiayah iwa okili-ayah:

—¿Amo Te otikijo tikxixitsas n Weyi Tiopa iwa ipan eyi tonati oksepa tikchijchi-waskia?, ³⁰ axa monewia ximopalewi iwa xiwaltemo de non krus.

³¹ Ijkó noiwa n tiopixkeh non tlayakantokeh iwa non kitemachtiah n tlanawatlistli, okipijpinawiaayah iwa okimoliayah:

—Oksikimeh okimpalewi, pero ye inewia, mach weleti mopalewia. ³² Tla milák Ye n Cristo, n Rey de Israel, mawaltemo de kan krus para matikitakah ijkuakó tikneltokaskeh. Iwa non okrusifikaritokah inajnakastla noiwa fiero okitenewaya.

Mikki n Jesús
(Mt. 27:45-56; Lc. 23:44-49; Jn. 19:28-30)

³³ Ijkuak oajsiko tlajko tonati, itech nochí non tlali otleyuak asta las tres. ³⁴ Iwa itech non ora Jesús owaltsajtsik chikawak iwa okijo:

—Eloí, Eloí, ¿lama sabaktani? —noni kijtosneki: Nodios, Nodios, ¿tleka otechkakajteh noseltí?

³⁵ Sikimeh ijkuak okikakeh, okijokeh:

—¡Xikkakikah!, kinotok n profeta Elías.

³⁶ Ijkuakó se omotlelo okisiawato se esponja itech vinagre. Okiyakailpi itech se akatl iwa okonmák n Jesús makoni, iwa okinmili n oksikimeh:

—Matikitakah kox n profeta Elías wits kitemowiki.

† ^{15:28} N bersíkulo 28 amo nesi itech non okachi yowejkajkeh tlajkuíolteh.

³⁷ Ijkuakó n Jesús owałtsajtsik chikawak, iwa omikki. ³⁸ San nima n kortina de n Weyi Tiopa owatlajkotsáyanki. ³⁹ Iwa n soldado tlayákanki romano non omoketoka iyakapan Jesús, ijkuak okitak kenijki otsajtsik iwa owlalmik, okijto:

—¡Milák, nin tlakatl ye Ikone Dios!

⁴⁰ Noiwa sikimeh siwameh san wejka oontlachixtokah. Ompa okatkah María de Magdala, María inmamá n iknimeh José iwa n Jacobo non tsoyotl, iwa n Salomé. ⁴¹ Ninteh siwameh oyayah iwan Jesús iwa okimpalewiayah ijkuak okatka Galilea. Noiwa ompa okatkah oksikimeh siwameh non otlejkokeh Jerusalén iwan Jesús.

Kitookah n Jesús

(Mt. 27:57-61; Lc. 23:50-56; Jn. 19:38-42)

⁴² Ijkuak otiotlatik, nochteh yomotlatlalijtokah para n sábado. ⁴³ Ijkuakó owala n José de n altepetl Arimatea, akin tewa okatka de n Sanedrín. Ye noiwa okichiaya ijkuak pewas tlanawatis Dios, omoyolchika iwa okitlatlaujtito n Pilato makimaktili ikuerpo n Jesús. ⁴⁴ Pilato omotlatlachialti ijkuak okima Jesús yomikki, ijkuakó okónnotski n soldado tlayákanki romano iwa okiyektlajtlani kox milák yomikki n Jesús. ⁴⁵ Ijkuak n soldado tlayákanki okili yomikki, n Pilato okimaktili n José ikuerpo n Jesús. ⁴⁶ Ijkuakó José okitemowi n kuerpo de kan krus iwa okikekemelo ika se tlakemtl de lino, non ye okiko. Otlanki okitlalito ikuerpo n Jesús kan se miketékochtli non okichkuakeh ipan tetl, iwa ika se weyi tetl tankachtit iwa patlaktik okitentsakeh n miketékochtli. ⁴⁷ María de Magdala iwa María imamá n José okitakeh kan okiwilankeh n Jesús.

16

Jesús moyolitía

(Mt. 28:1-10; Lc. 24:1-12; Jn. 20:1-10)

¹ Ijkuak yopanok n sábado, María de Magdala, María imamá n Jacobo, iwa n Salomé. Okikojkeh ajwiálistli para kixawiliskiah ikuerpo n Jesús. ² Iwa san kualka, ijkuak yotlatlanestiwalaya n domingo, oyajkeh kan miketékochtli. ³ Iwa okimolijtiayah:

—¿Akin techachiwilis n tetl non kitentsaktok n miketékochtli?

⁴ Pero ijkuak oajsitoh, okitakeh n weyi tetl non kitentsaktoka n miketékochtli, mach ok ompa okatka. ⁵ Ijkuak n siwameh okalakeh kan miketékochtli, okitakeh ik inyekma se télpochtli ewatok ika itlake weyak iwa istak, iwa omomojtijkeh. ⁶ Pero ye okinmili:

—Amo ximomojtikah, nomejwah nonkitemoah n Jesús de Nazaret akin okikrusifikarokeh. Pero Ye yomoyoliti. Ayakmó nika ka. Xikitakah kan owlantoka. ⁷ Xiwiah xikinmatiltitih itlamachtijkawah iwa n Pedro: “Jesús tlayakanas Galilea, ompa nonkitaskeh ijkó kemi Ye yonomechili.”

⁸ Ijkuakó n siwameh okistewakeh de kan miketékochtli, porke omomojtijkeh iwa sa obibiokatokah, iwa amaka itla okiljkeh porke omawiah.

Jesús kimonextilia n María de Magdala

(Jn. 20:11-18)

⁹ Jesús omoyoliti non domingo kualka, iwa achto okimonextili n María de Magdala, ye akin Jesús okinkixtili chikome espíritus amokualteh. ¹⁰ Ye oyá okinmatiltito akimeh onemiah iwan Jesús, iwa okimajsite moyolkokojtokeh iwa chokatokeh. ¹¹ Pero ijkuak okinmili yokitak n Jesús yolitok, yejwah mach okineltokakeh.

Jesús kinmonextilia ome de n májtlakteh iwa ome itlamachtijkawah

(Lc. 24:13-35)

¹² Jesús omoixpatlak iwa satepa okinmonextili ome itlamachtijkawah non oyayah intlala.

¹³ Ninteh noiwa okinmatiltitoh n oksikimeh itlamachtijkawah non tewa onemiah iwan Jesús, pero mach okineltokakeh tlan yejwah okimiljkeh.

*Jesús kintitlani itlamachtijkawah makitetlapowika n kualitlájtoli
(Mt. 28:16-20; Lc. 24:36-49; Jn. 20:19-23)*

¹⁴ Satepa Jesús okinmonextili n májtlakteh iwa n se itlamachtijkawah ikuak otlakuaj-takah. Ye okinmajwak por amo okineltokakeh iwa por okitlakuawaltijkeh inyolo ikuak oksikimeh okimilijkeh Ye yomoyoliti.

¹⁵ Iwa okinmili:

—Xiwiah ipan nochí n tlaltíkpaktli iwa xikinmatiltikah itlajtol Dios nochteh n tlaltik-paktlakah. ¹⁶ Akin kineltokas notlajtol iwa mokuaatekis momakixtis, pero akin amo nechneltokas Dios amo kitlapojpolwis. ¹⁷ Iwa akimeh nechneltokaskeh kinchiwaskeh wejweyi milagros: Itech Notoka kinkixtiskeh espíritus amokualteh, tlajtoskeh ika yankuikeh tlájtoltéh, ¹⁸ iwa tla kinkitskiskeh koameh noso tla koniskeh itla beneno, amitla kintoktis. Kintlaliskeh inmawah ipan kokoxkeh iwa kimpajtiskeh.

*Jesús tlejko ilwikak
(Lc. 24:50-53)*

¹⁹ Satepa, ikuak Toteko Jesús yotlanki okintlapowi itlamachtijkawah, otlejkok ilwikak iwa omoyayanti iyekma n Totajtsi Dios. ²⁰ Satepa, itlamachtijkawah n Jesús sentetl oyajkeh otetlapowitoh de n kualitlájtoli. Iwa n Toteko okimpalewiaya ika neskayolteh tlan tetlajtlachialti okinchiwayah.

N Kualtlájtoli non Okikuilo San Lucas

Lucas kontlajkuililia n weyixtok Teófilo

¹ Miakeh omochijchikajkeh okikuilojkeh nochí tlan otlamochi tonawak. ² Ijkó kemi otechtlapowijkeh akimeh okitakeh ika inmixtololowah tlan otlamochijtiwalaya desde ikuak opé motetlapowiah n kualtlájtoli. ³ Ne noíwa yonikmomachti iwa onitlajtlanínenki keniji opé, iwa onikmoli kuali manimitsontlajkuilili kemi moneki tejwatsi tionweyixtok Teófilo. ⁴ Ijkó, okachi xikyekmati tlan milák tlan achto yomitsmachtijkah.

N ángel Gabriel kitematiltia tlakatis n Juan Bautista

⁵ Ikuak Herodes* otlanawatijtoka Judea, ochantitoka se tiópixki non itoka Zacarías, ye tewa iwan tiopixkeh de Abías. Isiwa n Zacarías itoka Elisabet. Ye ojojpaixwi n tiópixki Aarón.[†] ⁶ Zacarías iwa isiwa Elisabet oyolmilajkanemiah inawak n Totajtsi Dios, iwa okichiwayah nochí tlan okijoaya itlanawatil n Toteko. ⁷ Pero mach okimpiayah impilwah, porke Elisabet mach oweletia okimpiaya, iwa san ken omeh yokatkah tetajtsitsinteh.

⁸ Se tonati, Zacarías iwa intiopixkaikniyah kichiwaskiah n tekitl ijtk Weyi Tiopa, iwa ken yomotekpankah, okipejpenke n Zacarías para makichiwa n tekitl ijtk Tiopa inawak Dios, kemi Abías okichijtiwalaya. ⁹ Yejwah omotlatlaniah para kichichinoskeh n kópali. Zacarías otlatlanki iwa otlapopochwi kan iartal Toteko. ¹⁰ Ikuak Zacarías otlapopochwi-jtoka ijtk Weyi Tiopa, nochteh n tlakah omototsajtsilijtokah kala. ¹¹ Ikuakó se iángel Toteko okimonextili n Zacarías, nin ángel omoketoka iyekma n artal kan kichichinoah n kópali. ¹² Ikuak Zacarías okitak n ángel, omotlajtlachialti iwa ayakmó okima tlan kichiwas iwa satlawel omaujki. ¹³ Pero n ángel okili:

—Zacarías, amo ximawi, porke Dios yokikak motiotsajtsilis, iwa mosiwa Elisabet kipias se konetl, iwa te tiktlalilis itoka Juan. ¹⁴ Te satlawel tiyolpakis, iwa miakeh tlakah noíwa yolpakiskeh ikuak tlakatis non konetl, ¹⁵ porke mokone satlawel weyijkatitos inawak Dios. Ayik konis vino nion tlan tewinti, iwa tentos de Espíritu Santo desde ikuak yetos ijtk inanyo Elisabet. ¹⁶ Iwa kichiwas mamoyolkopakah miakeh tlakah de Israel inawak Inteko Dios. ¹⁷ Ye achto moteixpantiti inawak Toteko ika iespíritu iwa iweletilis n tiotlajto Elías. Kichiwas mamoyekwikakah n tetajmeh iwa impilwah. Iwa kinmititis non amo tetlakitah, matetlakitakah, ijkó kinyolkopas n tlakah para makiselikah n Toteko.

¹⁸ Zacarías okitlajtlani n ángel:

—¿Kenomi nikmatis tlan otikijo milák?, ne ya nitetajtsi iwa nosiwa ya tenantsi.

¹⁹ N ángel okinankili:

—Ne Gabriel, iwa niktektilia Totajtsi Dios. Ye onechaltítlanki manimitsiliki ninteh kualtlájtoltéh. ²⁰ Pero axa, kemi amo otikneltokak tlan onimitsili, mach weletis titlajtos asta matlakati mokone, iwa nochí ni ijkó mochiwas ikuak ajiski n tonati.

²¹ Iwa kemi Zacarías yowejkajtoka ijtk Weyi Tiopa, n tlakah non kala okichixtokah opé motekipachoah tleka amo owalkisaya. ²² Ikuak Zacarías owálkiski, amo owéletki okintlapowi, ikuakó okajsikamatkeh itla okimonextili ijtk tiopa. Ye sa okinmanotsaya porke ayakmó oweletia otlajtoaya.

²³ Ikuak Zacarías otlanki okichi iteki ijtk Tiopa, oyá icha. ²⁴ Satepa Elisabet omoka kókoxki de konetl, iwa mákuili mestli mach okiski de icha, iwa okimoliaya: ²⁵ “Axa n Noteko onechchiwili tlan kuali ika itlasojtlalis, para ayakmó manechpijinawikah por amo oniweletia onikpiaya nokone.”

N ángel Gabriel kitematiltia tlakatis n Jesús

* ^{1:5} N okachi wejweyijtikeh tlanawatijkeh itech nin tlali kintokayotiah ‘Herodes’, non kijtosneki ‘se weyi tlanawati’.

† ^{1:5} Abías se weyi tiópixki.

²⁶ Ijkuak Elisabet yokipiaya chikwase mestli kókoxki de konetl, n Totajtsi Dios okitítlanki iángel Gabriel mawia Galilea itech se altepetl non itoka Nazaret, ²⁷ para makitlajpaloti se íchpochtli non itoka María. Ye yokisentlalijka monamiktis iwan se tlakatl non itoka José, nin José ojojpaixwi n Rey David. ²⁸ N ángel okalak kan okatka María iwa okili:

—¡Xipaki! Dios satlawel omitstiochi. N Toteko kajki mowa.

²⁹ Pero ijkuak María okitak n ángel, saikpanoa omotlajtlachialti iwa mach okimatia tlan kijtos, iwa okimoliaya tleka ijkó okitlajpaloya. ³⁰ Ijkuakó n ángel okili:

—María, amo ximawi, porke Dios yolpaki monawak. ³¹ ¡Xikkaki!, axa timokawas tikókoxki de konetl, iwa non konetl tiktlalilis itoka Jesús. ³² Ye saikpanoa weyijkatitos, iwa kinotsaskeh Tekone de non Weyijkatitok. Dios Toteko kitlalis mayeto Rey ijkó kemi otlanawati David iwejkatata. ³³ Ye nochipa kinawatijtos n país de Israel, iwa itlanawatil mach ayik pojpoliwi.

³⁴ Ijkuakó María okitlajtlani n ángel:

—¿Kenomi manikpia nokone, ne ayamó nikpia nookich?

³⁵ N ángel okinankili:

—N Espíritu Santo walmuikas motech, iwa iweletilis n Totajtsi Dios mitsmokemis kemi se mextli. Yika, n konetl non te tikpias yetos yolchipawak iwa kinotsaskeh Tekone de Dios. ³⁶ Moprima Elisabet, maya ya tenantsi, noiwa kipias se konetl. Ijkó kiné, non okiliayah ayik weletis kipias ikone axa ya kókoxki de konetl iwa ya kipia chikwase mestli.

³⁷ Porke Totajtsi Dios nochi weleti kichiwa.

³⁸ Ijkuakó María okili:

Ne iteska n Totajtsi Dios. Mamochiwa nowa ijkó kemi yokijto.

Ijkuakó n ángel owálkiski.

María kontlajpaloa iprima Elisabet

³⁹ Itech nonteh tonatijmeh, María oyá totokatijkak okitlajpaloto iprima Elisabet. Ye ochantitoka itech se altepetl non kajki itech tepeyo de Judea. ⁴⁰ Ijkuak oajsito itech non altepetl, María okalak icha n Zacarías, iwa okitlajpaloo n Elisabet. ⁴¹ Ijkuak Elisabet okikak itlajtol n María, ikone n Elisabet otsékuinki ijtk inanyo, iwa Elisabet otenki ika n Espíritu Santo. ⁴² Ijkuakó Elisabet ika pakílistli okualnankili chikawak:

—¡Dios omitstiochi okachi ke nochteh n siwameh, iwa n konetl non tikpias, Dios yokitiochi! ⁴³ ¿Akin ne, para manechontlajpaloki imamá n Noteko? ⁴⁴ Porke san nima ijkuak onikak otechtalajpaloo, nokone otsékuinki ijtk nonanyo ika pakílistli. ⁴⁵ ¡Tlawel xiylpaki, ken otikneltokak nochi tlan Toteko yokijto!

⁴⁶ Ijkuakó María okili:

Ika nochi noyolojtsi nikweyilia Noteko,

⁴⁷ iwa miak niyolpaki inawak Dios, Notemakixti.

⁴⁸ Porke onechitak kemi iteska, iwa ken niyolyámanki, Dios onechiknomá, iwa desde axa nochteh n tlaltikpaktlakah nechiliskeh niyolpakiliso.

⁴⁹ Porke Dios weletini okinchi notech wejweyi milagros.

¡Ye yolchipawak!

⁵⁰ N Totajtsi Dios nochipa kinmiknomatis akimeh kitlakitah.

⁵¹ Ye okinexti iweletilis ika tlan okichi, kimpipinawia akimeh kimatih moweyiliah.

⁵² N wejweyi tekiwajkeh okinkixtili intlanawatil, iwa okinweyijkatlali akimeh san moiknomati.

⁵³ Iwa non amitla okipiayah okinmák nochi tlan kuali, iwa akimeh okipiayah tomi amitla okinmák.

⁵⁴ Ye okipalewi itlakewal Israel,

mach okilka kiknomatis,

⁵⁵ ijkó kemi yowejka okimilijkeh totatawah,

Abraham iwa nochteh iojpa ixwiwah nochipa kintlasojtlaskia.

⁵⁶ Mar a omoka iwan Elisabet kemi eyi mestli, iwa satepa om kopki icha.

Tlakati n Juan Bautista

⁵⁷ Satepa oajsiko n tonati, ijkuak Elisabet ok pixki ikone. ⁵⁸ Iwa ijkuak non ik ompa ochanchiwaya iwa non ken kita n Elisabet okimatkeh Toteko Dios satlawel okiknoma, okitlajpalotoh iwa opakeh  wa. ⁵⁹ Ijkuak owalchikometik okisirkunsidarotoh n konetl, iwa okinekiah kitlaliliskeh itoka Zacar as, kemi ita. ⁶⁰ Pero imam  okijo:

—¡Am , tiktaliliskeh itoka Juan!

⁶¹ Non ompa okatkah okilijkeh:

—¿Tleka ijk  tikneki tiknotsas? nochteh non ken tикиnmita, amaka ijk  itoka.

⁶² Ijkuak , okimanotskeh n Zacar as iwa okitlajtlanjkeh kenijki okinekia kitlalilis itoka n konetl. ⁶³ Pero Zacar as okimatl jtlanke makimakakah itla tlan ipa tlajkuilos, iwa ijk  okikuilo: “Juan yetos itoka.” Iwa san okintlajtlachialti. ⁶⁴ Non ora Zacar as owatlajto, iwa op  kiweyijkachiwa Dios. ⁶⁵ Iwa nochteh non ik ompa ochantitokah omaujkeh, iwa non ochantitokah itech tepeyo de Judea, omotlapowiayah de nochi tlan otlamochi. ⁶⁶ Iwa nochteh non okikakiah, okimoliayah:

—¿Tlan kichiwas non chokotsi keman motlamiti tlakatl?

Porke okajsikamatiah n Toteko okatka  wa.

Itlauikal Zacar as

⁶⁷ Zacar as, ipap  n chokotsi otenki de Esp ritu Santo iwa ijk  okijo:

⁶⁸ Maweyijkachito n Toteko Dios de Israel,
porke okinmakixtiko ialtepeikniyah.

⁶⁹ Ye otechaltitlanili se chikaktik temakixti,
se non iwejkaixwi n Rey David it kitki n Totajtsi Dios.

⁷⁰ Ijk  kemi Dios yokijtojka ya wejkawitl ijkuak iprofetajwah yolchipawakeh otechmatilti-jkeh:

⁷¹ Ye techpalewiskia inmak akimeh techkokolia iwa inmak akimeh techtlawelitah.

⁷² Noiwa okijo kinmiknomatiskia totatawah
iwa ayik kilkawaskia tlan okisentlali kichiwaskia.

⁷³ Ye ni tlan Totajtsi Dios okisentlali iwa totata Abraham:

⁷⁴ Ye okisentlali techpalewiskia de inmak akimeh techkokolah,
para amo matimawikah ijkuak tiktektiliskeh,

⁷⁵ matiyetokah tiyolchipawakeh iwa timilajkameh inawak Dios, asta ijkuak timikiskeh.

⁷⁶ Iwa te, nokone, mitsnotsaskeh profeta de n Totajtsi Dios non weyijkatitok.

Porke te tias iyakapa n Totemakixti para matlaneltokakah inawak,

⁷⁷ iwa tикиnmatiltis itlakaikniyah,
kintlapojpolwis de intlajtlakolwah,
iwa ijk  weletis momakixtiskeh.

⁷⁸ Porke n Totajtsi Dios kintlapojpolwia ken mil k kintlasojtla.

Iwa kemi kinmiknomati kinwaltitlanilis n Temakixti non wits de ilwikak,

⁷⁹ para kintlawilis akimeh nemih kan tleyua iwa akimeh kateh kan itlasekawilo n mik listli,

iwa para techyakanas itech se kuali ojtli.

Is. 9:2

⁸⁰ N chokotsi Juan omoskaltiaya iwa iesp ritu omochikajtiaya. Omochantito kan amaka chanti iwa op  kintlapowia itlajtol Dios asta ijkuak omoteititi innawak n tlakah de Israel.

de Galilea, iwa oyá kan tlali de Judea, altepetl de Belén, ompa otlákatki n rey David, porke José oyá iojpaixwi n rey David. ⁵ José iwa María sansikah oyajkeh Belén, para momachotiskeh itech senso. María yokatka kokoxki de konetl iwa ya monamiktiskia iwan José. ⁶ Ijkuak yejwah okatkah Belén, oajsiko n tonati para tlakatis n konetl. ⁷ Iwa ompa otlákatki non sakinika ikonetsi. Iwa n María okikemelo ika tlakemeh iwa okitekak itech se kajo non okipiaya sakatl non ompa otlakuayah n yolkameh. Ompa otlákatki n konetl porke ayakmó lojar itech kali kan tekalotiah.

N ángelteh iwan tlajpixkeh

⁸ Amo wejka de Belén okatkah sikimeh tlajpixkeh non okinmokuitlawijtokah inmichkawah itech tlajtlala. ⁹ Ijkuakó okinmonextili se iángel Toteko, iwa itlawilnextilis okintlawili, iwa n tlájpixkeh satlawel omomojtjkeh. ¹⁰ Pero n ángel okinmili:

—Amo ximomojtakah, porke ne onomechmatiltiko se kualitlajtoli, non kinyolpaktis nochteh n tlaltikpaktlakah. ¹¹ Axa itech ialtépeu n David yotlákatki se Temakixti, Ye Cristo Toteko. ¹² Nonkajsitiweh n konetl kemelitika ika tsótsoleh, iwa wetotika kan kintlamakah n yolkameh.

¹³ Itech non ora inakastla non ángel, owalmonextijkeh miaktikeh ángelteh de ilwikak non okitlakuikiliayah Dios iwa ijkí okijoayah:

¹⁴ ¡Maweyijkatito Dios kan ilwikak,
iwa itech tlaltíkpaktli mayetokah ika yolsewílistli nochteh akimeh kiyolpaktiah n Totajtsi
Dios!

¹⁵ San nima, ijkuak n ángeles omokopkeh ilwikak, n tlajpixkeh opé motlalwiah:

—Matiwiah Belén, matikitatih tlan otlamochi, tlan Toteko otechmatiltiko.

¹⁶ Yejwah omotlelojtiwetskeh iwa okajsitoh n María iwa n José, iwa n konetl wetotika kan kintlamakah n yolkameh. ¹⁷ Ijkuak okitakeh n konetl, opé tetlapowiah tlan yokin-matiltjika n ángel, ¹⁸ iwa nochteh omotlajtlachialtjkeh ijkuak okikakiah tlan okijoayah n tlajpixkeh. ¹⁹ Pero María nochí ni okitlaati itech iyolo, iwa nochipa okilnamikia nochí tlan otlamochi. ²⁰ Satepa n tlajpixkeh omokopkeh kan okatkah inmichkawah, okiweyijkachiwayah iwa okitlakuikiliyah n Totajtsi Dios por nochí tlan okikakeh iwa okitakeh, ijkó kemi okinmili n ángel.

N konetl Jesús kiteixpantiah kan Weyi Tiopa

²¹ Ijkuak ochikometik de otlákatki n konetl, okisirkunsidarojkeh, iwa okitlaliljkeh itoka JESÚS, ijkó kemi n ángel achto yokilijka n María ijkuak ayamó kókoxki de konetl.

²² Ijkuak opanokeh n tonatijmeh de omochipajkeh, ijkó kemi kijtoa itlanawatil Moisés, yejwah okiwikakeh n konetl kan Weyi Tiopa de Jerusalén para kiteixpantiskeh inawak Toteko Dios.

Lv. 12:8 ²³ Ijkó okichijkeh porke itech

itlajkuilol n Toteko Dios kijtoa: “Nochi konetl tlakatl teteachka, yetos tlapejpénili ixpan Toteko Dios.” ²⁴ Noiwa okintemakakeh ome espiritomeh noso ome kokolotsitsinteh para makinmiktakah ipan artal, ijkó kemi kijtoa itlanawatil Toteko. *Lv. 12:8*

²⁵ Itech nekateh tonatijmeh, ochantitoka Jerusalén se tlakatl non itoka Simeón. Ye yolmilajka iwa miak okimopantiaya Dios iwa okichiaya matlakati non kimpalewis n tlakah de Israel. Iwa n Espíritu Santo okatka itech Simeón, ²⁶ iwa yokimatiltjka amo mikiskia tla amo achto kitaskia n Cristo, Akin Toteko Dios kualtitlanis. ²⁷ N Espíritu okili n Simeón mawia kan Weyi Tiopa. Ijkuakó José iwa n María okiwikakeh n konetl Jesús kan Weyi Tiopa para kichiwaskeh kemi kijtoa itlanawatil Moisés. ²⁸ Simeón okinapalo n konetl iwa okiweyijkachi Totajtsi Dios, iwa okijo:

²⁹ Noteko, axa ya weletis techkawilis manimiki ika yolsewílistli,
porke yotikchi tlan otechilijka, ne onia se motékitki.

³⁰ Ken yonikitak ika noixtololowah motemakixtilis,

³¹ Akin yotktlali inmixpah nochteh n tlaltikpaktlakah.

³² Ye se tlawili non kintlawilis non amo judíojteh,
iwa kichiwas maweyijkatito mopueblo Israel.

³³ José iwa n María san omotlajtlachialtijeh ikuak okikakeh nochí tlan Simeón okijoaya de n konetl. ³⁴ Otlanki n Simeón okintiochi iwa okili n María imamá n Jesús:

—¡Xikkaki! Dios okitlali mokone para miakeh de Israel non amo kineltokaskeh moixpoloskeh pero akimeh kineltokaskeh, momakixtiskeh. Ikuak moteititis kemi Cristo miakeh mach kiseliskeh, ³⁵ iwa ijkó momatis tlanón kiyeyekoliah n tlakah itech inyolo. Iwa te María noni mitstlaijyowiltis, kemi mitstsoponiliskia se tepostlatekini itech moyolo.

³⁶ Noiwa ompa okatka se siwatl profeta non ya tena iwa itoka Ana, ye teichpoch de Fanuel, iwa Fanuel iwejkaixwi n Aser. Ana omonamiki wel ok ichpotsintli, pero ikuak yokiwikayah chikome xiwitl sansikah, iokich omikki. ³⁷ Yika omoka iknosiawatl, iwa yokipiaya nawi pójali iwa n nawi xiwitl. Ixmostla oyaya tiopa, tlajka iwa n yuak okitekichiwiliaya n Toteko, ika itiotsajtsilis iwa ika imosawalis. ³⁸ Ana noiwa okalakito itech non ora iwa opé kiweyijkachiwa Dios. Iwa opé tetlapowia de n konetl Jesús, nochteh n tlakah de Jerusalén okichixtokah mawiki n Cristo para kinmakixtis.

N chokotsi Jesús iwa itajwah walmokopah Nazaret

³⁹ Satepa, ikuak yokichijkeh nochí tlan kijtoa itlanawatil n Toteko, owalmokopkeh inmaltépeu de Nazaret, itech tlalmeh de Galilea. ⁴⁰ Iwa n chokotsi Jesús omoskaltiaya, omochikawaya iwa okachi oixtlamatia, iwa Totajtsi Dios okachi okitiochiwaya.

N chokotsi Jesús mokawa itech Weyi Tiopa de Jerusalén

⁴¹ Itajwah n Jesús nochí xiwitl oyayah Jerusalén itech ilwitl de Paskua. ⁴² Ikuak Jesús okípixki májtatlktli iwa ome xiwitl, Ye iwa itajwah oyajkeh Jerusalén, kemi nochí xiwitl okichiwayah. ⁴³ Ikuak yotlanki n ilwitl, yejwah owalmokopayah para incha, pero n chokotsi Jesús omoka Jerusalén, iwa nion María nion José okitakeh kox n chokotsi omoka.

⁴⁴ Itajwah okiyeyekoliayah chamo Jesús okwalintokaya iwan oksikimeh non ompa owalayah, yejwah onejnenkeh se tonati. Satepa opé kitemoah inchokotsi inwah non ken okinmitayah iwa non okinmixmatiayah, ⁴⁵ amo kanaj okajsikeh, yika omokopkeh okitemotoh Jerusalén.

⁴⁶ Iwa eyi tonati satepa, okajsitoh itech Weyi Tiopa de Jerusalén. Ye oewatoka tlatlajkotia de kan oewatokah non kitemachtiah n tlanawatílistli, okinkaktoka iwa okintlatlajtlaniaya.

⁴⁷ Nochteh non okikakiah, omotlajtlachialtiayah porke Ye satlawel oixtlamatia, iwa porke kuali okinnankiliaya.

⁴⁸ Ikuak itajwah okitakeh omotlajtlachialtijeh, iwa imamá okili:

—Nokone, ¿tleka ijkó otechtokti? Mota iwa ne, satlawel otimomojijkeh, ken amo kanaj otimitsajsiah.

⁴⁹ Ikuakó Jesús okinmili:

—¿Tleka ononnechtemoayah? ¿Mach amo nonkimatih nikpia niktekichiwilis Notajtsi?

⁵⁰ Pero yejwah mach okajsikamatkeh tlan okinmili.

⁵¹ Ikuakó Jesús omókopki Nazaret inwah, ompa okintlakitaya itajwah. Pero María nochí noni okitlaatiaya itech iyolo. ⁵² N chokotsi Jesús okachi omoskaltijtiaya, iwa okachi oixtlamatia. Okipaktiaya n Totajtsi Dios iwa n tlakah okiseliayah.

Juan Bautista tlamachtia kan amaka chanti

(Mt. 3:1-12; Mr. 1:1-8; Jn. 1:19-28)

¹ Ikuak César Tiberio yokiwikaya káxtoli xiwitl kemi weyi tekiwa itech Roma, Poncio Pilato okatka gobernador de Judea, Herodes Antipas gobernador de Galilea, iwa ikni Felipe gobernador de Iturea iwa Traconite, iwa Lisanias okatka gobernador de Abilene.

² Anás iwa n Caifás okatkah weyi tiopixkeh, yejwah otlayakantokah. Itech nonteh tonatijmeh, Dios okitlapowi n Juan ipiltsi n Zacarías, yika Juan otetlapowiaya kan

amaka chanti. ³ Juan onentinemia itech nochteh altepemeh non okatkah itempa n río Jordán. Ye okinmiliaya makipatlakah innemilis iwa mamokuaatekikah para Dios makintlapojpolwi de intlajtlakolwah. ⁴ Ijkó omochi kemi ikuilitok itech itlajkuilol n profeta Isaías:

Se tlájtoli mokaki chikawak kan amaka chanti:

“Xikyektlalilikah iojwiu n Toteko,

Xikmilawahkah iojwiu.

⁵ Kan tlawewejkatla, xikixmanakah,
nochí tepemeh iwa n tepetsitsinteh noíwa nonkinmixmanaskeh,
n ojmeh nenekultikeh xikinmilawahkah,
iwa n ojmeh kan tlalchikotolonka noíwa xikinmixmanakah.

⁶ Iwa nochteh n tlaltikpaktlakah kitaskeh kenomi techmakixtis Dios.” Is. 40:3-5

⁷ Miakeh tlakah ovalayah inawak Juan, para makinkuaateki iwa ye okimiliaya:

—¡Namejwah kemi nonkoameh! ¿Akin onomechili nonmakisaskeh imak tlaijywílistli temohti non nomopah wits? ⁸ Xikchiwakah tlan kuali para mamota milák yononmoyolkopkeh inawak Dios, iwa amo xikmolikah: “Tejwah titepilwah de Abraham.” De milajka nomechilia, Totajtsi Dios weletis kinkopas ninteh temeh ipilwah n Abraham.

⁹ N acha kajki inakastla n kuawitl, iwa nochí kuawitl non amo kitemaka kuali itlakilo,

motsontekis iwa motlamotlas ijtit tletl.

¹⁰ N tlakah okitlajtlaniayah:

—¿Tlan tikchiwaskeh?

¹¹ Juan okinnankili:

—Akin kipia ome itlakéh makitliokoli se akin amo kipia. Iwa akin kipia tlan kikuas, makitliokoli akin amo kipia tlan kikuas.

¹² Noíwa omokuaatekikoh sikimeh tominooololojkeh inawak Juan, iwa okitlajtlanijkeh:

—Tlamachti, ¿tlan moneki matikchiwakah?

¹³ Juan okinmili:

—Amo okachi xikinkobrarokah san tlan machotitok.

¹⁴ Noíwa sikimeh soldadojteh okitlajtlanijkeh:

—Tejwah, ¿tlan tikchiwaskeh?

Juan okinmili:

—Amaka itla xikkixtilikah, nion aka xikteilikah tla amitla okichi iwa xipakikah ika nomotlaxtlawil.

¹⁵ Kemi n tlakah sa okichixtokah mawiki n Cristo, yejwah okimoliayah chamo Juan ye n Cristo. ¹⁶ Yika Juan okinmili:

—Ne nomechkuatekia ika atl, pero satepa wits se tlakatl Akin nomechkuatekis ika n Espíritu Santo iwa ika tletl. Ye okachi weletini, iwa ne mach ni tlawel kuali kemi para nikaktojtomás. ¹⁷ Ye kualika itech ima tlan ika kichipawas n trigo. N trigo non yokichipa kitlaatis, iwa itlajsol n trigo kontlamotlas ijtit tletl non ayik sewis.

¹⁸ Ijkí, iwa ika oksikimeh tlamachtijkeh, Juan Bautista okinmatiltiaya n kualitlajtoli.

¹⁹ Noíwa okajwak n gobernador Herodes Antipas; porke okimosiwati ikuñada Herodías. Nin Herodías okatka isiwa n Felipe, ikni n Herodes. Juan noíwa okajwak Herodes ika tlan amo kuali okichijtinemia. ²⁰ Pero Herodes mach okinek okikak tlan okiliaya n Juan, yej okichi tlan amokuali, iwa otlanawati makitsakuakah n Juan.

Juan kikuatekia n Jesús

(Mt. 3:13-17; Mr. 1:9-11)

²¹ Juan okinkuaatekiaya miakeh tlakah, iwa se tonati noíwa okikuateki n Jesús. Ijkuak Jesús omotrotsajtsilijtoka, n ilwikak owalmotlapo, ²² iwa n Espíritu Santo owaltemok ipan Jesús kemi se palomatsi, iwa itech ilwikak owalmokak se tlájtoli non okijtoaya:

—Te Ti Nokone non saikpanoa niktlasojtla, iwa monawak niyolpaki.

Iwejkatatawah n Jesús

(Mt. 1:1-17)

- ²³ Ijkuak Jesús okipiaya kemi sempóali iwa n májtaktli xiwitl opé tetlapowia de itlajtol n Totajtsi Dios. N tlakah okijtoayah Jesús oyá ipiltsi n José, iwa n José ikone n Elí,
- ²⁴ Elí ikone Matat, iwa Matat ikone n Leví, Leví ikone Melqui, iwa Melqui ikone n Jana, Jana ikone n José, iwa n
- ²⁵ José ikone Matatías, Matatías ikone n Amós, iwa n Amós ikone Nahúm, Nahúm ikone n Eslí, iwa n Eslí ikone n Nagai,
- ²⁶ Nagai ikone Maat, iwa n Maat ikone Matatías, Matatías ikone n Semei, iwa n Semei ikone Joséc, Joséc ikone Judá, iwa n
- ²⁷ Judá ikone Joanán, Joanán ikone n Resa, iwa n Resa ikone Zorobabel, Zorobabel ikone n Salatiel, iwa n Salatiel ikone Neri,
- ²⁸ Neri ikone Melquí, iwa n Melquí ikone n Adí, Adí ikone Cosam, iwa n Cosam ikone n Elmadam, Elmadam ikone n Er, iwa n
- ²⁹ Er ikone Josué, Josué ikone n Eliezer, iwa n Eliezer ikone Jorim. Jorim ikone Matat, iwa Matat ikone n Leví,
- ³⁰ Leví ikone n Simeón, iwa n Simeón ikone n Judá. Judá ikone José, iwa n José ikone n Jonán, Jonán ikone n Eliaquim, iwa n
- ³¹ Eliaquim ikone Melea. Melea ikone Mainán, iwa n Mainán ikone Matata. Matata ikone Natán, iwa n Natán ikone n David.
- ³² David ikone Isaí, iwa n Isaí ikone Obed, Obed ikone Booz, iwa n Booz ikone Salmón. Salmón ikone n Naasón, iwa n
- ³³ Naasón ikone n Aminadab. Aminadab ikone n Admín, iwa n Admín ikone Esrom. Esrom ikone n Fares, Fares ikone n Judá, iwa n
- ³⁴ Judá ikone n Jacob. Jacob ikone Isaac, iwa n Isaac ikone n Abraham. Abraham ikone n Taré, iwa n Taré ikone Nacor,

- ³⁵ Nacor ikone n Serug, iwa n
Serug ikone n Ragau.
Ragau ikone n Peleg, iwa n
Peleg ikone n Heber.
Heber ikone n Sala, iwa n
³⁶ Sala ikone n Cainán.
Cainán ikone n Arfaxad, iwa n
Arfaxad ikone n Sem.
Sem ikone Noé, iwa n
Noé ikone n Lamec.
³⁷ Lamec ikone Matusalén, iwa
Matusalén ikone n Enok.
Enok ikone n Jared, iwa n
Jared ikone n Mahalaleel.
Mahalaleel ikone n Cainán, iwa n
³⁸ Cainán ikone n Enós.
Enós ikone n Set, iwa n
Set ikone n Adán, iwa n
Adán ikone Dios.

4

Jesús kitlanilia n diablo
(Mt. 4:1-11; Mr. 1:12-13)

¹ Ijkuak Jesús owalmokopato kan río Jordán, Ye yotentiwalaya de n Espíritu Santo, iwa n Espíritu okiwík kan amaka chanti. ² Ompa omoka ome pójali tonati, iwa n diablo okinekia matlajtlakolchiwa. Itech nonteh ome pójali tonati Jesús amitla okimomajsewi, iwa satepa owalxitlatlak. ³ Ijkuakó n diablo okili:

—Tla milák Te Ikone Dios, xikili nin tetl mamokopa paj.

⁴ Jesús okinankili:

—Itlajkuilol Dios kijtoa: “N tlakatl amo san ika paj yolitos.”*

⁵ Otlanki n diablo okiwík n Jesús kan se tepetl wejkapa, iwa okimititi nochteh n altepemeh de nin tlaltíkpaktli. ⁶ Iwa n diablo okili n Jesús:

—Ne nikchiwas xiknawati nochí tlan onka itech nin tlaltíkpaktli iwa tiweyixtos intech. Porke nochí noaxka, iwa weletis nikmaktilis san akin ne niknekis. ⁷ Tla timotlankuaketsas nonawak iwa techweyilis, nochí yetos moaxka.

⁸ Ijkuakó Jesús okinankili:

—Itlajkuilol Dios kijtoa: “Xikweyijkachiwa Moteko Dios, iwa sanwel Ye tiktekichilis.”

Dt. 6:13

⁹ Otlanki okiwík n Jesús kan altepetl de Jerusalén, okitlejkolti ikpak n Weyi Tiopa kan okachi wejkapa iwa okili:

—Tla milák Te Ikone Dios, ximokajkawa ixko tlali, ¹⁰ porke itlajkuilol Dios kijtoa: Dios kinnawatis iangelwah mamitsmokuitlawikah.

¹¹ Yejwah mitsmatsakuiliskeh para amo ximoikxitlanwi ika tetl.

Sal. 91:11-12

¹² Jesús okinankili n diablo:

—Itlajkuilol Dios noiya kijtoa: “Amo xikyejyeko n Dios Moteko.”

Dt. 6:16

¹³ Ijkuak n diablo ayakmó okajsik kenijki weletis kiyeyekos n Jesús, okikakajte kech tonati.

Jesús pewa tlamachtia kan tlali de Galilea
(Mt. 4:12-17; Mr. 1:14-15)

* ^{4:4} Yej noiya ika itlajtol Dios Dt. 8:3.

¹⁴ Jesú omókopki Galilea ika iweletilis n Espíritu, iwa sentel omotlapowiayah tlan Jesú okichiwaya. ¹⁵ Otlamachtiaya itech insinagogajwah n judíojeteh, iwa nochteh akimeh okikakiah, kuali omotlapowiayah de Ye.

Jesús kan altepetl de Nazaret

(Mt. 13:53-58; Mr. 6:1-6)

¹⁶ Ijkuakó Jesú oyá Nazaret kan omoskalti. Non sábado[†] okalakito kan sinagoga,[‡] kemi nochipa okichiwaya, iwa owalmóketski para kinamapoilis itlajkuilol Dios. ¹⁷ Ompa okimaktilijkeh itlajkuilol n profeta Isaías,[§] iwa ijkuak Jesú okimila, okajsik kan ijkuilitok:

¹⁸ Iespíritu n Noteko notech kajki,
ken Ye inewia onechpéjpenki para manikinmatilti n kualitlátoli non amitla kipiah,
onechaltítlanki manikinyolchikawaki akimeh moyolkokoah,
iwa manikinmatilti kirkixtiskeh non tsakteh;
iwa manikinmixtlajtlapo akimeh amo tlachiah,
iwa manikinpalewi akimeh tlaijyowiah,

¹⁹ iwa maniktematilti yoajsiko n tonati keman Dios kintiochiwas nochteh akimeh witseh
inawak.

Is. 61:1-2

²⁰ Otlanki Jesú okimemelo n tiotlajkuilolamatl, okimaktili akin tlapalewia itech non sinagoga iwa omotlali. Iwa nochteh non ompa okatkah, san okitlajtlatakeh, ²¹ ijkuakó Jesú opé kinmilia:

—Nin tonati nomoixpa yomochi tlan kijtoa itlajkuilol Dios.

²² Nochteh non ompa okatkah kuali otlajtoayah de Jesú iwa omotlajtlachialtiayah kenjki okinmatiltiaya n kualitlátoli. Iwa omotlajtlaniayah:

—¿Amo ye ipiltsi n José?

²³ Jesú okinmili:

—Kuali nikmatok nomejwah nonkinekih nonnechkakitiskeh nin tlájtoli: “Tlapajti, jximopajti te monevia!”, noiwa nonnechiliskeh: “Tlan otikmatkeh otikchi Capernaúm, noiwa xikchiwa nika itech moaltepeu.”

²⁴ Iwa okinmili:

—De milajka nomechilia, nion se profeta kiyekseliah kan ialtépeu. ²⁵ Ijkuak oyolitoka n profeta Elías, okatkah miakeh iknosiwameh itech nochti tlali de Israel, itech nonteh tonatijmeh eyi xiwitl iwa n tlajko mach okiawik, iwa okatka miak apisol itech nonteh tlalmeh, ²⁶ pero Elías mach okititlankeh inawak seme de nonteh iknosiwameh, yej sanwel inawak se iknosiwatl non ochantitoka kan altepetl de Sarepta, itech tlali de Sidón. ²⁷ Noiwa ijkuak oyolitoka n profeta Eliseo, okatkah miakeh kokoxkeh de lepra itech nochti tlali de Israel, pero amaka de yejwah opajtik, sanwel Naamán non owalewatoka itech tlali de Siria.

²⁸ Ijkuak okinkakeh ninteh tlájtoltéh, nochteh non okatkah kan sinagoga, okualankamikeh. ²⁹ Owalmoketiwetskeh iwa okwalkixtijkeh n Jesú de itech non altepetl, iwa okiwikakeh itempa n tepetl non itech ochijchitoka inmaltépeu, para kontlamotlaskeh. ³⁰ Pero Jesú opanok intlajkotiah iwa oyá.

Jesús kipajtia se tlakatl non okipiaya se espíritu amokuali

(Mr. 1:21-28)

³¹ Ijkuakó Jesú okalakito Capernaúm non kajki itech tlali de Galilea, iwa nochti sábado oontlamachtiaya kan sinagoga. ³² N tlakah omotlajtlachialtiayah ika itlamachtilis porke okinnonotsaya kemi akin kipia tlanawatlistli.

³³ Ompa kan sinagoga okatka se tlakatl non okipiaya se espíritu amokuali, non owaltsajtsitewak:

[†] 4:16 sábado: tonati ijkuak nochteh non de Judea omosewiayah. [‡] 4:16 sinagoga: se kali kan omoololoayah n judíojeteh nochti sábado. [§] 4:17 itlajkuilol n profeta Isaías: se tiotlajtolamatl kemi memeloli non amo kipia capítulo nion bersíkulo. Jesú okimomachti miak welta n tiotlajtolamatl n profeta Isaías, iwa ijkó owéletki okimajsik ninteh tlajtolteh san nima.

³⁴ —Techkawa, ¿tleka timokalakia towah, Jesús de Nazaret? ¿Otiwala otechpojpoloko? Ne nimitsixmati, Te tiyolchipawak inawak Dios.

³⁵ Jesús okajwak n espíritu amokuali, iwa okili:

—¡Xiktsakua mokamak, iwa xikisa de non tlakatl!

N espíritu amokuali okitlalwitek n tlakatl inyakapah nochteh iwa okiski, iwa amitla okitokti. ³⁶ Nochteh omotlajtlachialtijkeh, iwa omotlatlajtlaniayah:

—¿Tlan weletfílistli kipia itlajtol? ¡Nin tlakatl ika weyi tlanawátili kinnawatia n espíritus amokualteh iwa yejwah kisah!

³⁷ Iwa omotlapowiayah de Jesús itech nonteh tlalmeh.

Jesús kipajtilia imona n Pedro

(Mt. 8:14-15; Mr. 1:29-31)

³⁸ Ijkuakó Jesús okiski de kan sinagoga iwa oyá icha n Simón Pedro. Ijkuak okalak icha okitlapowijkeh imona n Pedro omokokoaya ika chikawak totonik. ³⁹ Jesús omotolo inawak n siwatl iwa okinawati n totonik makisa. N totonik okiski iwa imona n Pedro ovalme iwa opé kintekichiwiilia.

Jesús kimpajtia miakeh kokoxkeh

(Mt. 8:16-17; Mr. 1:32-34)

⁴⁰ Ijkuak okalak tonati, nochteh akimeh okimpiayah inkokoxwah okwalinwikilijkeh n Jesús, iwa Ye okintlaliliaya imawah impah n kokoxkeh iwa okimpajtiaya. ⁴¹ Miakeh de nonteh kokoxkeh okimpiayah espíritus amokualteh, iwa ijkuak okisayah otsajtsiah iwa okijoayah:

—Te Ikone Dios.

Pero Jesús okinmajwaya n espíritus amokualteh iwa amo okinkawiliaya matlajtokah, porke yejwah okimatiah Ye n Cristo.

Jesús kitemachtia n kualitlátoli kan tlali de Galilea

(Mr. 1:35-39)

⁴² Ijkuak otláneski, Jesús okiski de kan altepetl iwa oyá iselti kan amaka onemia. Pero n tlakah okitemojkeh, iwa ijkuak okajsitoh, okinekiah kitsakuiliskeh para amo makinkakajtewa. ⁴³ Pero Jesús okinmili:

—Nikpia nitetlapowiti de kan tlanawatia Dios ika n kualitlátoli intech oksikimeh altepemeh, ken ika ye onechaltítlanki Dios.

⁴⁴ Iwa Jesús otlamachtijtinemia itech sinagogas de Galilea.

5

Jesús kinmonochia sikimeh michmajkeh

(Mt. 4:18-22; Mr. 1:16-20)

¹ Se tonati Jesús oyá itempa n lago de Genesaret, iwa miakeh tlakah asta omotojtope-wayah inawak ken okinekiah kikakiskeh itlajtol Dios. ² Jesús okoninmitak ome barkas san ijkeh itempa n atl, porke n michmajkeh otetemokah iwa okimpaktokah inmichayawah.

³ Ijkuakó Jesús otlejkok itech seme de nonteh barkas iaxkawah n Simón, iwa okitlatlaujti makikuani ok achitsi kan tlawaykatla. Otlanki Jesús omotlali ijlik n barka iwa opé kinmachtia akimeh omoololojkeh itempa n atl. ⁴ Ijkuak Jesús yotlanki okintlapowi, okili n Simón:

—Xikjkuani n barka kan okachi tlawaykatla, xikonintlamotlakah nomomichayawah iwa ompa ximichmaakah.

⁵ Simón okinankili:

—Tlamachi, interojyúali yotikyejyekojkeh timichmaaskeh iwa nion se michi otikkitsikjkeh, pero tla Tejwatsi titlanawatia, ye nikonchiwas.

⁶ Ijkuak okontlamotlakeh inmichayawah, saikpanoa miakeh michimeh okinkitsikjkeh iwa inmichayawah opé kokotokah. ⁷ Ijkuakó okoninmanotskeh sikimeh michmajkeh non ik ompa okatkah itech ok se barka, para makimpalewikh. Yejwah okimpalewikh, iwa

okintemitijkeh inbarkajwah ika miak michimeh iwa asta yoapolakiah. ⁸ Ijkuak Simón Pedro okitak noch ni, omotlankuáketski iyakapa n Jesús iwa okili:

—Noteko, amo xiwalmijkuani nonawak, porke ne nitlajtlakole.

⁹ Simón ijkó okijto porke Ye iwa non inwah okatka satlawel okinmojtih ijkuak okitakeh senmiaktikeh michimeh okinkitskijkeh. ¹⁰ Noiwa n Jacobo iwa n Juan, itelpochwah n Zebedeo non otekitia iwa n Simón, saikpanoa omomojtijkeh. Pero Jesús okili n Simón:

—Amo ximawi, axa te ayakmó timichmas, yej pewas tikanmichmas tlakah.

¹¹ Ompa, san nima ijkuak okwalinkixtijkeh inbarkajwah itempa n atl, okikakajtejkeh noch iwa oyajkeh iwan Jesús.

Jesús kipajtia se tlakatl non okipiaya lepra

(Mt. 8:1-4; Mr. 1:40-45)

¹² Ijkuak Jesús okatka itech se altepetl, okalakiko se tlakatl non okipiaya lepra. Iwa ijkuak okitak n Jesús, omotlankuáketski iyakapa asta okitelkoto n tlali ika ixkuak, iwa ijki okitlatlaujti:

—Noteko, tla Tejwatsi tikmonekiltia, weletis techchipawas de nokokolis.

¹³ Ijkuakó Jesús okitelko n kókoxki iwa okijo:

—Nikmonekiltia. ¡Ximochipawa!

Ijkuak ijkó okijo, isawawah n kókoxki san owalpolikeh. ¹⁴ Otlanki Jesús okinawati amaka makimatilti, iwa okili:

—Xio ximoteixpantiti inawak n tiópixki, iwa xiktemaka tlan Moisés otlanawati por mochipawalis. Ijkó nochteh makimatikah yotimochipa de mokokolis.

¹⁵ Yika noch ijlán Jesús okichiwaya san kan ik yetos okachi omomatia, iwa miakeh tlakah omoololoayah para kikakiskeh itlajtol iwa para makimpajti. ¹⁶ Pero Jesús omoixkoyantiaya, iwa oyaya kan amaka okitaya iwa ompa onmotiotsajtsiliaya.

Jesús kipajtia se tlakatl non osentitikak

(Mt. 9:1-8; Mr. 2:1-12)

¹⁷ Se tonati, Jesús otlamachtijtoka iwa ik ompa oewatokah sikimeh fariseos iwa sikimeh tlamachtijkeh de intlanawatil. Yejwah ovalajkeh de nochteh altepetsitsinteh de Galilea, de Judea iwa de Jerusalén. Iwa ika ichikawalis Dios, Jesús okimpajtiaya n kokoxkeh. ¹⁸ Ijkuakó okalakikoh sikimeh tlakah non okualikayah itech ikuaujtlapech se tlakatl non osentitikak. Ijkuak okalakitoh itech kali kan Jesús otlamachtijtoka, yejwah okitemoliayah keniji kikalakiskeh iwa kitlaliskeh iyakapa n Jesús. ¹⁹ Pero mach oweletkeh okikalakijkeh, porke miakeh tlakah okatkah kaltempa. Ijkuakó otlejkokeh ikpak kali, okikuatlapojkeh, iwa ik ompa okitemowijkeh n kókoxki ika noch ikuaujtlapech, iwa tlatlajkotia okitlalijkeh, kan okatka n Jesús. ²⁰ Ijkuak Jesús okitak keniji ninteh tlakah okineltokakeh, okili n kókoxki:

—Tlakatl, nimitstlapojpolwia de motlajtlakolwah.

²¹ Ijkuakó non kitemachtiah n tlanawatílistli iwa n fariseos opé mokuatlapowiah: “¿Akí nin tlakatl non ika itlajtol kixpanawijtok n Totajtsi Dios?” Amaka weleti kintlapo-jpolwia tlajtlákolteh, sanwel Totajtsi Dios.

²² Pero Jesús okimatis tlan yejwah omokuatlapowijtokah, iwa okinmili:

—¿Tleka ijkó nonkimoliah itech nomoyolo? ²³ ¿Tlan okachi amo owi se kijtos: “Mot-lajtlakolwah ya tlajtolpolwitokeh”, noso okachi owi se kijtos: “Ximewa iwa xinejnemi”?

²⁴ Yika xikmatikah, Ne Non onimochi ni tlakatl nikpia weletlistli itech nin tlaltíkpaktli para nikintlapojpolwia tlajtlakolteh.

Ijkuakó okili n kókoxki:

—Ne nimitsilia, ximewa, xikonana mokuaujtlapech iwa xajti mocha.

²⁵ Inmixpah, n kókoxki owalmóketski, okajkok ikuaujtlapech iwa oyá icha kiweyijkachijti Dios. ²⁶ Iwa nochteh non ompa okatkah omotlajtlachialtijkeh iwa okiweyijkachijkeh Totajtsi Dios, iwa ika miak mawílistli okijtojkeh:

—Nin tonati otikinmitakeh wejweyi neskayolteh.

Jesús kinotsa n Leví

(Mt. 9:9-13; Mr. 2:13-17)

²⁷ Satepa, Jesús okiski de ompa iwa okitak se tominooololo non omonotsaya Leví. Ye oewatoka kan motlaxtlawa impuesto de Roma, iwa Jesús okili:

—Xiwiki nowa.

²⁸ San nima n Leví omóketski, okikakajte nochi iwa oyá iwan Jesús.

²⁹ Satepa, Leví okichi se weyi ilwitz para Jesús, iwa miakeh tominooololojkeh iwa n oksikimeh tlakah otlakuajtokah inwah. ³⁰ Pero n fariseos iwa n tlamachtijkeh de intlanawatilis, opé kimpopoah tlamachtijkawah n Jesús, iwa okimiljkeh:

—¿Tleka nontlakuah iwa nonkonih iwan tominooololojkeh iwa n tlajtlakolchijkeh?

³¹ Jesús okinnankili:

—N tlakah chikawakeh amo kimotlakewiah se tlapajti, yej non kokoxkeh. ³² Ne amo onikinnotsako non yekmilajkameh. Ne onikinnotsako n tlajtlakolchijkeh, para mamoyolpatlakah inawak Dios.

Jesús otlamachti keniji se mosawas

(Mt. 9:14-17; Mr. 2:18-22)

³³ Ijkuakó yejwah okitlajtlanijkeh n Jesús:

—¿Tleka tlamachtijkawah n Juan iwa tlamachtijkawah n fariseos nochipa mosawah iwa motiotsajtsiliah, pero motlamachtijkawah nochipa tlakuah iwa konih?

³⁴ Jesús okinnankili:

—¿Kox weletis nonkitoktiskeh aka mamosawa itech se monamiktilo ijkuak n novio jakji íwa? ³⁵ Witseh tonatijmeh ijkuak kinkixtiliskeh n novio, ijkuakó mosawaskeh.

³⁶ Noiwa okinmili nin tlapoálistli:

—Amaka kitlamania itlake non ya wewe ika se yankuik tsótsoli. Porke tla ijkó kichiwa, okachi kijtlakoa itlake, porke n yankuik tsótsoli mokototsoa iwa mach kinamiki. ³⁷ Nion amaka kitlalia yankuik vino itech se kuilambre ya wewe. Porke tla se ijkó kichiwa, n yankuik vino kitsomonia n kuilambre, iwa san ken omeh pojpoliwih. ³⁸ Yika, moneki se kitlalis n yankuik vino itech yankuik kuilambre, iwa ijkó san ken omeh wejkawaskeh.

³⁹ Iwa amaka kineki konis n yankuik vino ijkuak yokonik n vino non yowejka tlatitok, porke kijtoa: “N vino non yowejka tlatitok okachi kuali.”

6

Itlamachtijkawah n Jesús miawatekih se sábado

(Mt. 12:1-8; Mr. 2:23-28)

¹ Se sábado ijkuak mosewia n judíos, Jesús iwa tlamachtijkawah opajpanotiayah kan ik tlatoottok, tlamachtijkawah opé tlakuatejtekih, okimaxotomayah iwa okikuayah itliolyo n tlátoktli. ² Ijkuakó sikimeh fariseos okintlajtlanijkeh:

—¿Tleka nonkichiwha tlan amo moneki se makichiwa itech sábado?

³ Jesús okinnankili:

—¿Ayamó nonkiamapoah tlan okichi n David iwa non iwa oyayah, se tonati ijkuak owalxitlatlakeh? ⁴ David okalak ijtik ikal Dios iwa okinmónanki n tlatiochiwalpameh. Otlanki okinkuah, iwa okinmajmák noiwa akimeh oyayah íwa, maya ninteh pameh sanwel n tiopixkeh okinkawiliayah makinkuakah.*

⁵ Noiwa okinmili:

—Ne Non onimochi ni tlakatl noiwa niknawatia n sábado.

Jesús kipajtia se tlakatl non omapitswak

(Mt. 12:9-14; Mr. 3:1-6)

⁶ Ok se sábado ijkuak mosewia n judíos, Jesús okalak itech sinagoga iwa opé tlamachtia. Ompa okatka se tlakatl non opitswak imayekma. ⁷ N fariseos iwa n tlamachtijkeh, sa okitokatinemiah n Jesús para kitaskeh kox kipajtiskia non tlakatl itech sábado iwa ijkó

* ^{6:4} pameh tlatiochíwalteh: Nochi sábado n tiopixkeh okinkuayah n pameh non olaatitokah itech Weyi Tiopa iwa okintlaliayah oksikimeh yankuikeh.

weletis kiteiliskeh. ⁸ Pero Jesús okimatia tlan yejwah okiyeyekoliayah, iwa okili n tlakatl non okipiaya imayekma pitswak:

—Ximoketsa iwa xiwiki nika tlatlajkotia.

N tlakatl omikuani iwa omoketsato tlatlajkotia. ⁹ Ijkuakó Jesús okinmili non ompa okatkah:

—Ne nikneki nomechtlahtlanis: ¿Tlan moneki se kichiwas itech sábado, tlan kuali noso tlan amokuali? ¿Tikpalewiskeh mayolito se tokni, noso tejwah tigmiktiskeh?

¹⁰ Ijkuakó Jesús okintlatlajtlatak nochteh non okiyawalojtokah, iwa okili n tlakatl:

—Xikmilawa moma.

N tlakatl okimila ima, iwa san nima ovalpajtik. ¹¹ N fariseos okualankamikeh, iwa opé kimoliah tlanón kitoktiskeh n Jesús.

Jesús kimpejpena májtlaktli iwa ome itlamachtijkawah

(Mt. 10:1-4; Mr. 3:13-19)

¹² Itech nekateh tonatijmeh, Jesús otlejkok itech se tepetl iwa omototsajtsilito interojojúali. ¹³ Ijkuak otláneski, okínnotski itlamachtijkawah iwa okimpéjpenki májtlaktli iwa ome (12) de yejwah, iwa okintlalili intoka apóstoles.[†] ¹⁴ Yejwah ninteh akimeh okimpéjpenki:

Simón, akin Jesús noiwa okitlalili itoka Pedro, iwa ikni

Andrés;

Jacobo iwa n

Juan;

Felipe iwa n

Bartolomé,

¹⁵ Mateo,

Tomás,

Jacobo ipiltsi n Alfeo;

Simón akin okitokayotiah Zelote, iwa n

¹⁶ Judas ikni n Jacobo; iwa n

Judas Iscariote, akin satepa kitemaktiskia n Jesús.

Jesús kinmachtia miaktikeh tlakah

(Mt. 4:23-25)

¹⁷ Jesús otemok itech tepetl iwa itlamachtijkawah, iwa omoketsatoh ixtlawak. Noiwa ompa okatkah miakeh tlakah non ovalajkeh de nochteh n altepemeh de Judea, de Jerusalén, de Tiro, iwa Sidón. Yejwah ovalajkeh okikakikoh n Jesús iwa para makimpajti de inkokolis. ¹⁸ Noiwa okimpajtiaya akimeh okimpiayah espíritus amokualteh.

¹⁹ Nochteh okinekiah kitelkoskeh n Jesús, porke ika iweletilis okimpajtiaya.

Xiyolpakikah

(Mt. 5:1-12)

²⁰ Ijkuakó Jesús okintlajtlatak itlamachtijkawah iwa okinmili:

—Miak yolpáklisli nonkipiah nomejwah akimeh non próbesteh, porke nonkipiah tlan nomoaxka kan Dios tlanawatijtok.

²¹ 'Miak yolpáklisli nonkipiah nomejwah non axa nonxitlatlah, porke satepa nonmixwiskeh.

'Miak yolpáklisli nonkipiah akimeh axa nonchokah, porke satepa nonwetskaskeh.

²² 'Miak yolpáklisli nonkipiaskeh ijkuak nomechkokoliskeh, ijkuak nomechtototokaskeh, ijkuak nomechwijwikaltiskeh iwa ijkuak nomechtlawelitaskeh por nonnechneltokah Ne Non onimochi ni tlakatl. ²³ Xiyolpakikah itech non tonati iwa xiwetskakah, porke yetos weyi nomotlaxtlawil kan ilwikak, porke intatawah akimeh asta axa tlajtakolchiwah, noijkó okintlaijyowiltijkeh n profetas.

²⁴ 'Pero miálmasteh nomejwah akimeh nonkitlawelpiah tomi, porke yononmopaktijkeh kemi ononkinekeh.

† ^{6:13} apóstoles kijtosneki tlatitlaniltih iwa tlatematiltijkeh

²⁵ 'Miálmasteh akimeh axa nonmixwitokeh, porke satepa nonmapismikiskeh.

'Miálmasteh akimeh axa nonwetskah porke satepa nonchokaskeh ika neyolkókoli.

²⁶ 'Non miálmasteh ikuak nochteh n tlakah ayakmó kimatiskeh kenomi nomech-weyliskeh. Porke intataawah akimeh asta axa kichiwah tlajtlácoli noijkó satlawel okinweyiliayah n profetas tekajkayajkeh.

Jesús tlamachtia matikintlasojoatlakah akimeh techkokoliah

(Mt. 5:38-48; 7:12)

²⁷ 'Pero nomejwah akimeh nonnechtlakitah, Ne nomechilia: Xikintlasojoatlakah akimeh amo nomechtlaosjtlah, iwa xikinchiwilakah tlan kuali akimeh nomechkokoliah. ²⁸ Noiwa xiktlajtlanilikah Dios makintiochiwa akimeh nomechwijwikaltiah, iwa ximotiotssajtsilikah por akimeh fiero nomechtenewah. ²⁹ Tla aka mitsixtlatsinia, xikkawili noiwa mamitsixtlatsini ojkatia, iwa tla aka mitskixtilia mokoto, xikkawili makiwika noiwa mokamisa. ³⁰ Akin mitstlajtlanilia itla, xikmaka, iwa tla aka mitskixtilia itla, ayakmó xiktlajtlanili. ³¹ Xikchiwakah tlan kuali, ijkó kemi nomejwah nonkinekih makichiwakah tlan kuali nomowah.

³² 'Tla nomejwah nonkintlasojojtah sanwel akimeh nomechtlaosjtlah, amo kuali tlan nonkichiwah. Porke non amo kixmatih Dios noijkó kichiwah. ³³ Tla nonkinchiwiliah tlan kuali sanwel akimeh nomechchiwiliah tlan kuali, amo kuali tlan nonkichiwah. N tlajtlakolchijkeh noijkó kichiwah. ³⁴ Noso tla aka nonkitlanetiah itla, porke non kimoliah satepa ye noiwa nomechmakas itla, amo kuali tlan nonkichiwah. Noiwa n tlajtlakolchijkeh kintlanetiah akimeh iwa mowikah, porke kimatokeh ok se tonati noiwa kintlanetiskeh. ³⁵ Ne nomechilia: Xikintlasojoatlakah akimeh nomechkokoliah, iwa xikinchiwilakah tlan kuali iwa xiktetlanetakah. Iwa amo xikchiakah itla manomech-makakah. Tla ijkó nonkichiwaskeh, nonkiseliskeh weyi nomotlaxtlawil. N Totajtsi Dios nomechyekselis kemi ipilwah, porke Ye kinmiknomati akimeh amo motlasojkamatih innawak iwa akimeh tlajtlakolchijkeh. ³⁶ Xiteiknomatikah ijkó kemi Nomotajtsi teiknomati.

Amo xitepojpoakah

(Mt. 7:1-5)

³⁷ 'Amo xikimpojpoakah oksikimeh, ijkó Dios amo nomechpojpoas. Amo xitetlajtlakoltikah ijkó Dios amo nomechtlaajtlakoltis. Xitetlapojpolwikah iwa Dios nomechtlapojpolwis. ³⁸ Xitetlatliokolikah iwa Dios nomechtlatliokolis. Ye nomechmakas se kuali tlatamachíwale, tejtélinki, tetentok iwa kitsonewiltis. Dios nomechkopilis ijkó kemi nomejwah ononkitemakakeh.

³⁹ Jesú斯 noiwa okinmili nin tlájtoli:

—¿Se non amo tlachia weletis kiyakanas ok se kemi ye? ¿Amo motekochwiskeh san ken omeh? ⁴⁰ Se akin momachtia amo okachi kimiati ke itlamachi. Pero tla kimokawilia makimachtikah, motlamiti kemi itlamachi.

⁴¹ '¿Keniji weleti tikita n tlajsoltsintli non kipixtok mokni kan ixtololo, iwa amo tikita n tláktsonli non tikpixtok te kan moixtololo? ⁴² Iwa tla amo tikita n tláktsonli non tikpixtok kan moixtololo, ¿keniji timixewia tikilia mokni: "Noknitsi, manimitsonkixtili n tlajsoltsintli non tikpixtok kan moixtololo"? ¡Íxkoptli!, achto xikmokixtili n tláktsonli non tikpixtok kan moixtololo, iwa ijkó ya weletis tiyektlachias para weletis tikixtilis n tlajsoltsintli non kipixtok mokni kan iixtololo.

Se kuawitl moixmati ika tlan kitlakiltia

(Mt. 7:17-20; 12:33-35)

⁴³ 'Se kuali kuawitl, amo weletis kitemakas amokuali itlakilo. Nion se amokuali kuawitl weletis kitemakas kuali itlakilo. ⁴⁴ Yika, nochi kuawitl moixmati ika itlakilo, porke amo motekih igos de kan witsmeh, nion tikintekih uvasteh de kan tlatsmolteh. ⁴⁵ Noiwa n kuali tlakatl, ikuak tlajtoa kitenkixtia tlan kuali kitlaatijtok itech iyolo. Iwa n tlakatl amokuali kinmijtoa tlájtoltéh amokualteh porke tlan amokuali kajki itech iyolo. Nochi tlan kitenkixtia se tlakatl, ye noni tlan kipixtok itech iyolo.

*N kali non moyekchijchi iwa n kali non amo moyekchijchi
(Mt. 7:24-27)*

⁴⁶ '¿Tleka nonnechnotsah, "Noteko, Noteko", iwa amo nonkichiwah tlan Ne nomechilia? ⁴⁷ Axa nomechaisikamatiltis kenomi nonkixmatiskeh n tlakatl non milák wits nonawak, iwa nechkaki iwa kitlakita notlajtol. ⁴⁸ Ye kemi se tlakatl akin omokalti. Achto otlachkuak tlajejkatla iwa ikal okitlajtlaxili ipan tetl. Ijkuak owala n kiawitl, n atepiatl omomiakili iwa opé kitsinwiteki n kali, pero n kali amo owetski porke otlakxilitoka ipan tetl. ⁴⁹ Pero akin nechkaki iwa amo kichiwa tlan nikijtoa, noni kemi se tlakatl akin okichijchi ikal itech tlali iwa amo kuali okitlaxili. Ijkuak omomiakili n atepiatl, okitsinwitek n kali iwa san nima owetski.

7

*Jesús kipajtia itlakewal se soldado romano tlayákanki
(Mt. 8:5-13; Jn. 4:43-54)*

¹ Ijkuak Jesús otlanki okinmachtí n tlakah, okalakito Capernaúm. ² Ompa ochantitoka se soldado romano tlayákanki non okipiaya se itlakewal non satlawel okitlanekiliaya non yomiktoka. ³ Ijkuak n tlayákanki okikak omotlapowiayah de Jesús, okintítlanki sikimeh tetajmeh non tlayakantokeh kan tiopa para makitlatlaujtith makipajtiliki itlakewal.

⁴ Yeywah okalakikoh inawak Jesús iwa okilijkeh:

—Kuali ka tla tikpalewis nin tlayákanki romano, ⁵ porke maya amo israelita, ye satlawel kitlasojtla topaís, iwa ye inewia otlanawati matechchijchiwilayah se tosinagoga.

⁶ Ijkuakó Jesús oyá inwah. Pero ijkuak ya onkalakiah itech kali, n tlayákanki romano okintítlanki sikimeh itlakaikniyah makilith n Jesús:

—Noteko, tla amo weletis tias nocha, amo ximotekipacho, porke ne mach ni tlawel kuali para nimtsompanoltis ijlik nocha. ⁷ Yika, mach onimixewi onimitstemoto nonnewia. Sanwel xikijto "Mapajti", iwa ye walpajitis. ⁸ Porke ne noijki nikpia akin nechnawatia, iwa noijki nikimpia sikimeh soldadojteh akimeh nikinnawatia. Tla seme de yeywah nikilia mawia, yawi; iwa tla ok se nikilia mawiki, wits; iwa ijkuak niknawatia notlakewal makichiwa itla, kichiwa.

⁹ Ijkuak Jesús okikak, omotlajtlachialti non tlayákanki romano, iwa okinchikoitak non okwaltokayah iwa okijto:

—De milajka nomechilia, itech nochí país de Israel mach nikkajsitika aka non satlawel matlaneltoka kemi ye.

¹⁰ Ijkuak n tlakah non okintitlankeh omokopkeh icha n tlayákanki romano, okajsitoh n tlakewale yopajtit.

Jesús kiyolitia ipiltsi se iknosiwatl

¹¹ Okachi satepa, Jesús oyá kan se altepetl non itoka Naín, iwa itlamachtijkawah iwa oksikimeh tlakah oyayah íwa. ¹² Ijkuak Jesús yonkalakia itech non altepetl, okimitak sikimeh tlakah non okiwikayah kitookatiweh se miketl. Ye ikone se iknosiwatl non sanwel se ipiltsi okípixki, iwa miakeh okiwikayah kitookatiweh. ¹³ Ijkuak Toteko okitak n iknosiwatl okiknomá, iwa okili:

—Ayakmó xichoka.

¹⁴ Ijkuakó Jesús omikuani iwa okitelko ikaja n miketl, iwa non okimamajtiyah omoketskeh. Iwa Jesús okili n miketl:

—Télpochtli, Ne nimtsilia: ¡Ximoketsa!

¹⁵ San nima n télpochtli non omiktoka, owlomotlali iwa opé tlajtoa, iwa Jesús okimaktili ina. ¹⁶ Ijkuak ijkí okitakeh, nochteh omaujkeh iwa opé kiweyijkachiwah Dios, iwa okijoayah:

—Se weyi profeta yomonextiko tonawak.

Noiwa okijoayah:

—N Totajtsi Dios yowala okipalewiko ialtépeu.

¹⁷ Itech nochi n tlali de Judea iwa n altepemeh non kiyawalojtokeh omoma tlan Jesús okichi.

*Juan Bautista kintitlani ome itlamachtijkawah kan Jesús
(Mt. 11:2-19)*

¹⁸ Itlamachtijkawah n Juan okimatiltijkeh nochi tlan otlamochijtoka, iwa ye okínnotski ome itlamachtijkawah, ¹⁹ iwa okintítlanki inawak Jesús para makitlajtlanitih kox Ye n Cristo Akin walaskia, noso kichiaskiah ok se. ²⁰ N tlakah non okintítlanki n Juan okalakitoh inawak Jesús iwa okilijkeh:

—Juan Bautista otechaltítlanki matimitstlajtlanikih kox Tejwatsi Akin walaskia, noso tikchiaskeh ok se.

²¹ Itech non ora ikuak yejwah okalakitoh, Jesús okimpajti miakeh kokoxkeh de inkokolis, intlaijyowilis, iwa okinkixtilaya espíritus amokualteh. Noiwa miakeh non amo otlachiayah okinmák intlachialis. ²² Ikuakó Jesús okinmili:

—Ximokopakah kan Juan iwa xikilikah tlan yononkitakeh iwa ononkikakeh. Xikmatiltakah:

non amo otlachiayah, ya tlachiah,
non amo onejnemiah, ya nejnemih;
non okipiayah lepra, yopajtikeh;
non amo otlakakiah, ya tlakakih.

Non yomikkeh, moyolitiah,
iwa n próbesteh kinmatiltiah n kualitlajtoli.

²³ Miak pakílistli kipias akin nechneltokah.

Jesús tlajtoa de Juan Bautista

²⁴ Ikuak oyajkeh itlamachtijkawah n Juan, Jesús opé kintlapowia n tlakah non ompa okatkah de Juan Bautista:

—¿Tlan ononkitatoh kan amaka chant? ¿Ononkitatoh se akatl non okoliniaya n ejekatl? ²⁵ ¿Tlan ononkitatoh? ¿Ononkitatoh se tlakatl non yektlakentitok? Nomejwah nonkimatih akimeh moyektlakentiah, chantitokeh incha n reyes. ²⁶ ¿Tlan ononkitatoh? ¿Ononkitatoh se profeta? Milák, ye se profeta, iwa okachi weyijkatitok ke oksikimeh profetas. ²⁷ Ye de akin tlajtoa itlajkuil Dios:

Ne niklayakanaltis akin tlatematiltijtias moyakapa
para mamitsmajmanili n ojtl. *Mal. 3:1; Is. 40:3*

²⁸ De milajka nomechilia amo otlakatki ok se okachi weyijkatitok ke Juan, pero akin kimokawilia Dios makiyakana okachi weyijkatitos ke Juan.

²⁹ Ikuak okikakeh nochi ni, nochteh n tlakah iwa n tominooolojkeh non okiselijkah itlakuaatekilis n Juan, okajsikamatkeh Dios yekmilajka. ³⁰ Pero n fariseos iwa n tlamachtijkeh de intlanawatilis, amo okiselijkeh itlakuaatekilis n Juan. Okixnamikeh tlan Totajtsi Dios okinekia kichiawilia inwah. ³¹ Iwa okinmili:

—¿Kenomi motah n tlakah itech ninteh tonatijmeh? ¿Kenomi akimeh inyalis? ³² Mota kemi pípilteh non mawiltia tiánkistli iwa motsatsajtsiliah: “Otomechtlapichilijkeh ika akatlapítsali iwa amo ononmijtotijkeh; otomechintlakuikilijkeh tlakuíkalteh teyolkoko- jkeh iwa amo ononchokakeh.” ³³ Owala n Juan Bautista, ye amo okikuaya paj nion okoni- aya vino, iwa nomejwah nonkijtoah kipia se amokuali espíritu. ³⁴ Satepa oniwala Ne Non onimochi ni tlakatl, iwa Ne nitlakua iwa nikoni, iwa nomejwah nonkijtoah Ne niápitli iwa tlawel nikoni, nimowikatinemi iwan tlajtlakolchijkeh iwan tominooolojkeh. ³⁵ Pero akin de milajka kajsikamati tlan Dios kimonekiltia, kinextia itech tlan kichiwa.

Se siwatl kixawilia gjwiálistli n Jesús icha n Simón n fariseo

³⁶ Se fariseo, non itoka Simón, okontlalwi n Jesús matlakuati icha. Jesús oyá icha iwa omoyayanti inakastla n mesa. ³⁷ Ikuakó se siwatl tlajtlakolchi itech non altepetl, okima Jesús otlakuajtoka iwan fariseo. Okalakito ika se itekontsi tentika ika ajwiálistli.

³⁸ Chokati, omotlali ikxitla n Jesús iwa ika ixayo opé kinsiawilia ikxiwah. Otlanki ika

itsonkal okinwajwachili ikxiwah. Okintennamik iwa okinxajxawili n ajwiálistli. ³⁹ Ijkuak n fariseo non okitlalwi n Jesús okitak tlan okitoktijtoka non siwatl, okimoli: “Tla nin tlakatl yetoskia n profeta, kimatiskia aki nin siwatl non kikxitelkojtok, porke nin siwatl, ye tlajtlakolchi.” ⁴⁰ Ijkuakó Jesús okili n fariseo:

—Simón, nikneki nimitsilis itla.

N Simón okinankili:

—Kuali ka, Tlamachti, techili.

⁴¹ Jesús okili:

—Se tlakatl non okitetlanetiaya tomi, okintlaneti tomi ome tlakah. Se okiwikiliaya mákuili siento denariojtomí, iwa n ok se san tlajko siento denariojtomí. ⁴² Iwa kemi amo oweletiah okikopiliayah itomi, san ken omeh okintlapojpolwili tlan okiwikiliayah. Axa monewia techili, ¿katlie de ninteh ome okachi okitlasoxtlak?

⁴³ Simón okinankili:

—Ne nikijtoa, akin okachi miak okitlapojpolwili.

Jesús okili:

—Milák kemi otikyejyekoli.

⁴⁴ Otlanki Jesús okonitak n siwatl, iwa okili n Simón:

—¿Tikita nin siwatl? Onikalak mocha, iwa amo otechmák atl para nokxiwah. Pero nin siwatl, ika ixayo onechixipajpak iwa ika itsonkal onechinwajwachili. ⁴⁵ Te amo otechixtennamik, pero nin siwatl desde onikalakiko opé nechikxitennamiki. ⁴⁶ Te amo otechkuaxawili aseite. Pero nin siwatl onechxawili ajwiak pajtli ipan nokxiwah. ⁴⁷ Yika nimitsilia, nochteh itlajtlakolwah ya tlapojoxtitlak ken miak otetlasoxtlak. Pero akin san achitsi kitlapojpolwiah san achitsi tetlasoxtl.

⁴⁸ Otlanki Jesús okili n siwatl:

—Motlajtlakolwah ya tlapojoxtitlak.

⁴⁹ Iwa n tlatlálwilteh non otlakuajtokah iwa Jesús, opé moichtakatlapowiah:

—¿Akin nin tlakatl, non kintlapojpolwia tlajtlakolejkeh?

⁵⁰ Jesús okili n siwatl:

—Motlaneltokalis yomitsmakixti, xajti ika yolsewílistli.

8

N siwameh non okipalewiayah n Jesús

¹ Okachi satepa, Jesús otlamachtíjtjinemia itech miakeh altepemeh. Ye okintlapowijtinemia de n kualitlajtoli de Dios. N májtlakteh iwa ome tlatematiltjkeh íwa oyayah.

² Noiwa oyayah iwan Jesús sikimeh siwameh non Ye okimpajtjka de miak kokólisteh iwa de espíritus amokualteh. Inwah oyaya n María de Magdala, akin Jesús okinkixtilijka chikome espíritus amokualteh. ³ Noiwa ompa oyaya n Juana, isiwa n Chuza, akin okitaya nochti tlan okipiaya n Herodes, iwa n Susana, iwa n oksikimeh siwameh non okipalewiayah n Jesús ika tlan okipiayah.

Se tlakatl non otook

(Mt. 13:1-9; Mr. 4:1-9)

⁴ Miakeh tlakah owalkiskeh de inmaltépeu okitatoh n Jesús; iwa ijkuak omoololojkeh, Jesús okintlapowi ika tlapoálisteh, iwa okinmili:

⁵ —Se tlakatl otookato, iwa ijkuak okitepejtoka xínachtli, siki owetski inakastla n ojiali, akimeh ik ompa opanoayah okitlajtlaksakeh iwa n totomeh okikuajkeh. ⁶ Oksiki xínachtli owetski kan tlateyo; iwa ijkuak oixwak nimana waki ken amo okipiaya kuichawálistli.

⁷ Oksiki xínachtli owetski intsalko witsmeh, iwa n witsmeh non inwah omoskaltiayah okimijyomiktjkeh. ⁸ Pero oksiki xínachtli owetski itech kuali tlali; iwa ijkuak omoskalti, kualtsi otlaaki, iwa okitlakilti se siento por se xínachtli.

Ijkuak Jesús otlanki okintlapowi, otlajto chikawak iwa okinmili:

—Akin de milajka kipia inakas, makajskamati!

*Jesús kinmajsikamatiltia itlamachtijkawah ika tlapoálisteh
(Mt. 13:10-17; Mr. 4:10-12)*

⁹ Ijkuakó itlamachtijkawah n Jesús okitlajtlanjkeh tlan kijtosneki non tlapoálistli.
¹⁰ Jesús okinmili:

—Dios yonomechkawili xikajsikamatikah kenomi Ye tlanawatia. Pero non oksikimeh nikintlapowia ika tlapoálisteh. Yika, maya tlachiah, amitla kitah, iwa maya tlakakih amo kajsikamatih.

*Jesús kinmajsikamatiltia n tlapoálistli de n xínachtli
(Mt. 13:18-23; Mr. 4:13-20)*

¹¹ 'Ye ni tlan kijtosneki n tlapoálistli: N xínachtli kijtosneki itlajtol n Totajtsi Dios. ¹² N xínachtli non owetski inakastla n ojti, yejwah n tlakah akimeh kikakih itlajtol Dios, pero wits n diablo iwa kinyolkixtilia para amo makineltokakah iwa Dios amo makinmakixti.

¹³ N xínachtli non owetski kan tlateyo, yejwah akimeh kiseliah ika pakílistli itlajtol Dios, pero ken amo nelwayojkeh, san kech tonati tlaneltokah inawak Dios, pero ijkuak kinyejyekoa n diablo, mosotlawah iwa kikawah Dios. ¹⁴ N xínachtli non owetski intsalko witsmeh, kijtosneki akimeh kikakih itlajtol Dios, pero amo kimokawiliah makinyakana, yej okachi kintekipachoa inteki. Kinekih kitlawelpiaskeh tomi iwa satlawel kinekih mopaktiskeh, yika itech tlan kichiwhay ayik kitenextiah itlasojoatlalis Dios. ¹⁵ Pero n xínachtli non owetski itech kuali tlali, yejwah akimeh ika kuali inyolo kikakih n kualitlátjoli iwa kitlakitah, kimokawiliah makinyakana Dios iwa ijkó weletih kitenextiah itlasojoatlalis.

*N tlapoálistli de n tlawili
(Mr. 4:21-25)*

¹⁶ 'Amaka kimilintia se tlawili iwa tlami kitlalia itlampa se chikiwitl noso itlampa se kama, yej kontlalia tlakpak para makintlawili akimeh kalakih itech kali. ¹⁷ Yika, nochi tlan tlaatitok monextis, iwa tlan amo momati saman momatis.

¹⁸ Ijkó kiné, kuali xikkajsikamatikah, akin kajsikamati keniji Dios tlanawatia, kinextiliskeh okachi, iwa akin kijtoa san achitsi yokajsikama kitoktiskeh makilkawa tlan achitsi yokajsikamatka.

*Imamá iwa ikniwha n Jesús
(Mt. 12:46-50; Mr. 3:31-35)*

¹⁹ Ijkuakó imamá iwa ikniwha n Jesús okalakitoh kan otlamachtijtoka, pero amo oweletkeh okalakeh inawak porke miakeh tokniwha ompa okatkah. ²⁰ Ijkuakó aka okilito n Jesús:

—Momamá iwa mokniwha kateh kaltempa, iwa kinekih mitsitaskeh.

²¹ Pero Jesús otlanankili:

—Akimeh kikakih itlajtol Dios iwa kitlakitah, yejwah nomamá iwa nokniwha.

*Jesús kitlakawaltia n ejekatl iwa n atl
(Mt. 8:23-27; Mr. 4:35-41)*

²² Se tonati Jesús otlejkok itech se barka iwa itlamachtijkawah, iwa okinmili:

—Matikojchalwikah n lago.

Iwa nochteh oyajkeh, ²³ pero ijkuak okikojchalwiktakah n lago, Jesús okochki. Iwa owalajsiwetsiko se ejekatl chikaktik non okiatemitiya n barka iwa yoapolakia.

²⁴ Ijkuakó itlamachtijkawah n Jesús okijxititoh iwa okilijkeh:

—¡Tlamachti, Tlamachti! ¡Tiapolaktekeh!

Jesús owalmóketski iwa okintlakawalti n ameméolteh iwa n ejekatl; iwa nochi san owaltlamoka. ²⁵ Satepa Jesús okinmili itlamachtijkawah:

—¿Kanin kajki nomotlaneltokalis?

Pero yejwah omotlajtlachialtjkeh, omomojtjkeh iwa omotlatlajtlaniayah:

—¿Akí nin tlakatl, porke asta ejekatl iwa n atl kitlakita?

*Se tlakatl non okimpiaya miakeh espíritus amokualteh
(Mt. 8:28-34; Mr. 5:1-20)*

²⁶ Yewah okalakitoh kan tlali de Gadara, non kajki ik nepa lado n lago, iyakapa n Galilea. ²⁷ Ijkuak Jesús owaltemok de kan barka, se tlakatl de non altepetl owalmijkuani inawak. Nin tlakatl yowejka okimpiaya espíritus amokualteh. Amo omotlakentiaya nion ochanchitoka itech kali, yej san intsalko miketékochteh. ²⁸ Ijkuak nin tlakatl okitak n Jesús, omotlankuáketski iyakapa iwa opé tsajtsi:

—¿Tlan tikneki nowa, Jesús, Ikone n Totajtsi Dios non weyijkatitok? Nimitstlatlaujtia amo techtlaijyowiltsi.

²⁹ Ijkó okijto porke Jesús okinawatijtoka n amokuali espíritu makisa de ijtki non tlakatl. Miak welta n espíritu amokuali yokimoaxkatijka non tlakatl, iwa n tlakatl okimaijilpiyah iwa okikxijilpiyah ika kadenajteh para amo macholo, pero ye okinkojkotonaya iwa n espíritu amokuali okichololtiaya kan amaka chanti. ³⁰ Jesús okitlajtlani:

—¿Tlan timotoka?

Otlanankili:

—Miaktikeh.

Ijkó okijto porke miaktikeh espíritus amokualteh okatkah ijtki. ³¹ Iwa nonteh espíritus amokualteh okitlatlaujtayah n Jesús amo makintitlani miktla. ³² Ik ompa otlakuajtinemiah miakeh pitsomeh, iwa n espíritus amokualteh okitlajtlanilijkeh n Jesús makinkawili makalakikah inmijtik; iwa Jesús okinkawili. ³³ Ijkuakó n espíritus amokualteh okikakajtekeh n tlakatl iwa okakalakitoh inmijtik n pitsomeh, iwa nochteh nonteh pitsomeh okistewakeh iwa onmokajkawatoh ijtki atl iwa omijmikeh.

³⁴ Ijkuak n tlakah non okinmokuitlawijtokah n pitsomeh okitakeh tlan otlamochi, omotlelojkeh otetlapowitoh itech altepetl iwa ik tetlala. ³⁵ Iwa miakeh tlakah oyajkeh okitatoh tlan otlamochi. Iwa ijkuak okalakitoh kan Jesús, okitakeh n tlakatl non itech okiskeh n espíritus amokualteh. Ye yoewatoka ikxitla n Jesús, yokonakijtoka itlake, porke yotlalnamik, iwa nochteh omaujkeh. ³⁶ Iwa akimeh okitakeh, okintlapowijkeh oksikimeh keniji opajtik n tlakatl non okimpiaya espíritus amokualteh. ³⁷ Ijkuakó, nochteh n tlakah de Gadara opé kitlatlaujtiah n Jesús mawia de ompa, ken satlawel omawiah. Yika Jesús otlejkok itech barka iwa oyá. ³⁸ N tlakatl non itech okiskeh n espíritus amokualteh okitlatlaujti n Jesús makiwika, pero Jesús okinawati mamokawa iwa okili:

³⁹ —Ximokopa mocha, iwa xiktetlapowi nochti tlan Dios okichi mowa.

N tlakatl oyá, iwa otetlapowi nochti tlan Jesús okichi íwa.

*Ichpoch n Jairo iwa n siwatl non okitempantelko itlake n Jesús
(Mt. 9:18-26; Mr. 5:21-43)*

⁴⁰ Ijkuak Jesús omokopato, miakeh tlakah okiselijkeh ika pakílistli, porke nochteh sa okichixtokah. ⁴¹ Ijkuakó oajsiko se tlayákanki de n sinagoga non itoka Jairo. Ye omotlankuáketski iyakapa n Jesús iwa okitlatlaujti mawia icha, ⁴² porke sanwel se itakotsi okipiaya iwa yomiktoka, iwa sikin okipiaya májtlaktli iwa ome xiwitl. Ijkuak Jesús yoyaya icha n Jairo, miakeh tlakah okikuitlapantokakeh iwa sa okipajpatsoayah.

⁴³ Iwa intlajkotiah n tlakah noiva oyaya se siwatl non yokipiaya májtlaktli iwa ome xiwitl ika esmilawálistli, iwa amaka oweletia okipajtiaya. ⁴⁴ N siwatl omijkuanijtia ikuitlapa n Jesús iwa okitempantelkoli itlake, iwa san nima iesmilawalis omóketski.

⁴⁵ Ijkuakó Jesús otlájtlanki:

—¿Akin onechtelko?

Kemi nochteh okijtoayah amo okimatiah akin okitelkoja, Pedro okijto:

—Tlamachti, nochteh n tlakah mitspajpatsojtiwitseh iwa mitstojojpejtiwitseh, iwa Te titlajtlani: “¿Akin onechtelko?”

⁴⁶ Pero Jesús okijto:

—Aka onechtelko, porke onikmachili notech okiski nochikawalis.

⁴⁷ Ijkuak n siwatl okitak Jesús yokimatis akin okitelkojka, bibiokatiwits omotlankuáketsato iyakapa. Iwa inmixpah nochteh n tlakah okimokuiti tleka okitlakentelko n Jesús iwa keniji san totokatijkak owalpajtik. ⁴⁸ Ijkuakó Jesús okili n siwatl:

—Nokone, axa yotipajtik porke otitlaneltokak. Xio ika pakílistli.

⁴⁹ Jesús ok otlajtojtoka ijkuak okalakiko se itlakewal n Jairo non okiliko:

—Motakotsi yomikki, ayakmó xiktekimaka n Tlamachti.

⁵⁰ Pero ijkuak Jesús okikak tlan okiliko n tlakatl, okili n Jairo:

—Amo ximawi, te xitlaneltoka, iwa motakotsi pajitis.

⁵¹ Ijkuak Jesús okalakito icha n Jairo. Amo okitekawili makalakikah oksikimeh, sanwel Pedro, Jacobo, Juan iwa itajwah n takotsi. ⁵² Nochteh omoyolkokojtokah iwa okichokilijtokah n takotsi. Pero Jesús okinmili:

—Amo xichokakah; n takotsi mach omikki, sanwel kochi.

⁵³ Pero n tetlajpalojkeh san okiwetskakeh n Jesús porke okimatokah n takotsi yomikki.

⁵⁴ Ijkuakó Jesús okimakitski n takotsi iwa okili:

—Takotsi, ximewa.

⁵⁵ N takotsi omoyoliti iwa owalme; iwa n Jesús otlanawati makitlakualtikah. ⁵⁶ Itajwah n takotsi san omotlajtlachialtijkeh. Pero Jesús okinnawati amaka makilikah tlan otlamochijka.

9

Jesús kintitlani itlamachtijkawah

(Mt. 10:5-15; Mr. 6:7-13)

¹ Jesús okinmoololo májtlakteh iwa ome itlamachtijkawah iwa okimmák weletílistli iwa tlanawatlistli para makinkixtikah n espíritus amokualteh iwa makimpajtikah kokoxkeh.

² Satepa okintítlanki makitematiltiti itlajtol Dios, iwa makinpajtikah kokoxkeh. ³ Iwa okinmili:

—Amitla xikwikakah kan ik nonyaskeh, nion nomobasto, nion nomomantajkostal, nion nomotlaxkal, nion nomotomi, sanwel se nomotlakeh. ⁴ Ijkuak nonkalakitiweh itech se kali, ompa ximokalotikah asta ijkuak non kisaskeh de non altepetl. ⁵ Iwa kan amo nomechseliskeh, xikisakah de ompa iwa ximoikxitsejtselokah para makinteilikah por amo nomechseliskeh.

⁶ Ijkó kiné, itlamachtijkawah n Jesús otetlapowijtinemiah n kualitlajtoli itech nochteh n altepemeh, iwa okimpajtiayah kokoxkeh.

Herodes okikak tlan kichiwa Jesús

(Mt. 14:1-12; Mr. 6:14-29)

⁷ N rey Herodes Antipas Primero okima nochí tlan Jesús okichiwaya; iwa amo okimatis tlan kimolis, porke sikimeh okijoayah Juan Bautista omoyolitija. ⁸ Oksikimeh okijoayah Elías n profeta akin oksepa yomonextiko, iwa oksikimeh okijoayah chamo yomoyoliti se improfeta totatawah. ⁹ Pero Herodes okijo:

—Ne nonewia onitlanawati makikechtsontekikah n Juan. ¿Akin yetos non tlakatl non satlawel kitenevah?

Iwa Herodes okitemoliaya keniji kixmatis.

Jesús kintlakualtia mákuili mil tlakah

(Mt. 14:13-21; Mr. 6:30-44; Jn. 6:1-14)

¹⁰ Ijkuak n májtlakteh iwa ome tlatematiltijkeh omokopatoh, okitlapowijkeh n Jesús tlan okichijkeh, iwa oyajkeh kan amaka kinkuejsoska, amo wejka de Betsaida. ¹¹ Pero ijkuak n tlakah okimatkeh kan okatka n Jesús, okajsitoh, iwa Ye okinseli iwa okintlapowi keniji Dios tlanawatia iwa okimpajti n kokoxkeh.

¹² Ijkuak yotlejtlepuyawatoka, n májtlaktli iwa n ome tlatematiltijkeh onmopachojkeh inawak Jesús iwa okilijkeh:

—Xikintitlani n tlakah mamosewitih, mawiah itech altepemeh noso tetlala makimote-molitih tlan kimomajsewiskeh, porke nika amitla onka.

¹³ Pero Jesús okinmili:

—Nomejwah xikintlakualtikah.

Yejwah okilijkeh:

—Sanwel tikimpiah mákuili pameh iwa ome michimeh. Axa, tla mokoati itla tlákuali, tikintlakualtiskeh.

¹⁴ Ompa okatkah kemi mákuili mil tlakah. Pero Jesús okinmili itlamachtijkawah:

—Xikinmilakah mamoololokah iwa mamotlajtlalikah de tlatlajko siento.

¹⁵ Ijkó okichijkéh itlamachtijkawah, iwa nochteh omotlajtlalikéh. ¹⁶ Ijkuakó Jesús okinmónanki n mákuili pameh iwan ome michimeh. Oajkotláchixki ilwikak iwa omotlasojkama inawak Totajtsi Dios, sanima okintlajtlápanki n pameh iwa okinmáktilli itlamachtijkawah makinxejxelilikah nochteh n tlakah. ¹⁷ Nochteh otakuajkeh iwa kuali oixwikeh. Satepa itlamachtijkawah okoololojkeh n paj tlatlapánali tlan omoka, iwa okintemítijkeh májtlaktli iwa ome chikimeh.

Pedro kijtoa Jesús Ye n Cristo

(Mt. 16:13-19; Mr. 8:27-29)

¹⁸ Se tonati ijkuak Jesús omotrotsajtsilitoka iselti, itlamachtijkawah okalakito kan Ye. Jesús okintlajtlani:

—¿Akin Ne? ¿Tlan kimoliah n tlakah?

¹⁹ Yejwah okinankilijkeh:

—Sikimeh kijtoah Tejwatsi ti Juan Bautista, oksikimeh kijtoah Tejwatsi ti Elías, iwa oksikimeh kijtoah Tejwatsi tiprofeta non ya wejkawitl omikki iwa axa omoyoliti.

²⁰ Ijkuakó, Jesús okintlajtlani:

—Iwa nomejwah, ¿tlan nonkimoliah?

Pedro okili:

—Tejwatsi Ti Cristo Akin Dios okwaltítlanki.

²¹ Pero Jesús okinnawati amaka makimatiltikah.

Jesús kinmilia kenomi mikkis

(Mt. 16:20-28; Mr. 8:30-9:1)

²² Jesús noíwa okinmili itlamachtijkawah:

—Ne Non onimochi ni tlakatl moneki nitlaijyowis, iwa nechtlawelitaskeh n tetajmeh non tlayakantokeh kan Weyi Tiopa, iwa n tiopixkeh non tlayakantokeh, iwa non kitemachtiah n tlanawatílistli, nechmiktiskeh. Pero ipan eyi tonati nimoyolitis.

²³ Satepa nochteh okinmili:

—Tla aka kineki yetos notlamachtijkau, ayakmó makichiwa san tlan ye kineki, yej moneki nochipa manechtlakita, maya makitlaijyowiltikah n tlakah. ²⁴ Akin kinekis kimakixtis iyolilis kixpolos, pero akin kixpolos iyolilis por nechtematiltia, kimakixtis.

²⁵ Porke, ¿tlan ipati tla se tlakatl kimotlanilia nochí n tlaltípkaktli pero ye moixpoloano noso yawi miktla? ²⁶ De milajka nomechilia, tla aka pinawa nonawak iwa kipinawilia notlajtol, noíwa Ne Non onimochi ni tlakatl nikmopinawilis ijkuak niwits kemi Rey, ika iweyijkachiwalis Notajtsi iwan iángelwah. ²⁷ De milajka nomechilia sikimeh non nika kateh amo mikiskeh tlamo achto kitaskeh Dios matlanawati.

Ixko Jesús otsótlanki

(Mt. 17:1-8; Mr. 9:2-8)

²⁸ Kemi chikweyi tonati satepa, Jesús oyá kan se tepetl omotrotsajtsilito iwa okiwík n Pedro, Jacobo iwa n Juan. ²⁹ Iwa ijkuak Jesús omotrotsajtsilitoka, okipatlak ixko iwa itlakéh oistaktiak iwa otsotlania. ³⁰ Ijkuakó owalmonextíjkeh ome tlakah non omotlapowijtokah iwan Jesús. Yejwah okatkah Moisés iwa Elías. ³¹ Iwa okinyawalojtoka se tlawilnextílistli, iwa okiliayah n Jesús keniki kimiktiskiah kan altepetl de Jerusalén.

³² Pedro iwan oksikimeh satlawel okochmikiah, pero ijkuak owaltlajtlachixkeh, okitakeh iweyijkachiwalis Jesús iwan ome tlakah non okatkah íwa. ³³ Ijkuak nekateh tlakah yokikakajtewayah n Jesús, Pedro okili:

—Tlamachti, ¡Sa kuali nika tikateh! Matikinchijchiwakah eyi akákalteh, se moaxka, se iaxka Moisés iwa ok se iaxka Elías.

Pedro mach okimatia tlan okijtoaya. ³⁴ Ijkuak Pedro ok otlajtojtoka, se mextli owaltemok iwa okinkemelo, iwa satlawel omomojtijkeh. ³⁵ Ijkuakó itech mextli owalmokak se tlájtoli non okijtoaya:

—Ye ni Nokone non saikpanoa niktlasojtlá: xikkakikah tlan Ye nomechilis.

³⁶ Ijkuak n tlájtoli san owalmoka, okitakeh n Jesús sa iselti. Yejwah san otlamatokah, iwa amaka okilijkeh tlan okitakeh asta satepa.

Jesús kipajtia se télpochtli non okipiaya se espíritu amokuali

(Mt. 17:14-21; Mr. 9:14-29)

³⁷ Ijkuak owalmostlatik Jesús iwa itlamachtijkawah otemokeh de kan tepetl, iwa miakeh tlakah okinamikitoh n Jesús. ³⁸ Ijkuakó se tlakatl non ovalaya intlajko n tlakah, okualtsajtsili n Jesús:

—Tlamachti, nimitstlatlaujtia xikonitaki nopiltsi, porke sanwel ye nikpia. ³⁹ Se espíritu amokuali kimoaxkatia iwa kitsajtsitia; kitoktia mamimiki iwa kitoktia makikixti posoktli itech ikamak. Semi kitlaijyowiltia iwa owi kikajkawa. ⁴⁰ Yonikintlatlaujti motlamachtijkawah makikixtilikah n espíritu amokuali, pero mach oweletkeh.

⁴¹ Jesús okijto:

—¡Satlawel amo nonteneltokakeh iwa nontlajtlakolchijkeh! ¿Asta kemanía moneki maniyeto nomowah iwa manomechxikojto? Techalikili nika mopiltsi.

⁴² Pero ijkuak n télpochtli yomijkuanijtaya inawak Jesús, n espíritu amokuali okitlalwitek iwa opé kitsejtseloa. Ijkuakó n Jesús okitlawelajwak n espíritu amokuali, okipajti n télpochtli iwa okimaktli ita. ⁴³ Iwa nochteh omotlajtlachialtijkeh ika iweletilis n Totajtsi Dios.

Oksepa Jesús kinmilia kenomi milkis

(Mt. 17:22-23; Mr. 9:30-32)

Ijkuak nochteh omosentlajtlachialtijtokah, Jesús okinmili itlamachtijkawah:

⁴⁴ —Kuali xikkakikah tlan nomechilis: Ne Non onimochi ni tlakatl nechtemakaskeh inmak n tlaltikpaktlakah.

⁴⁵ Pero itlamachtijkawah mach okajsikamatiah tlan okimiliaya porke ayamó ovalajsia n tonati para makajsikamatikah, iwa omawiah kitlajtlaniskeh tlan kijtosneki tlan okimilika.

Jesús kinmilia akin okachi weyijkatitok kan Dios tlanawatijtok

(Mt. 18:1-5; Mr. 9:33-37)

⁴⁶ Ijkuakó itlamachtijkawah n Jesús opé motlatlajtolkopah, okinekiah kimatiskeh akin okachi weyijkatitok, ⁴⁷ pero Jesús yokimati tlan omokuatlapowijtokah itlamachtijkawah. Ijkuakó okimonapalolti se chokotsi iwa okontlali inakastla ⁴⁸ iwa okinmili:

—Akin kiselia se chokotsi itech Notoka, Ne nechsilia, iwa akin Ne nechsilia, noíwa kiselia akin onechaltítlanki. Porke akin Amitla ipati nomonawak, ye akin okachi weyixtos.

Akin kajki towah amo techixnamiki

(Mr. 9:38-40)

⁴⁹ Ijkuakó Juan okili:

—Tlamachti, otiktakeh se tlakatl akin okinkixtiaya espíritus amokualteh itech Motoka. Pero tejwah otiknawatijkeh ayakmó ijkó makichiwa, porke amo nemi towah.

⁵⁰ Pero Jesús okinmili:

—Amo xiktlakawaltikah, porke akin amo techixnamiki, kajki towah.

Jesús kinmajwa n Jacobo iwa n Juan

⁵¹ Yowalajsia n tonati ijkuak Jesús tlejkoskia ilwikak. Omoyolchika iwa okónanki ottli para Jerusalén. ⁵² Jesús okintlayakanalti ome itlamachtijkawah kan se altepetl de Samaria makitemolitih kan mokalotis. ⁵³ Pero n tlakah de Samaria amo okinekeh

okiselijkeh, porke okimatkeh Jesús oyaya Jerusalén. ⁵⁴ Ijkuak itlamachtijkawah Jacobo iwa n Juan, okitakeh amo okinekiah kinseliskeh, okilijkeh n Jesús:

—Tejwatsi, ¿tikneki matitlanawatikah mawetsi tletl de ilwikak para makimpojpolo, ijkó kemi okichi n profeta Elías?

⁵⁵ Jesús okonimitak, okinmajwak iwa okinmili:

—Nomejwah mach nonkimatih tlan espíritu nomotech kajki. ⁵⁶ Porke Ne Non onimochi ni tlakatl amo oniwala para nikimpojpolos n tlaltikpaktlakah, yej oniwala para ninkinmakixtis.

Akimeh okinekiah kitlakitaskeh n Jesús

(Mt. 8:18-22)

⁵⁷ Ijkuak oyayah itech ojtli, se tlakatl okili n Jesús:

—Noteko, nikneki nias mowa san kanik timuikas.

⁵⁸ Jesús okili:

—N ostomeh kipiah kan motlaatiskeh, iwa n totomeh kipiah intepajsol. Pero Ne Non onimochi ni tlakatl mach nikpia kan nimoseewis.

⁵⁹ Jesús okili ok se tlakatl:

—Xiwiki nowa.

N tlakatl okili:

—Noteko, achto techonkawili maniktookati nota.

⁶⁰ Jesús okinankili:

—Xikinkawa akimeh ok miktokeh makintookatih akimeh yomikkeh, pero te, xitetlapowi kenomi Dios tlanawatia.

⁶¹ Ijkuakó ok se tlakatl okili n Jesús:

—Noteko, ne nikneki nias mowah, pero achto techonkawili manimomakawati íwan nochanejkawah.

⁶² Pero Jesús okili:

—Akin kitlalia ima itech arado iwa ontlachia ik ikuitlapa, ye mach weletis kalakis kan tlanawatia Totajtsi Dios.

10

Jesús kintitlani eyi póali iwan májtlaktli iwa ome itlamachtijkawah

¹ Satepa Jesús okimpéjpenki eyi póali iwa n májtlaktli iwa ome (72) itlamachtijkawah, iwa ojomeh okintítlanki sa matlayakanakah itech nochteh n altepemeh kanik Ye panoskia. ² Iwa okinmili:

—Onkateh miakeh akimeh moneki makalakikah kan Totajtsi tlanawatia, pero amo miakeh akimeh kitematiltiskeh nin kualtlájtoli. Yika, xiktlajtlanilikah Totajtsi Dios mak-intitlani oksikimeh tekitkeh para makitematiltiki nin kualitlájtoli.* ³ Xiwiah nomejwah, Ne nomechtitlani kemi nonmichkatsitsinteh intlajko kokoyomeh. ⁴ Amo xikwikakah nomomantajkostal nion nomotomi, nion nomokakkuah; iwa amo ximoketsakah itech ojtli san para aka nonkitlajpaloskeh. ⁵ Ijkuak nonkalakitiweh itech se kali, achto xitetlajpalokah iwa xikijtokah: “Xiyolseutokah.” ⁶ Tla ompa chantitok se kuali tlakatl, nomoyolsewilis mokawas íwa. Pero tla amaka kiselia nomoyolsewilis, oksepa mokopas nomowah. ⁷ Ximokawakah itech se kali, iwa xikmomasewikah iwa xikonikah tlan nomechmakaskeh, porke akin tekiti kiselia itlaxtlawil, iwa amo san xipapanotinemikah.

⁸ Ijkuak nonkalakitiweh itech se altepetl iwa nomechseliah, xikmomajsewikah san tlan nomechmakaskeh. ⁹ Xikimpajtikah n kokoxkeh non ompa nonkinmajsitiweh, iwa xik-inmilikah: “Yoajsiko n tonati ijkuak Dios pewas tlanawatis.” ¹⁰ Pero tla nonkalakitiweh itech se altepetl iwa amo nomechseliah, xiwiah itech ojtli iwa xikijtokah: ¹¹ “Nochi n póktlali de nomoaltepeu non omoka itech tokakuah, tiktsejtseloah nomoyakapah para xikmatikah mach kuali tlan nonkichijtokeh. Pero kuali xikmatikah ya walarsi n tonati para Dios pewas tlanawatis nomonawak.” ¹² Ne nomechilia, itech neká tonati ijkuak Dios

* 10:2 N griego kijtoa: Onka miak tlakilo, pero n tekitkeh amo miakeh. Yika, xiktlajtlanilikah Dios makualintitlani tekitkeh matlaoololokih.

tlayektlalis, n tlakah de non altepetl kiseliskeh okachi tlaijyowílistli ke non okiselijkeh n tlakah de Sodoma.

Jesús kinnonotsa n tlakah non amo tetlakitah

(Mt. 11:20-24)

¹³ '¡Miálmasteh tlakah de n altepetl de Corazín!

¡Miálmasteh tlakah de Betsaida! Porke tla itech altepemeh de Tiro iwa Sidón mochiwaskiah n milagros non yomochijkeh nomoixpa, n tlakah de ompa yowejka kitlakitaskiah Dios. Iwa kinmokentiskiah intlakenwah tlilikeh iwa wajwapawakeh. Iwa yejwah kimotlaliliskiah tlekónextli ipan intsonteko. ¹⁴ Yika, itech neká tonati ijkuak Dios tlayektlalis, nomejwah nonkiseliskeh okachi weyi tlaijyowílistli ke non okiselijkeh n tlakah de Tiro iwa Sidón. ¹⁵ Iwa nomejwah tlakah de Capernaúm, ¿nonkiyejyekolah nomechajkokuiskeh ilwikak? ¡Amó!, yej nomechonkajkawaskeh miktla.

¹⁶ 'Akin nomechkaki nomejwah, Ne nechkaki, iwa akin nomechtlawelita, Ne necht-lawelita, iwa akin Ne nechtlawelita noiva kitlawelita Akin onechaltítlanki.

Walmokopah n eyi póali iwa n májtlakteh iwa ome itlamachtijkawah

¹⁷ N eyi póali iwa n májtlaktli iwa n ome itlamachtijkawah omokopatoh ika miak pakílistli iwa okijoayah:

—Tejwatsi, asta n espíritus amokualteh techtlakitah ijkuak tiktenewah Motoka.

¹⁸ Jesús okinmili:

—Milák, Ne onikitak keniji n diablo owetsiko de ilwikak kemi ijkuak tlapejpetlani.

¹⁹ ¡Techkakikah! Ne yonomechmák weletílistli para nonkintlajtlaksaskeh koameh iwa kolomeh, iwa nonmakisaskeh imak iweletilis n diablo, iwa mach ok itla nomechtoktis.

²⁰ Pero amo xipakikah porke nomechtlatitah n espíritus amokualteh, yej xipakikah porke nomotokah ya ijkuitilitok ilwikak.

Jesús yolpaki

(Mt. 11:25-27; 13:16-17)

²¹ Itech non ora, n Espíritu Santo okiyolpakti n Jesús, iwa okijo:

—Notajtsi nimitsweyijkachiwa, Toteko de ilwikak iwan tlaltíkpak, porke otikinmasikamatilti akimeh amitla kimatih iwa amo akimeh kimoliah ixtlamatih. Nimotlasojkamati Notajtsi, porke Tejwatsi ijkó otkmonekilti.

²² 'Notajtsi yonechmactili nochí tlan onka. Amaka kímati Akin Tekone, sanwel Notajtsi. Iwa amaka kímati Akin Notajtsi, sanwel n Tekone kímati iwa akimeh Ye kinekis kinmixmatiltis.

²³ Ijkuakó Jesús okintlajtlatak itlamachtijkawah iwa okinmili:

—¡Xipakikah nomejwah porke weletih nonkitah ika nomoixtololowah tlan axa panotok! ²⁴ Ne nomechilia miakeh profetas iwa wejweyi tlanawatijkeh okinekiah kitaskeh tlan nomejwah axa nonkitah, iwa mach okitakeh; okinekiah kikakiskeh tlan nomejwah axa nonkikakih, iwa mach okikakeh.

N kuali tlakatl samaritano

²⁵ Ijkuakó se non kitemachtia n tlanawatílistli okinek kiyejyekos n Jesús iwa okitlajtlaní:

—Tlamachti, ¿tlan moneki manikchiwa iwa ijkó niyolitos nochipa kan ilwikak?

²⁶ Jesús okinankili:

—¿Tlan ijkuitilitok itech n tlanawatílistli? ¿Keniji tikkajsikamati?

²⁷ N tlamachti okinankili:

—“Xiktlasojtla Motajtsi Dios ika nochí moyolo,

ika nochí moalma,

ika nochí mochikawalis

iwa ika nochí motlalnamikilis,

iwa xiktlasojtla se tokni kemi te timotlasojtla.”

²⁸ Ijkuakó Jesús okili:

—Kuali otitlanankili. Tla ijkó tikchiwas, tiyolitos nochipa kan ilwikak.

²⁹ Pero n tlamachti okinekia mokawas kuali teixpa, iwa oksepa okitlajtlani n Jesús:

—¿Akin nokni?

³⁰ Ijkuakó Jesús okinankili:

—Se tlakatl owaltemoaya de Jerusalén para Jericó, iwa itech ojtli okitlachtekijkeh, iwa asta itlake okikixtilijkeh. Okitekilmakakeh iwa okiwijwilantewakeh.

³¹ 'Satepa, se tiópixki opajpanotiaya itech non ojtli, iwa ijkuak okitak n tlakatl non ompa owlantoka, san okipanawi. ³² Noiwa ik ompa opajpanotiaya se levita, iwa ijkuak okitak non owlantoka noiwa san okipanawi. ³³ Pero se tlakatl de altepetl de Samaria akin noiwa opajpanotiaya itech non ojtli, ijkuak okitak n tlakatl non owlantoka okiknoma.

³⁴ Ijkuakó omikuani inawak n kókoxki, iwa opé kipajtia ika chiawak iwa ika oktli kan okikojkojka, iwa okikekemelo ika tsótsoli. Otlanki okitlejkolti itech iburro, okiwík kan tekalotiah iwa ompa okimokuitlawi. ³⁵ Ipan ok se tonati, ijkuak n samaritano yoonewaya, okinkixti ome denariojtomimeh iwa okinmaktili n tekowa itech kali kan mokalotiah, iwa okili: “Xikmokuitlawi nin tlakatl, iwa tla monekis itla okachi, nimitstlaxtlawilijtejkos ijkuak nimokopati.” ³⁶ Axa, techili ¿katlie de ninteh eyi tlakah omochi ikni n tlakatl non okitlachtekijkeh?

³⁷ N tlamachti okili:

—Akin oteiknoma.

Jesús okili:

—Te noiwa ijkó xikchiwa.

Jesús okintlajpaloto n Marta iwa n María

³⁸ Jesús iwa itlamachtijkawah onejnenkeh okachi tlayakapa, iwa okalakitoh kan se altepetsintli. Ompa, se siwatl non itoka Marta okiseli n Jesús itech icha. ³⁹ Marta okipiaya se iwelti non itoka María akin omotlaliko ikxitla n Jesús para kikakis itlajtol. ⁴⁰ Pero Marta okachi okitekipachoaaya iteki, omikuani inawak Jesús iwa okili:

—Noteko, ¿amo techita nimotekimiktijtok iwa nowelti amo nechpalewia? Xikili manechpalewi.

⁴¹ Pero Jesús okinankili:

—Marta, Marta, mitstekipachoa moteki iwa timotekimiktia, ⁴² pero sanwel onka itla tlan okachi ipati. María yokipéjpenki, iwa amaka weletis kikixtilis.

11

Jesús tlamachtia kenomi se weletis motiotsajtsilis

(Mt. 6:9-15; 7:7-11)

¹ Se tonati Jesús omotiotsajtsilitoka, iwa ijkuak otlanki omotiotsajtsili, se itlamachtijkau okili:

—Tewatsi, techmachti kenijke timotekimiktis, ijkó kemi Juan Bautista okinmachti itlamachtijkawah.

² Jesús okinmili:

—Ijkuak non motiotsajtsiliskeh, ijkí xikijtokah:

Totajtsi Dios non timuistikila ilwikak,
nochipa makiyektenewakah motoka.

Xiwalmuika xitlananawatiki.

Mamochiwa tlan Tejwatsi tikmonekiltia itech nin tlaltíkpaktli, ijkó kemi mochiwa kan ilwikak.

³ Techmaka nochí tonati tlan tikmomajsewiskeh.

⁴ Techintlapojpolwili totlajtlakolwah, ijkó kemi tejwah noiwa tikintlapojpolwiah akimeh techtuktiah tlan amokuali.

Iwa amo xiktekawili matechyoltilana tlan amokuali.

⁵ Jesús noiwa okinmili:

—Matikijtokah, se de nomejwah yawi ik tlajko yúak ichan se non íwa mowika iwa kilia: “Noknitsi, techintlaneti eyi pameh,⁶ porke se non iwa nimowika onechtlajpaloko, ye wejka wits iwa amo nikpia tlan nikmakas makimomajsewi.”⁷ Iwa neká tlakatl waltlanankilis ijtk icha: “Amo techkuejsolo, yoniktepacho nokalte iwa ne iwa n nopilwantsitsiwh yotimotejtekakeh. Ayakmó weletis itla nimitsmakati.”⁸ Ne nomechilia, n chane maya amo kinekiska mewas, mewas kimakati tlan kitlajtlanilijtok. Pero amo por iwa mowika, yej para ayakmó makikochkuejsolo.⁹ Yika, Ne nomechilia:

Xiktlajtlanilikah Dios, iwa Ye nomechmakas;
xiktemokah, iwa nonkajsiskeh;
xitlakakalatsakah, iwa nomechtlatlapoliskeh.
¹⁰ Porke akin kitlajtlani, kiselia;
iwa akin tlatemoa, tlaajsi;
iwa akin tlakakalatsa, kitlatlapolah.

¹¹ '¿Kox onka aka de nomejwah non mamixewi makimaka ichokotsi se koatl, ikuak ichokotsi kitlajtlanilia se michi? ¹² ¿Noso ikuak kitlajtlanilia se téksistli, makimaka se kolotl? ¹³ Nomejwah mach nonkualteh, iwa nonkinmakah tlan kuali nomopilwah, ¿amo nonkiyejyekolah Nomotajtsi non kajki ilwikak nomechmakas n Espíritu Santo tla nonkitlajtlaniliskeh?

*Kiteiliah n Jesús iweletilis walewatok de n diablo
(Mt. 12:22-30; Mr. 3:19-27)*

¹⁴ Jesú okikixtilijtoka se espíritu amokuali se tlakatl, non amo okikawiliaya matlajto, ikuak n espíritu amokuali okiski, n tlakatl owaltlajto. Nochteh n tlakah omotlajtachialtijkeh ikuak ijkí okitakeh,¹⁵ pero sikimeh okijtokeh:

—Nin tlakatl kinkixtia n espíritus amokualteh ika iweletilis n tlayákanki demonio non itoka beelzebú.

¹⁶ Oksikimeh okinekiah kiyeyekoskeh iwa okitlajtlaniliyah makinnextili se neskayotl de ilwikak. ¹⁷ Pero Jesú okimatia tlan omokuatlapowijtokah, yika okinmili:

—Nochteh n tekiwajkeh tla moxexeloah, san nima pojpoliwi; iwa ikuak moxexeloa itech se kali, san nima moixpoloa. ¹⁸ Ijkó noiva, tla satanás inewia moixnamiki, iwa iespíritus amokualteh, ¿kenikki wejkawas iweletilis? Ne ijkí nomechilia ken nomejwah nonkijtoah Ne nikinkixtia n espíritus amokualteh ika iweletilis n satanás; ¹⁹ pero tla milák yaskia kemi nonkijtoah, ¿akin kinmaka weletílistli nomotlatitlanilwah para makinkixtikah n espíritus amokualteh? Yika, innewiah kinxnextiah nomejwah nonkualapolojtokeh. ²⁰ Pero tla Ne nikinkixtia n espíritus amokualteh ika iweletilis Dios, noni kijtosneki Ye yotlanawatiko nomonawak.

²¹ Ikuak se tlakatl chikaktik kipixtok iespada iwa kimokuitlawijtok icha, nochi tlan kitlaatijtok amaka weletis kikixtilis. ²² Pero tla walkalaki ok se tlakatl okachi chikaktik ke ye iwa kitlanis, ikuakó kikixtilis iespada non ika omopalewiaya iwa kikixtilis nochi tlan iaxka.

²³ 'Akin amo kajki nowa, nechixnamiki, iwa akin amo nowa tlaoololoa, tlaxixinia.

*N espíritu amokuali non walmokopa
(Mt. 12:43-45)*

²⁴ Ikuak se espíritu amokuali kikajkawa se tlakatl, nemi kan amaka chanti kitemojtinemi kan moseewis. Pero ikuak amo kajsi, kimolia: “Nimokopas nocha, kan oníkiski.”

²⁵ Iwa ikuak non amokuali espíritu walmokopa, kualajsi n tlakatl kemi yaskia se kali non sokin okichpankeh iwa otlaajachijkeh. ²⁶ Ikuakó n espíritu amokuali yawi kinnotsatih chikome espíritus okachi amokualteh ke ye, iwa nochteh mochantiah ijtk non tlakatl, iwa non tlakatl mokopa okachi amokuali ke achto.

Akimeh kipiah milák yolkapílistli

²⁷ Ikuak Jesú otlaajtojtoka, se siwatl non ik ompa okatka, okijo chikawak:

—¡Miak yolkapílistli kipia n siwatl non omitspixki iwa omitschichiti!

²⁸ Pero Jesús okijo:

—¡Okachi kuali yolpakilisojkeh akimeh kikakih itlajtol Dios iwa kitlakitah!

Non amo kineltokah n Jesús kitlajtlaniliah se ixneskayotl

(Mt. 12:38-42; Mr. 8:12)

²⁹ N tlakah opé kiyawaloah n Jesús, iwa Ye opé kinmilia:

—N tlakah amokualteh de ninteh tonatijmeh nechtlajtlaniliah se milagro. Pero mach ok nikinmakas ok se, sanwel non yokinnextili n profeta Jonás. ³⁰ Porke ijkó kemi Jonás omochi kemi se neskayotl intech n tlakah de Nínive, ijkó noiya Ne Akin onimochiwako ni tlakatl nimochiwas kemi se neskayotl para n tlakah de ninteh tonatijmeh. ³¹ Itech neká iksemi tonati ikuak Ne nikintlajtlakoltis nochteh n tlakah, n reina de Sabá non walewatok ik tlatsintla majkokuis impah n tlakah de ninteh tonatijmeh iwa kintlajtlakoltis, porke ye wejka owalewak, okikakiko n Salomón non satlawel ixtlamati. Iwa non axa nika kajki, se Akin okachi weyijkatitok ke Salomón. ³² Noiya n tlakah de Nínive majkokuiskeh iwa nomechtljatlakoltiskeh. Porke n tlakah de Nínive omoyolkopkeh inawak Dios ikuak Jonás okinmatilti itlajtol, pero axa nika kajki se Akin okachi weyijkatitok ke Jonás.

Toixtololowah intlawilis tokuerpo

(Mt. 5:15; 6:22-23)

³³ 'Amaka kimilintia se tlawili iwa tlami kitlaatia itlampa se kajo, yej kitlalia tlakpak para makintlawili akimeh walkalakih itech kali. ³⁴ Nomoixtololowah kemi yaskiah tlawilteh itech nomokuerpo. Tla nomoixtololowah kualteh, noiya nochi nomokuerpo kipia tlawili, pero tla amo kualteh moixtololowah, nomokuerpo kajki itech tleyuálistli. ³⁵ Ximotlachili, amo kichiwa n tlawili non axa tikpixtok walmokopas tleyuálistli. ³⁶ Yika, tla nochi mokuerpo kipia tlawili, iwa amo kipia tleyuálistli, nochi weletis tikyekitas kemi ikuak se tlawili mitstlawilia.

Jesús kinteilia non kitemachtiah n tlanawatílistli iwa n fariseos

(Mt. 23:1-36; Mr. 12:38-40; Lc. 20:45-47)

³⁷ Ikuak Jesús otlanki otlajto, se fariseo okitlalwi matlakuati icha. Jesús oyajki icha n fariseo iwa omotlali kan mesa. ³⁸ N fariseo omotlajtlachialti ikuak okitak Jesús mach omomajteki kemi yejwah omomajtekiayah ikuak otlakuayah. ³⁹ Pero Toteko Jesús okili:

—Nomejwah fariseos, nonkicipawah san ixko n kaxitl iwan tlamana, pero ijtek nomoyolo nonkiwilitah nontlachtekiskeh iwa nonkichiwah tlan amo kuali.

⁴⁰ ¡Tsontewewemeh! Dios okichijchi tlan onka ik kala iwa tlan onka ik tlajtik. ⁴¹ Tla nonkinekiskeh nonyetoskeh nonchipawakeh, xikintlatliokolikah n próbesteh.

⁴² ¡Miálmasteh fariseos! Nomejwah nonkitemakah nomodiesmo de nomoyerbabuena, de nomoruda iwa de nochi tlan nonkitookah. Pero amo nonkichiwah tlan Dios kimonekiltia nion nontetlasojtlah ijkó kemi Ye tlanawatia. Nochi ni moneki xikchiwakah iwa amo xikkawakah tlan kuali ya nonkichijwitseh.

⁴³ ¡Miálmasteh nomejwah fariseos!, porke nonkiwilitah nonmotlaliskeh ijtek n sinagoga kan motlaliah non satlawel kintlakitah, iwa nonkiwilitah manomechyektlajpalokah teixpa.

⁴⁴ ¡Miálmasteh akimeh non kitemachtiah n tlanawatílistli iwa fariseos, íxkopeteh!, nomejwah kemi miketékochteh non amo motah, iwa n tlakah mach kimatih kox nomopah tlaksatokeh.

⁴⁵ Seme de non kitemachtia n tlanawatili okili n Jesús:

—Tlamachti, ika tlan tikijtoa, noiya tejwah techpijinatia.

⁴⁶ Pero Jesús okijo:

—¡Miálmasteh noiya nomejwah tlamachijkeh de nomotlanawatil!, porke nonkinmamtiliah n tlakah miakeh tlanawátilteh non mach kinxikoah, iwa nomejwah nion ika se nomomajpil nonkinekih nonkintelkoskeh.

⁴⁷ ¡Nonmiálmasteh!, porke nonkinyekchijchiwiliah inmiketekochwah n profetas, pero san innewiah nomotatawah okinmiktijkeh. ⁴⁸ Yika, ikuak nonkinyekchijchiwiliah

intekochwah nonkiteajsikamatiltiah nomejwah nonkiyekitah tlan okichijkeh nomotatawah, porke yejwah okinmiktijkeh n profetas.

⁴⁹ 'Yika, Dios kemi nochi kimati okijo: "Nikintitlanilis profetas iwa tlatematiltijkeh, iwa sikiméh de yejwah kinmiktiskeh iwa oksikiméh kintotojtokaskeh." ⁵⁰ Porke n tlakah de ninteh tonatijmeh impah wetsis n tlajtlácoli de inmikilis nochteh n profetas non okinmiktijkeh desde ipewaya n tlaltíkpaktli, ⁵¹ desde imikilis n Abel asta imikilis n Zacarías, akin okimiktijkeh ijtit n Weyi Tiopa, iyakapa n artal. Yika nomechilia Dios kintlaxtlawaltis desde imikilis Abel asta Zacarías.

⁵² '¡Miálmasteh de nomejwah tlamachtijkeh akimeh nonkixmatih nomotlanawatil! Porke amo nonkinkawiliah n tlakah makajsikamatikah tlan Dios technawatia, nion nomejwah mach nonkinekih nonkaksikamatiskeh. Nion amo nonkinkawiliah oksikiméh makajsikamatikah.

⁵³ Ijkuak Jesús okinmili ninteh tlájtolteh, non kitemachtiah n tlanawatílistli iwa n fariseos opé kualanil iwa san tlan okajsiah opé kitlatlajtlaniah. ⁵⁴ Yejwah san okiyejyekoayah porke okinekiah makijto itla tlan ika weletis kiteiliskeh.

12

Jesús kinmilia itlamachtijkawah mamotlachilikah de n fariseos íxkopteh

¹ Se tonati opé moololoah miaktikeh tlakah asta omopajpatsoayah, iwa Jesús opé kinmilia itlamachtijkawah:

—Ximotlachilikah de n fariseos íxkopteh. ² Porke nochi tlan nonkiichtakachiwaskeh momatis, iwa tla non kimoliah amaka kimatis, saman momatis. ³ Yika, nochi tlan ononkijtojkeh kan tleyua, momatis kan tlanestok, iwa nochi tlan ononkijtojkeh san ichtaka, saman momatis.

Akin moneki tikiimakajsiskeh

(Mt. 10:28-31)

⁴ 'Nokniwah non satlawel nomechtlaosjtla, amo xikinmawilikah akimeh weletis nomechmiktiskeh. Pero satepa ayakmitla weletis nomechtoktiskeh. ⁵ Ne nomechilis akin moneki tikiimakajsiskeh: xikiimakajsikah n Totajtsi Dios Akin satepa de kimiktia n kuerpo noiwa kipia weletílistli para kititlanis mikta. Ye xikiimakajsikah.

⁶ 'Monamakah mákuili tototsitsinteh san ika ome tomi. Pero maya ijkó, n Totajtsi Dios amo kinmilkawa nion seme de yejwah. ⁷ Iwa Dios kimatok kech tsónkali nonkipixtokeh itech nomotsontekoh. Yika amo ximawikah, porke nomejwah okachi miak nomopati ke n tototsitsinteh.

Akimeh amo pinawah tetlapowiskeh teixpa de itlajtol Cristo Jesús

(Mt. 10:32-33; 12:32; 10:19-20)

⁸ 'Ne nomechilia, akin teixpa kijtoa nechixmati, Ne noiwa nikijtos inmixpah iangelwah Dios ye noaxka. ⁹ Pero tla aka kijtos inmixpah n tlakah amo nechixmati, Ne noiwa nikijtos inmixpah iangelwah Dios amo nikixmati.

¹⁰ 'Iwa akin fiero tlajtos de Ne Non onimochi ni tlakatl, weletis kitlapojpolwiskeh. Pero akin fiero kiteneva n Espíritu Santo, mach kipias tlapojpolwlistli.

¹¹ 'Ijkuak nomechwikaskeh kan sinagogas, noso innawak tekiwajkeh noso innawak wejweyi tlanawatijkeh, amo manomechtekipacho tlan ika non mopalewiskeh noso kenomi non tlanankiliskeh. ¹² Porke ijkuak monekis xitlajtokah, n Espíritu Santo nomechilis tlan nonkijtoskeh.

Amo matechikajkayawa n tomi

¹³ Se tlakatl non ompa okatka okili n Jesús:

—Tlamachti, xikili nokni makixexelo tlan otechkajtewili tota.

¹⁴ Jesús okili:

—Tlakatl, ¿akin onechtlali kemi teyektlali noso tlaxejxelo nomonawak?

¹⁵ Noiwa okinmili:

—¡Kuali ximotlachilikah! Amo xikmokawilikah manomechyoltilana n tomi, porke n tlakatl amo kipia nemílistli san por kipia miak tomi.

¹⁶ Ijkuakó opé kinmilia nin tlapoálistli:

—Okatka se tlakatl non satlawel okipiaya tomi, iwa itlalwah saikpanoa otlatlakia.

¹⁷ Ijkuakó n tlakatl opé mokuatlaptopia: “¿Tlan nikchiwas? ¡Amo nikpia kan niklaatis tlan okitlakiltijeh notlalwah!” ¹⁸ Iwa okimoli: “Ya nikmatok tlan nikchiwas. Nikinxixinis kan oniklatiaya notliol iwa tlan noaxka, iwa nikinchijchiwas oksikimeh okachi wejweyi. Ompa niklaatis nochí tlan okitlakiltijeh notlalwah iwa nochí tlan nikpia. ¹⁹ Iwa nikilis noyolo: Noyolojtsi, ya tikpia miak tlan ika tipanotos miak xiwitl. Axa, sa ximosewi, xitlakua, xikoni, iwa xipaki.” ²⁰ Pero Dios okili: “¡Tlakatl, tsontewewe! Nin yúali timikkis, iwa nochí tlan tiktlaatijtok ¿akin kimokawis?” ²¹ Ijkó mochiwah n tlakah non koololoah miak tomi itech nin tlaltíkpaktli. Pero amitla kipiah ixpa n Dios.

Dios kinmokuitlawia iaxkawah

(Mt. 6:25-34)

²² Satepa Jesús okinmili itlamachtijkawah:

—Yika, Ne nomechilia: Amo manomechtekipacho tlan nonkimomajsewiskeh noso tlan ika nonyolitoskeh, nion tlan nonkimokentiskeh. ²³ Nomonemilis inawak Totajtsi Dios okachi ipati ke n tláku, iwa nomokuerpo okachi ipati ke n tlakemil. ²⁴ San xikinmitakah n kakalomeh, amo tookah nion pixkah, nion amo kipiah kan kitlaatiskeh intlakual; iwa maya ijkó, Dios kintlakualtia. ¿Amo okachi nomopati nomejwah ke n totomeh? ²⁵ ¿Tla aka de nomejwah satlawel motekipachoa, yolitos ok se tonati?* ²⁶ Tla nomejwah amo nonweletih nonkichiwas tlan amo owi, ¿tleka nomechtekipachoa oksiki tlan mach weletis nonkichiwaskeh?

²⁷ 'Xikimitakah keniji moskaltiah n liriojteh. Amo tekith nion tlajtsomah, pero Ne nomechilia nion n rey Salomón ika nochí iweyilis, omotlakenti kemi seme de ninteh xochimeh. ²⁸ Iwa tla Dios kitlakentia n xiwitl, non axa moskaltia tetlala iwa ok se tonati kichichinoah, amo okachi nomechyektlakentis maya amo nonteneltokakeh. ²⁹ Yika, amo manomechtekipachojtinemi tlan nonkimomajsewiskeh noso tlan nonkoniskeh. ³⁰ Porke n tlaltikpaktlah kitemojtinemih nochí ni, pero nomejwah nonkipiah Nomotajtsi iwa Ye ya kimatok nochí tlan nomechpoloa. ³¹ Okachi kuali xiktemokah matlanawati Dios itech nomoyolo, iwa Ye nomechmakas tlan nomechpoloa.

Jesús otemachti matiktemokah tlan milák ipati kan ilwikak

(Mt. 6:19-21)

³² 'Maya amo nonmiakeh amo ximawikah noichkawah, porke Nomotajtsi kimonekiltia nomechkawilis xikalakikah kan Ye tlanawatia. ³³ Xiknemakakah tlan nonkipiah, iwa xikimpalewikah akimeh kimpoloa. Xikinchijchiwah púxajteh non amayik tsomonih, xiktlaweloololokah kan ilwikak kan amitla kipia soliwi nion kipia tlami, kan amo onka ichtek nion n tlaxinachi tlaixpoloa. ³⁴ Porke kan yetos tlan nomoaxka, ompa yetos nomoyolo.

Jesús technajnawatia matijsatokah

³⁵ 'Ximotlatlalikah sa maxotlatokah nomotlawilwah. ³⁶ Xiyetokah kemi itekitwah se tlakatl non oyá kan monamiktilo iwa sa mochixtokeh para kitlatlapoliskeh iteko ijkuak waltlakakalatsas. ³⁷ Miak pakílistli kipiaskeh n tekitkeh ijkuak kualinmajsiki inteko kichijtokeh tlan okinnawatijtewak. Ne nomechilia inewia n tekowa pewas kintlateekilis mamotlamajsewikh. ³⁸ Maya mawalkalakiki n tekowa tlajko yuak, noso sa kualka, miak yolpáklisli kipiaskeh nonteh tekitkeh tla inteko kualinmajsiki ijsatokeh. ³⁹ Noiwa kuali xikmatikah, tla se chane kipatoskia kemanía kalakiki n tlachtek, ye ijsatoskia interojoýúali iwa amo kitekawiliskia makitlachtekikah. ⁴⁰ Nomejwah noiwa xiijsatokah, porke mach nonkimatih kemanía niwalkalakiki Ne Non onimochi ni tlakatl.

* 12:25 sikimeh tiotlajkuíolteh kipiah: ¿Akin de nomejwah okachi mowejkantia san por miak motekipachoa?

*N tetlakéwale tetlakitak iwa non amo tetlakitak
(Mt. 24:45-51)*

⁴¹ Ijkuakó Pedro okili:

—Noteko, ¿nin tlapoálistli otechkakiti san tejwah, noso tinochteh?

⁴² N Toteko okinankili:

—¿Kanin ka n tetlakéwale yekmilajka iwa tetlakitak, non iteko kinmaktilia itlakawah para makintlamaka ipan ora? ⁴³ Satlawel yolpasiliso n tetlakéwale akin iteko kajsiki kichijtok tlan okinawatijtewak. ⁴⁴ De milajka nomechilia, n tekowa kimaktilis makimokuitlawili nochi tlan iaxka. ⁴⁵ Pero tla non tetlakéwale kiyejyekolia iteko ok wejkawas kalakiki, iwa pewa kinwiteki n tekitkeh iwa pewa motlakaultia iwa motlawantia. ⁴⁶ Ijkuakó n tekowa walkalakiki ijkuak itékitki amo kichia, iwa chikawak kitlaijyowiltis kemi kintlaijyowiltiah non amo tetlakitakeh.

⁴⁷ 'N tetlakéwale non ya kimatok tlan kipaktia iteko pero amo motlatlalia nion kitlakita, saikpanoa kitsonwitekiskeh. ⁴⁸ Pero n tetlakéwale non amo kimatil tlan kipaktia iteko, iwa kichiwa tlan amokuali, amo miak kitlaijyowiltiskeh. Porke akin miak okimaktilkeh, miak kitlajtlaniliskeh. Iwa akin miak okiseli, okachi miak kitlajtlaniliskeh.

N tlakah moxexeloah por Cristo

(Mt. 10:34-36)

⁴⁹ 'Ne oniwala onikxotlaltiko tletl ipan nin tlaltípkaktli. ¡Saikpanoa niknekiskia ya maxotlato! ⁵⁰ Pero acharto moneki manimokuateki ika tlaijyowílistli iwa ¡satlawel nimotekipachojtinemi asta mamochiwa! ⁵¹ Amo xikyejyekolikah Ne onikualík yolsewílistli itech nin tlaltípkaktli. Amó, yej Ne nomechilia n tlaltípkaktlakah mokualaniskeh iwa moxexeloskeh porke Ne oniwala. ⁵² Axa ik tlayakapa itech se familia kan chantitoskeh mákuliteh, non eyi amo kinekiskeh mowikaskeh iwa non ome, iwa nonteh ome amo kinekiskeh mowikaskeh iwa nonteh eyi. ⁵³ N teta kixnamikis ipiltsi, iwa n tepiltsi kixnamikis ita. N tena kixnamikis ichpoch, iwa n teichpoch kixnamikis ina. N temona kixnamikis imo, iwa n montli kixnamikis imona.

Tlan technextiliah n tonatijmeh

(Mt. 16:1-4; Mr. 8:11-13)

⁵⁴ Jesús noiva okinmili n tlakah:

—Ijkuak nomejwah nonkitah pewa tlamixtemi kan ik kalaki tonati, niman nonkijtoah kiawis, iwa milák ijkó tlamoche. ⁵⁵ Iwa ijkuak n ejekatl walewa ik tlatsintla, nomejwah nonkijtoah: “Axa kualtsi tonas”, iwa ijkó tlamoche. ⁵⁶ ¡Íxkopeteh! Kenomi nonweletih nonkiyejyekolah kemanía kiawis noso kemanía tonas. ¡Tleka amo nonweletih nonkajamatih tlan tlamochejtok itech ninteh tonatijmeh?

Ximotlapojpolwi iwa non mitskokolia

(Mt. 5:25-26)

⁵⁷ ¡Tleka nomonewiah amo nonkiyejyekolah tlan kuali? ⁵⁸ Tla aka mitsteilia por otiktokti itla amo kuali, ximoyekkawa íwa, ijkuak ayamó mitsteixpantia inawak tekiwa, tlamo n tekiwa mitstemaktis inawak n alwasil para mamitsakua. ⁵⁹ De milajka nimitsilia, amo tikisas asta kelamo tiktlaxtlawas nochi tlan mitstlajtlaniliskeh.

13

Moneki se mamoyolkopa inawak Dios

¹ Itech nekateh tonatijmeh, sikimeh tlakah okitakoh n Jesús iwa okilijkeh Pilato okinmiki sikimeh tlakah de Galilea, iwa inmessó okinenelo ika inmessó n yolkameh non yejwah okinmiktijkeh para tlamanaskeh. ² Jesús okinmili:

—¿Nonkiyejyekolah nomejwah nonteh tlakah de Galilea ijkó omochijkeh porke okachi tlajtlakolejkeh ke n oksikimeh tlakah de Galilea? ³ Ne nomechilia amó; iwa tla nomejwah amo nonmoyolpatlah, noijkó nontlamitiweh. ⁴ ¡Noso nonkiyejyekolah

nekateh májtlaktli iwa n chikweyi tlakah non omijmikeh ijkuak impah owetsiko n wejkapa torre de Siloé, okachi tlajtlakolejkeh ke n oksikimeh non ochantitokah Jerusalén? ⁵ Ne nomechilia amó, iwa tla nomejwah amo nonmoyolpatlah inawak Dios, non nochteh ijkó nontlamitiweh.

N igoskuawitl non amo tlaki

⁶ Ijkuakó Jesús okinmili nin tlapoálistli:

—Se tlakatl okipiaya se igoskuawitl non ottoktoka itlajko iuvaskuauyo, iwa oyá okitlatemolito, pero amitla okajsik. ⁷ Ijkuakó okili iuvastékitki: “Techkaki, ika axa ya eyi xiwitl nikwaltlatemolia nin igoskuawitl iwa ayik nikajsi nion se igos. Xiktsonteki, ayakmó san matlatsakuilijo.” ⁸ Pero n uvastékitki okili: “Noteko, xikkawa sa nin xiwitl; niktlalkaxanis iwa nikkojtlalotis. ⁹ Chamo ijkó ya tlaakis. Pero tla amo tlaaki, ijkuakó niktsontekis.”

Jesús kipajtia se siwatl itech tonati pialoni

¹⁰ Se sábado ijkuak mosewia n judíos, Jesús otlamachtijtoka itech se sinagoga.*

¹¹ Noiwa ompa okatka se siwatl non yokiwikaya májtlaktli iwa n chikweyi xiwitl ika kokólistli. Se espíritu amokuali okikuitlapantompocho iwa mach oweletia omomilawaya. ¹² Ijkuak Jesús okitak okínotski iwa okili:

—Siwatl, yotimákiski de mokokolis.

¹³ Ijkuakó Jesús okintlali imawah ipan siwatl, iwa n siwatl san nima owalmomila iwa opé kiweyijkachiwa Dios. ¹⁴ Pero n tiópixki non okachi otlayakantoka okuálanki, porke Jesús okipajti non siwatl itech sábado, iwa okinmili non ompa okatkah:

—Onkateh chikwase tonatijmeh ijkuak weletis se tekitis; itech seme de nonteh tonatijmeh ximopajtikih, pero amo itech tonati ijkuak moneki matimosewikhah.

¹⁵ Ijkuakó Jesús okinankili:

—Íxkopteh!, ¿mach amo nonkintojtomah nomoyolkawah iwa nonkinmatlitiah malki mayeto sábado? ¹⁶ Nin siwatl non walewatok de Abraham, akin satanás okitlaijyowitztoka májtlaktli iwa n chikweyi xiwitl, ¿mach amo omonekia se makimakixti maya mayeto sábado?

¹⁷ Ijkuak Jesús ijkó okinmili, nochteh non okikokoliayah opinawakeh. Pero n oksikimeh opakiah ijkuak okitayah n wejweyi neskayolteh non Jesús okinchiwaya.

N xinatsintli de mostaza

(Mt. 13:31-32; Mr. 4:30-32)

¹⁸ Ijkuakó Jesús okijto:

—¿Tlan ika weletis nikiknitis kan Dios tlanawatia? ¹⁹ Nikchiwas ika se xinatsintli de mostaza non se tlakatl okitookak kan ilawerta, satlawel omoskalti iwa omotlamito se weyi kuawitl iwa n totomeh omotepajtsoltijkeh itech imamayowah.

N tlapoálistli de n levadura

(Mt. 13:33)

²⁰ Jesús noiwa okijto:

—¿Tlan ika weletis nikiknitis kan Dios tlanawatia? ²¹ Nochi ni kemi n levadura non se siwatl kineloa ika eyi tlatamachiwali arina. Iwa n levadura kisamawaltia nochi n textli.

N ojtli pitsawak

(Mt. 7:13-14, 21-23)

²² Ijkuak Jesús oyaya itech ojtli non onkisa Jerusalén, otlamachtijtiah itech nochteh altepemeh kan ik opapanotia. ²³ Iwa se tlakatl okitlajtlani:

—Toteko, ¿amo miakeh momakixtiskeh?

Jesús okinankili:

* 13:10 sinagoga: se kali kan omoololoayah n judíojeteh nochteh sábado.

²⁴ —Ximochijchikawah xikalakikah kan ik kaltentli tsopijtik, Ne nomechilia, miakeh kinekiskeh kalakiskeh pero amo weletiskeh. ²⁵ Porke ijkuak n chane mewas iwa kiwalt-sakuas n kaltentli, akimeh nonyetoskeh kala, nontlakakalatsaskeh iwa nonkijtoskeh: “Toteko, techtlatlpoli.” Pero Ye nomechnankilis: “Mach nikmati kan nonwalewah.” ²⁶ Ijkuakó nomejwah pews nonkijtoskeh: “Tejwah otitlakuajkeh iwa otikonikeh mowah, iwa otitemachtí itech toaltepeu.” ²⁷ Pero Ye nomechilis: “Mach amo yonomechili amo nikmati kan nonwalewah. Ximoachiwah tlajtlakolchiwanih.” ²⁸ Ompa nonchokaskeh iwa nomotlanwah nejnetsontoskeh ijkuak nonkitaskeh Abraham, Isaac, Jacob iwa nochteh n profetas kan Dios tlanawatijtok. Pero nomejwah nomechontlamotlaskeh kala. ²⁹ Porke witseh n tlakah de ik tlatsintla iwa de ik tlakpak, kan ik kisa tonati iwa kan ik kalaki tonati, moyayantiskeh iwa motlamajsewiskeh kan Dios tlanawatijtok. ³⁰ Non tonati, sikimeh non axa amitla impati, ijkuakó weyijkatitoskeh, iwa non axa weyijkatitokeh ijkuakó ayakmitla yetos impati.

Jesús kichokilia n Jerusalén

(Mt. 23:37-39)

³¹ Itech non tonati ovalajkeh sikimeh fariseos iwa okilijkeh n Jesús:

—Xio de nika, porke Herodes Antipas kineki mitsmiktis.

³² Pero Jesús okinnankili:

—Xiwiah iwa xikilikah non koyotl: “Xikkaki, axa iwa mostla nikinkixtis espíritus amokualteh iwa nikimpajtis kokoxkeh, iwa biktla niktlamis notezi.” ³³ Pero axa, mostla iwa biktla, moneki maniksentoka notezi, porke mach weletis se profeta mamiki oksika tla amo kan weyi altepetl de Jerusalén.

³⁴ ¡Jerusalén, Jerusalén, mopilwah kinmiktiah n profetas iwa kinmojmotlah ika tetl akimeh Dios kintitlani monawak! ¡Miak welta oniknek nikinmoololos mopilwah, kemi se siwapio kimoololoa ipiotsitsiwhitlampa iajaswah, pero mach okinekeh! ³⁵ Axa nomoweyitiopa mokawas sa iselti, iwa Ne nomechilia ayakmó nonnechitaskeh oksepa asta maajsiki n tonati ijkuak nonkijtoskeh: “Matiochito Akin okwaltítlanki Toteko Dios.”

14

Jesús kipajtia se tlakatl non oatétenki

¹ Itech se sábado ijkuak mosewia n judíos, Jesús oyá otlakuaato icha n se tlanawati fariseo. Iwa n oksikimeh fariseos sa okiitinemiah tlan kichiwas. ² Iwa iyakapa n Jesús okatka se tlakatl kókoxki non oatétenki. ³ Ijkuakó Jesús okintlajtlani n fariseos iwa non kitemachtiah n tlanawatílistli:

—¿Nomotlanawatil kitekawilia se matlapajti itech sábado, noso amó?

⁴ Yejwah mach otlanankilijkeh. Ijkuakó Jesús okonkitski n kókoxki, okipajti iwa okili mawia. ⁵ Otlanki Jesús okinmili n fariseos:

—Tla se nomoburrojtsi noso se nomotoro moposojwia, ¿amo nonkonkixtiah maya mayeto sábado?

⁶ Yejwah mach ok itla oweletkeh okinankilijkeh.

N tlatlálwilteh itech se monamiktilo

⁷ Ijkuak Jesús okimitak kenomi omotlapejpeniayah para motlaliskeh okachi tlayakapa n tlatlálwilteh itech se ilwitl, Ye okinmili ninteh tlajtolteh:

⁸ —Ijkuak aka mitsontlalwis xitlatlakuaati kan se monamiktilo, amo ximotlapejpeni kan timoyayantis, porke weletis wits ok se tlatlálwili okachi weyijkatitok; ⁹ ijkuakó akin omitstlalwi weletis mitsiliki: “Xonmíkuani, nika motlalis nin notlatlalwil.” Ijkuakó te tipinawas iwa tias timotlaliti asta tlakuitlapa. ¹⁰ Yika, ijkuak mitstlalwiskeh, ximotlaliti tlakuitlapa; ijkó mitsontlajpaloki akin omitstlalwi, iwa mitsilis: “Noknitsi, ximoyayantiti nepa tlayakapa.” Ijkuakó, nochteh akimeh mowah ewatoskeh, kuali tlajtoskeh de te.

¹¹ Pero akin inewia moweyilia, kipipinawiskeh; iwa akin moiknelia, kiweyijkatlaliskeh.

¹² Jesús noíwa okili n tlakatl non okitlalwi matlakuati icha:

—Ijkuak tiilwichiwas, amo xikintlalwi akimeh inwah timowika, noso mokniwah, noso non ken tikimita, noso non kitlawelpiah tomi; porke satepa yejwah noiva mitstlalwiskeh xitlatlakuaati, iwa ijkó momakopaskeh mowah. ¹³ Ijkuak tiilwichiwas xikintlalwi n próbesteh, n matepomeh, n koxomeh iwa non amo weleti tlachiah, ¹⁴ iwa tikpias miak pakílistli. Porke yejwah mach weletis momakopaskeh mowah, pero te tikpias motlaxtlawil neká iksemi tonati ijkuak moyolitiskeh n yekmilajkameh.

Se weyi yuaultlákuali

¹⁵ Ijkuak ijkó okikakeh, seme non ompa otlakuajtokah iwan Jesú, okili:

—¡Miak pakílistli kipias akin tlakuas kan Dios tlanawatijtok!

¹⁶ Jesú okili:

—Se tlakatl okichi miak tlákuali iwa otlanawati matetlalwitih matlakuakih icha. ¹⁷ Iwa ijkuak ya tlakuaskiah, okinawati se tetlakéwale makimiliti n tlatlálwilteh: “Xiwal-muikakah, porke nochti yotlaiksik.” ¹⁸ Pero nochteh opé motlapojpolwiah inawak. Se okijo: “Sikin onikko se tlali, iwa nio nikontati; nimitstlatlaujtia techontlapojpolwi.”

¹⁹ Ok se okijo: “Sikin onikinko mákuili noyuntajwah, iwa nio nikinyejyekoti, nimitstlatlaujtia techontlapojpolwi.” ²⁰ Iwa ok se okijo: “Sikin onimonamikti, iwa mach weletis nias.” ²¹ Ijkuak n tetlakéwale omokopato, okitlapowi iteko nochti tlan okilijkeh n tlatlálwilteh. Ijkuakó n tekowa tlawel okuálanki iwa okili itlakewal: “Xiajtiwetsi tiánkistli iwa itech ojmeh de nin altepetl, xikualinwika n próbesteh, n matepomeh, n koxomeh iwa non amo tlachiah.” ²² N tetlakéwale omokopato iwa okijo: “Noteko, yonikchi tlan otechnawati, iwa ok onka miak lojar.” ²³ Ijkuakó n tekowa okili itlakewal: “Xiajtiwetsi itech ojmeh, iwa nochteh non tikinnamiktias xikinchijchikawa makalakikah nocha para matemi nocha. ²⁴ Porke de milajka nomechilia, nion se de akin achto oniktlalwi matlakuaki, kimomasewis n tlákuali non ne nikmomajsewis.”

Kipia ipati tiktakitas Cristo

²⁵ Miakeh tlakah okuitlapantokayah n Jesú, iwa Ye omókopki iwa okinmili:

²⁶ —Tla aka wits nonawak, iwa amo nechtlaosjila okachi ke ita, ina, isiwa, ipilwah, ikniwah, iweltiwh noso ye inewia, noni mach weletis yetos notlamachtijkau. ²⁷ Iwa akin amo kinekis tlaijywos maya makimiktikah por nechtlaosjila, noni mach weletis yetos notlamachtijkau. ²⁸ Tla aka de nomejwah kineki kichijchiwas se torre, ¿amo achto kiyeyekolia kox kajxilis itomi para weletis kitlamis? ²⁹ Porke tla kualtsimpewaltia iwa san ompa kikawa ken ayakmó okajxili itomi; nochteh akimeh kitaskeh san kiwetskaskeh, ³⁰ iwa kijtoskeh: “Nin tlakatl san okitsimpewalti ikal iwa mach owéletki okitlamí.”

³¹ Noso ijkuak se rey kintitlani isoldadojwah mamotekilmakatih iwan isoldadojwah ok se rey, ¿amo achto kiyeyekolia kox ika májtlaktli mil soldadojteh weletis motekilmakas iwa non ok se rey non okwalintítlanki sempóali mil soldadojteh? ³² Iwa tla amo weleti, ijkuak n ok se rey ok wejka wits, konintitlanilia sikimeh tlatitlaniltih para mamoyekkawakah.

³³ Ijkó kiné, akin amo kikawa nochti tlan kiyoltilana, mach weletis yetos notlamachtijkau.

Ijkuak n istatl ayakmó tlapuyeya

(Mt. 5:13; Mr. 9:50)

³⁴ 'N istatl satlawel kuali, pero tla ayakmó tlapuyeya, ayakmó kuali. ³⁵ Ayakmó weletis motekiltihs nion itech tláli, nion para motlakojtlalotis, yej sa para motepewas. ¡Akin de milajka kipia inakas, makajskamat!

N ichkatsi non opolika

(Mt. 18:10-14)

¹ Miakeh tominooolojkeh, non okoololoaya tomi para Roma, iwa sikimeh tlajt-lakolchijkeh owlalmikuaniyah inawak Jesú iwa okikakiah, ² yika n fariseos iwa non kitemachtiah n tlanawatili okipojpoayah iwa okijtoayah:

—Nin tlakatl mowika iwan tlajt-lakolchijkeh iwa tlakua ínwah.

³ Ijkuakó Jesús okinmili nin tlapoálistli:

⁴ —¿Tla aka de nomejwah kimpixtok se siento ichkameh iwa kipoloa se, amo kinkaka-jtewah n nawi póali iwa n káxtoli iwa n nawi (99) ichkameh tetlala iwa kontemoa n ichkatsi non opoliwik? ⁵ Iwa ijkuak konajsi, kimokechpanoltia iwa satlawel pakmiki, ⁶ iwa ijkuak onkalaki icha, kinmoololoa non iwa moiknitia, iwa non ik ompa chanti iwa kinmilia: “Xipakikah nowa, porke yonikajsik n ichkatsi non onikpoloika.” ⁷ Ne nomechilia onka okachi miak pakílistli kan ilwikak ijkuak se tlajtlakolchi moyolpatla, iwa amo por nawi póali iwa n káxtoli iwa n nawi kualteh n tlakah non ayakmó moneki makipatlakah inyalis.

N tomi non opolika

⁸ 'Noso tla se siwatl kipia májtlaktli platajtomi iwa kualpoloa se, ¿amo kixotlaltia se tláwili, iwa yolik kichpana n kali iwa kitejtemohti asta kan kualjsi? ⁹ Iwa ijkuak yokajsik, kinmoololoa non iwa moiknitia iwa non ik ompa chanti iwa kinmilia: “Nowa xipakikah, porke yonikajsik n platajtomi non onikpoloika.” ¹⁰ Ne nomechilia, noiva iangelwah Dios pakmikih ijkuak se tlajtlakolchi molnamiki iwa ayakmó tlajtlakolchiwa.

N télpochtli non okawilti itomi

¹¹ Jesús noiva okinmili:

—Se tlakatl okimpiaya ome itelpochwah, ¹² iwa non tsoyotl okili ita: “Nota, xikxejxelo tlan tikpia iwa techmaka tlan techaxkatilis.” Ijkuakó n tetá okixejxelo tlan okipixtoka, iwa okimák ipiltsi non tsoyotl tlan okitlajtlanili. ¹³ Kech tonati satepa, n télpochtli non tsoyotl okinamák nochí tlan okiaxkatilijkah, iwa ika non tomi wejka omopaxialoltito. Ompa okawilti itomi iwan awilsiwameh. ¹⁴ Pero ijkuak omotomintlajtlami, owala se apisol itech neká tlali kan ye opaxialoto iwa opé kipoloa tlan kikuas. ¹⁵ Ijkuakó okitlajtlanilito tekitl se tlakatl non ochantitoka itech non altepetl, akin okinawati mak-inmokuitlawiliti ipitsowah. ¹⁶ N télpochtli oapismikia iwa okinekia kinkualis intlakual n pitsomeh, pero amaka itla okimakaya. ¹⁷ Ijkuakó opé ijkí mokuatlapowia: “¡Miakeh itlakawah nota, kipiah miak tlan kikuaskeh, iwa ne nika niapismiktok! ¹⁸ Okachi kuali nimokopas ichan nota, iwa nikilis: nota, onitlajtlakolchi inawak Dios iwa monawak. ¹⁹ Ayakmó techita kemi mokone; yej techita kemi se motlakewal.” ²⁰ Ijkuak owalmókopki icha n ita.

Iwa ok wejka ovalaya, ita okonitak iwa saikpanoa okiknomá. Omotlelo okinamikito, okinanawajtek iwa okiixtennamik. ²¹ Ijkuakó ipiltsi okili: “Nota, onitlajtlakolchi inawak Dios iwa monawak. Ayakmó techita kemi mokone.” ²² Ijkuakó n tetá okinmili itlakawah: “Totokatijkak, xikualikakah non okachi kuali tlakemítl iwa xiktakentikah; noiva xik-tlalilikah se anijo iwa xikkaktikah. ²³ Xikualikakah n torojkonetl non tomawak iwa xikmiktikah. ¡Matiilwichiwakah iwa matitlatlakuakah! ²⁴ Porke nin nopiltsi yomikka, iwa oksepa omoyoliti, yopolika, iwa axa yotikajsikeh.” Iwa opé ilwichiwah.

²⁵ 'Pero ipiltsi non teteachka otekkititoka itlala; iwa ijkuak owalmokopaya iwa ya onajsia icha, okikak tlatsotsonah iwa mijtotiah. ²⁶ Ijkuakó okínotski se tlakéwale iwa okitlajtlani tlan okichijtokah icha. ²⁷ N tlakéwale okili: “Mokni yomokopato, iwa mopapá otlanawati makimiktikah n torojkonetl non okachi tomawak, porke mokni okalakiko ika kuali.” ²⁸ Pero n teikni non teteachka okuálanki, iwa kemi amo okinekia kalakis, ita owálkiski iwa okitlatlaujtí makalaki. ²⁹ Pero n tepiltsi okili ita: “Tejwatsi kuali tikmatok nochipa nitekititok mowah iwa nimítstlakita, iwa ayik techmakatikah nion se tentsontsi, para maniilwichiwa iwa non inwa nimowika. ³⁰ Pero axa kemi owala mopiltsi, non okawiltito motomi iwan awilsiwameh, okachi otikmiktili n torojkonetl non sa tomaktik.” ³¹ Ijkuakó n tetá okili ipiltsi: “Nokone, te nochipa tika nowa, iwa nochí tlan nikpia moaxka. ³² Pero axa kuali matiilwichiwakah iwa matipakikah, porke mokni omikka, iwa axa omoyoliti; opolika, pero yotikajsikeh.”

16

N tetlakéwale non amo okitlachiliaya iteko

¹ Jesúz noíwa okinmili itlamachtijkawah:

—Okatka se tlakatl non satlawel okipiaya, iwa okitlali se ichantlamokuitlawi. Pero sikimeh tlakah okilitoh n tekowa ichantlamokuitlawi san okawiltijtoka tlan iaxka. ² Ijkuakó n tekowa okónnotski iwa okili: “¿Amo tikmati tlan nechtlapowiah de te? Techili kenomi titekititok, porke ayakmó tigmokuitlawis tlan noaxka.” ³ Ijkuakó n techantlamokuitlawi okimoli: “¿Axa tlan nikchiwas tla noteko nechkixtilis noteke? Mach nikxikos nitekitis tetlala, iwa satlawel nipinawas nimijtlanijtinemis. ⁴ Ya nikmatok tlan nikchiwas, para manechselikah itech incha ijkuak ayakmó nikpias nin tekitl.” ⁵ Ijkuakó n techantlamokuitlawi se por se okinnotiah akimeh okiwiliayah iteko; iwa non achto owala okitlajtlani: “¿Kech tikuikilia noteke?” ⁶ N tlakatl okinankili: “Nikkuikilia mákuili poali barril aseite.” Ijkuakó n techantlamokuitlawi okili: “Nika machotitok tlan tiktewikilia, ximotlali iwa xikmajmantiwetsi sa tlajko siento barril.” ⁷ San nima ok se okitlajtlani: “Iwa te, ¿kech tiktewikilia?” N tlakatl okinankili: “Se siento tlatamachiwali de trigo.” Ijkuakó n techantlamokuitlawi okili: “Xikonana moamatsi iwa xikmajmana ok se, pero xikmomachotili san nawi pójali (80) tlatamachiwali de trigo.” ⁸ Ijkuakó n tekowa omotlajtlachialti ijkuak okima tlan okichi n amokuali techantlamokuitlawi. N tlaltikpaktlahok okachi ixtlamatih itech tlan kichiwah, iwa amo akimeh tepilwah inawak Dios.

⁹ 'Ne nomechilia: Xiktektiltikah tlan onka itech nin tlaltíkpaktli, para nonkim-palewiskeh n próbesteh iwa ijkó nonkimpiaskeh akimeh nomechmoiknitiskeh, para ijkuak amitla nonkipiaskeh, weletis nomechseliskeh ilwikak kan nochipa nonchantoskeh.

¹⁰ 'Akin san achitsi kiyekmokuitlawia, noíwa weletis kiyekmokuitlawis tlan miak; iwa akin amo kiyekmokuitlawia tlan san achitsi, mach weletis kiyekmokuitlawis tlan miak.

¹¹ Yika tla amo nonkiyektektiltiah tlan onka itech nin tlaltíkpaktli, ¿kenomi nomech-maktiliskeh xikmokuitlawikah tlan de milajka ipati? ¹² Iwa tla amo nonkiyekmokuitlaw-iah tlan amo nomoaxka, ¿akin nomechmakas tlan nomoaxka?

¹³ 'Nion se tlakéwale weletis kinyektektilis ome tekowajkeh; porke se kikokolis iwa n ok se kitlasojtas, noso sanwel se kitlakitas iwa n ok se kitlawelitas. Mach weletis nonkiyolpixtoskeh Dios tla nomechyoltilana n tomi.

¹⁴ N fariseos san okikaktokah tlan Jesúz otetlapowiaya, iwa san okiwetskayah porke yejwah okiweliayah n tomi. ¹⁵ Ijkuakó Jesúz okinmili:

—Nomejwah nonmomachiliah nonkualteh n tlakah imixpah n oksikimeh, pero Dios nomechyolixmati, porke nochí tlan kiweyiliah n tlakah, Dios kitlawelita.

N tlanawátili iwa kan Dios tlanawatia

¹⁶ 'N tlanawatílistli iwa n profetas otlamiko ijkuak owala n Juan Bautista. Ijkuakó opé kitematiltia n kualitájtoli iwa satlawel miakeh tlaltikpaktlahok mochijchikawah iwa kinekih kalakiskeh kan Dios tlanawatijtok.

¹⁷ 'Okachi amo owi pojpoliwiis n ilwikak iwa n tlaltíkpaktli, pero tlan ijkuilitok saman mochiwas.

Jesúz temachtia amo se mamosiwakajkawa

(Mt. 19:1-12; Mr. 10:1-12)

¹⁸ 'Tla se tlakatl kikajkawa isiwa iwa monamiktia iwan ok se siwatl, non tlakatl san ki-momekatijtok n siwatl iwa tlajtlakolchijtok. Iwa tla se tlakatl non san iselti, monamiktia iwan se siwatl non yokikajka iokich, noíwa san kimomekatijtok iwa tlajtlakolchijtok.

Lázaro iwa n tlakatl non kitlawelpia

¹⁹ 'Okatka se tlakatl akin satlawel okipiaya, iwa omotlakentiaya ika tlakemeh patio-jkeh; nochipa oilwichiwaya iwa otetlatlakualtiaya. ²⁰ Noíwa se tlakatl non satlawel probe non itoka Lázaro, nin tlakatl oajsiltentoka inakayo iwa nochipa owalmotlaliaya

ikaltempa n tlakatl non saikpanoa okitlawelpiaya. ²¹ Nin probe okinekia ixwis ika n tlákuali non owetsia de kan imesa non tlakatl; iwa n chichimeh okualpajpaliliayah inakayo kan oajsiltentoka. ²² Se tonati n Lázaro omikki, iwa iangelwah n Dios okiwikakeh inawak Abraham. Noiwa n tlakatl non okipiaya tomi omikki, iwa okitookakeh. ²³ Ijkuak n tlakatl non okipiaya tomi otlaijyowijtoka miktla, oajkotláchixki iwa okitak Abraham iwa n Lázaro inakastla. ²⁴ Ijkuakó opé kitsajtsilia: “Nota Abraham, techiknomati, iwa xiknawati n Lázaro makisiawa se imajpil iwa makiseseyaliki nonenepil, porke saikpanoa nitlaijyowijtok itech nin tletl.” ²⁵ Pero Abraham okili: “Nokone, xikilnamiki te yotimopaakti ijkuak otinemedia itech tlaltípkaktli, iwa n Lázaro amo okipiaya nion tleno. Yika axa ye nika yolpaktok, iwa te axa titlaijyowijtok. ²⁶ Noiwa xikmati techxelojtok se weyi barranka, yika non nika kateh mach weletis yaskeh ompa, iwa non ompa kateh mach weletis witseh nika.” ²⁷ Ijkuakó n tlakatl non okitlawelpiaya tomi okijo: “Nota Abraham, nimitstlatlaujtia xikitlani n Lázaro mawia ichan nota, ²⁸ porke nikimpia mákuilteh nokniwah iwa nikneki makintlapowiti, para ijkó yejwah amo mawikih itech nin lojar tetlaijyowilti.” ²⁹ Pero Abraham okili: “Yejwah kipixtokeh itlajkuilol Moisés iwa intlajkuilolwah n profetas; ¡makintlakitakah!” ³⁰ Pero n tlakatl non okipiaya tomi okinankili: “Milák, tata Abraham, pero tla kintlapowiti se non yomikki, moyolpatlaskeh inawak Dios.” ³¹ Pero Abraham oksepa okili: “Tla amo kinekih kitlakitaskeh itlajkuilol Moisés nion intlajkuilol n profetas, noiwa mach kineltokaskeh maya mamoyoliti se miketl.”

17

Ximotlachilikah amo kichiwa nontlajtlakolchiwaskeh

(Mt. 18:6-7, 21-22; Mr. 9:42)

¹ Satepa Jesús okinmili itlamachtijkawah:

—Nochipa yetos tlan kintlajtlakolchiwaltis n tlakah. Pero ¡probe n tlakatl non kichiwas aka matlajtlakolchiwa! ² Okachi kuali makikechilpililikah se weyi tetl, iwa makontlamotlakah ijtk n weyi atl, para amo makitlajtlakolchiwalti seme de ninteh pípilteh. ³ ¡Yika, ximotlachilikah!

‘Tla mokni mitstoktia itla amokuali, xiknonotsa; tla mitskaki iwa molnamiki, xiktlapojpolwi. ⁴ Iwa tla mitstoktia itla amokuali chikome welta itech se tonati, iwa mitstlajtlanilia xiktlapojpolwi chikome welta itech se tonati, xiktlapojpolwi.

Xikmiakili totlaneltokalis

⁵ Ijkuakó itlamachtijkawah okilijkeh n Jesús:

—Xikmiakili totlaneltokalis.

⁶ N Toteko okinmili:

—Tla nonkipiaskiah tlaneltokálistli, maya san kemi se xinatsintli de mostaza, weletis nonkiliskiah nin tlatoókali: “Ximowiwitla de nika iwa ximomanati itech weyi atl”, iwa non tlatoókali nomechtlakitaschia.

N tlakéwale iwa iteko

⁷ ‘Tla aka de nomejwah kipia se itlakewal non okitekitilito itlala noso otlajpiato, mach nonkiliah: “Ximotlali iwa ximotlamajsewi.” ⁸ Amó, yej nonkiliah: “Techtlalili tlan nikkuas, iwa ijkuak nitlamis nitlakuas iwa nikonis ijkuakó te titlakuas iwa tikonis.” ⁹ ¡N tekowa mach motlasojkamati inawak itlakewal, por okichi tlan okinawati makichiwa! ¹⁰ Ijkó noiwa nomejwah, ijkuak tlamis nonkichiwaskeh tlan Dios nomechnawatia, xikijtokah: “Tejwah mach itla topatih, porke sanwel otikchijkeh tlan omonekia tikchijwaskeh.”

Jesús kimpajtia májtlakteh leprosos

¹¹ Ijkuak Jesús oyaya Jerusalén, opajpanotia kan tlalmeh de Samaria iwa Galilea.

¹² Ijkuak ya onkalakia itech se altepetl, okinamikikoh májtlakteh tlakah non okipiaya lepra, pero san wejka omoketskeh ¹³ iwa okitsajtsilijkeh:

—¡Jesús! ¡Tlamacthi! ¡Techiknomati!

¹⁴ Ijkuak Jesús okimitak, okinmili:

—Ximoteititith innawak tiopixkeh.

Ijkuak oyayah itech ojtli, owalpajtikeh. ¹⁵ Ijkuakó seme de yejwah ijkuak okitak yopatik, owalmókopki iwa okiweyijkachiwaya Dios ika chikawak itlajtol, ¹⁶ iwa omixtlapacho ikxitla n Jesús, iwa okitlasojkama nin tlakatl samaritano. ¹⁷ Ijkuakó Jesús okitlajtlani:

—¿Amo non májtlakteh akimeh onompajtikeh? ¿Kanin kateh n oksikimeh chiknawi?

¹⁸ ¿Sanwel nin tlakatl non amo israelita owalmókopki okiweyijkachiwako Dios?

¹⁹ Ijkuakó Jesús okili n tlakatl:

—Ximoketsa iwa xio, motlaneltokalis omitspajti.

Ijkí kalakiki itlanawatil Dios

(Mt. 24:23-28, 36-41)

²⁰ N fariseos okitlajtlanjeh n Jesús, kemania kalakiki itlanawatil Dios. Jesús okinankili:

—Itlanawatil Dios mach motas ijkuak wits. ²¹ Amo kijtoskeh, “Nikan ka”, noso “Nepaka”, porke itlanawatil Dios ya kajki nomonawak.

²² Ijkuakó Jesús okinmili itlamachtijkawah:

—Ajsiki n tonati ijkuak nonkinekiskeh nonnechitaskeh Ne Non onimochi ni tlakatl maya san se tonati, pero amo nonnechitaskeh. ²³ Iwa nomechiliskeh: “Nikan kajki”, noso “Nepa kajki.” Pero amo xiwiah, nion xikinmotokikah. ²⁴ Porke ijkó kemi ijkuak tlapejpetlani iwa tlawia de nin lado iwa asta kan ok se lado de ilwikak, ijkó Ne Non onimochi ni tlakatl sentetl nechitaskeh itech neká iksemi tonati. ²⁵ Pero achto nitlaijyowis iwa nechixnamikiskeh n tlakah de ninteh tonatijmeh. ²⁶ Ijkó kemi otlamochi ijkuak Noé onemia, ijkó tlamochiwas ijkuak niwits Ne Non onimochi ni tlakatl. ²⁷ N tlakah otlatlakuayah iwa okoniayah, omonamiktiayah iwa otenajnamiktiayah, asta n tonati ijkuak Noé okalak itech weyi arka iwa owalmokajka n weyi kiawitl non okimijmiktih nochteh. ²⁸ Noijkó otlamochi ijkuak Lot onemia: otlatlakuayah iwa okoniayah, otlanamakayah iwa omotlakojkowiayah, otookayah iwa omokajkaltiayah; ²⁹ pero ijkuak Lot okiski de Sodoma, owetski tletl ika asufre de ilwikak, iwa nochteh omijmikeh non ompa ochantitokah. ³⁰ Ijkó tlamochiwas itech neká tonati ijkuak niwalmonextis, Ne Non onimochi ni tlakatl.

³¹ 'Itech non tonati, akin yetos ikpak ikal, amo mawaltemo makikixtiki tlan kipixtok tlajtitk; iwa tla aka yetos itlala amo mawalmokopa icha. ³² Xikilnamikikah tlan omochi isiwa n Lot. ³³ Akin kinekis kipalewis iyolilis kixpolos, pero, akin kipolos iyolilis por nechtlakita momakixtis.

³⁴ 'Ne nomechilia, itech non yúali ome kochtoskeh san sika; se kiwikaskeh iwa n ok se mokawas. ³⁵ Ome siwameh testoskeh sansikah; se kiwikaskeh iwa n ok se mokawas.

³⁶ Ome tlakah tekkitoskeh sansikah intlala; se kiwikaskeh iwa n ok se mokawas.

³⁷ Ijkuak ijkí okikakeh, okitlajtlanjeh n Jesús:

—¿Toteko, kan tlamochiwas nochi ni?

Jesús okinmili:

—Kan yetos n miketl, ompa moololoskeh n tsojpilomeh.

N iknosiwatl iwa n jue

¹ Jesús okinmili se tlapoálistli para kinmititis nochipa mamototsajtsilikah, iwa ayik mamosotlawakah. ² Iwa okinmili:

—Itech se altepetl okatka se tekiwa, non amo okiimakajsa Dios, nion okintlakitaya n tlakah. ³ Itech non altepetl, noiwa ochantitoka se iknosiwatl, akin nochipa okualtlajtlaniliaya n tekiwa makipalewi porke aka okikokoliaya iwa okitlajtoltemoliaya. ⁴ Pero n tekiwa mach okikakia tlan okiliaya n iknosiwatl, pero satepa okimoli: “Maya amo nikiimakajsi Dios nion aka nechtekipachoa, ⁵ nikpalewis nin iknosiwatl iwa ayakmó mawalajto, para ayakmó manechkuejso, porke tla amo nikpalewis nochipa nechkuejsolositos.”

⁶ N Toteko ok okijo:

—Ye ni tlan okijto n amokuali tekiwa. ⁷ Pero Ne nomechilia: *¿Amo kimpalewis Dios akimeh Ye okimpéjpenki, iwa motiotsajtsiliah tlajka iwa n yuak?, noso ¿kintoktis mamochiakah?* ⁸ Ne nomechilia Ye kimpalewis iwa amo wejkawas. Pero ikuak Ne Non onimochi ni tlakatl niwalmokopas, *¿kechmeh ok kipiaskeh tlaneltokálistli inawak Dios?*

N fariseo iwa n tominooololo

⁹ N fariseos satlawel omomachiliayah kualteh n tlakah. Yejwah okintlawelitayah oksikimeh tlakah. Ijkó kiné Jesús okinmili:

¹⁰ —Ome tlakah omotrotsajtsilitoh kan Weyi Tiopa: se fariseo, iwa n ok se tominooololo. ¹¹ N fariseo omoketoka iwa ijkí omotrotsajtsiliaya: “Notajtsi Dios, nimitstlasojkamati porke ne mach kemi n oksikimeh, yejwah ichtekeh, amokualteh iwa mekatánajteh, iwa ne amo kemi nin tominooololo. ¹² Ne nochipa nimosawa ome tonati itech se samano, iwa nimitsmaka májtlaktli de se siento de nochí tlan niktlani.” ¹³ Pero n tominooololo san wejka omoka iwa amo omixewiaya kajkokuis itlachialis, yej omoelpanwitekiaya iwa okitoaya: “¡Noteko Dios, techiknomati, ne saikpanoa nitlajtlakolchiwa!” ¹⁴ Ne nomechilia, nin tominooololo omókopki icha ika itlapojpolwilis Dios, pero n fariseo amó. Porke akin inewia moweyilia kipijpinatiskeh, iwa akin amo kimiati moweyilia, okachi kitlakitaskeh.

Jesús kintiochiwa n pípilteh

(Mt. 19:13-15; Mr. 10:13-16)

¹⁵ Noiwa okwalinwikiliayah n pípilteh inawak Jesús, para makintlalili imawah intech. Pero ikuak itlamachtijkawah ijkí okitakeh, opé kimajwah akimeh okwalinwikiliayah n pípilteh. ¹⁶ Pero Jesús okínnotski itlamachtijkawah iwa okinmili:

—Xikinkawilikah n pípilteh mawikh nonawak, amo xikintsakuilikah, porke akimeh yolyamankeh kemi n pípilteh, kalakiskeh kan Dios tlanawatijtok. ¹⁷ De milajka nomechilia, akin amo kikawilis Dios matlanawati itech iyolo kemi se chokotsi kimokawilia makinawatikah, non tlakatl mach kalakis kan Dios tlanawatijtok.

Se télpochtli non kitlawelpia tomi motlapowia iwan Jesús

(Mt. 19:16-30; Mr. 10:17-31)

¹⁸ Se tlayákanki okitlajtlani n Jesús:

—Kuali tlamachti, *¿tlan moneki nikchiwas para niyolitos nochipa kan ilwikak?*

¹⁹ Jesús okili:

—*¿Tleka techilia nikuali? Sanwel onka se Akin kuali, Ye Dios.* ²⁰ Te tikinmixmati n tlanawatílisteh:

“Amo ximomekati;

amo xitemikti;

amo xitlachtek;

amo xixolopijti;

xiktlakita mota iwa n mona.”

²¹ N tlakatl okili:

—Ninteh tlanawatílisteh nikinchijtiwits desde ni telpotsintli.

²² Ikuak Jesús ijkó okikak, okili n tlakatl:

—Ok mitspoloa tikchiwas itla: xiknamaka nochí tlan tikpia iwa xikinxejxelili n próbesteh, ijkó tiktlawelpias kan ilwikak; tlamis xiwiki nowa.

²³ Pero ikuak n tlakatl ijkó okikak, satlawel omoyolkoko, porke okitlawelpiaya tomi.

²⁴ Ikuak Jesús okitak omoyolkoko, iwa okijo:

—¡Owi kalakiskeh kan Dios tlanawatijtok akimeh kitlawelpiah tomi! ²⁵ Okachi amo owi panos se “kameyo”* kan ik ixtololo se akuxa, iwa amo se non kitlawelpia tomi makalaki ilwikak.

* 18:25 Sikimeh tlajkuíolteh kipiah n tlájtoli ‘de kameyo’ porke n michmajkeh kipiah se tomawak riata non okichijchijkeh ika itsojmio n kameyo. Nawi itlamachtijkawah Jesús achto okatkah michmajkeh iwa okitekitiltiayah non riata non yejwah okitokayotijkeh ‘kameyo’.

²⁶ Yika akimeh ijkó okikakeh okijtojkeh:

—Tla ijkó, ¿akin kalakis kan Dios tlanawatijtok?

²⁷ Jesús okinmili:

—Tlan amo weletih kichiwhah n tlakah, Dios weleti kichiwa.

²⁸ Ijkuakó, Pedro okili:

—Tejwah otikkakajtejkeh nochí tlan otikpiayah, iwa otiwalajkeh mowah.

²⁹ Ijkuakó Jesús okinnankili:

—De milajka nomechilia, akin kikakajtewa icha, itajwah, ikniwhah, isiwa, noso ipilwhah, para kichiwas tlan Dios kinawatia, ³⁰ noni kiselis okachi miak itech nin tlaltíkpaktli; iwa itech n tonatijmeh non sikan witseh, yolitos nochipa.

Oksepa Jesús kinmatiltia imikilis

(Mt. 20:17-19; Mr. 10:32-34)

³¹ Satepa, Jesús okinmoololo n májtlakteh iwa ome itlamachtijkawah iwa okinmili:

—Xikkakikah, axa tiawih Jerusalén, Ne Non onimochi ni tlakatl nechtoktiskeh nochí tlan okijuilojkeh n profetas. ³² Ompa nechtemakaskeh inmak non amo judíojteh, nechpijpinawiskeh, nechwijwikaltiskeh iwa nechchijchawiskeh. ³³ Nechwitekiskeh, tlamis nechmiktiskeh. Iwa ipan eyi tonati nimoyolitis.

³⁴ Itlamachtijkawah mach itla okajsikamatkeh, nion okimatiah tlan okintlapowiaya.

Jesús kipajtia se tlakatl de Jericó non amo otlachiaya

(Mt. 20:29-34; Mr. 10:46-52)

³⁵ Ijkuak Jesús ya onajsiá kan altepetl de Jericó, se tlakatl non amo otlachiaya omijtlanijtoka inakastla n ojtli. ³⁶ Ijkuak n tlakatl non amo otlachiaya okinkak panotokeh miakeh tlakah, otlájtlanki tlan otlamochijtoka. ³⁷ Okilijkeh Jesús de Nazaret ik ompa opanotoka. ³⁸ Ijkuakó non tlakatl otsajtsik chikawak iwa okijo:

—Jesús, Ikone n David, techiknomati!

³⁹ N tlakah non oyayah tlayakapa okajwakeh para makitsakua ikamak. Pero ye okachi chikawak otsajtsik:

—Ikone n David, techiknomati!

⁴⁰ Ijkuakó Jesús omóketski iwa otlanawati makualikilikah n tlakatl; iwa ijkuak okualik-ilijkeh, Jesús okitlajtlani:

⁴¹ —¿Tlan tikneki manimitstokti?

N tlakatl non amo otlachiaya otlanankili:

—Noteko, nikneki nitlachias.

⁴² Jesús okili:

—Xitlachia! Por motlaneltokalis yotipajtik.

⁴³ San nima n tlakatl non amo otlachiaya owatláchixki, iwa oyá iwan Jesús kiweyijkachijti n Totajtsi Dios. Iwa nochteh n tlakah ijkuak ijkó okitakeh, noíwa okiweyijkachijkeh Dios.

19

Jesús yawi icha n Zaqueo

¹ Jesús okalak Jericó, iwa opajpanotiaya itlajko non altepetl. ² Ompa ochantitoka se tlakatl non itoka Zaqueo ye okitlawelpiaya tomi porke okinnawatiaya n tominooololojkeh.

³ Ye okinekia kixmatis Jesús. Pero mach oweletia okitaya porke miakeh tlakah oyayah iwan Jesús, iwa n Zaqueo mach wejkapa. ⁴ Ijkuakó n Zaqueo otlayákanki omotlejkoltito itech se kuawitl kan ik Jesús panoskia para weletis kitas. ⁵ Ijkuak Jesús yopanotoka ik ompa, oajkotláchixki; okitak n Zaqueo iwa okili:

—Zaqueo, xitemotiwetsi, porke axa nikneki nimokalotis mocha.

⁶ Ijkuakó n Zaqueo owaltemotíwetski, iwa ika miak pakílistli okiseli n Jesús. ⁷ Ijkuak okitakeh, nochteh opé kipojpoah n Jesús por otlakuaato icha n se tlajtlakolchi. ⁸ Ijkuakó Zaqueo omóketski iwa okili n Toteko:

—Noteko, nikinmakas n próbesteh tlajko de nochí tlan nikpia; iwa tla aka oniktlachtekili, nikkopilis nawi welta okachi.

⁹ Jesús okili:

—Axa, itech nin tonati, Dios okinmakixtiko akimeh chantitokeh itech nin kali, porke nin tlakatl noiva walewatok de Abraham. ¹⁰ Ne Non onimochi ni tlakatl oniwala onikintemoko iwa onikinmakixtiko akimeh yopolikah.

N májtlakteh tomimeh

(Mt. 25:14-30)

¹¹ Ijkuak n tlakah okikaktokah tlan Jesús okinmilitoka, Ye okinmili ok se tlapoálistli, porke ya onajsia Jerusalén, iwa yejwah okiyejyekoliayah Dios san nima ya pewaskia tlanawatis ompa. ¹² Yika Jesús okinmili:

—Se tlakatl non owalewatoka itech se kuali familia oyá wejka, kan sa okichixtoka kitlaliskeh inrey iwa satepa walmokopaska. ¹³ Iwa ijkuak yoonewaya, okínnotski májtlakteh itekitwah. Sejse okimaktilijta se tomi non miak ipati iwa okinmili: “Xikitliltijtokah nin tomi para xiktlanikah okachi asta manimokopati.” ¹⁴ Pero n tlakah de ialtépeu okikokoliayah, yika, ijkuak oonewak, okintitlankeh sikimeh tlakah makijtotoh: “Mach tiknekih matechnawati nin tlakatl.” ¹⁵ Pero maya ijkó, non tlakatl okitlalijkeh tekiwijtlanawati. Iwa ijkuak owalmokopato iwa oajsiko kan ialtépeu, okínnotski itlakewalwah non okinmajmakatewak itomi, para kimatis kech okitlankeh sejsemeh.

¹⁶ Itékitki non achto okalakiko okijo: “Noteko, motomi okitlanki májtlaktli welta ipa.”

¹⁷ N rey okinankili: “Kuali tlan otikchi; te kuali titékitki; iwa kemi otikyektektilti tlan san achitsi onimitsmák, nimitstlalis xikinnawati májtlakteh altepemeh.” ¹⁸ Non ok se noiwa okalakiko iwa okili: “Noteko, ika motomi oniktlanki ok mákuili ipa.” ¹⁹ N rey noiwa okili: “Te tiyetos gobernador iwa tikinnawatijtos mákuili altepemeh.” ²⁰ Ijkuakó owala ok se iwa okijo: “Noteko, nikan kajki motomi. Ne onikslaati ika nopañito; ²¹ porke onimitsmawili, nikmatok tejwatsi tikuejsi, iwa tikmoaxkatia tlan amo moaxka, iwa tipixka kan amo titooka.” ²² Ijkuakó n rey okili: “Amo kuali tlakéwale, san ika motlajtolwah nikyejyekolia akin te. Yotikmatia nikuejsi, iwa nikmoaxkatia tlan amo noaxka, iwa nipixka kan amo nitooka. ²³ ¿Tleka amo otiklaati notomi itech banko, ijkó keman niwalmokopaska, nikseliskia notomi ika nochí ikoneyo?” ²⁴ Ijkuakó n rey okinmili akimeh ompa okatkah: “Xikkixtilikah n tomi, iwa xikmactilikah akin kipixtok májtlaktli.” ²⁵ Yejwah okilijkeh: “Noteko, pero ye ya kimpixtok májtlakteh tomimeh.” ²⁶ N rey otlanankili: “Ne nomechilia, akin ya kipia, kimactiliskeh okachi. Iwa akin amo kipia, kikixtiliskeh asta tlan san achitsi kipia. ²⁷ Iwa nekateh akimeh amo okinekeh maniyeto intlanawati, techinwaliklikah iwa xikinkechtsontekikah noyakapa.”

Jesús kalaki Jerusalén kemi Rey

(Mt. 21:1-11; Mr. 11:1-11; Jn. 12:12-19)

²⁸ Ijkuak Jesús otlanki okintlapowi, oyá Jerusalén. ²⁹ Ijkuak Jesús ya onkalakia kan altepemeh de Betfagé iwa Betania, itech olivostepetl, okintlayakanalti ome itlamachti-kawah, ³⁰ iwa okinmili:

—Xiwiah kan altepetl non kajki tlayakapa, iwa ijkuak nonkalakitiweh, ompa nonka-jisitiweh se burrojtsi ilpitok, non ayamaka ipan tlejkotika. Xiktojtomakah iwa techaliki-likah. ³¹ Iwa tla aka nomechtlajtlania tleka nonkitojtomah, xikilikah n Toteko kitekitiltis.

³² Itlamachti-kawah oyajkeh iwa okajsikeh nochí kemi Jesús okinmilija. ³³ Iwa ijkuak yokitojtontokah n burrojtsi, n tekowajkeh okintlajtlanijkeh:

—¿Tleka nonkitojtomah n burrojtsi?

³⁴ Yejwah otlanankilijkeh:

—Porke n Toteko kitekitiltis.

³⁵ Iwa nima, okiwilijkeh n Jesús non burrojtsi, okipejpechtijkeh ika inkoton wah iwa ipan okitlejkoltijkeh n Jesús. ³⁶ Iwa ijkuak Jesús opanotiaya itech ojtli, n tlakah okin-soayah intlaken wah. ³⁷ Iwa ijkuak ya onajsia kan pewa ixtemoa n olivostepetl, nochteh

n tlakah akimeh okineltokayah opé kojtsajtsih ika pakílistli iwa okiweyijkachijkeh Dios por nochteh n milagros non yokimitakeh. ³⁸ Iwa okijoayah:

—¡Matiochito n Weyi Tlanawati Akin wits itech itoka n Toteko! ¡Mayeto yolsewílistli, iwa Weyijkachiwálistli kan ilwikak!

Sal. 118:25-26

³⁹ Ijkuakó sikimeh fariseos non okatkah intlajko n tlakah, okilijeh n Jesúis:

—Tlamachti, xikintlakawalti nonteh tlakah.

⁴⁰ Pero Jesúis okinnankili:

—Ne nomechilia, tla yejwah kitsakuaskeh inkamak, n temeh tsajtsiskeh.

Jesúis kichokilia n Jerusalén

⁴¹ Ijkuak Jesúis ya onkalakia Jerusalén, okonitak iwa opé kichokilia. ⁴² Iwa okijo:

—¡Tla tikkajskamatiskia maya san itech nin tonati, tlan weletis mitsmakas yolsewílistli! Pero mach weleti tikita nion tikkajskamat. ⁴³ Porke witseh tonatijmeh, ijkuak mokokolikniyah kichijchiwaskeh se tepamit non ika mitsyawaloskeh, sentetl mitsmojmotlaskeh ⁴⁴ iwa mitspojpoloskeh. Kinmiktiskeh non motech chantitokeh, iwa amo kikawaskeh nion se tetl ipan ok se tetl, porke amo otikseli Dios, ijkuak omitstlajpaloko para mitspalewis.

Jesúis kualinkixtia n tlasemankeh kan Weyi Tiopa

(Mt. 21:12-17; Mr. 11:15-19; Jn. 2:13-22)

⁴⁵ Jesúis okalak kan Weyi Tiopa iwa opé kinkixtia akimeh ompa otlanamakatokah iwa otlakojtokah, ⁴⁶ iwa okinmili:

—Itech itlajkuilol Dios kijtoa: “Nocha, kali kan motiotsajtsiliah”, pero nomejwah yononkikopkeh se kúyoktli kan moololoah ichtekeh.

Is. 56:7; Jr. 7:11

⁴⁷ Nuchi tonati Jesúis ottlamachtiaya itech Weyi Tiopa, pero n tiopixkeh non tlayakan- tokeh iwa non kitemachtiah n tlanawatílistli, iwa n tlayakankeh israelitas, okitemoli- jtinemiah kenijki kimiktiskeh n Jesúis. ⁴⁸ Pero mach okajsiah kenijki kichiwaskeh, porke n tlakah nochipa okiwakinemiah iwa okikakiah itemachtilis.

20

Kitlajtlaniah n Jesúis akin okitekiwajtlali

(Mt. 21:23-27; Mr. 11:27-33)

¹ Se tonati, ijkuak Jesúis okinmachtijtoka n tlakah n kualitlajtoli kan Weyi Tiopa, ovalajkeh n tiopixkeh non tlayakantokeh, non kitemachtiah n tlanawatílistli iwa n tetajmeh non tlayakantokeh kan tiopa, ² iwa okitlajtlanjkeh:

—Techili, ¿akin omitsnawati ijkó xikchiwa? Iwa, ¿akin omitsmák non tekiwajyot?

³ Jesúis okinnankili:

—Ne noiya nomechtatljanis, iwa technankilikah: ⁴ ¿Akin okinawati n Juan mat- lakaateki? ¿Okinawati Dios noso n tlakah?

⁵ Yejwah opé moichtakatlajtoltiah iwa okijoayah:

—¿Tla tikijtoskeh? Tla tikijtoskeh Dios okinawati, Ye techilis: “¿Tleka mach ononkineltokakeh?” ⁶ Pero, tla tikijtoskeh n tlakah okinawatijkeh, nochteh n tlakah techmokitskiliskeh ika tetl iwa techmiktiskeh, porke yejwah kuali kimatokeh Juan iprofeta n Dios.

⁷ Ijkuakó, yejwah okinankilijkeh mach okimatiah. ⁸ Ijkuakó Jesúis okinmili:

—Ne noiya mach nomechilis akin onechmák nin tekiwajyot.

N tekitkeh amokualteh

(Mt. 21:33-44; Mr. 12:1-11)

⁹ Otlanki Jesúis opé kintlapowia ika nin tlapoálistli:

—Se tlakatl okintookak miakeh uvaskuaujkeh itlala. Satepa okinmák partido sikimeh uvastekitkeh, iwa non tekowa wejka oyá, iwa owejkawato. ¹⁰ Iwa ijkuak oajsiko n tonati para motlatekis, n tekowa okitítlanki se itlakewal makitlajkoxelilikah n uvas. Pero n uvastekitkeh okitekilmakakeh itlakewal n tekowa iwa okikopkeh mapijpilkati. ¹¹ Otlanki

n tekowa okitítlanki ok se itlakewal. Pero n uvastekitkeh noiva okitekilmakakeh, okiwiwikaltijkeh iwa okikopkeh noiva mapijpilkati. ¹² Niman, n tekowa okitítlanki ok se itlakewal, pero n uvastekitkeh noiva okikojkojkeh iwa okwalkixtijkeh.

¹³ Ijkuakó n tekowa okijo: “¿Axa tlan nikchiwas? Niktitlanis nopiltsi non satlawel niktlasojtla, ijkuak kitaskeh, ye okachi kitlakitaskeh.” ¹⁴ Pero ijkuak n uvastekitkeh okitakeh ipiltsi n tekowa, okijtojkeh: “Ye ni akin kiselis tlan iaxka n tekowa; matikmiktakah iwa ijkó tejwah tigmokawiskeh n lawerta.” ¹⁵ Ijkuakó, n uvastekitkeh okwalkixtijkeh de kan lawerta iwa okimiktiyeh.

Ijkuakó Jesús okintlajtlani:

—Axa, ¿tlan nonkiyejyekolah kintoktis n tekowa nonteh uvastekitkeh amokualteh?

¹⁶ Ye yas iwa kinmijmiktis nonteh uvastekitkeh, iwa ilawerta kinmaktilis oksikimeh.

Ijkuak yejwah ijkí okikakeh, okijtojkeh:

—¡Amo Dios makimonekilti!

¹⁷ Pero Jesús okintlajtlatak iwa okinmili:

—¿Tlan kijtosneki itlajkuil Dios kan kijtoa?

N tetl non n kalchijchijkeh okontlakaltechojkeh,
omochiwako non okachi tetlakxili.

Sal. 118:22

¹⁸ Akin wetsis ipan non tetl mopopostekis.

Pero tla n tetl wetsis ipan se, kikuejkuechos.

Is. 8:14-15

Kitlajtoltiah n Jesús kox kuali se kitlaxtlawas impuestos

(Mt. 21:45-46; 22:15-22; Mr. 12:13-17)

¹⁹ Ijkuak n tiopixkeh non tlayakantokeh iwa non kitemachtiah n tlanawatílistli, okajsikamatkeh n Jesús okinkakitjtoka non tlájtoli. Satlawel okulankeh iwa okinekiah kikitskiskeh, pero mach okikitskijkeh porke okinmawiliyah n tlakah. ²⁰ Ijkuakó okintitlankeh sikimeh teixkajkayajkeh inawak Jesús para makikjakakith tlan kijtoa, iwa ijkó weletis kitemaktiskeh inawak n gobernador. ²¹ Yika ijkí okitlajtlanjkeh:

—Tlamachti, tikmatokeh tlan tikitjota iwa tlan tiktemachtia milák, iwa amo san tikpejpena motemachtilis. Tejwatsi kuali titlamachtia ijkó kemi Dios kimonekiltia matiyeknemikah. ²² Techonili: ¿Kuali ka matiklaxtlawakah impuestos inawak n romanoytekiwa, noso amó?

²³ Pero Jesús okajsikama san okiyejyekojtokah iwa okinmili:

—¿Tleka nonnechyeyekoah? ²⁴ Techititikah se denariojtomí. ¿De akin ixko nikan ka?, iwa ¿akin itoka ijkuitlitol?

Yejwah okinankilijkeh:

—De César.

²⁵ Ijkuakó Jesús okinmili:

—Xikmakakah n César tlan iaxka n César, iwa xikmakakah Dios tlan iaxka n Dios.

²⁶ Iwa n tlakah mach itla okajxililijkeh itech tlan okijtoaya non ika kiteiliskiah, yej omotlajtlachialtijkeh kenijki okinnankili, yika san owalmokakajkeh.

N saduseos kitlajtlaniah n Jesús kox oksepa moyolitiah non yomikkeh

(Mt. 22:23-33; Mr. 12:18-27)

²⁷ Satepa sikimeh saduseos non amo kineltokah non yomikkeh oksepa moyolitiah, omikuaniyeh inawak Jesús iwa okitlajtlanjkeh:

²⁸ —Tlamachti, itech itlanawatil Moisés ijkí otechtlajkuil, tla se tlakatl non ya kipia isiwa, mikki iwa amo okímpixki ipilwah iwan isiwa, n iknosiwatl moneki mamonamikti iwan ikni non yomikki para makinmaka ipilwah ikni non yomikki. ²⁹ Yowejka okatkah chikome iknimeh. Non teteachka monamikti pero omikki iwa amo okinkajteh ipilwah. ³⁰ Itsayo non omikki monamikti iwan iknosiwatl. Pero noiva omikki iwa amo okinkajtewili ipilwah. ³¹ Ijkuakó non ipan eyi iknimeh noiva monamikti iwa n iknosiwatl; iwa nochteh n iknimeh monamiktiyajkeh iwa non iknosiwatl pero nochteh omijmiktiajkeh, iwa nion seme de yejwah okimák se konetl non siwatl. ³² Sa iksemi, n

siwatl noiva omikki. ³³ Axa, ijkuak non yomikkeh moyolitiskeh, nin siwatl *¿de akin yetos tesiwa, tla n chikome iknimeh omonamiktjeh iwa non siwatl?*

³⁴ Ijkuakó Jesús okinmili:

—Itech nin tlaltípkaktli, n tlakah iwa n siwameh monamiktiah. ³⁵ Pero ijkuak moyolitiskeh non yomikkeh, akimeh Dios kinkawilis makalakitih kan ilwikak; ompa ayakmó monamiktiskeh nion kintemakaskeh impilwah mamonomamiktikah, ³⁶ porke ompa mach ok mikiskeh. Yetoskeh kemi ángelteh, iwa yetoskeh tepilwah de Dios porke omoyolitijkeh. ³⁷ Inewia n Moisés itech itlajkuilol de n tlátsmoli non otlatlaya, otechmatilti non yomikkeh oksepa moyolitiskeh. Ompa nestok kan Moisés kijtoa n Totajtsi, Ye Idios Abraham, Isaac, iwa Jacob. ³⁸ Porke Dios amo Dios de non yomikkeh, yej de akimeh yolitokeh, porke ixpa n Ye nochteh yolitokeh.

³⁹ Ijkuakó sikimeh non kitemachtiah n tlanawatílistli okilijkeh:

—Tlamachti, kuali tlan otikijo.

⁴⁰ Iwa ayakmó omixewijkeh okachi kitlatlajtlaniskeh.

Jesús kintlajtlania n fariseos akin Ikone n Cristo

(Mt. 22:41-46; Mr. 12:35-37)

⁴¹ Jesús okinmili:

—*¿Kenomi nonkijtoah Cristo ikone n David?* ⁴² Porke n David inewia kijtoa itech salmos:

N Totajtsi Dios okili n Noteko:

“Ximoyayanti noyekma,

⁴³ asta manikintlali mokokolikniyah itlampa mokxiwah.”

Sal. 110:1

⁴⁴ Tla inewia n David kilia n Cristo, Noteko; *¿kenomi n Cristo weletis yetos ikone n David?*

Jesús kintelilia non kitemachtiah n tlanawatílistli

(Mt. 23:1-36; Mr. 12:38-40; Lc. 11:37-54)

⁴⁵ Nochteh n tlakah okikaktokah ijkuak Jesús okinmili itlamachtijkawah:

⁴⁶ —Ximotlachilikah de akimeh kitemachtiah n tlanawatílistli, porke kiwilitah nemiskeh ika intlakeh weweyak, iwa kinekih makinyektlajpalokah ijkuak nemi tiánkistli. Iwa itech sinagogas kiwilitah motlaliskeh kan motlaliah n tlayakankeh, iwa kiwilitah motlaliskeh kan okachi kualteh lojarteh itech ilwimeh. ⁴⁷ Noiwa kintlakijkixtiliah n iknosiwameh, iwa para amaka makimati, satlawel motiotsajtsiliah. Ne nomechilia, ninteh kiseliskeh okachi weyi tlaijywílistli.

21

N iknosiwatl non okitemák nochí tlan okipiaya

(Mr. 12:41-44)

¹ Ijtik Weyi Tiopa, Jesús okimitak n tominyojkeh ijkuak okontlalijtokah intomi kan nochteh okitlaliya. ² Noiwa okitak se probe iknosiwatl ijkuak okintlali ome tomitsitsinteh non amo miak impati. ³ Iwa Jesús okijo:

—De milajka nomechilia, nin probe iknosiwatl, okachi okitemák ke n oksikimeh;

⁴ porke nochteh okitemakakeh tlan ayakmó kitekitiltiah, pero nin probe iknosiwatl okitemák nochí tlan ika panotoskia.

Jesús kinmilia n Weyi Tiopa de Jerusalén kixijxitiniskeh

(Mt. 24:1-2; Mr. 13:1-2)

⁵ Sikimeh okimolijtokah saikpanoa kualsitsinteh n temeh non okintekitiltijkeh ijkuak okichijchijkeh n Weyi Tiopa, iwa keniji kualtsi otlamajmankeh itech itepanwah. Ijkuakó Jesús okijo:

⁶ —Wits tonati ijkuak nochí ni tlan nomejwah nonkitlajtlatokeh kixijxitiniskeh, iwa amo mokawas nion se tetl ikpak ok se.

Ijkí tlamoche was achto de tlajtlamis n tlaltípkaktli

(Mt. 24:3-28; Mr. 13:3-23)

⁷ Ijkuakó okitlajtlanijkeh n Jesús:

—Tlamachti, ¿kemania ijkó tlamoche? iwa ¿tlan monextis ijkuak ijkó ya tlamoche-wati?

⁸ Jesús okijo:

—Ximotlachilikah, iwa amo manomechkajkayawah. Porke miakeh kijtojtiwitseh itech Notoka: “Ne Cristo”; iwa kijtoskeh: “Yoajsiko n tonati.” Amo xikinneltokakah.

⁹ Keman nonkimatiskeh momijmiktilo iwa motekilmakalo, amo ximomojtikah, nochi ni moneki mamochiwa, pero ayamó itlamia n tlaltípkaktli.

¹⁰ Jesús noiwa okinmili:

—N tlanawatijkeh de se weyi tlali motekilmakaskeh iwa n tlanawatijkeh de ok se weyi tlali, iwa n tekiwajkeh de se altepetl motekilmakaskeh iwan tekiwajkeh de ok se altepetl.

¹¹ Tlalolinis chikawak, iwa sentetl yetos apisotl iwa kokólistli, iwa itech ilwikak motas tlan temohti non ayik motika.

¹² 'Pero achto, nomechkitskiskeh iwa nomechtotojtokaskeh. Nomechwikaskeh innawak tekiwajkeh de sinagogas iwa nomechtsakuatiweh. Nomechtemaktiskeh inmak wejweyi tlanawatijkeh iwa gobernadormeh por nonnechlakitat. ¹³ Ijkuakó nomejwah nonweletiskeh nonkintlapowiskeh de Ne. ¹⁴ Amo sa manomechtekipachojto keni-jki nonmotlajtolpalewiskeh ijkuak nonyetoskeh inyakapah n tekiwajkeh, ¹⁵ porke Ne nomechinmakas n tlájtolteh non nomejwah nonkintenkixtiskeh, iwa nion se de akin nomechkokolia kixikos nion nomechtolajtolkopas. ¹⁶ Innewiah nomotajwah, nomokniewah, nomotlakaikniwah iwa non ken nonkinmitah nomechtejtemaktiskeh. Iwa sikimeh de nomejwah nomechmiktiskeh, ¹⁷ iwa nochteh n tlaltikpaktlah nomechkokoliskeh por nonnechneltokah, ¹⁸ pero nion se nomotsonkal polewis.

¹⁹ 'Iwa tla nochi nonkixikoskeh, nonmomakixtiskeh.

²⁰ Ijkuak nonkinmitaskeh n soldadojteh yokiyawalojkeh n Jerusalén, ijkuakó kuali xikmatikah ya kixixitiniskeh. ²¹ Ijkuakó, akimeh yetoskeh Judea, macholokah kan tepemeh; iwa akimeh yetoskeh Jerusalén noiwa makisakah, iwa akimeh yetoskeh intlala amo mamokopakah Jerusalén. ²² Porke itech nekateh tonatijmeh Dios tetlaijyowiltis, ijkó kemi ijkuilitok itech itlajkuilol Dios. ²³ ¡Miálmasteh n siwameh akimeh itech nonteh tonatijmeh kokoxtitoskeh de konetl noso matlachichitijtokah! Porke yetos miak tlaijyowílistli itech nin tlaltípkaktli, iwa ikualanilis Dios wits ipan ninteh tlakah. ²⁴ Sikimeh kinmiktiskeh, iwa oksikimeh kintsakuatiweh itech oksikimeh tlalmeh. Iwa non amo judíojteh kitlajtlaksaskeh n Jerusalén, asta ijkuak Dios kijtos matlami tlan kichijtokeh n tlakah non amo judíojteh.

Ne Non onimochi ni tlakatl oksepa niwalmokopas

(Mt. 24:29-31, 42-44; Mr. 13:24-27)

²⁵ Ijkuakó motaskeh neskáyolteh itech tonati, itech metsi iwa itech sítlalteh; iwa itech n tlaltípkaktli n tlakah san moixtlapololtijtoskeh iwa momojtiskeh ijkuak ijkyukas n weyi atl iwa n ameméolteh. ²⁶ N tlakah tlawelmomojtiskeh ijkuak kajsikamatikah tlan panos itech nin tlaltípkaktli; porke asta n chikawálisteh non kateh ilwikak bibiokaskeh. ²⁷ Ijkuakó nechitaskeh Ne Non onimochi ni tlakatl, niwaltemotiwihs itech se metxli ika noweletilis iwa ika se weyi tláwili. ²⁸ Ijkuak pewas ijkó tlamoche, ximoyolchikawakah iwa xiajkotlachiakah porke san nima nomechmakixtikih.

Nigoskuawitl

(Mt. 24:32-35; Mr. 13:28-31)

²⁹ Jesús noiwa okinmili nin tlapoálistli:

—Xikitakah n igoskuawitl, noso ok se tlatoockali. ³⁰ Ijkuak nonkitah yopé mokopina, nonkimatiyah waljsi n tonala. ³¹ Ijkó noiwa, ijkuak nonkitaskeh ijkó ya tlamochejtok, xikmatikah itlanawatil Dios ya waljsi.

³² 'De milajka nomechilia, nochi ni tlamoche, iwa n tlakah non axa yolitokeh kitaskeh. ³³ N ilwikak iwa n tlaltípkaktli pojpoliwiseh, pero notlajtol ayik pojpoliweis.

³⁴ 'Ximotlachilikah; amo xiktlakuawakah nomoyolo ika tlan amo kuali, amo san xitlakuajtinemikah, amo xitlawantinemikah iwa amo xikkawilikah manomechtekipacho tlan onka itech nin tlaltípkaktli. Porke Ne san nonkisaki itech neká tonati, iwa amo nikneki ijkó nomechajsiki. ³⁵ Yetos kemi se tékochtli non amo mota iwa wetsiskeh nochteh n tlakah non nemi itech nin tlaltípkaktli. ³⁶ Xiijsatokah, iwa nochipa ximotiot-sajtsiljtokah para weletis nonmakisaskeh de nochí tlan panos, iwa ijkó nonweletiskeh nonmoketoskeh nonawak Ne Non onimochi ni tlakatl.

³⁷ Jesúz otlamachiaya tlajka kan Weyi Tiopa, iwa de yuak, oyaya kan olivostepetl iwa ompa omokawayá. ³⁸ Iwa nochí tonati, miakeh oyayah kan Weyi Tiopa san kualka para kikakiskeh n Jesúz.

22

Motlatlalwiah kenijki kikitskiskeh n Jesúz (Mt. 26:1-5, 14-16; Mr. 14:1-2, 10-11; Jn. 11:45-53)

¹ Yowalajsia n ilwítl ikuak mokua paj non amo kipia levadura, non okiliayah n ilwítl de Paskua. ² N tiopixkeh non tlayakantokeh iwa non kitemachtiah n tlanawatlistli, okitemoliayah kenijki kimiktiskeh n Jesúz. Pero mach oweletiah porke okinmawiliyah n tlakah non iwa onemiah.

³ Ikuakó, satanás okimoaxkati n Judas Iscariote akin tewa iwan májtlaktli iwa n ome tlatematiltijkeh. ⁴ Ye okimitato n tiopixkeh non tlayakantokeh iwa non okimokuit-lawiayah n Weyi Tiopa, inwah omotlapowitz tlan kichiwaskia para kinmaktilis n Jesúz. ⁵ Yejwah saikpanoa opakmikeh iwa okilijkeh kimakaskeh tomi. ⁶ Judas omoyekka inwah, iwa opé kitemolia kemanía weletis kinmaktilis n Jesúz, pero ikuak amo makitakah n tlakah.

Itlamachtijkawah kimajmanah n tlákuali de Paskua

(Mt. 26:17-29; Mr. 14:12-16; Jn. 13:21-30; 1 Co. 11:23-26)

⁷ Oajsko n ilwítl de Paskua ikuak mokua n paj non amo kipia levadura iwa kimiktiah n ichkatsi. ⁸ Ikuakó Jesúz okintítlanki n Pedro iwa Juan, iwa okinmili:

—Xikmajmanatih n tlákuali de Paskua.

⁹ Yejwah okitlajtlanjkeh:

—¿Kani tikneki matikmajmanatih?

¹⁰ Jesúz okinnankili:

—Ikuak nonkalakitiweh Jerusalén, nonkinamikiskeh se tlakatl kimamajti iaxoktsi. Xikkuitlapontokakah asta itech kali kan kalakiti, ¹¹ iwa xiklikah n tekowa: “N Tlamachtijlani: ¿Kanin kajki n kuarto kan kimomajsewis n tlákuali de Paskua iwan itlamachtijkawah?” ¹² Ikuakó ye nomechititis se weyi kuarto kan tlamajmantos, non kajki tlakpak; ompa xikmajmanakah n tlákuali de Paskua.

¹³ Yejwah oyájkeh iwa okajiskeh nochí kemi Jesúz okinmilika, iwa okimajmankeh n tlákuali de Paskua.

Jesúz kimomajsewia n iksemi tlákuali

(Mt. 26:20-25; Mr. 14:17-21; Jn. 13:21-35)

¹⁴ Ikuak ya motlamajsewiskiah, Jesúz omoyayanti iwa n májtlaktli iwa ome itlamachtijkawah. ¹⁵ Iwa okinmili:

—¡Satlawel yoniktlawelnekto n ikmomajsewis nin tlákuali de Paskua nomowah, acho de nimikkis! ¹⁶ Porke de milajka nomechilia, amo n ikmomajsewis oksepa nin tlákuali asta ikuak tikmosepanmajsewiskeh kan Dios tlanawatijtok.

¹⁷ Ikuakó Jesúz okónanki se kopa, omotlasojkama inawak Dios, iwa okijo:

—Xikonikah non nochteh. ¹⁸ Ne nomechilia mach nikonis oksepa iayo n uvas, tlamo asta maajsiki n tonati ikuak Dios pewas tlanawatis.

¹⁹ Otlanki okónanki n paj iwa omotlasojkama inawak Dios; okitlatlajkotlápanki iwa okinmajmák itlamachtijkawah iwa okinmili:

—Ye ni nokuerpo non niktemaka por nomejwah. Ijkí xikchiwakah para non-nechilnamikiskeh.

²⁰ Ijkuak yokimomajsewijkeh n paj; okónanki n kopa iwa okijto:

—Nin kopa ye noesso non ika timotlajtolsenkawa, iwa motoyawas por nomejwah.

²¹ 'Pero axa, akin nechtemaktis kajki nowa itech mesa. ²² Porke Ne Non onimochi ni tlakatl, nimikkis ijkó kemi Dios kimonekiltia, pero, jmialma n tlakatl akin nechtemaktis!

²³ Ijkuakó opé motlatlajtlaniah akin kitemaktiskia.

Itlamachtijkawah motlatlajtolkopah akin okachi weyijkatitok

²⁴ Otlanki yejwah opé motlatlajtolkopah akin okachi weyijkatitoskia. ²⁵ Pero Jesús okinmili:

—N reyes moweyiliah iwa kinnajnawatiah n tlakah de non altepetl, iwa n tlakah de non altepetl kinnotsah kualteh n tlakah. ²⁶ Pero nomejwah amo ijkó xikchiwakah, yej akin weyijkatitok, amo mamoweyili; iwa akin teyakana, noiwa makimati matetlakita. ²⁷ ¿Akin okachi weyijkatitok?, ¿akin sa kitlateekiliah matlakua, noso akin tlateeka? ¿Amo okachi weyijkatitok akin sa kitlateekiliah matlakua? Pero Ne nika nomowah kemi se non tlateeka.

²⁸ 'Iwa nomejwah nochipa nontlajyowijtinemih nowa. ²⁹ Yika, Ne nomechtalisis xitlanawatikah, ijkó kemi Notajtsi onechtlali manitlanawati, ³⁰ para ximotlamajsewikah iwa xikonikah ipan nomesa kan nitlanawatia. Noiwa para nonmoyayantiskeh iwa nonkinmixkomakaskeh n májtlakteh iwa ome familias de Israel.

Jesús kitematiltia Pedro kijtoskia amo kixmati

(Mt. 26:31-35; Mr. 14:27-31; Jn. 13:36-38)

³¹ Satepa okijto:

—¡Simón, Simón, xikkaki! N satanás yonomechtlájtlanke para nomechtsejtselos kemi kitsejtseloah n trigo; ³² pero Ne yonimotiotsajtsili para amo xikpolo motlaneltokalis. Iwa ijkuak timoyolpatlas, xikinyolchikawa mokniwah.

³³ Pedro okili n Jesús:

—¡Noteko, nimotemaka nias mowa maya manechtsakuakah noso manechmiktikah!

³⁴ Jesús okili:

—Pedro, Ne nimitsilia achto de tlakuikas n kaxtil, te tikijtos eyi welta, “Amo nikixmati.”

Yoajsiko n ora para kiyeyjekoskeh n Jesús iwa itlamachtijkawah

³⁵ Ijkuakó Jesús okinmili:

—Ijkuak onomechtítlanke, amo ononkiwikakeh nomopuxa, nion nomopuxajtomí, nion oksikimeh nomokakuah, ¿itla onomechpolo?

Yejwah otlanankilijkeh:

—Amitla otechpoloh.

³⁶ Ijkuakó Jesús okinmili:

—Pero axa, akin kipia se ipuxa, makimowikili noiwa ipuxajtomí, iwa akin amo kipia iespada, makinamaka se ikoto iwa makimokuili se iespada. ³⁷ Porke Ne nomechilia moneki mamochiwa tlan ijkuitlitok itech itlajkuilol Dios: “Okitakeh kemi yaskia se tlakatl amo kuali.” *Is. 53:12* Porke nochí tlan ijkuitlitok de Ne moneki mamochiwa.

³⁸ Ijkuakó yejwah okilijkeh:

—Noteko, nika kateh ome espadajteh.

Jesús okinnankili:

—Ya kuali ka.

Jesús motiotsajtsilia kan huerto de Getsemani

(Mt. 26:36-46; Mr. 14:32-42)

³⁹ Jesús okiski de Jerusalén iwa oyá kan olivostepetl, kan nochipa onmotiotsajtsiliaya. Itlamachtijkawah noiwa oyajkeh íwa. ⁴⁰ Ijkuak okalakitoh kan olivostepetl, Jesús okinmili itlamachtijkawah:

—Ximotrotsajtsilikah, para amo manomechyoltilana n tlajtlákoli.

⁴¹ Nima omikuani ixwejkatsi kemi sempóali metro, iwa ompa omotlankuáketski iwa opé motrotsajtsilia. ⁴² Iwa okijto:

—Notajtsi, tla tikmonekiltia, techachiwili nin tlaijyowílistli. Pero amo mamochiwa kemi Ne nikneki, yej kemi Tejwatsi tikmonekiltia.

⁴³ Ijkuakó okimonextili se ángel de ilwikak non okiyolchikawako. ⁴⁴ Iwa ken satlawel otlaijyowijtoka, okachi omotrotsajtsiliaya, iwa itonil omókopki kemi estli iwa owetsia ixko tlali.

⁴⁵ Ijkuak Jesús otlanki omotrotsajtsili, omókopki kan itlamachtijkawah; iwa ken satlawel omoyolkokoayah, okochtlamilajkeh.

⁴⁶ Iwa okinmili:

—¿Tleka nonkochtokeh? Ximewakah iwa ximotrotsajtsilikah para amo manomechyoltilana n tlajtlákoli.

Kikitskiah n Jesús

(Mt. 26:47-56; Mr. 14:43-50; Jn. 18:2-11)

⁴⁷ Jesús okintlapowijtoka itlamachtijkawah ijkuak okalakikoh miakeh tlakah. Judas seme de n májtlakteh iwa ome itlamachtijkawah okwalinyakantiwalaya, niman omikuani inawak Jesús para kiixtennamikis. ⁴⁸ Ijkuakó Jesús okili:

—Judas, ¿techixtenamiki para manechkitsikah, iwa ijkó techtemaktia Ne Non onimochi ni tlakatl?

⁴⁹ Akimeh okatkah iwan Jesús, ijkuak okitakeh tlan otlamochijtoka, okitlajtlanjkeh:

—Tejwatsi, ¿tikneki matikinkojkokah ika toespadajwah?

⁵⁰ Ijkuakó seme de yejwah okikojo se itékitki n tiópixki non okachi otlayakantoka, ni okitekili inakas non iyekma. ⁵¹ Pero Jesús okili:

—Xikinkawakah, jayakmó xikinkojkokah!

Ijkuakó Jesús okitelkoli inakas non tlakewale, iwa ovalpajtik. ⁵² Otlanki, Jesús okinmili n tiópixkeh non tlayakantokeh, iwa non otlamokuitlawiayah kan Weyi Tiopa iwa n tetajmeh non tlayakantokeh kan tiopa, non okikitsikoh:

—¿Ononwalajkeh ononnechkitsikoh ika espadajteh iwa ika kuawitl kemi niyetoskia se ichtek? ⁵³ Ixmostla onikatka nomowah kan Weyi Tiopa, iwa ayik ononnechtelkojkeh. Pero ye ni nomoora ijkuak tleyua iwa nomejwah nonweletih nonkichiwhah nomoteki.

Pedro kijtoa amo kixmati Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Ijkuakó okikitsikkeh n Jesús, iwa okiwakakeh icha n tiópixki non okachi otlayakan-
toka, iwa n Pedro san wejka okintokaya. ⁵⁵ Ompa itlajkotia n patio otlatlatijkeh,
okiyawalojkeh n tlékuili iwa omotlajtlajkeh; noiwa n Pedro omotlali inwah. ⁵⁶ Ijkuakó
se iteska n tiópixki non okachi otlayakantoka okitak n Pedro ewatok inakastla n tlékuili,
okisentlajtlatak iwa okijto:

—Nin tlakatl noiwa okatka iwa n Jesús.

⁵⁷ Pero n Pedro mach okimokuiti, iwa okijto:

—Siwatl, ne mach nikixmati.

⁵⁸ Okachi satepa ok se tlakatl okitak n Pedro iwa okili:

—Te noiwa seme de yejwah.

Pero Pedro okijto:

—Mach ne, otimoixtlapololti.

⁵⁹ Kemi se ora okachi satepa, ok se tlakatl noiwa okili:

—De milajka nin tlakatl tewa íwa, ye noiwa walewatok de Galilea.

⁶⁰ Ijkuakó Pedro okijto:

—Tlakatl, mach nikmati tlan tikijtojtak.

Ijkuak Pedro ok otlajtojtaka, owlalakuikak n kaxtil. ⁶¹ Ijkuakó n Toteko omókopki iwa
okitak n Pedro, ijkuakó Pedro okilnamik tlan Jesús yokilijka: “Ijkuak tlakuikas n kaxtil,
te yotikijto eyi welta amo nikixmati.” ⁶² Ijkuakó Pedro okiski iwa satlawel ochokak.

Kipijpinatiah n Jesús

(Mt. 26:67-68; Mr. 14:65)

- ⁶³ Akimeh okimokuitlawijtokah n Jesús okipijpinawiayah iwa okitekilmayah.
⁶⁴ Okiixtsajtsakeh, okiixwiwitekiah iwa okiliayah:
 —¡Techili, akin omitsmák!
⁶⁵ Iwa ika tlájtolteh pitsotikeh okipijpinawiayah.

Kiteixpantiah n Jesús inawak Sanedrín

(Mt. 26:59-66; Mr. 14:55-64; Jn. 18:19-24)

- ⁶⁶ Ijkuak owaltláneski, omoololojkeh n tetajmeh non tlayakantokeh kan Weyi Tiopa, noiwa n tiopixkeh non tlayakantokeh iwa non kitemachtiah n tlanawatílistli, iwa okiixpantitoh n Jesús innawak n Sanedrín.* Iwa ompa okitlajtlanijkeh:

⁶⁷ —Techili, ¿te ti Cristo?

Ye okinnankili:

—Tla nomechilis Ne Ni Cristo, mach nonnechneltokaskeh. ⁶⁸ Desde tla Ne nomecht-lajtlanis itla, mach nonnechnankiliskeh. ⁶⁹ Desde axa, Ne Non onimochi ni tlakatl, niewatos iyekma Totajtsi Dios Akin kipia nochí weletílistli.

⁷⁰ Ijkuakó nochteh okitlajtlanijkeh:

—¿Tejwatsi Ikone Dios?

Jesús okinmili:

—Milák, Ne Ikone n Totajtsi Dios kemi nomonewiah yononkijtojkeh.

⁷¹ Ijkuakó yejwah okijtojkeh:

—¿Tlan ok para tikintlatlajtlaniskeh oksikimeh? Tonewiah yotikkakeh tlan okijo.

23

Jesús inawak Pilato

(Mt. 27:1-2, 11-14; Mr. 15:1-5; Jn. 18:28-38)

- ¹ Ijkuakó nochteh owalmokeketskeh, iwa okiwikakeh n Jesús inawak Pilato. ² Ompa opé kiteiliah, iwa okijtojkeh:

—Otikitakeh nin tlakatl kimpajsolojtinemi n tlakah. Ye kijtojtinemi amo matiktlaxt-lawilikah impuestos n César, iwa kijtoa ye n Cristo, iwa kijtoa Ye rey.

³ Ijkuakó Pilato okitlajtlani n Jesús:

—¿De milajka te inrey n judíojteh?

Jesús okinankili:

—Milák, ijkó ken yotikijo.

⁴ Ijkuakó Pilato okinmili n tiopixkeh non tlayakantokeh iwa nochteh n tlakah:

—Ne amitla amokuali nikajsi itech nin tlakatl.

⁵ Pero yejwah okachi okualankeh iwa okijtojkeh:

—Kimpajsolojtinemi nochteh n judiojteh ika itlamachtilis. Opé Galilea, iwa nika yokalakiko.

Jesús ixpa Herodes Antipas Primero

- ⁶ Ijkuak Pilato ijkí okikak, otlájtlanki kox non tlakatl walewatok de Galilea. ⁷ Ijkuak okilijkeh Jesús owalewatoka de Galilea, okitítlanki kan Herodes, gobernador de Galilea. Itech nonteh tonatijmeh Herodes okatka Jerusalén. ⁸ Ijkuak Herodes okitak n Jesús satlawel opaki; porke miakeh omotlapowiayah de Jesús iwa yowejka okinekia kixmatis, iwa okinekia kitas se neskayotl. ⁹ Herodes okitlatlajtlani n Jesús, pero Ye machitla okinankili. ¹⁰ Ompa okatkah n tiopixkeh non tlayakantokeh iwa non kitemachtiah n tlanawatílistli, akimeh okitlawelteiliayah n Jesús. ¹¹ Ijkuakó Herodes Antipas Primero iwa isoldadojwah fiero okitotkijkeh n Jesús, iwa para okachi fiero kipijpinawiskeh

* 22:66 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kuali kitlakitah itlanawatil Moisés.

okitlakentijkeh kemi yetoskia Rey, iwa n Herodes oksepa okitítlanki kan Pilato. ¹² Pilato iwa n Herodes omokokoliayah, pero non tonati opé moyekwikah.

Kitemaktiah n Jesús para makimiktikah

(Mt. 27:15-26; Mr. 15:6-15; Jn. 18:39—19:16)

¹³ Ijkuakó n Pilato okinmoololah n tiopixkeh non tlayakantokeh, n tekiwajkeh iwa nochteh n tlakah, ¹⁴ iwa okinmili:

—Nomejwah ononnechalikilijkeh nin tlakatl, porke nonkijtoah kimpajsolojtinemi n tlakah. Ne yoniklatlajtlani nomoixpah, iwa yononkikakeh amitla amokuali nikkajxililia ika tlan nomejwah nonkiteiliah. ¹⁵ Nion Herodes mach okijo kox tlajtlakole nin tlakatl, yika oksepa otechaltitlanili, porke noiwia amitla okajsík kemi para matikmiktikah.

¹⁶ Nitlanawatis makitsonwitekikah iwa nikkajkawas.

¹⁷ Nochi xiwitl itech ilwital de Paskua, Pilato okimpaktiaya n judíojteh ijkuak okinkajkawiliaya seme de non tsaktokeh. ¹⁸ Pero nochteh otsajtsikeh chikawak:

—¡Xikmiki non tlakatl! ¡Xikkajkawa n Barrabás!

¹⁹ Nin Barrabás otsaktoka porke otemiki iwa okimpajsoloka miakeh tlakah para makixnamikikah n gobierno. ²⁰ Pilato oksepa okintlapowi n tlakah porke okinekia kikajkawas n Jesús. ²¹ Pero yejwah oksepa otsajtsikeh:

—¡Xikkrusifikaro! ¡Xikkrusifikaro!

²² Ipan eyi welta Pilato okinmili:

—¿Tleka nonkinekih mamikki?, ¿tlan amo kuali okichi? Ne mach nikita satlawel tlajtlakole, kemi para makimotlanili imikilis. Nitlanawatis makitsonwitekikah iwa satepa nikkajkawas.

²³ Pero yejwah okachi otsajtsiah chikawak iwa okitlajtlaniliayah makikrusifikaro n Jesús; iwa kemi yejwah satlawel otsajtsiah, okinekiltijkeh n Pilato makinchiwili tlan okitlajtlanilijtokah. ²⁴ Ijkuakó Pilato okichi tlan yejwah okitlajtlanilijkeh, ²⁵ iwa okikajka n Barrabás, non otsaktoka por okimpajsoloka n tlakah iwa por otemiki, otlanki okinnawati isoldadojwah makikrusifikarokah n Jesús kemi yejwah okinekiah.

Kikrusifikaroah n Jesús

(Mt. 27:32-44; Mr. 15:21-32; Jn. 19:17-27)

²⁶ Ijkuak yokiwikayah kikrusifikarotiweh n Jesús, okiyakanamikeh se tlakatl de Cirene non itoka Simón. Ye owalewaya de itlala iwa okitoktijkeh makimama n krus, iwa makikuitlapantoka n Jesús.

²⁷ Miakeh tlakah de Jerusalén okwaltokayah n Jesús. Noiwa miakeh siwameh okichokiliitiayah iwa omoyolkokojtiayah. ²⁸ Pero Jesús okimitak iwa okinmili:

—Siwameh de Jerusalén, amo techchokilikah, yej ximochokilikah iwa xikinchokilikah nomopilwahl. ²⁹ ¡Xikakikah!, witseh tonatijmeh ijkuak kijtoskeh: “Miak yolpakílistli para akimeh amo okimpixkeh impilwahl, nion okonewajtikeh nion otlachichitijkeh.” ³⁰ Ijkuakó n tlakah pewas kinmiliskeh n tepemeh: “Xiwetsikah topah”; iwa kinmiliskeh n tepeyomeh: “Techtlaatikah.” ³¹ Pero tla ijkó kichiwh iwa n kuawitl xoxobik tlan kichiwaskeh ika non yowaki?

³² Noiwa okinwikayah ome ichtekkeh iwa temiktijkeh para kinkrusifikaroskeh inajnakastla n Jesús. ³³ Ijkuak okalakitoh kan tepetl non kiliah Miketsontekomatl, okikrusifikarojkeh n Jesús. Noiwa ompa okinkrusifikarojkeh ome tlachtekeh, se ik iyekma iwa n ok se ik iopochma. ³⁴ Iwa ijkuak yokikrusifikarojtokah, Jesús okijo:

—Notajtsi, xikintlapojpolwi, porke mach kimatih tlan kichiwh.

Iwa n soldadojteh okinmotlatlanilijkeh itlakenwah n Jesús. ³⁵ N tlakah de non altepetl okimawisojtokah, iwa asta n tekiwajkeh okipijpinawiayah n Jesús iwa okijtoayah:

—Oksikimeh okinmakixti, axa, tla de milajka Ye n Cristo itlapejpenil Dios, mamomakixti inewia.

³⁶ N soldadojteh noiwa okipijpinawiayah n Jesús, omopachoayah inawak iwa okitiayah vinagre, ³⁷ iwa okiliayah:

—Tla Te tirey de judíojtih, ximomakixti monewia.

³⁸ Noiwa ik ikuatsontla okikuilijkeh non okijoaya: “Ye ni inrey n judiojteh.”

³⁹ Seme de nonteh ichtekeh non okikrusifikarokkeh inakastla n Jesú, ijkí fiero okiliaya:

—Tla te ti Cristo, monewia ximomakixti, iwa tejwah noiwa.

⁴⁰ Pero non ok se ichtek okajwak iwa okili:

—¿Amo tigmawilia Dios, maya ya tikmati san sika timikiskeh? ⁴¹ Tejwah tikijowij-tokeh nin tlaijywílistli porke otikmotlanilijkeh, pero nin tlakatl mach itla okichi.

⁴² Ijkuakó okili n Jesú:

—Techilnamiki ikuak pewas titlanawatis.

⁴³ Jesú okinankili:

—De milajka axa nimitsilia: tiyetos nowa kan moitstika Notajtsi.

Mikki n Jesú

(Mt. 27:45-56; Mr. 15:33-41; Jn. 19:28-30)

⁴⁴ Kemi tlajko tonati owaltleyuak itech neká tlali, iwa asta kemi las tres de tiotlak opanok n tleyuálistli. ⁴⁵ N tonati okualok, iwa n kortina de n Weyi Tiopa, otlajkotsáyanki.

⁴⁶ Ijkuakó Jesú ika chikawak tlájtoli okijo:

—Notajtsi Dios, momak niktlalia noespíritu.

Ijkuak ijkó okijo, omikki.

⁴⁷ Ijkuak n soldado tlanawati romano okitak tlan otlamochijk, okiweiykachi Dios iwa okijo:

—Nin tlakatl milák yekmilajka.

⁴⁸ Nochteh non ompa otlamawisojtokah, ijkuak okitakeh nochí tlan otlamochijk, owalyayajkeh incha iwa omoelpanwitektiayah. ⁴⁹ Pero nochteh akimeh okixmatiah n Jesú, iwa n siwameh non ovalayah iwan Jesú desde Galilea, san wejka okoniiotkah tlan otlamochijtoka.

Kitoakah n Jesú

(Mt. 27:57-61; Mr. 15:42-47; Jn. 19:38-42)

⁵⁰ Okatka se kualtlakatl non omonotsaya José, owalewatoka de se altepetl non itoka Arimatea. Ye noiwa tewa otekiwijtitoka kan Sanedrín. ⁵¹ Nin José noiwa okichiaya ijkuak Dios pewas tlanawatis, yika mach okipakti tlan okichijkeh non de Sanedrín. ⁵² Ijkuakó n José okitato n Pilato iwa okitlajtlanili ikuerpo n Jesú. ⁵³ Satepa okitemowito de kan krus iwa okikemelo ika se tlakemitl, otlanki okikalakito kan se miketékochtli non oichkuatoka itech tetl kan ayamaka okitlalpachoayah. ⁵⁴ Non tonati yomotlatlalijtokah para n sábado non yowalajsia.

⁵⁵ N siwameh akimeh ovalajkeh de Galilea iwan Jesú, oyajkeh okitatoh n miketékochtli, iwa okitakeh kenijki okiwilankeh n kuerpo. ⁵⁶ Iwa ijkuak owlomokopkeh incha, okinmajmankeh ajwiakpajmeh, iwa non sábado omosewijkeh ijkó kemi kijtoa n tlanawátili.

24

Jesú moyolitia

(Mt. 28:1-10; Mr. 16:1-8; Jn. 20:1-10)

¹ Semi san kuinal, itech ipewaya n samano, n siwameh oyajkeh kan otoooktoka n Jesú, iwa okinwikayah ajwiakpajmeh non yejwah yokichijchijkeh, noiwa oksikimeh siwameh oyayah ínwah. ² Ijkuak n siwameh okalakitoh kan okitookakeh Jesú, n tetl non okitentsaktoka n miketékochtli yokachijk. ³ Iwa okalakeh, pero mach okajsikeh ikuerpo n Toteko Jesú. ⁴ Yejwah ayakmó okimatiah tlan kichiwaskeh. San nima ome tlakah non otlakentsotlaniah, okinmonextilijkeh innakastla. ⁵ Kemi yejwah satlawel omomojijkeh, omotlankuaketskeh asta okitelkotoh n tlali ika inmixkuak, pero nonteh tlakah okinmilijkeh:

—¿Tleka nonkitemoah kan yomikkeh, Akin yolitok? ⁶ Mach nikan ka, Ye yomoyoliti. Xikilnamikakah tlan onomechili ikuak ok okatka Galilea, ⁷ noiva onomechili Ye Akin omochi tlakatl kitemaktiskiah inmak n tlajtlakolejkeh, iwa kikrusifikaroskiah, pero ipan eyi tonati moyolitiskia.

⁸ Ikuakó n siwameh okilnamikeh tlan Jesús okimilika, ⁹ iwa ikuak yomokopatoh de kan miketékochtli, nochi tlan yejwah okitakeh ompa, n siwameh okintlapowijeh n májtlakteh iwa n se itlamachtijkawah iwa akimeh ompa okatkah. ¹⁰ N siwameh yejwah ninteh: María de Magdala, Juana, María, ina n Jacobo, iwa n oksikimeh siwameh. ¹¹ Pero itlamachtijkawah okimoliayah chamo kuatlapolojtokeh, iwa mach okinneltokakeh.

¹² Pero n Pedro okistewak iwa omotlelo kan miketékochtli, iwa ikuak oontláchixki tlajtitik, sanwel okimitak n tsótsoleh tlakaltechitokeh. Ikuakó omókopki icha, iwa satlawel okitlajtlachialti tlan otlamochijka.

*Jesús kinmonextilia itech ojtli de Emaús
(Mr. 16:12-13)*

¹³ Non tonati, ome itlamachtijkawah oyayah para n altepetl non itoka Emaús, non omokawaya kemi májtlaktli iwa n se kilómetro wejka de Jerusalén. ¹⁴ Yejwah omotlatlapowijtiayah tlan otlamochijka. ¹⁵ Iwa ikuak yejwah omotlatlapowijtiayah iwa omotlatlajtolkopayah, Jesús inewia omíkuani innawak iwa opé nejnemi ínwah. ¹⁶ Pero maya okitayah, mach okixmatkeh. ¹⁷ Ikuakó Jesús okintlajtlani:

—¿Tlan semi nonkimolijtiwh? —¿Tleka nonmoyolkokoah?

¹⁸ Se de yejwah, non omonotsaya Cleofas, okinankili:

—Nochteh n tlakah kimatekeh tlan otlamochi kan Jerusalén itech ninteh tonatijmeh.
—Te timokalotijtok ompa iwa amo tikmati?

¹⁹ Ikuakó Jesús okintlajtlani:

—¿Tlan otlamochi?

Yejwah okinankilijkeh:

—¿Amo otikma tlan okitoktijkeh n Jesús non owalewatoka de Nazaret? Ye se profeta weletini itech nochi tlan okijoaya iwa tlan okichiwaya inawak Dios iwa innawak n tlakah.

²⁰ —¿Amo otikma n tiopixkeh non tlakantokeh sansikah iwa n totekiwajkawah okitemak-
tijkeh para makitlajiyowiltikah iwa makimiktikah? ²¹ Tejwah otimoyolchikawayah itech porke otikneltokayah Ye akin kimakixtiska nochi Israel. Pero axa ya kipia eyi tonati ijkó otlamochi. ²² Iwa axa, sikimeh siwameh non towah mopoah yotechmomojtijkeh, porke yejwah san kuinal oyajkeh kan miketékochtli. ²³ Amo okajsikeh ikuerpo Jesús. Ikuakó ovalajkeh otechilikhok okimitakeh sikimeh ángelteh non okimilijkeh Jesús yolitok. ²⁴ Okachi satepa, sikimeh tlakah non towah mopoah oyajkeh kan miketékochtli, iwa okajsitoh kemi n siwameh otechilijkeh, pero mach okitakeh n Jesús.

²⁵ Ikuakó Jesús okinmili:

—¿Namejwah yolk nonteajsikamatih, tleka owi nonkineltokah tlan okitemachtijkeh n profetas! ²⁶ —¿Mach amo omonekia matlajiyowi n Cristo iwa satepa kiweyijkachiwaskiah?

²⁷ Ikuakó Jesús opé kinmajsikamatiltia itlajkuilol n Moisés iwa n profetas kan tlapoah de Ye.

²⁸ Ikuak okalakitoh Emaús, Jesús omochi kemi ok oyaya okachi tlayakapa. ²⁹ Pero yejwah okitlatlautijkeh mamokawa, iwa okilijkeh:

—Ximokawa towah, yopé tleyua.

Ikuakó Jesús okalak itech non altepetl iwa omoka inwah. ³⁰ Iwa ikuak yoewatoka inwah kan motlamajsewiskiah, okónanki n paj, omotlasojkama inawak Dios, iwa okinmajmák makimomajsewikh. ³¹ Ikuakó okimachilijkeh kemi owlmoixtlajtlapojkeh, iwa okiyekixmatkeh Ye n Jesús, pero Ye san ovalpoliwik. ³² Iwa yejwah opé kimoliah:

—Satlawel otiyoltlatlayah keman otechtlapowijitiwalaya itech ojtli, noiva kemi otechilijtiwalaya tlan kijtosneki itlajkuilol Dios.

³³ Ijkuakó, owalmokeketskeh okonankeh ojtli iwa omokopkeh Jerusalén; ompa okinmajsitoh n májtlaktli iwa n se itlamachtijkawah iwa n oksikimeh non ompa okatkah,
³⁴ iwa yejwah okimilijkeh:

—Milák, n Toteko Jesús yomoyoliti, iwa n Simón yokitak.

³⁵ Satepa yejwah ome okinmatiltijkeh tlan omochijkeh itech ojtli, iwa okimilijkeh kenijke okiyekixmatkeh n Jesús ikuak okitlajkotlápanki n paj.

Jesús kinmonextilia itlamachtijkawah.

(Mt. 28:16-20; Mr. 16:14-18; Jn. 20:19-23)

³⁶ Itlamachtijkawah okimolijtokah tlan omochijkeh, ikuakó Jesús owalmonexti intlajko.

³⁷ Yejwah saikpanoa omomojtijkeh iwa okiyeyekoliayah chamo okitlajtlatokah se espíritu. ³⁸ Pero Jesús okinmili:

—¿Tleka nonmotlajtlachialtiah? ¿Amo nonkineltakah kox Ne? ³⁹ Xikinmitakah nomawah iwa nokxiwah. Techtelkokah iwa techitakah; porke se espíritu amo kipia inakayo nion iomiowah kemi Ne nikimpia.

⁴⁰ Ijkuak Jesús ijkó okinmili, okimititih imawah iwa ikxiwah. ⁴¹ Pero ken opakmiktakah iwa ok omotlajtlachialtijtokah, amo okiyekneltokayah kox Ye n Jesús, yika Jesús okinmili:

—¿Nonkipiah itla tlan se kimomajsew?

⁴² Ijkuakó okonmakakeh tlajko michi tléwaki, ⁴³ iwa Ye okiseli iwa okimomajsewi inmixpah.

Jesús kintitlani itlamachtijkawah makitetlapowikah n kualitlátoli

(Mt. 28:16-20; Mr. 16:15-18; Jn. 20:21-23)

⁴⁴ Otlanki Jesús okinmili:

—Tlan yonimochi ye tlan onomechilijka ikuak onikatka nomowah. Onomechili nochitlan ikuilitok itech itlanawatil Moisés iwa itech intlajkuilolwah n profetas iwa itech salmos, ye tlan nimochiwaskia.

⁴⁵ Ijkuakó n Jesús okinmajsikamatilti tlan okijoaya itlajkuilol Dios, ⁴⁶ iwa okinmili:

—Nochi ni ikuilitok iwa ijkó Ne onimochi, porke saman nimikiskia, iwa ipan eyi tonati nimoyolitiskia. ⁴⁷ Itech Notoka xikimilikah kenijke moyolpatlaskeh inawak Dios iwa kenijke kintlapojpolwiliskeh de intlajtlakolwah. Xipewakah nika Jerusalén iwa satepa itech nochteh tlalmeh de nin tlaltíkpaktli. ⁴⁸ Nomejwah ononkitakeh tlan onipanok.

⁴⁹ Techkakikah, Ne nomechaltitlanilis tlan Notajtsi onomechkakiti. Pero xiyetokah nika Jerusalén, asta ikuak nonkiseliskeh n weletílistli non wits de ilwikak.

Jesús tlejko ilwikak

(Mr. 16:19-20)

⁵⁰ Satepa, Jesús okinwík itlamachtijkawah asta Betania. Ompa okinmajkok imawah iwa okintiochi. ⁵¹ Iwa ikuak okintiochijtoka, omoixkoyanti iwa okiwakakeh ilwikak.

⁵² Niman, ikuak otlankeh okiweyijkachijkeh, omokopkeh Jerusalén ika miak pakílistli, ⁵³ iwa ixmostla okitlakuikiliayah Dios kan Weyi Tiopa.

N Kualitlántoli non Okikuilo San Juan

Itlajtol n Totajtsi Dios omochi tlakatl

- ¹ Ijkuak ayamó opewaya n tlaltíkpaktli, yokatka n Tlájtoli,
iwa non Tlájtoli okatka iwan Dios,
iwa non Tlájtoli* Ye Dios.
- ² Nin Tlájtoli yokatka iwan Dios ijkuak okichijchi n tlaltíkpaktli.
- ³ Ika nin Tlájtoli, okichijchi nochí tlan onka, iwa tla amo por Ye, amitla yetoskia. *Col. 1:15-17*
- ⁴ Itech Ye onka Yolílistli, iwa non Yolílistli Ye n Tláwili Akin kintlawilia n tlaltikpaktlakah.
- ⁵ Nin Tláwili tlawia kan tleyua, iwa n sentleyuálistli mach weleti kisewia non Tláwili.
- ⁶ Okatka se tlakatl itoka Juan, non Dios okwaltítlanki. ⁷ Juan owala otetlapowiko de
nin Tláwili (Cristo), para ijkó nochteh makineltokakah. ⁸ Juan amo ye n Tláwili, sanwel
otetlapowiko de non Tláwili. ⁹ Ye n milajka Tláwili, non kintlawilia nochteh n tlakah
itech nin tlaltíkpaktli.
- ¹⁰ Neka Tlájtoli okatka itech nin tlaltíkpaktli, iwa Ye okichijchi nochí n tlaltíkpaktli
pero n tlaltikpaktlakah mach okixmatkeh akin Ye. ¹¹ Owala innawak ichanikniwah, pero
yejwah mach okiselijkeh. ¹² Pero akimeh okiselijkeh iwa okineltokakeh, Ye okinkawili
mamochiwakah ipilwah Dios. ¹³ Ninteh amo otlakatkeh kemi tlakatih n tlaltikpaktlakah,
yej otlakatkeh kemi tepilwah de Dios porke Ye ijkó okimonekilti matlakatikah inawak.
- ¹⁴ Non Tlájtoli omókopki Tlakatl, iwa towa ochanchiwako. Tejwah otiktakeh imawis-
tilis, iwa non mawistílistli kipia non san Ye ikone n Totajtsi Dios, porke otechititi nochí
itla sojtlalis iwa nochí tlan ye milajka.
- ¹⁵ Juan otetlapowi de non Tlájtoli. Iwa chikawak otlajto, iwa okijo:
—Ye nin tlakatl non ne onomechiliaya. N tlakatl non satepa wits, Ye okachi
weyijkatitok ke ne, porke Ye yokatka ijkuak ne ayamó onitlakatia.
- ¹⁶ Nochi tlan Ye kipia tejwah tiksélijtiwitseh, nochipa topah momiakilia itlatiochiwalis.
- ¹⁷ Moisés otechmák n tlanawátili, pero por Cristo Jesús owala n tla sojtlálistli iwa tlan
milák. ¹⁸ Amaka tlakatl yokitak Totajtsi Dios, pero Ikone non san Ye se Akin noíwa Dios,
Akin nochipa nechonitok iwan Itajtsi, Ye Akin otechixmatiltiko.

Juan non tlakuatekia kiteixmatiltia n Cristo Jesús (Mt. 3:11-12; Mr. 1:7-8; Lc. 3:15-17)

- ¹⁹ Ye ni tlan Juan otlapoaya ijkuak n judíojteh de Jerusalén okintitlankeh sikimeh
tiopixkeh iwa levitas makitlajtlanitih n Juan akin ye. ²⁰ Okimili tlan milák iwa okimokuiti:
—Mach ne ni Cristo.
- ²¹ Ijkuakó yejwah oksepa okitlajtlanijkeh:
—¿Akin te? ¿Te n profeta Elías?
- Juan okinnankili:
—Amó, mach ne.
—Techili, ¿Te n profeta?
- Ye okinnankili:
—Amó.
- ²² Ijkuakó okilijkeh:
—¿Akin te kiné? Moneki tikinmiliskeh itla akimeh otechaltitlankeh. ¿Techili, akin te?
- ²³ Juan okinnankili:
—Ne non nitetsajtsilia kan tlaltejtéyinki iwa nikijtoa: “Xikmilawah iojwiu n Toteko”
—ijkó kemi okijto n profeta Isaías. *Is. 40:3*
- ²⁴ N fariseos okintitlankeh sikimeh makitlajtlanitih n Juan
- ²⁵ —Tla te amo Ti Cristo, nion ti Elías, nion ti profeta, ¿tleka titlakuaatekia?

* *1:1 Tlájtolikijtosneki Cristo*

²⁶ Juan okinnankili:

—Ne nitlakuaatekia ika atl, pero nomowah kajki se Akin nomejwah amo nonkixmatih.

²⁷ Milák, Ye satepa wits, iwa ne mach nitlawelkuali kemi para nikkaktojtomas.

²⁸ Nochi ni otlamochi itech altepetl de Betania, ik nepa lado de n río Jordán, kan Juan otlakuaatekijtoka.

Jesús Ye Iichkatsi n Totajtsi Dios

²⁹ Ipan ok se tonati, Juan okitak n Jesús okinamikiwalaya iwa okijo:

—Xikitakah, Ye Ni Iichkatsi Dios, non kitekixtilis nochí intlajtlakol n tlaltikpaktlakah.

³⁰ De Ye onitlajo: “Satepa wits se tlakatl Akin okachi weyijkatitok ke ne, porke Ye yokatka ikuak ne ayamó onitlakatia.” ³¹ Ne nonewia amo onikixmatia. Yika onitlakuaatekijtiwalaya ika atl para n tlakah de Israel makixmatikah Ye.

³² Juan noiwa okijo:

—Ne onikitak n Espíritu owaltemok de ilwikak kemi se palomatsi, iwa omotlaliko itech Jesú. ³³ Ne ayamó onikixmatia. Pero Akin onechaltítlanki manitlakuaatekiki ika atl, onechili: “Ikuak tikitas n Espíritu waltemos iwa motlaliki itech se tlakatl, Ye Akin tlakuaatekis ika n Espíritu Santo.” ³⁴ Ne yonikitak, yika, nomechilia nik Ye Ikone Dios.

Non sakinika itlamachtijkawah n Jesús

³⁵ Ikuak owalmostlatik Juan oksepa ompa okatka iwa ome itlamachtijkawah. ³⁶ Iwa ikuak okitak Jesú opanoaya, Juan okijo:

—Xikitakah, nin tlakatl Ye Iichkatsi n Totajtsi Dios.

³⁷ Ikuak n ome itlamachtijkawah n Juan okakeh tlan okijo, oyajkeh iwan Jesú.

³⁸ Ikuakó Jesú oontláchixki ik ikuilapa, iwa ikuak okinmitak okiwaltokayah, okintlajtlani:

—¿Tlan nonkitemoah?

Yejwah okinankilijkeh:

—Rabí —non kijtosneki tlamachti—, ¿kan tichanti?

³⁹ Jesús okinnankili:

—Xiwikh iwa xikitakah.

Ikuakó yejwah oyajkeh iwan Jesú iwa okakeh kan chanti. Yokatka kemi las cuatro de tiotlak. Ompa omokajkeh iwan Jesú non tonati.

⁴⁰ Andrés ikni n Simón Pedro, ye seme de nonteh ome non okakeh tlan okijo n Juan, oyajkeh iwan Jesú. ⁴¹ Andrés achto okajsik ikni Simón, iwa okili:

—Yotikajsikeh n Mesías —noni kijtosneki n Cristo noso non Dios okipéjpenki.

⁴² Andrés okiwík ikni Simón inawak Jesú, iwa ikuak Jesú okitak okili:

—Te ti Simón ipiltsi n Jonás, axa yetos motoka Cefas —kijtosneki Pedro.†

Jesús kinotsa n Felipe iwa Natanael

⁴³ Owalmostlatik Jesú okisentlali yas kan tlali de Galilea. Ompa okitak n Felipe, iwa okili:

—Xiwiki nowa.

⁴⁴ Felipe owalewatoka itech altepetl de Betsaida. Andrés iwa n Pedro noiwa de ompa.

⁴⁵ Felipe okitemoto n Natanael iwa okili:

—Yotikajsikeh n tlakatl non okitene Moisés iwa n profetas itech intlajkuilowah. Ye n Jesú ipiltsi n José non walewatok de Nazaret.

⁴⁶ Natanael okili:

—¿Weletis kisas itla kuali de Nazaret?

Felipe okinankili:

—Xiwiki, iwa xikitaki.

⁴⁷ Ikuak Jesú okitak Natanael okualajsia, okijo:

—Nika wits se tlakatl non milák Israelita, non amo kimati tlakajkayawa.

⁴⁸ Ikuakó Natanael okitlajtlani:

† ^{1:42} N tlájtoli ‘cefas’ itech arameo kijtosneki ‘tetl’

—¿Kenomi techixmati?
 Jesúz okinankili:
 —Ijkuak otikatka itlampa n igoskuawitl, achto de mitsonnotsaskia n Felipe, Ne yonimitsitak.
⁴⁹ Natanael okili:
 —¡Tlamachti, Tejwatsi Ti Tekone de Dios! ¡Tejwatsi Rey de Israel!
⁵⁰ Jesúz okinankili:
 —¿Techneltoka san por onimitsili onimitsitak itlampa n igoskuawitl? Te tikitás itla okachi wejweyi ke ni.
⁵¹ Jesúz noíwa okijo:
 —De milajka, de milajka nomechilia, nomejwah nonkitaskeh n ilwikak tlapotok, iwa iángelwah n Dios tlejkoskeh iwa temoskeh notech Akin onimochi ni tlakatl.

2

Se ilwitl kan monamiktiah itech altepetl de Caná de Galilea

¹ Eyi tonati satepa okatka se ilwitl kan monamiktilo itech se altepetl de Caná itech tlali de Galilea. Iwa imamá n Jesúz ompa okatka. ² Jesúz iwa itlamachtijkawah noíwa okintlwijkeh itech non ilwitl. ³ Iwa ijkuak otlanki n vino, imamá n Jesúz okiliko:

—Ayakmó kipiah vino.
⁴ Pero Jesúz okinankili:
 —¿Siwatl, tleka ne techilia? Ayamó ajsi noora.
⁵ Pero imamá n Jesúz okinmili non tetlamakatokeh:
 —Xikchiwakah nochí tlan Ye nomechilis.
⁶ Ompa okatkah chikwase ajpasteh* non ika okipixtokah inmau, iwa okintekitiltiayah ijkuak omomapajpakayah noso omochipawayah n judíos, ijkó kemi kijtoa intlanawatil, itech ninneh ajpasteh oakiah mákuili poali litro atl. ⁷ Jesúz okinmili non olatetekatokah:
 —Xikintetemitikah ika atl n ajpasteh.
 Yejwah okintetemitijkeh asta opiaujkeh, ⁸ ijkuakó Jesúz okinmili:
 —Axa xikkixtikah siki iwa xikwikilikah akin kiyakantok n ilwitl.
 Yejwah ijkó okichijkeh. ⁹ Akin otlayakantoka itech ilwitl okiyeko n atl, non Jesúz okíkopki vino. Ye amo okimatia de kan owala, sanwel okimatiah non olatetekatokah porke yejwah okikixtijkeh non atl. Ijkuakó n tlayakantok okínotski n novio, ¹⁰ iwa okili:
 —San akin yetos achto kitemaka n kuali vino, iwa ijkuak n tlatlálwilteh satlawel yokonikeh, ijkuakó kinmajmakah ok se vino. Pero te sakin otikkixtiko non okachi kuali vino.
¹¹ Itech Caná de Galilea, Jesúz okichi non sakinika milagro. Ika non milagro omotak milák weletini, yika itlamachtijkawah okineltokakeh.
¹² Satepa, Jesúz iwa imamá, iwa ikniwah iwa itlamachtijkawah owaltemokeh kan altepetl de Capernaúm iwa ompa omokajkeh kanaj kech tonati.

Jesúz kinkixtia n tlasemankeh kan Weyi Tiopa

(Mt. 21:12-13; Mr. 11:15-18; Lc. 19:45-46)

¹³ Ijkuak yowalajsia n ilwitl de Paskua inmilwiu n judíojeteh, Jesúz otleykok Jerusalén. ¹⁴ Iwa kan Weyi Tiopa okinmajsito non kinnamakah torojteh, ichkameh iwa palomajtsitsinteh, noíwa ompa okatkah n tomintlapatlakeh. ¹⁵ Ijkuak Jesúz okimitak, okichijchi se chikote iwa okwalinkixti de kan Weyi Tiopa ika nochí intorojwah iwa inmichkawah. Okintlamochili ipan tlali intomi n tomintlapatlakeh. Okinxitronkopili inmesajwah iwa intomi oxixitikak. ¹⁶ Iwa akimeh okinnamakatokah palomajtsitsinteh okinmili:

—¡Xikinkixtikah de nika! ¡Amo xiktiankiskopakah icha n Notajtsi Dios!
¹⁷ Ijkuakó, itlamachtijkawah okinamikeh itech tiotlájtoli ijkuitol: “Nikchawatilia mochantsi, kemi se tletl nechtlamia.” ^{Sal. 69:9}
¹⁸ Ijkuakó n judíojeteh okitlajtlanijkeh:

* 2:6 kemi sien litros, n griego kijtoa: ome noso eyi metretas.

—¿Tlan weletis technextilis para tikitaseh kox milák te omitsmakakeh non tekiwajyotl?

¹⁹ Jesús okinnankili:

—Xikxixitinikah nin tiopa, iwa ipan eyi tonati oksepa nikajkokuis.

²⁰ Ijkuakó n judíojteh okilijkeh:

—Ome pójali iwa n chikwase xiwitl (46) owejkajkeh okichijchijkeh nin tiopa; ¿Iwa Te tikjitoa ipan eyi tonati tikajkokuis?

²¹ Keman Jesús okitene n tiopa, Ye otlajtojtoka de ikuerpo. ²² Yika, ijkuak Jesús omoyoliti, itlamachtijkawah okilnamikeh tlan okimilija, iwa okineltokakeh tlan kijtoa itlajkuilol Dios.

Jesús kinmixmati inyolo n tlakah

²³ Ijkuak Jesús okatka Jerusalén itech ilwitl de Paskua, miakeh okineltokakeh ijkuak okimitakeh n wejweyi milagros, non Ye okinchiwaya. ²⁴ Pero Jesús mach okinneltokaya, porke yokinmixmatia inyolo. ²⁵ Amo omonekia aka makitlapowi tlanón okiyejyekoliyah n tlakah, porke Ye yokimatich tlan okipiayah itech inyolo.

3

Jesús iwa Nicodemo

¹ Okatka se tlakatl fariseo non itoka Nicodemo, ye okatka tlayakanki judío. ² Ye okitato n Jesús se yúali, iwa okili:

—Tlamachti, kuali tikmatokeh Dios omitsaltítlanki techmachtiki, porke amaka weleti kinchiwa ninteh milagros non Tejwatsi tikinchiwa, tla Dios amo kajki iwa.

³ Jesús okili:

—De milajka, de milajka nimitsilia, amaka weletis kalakis kan Dios tlanawatia, tla amo oksepa tlakati.

⁴ Nicodemo okitlajtlani:

—¿Kenijki weletis se tlakatl non yomochi teta oksepa tlakatis? ¿Weletis oksepa kalakis ijtit imamá iwa oksepa tlakatis?

⁵ Jesús okinankili:

—De milajka, de milajka nimitsilia, akin amo tlakati de atl iwa de Espíritu, amo kalakis kan Dios tlanawatia. ⁶ Akin tlakati itech nin tlaltíkpaktli, ye tlaltíkpaktlakatl. Pero akin tlakati itech Espíritu, ya kipias espíritu de ilwikak. ⁷ Amo ximotlajtlachialti por tlan onimitsili: “Nochteh kipiah de tlakatiskeh oksepa.” ⁸ N ejekatl tlaxojpitsa san kan ik kineki, iwa tikkaki ijkuyuka, pero amo tikmati kan ik walewa nion kan ik yawi. Ijkó noiwa mochiwah akimeh tlakatih itech Espíritu.

⁹ Nicodemo oksepa okitlajtlani n Jesús:

—¿Kenijki weletis mochiwas tlan tikijtoa?

¹⁰ Jesús okinankili:

—¿Amo weyi titlamachti de Israel iwa amo tikkasikamati tlan nimitsilijtok? ¹¹ De milajka, de milajka nimitsilia, tejwah tikijoah tlan tikmatih, iwa titetlapowiah de tlan otiktakeh. Pero nomejwah mach nonkineltokah tlan tomechiliah. ¹² Ne nomechtlapowia ika tlan tlamochiwa itech nin tlaltíkpaktli, iwa amo nonnechneltokah, ¿kenijki nonnechneltokaskeh tla nomechtlapowis de tlan tlamochiwa ilwikak?

¹³ 'Amaka tlejkotika ilwikak, sanwel Ne, Akin onimochi ni tlakatl, non oniwaltemok de ilwikak. ¹⁴ Iwa ijkó kemi Moisés okajkok n koatl kan tlaltejtéyinki, ijkó noiwa moneki nechajkokuiskeh Ne Non onimochi ni tlakatl, ^{Nm. 21:8} ¹⁵ para nochteh akimeh nechneltokaskeh amo mamoixpolokah, yej mayolitokah nochipa kan ilwikak.

Totajtsi Dios saikpanoa okintlasojtlak n tlaltíkpaktlakah

¹⁶ 'Totajtsi Dios saikpanoa okintlasojtlak n tlaltíkpaktlakah, yika okitemakti non sanwel Ye se Ikone, para nochteh akimeh kineltokaskeh amo mamoixpolokah, yej

makipiakah se yankuik nemílistli non ayik tlami. ¹⁷ Dios amo okwaltítlanki Ikone para kintlajtlakoltis n tlaltikpaktlakah, yej okwaltítlanki para kinmakixtis.

¹⁸ 'Akin kineltoka Ikone n Totajtsi Dios, amo kitlajtlakoltiskeh. Pero akin amo kineltoka, Dios kitlajtlakoltis porke amo okineltokak itech Itoka non san Ye se Ikone n Totajtsi Dios. ¹⁹ Akimeh amo kineltokah Dios, kintlajtlakoltis. Porke ikuak owala n Tlawili itech nin tlaltíkpaktli, okachi okiwilitakeh n tleyuálistli iwa amo n tlawili. Yika okichiwayah tlan amokuali. ²⁰ Nochtek akimeh kichiwayah tlan amokuali, kikokoliah n Tlawili. Amo mijkuaniah inawak n Tlawili, para amo mamota tlan amokuali kichiwayah. ²¹ Keman akimeh kichiwayah tlan kuali, mijkuaniah inawak n Tlawili, ijkó mamota kichijtokeh tlan Dios kimonekiltia.

Juan Tlakuatekiani oksepa tetlapowia de Jesús

²² Okachi satepa, Jesús iwa itlamachtijkawah oyajkeh kan tlali de Judea, iwa ompa omokajkeh kech tonati, iwa otlakuaatekiayah. ²³ Juan noiva otlakuaatekijtoka itech altepetl de Enón, inakastla n altepetl de Salim, porke ompa okatka miak atl. Iwa miakeh tlakah oyayah inawak Juan iwa Ye okinkuaatekiaya. ²⁴ Itech nonteh tonatijmeh ayamó okitsakuayah n Juan.

²⁵ Ikuakó sikimeh itlamachtijkawah n Juan omotlatlajtolkopkeh iwan se tlakatl judío de kenikki se moyolchipawas inawak Dios. ²⁶ Ikuakó okilitoh n Juan:

—Tlamachti, akin okatka mowa ik nepa lado de n río Jordán, de akin tejwatsi otechtlapowi, noiva ya tlakuaatekijtok, iwa nochtek yawih inawak.

²⁷ Juan okinnankili:

—Se tlakatl amo weletis itla kiselis, tla amo kimaktilia de ilwikak. ²⁸ Nomejwah nomonewiah ononnehchkakeh ikuak onomechili nik ne amo ni Cristo, sanwel onechtilanke iyakapa. ²⁹ Kan monamiktilo, n novio mokawa iwan novia, iwa iamigo n novio paki ikuak kikaki itlajtol n novio. Ijkó kiné, ajositok nopakilis. ³⁰ Jesús moneki okachi maweyixti, iwa ne manitskitsintia.

Jesús walewatok de ilwikak

³¹ 'Akin walewatok de ilwikak okachi weyijkatitok. Akin walewatok itech nin tlaltíkpaktli, tlajtoa de tlan onka itech nin tlaltíkpaktli. Pero Akin walewatok de ilwikak Ye okachi weyijkatitok ke nochtek. ³² Ye kitematiltia tlan yokitak iwa yokikak, pero amaka kineltoka tlan kitematiltia. ³³ Pero akin kineltoka tlan Ye kitetlapowia, kinextia nik Dios kijtoa tlan milák. ³⁴ Porke Akin Dios okwaltítlanki, tlajtoa de itlajtol Dios, porke Dios amo kitemaka n Espíritu san ajachi. ³⁵ N Teta kitlasojtla Ikone, iwa okimák makinawati noch. ³⁶ Akin kineltoka Ikone Dios, yolitos nochipa kan ilwikak. Pero akin amo kineki kitlakitas Ikone Dios, amo yolitos kan ilwikak yej kiselis ikualanilis Dios.

4

Jesús iwa n siwatl de Samaria

¹ N fariseos okimatkeh Jesús okimpiaya okachi itlamachtijkawah iwa okachi okinkuaatekiaya ke Juan. ² Pero Jesús amaka okikuuateki, yej san itlamachtijkawah.

³ Ikuak Jesús ijkó okima, okiski de Judea iwa omókopki kan tlali de Galilea.

⁴ Iwa kan ik yaskia, okipiaya de panos kan tlali de Samaria. ⁵ Ijkó kiné, Jesús okalakito itech se altepetl de Samaria non itoka Sicar, inakastla n tlali non Jacob okiaxkatili ipiltsi José. ⁶ Ompa okatka n atékochtli non okiliyah poso de Jacob. Jesús omotlali inakastla n atékochtli porke osotlawatoka de onejnentiwala. Okatka kemi tlajko tonati. ⁷ Ikuakó se siwatl de Samaria okikixtiko atl, Jesús okili:

—Techonmaka siki atl, maniatli.

⁸ Itlamachtijkawah yoyajtokah kan altepetl okikuatoh tlan kikuaskeh.

⁹ Ikuakó n siwatl de Samaria okinankili:

—¿Tleka techtlajtlanilia atl, amo tikmati ne de Samaria iwa tejwatsi judío? N judíos amo monotsah iwa non de Samaria.

¹⁰ Ijkuakó Jesús okinankili:

—Tla tikixmatiskia tlan Dios kitetliokolia iwa tikmatiskia akin mitstlajtlanilijtok atl, te monewia tiktajtlaniliskia atl, iwa Ye mitsmakaskia n atl non ika tiyolitos nochipa.

¹¹ N siwatl okili:

—Tlakatl, n atékochtli wejkatla iwa amo tikpia tlan ika tikixtis atl. ¿Kan tikixtis nin atl non ika niyolitos nochipa? ¹² Towejkatata Jacob otechkajtewili nin atékochtli. Ye, ipilwah iwa iyolkawah nika oatlikeh. ¿Mach te okachi tiweyixtok ke ye?

¹³ Jesús okinankili:

—Nochteh akimeh nika atlih, oksepa amikiskeh, ¹⁴ pero akin konis n atl non Ne nikmakas, ayik oksepa amikis. Porke n atl non Ne nikmakas, mochiwas itech ye kemi se améyali, kan mextos n atl non ika yolitos nochipa.

¹⁵ Ijkuakó n siwatl okili:

—Tlakatl, techmaka kiné non atl, ijkó ayakmó niamikis, iwa ayakmó oksepa nikixtiki atl nika.

¹⁶ Jesús okili:

—Xio xiknotsati mookich iwa oksepa xiwiki.

¹⁷ N siwatl okinankili:

—Ne mach nikpia nookich.

Jesús okili:

—Milák tlan tikijtoa, nik amo tikpia mookich, ¹⁸ porke yotikimpapatlak mákuilteh tlakah, iwa non axa iwan tika noiva amo mookich. Milák tlan tikijtoa.

¹⁹ N siwatl okili n Jesús:

—Tlakatl, nikita tejwatsi tiprofeta. ²⁰ Towejkatata wah okiweyiliyah Dios itech nin tepetl. Pero nomejwah non de Judea nonkijtoah moneki matikweyilikah Dios kan Jerusalén.

²¹ Jesús okili:

—Siwatl, xikneltoka, ajsiki tonati ijkuak nomejwah weletis nonkiweyijkachiwaskeh Dios maya amo nonwitseh itech nin tepetl nion nonyaskeh Jerusalén. ²² Nomejwah mach nonkixmatih akin nonkiweyijkachiwah, pero tejwah tijudíojteh tikixmatih Akin tikweyijkachiwah, porke n temakixtílistli wits por n judíojteh. ²³ Pero ajsiki n tonati, iwa ya yoajsiko, ijkuak akimeh de milajka kiweyijkachiwah Dios, kiweyijkachiwah Totajtsi ika inmespíritu iwa ika tlan milák, porke Totajtsi kintemoa akimeh kiweyijkachiwaskeh. ²⁴ Dios, Ye Espíritu, iwa akimeh kiweyijkachiwah moneki makiweyijkachiwakah ika nochi inyolo iwa de milajka.

²⁵ N siwatl okili:

—Ne nikmatok wits n Mesías —non Itoka Cristo—, iwa ijkuak Ye wits, techajsikamatiltis nochi.

²⁶ Jesús okinankili:

—Ye Ne, Akin axa timotlapowijtok íwa.

²⁷ Ijkuakó oajsikoh itlamachtijkawah n Jesús iwa omotlajtlachialtijkeh ijkuak okitakeh n Jesús motlapowijtok iwan se siwatl. Pero amaka omixewi kitlajtlanis tlan okinekia non siwatl, noso tlan okimolijtokah. ²⁸ Ijkuakó n siwatl okikakajte iaxoktsi iwa oyá kan ialtépeu, iwa okinmilito n tlakah:

²⁹ —Xiwickih, xikitakih se tlakatl non onechili nochi tlan onikchi. ¿Amo Ye n Cristo?

³⁰ Ijkuakó n tlakah de non altepetl okiskeh okitatoh n Jesús. ³¹ Ijkuakó itlamachtijkawah okitlatlaujtiyah n Jesús:

—Tlamachti, ximotlamasewi.

³² Pero Ye okinmili:

—Ne nikpia itla tlan nikmomajsewis tlan nomejwah amo nonkixmatih.

³³ Ijkuakó itlamachtijkawah opé motlatlajtlaniah:

—¿Chamo aka okwalikili tlan kimomajsewis?

³⁴ Pero Jesús okinmili:

—Notlakual ye manikchiwa tlan kipaktia Akin onechaltítlanki, iwa maniktلامي iteki.
³⁵ Nomejwah nonkijtoah: “Ok poliwi nawi mestli para mopixkas.” Pero Ne nomechilia: Xiyektlachiakah iwa xikimitakah n tlátootkeh, yotlachikawak iwa ya kuali se pixkas.
³⁶ Akin tlaoololoa kiselia itlaxtlawil, iwa tlan koololoa, koololoa para ayik tlamic, iwa ijkó akin tlatooka iwa akin pixka, sansikah yolkertoskeh. ³⁷ Milák, ijkó kemi kijtoa n tlájtoli: “Se akin tooka, iwa ok se akin pixka.” ³⁸ Ne onomechtítlanki xipixkatih kan amo onontookakeh. Oksikimeh otookakeh, pero axa nomejwah nompixkaskeh kan yejwah otookakeh.

³⁹ Miakeh tlakah de Samaria okineltokakeh n Jesús por tlan okinmatilti neká siwatl, ikuak okinmili: “Ye onechili nochí tlan yonikchi.” ⁴⁰ Yika ikuak n samaritanos ovalajkeh inawak Jesús, okitlatlautijkeh mamokawa ínwah. Iwa Ye omoka ompa ome tonati, ⁴¹ iwa oksikimeh noiva okineltokakeh n Cristo Jesús ikuak okikakeh tlan Ye inewia okimiliaya. ⁴² Iwa okiliyah n siwatl:

—Axa tikneltokah pero amo san por tlan otikijo, yej porke tonewiah yotikkakeh, iwa axa kuali tikmatokeh milák Ye n Cristo, non kinmakixtis n tlaltikpaktlakah.

Jesús kipajtia itelpoch se tekiwa

⁴³ Ome tonati satepa, Jesús okiski de Samaria iwa oyá Galilea. ⁴⁴ Porke inewia n Jesús okijtojka, nion se profeta kitlakitah kan otlakatki. ⁴⁵ Ikuak Jesús okalakito Galilea, n tlakah okiyekselijkeh, porke noiva oyajkeh Jerusalén itech ilwitl de Paskua, iwa ompa okitakeh nochí tlan Ye okichi itech non ilwitl.

⁴⁶ Ikuakó Jesús oksepa omókopki kan altepetl de Caná de Galilea, kan okikopki vino n atl. Ompa okatka se tekiwa de n rey akin okipiaya se itelpoch non omokokoaya. Ye okatka Capernaúm. ⁴⁷ Ikuak n tekiwa okima Jesús omokopato de Judea iwa okalakiko Galilea, okitato iwa okitlatlauji mawia icha iwa makipajtiti itelpoch porke yomiktoka.

⁴⁸ Ikuakó Jesús okili:

—Nomejwah mach nonnechneltokah, tla amo achto nonkitah se milagro.

⁴⁹ Pero itekiwa n rey okili:

—Tejwatsi, xiwalmuikatiwetsi, amo kichiwa mikis notelpoch.

⁵⁰ Ikuakó Jesús okinankili:

—Ximokopa mocha, motelpoch yolitok.

N tlakatl okineltokak tlan Jesús okili, iwa omókopki icha. ⁵¹ Ikuak n tekiwa ya onajsia icha, sikimeh itlakawah okinamikikoh iwa okilijkeh:

—Mopiltsi yolitok.

⁵² Ikuakó ye okintlajtlani kemi tlan oras opé kuali momachilia itelpoch, iwa yejwah okilijkeh:

—Yala, la una de tiotlak, okikajka n totonik.

⁵³ Ikuakó n teta okinamik ipan non ora Jesús okili: “Motelpoch yolitok.” Ye iwa nochí ichantlakawah okineltokakeh n Jesús.

⁵⁴ Ika ni, Jesús okinchi ome milagros, ikuak owlamokopki de Judea iwa okalakiko Galilea.

Jesús kipajtia se tlakatl non amo oweletia onejnemia

¹ Satepa Jesús otlejkok Jerusalén itech tonatijmeh ikuak n judío jteh okichiwayah se ilwitl. ² Ompa Jerusalén kanik kiliyah kaltentli de ichkameh, okatka se tanke non itech tlájtoli hebreo monotsa Betesda. Nin tanke okimpiaya mákuili portalteh. ³ Ompa owejwetokah miakeh kokoxkeh: non amo otlachiayah, koxomeh iwa non oikximijmiktokah, yejwah okichiayah mamolini n atl. ⁴ San kualchiwa se ángel owlemoaya iwa okoliniaya n atl, iwa san akin achto omopolakiaya, opajtia. ⁵ Ompa owetoka se tlakatl non omokokoaya sempóali iwa n káxtoli iwa n eyi xiwitl (38). ⁶ Ikuak Jesús okitak n kókoxki ompa wetok, okajskama yowejka omokokoaya, iwa okili:

—¿Tikneki tipajtis?

⁷ N kókoxki okinankili:
—Tejwatsi, amo nikpia akin nechapolakis ijlik tanke ikuak molinia n atl. Iwa ikuak ya nimopolakiti, ok se achtio mopolakia.

⁸ Jesús okili:

—Ximewa, xikajkokui moperl iwa xinejnemi.

⁹ San nima non tlakatl owalpajtik, okajkok ipetl iwa onéjnenki. Non tonati okatka sábado ikuak mosewia n judíos. ¹⁰ Pero n tlayakankeh judíojteh okilijkeh n tlakatl non opajtik:

—Axa sábado, mach weletis tikmamas moperl.

¹¹ N tlakatl okinnankili:

—Akin onechpajti inewia onechili: “Xikajkokui moperl iwa xajti.”

¹² Ikuakó okitlajtlanjkeh:

—¿Akin omitsili: “Xikajkokui moperl iwa xajti”?

¹³ Pero n tlakatl non opajtik mach okimatia akin okipajti, porke ompa okatkah miakeh tlakah iwa n Jesús ayakmó ompa okatka. ¹⁴ Okachi satepa Jesús okajsito n tlakatl kan Weyi Tiopa iwa okili:

—Techkaki, ken axa yotipajtik, ayakmó oksepa xitlajtlakolchiwa, porke weletis mitsassis ok se kokólistli okachi temohti.

¹⁵ N tlakatl oyá, iwa okinmatiltito n tlayakankeh judíojteh Jesús okipajti. ¹⁶ Yika, n tlayakankeh judíojteh okitotojtokayah n Jesús porke okinchiwaya ninteh milagros itech sábado. ¹⁷ Pero Jesús okinmili:

—Notajtsi nochipa tekiti, yika Ne noiva nitekiti.

¹⁸ Yika, n tlayakankeh judíojteh okachi okinekiah kimiktiskeh, iwa amo san por okixpanawiaya n sábado yej porke noiva okijtoaya Dios Itajtsi, kemi yetoskia Ye noiva Dios.

Ikone Dios kipia weletílistli

¹⁹ Jesús noiva okinmili:

—De milajka, de milajka nomechilia: Ne Akin Ni Tekone amo niweleti nikchiwa itla, san Ne noselti, yej nikchiwa tlan nikita kichiwa Notajtsi. Porke nochi tlan Notajtsi kichiwa Ne noiva nikchiwa. ²⁰ Iwa Notajtsi nechtlasojtlia iwa nechititia nochi tlan Ye kichiwa, iwa okachi wejweyi milagros nechnextilis para nomechtlajtlachialtis. ²¹ Porke ijkó kemi Notajtsi Dios kinyolitía non yomikkeh, ijkó noiva ikone n Dios kinmaka yolílistli akimeh Ye kineki kinmakas. ²² Porke Notajtsi amaka kiyolkuitia, yej onechmák nochi itlanawatil para Ne maniteyolkuiti, ²³ para nochteh n tlaltikpaktlakah makiweyijkachiwakah Ikone Dios ijkó kemi kiweyijkachiwah Dios. Akin amo kiweyijkachiwa n tekone, amo kiweyijkachiwa Dios akin okualtitlanki.

²⁴ 'De milajka, de milajka nomechilia: akin kikaki notlajtol iwa kineltoka Notajtsi Dios Akin onechaltítlanki, ye kipias yolílistli non ayik tlami iwa amaka kitlajtlakoltis. Kijtosneki yomiktoka pero axa ya kipia nemílistli non ayik tlami. ²⁵ De milajka, de milajka nomechilia: ajsitiwits n ora, iwa yoajsiko, ikuak non yomikkeh nechkakiskeh Ne Akin Ni Tekone de Dios, iwa akimeh nechkakiskeh yolitoskeh. ²⁶ Ijkó kemi Notajtsi inewia kipia yolílistli, Ne Ikone noiva onechmák weletílistli para maniktemaka yolílistli. ²⁷ Noiva onechmák tekiwájyotl para manitetlajtlakolti, Ne Non onimochi ni tlakatl. ²⁸ Amo ximotlajtlachialtikah, porke ajsiki n ora ikuak nochteh non yomikkeh iwa tooktokeh kikakiskeh itlajtol. ²⁹ Iwa kisaskeh de inmiketekochwah. Akimeh okichijkeh tlan kuali, moyolitiskeh iwa mach ok ayik mikiskeh, iwa akimeh okichijkeh tlan amokuali, moyolitiskeh para kinyolkuitiskeh.

Sikimeh kiteixmatiltiah Jesús kipia weletílistli

³⁰ 'Ne amitla weleti nikchiwa san tlan notech kisa. Ne nitetlajtlakoltia ijkó kemi Notajtsi Dios nechnawatia, iwa nitetlajtlakoltia kemi moneki, porke mach nikchiwa san tlan ne nikneki, yej nikchiwa tlan kineki Notajtsi Akin onechaltítlanki. ³¹ Tla nomechiliskia san tlan kisa itech ne, tlan nikijtoskia amitla ipati. ³² Pero onka ok se akin

tlajtoa de Ne, iwa nikmatok nik tlan Ye kijtoa de Ne milák. ³³ Nomejwah ononkintitlankeh sikimeh tlakah makitlajtlanith n Juan akin ye, iwa ye okijo tlan milák de Ne. ³⁴ Pero mach moneki aka tlakatl para makimatiyah akin Ne; yej san nomechilnamikcia tlan Juan okijo para weletis nonnechneltokaskeh iwa ijkó ximomakixtikah. ³⁵ Juan okatka kemi se tlawili non oxotlatoka iwa otlawia, iwa nomejwah ononpakeh san kech tonati ika itlawil. ³⁶ Pero Ne nikpia ok se tlajtoli non okachi weyi ke non de Juan: Nochi tlan Ne nikchiwa ye tlan Notajtsi onechnawati manikchiwa, iwa nochi tlan nikchiwa kiteititia nik Notajtsi onechaltítlanki. ³⁷ Notajtsi Akin onechaltítlanki, noiwa kiteititia Akin Ne. Nomejwah ayik nonkikaktikateh itlajtol, nion nonkiitikateh, ³⁸ nion itlajtol amo onkalaki itech nomoyolo, porke amo nontlaneltokah Itech Akin Notajtsi Dios okwaltítlanki. ³⁹ Nomejwah nonkimomachtiah itlajkuilol Dios porke nonkiyejyekolah nomechmakas yolílistli non áyik tlami. Pero itlajkuilol Dios ompa tlajtoa de Ne, ⁴⁰ iwa maya ijkó, nomejwah amo nonkinekih nonwitseh nonawak para nonyolitoskeh nochipa.

⁴¹ 'Ne mach nikselia manechweyilikah n tlaltikpaktlakah. ⁴² Porke Ne nomechixmatok iwa nikmati amo nonkipiah itlasojtlalis Totajtsi Dios. ⁴³ Ne oniwala itech itoka Notajtsi iwa nomejwah amo nonnechseliah. Pero tla aka ok se wits itech ye itoka, nomejwah nonkiseliskiah. ⁴⁴ ¿Kenijki weletis nontlaneltokaskeh, tla san nonkitemojtinemih manomechweyilikah oksikimeh iwa amo nonkitemoah n weyílistli non kitemaka Akin sanwel Ye Dios? ⁴⁵ Amo xikmolikah Ne nomechteilis inawak Notajtsi, yej onka se akin nomechteilis, ye itlanawatil Moisés, akin nomejwah itech nonmoyolchikajtokeh. ⁴⁶ Porke tla milák nonkineltokaskiah tlan okijo n Moisés, noiwa Ne nonnechneltokaskiah, porke ye otlajkuilo de Ne. ⁴⁷ Pero tla amo nonkineltokah tlan Moisés okijuilo, ¿kenijki nonkineltokaskeh tlan Ne nomechilia?

6

*Jesús kintlakualta mákuili mil tlakah
(Mt. 14:13-21; Mr. 6:30-44; Lc. 9:10-17)*

¹ Satepa, Jesús oyá ik nepa lado de lago de Galilea non noiwa itoka Tiberias. ² Iwa miakeh tlakah oyayah iwan Jesús, porke okinmitayah n milagros non Ye okinchiwaya keman okimpajtiaya n kokoxkeh. ³ Otlanki Jesús otlejkok itech se tepetl iwa ompa omotlali iwan itlamachtijkawah. ⁴ Ijkuakó yowalajsia n paskua, inmilwiu n judíojteh. ⁵ Ijkuak Jesús oontláchixki iwa okitak miakeh tlakah omoololojtokah, okili n Felipe:

—¿Kani tikkoatiweh paj para tikintlakualtaiskeh ninteh tlakah?

⁶ Ijkó okili n Felipe san para kitas tlan kijtos, porke Jesús yokimatia tlan kichiawskia.

⁷ Ijkuakó Felipe okinankili:

—¡Ome siento denariojomi paj, amo kajxilis tikinmajmakaskeh ajachitsi!

⁸ Andrés ikni n Simón Pedro, akin noiwa imomachti okilito n Jesús:

⁹ —Nika kajki se telpotsintli, non kimpixtok mákuili pameh de sebada iwa ome michimeh, pero ¿kan matechajxili?

¹⁰ Ijkuakó Jesús okijo:

—Xikinmilikah nochteh mamotlajtlalikah.

Itech non lojar okatka xiuyyo, iwa omotlajtlalikah kemi mákuili mil tlakah. ¹¹ Ijkuakó Jesús okinmónanki n pameh iwa omotlasojkama inawak Dios, otlanki okinmák itlamachtijkawah, iwa yejwah opé kinxejxeliliah nochteh non ompa oewatokah. Noiwa ijkó okichi iwan michimeh, iwa nochteh omotlamajsewijkeh iwa kuali oijixwikeh. ¹² Ijkuak yojixwikeh, Jesús okinmili itlamachtijkawah:

—Xikoololokah nochti tlan omoka amo san maawilti.

¹³ Okoololokeh tlan ayakmó okikuajkeh ika mákuili paj de sebada, iwa okintemitijkeh májtlaqtli iwa ome chikimeh. ¹⁴ Ijkuak n tlakah okitakeh n milagro non Jesús okichi, okijojkeh:

—De milajka, Ye ni n profeta non saman walaskia itech nin tlaltíkpaktli.

¹⁵ Pero Jesús okinmitak yejwah omochijchikajtokah kiwikaskeh para mayeto Inrey. Yika, oksepa oyá iwa otlejkok ikpak tepetl san Ye iselti.

Jesús nejnemi ixko atl

(Mt. 14:22-27; Mr. 6:45-52)

¹⁶ Ijkuak opé tleyua, itlamachtijkawah otemokeh okichiatoh itempa n lago de Galilea. ¹⁷ Otlejkokeh itech se barka iwa opé kikojchalwiah n lago para ajsitiweh kan altepetl de Capernaúm. Ijkuakó yotleyuak, Jesús ayamó okwalinmajsia. ¹⁸ Ijkuakó se ejekatlı chikaktik opé kitlatlamotla n atl. ¹⁹ Iwa yoyayah kemi se mákuili noso chikwase kilómetro itech atl. Okitakeh n Jesús nejnentiwits ixko atl iwa yokualinmasia. Ijkuakó yejwah omomojtijkeh, ²⁰ pero Ye okinmili:

—Amo ximomojtikah, Ne ni Jesús.

²¹ Ijkuakó yejwah opakeh iwa okitlejkoltijkeh itech barka. Iwa san nima n barka oajsito itech tlali kan oyayah.

N tlakah kitemoah n Jesús

²² Owalmostlatik, nochteh n tlakah non omokajkeh ik nepa lado de n lago, okitakeh okatka san se barka, iwa itlamachtijkawah n Jesús oyajkeh inselti, iwa Jesús amo oya inwah. ²³ Satepa, oksikimeh barkas non ovalaya de Tiberias okalakikoh kan ik okikuajkeh n paj, iwa Jesús omotlasojkamah inawak Dios. ²⁴ Yika, ijkuak n tlakah okitakeh Jesús iwa itlamachtijkawah ayakmó ompa okatkah, ottlejkokeh itech nonteh barkas iwa oyajkeh Capernaúm okitemoto n Jesús.

Jesús Ye n paj non kitemaka yolílistli

²⁵ Ijkuak okajsitoh n Jesús ik nepa lado de n lago, okitlajtlanjkeh:

—Tlamachi, ¿kemania otikalakiko nika?

²⁶ Jesús okinmili:

—De milajka, de milajka nomechilia, nomejwah nonnechtemoah amo por ononkajamatkeh tlan kijtosneki n milagro non onikchi, yej porke onomechtakuali asta kan ononmijixwikeh. ²⁷ Amo xitekitakah por n tlákuali non kimati tlami, yej xitekitakah por n tlákuali non ayik tlami iwa kitemaka yolílistli. Non tlákuali Ne nomechmakas porke sanwel Ne Dios onechpéjpenki para nin tekitl.

²⁸ Ijkuakó yejwah okitlajtlanjkeh:

—¿Tlan tekitl moneki matikchiwakah para tiktekitiliskeh Dios?

²⁹ Jesús okinnankili:

—Ye ni tlan Dios okichi, iwa manechneltokakah Ne Akin Ye okuáltlanki.

³⁰ Yejwah okilijkeh:

—¿Tlan milagro techititis para matiktakah iwa timitsneltokaskeh? ¿Tlan weletis tikchiwas? ³¹ Towejkatatawah okikuajkeh n paj non itoka maná kan tlatejtéyinki, ijkó kemi kijtoa itlajkuil Dios: “Paj de ilwikak okinmák makikuakah.” Sal. 78:24; Éx. 16:4-15

³² Jesús okinmili:

—De milajka, de milajka nomechilia: Moisés amo onomechmák n paj non owaltemok de ilwikak, yej Notajtsi Dios Akin nomechmaka n de milajka paj de ilwikak. ³³ Porke n paj non Dios kitemaka ye non waltemoa de ilwikak iwa kinmaka yolílistli n tlaltikpaktlah.

³⁴ Ijkuakó okilijkeh:

—Tejwatsi, techmaka sanwel non paj.

³⁵ Jesús okinmili:

—Non paj ye Ne, akin niktemaka yolílistli. Akin wits nonawak mach ok ayik xitlatlas, iwa akin nechneltoka ayik amikis. ³⁶ Pero ijkó kemi yonomechili, maya yononnechitakeh amo nonnechneltokah. ³⁷ Nochi tlan Notajtsi nechmaka wits nonawak, iwa akimeh witseh nonawak, Ne nikinselis. ³⁸ Porke Ne amo oniwaltemok de ilwikak para nikchiwas tlan Ne nechpaktia, yej para nikchiwas tlan kipaktia Akin onechaltítlanki. ³⁹ Iwa Notajtsi Akin onechaltítlanki, amo kineki manikpolo nion se de nochteh akimeh onechinmák, yej kineki manikinyoliti itech nekateh iksemi tonatijmeh. ⁴⁰ Porke tlan Notajtsi Dios

kineki Ye ni: nochteh akimeh kitaskeh ikone Dios iwa kineltokah, maya mamikakah moyolitiskeh porke Ne nikinyolitis itech n iksemi tonati.

⁴¹ Ijkuakó n judíojteh opé moichtakatlapowiah de Jesús porke okijo: “Ne nipaj non ovaltemok de ilwikak.” ⁴² Iwa okijoayah:

—¿Amo ye nin Jesús, ipiltsi n José? Tejwah tikanmixmatih ipapá iwa imamá. ¿Kenijke kijtoa ovaltemok de ilwikak?

⁴³ Jesús okinmili:

—Ayakmó ximokualankatlapowikah. ⁴⁴ Amaka weletis wits nonawak, tla amo kinotsa Notajtsi Akin onechaltítlanki, iwa Ne nikyolitis itech n iksemi tonati. ⁴⁵ Itech intlajkuilol n profetas ijkuitilitok: “Dios kinmachtis nochteh.” ^{Is. 54:13; Jr. 31:33-34} Yika, nochteh akimeh kikakih Notajtsi iwa kajsikamatih tlan kinmachtia, witseh nonawak.

⁴⁶ 'Amaka yokitak Notajtsi, sanwel Ne Akin niwalewatok de Dios, Ne yonikitak. ⁴⁷ De milajka, de milajka nomechilia: Akin Ne nechneltoka kipia yolílistli non ayik tlami. ⁴⁸ Ne ni paj non kitemaka yolílistli. ⁴⁹ Nomewejkatawah kan tlaltejtéyinki okikuajkeh n paj non itoka maná, iwa maya okikuajkeh non paj omikeh. ⁵⁰ Pero Ye nin paj non waltemoa de ilwikak, akin kikuas non paj, ayik mikis. ⁵¹ Ne nonewia non paj yolitok non ovaltemok de ilwikak. Tla aka kikua non paj, nochipa yolitos. Nokuerpo ye non paj non niktemaka para mayolitokah nochipa n tlaltikpaktlakah.

⁵² Ijkuakó n judíojteh opé motlatlajtolkopah iwa okimoliayah:

—¿Kenomi weletis techmakas matikkaukah ikuerpo?

⁵³ Jesús okinmili:

—De milajka, de milajka nomechilia: Tla nomejwah amo nonkikuaskeh nokuerpo, Ne non onimochi ni tlakatl, iwa tla amo nonkoniskeh noesso, amo kipiah yolílistli. ⁵⁴ Akin kikua nokuerpo iwa koni noesso kipias yolílistli non ayik tlamis, iwa Ne nikyolitis itech iksemi tonati. ⁵⁵ Porke nokuerpo de milajka tlákuiali, iwa noesso de milajka tlaonílistli. ⁵⁶ Akin kikua nokuerpo iwa koni noesso, moseitilijtok nowa iwa Ne íwa. ⁵⁷ Notajtsi Akin onechaltítlanki, yolitok, iwa Ne niyolitok por Ye, ijkó noiwa akin kimomajsew is nogueqrpo, yolitos por Ne. ⁵⁸ Ne Ni paj non ovaltemok de ilwikak, pero nin paj amo kemi n maná non okikuajkeh nomotatawah iwa satepa omijmikeh. Akin kikuas nin paj, nochipa yolitos.

⁵⁹ Jesús ijkí okitemachti kan se sinagoga* kan altepetl de Capernaúm.

Miakeh kikawah n Jesús

⁶⁰ Ijkuak ijkó okikakeh itlamachtijkawah n Jesús, miakeh okijojkeh:

—Nin tlamachtílistli kema chikawak, ¿akin weletis kajsikamatis?

⁶¹ Jesús okimatia itlamachtijkawah omoichtakatlapowiayah ika tlan okijo, iwa okinmili:

—¿Ye ni nomechkuejsoa? ⁶² ¿Tlan nonkimoliah tla nonnechitaskiah Ne Non onimochi ni tlakatl nitlejkos ilwikak kan achto onikatka? ⁶³ N espíritu kimaka yolílistli se kuerpo. N kuerpo mach itla ipati tla amo kipia espíritu. N tlájtolteh non Ne yonomechili wits de n espíritu iwa kimaka yolílistli. ⁶⁴ Pero miálmasteh nomejwah akimeh amo nontlaneltokah.

Jesús ijkó okijo porke desde achto yokimatia akimeh amo kineltokaskiah iwa akin kitemaktiskia. ⁶⁵ Iwa okijo:

—Yika, yonomechili amaka weletis wits nonawak, tla Notajtsi amo kitekawilia.

⁶⁶ Ika noni, miakeh itlamachtijkawah n Jesús okikakajtejkeh iwa ayakmó onemiah íwa.

Jesús techilia kenomi tiyolitoskeh nochipa

⁶⁷ Ijkuakó Jesús okintlajtlani n májtlakteh iwa ome itlamachtijkawah:

—¿Nomejwah noiwa nonkinekih non nechkakajtewaskeh?

⁶⁸ Simón Pedro okinankili:

* 6:59 sinagoga: se kali kan omoololoayah n judíojteh nochí sábado.

—Noteko, ¿Akin ok se íwa tiaskeh? Sanwel Tejwatsi tikpia non tlájtoli non kitemaka yolílistli non ayik tlami. ⁶⁹ Tejwah tikneltokah iwa tikmatih Tejwatsi n Yolchipawak de Dios.

⁷⁰ Ijkuakó Jesús okinnankili:

—Ne onomechpéjpenki nomejwah n májtlakteh iwan ome. Pero seme de nomejwah ye n diablo.

⁷¹ Ijkuak ijkó okijto, Jesús otlaajoaya de Judas Iscariote ipiltsi n Simón, porke ye kitemaktiskia maya okatka seme de n májtlakteh iwa ome itlamachtijkawah.

7

Ikniah n Jesús mach okineltokayah

¹ Satepa ijkuak ijkó yotlamochi, Jesús onemia itech tlali de Galilea, mach okinekia nemis itech altepetl de Judea, porke ompa sikimeh judíojteh okinekiah kimiktiskeh.

² Pero kemi yowalajsia inmilwiu n judíojteh non itoka ilwitl de n akákalteh, ³ ikniyah n Jesús okilijkeh:

—Amo ximokawa nika, xio kan tlali de Judea, ijkó motlamachtiwkawah, kitaskeh tlan tikchiwa. ⁴ Porke akin kineki makixmatikah, mach kichiwa itla san ichtaka. Yej moneki xikinchiwa milagros inmixpa nochteh n tlakah para ijkó nochteh makitakah tlan tikchiwa.

⁵ Ikniah n Jesús ijkó okiliayah, porke nion yejwah amo okineltokayah. ⁶ Yika Jesús okinmili:

—Ayamó walajsi noora para nias ompa, pero nomejwah san tlan oras weletis nonyaskeh. ⁷ N tlaltikpaktlakah mach weletis nomechkokoliskeh, pero Ne nechkokoliah, porke Ne nikinmilia yejwah kichiwha tlan amo kuali. ⁸ Nomejwah xitlejkokah ilwitl. Ne amo nitlejkos porke ayamó walajsi noora.

⁹ Ye ijkó okinmili iwa omoka Galilea.

Jesús yáwi ilwitl non itoka akákalteh

¹⁰ Satepa, ikniyah n Jesús otlejkokeh ilwitl. Ye noiwa otlejkok pero san ichtaka. ¹¹ Itech ilwitl de Jerusalén, n tlayakankeh judíojteh okitemoayah n Jesús iwa omotlajtlaniayah:

—¿Kan ik nentinemi non tlakatl?

¹² Iwa miakeh omoichtakatlapowiayah de Ye. Sikimeh okijtoayah: “Jesús, ye kuali tlakatl.” Pero oksikimeh okijtoayah: “Amó, porke san kinkajkayawa n tlakah.”

¹³ Pero amaka omixewiaya tlajtos de Ye inmiixpa n tlayakankeh judíojteh, porke okinmawiliayah.

¹⁴ Ijkuak yoyaya tlajko ilwitl, Jesús otlejkok kan Weyi Tiopa iwa opé tlamachtia. ¹⁵ N tlayakankeh judíojteh san omotlajtlachialtiayah iwa okijtoayah:

—¿Kenomi nin tlakatl satlawel kimiati miak, iwa amo omixtlamachti?

¹⁶ Jesús okinnankili:

—Notemachtilis amo Ne noaxka, yej de Akin onechaltítlanki. ¹⁷ Akin kineki kichiwas tlan Dios kimonekiltia, kajsikamatis kox notemachtilis walewatok de Dios, noso nikijtoa san tlan Ne nikijtoa. ¹⁸ Akin tlajtoa san tlan ye itlajtol, kichiwa san para makiyekte-newakah n tlakah. Pero Ne nikneki nikweyijkachiwas Akin onechaltítlanki, yika nikijtoa tlan milák iwa ayik nitlakajkayawa.

¹⁹ ¹⁹ Moisés onomechmák n tlanawátili, iwa nion se de nomejwah amo kichiwa tlan kijtoa non tlanawátili. ¿Tleka kiné nonkinekih nonnechmiktiskeh?

²⁰ N tlakah okinankilijkeh:

—Te tikpia se demonio; ¿akin kineki mitsmiktis?

²¹ Jesús okinnankili:

—Se kuali tektil onikchi itech sábado iwa nochteh nomejwah nonmotlajtlachaltiah.

²² Moisés onomechnawati ximosirkunsidarakah, pero non tlanawátili amo walewatok de Moisés, yej de nomowejkatatawhah, iwa nomejwah nonkisirkunsidaroah se konetl maya mayeto sábado ijkuak amo para nontekitiskeh. ²³ Ijkó kiné, nomejwah nonkitlakitah

itlanawatil Moisés, iwa nonkisirkunsidaroah se konetl maski mayeto sábado, porke ijkuakó ochikometik de otlákatki, ¿tleka kiné nonkualaníh nowa por onikpajti se tlakatl ítech sábado? ²⁴ Amo san nima xiktlaítlakoltikah se tlakatl san por ijkó nonkimoliah, yej xiktlaítlakoltikah kemi moneki.

Jesús kinmilia de kan walewatok

²⁵ Ijkuakó sikimeh tlakah de Jerusalén okimoliayah:

—¿Amo nin tlakatl kitemojtinemih para kimiktiskeh? ²⁶ ¡Xikitakah!, tlajtojtok teixpa iwa amitla kiliyah ¿chamo totlayakanwah yokajskamatkeh nin tlakatl Ye n Cristo? ²⁷ Pero tejwah kuali tikmatih kan walewatok nin tlakatl. Pero ijkuak wits n Cristo, amaka kimatis de kan wits.

²⁸ Jesús otlamachtijtoka ítech Weyi Tiopa, iwa ijkuak okikak tlan okijoayah, okijo chikawak:

—¡Nomejwah nonkijoah nonnechixmatih iwa nonkimatih de kan niwalewatok! Pero amo oniwala san por Ne oniknek, yej onechaltítlanki Akin nomejwah amo nonkixmatih. Ye yekmilajka. ²⁹ Ne nikixmati porke inawak oniwala, iwa Ye onechaltítlanki.

³⁰ Ijkuakó n tlayakankeh judíojteh okinekiah kikitskiskeh n Jesús. Pero amaka omixewi okikitski, porke ayamó oajsia iora para kikitskiskeh. ³¹ Pero miakeh okineltokakeh, iwa okijoayah:

—Ijkuak wits n Cristo, ¿kox kinchiwas okachi wejweyi milagros ke nin tlakatl?

N fariseos kintitlaníh insoldadojwah para makikitskikah n Jesús

³² N fariseos okikakeh tlan okijoayah n tlakah de Jesús, yika omotlatlalwijkeh iwa n tiopixkeh non tlayakantokeh, iwa okintitlankeh non otlamokuitlawiayah kan Weyi Tiopa makikitskitih n Jesús. ³³ Ijkuakó Jesús okijo:

—Ne niyetos nomowah sa kanaj kech tonati, tlamic oksepa nimokopas inawak Akin onechaltítlanki. ³⁴ Nomejwah nonnechtemoskeh, pero amo nonnechajsiskeh, porke mach nonweletiskeh nonyaskeh kan Ne nias.

³⁵ Ijkuakó n tlayakankeh judíojteh omotlatlaniayah:

—¿Kan ik yas nin tlakatl, kan amo weletis tikajsiskeh? ¿Chamo kinmachtitih n israelitas non xitintokeh ítech tlali de Grecia, noso innewiah n tlakah de Grecia kinmachtitih? ³⁶ ¿Tlan kijtosneki: “Nonnechtemoskeh pero mach nonnechajsiskeh, porke amo weletis nonyaskeh kan Ne nio”?

N améyali non kichiwa matiyolitokah nochipa

³⁷ Itech iksemi tonati, de non weyi ilwiltl, Jesús omóketski iwa ika chikawak tlájtoli okijo:

—Tla aka amiki, mawiki nonawak iwa maatli. ³⁸ Kemi kijtoa itlajkuilol Dios, akin nechneltokas, ítech iyolo mextos atl non kitemaka yolflistli.

³⁹ Jesús otlaítjotoka de n Espíritu non kiseliskiah akimeh kineltokaskiah. Pero n Espíritu ayamó owaltemoaya porke Jesús ayamó okiseliaya weyílistli.

N tlaltikpaktlakah moxexeloah

⁴⁰ Ijkuakó sikimeh ijkuak okinkakeh ninteh tlájtoltéh, okijojkeh:

—De milajka, nin tlakatl Ye n profeta.

⁴¹ Iwa oksikimeh okijoayah:

—Ye ni n Cristo.

Pero oksikimeh okijoayah:

—¿De Galilea weletis wits n Cristo? ⁴² Itlajkuilol Dios kijtoa Cristo walewatos de n Rey David, de Belén kan ochantitoka n David.

⁴³ Ijkó, n tlakah omoxexelojkeh porke sikimeh amo okineltokayah n Jesús. ⁴⁴ Sikimeh okinekiah kikitskiskeh, pero amaka omixewi okikitski.

N wejweyi tlanawatijkeh mach kineltokah n Jesús

⁴⁵ N tlamokuitlawijkeh de n Weyi Tiopa, oyajkeh innawak n fariseos iwa innawak tiopixkeh non tlayakantokeh, iwa ninteh okintlajtlanjikeh:

—*Tleka amo ononkualikakeh?*

⁴⁶ N tlamokuitlawijkeh otlanankilijkeh:

—*Nion se tlakatl ayik ijkó tlajtoa kemi nin tlakatl!*

⁴⁷ Ijkuakó n fariseos okinmilijkeh:

—*Noiwa nomejwah ononkimokawilijkeh manomechkajkayawa?* ⁴⁸ *Kox aka totlanawati noso aka fariseo okineltokak non tlakatl?* ⁴⁹ Akimeh kineltokah non tlakatl, amo kixmati itlanawatil Moisés, yika Dios kintlaijyowíltis.

⁵⁰ Nicodemo tewa iwan fariseos, akin se yúali okitato n Jesús, okinmili:

⁵¹ —Totlanawatilis amo techkawilia matiktlajtlakoltakah se tlakatl, tla amo achto tikkakih tlan ika kiteiliah.

⁵² Ijkuakó okinankilijkeh:

—*Te noiwa de Galilea? Xikmoyekmachti itlajkuilol Dios iwa tikitas itech Galilea ayik kistika nion se profeta.*

⁵³ Iwa nochteh oyayajkeh inchajcha.

8

N siwatl non okajsito iwan ok se tlakatl

¹ Jesúz oyá kan olivostepetl. ² Ijkuak owatláneski, oksepa oyá kan Weyi Tiopa. Omi-juanijkeh inawak, iwa Ye omotlali iwa opé kinmachtia. ³ Ijkuak Jesúz otlamachtijtoka, n tlamachtijkeh de itlanawatil Moisés iwa n fariseos okualikilijkeh se siwatl non okajsitoh iwan ok se tlakatl non amo iokich itech tlajtlákoli. Yejwah okiketsatoh tlatlajkotiah, ⁴ iwa okilijkeh n Jesúz:

—Tlamachti, nin siwatl otikajsitoh itech tlajtlákoli. ⁵ Itlanawatil Moisés tlanawatia matikinmiktikah ika tetl akimeh ijkó kichiwah.* Tejwatsi, *¿tlan tikijtoa?*

⁶ Yejwah ijkó okilijkeh para kitaskeh tlan kichiwas, iwa ijkó kipiaskeh tlan ika kiteiliskeh. Ijkuakó Jesúz omotolo iwa opé tlajkuilo ixko tlali ika imajpil. ⁷ Pero kemi okachi okitlatlajtlaniayah, Ye omoyékketski iwa okijo:

—Tla aka de nomejwah amo kipia tlajtlákoli, ye achto makimotla ika tetl.

⁸ Jesúz oksepa omotolo iwa ok otlajkuilo ixko tlali. ⁹ Keman okikakeh tlan Jesúz okinmili, se por se oyayajtiajkeh. Achto oyayajkeh non okachi ya wewemeh, iwa ijkuak nochteh yoyayajkeh, sa Jesúz omoka iselti iwan siwatl. ¹⁰ Ijkuakó, Jesúz omoyékketski iwa kemi ayakmaka okitak, okitlajtlani n siwatl:

—Siwatl, *¿kanin kateh non omitsteiliayah? ¿Amaka omitstlajtlakolti?*

¹¹ N siwatl okili:

—Nion se de yejwah Noteko.

Ijkuakó Jesúz okili:

—Nion Ne omitstlajtdlakolti. Xio, iwa ayakmó oksepa xitlajtlakolchiwa.

Jesúz Ye n tláwili itech nin tlaltíkpaktli

¹² Jesúz oksepa okintlapowi iwa okinmili:

—Ne nitláwili itech nin tlaltíkpaktli. Akin wits nonawak, kipias n tláwili non kimakas nemílistli iwa ayik nemis kan tleyua.

¹³ N fariseos okilijkeh:

—San Te monevia timotenewa akin te, yika, tlan tikijtoa mach itla ipati.

¹⁴ Jesúz okinnankili:

—Maya Ne nonewia nimotenewa Akin Ne, tlan nomechilia milák, porke Ne nikmatok kan oniwalewak iwa kan nio. Pero nomejwah amo nonkimatih kan oniwalewak nion kan nio. ¹⁵ Nomejwah nontetlajtlakoltiah kemi kichiwah n tlaltíkpaktlah. Ne amaka niktlajtlakoltia. ¹⁶ Pero tla Ne nitetlajtlakoltia, nikchiwa ika tlan milák, porke amo san Ne noselti nitetlajtlakoltia, yej Ne iwan Notajtsi Dios akin onechaltítlanki. ¹⁷ Itech nomotlanawatil ijkuitilitok, sanwel kiseliskeh intlajtol ome iwa amo san se.

* ^{8:5} Itlanawatil Moisés tlanawatia matikinmiktikah ika tetl san ken ome akimeh ijkó kichiwah, iwa amo san siwatl.
Lv. 20:10.

¹⁸ San Ne nonewia nimoteneva akin Ne, iwa Notajtsi Dios Akin onechaltítlanki, noiva nechteixmatiltia akin Ne.

¹⁹ Yejwah okitlajtlanijkeh:

—¿Kanin kajki Mota?

Jesús okinnankili:

—Nomejwah amo nonnechixmatih, nion nonkixmatih Notajtsi, tla nomejwah nonnechixmatiskiah, noiva nonkixmatiskiah Notajtsi.

²⁰ Ninteh tlájtolteh Jesús okimijo ikuak otlamachtijtoka itech n Weyi Tiopa kan ik okatka n kaxajtomij. Pero amaka okikitski porke ayamó oajsia n tonati para kikitskiskeh.

'Kan Ne nias nomejwah amo weletis nonyaskeh'

²¹ Jesús oksepa okinmili:

—Ne nias, iwa nonnechtemoskeh, pero nonmikiskeh itech nomotlajtlakolwah. Yika, kan Ne nias, amo weletis nonyaskeh.

²² Ikuakó n tlayakankeh judíojteh okijtojkeh:

—¿Chamo kineki momiktis, yika kijtoa kan Ye yas, tejwah mach weletis tiaskeh?

²³ Ikuakó Jesús okinmili:

—Nomejwah nonteaxkawah itech nin tlaltípkaktli, pero Ne niwalewatok de ilwikak. Nomejwah non tlaltípkaktlakah, pero Ne amó. ²⁴ Yika onomechili nonmikiskeh itech nomotlajtlakolwah. Porke tla nomejwah amo nonnechneltokah kox Ne Ni Cristo, nonmikiskeh itech nomotlajtlakolwah.

²⁵ Ikuakó oksepa okitlajtlanijkeh:

—¿Akin te?

Jesús okinnankili:

—Ne yonomechili Akin Ne. ²⁶ Nikpia miak tlájtoli tlan nomechilis iwa miak tlan ika nomechtajtlakoltis, pero Akin onechaltítlanki kijtoa tlan milák, iwa tlan Ne nikinmilia n tlaltípkaktlakah ye tlan onikkak, okijo.

²⁷ Yejwah amo okajsikamatkeh Jesús okintlapowiaya de Itajtsi Dios. ²⁸ Yika Jesús okinmili:

—Ikuak nonnechajkokuiskeh, Ne non onimochi ni tlakatl, ikuakó nonkajsikamatiskeh Ne Ni Cristo, iwa amitla nikchiwa san tlan Ne nikneki. Ne sanwel nikijtoa tlan Notajtsi Dios onechmachti. ²⁹ Porke Akin onechaltítlanki kajki nowa. Amo kema nechkawa noselti, porke nochipa nikchiwa tlan Ye kipaktia.

³⁰ Ikuak Jesús ijkó okinmili miakeh okineltokakeh.

Jesús kinmilia kenomi se makisas itech tlajtlákoli

³¹ Ikuakó Jesús okinmili n judíojteh non okineltokakeh:

—Tla nomejwah nochipa nonkitlakitaskeh notlajtol, milák nonyetoskeh notlamachti-jkawah. ³² Iwa nonkixmatiskiah tlan milák, iwa tlan milák nomechmakixtis.

³³ Yejwah okinankilijkeh:

—Tejwah tiwalewatokeh de Abraham, iwa ayik otikatkah titlanemakteh, ¿kenikki Te tikijtoa techmakixtis?

³⁴ Jesús okinankili:

—De milajka, de milajka nomechilia, nochteh akimeh kichiwa tlajtlákoli kijtosneki n tlajtlákoli kinnawatijtok kemi se tekowa. ³⁵ Se esklavo amo nochipa mokawas ichan iteko. Pero se tekone nochipa yetos mowa. ³⁶ Ijkó kiné, tla ikone Dios nomechmakixtis, nomejwah de milajka nonmomakixtiskeh. ³⁷ Kuali nikmatok nomejwah nonwalewatokeh de Abraham. Pero nonkinekih nonnechmiktiskeh porke amo nonkiseliah notlajtol itech nomoyolo. ³⁸ Tlan onikitak inawak Notajtsi, ye nikijtoa. Iwa nomejwah tlan ononkikakeh de nomota nonkichiwah.

³⁹ Yejwah okilijkeh:

—¡Tejwah titepilwah de Abraham!

Jesús okinmili:

—Tla de milajka nonyetoskiah ipilwah Abraham, nonkichiwaskiah tlan Ye okichi.
⁴⁰ Pero maya yonomechili tlan milák, tlan Dios onechititi, nomejwah nonkinekih nonnechmiktiskeh. ¡Abraham ayik ijkó okichi! ⁴¹ Nomejwah nonkichiwah tlan kichiwa nomota.

Yejwah okinankilijkeh:

—Tejwah amo tiichtakakokoneh, sanwel se totata tikpiyah, iwa Ye Dios.

⁴² Jesús okinnankili:

—Tla de milajka Dios yaskia Nomotajtsi, nomejwah nonnechtasojtlaskiah, porke Ne oniwala de Dios itech nin tlaltípkaktli. Amo oniwala san por Ne oniknek, yej Dios onechaltílanki. ⁴³ ¿Tleka amo nonweletih nonkajsikamatih tlan nomechilia? Porke amo nonkinekih nonkiseliskeh notlajtol. ⁴⁴ Nomejwah nomota n diablo, nomejwah ipilwah, iwa nonkichiwah tlan ye kiwelita. N diablo ye se temikti desde ipewaya n tlaltípkaktli iwa ayik kijtoa tlan milák. Porke ye amo kixmati tlan milák, iwa ijkuak tlajtoa, tlakajkayawa porke ye non iteki. Iwa ye n teta de nochteh non tlakajkayawah. ⁴⁵ Pero kemi Ne nikijtoa tlan milák, yika nomejwah mach nonnechneltokah. ⁴⁶ ¿Akin de nomejwah weletis kijtos ke nikpia itla tlajtlácoli? Iwa tla Ne nikijtoa tlan milák, ¿tleka amo nonnechneltokah?
⁴⁷ Akimeh tepilwah de Dios, kikakih itlajtol Dios. Pero kemi nomejwah amo nontepilwah de Dios, mach nonnechkakih.

Ijkuak Abraham otlákatki Cristo yokatka

⁴⁸ Ijkuakó n tlayakankeh judío jteh okilijkeh:

—Yompa tlan tejwah tikijtoah, te de Samaria iwa tikpixtok se amokuali espíritu.

⁴⁹ Jesús okinnankili:

—Ne amo nikpia se demonio. Ne sanwel nikweyilia Notajtsi, pero nomejwah nonnechmawistetepewah. ⁵⁰ Ne mach niktemoa manechweyilikah. Pero onka se Akin kimonekiltia manechweyilikah, iwa Ye Akin teixkomakah. ⁵¹ De milajka, de milajka nomechilia, akin kitlakita notlajtol, ayik mikis.

⁵² Ijkuakó n tlayakankeh judío jteh okinankilijkeh:

—Axa kuali tikmatih te tikpia se demonio. Abraham iwa nochteh n profetas omikkeh, iwa te tikijtoa: “akin kitlakita notlajtol, ayik mikis.” ⁵³ ¿Mach te okachi tiweyijkatitok ke Totata Abraham? Ye noiya omikki iwa n profetas noiya. ¿Akin te timomachilia?

⁵⁴ Jesús okinnankili:

—Tla san Ne nimoweyijkachiwa, noweyijkachiwalis amitla ipati. Pero Akin nechweyijkachiwa, Ye Notajtsi, Akin nomejwah nonkijtoah Nomodios. ⁵⁵ Pero nomejwah mach nonkixmatih. Ne de milajka nikixmati, iwa tla nikijtoskia amo nikixmati, nixolopijtiskia kemi nomejwah. Pero Ne kema nikixmati, iwa nikchiwa tlan Ye nechnawatia.
⁵⁶ Nomotata Abraham, opaki ijkuak okima niwalaskia, iwa ika itlaneltokalis onechitak iwa opakmik.

⁵⁷ Ijkuakó n tlayakankeh judío jteh okilijkeh n Jesús:

—Ayamó tikpia ome pójali iwa n májtlakatl xiwitl, ¿iwa tikijtoa otikitak Abraham?

⁵⁸ Jesús okinnankili:

—De milajka, de milajka nomechilia: ¡Ijkuak Abraham ayamó otlakatia, Ne yonikatka!

⁵⁹ Ijkuakó yejwah okinmonankeh temeh para kimojmotlaskeh n Jesús. Pero Ye okinmotlaatili, iwa opanok intlajkotiah, iwa okiski de kan Weyi Tiopa.

Jesús kipajtia se tlakatl non amo otlachiaya desde otlákatki

¹ Ijkuak Jesús opanotiaya itech se ojtli, okitak se tlakatl non amo otlachiaya desde otlákatki. ² Iwa itlamachtijkawah okitlajtlanjkeh:

—Tlamachti, ¿tleka ijkó otlákatki nin tlakatl? ¿Akin otlajtlakolchi, itajwah, noso ye inewia?

³ Jesús otlanankili:

—Amo por ye otlajtlakolchi nion por itajwah, yej ijkó otlákatki para mamota ítech, tlan Dios weletis kichiwas. ⁴ Iwa axa kemi ok tlanestok, nikpia niktekitilis Akin onechaltílanki, porke ajsiki n yúali ikuak ayakmaka weleti tekiti.

⁵ Axa, kemi Ne ok nika itech nin tlaltíkpaktli, Ne nitláwili itech n tlaltíkpaktli.

⁶ Ikuak Jesús ijkó okijto, ochijchak ipan tlali, iwa okichijchi siki sokitl. Okinxawili itech ixtololowah n kókoxki, ⁷ iwa okili:

—Ximoixpajpkati kan tanke de Siloé. Siloé kijtosneki Tlatitlánili.

N tlakatl non amo otlachiaya omoixpajpkato, iwa ikuak owalmokopato, yotlachiaya.

⁸ Ikuakó non okixmatiah iwa akimeh okimatiah amo otlachiaya okijtokeh:

—¿Amo ye ni non omijtlaniaya?

⁹ Sikimeh okijtoayah:

—Ye ni n tlakatl.

Oksikimeh okijtoayah:

—Nesi ijkó tlachixtok, pero amo ye.

Pero inewia okimiliaya:

—Ejé, ye ne.

¹⁰ Ikuakó okitlajtlanjeh:

—¿Kenijki ya weleti titlachia?

¹¹ Ye okinnankili:

—Neká tlakatl non Itoka Jesús, okichijchi siki sokitl, onechxawili kan noixtololowah iwa onechili: “Ximoixpajpkati kan tanke de Siloé.” Ne onia iwa ikuak yonimoixpajpk, oniwaltláchixki.

¹² Iwa oksepa okitlajtlanjeh:

—¿Kanin kajki non tlakatl?

Ye okinmili:

—Mach nikmati.

N fariseos kitlatsintokiah n tlakatl non amo otlachiaya

¹³ Ikuakó n tlakatl non amo otlachiaya okiwakakeh innawak n fariseos. ¹⁴ Porke ikuak Jesús okichijchi sokitl iwa okintlapoli ixtololowah n tlakatl, okatka sábado ikuak yejwah mosewiah. ¹⁵ Ikuakó n fariseos oksepa okitlajtlanjeh kenomi otláchixki, iwa ye okinnankili:

—Onechxawili sokitl itech noixtololowah, onimoixpajpk, iwa axa ya nitlachia.

¹⁶ Ikuakó sikimeh fariseos okilijkeh:

—Akin ijkó okichi amo walewatok de Dios, porke amo kitlakita n sábado ikuak moneki se mamosewi.

Pero oksikimeh okijtoayah:

—¿Kenijki weletis se tlajtlakolchi ijkó kichiwas?

N tlakah omoxexelojkeh. ¹⁷ Ikuakó oksepa okitlajtlanjeh n tlakatl non amo otlachiaya:

—¿Iwa te, tlan tikjtoa de neká tlakatl non omitsmák motlachialis?

Ye otlanankili:

—Ne nikjtoa Ye se profeta.

¹⁸ N tlayakankeh judíojteh mach okineltokayah kox milák amo otlachiaya. Ikuakó okinnotskeh intajwah, ¹⁹ iwa okintlajtlanjeh:

—¿Ye ni nomotelpoch non nomejwah nonkijtoah amo otlachiaya ikuak otlákatki?

¿Iwa axa kenomi ya tlachia?

²⁰ N tetajmeh otlanankilijkeh:

—Ye totelpoch, iwa kuali tikmatokeh amo otlachiaya ikuak otlákatki. ²¹ Pero axa, amo tikmatih kenijki ya weleti tlachia iwa amo tikmati akin okintlapoli ixtololowah. Inewia xiktlajtlanikah, ye ya tlakatl iwa weletis nomechilis.

²² N tetajmeh ijkó otlanankilijkeh porke okinmawiliyah n tlayakankeh judíojteh. Porke n tlayakankeh judíojteh yomotlatlalwijkeh ayakmó kinkawiliskiah makalakikah

kan sinagoga* akimeh kijtoskiah Jesús Ye n Cristo. ²³ Yika itajwah okijtokeh: “Ye inewia xiktlajtlanikah porke ya tlakatl.”

²⁴ Ijkuakó n tlayakankeh judíojteh oksepa okinotskeh n tlakatl non achto amo otlachiaya, iwa okilijkeh:

—Techili tlan milák ixpa n Dios, tejwah tikmatokeh non tlakatl, tlajtlakolchi.

²⁵ Ijkuakó n tlakatl non yotlachiaya okinnankili:

—Ne mach nikmati kox tlajtlakolchi noso amó. Sanwel nikmatok, achto amo onitlachiaya iwa axa ya nitlachia.

²⁶ Iwa oksepa okitlajtlanijkeh:

—¿Tlan omitstoki? ¿Kenomi omitsintlapoli moixtololowah?

²⁷ Ye okinnankili:

—Ne yonomechili iwa amo nonnechkakih, ¿tleka nonkinekih oksepa manomechili?
¿Noiwa nomejwah nonkinekih nonyestoskeh itlamachtijkawah?

²⁸ Ijkuakó yejwah fiero okitenejkeh iwa okilijkeh:

—Te yotimochi itlamachtijkau non tlakatl, pero tejwah tiitlamachtijkawah Moisés.

²⁹ Tejwah tikmatokeh Dios okitlapowi n Moisés. Pero non tlakatl, mach tikmatih kan owala.

³⁰ Ijkuakó n tlakatl okinnankili:

—¡Kenijkl! Ye onechintlapoli noixtololowah iwa nomejwah amo nonkimatih kan owala. ³¹ Kuali tikmatih Dios amo kinkaki n tlajtlakolejkeh. Ye sanwel kinkaki akimeh kiweyijkachiwah iwa kichiwah tlan Ye kimonekiltia. ³² Mach ayik tikkakih aka tlakatl makitlachialti se akin amo tlachia desde otlákatki. ³³ Tla nin tlakatl amo walewaskia de Dios, amitla weletiskia kichiwaskia.

³⁴ Yejwah okilijkeh:

—Te otitlákatki ika miak tlajtlácoli, ¿iwa axa tikneki techmachtis?

Ijkuakó okwalkixtijkeh de kan sinagoga.

N tlakah non kijtoah tlachiah pero amitla kimatih

³⁵ Jesús okima n tlakatl non okimák itlachialis okwalkixtijkeh de kan sinagoga, iwa ijkuak okinamik okili:

—¿Te tikneltoka Ikone Dios?

³⁶ Ye okinankili:

—Tejwatsi, techili akin ye iwa nikneltokas.

³⁷ Jesús okinankili:

—Te yotikitak, iwa Ye Akin íwa timotlapowijtok.

³⁸ Ijkuakó n tlakatl omotlankuáketski inawak Jesús iwa okili:

—Nimitsneltoka, Tejwatsi Noteko.

³⁹ Otlanki Jesús okili:

—Ne oniwala itech nin tlaltípkaktli para nikinmilis kox kuali noso amokuali tlan kichiwah n tlaltípkaktlah, iwa non amo tlachiah matlachiakah iwa non tlachiah amo matlachiakah.

⁴⁰ Ijkuakó sikimeh fariseos non ompa okatkah, ijkuak ijkó okikakeh okitlajtlanijkeh:

—¿Kijtosneki tejwah noiwa amo titlachiah?

⁴¹ Jesús okinnankili:

—Tla nomejwah milák amo nontlachiaskiah, amo nonkipiaskiah tlajtlácoli. Pero kemi nomejwah nonkijtoah kuali nontlachiah, yika nonmokawah itech nomotlajtlakolwah.

N tlájpixki iwa ichkameh

¹ 'De milajka, de milajka nomechilia, akin amo kalaki kan ik ikalte n ichkakorral iwa san tsekuini, noni se ichtek. ² Pero akin kalaki kan ik inkalte n ichkameh, ye intlájpixki iwa ye kinmokuitlawia. ³ N kaltentlamokuitlawi kitlatlapolia n tlájpixki, iwa iichkawah

* 9:22 sinagoga: se kali kan omoololoayah n judíojteh nochí sábado.

kitenkakih. Ye kinnotsa iichkawah ika intoka, iwa kinkixtia. ⁴ Iwa ijkuak yokinkixti nochteh iichkawah, kinyakana. Iwa iichkawah yawih ikuitlapa porke kitenkakih. ⁵ Pero se non amo kixmati mach iwan yawi, yej kicholiliskeh porke amo kitenkakih se akin amo kixmatih. ⁶ Jesús okinmili nin tlapoálistli, pero yejwah mach okajsikamatkeh tlan okinekia makajsikamatkah.

Jesús Ye n kuali Tlájpixki

⁷ Ijkuakó Jesús oksepa okinmili:

—De milajka, de milajka nomechilia: Ne n kaltentli kan ik kalakih n ichkameh. ⁸ Nochteh akimeh ovalajkeh achto de Ne, okatkah ichtekah iwa tekajkayajkeh. Pero n ichkameh mach okintenkakeh. ⁹ Ne n kaltentli, akin kalakis itech non kaltentli non Ne nonewia, momakixtis. Kalakis iwa kisas iwa kajsis tlan kikuas.

¹⁰ 'N ichtek sanwel wits para tlachtekis, para temiktis iwa teixpolos. Pero Ne oniwala para nochteh n tlakah makipiakah yolílistli, iwa non yolílistli mamomiakili itech inyolo. ¹¹ Ne nikuali tlájpixki. Se kuali tlájpixki kinmokuitlawia iichkawah, maya makimiktikah.

¹² Pero se akin san tetlajpialia iwa amo iaxkawah n ichkameh, ijkuak kita wits n koyotl kinkakajtewa n ichkameh iwa choloa. Ijkuakó n koyotl kinkitskia sikimeh, iwa oksikimeh kinxijxitinia. ¹³ Ijkuakó non tetlajpialia choloa porke amo kintekipachoa n ichkameh sanwel itlaxtlawil.

¹⁴ 'Ne kuali ni tlájpixki, iwa nikinmixmati akimeh noichkawah, iwa yejwah nechixmatih. ¹⁵ Ijkó kemi Notajtsi nechixmati iwa Ne nikixmati Notajtsi, iwa niktemaka noyolilis por noichkawah. ¹⁶ Noiwa nikimpia oksikimeh ichkameh, non amo kateh ijlik nin korral. Iwa moneki nikualinwikas noiwa. Yejwah nechtenkakiskeh, iwa nochteh yetoskeh sansikah, iwa yetos san se tlájpixki.

¹⁷ 'Yika Notajtsi nechtlasojtla, porke nonewia niktemaka noyolilis, para ijkó satepa oksepa nimoyolitis. ¹⁸ Amaka weletis nechixtilis noyolilis, yej Ne nonewia niktemaka. Ne weletis niktemakas noyolilis, iwa oksepa nikselis. Ye ni tlan onechnawati Notajtsi.

¹⁹ Ijkuak n tlayakankeh judíojteh okikakeh nin tlájtoli, oksepa omoxexelojkeh.

²⁰ Sikimeh okijoayah:

—Nin tlakatl kipia se demonio iwa yokuatlapolo. ¿Tleka nonkikakih?

²¹ Pero oksikimeh okijoayah:

—Akin kipia se demonio mach ijkó tlajtoa. Se tlakatl non kipia se demonio mach weletis kintlapolis ixtololowah non amo tlachiah.

N tlayakankeh judíojteh amo kiseliah n Jesús

²² Itech sewaya n judíojteh okichiwayah ilwítl porke okilnamikiah nochi xiwitl n tonati ijkuak okiyankuilijkeh n Weyi Tiopa de Jerusalén. ²³ Iwa Jesús onemia kan Weyi Tiopa, kan ik iportal Salomón. ²⁴ Ijkuakó n tlayakankeh judíojteh okiyawalojkeh iwa okitlajtlanjikeh:

—¿Asta kemanía san titlamatoskeh akin te? Sansemi techili tla te ti Cristo.

²⁵ Jesús okinnankili:

—Ne yonomechili, iwa nomejwah amo nonnechneltakah. Nochi tlan Ne nikchiwa, nikchiwa ika iweletilis itoka Notajtsi iwa kinextia Ne Ni Cristo. ²⁶ Pero nomejwah amo nonnechneltakah porke amo noichkawah. ²⁷ Noichkawah nechtenkakih, iwa Ne nikinmixmati, iwa yejwah witseh nonawak. ²⁸ Ne nikchiwa mayolitakah nochipa, iwa ayik moixpoloskeh, iwa amaka weletis nechinmakixtilis. ²⁹ Notajtsi Akin onechinmaktli noichkawah, Ye okachi kipia weletílistli iwa amo onka ok se kemi Ye, iwa amaka weletis kinmakixtilis. ³⁰ Ne iwa Notajtsi tiseititokeh.

³¹ Ijkuakó n tlayakankeh judíojteh oksepa okonintilankeh temeh para kimotlaskeh.

³² Jesús okinmili:

—Nomoixpa nikchijtiwits miak tlamañsoli ika iweletilis Notajtsi, ¿katlie ika non-inekih nonnechmojomotlaskeh ika tetl?

³³ N tlayakankeh judíojteh okinankilijkeh:

—Amo timitsmojmotlaskeh ika tetl por tlan kuali yotikchi, yej por tikixpanawia Dios ika tlan tikittoa. Te san titlakatl iwa timotenewa ti Dios.

³⁴ Jesú斯 okinnankili:

—Itech nomotlanawatilis ijkí ijkuitol: “Ne onikijo nomejwah nondiosmeh.”

³⁵ Tikmatokeh tlan kijtoa itlajkuilol Dios amo weletis se kipatlas; iwa Dios okínnotski diosmeh akimeh okiselijkeh itlajtol. ³⁶ Iwa tla Dios onechpéjpenki iwa onechaltítlanki itech nin tlaltíkpaktli, ¿kenomi nonkijtoah Ne onikixpanawi porke onikijo Ne Ni Tekone de Dios? ³⁷ Tla amo nikinchiwa milagros kemi Notajtsi kinchiwa, amo techneltokakah. ³⁸ Pero tla nikinchiwa milagros, amo Ne techneltokakah, yej xikinneltokakah n milagros non nikinchiwa, ijkó nonkitaskeh Notajtsi kajki nowa, iwa Ne nika íwa.

³⁹ Oksepa okinekiah kikitsiskeh, pero Jesú斯 okincholili.

⁴⁰ Ijkuakó Jesú斯 oksepa oyá ik nepa lado de n río Jordán, kan achto n Juan otlakuatekiaya iwa ompa omoka. ⁴¹ Miakeh oyayah inawak Jesú斯 iwa okijoayah:

—Juan amo okichi nion se milagro, pero nochí tlan okijo de nin tlakatl milák.

⁴² Iwa miakeh ompa okineltokakeh n Jesú斯.

11

Mikki n Lázaro

¹ Itech altepetl de Betania okatka se tlakatl non omokokoaya. Ye itoka Lázaro, iwa ochantitoka iwan iweltiwha María iwa Marta. ² Nin María iwelti n Lázaro, ye akin okinxawili ajwiálistli itech ikxiwha n Toteko iwa okinwajwachili ika itsonkal. ³ Ijkó kiné, iweltiwha n Lázaro olatitlankeh makilitih n Jesú斯:

—Tejwatsi, motlasojikni Lázaro mokokoa.

⁴ Ijkuak Jesú斯 okikak, okijo:

—Nin kokólistli amo kimiktis, yej ika noni moteitisitis iweyijkachiwalis Dios, iwa ika non kokólistli noiwa kiweyijkachiwaskeh Ikone Dios.

⁵ Jesú斯 okintlasojtlaya n Marta, María iwa n Lázaro. ⁶ Ijkuak okilijkeh Lázaro omokokoaya, Ye ok omoka ome tonati kan okatka. ⁷ Otlanki Jesú斯 okinmili itlamachti-jkawah:

—Matimokopakah Judea.

⁸ Ijkuakó itlamachti-jkawah okilijkeh:

—Tlamachti, ayamó wejkawa n tlayakankeh judíojteh okinekiah mitsmiktiskeh ika tetl; ¿iwa oksepa tikneki timuikas ompa?

⁹ Jesú斯 okinmili:

—Se tonati kipia májtlaktli iwa ome ora. Tla se tlakatl nemis ijkua tlanestok amo moikxitlanwis, porke kita n tláwili non kajki itech nin tlaltíkpaktli, ¹⁰ pero tla se tlakatl nemí de yuak, moikxitlanwia porke n tláwili amo kajki itech.

¹¹ Satepa Jesú斯 okinmili:

—Totlasoj Lázaro kochtok, iwa Ne nio nikijxititi.

¹² Ijkuakó itlamachti-jkawah okilijkeh:

—Tejwatsi, tla san kochtok, pajtis.

¹³ Pero Jesú斯 okinekia kimilis Lázaro yomikki, pero itlamachti-jkawah okiyeyekoliyah chamo okintlapowijtuka de n kochílistli non tinochteh tikpiyah. ¹⁴ Ijkuakó Jesú斯 okinyekili:

—Lázaro yomikki. ¹⁵ Iwa nipaki porke amo ompa onikatka, ijkó nomejwah nontlanel-tokaskeh. Tiawih, matikitatihi.

¹⁶ Ijkuakó Tomás non okiliyah Kuatsi, okinmili non oksikimeh itlamachti-jkawah:

—Matiwiah tejwah noiwa, para timikiskeh iwan Jesú斯.

Jesú斯 teyolitia iwa kitemaka nemílistli

¹⁷ Ijkuak Jesú斯 okalakito Betania, Lázaro yokiwikaya nawi tonati tooktok. ¹⁸ Betania amo wejka omokawaya de Jerusalén, san kanaj eyi kilómetro. ¹⁹ Miakeh judíojteh ovalajkeh otetlajpaloko ichan Marta iwa n María para kinyolchikawaskeh porke omikki

inmikni. ²⁰ Ijkuak Marta okima Jesús yompa owalaya, okinamikito, pero María omoka itech kali. ²¹ Iwa Marta okili n Jesús:

—Noteko, tla nika tiyetoskia, nokni amo mikiskia. ²² Pero ne nikmati Dios mitsmakas nochi tlan Te tiktajtlanilis.

²³ Jesús okili:

—Mokni moyolitis.

²⁴ Marta okili:

—Milák, ne nikmati moyolitis ijkuak non yomikeh moyolitiskeh itech n iksemi tonati.

²⁵ Ijkuakó Jesús okili:

—Ne niktemaka nemílistli iwa yolílistli. Akin nechneltokas maya mamiki, yolitos nochipa. ²⁶ Iwa nochteh akimeh yolitokeh iwa nechneltokah ayik mikiskeh. ¿Tikneltoka?

²⁷ Marta okili:

—Ejé, Noteko, ne nikneltoka Tejwatsi Ti Cristo Ikone Dios, Akin walaskia itech nin tlaltípkaktli.

Jesús choka kan okitookakeh n Lázaro

²⁸ Ijkuak ijkí okijto, Marta oyá san ichtakatsi okinotsato ikni María iwa okili:

—N Tlamachti nika moitstika iwa mitsnotsa.

²⁹ Ijkuak María okikak tlan Marta okili, omoketíkiski iwa okitato n Jesús. ³⁰ Jesús ayamó okalakia kan altepetl, ok okatka kan Marta okajsito. ³¹ Ijkuak n tlayakankeh judíojteh non okatkah itech kali okitakeh kenijki n María omoketíkiski, okikuitlapantokakeh. Okiyejyekoliayah chamo oyaya kichokiliti n Lázaro kan okitookakeh.

³² Ijkuak María okalakito kan okatka n Jesús, omotlankuáketski inawak iwa okili:

—Noteko, tla nika tiyetoskia, nokni amo mikiskia.

³³ Ijkuak Jesús okitak n María chokatok, iwa n judíojteh non okikuitlapantokayah noiwa, Jesús oyoltélinki asta oyolpatsiwik. ³⁴ Iwa okintlajtlani:

—¿Kani ononkitookakeh?

Yejwah okilijkeh:

—Tejwatsi, nika xiwalmuika iwa xikitaki.

³⁵ Iwa Jesús ochokak. ³⁶ N tlayakankeh judíojteh okijtojkeh:

—¡Xikitakah, milák okitlasoxtlaya!

³⁷ Pero oksikimeh okijtojkeh:

—Tla owéletki okimák itlachialis non amo otlachiaya, ¿amo weletiskia kichiwaskia itla para amo mamiki n Lázaro?

Jesús kiyolitia n Lázaro

³⁸ Jesús oksepa omoyolkoko iwa omikuani kan okitookakeh n Lázaro. Non miketékochtli okatka ijtk se kúyoktli iwa otentsaktoka ika se tetl. ³⁹ Jesús okinmili:

—Xikachiwakah n tetl.

Marta, iwelti n Lázaro, okili n Jesús:

—Noteko, ye ya fiero kistos porke ya kipia nawi tonati tooktok.

⁴⁰ Pero Jesús okili:

—Yonimitsili, tla titlaneltokas titikas iweyijkachiwalis Dios.

⁴¹ Ijkuakó okachijkeh n tetl. Jesús oajkotláchixki ilwikak iwa okijto:

—Notajtsi, nimitstlasojkamati porke otechkak. ⁴² Ne nikmatok nochipa techkaki, iwa ijkí nikijtoa para n tlakah non nika kateh makinelokakah Tejwatsi otechaltítlanki.

⁴³ Ijkuak ijkí otlanki okijto, chikawak okitsajtsili:

—¡Lázaro, xiwalkisa!

⁴⁴ Ijkuakó n miketl owálkiski kikekemelitiwits ika tsótsoli itech ikxiwah iwa itech imawah, iwa oixtsaktiwalaya ika se tsótsoli. Iwa Jesús okinmili:

—Xiktojtomakah iwa xikkawilikah mawia.

Motlatlalwiah kenijki kimiktsiskeh n Jesús

(Mt. 26:1-5; Mr. 14:1-2; Lc. 22:1-2)

⁴⁵ Miakeh judíojteh non okiyolchikawatoh n María, ikuak okitakeh tlan okichi n Jesús, okineltokakeh. ⁴⁶ Pero sikimeh okimitatoh n fariseos iwa okimilijkeh tlan Jesús okichi.

⁴⁷ Ikuakó n tiopixkeh non tlayakantokeh, n fariseos iwa n tekiwajkeh de Sanedrín* omooololojkeh iwa okimilijkeh:

—¿Tlan tikchiwaskeh? Nin tlakatl kinchijtinemi miakeh milagros. ⁴⁸ Tla tikkawiliskeh ijkó makichijtinemi, nochteh pewas kineltokaskeh, iwa n tekiwajkeh de Roma witseh kixxititsakiweh n Weyi Tiopa iwa n nochi topaís.

⁴⁹ Ikuakó seme de yejwah non itoka Caifás, non itech non xiwitl okinnawatiaya n tiopixkeh, okinmili:

—Nomejwah amitla nonkimatih, ⁵⁰ amo nonkajsikamatih okachi kuali mamiki san se tlakatl por tinchteh, iwa amo makipojpolokah nochi topaís.

⁵¹ Ninteh itlajtol wah n Caifás amo inewia okimijo, yej kemi ye okatka weyi tiópixki non xiwitl, Dios okitlajtolti Jesús mikiskia por nochteh. ⁵² Iwa amo mikiskia san por n judíojteh, yej noiva para kinseitis nochteh ipilwah Dios non sentel oxitintokah. ⁵³ Yika desde non tonati opé kitemoliah kenijki kimiktiskeh n Jesús.

⁵⁴ Ika noni, Jesús ayakmó omoteititiaya inmixpah n judíojteh, yej oyá kan se altepetl non itoka Efraín non kajki kan ik tlaltejtéyinki, iwa ompa omoka iwa itlamachtijkawah.

⁵⁵ Yowalajsitiwalaya n ilwitl de Paskua de n judíojteh. Miakeh okisayah de inmaltépeu iwa otlejkoayah Jerusalén para motlajtlakolchipawaskeh achto de pewas inmilwiu.

⁵⁶ Yejwah okixtemojtinemiah n Jesús kan Weyi Tiopa iwa omotlajtlaniayah:

—¿Tlan non kimoliah? ¿Wits itech ilwitl noso, amo wits?

⁵⁷ N fariseos iwa n tiopixkeh non tlayakantokeh otlanawatijkeh tla aka kimatis kan kajki n Jesús, makinmatilti para kikitskiskeh.

12

Se siwatl kinmajwalia ikxiwah n Jesús

(Mt. 26:6-13; Mr. 14:3-9)

¹ Chikwase tonati achto de pewas n ilwitl de Paskua, Jesús oyá Betania, kan ochantitoka n Lázaro, akin Jesús okiyoliti. ² Ompa okichijchijkeh se tlákuali para motlasojkamatiskeh inawak Jesús, Marta okintlatekiliaya, Lázaro oewatoka kan mesa iwan Jesús. ³ Ikuakó María okualík kemi tlajko litro ajwiálistli de nardo non tlawel patio, iwa okinmajwiali ikxiwah n Jesús, otlanki okinwajwachili ika itsonkal. Iwa nochi n kali omoajwiali. ⁴ Ikuakó Judas Iskariote ikone n Simón, seme de itlamachtijkawah akin satepa kitemaktisgia n Jesús, okijo:

⁵ —¿Tleka amo omonamák nin ajwiálistli ika eyi siento denariojtomi, ika tikimpalewiskiah n próbesteh?

⁶ Pero Judas amo ijkó okijo por milák okinmiknomatiaya n próbesteh, yej porke ye tlachtek, iwa kemi ye okoololoaya n tomi, inewia okichikowiaya. ⁷ Ikuakó Jesús okili:

—Xikkawa, ye okitlaatijtoka nin ajwiálistli para n tonati ikuak nechtookaskeh. ⁸ N próbesteh nochipa yetoskeh nomowah, pero Ne amo nochipa niyetos nomowah.

N tiopixkeh non tlayakantokeh motlatlalwiah kimiktiskeh n Lázaro

⁹ Miakeh judiojteh okimatkeh Jesús okatka kan altepetl de Betania, iwa oyajkeh. Amo oyajkeh san para kitaskeh n Jesús, yej noiva para kitaskeh n Lázaro, akin Jesús okiyoliti.

¹⁰ Ikuakó n tiopixkeh non tlayakantokeh omotlatlalwijkeh noiva kimiktiskeh n Lázaro.

¹¹ Porke ikuak Lázaro omoyoliti, miakeh judíojteh omoixkoyantijkeh de n tiopixkeh non tlayakantokeh iwa okineltokayah n Jesús.

Jesús kalaki Jerusalén kemi Rey

(Mt. 21:1-11; Mr. 11:1-11; Lc. 19:28-40)

* 11:47 Sanedrín: nin grupo kimajmanah kemi 50 tetajmeh non teixkomakah ikuak kinteiliah akimeh amo kuali kitlakitah itlanawatil Moisés.

¹² Ipan ok se tonati, miakeh tlakah oyajkeh ilwitl de Paskua, iwa okimatkeh Jesús noiva oyaya ompa Jerusalén itech non ilwitl. ¹³ Okinmatekeh soyameh iwa oyajkeh okinamikitoh n Jesús, iwa otsajtsia chikawak:

—¡Hosanna! Ma Dios kitiochiwa Akin okititlankeh matlanawati! ¡Ma Dios kitiochiwa n Rey de Israel!

¹⁴ Jesús okajsik se burrojtsi iwa ipan otlejkok. Kemi kijtoa itlajkuilol Dios:

¹⁵ Amo ximawikah akimeh chanchiwah Sión;
xikitakah nomorey ya walmuika,
tlejkotiwits ipan se burrojtsi.

¹⁶ Itech non tonati itlamachtijkawah mach okajsikamatkeh tlan kijtosneki tlan otlamochi, pero satepa ijkuak Jesús oyá ilwikak, itlamachtijkawah okualilnamikeh yoijkluitoka nochi tlan Ye panoskia.

¹⁷ N tlakah non okatkah iwan Jesús ijkuak okínotski n Lázaro ijtk miketékochtli iwa okiyoliti de kan mikemeh, otetlapowijtinemiah tlan okitakeh. ¹⁸ Yika, miakeh okinamikitoh n Jesús, porke okimatkeh okichi non milagro. ¹⁹ Pero n fariseos okimoliayah:

—Xikitakah, nochteh n tlakah yawih inawak Jesús. Iwa tejwah amitla tiweleti tikchiwah.

Sikimeh tlakah de Grecia kitemoah n Jesús

²⁰ Itech non ilwitl de Paskua noiva ovalajkeh sikimeh tlakah de Grecia akimeh noiva okiweyijkachiwakoh Dios. ²¹ Yejwah omijkuanikeh inawak Felipe non okatka de Betsaida, iwa okitlatlautijkeh:

—Tlakatl, tiknekih tikitakesh n Jesús.

²² Felipe okitlajtoltito n Andrés; iwa san ken ome okitlapowitoh n Jesús. ²³ Ijkuakó Jesús okinmili:

—Yoajsiko n ora ijkuak nechweyijkachiwaskeh Ne Non onimochi ni tlakatl. ²⁴ De milajka, de milajka nomechilia, tla se kitooka se xínachtli iwa non xínachtli amo miki, non xínachtli mokawas iselti iwa amitla kitemakas. Pero tla non xínachtli miki, kitemakas miak itlakilo. ²⁵ Akin amo kitemakas iyolilis nonawak, kipolos ijkuak mikis. Pero akin kitemakas iyolilis nonawak itech nin tlaltíkpaktli amo kipolos yej kipias yolílistli non amayik tlami. ²⁶ Akin kinekis nechtekitilis, mawiki nowa, iwa kan Ne niyetos, noiva ompa yetos. Tla aka nechtekitilia, Notajtsi kiweyijkatlalis.

Jesús kinmatiltia imikilis

²⁷ 'Axa satlawel nimoyolkokoa, ¿Iwa tlan nikijtos? ¿Mach weletis nikilis: "Notajtsi, techmakixti itech nin tlajjywílistli"? Amó, mach weletis ijkó nikilis porke saman para ye Ne oniwala. ²⁸ Notajtsi, maweyijkachito Motoka.

Ijkuakó omokak se tlájtoli de ilwikak:

—Yonikweyijkachi iwa oksepa nikweyijkachiwas.

²⁹ N tlakah non ompa okatkah, ijkuak okikakeh n tlájtoli, okijtoayah, otlatékuinki, iwa oksikimeh okijtoayah:

—Se ángel okitlapowi.

³⁰ Ijkuakó Jesús okinmili:

—Non tlájtoli amo omokak para Ne manikkaki, yej para nomejwah xikkakikah.

³¹ Yoajsiko n tonati ijkuak kintlajtlakoltiskeh n tlaltíkpaktlakah, iwa axa kualkixtiskeh akin kinawatia nin tlaltíkpaktli. ³² Iwa ijkuak nechajkokuiskeh itech krus, nochteh nikinyoltilanas para mawikh nonawak.

³³ Ijkó Jesús okinmajsikamatilti kenijki mikiskia. ³⁴ N tlakah okinankilijkeh:

—Itlajkuilol Dios kijtoa Cristo nochipa yolitos. ¿Kenijki Te tikijtoa non omochiwako tlakatl moneki makajkokuiyah? ¿Akin ye akin omochi tlakatl?

³⁵ Ijkuakó Jesús okinmili:

—San kanaj kech tonati niyetos nomowah. Xinemikah ika notlawil axa ken ok nonweletih, amo kichiwa nomechajsiti n tleyuálistli. Porke akin nemí itech tleyuálistli

amo kinati kan ik yawi. ³⁶ Axa ken ok nonkipixtokeh n tláwili, xikkawilikah mamoskaltih non tláwili itech nomoyolo, ijkó nonyatoskeh tepilwah de non tláwili.

Ijkuak Jesús okimijo ninteh tlájtolteh, oyá okinmotlaatilito.

Njudíjteh mach kineltokah n Jesús

³⁷ Maya Jesús okinchi miakeh milagros inmixpah n judíjteh, amo okineltokayah.

³⁸ Ijkó omochi tlan okijto n profeta Isaías:

Noteko, ¿akin okineltokak motlajtol non tejawah otiktematiltijkeh?

¿Akin inawak yomonexti iweletilis n Toteko?

³⁹ Yejwah mach otlaneltokayah, Isaías noiwa okijto:

⁴⁰ Dios okintokti ayakmó matlachiakah iwa okinyoltlakuawaltih,

para amo matlachiakah ika inmixtololowah

nion mateajsikamatikah ika inyolo,

nion mamoyolkopakah nonawak, para manikimpajti.

⁴¹ Isaías ijkí okijto porke okitak iweletilis Cristo, yika otetlapowiaya de Ye.

⁴² Maski ijkó, miakeh judiojteh okineltokakeh n Jesús, iwa asta sikimeh tlayakankeh itech Weyi Tiopa. Pero amo okitenextiayah teixpa porke okinmawiliayah n fariseos, para amo makinkixtikah itech sinagogas. ⁴³ Porke yejwah okachi okiwilitayah makinweyilikah n tlakah iwa amo Dios.

Itlajtol Jesús kintlajtlakoltis n tlakah

⁴⁴ Ijkuakó Jesús chikawak okijto:

—Akin nechneltoka, amo san Ne nechneltoka, yej noiwa kineltoka Notajtsi Akin onechaltítlanki. ⁴⁵ Iwa akin nechita, noiwa kita Akin onechaltítlanki. ⁴⁶ Ne oniwala itech nin tlaltíkpaktli kemi se tláwili, iwa nikintlawilia itech inyolo nochteh akimeh nechneltokah, iwa yejwah amo mamokawakah itech tleyuálistli. ⁴⁷ Tla aka kikaki notlajtol iwa amo kitlakita, amo Ne niktlajtlakoltis. Porke Ne amo oniwala onikintlajtlakoltiko n tlaltíkpaktlah, yej onikinmakixtiko. ⁴⁸ Akin nechtlawelita, iwa amo kitlakita notlajtol, ya kipia akin kitlajtlakoltis: N tlájtoli non Ne nonewia onikyejyekoli, yej Notajtsi Akin onechaltítlanki onechnawati tlan moneki nikijtos iwa tlan moneki niktemachtis. ⁵⁰ Ne nikmatok akimeh kichiwa tlan kijtoa itlanawatil Notajtsi, kinmakas yolílistli non ayik tlami. Yika, tlan Ne nikijtoa, nikijtoa ijkó kemi Notajtsi onechnawati.

13

Jesús kinmiikxipajpaka itlamachtijkawah

¹ Yoajsitiwalaya n ilwitl de Paskua, Jesús yokimatia yoajsia n ora para kikakajtewas nin tlaltíkpaktli iwa yas inawak Itajtsi. Ye nochipa okintlasojtlak iaxkawah non okatkah itech nin tlaltíkpaktli, iwa okintlasojtlak asta n iksemi tonati.

² Non yúali, ijkuak Jesús iwa itlamachtijkawah oyualtlakuajtokah, n diablo yokitlalijka itech iyolo n Judas Iscariote, ipiltsi n Simón, para makitemakti n Jesús. ³ Jesús okimatiwalaya Itata yokimaktili nochí para Ye matlanawati, iwa yokimatia Ye owala de Dios iwa oksepa mokopaskia íwa. ⁴ Ijkuakó Jesús omóketski de kan mesa, okimokixtili ikapa, iwa omotlajkoilpi ika se tsótsoli. ⁵ Ijkuakó okitekak atl itech se xíkali iwa opé kinmikxipajpaka itlamachtijkawah iwa okinmaxotomaya ika n tsótsoli non ika omotlajkoilpika.

⁶ Ijkuak Jesús omijkuani kan Simón Pedro para kimpakilis ikxiwah, Pedro okili:

—Noteko, ¿Tejwatsi, techimpakilis nokxiwah?

⁷ Jesús okinankili:

—Tlan Ne nikchijtok, te axa amo tikajsikamati, pero satepa tikajsikamatis.

⁸ Pedro okili:

—Tejwatsi amayik techimpakilis nokxiwah.

Jesús okinankili:

—Tla amo nimitsikxipajpkas, amo timopoas nowa.

⁹ Ijkuakó Simón Pedro okili:

—Noteko, tla ijkó, amo sanwel techimpakili nokxiwah, yej noiwa nomawah iwa notsonteko.

¹⁰ Pero Jesús okili:

—Akin sikin omalti, sanwel moneki mamoikxipajpaka, porke ya chipawak. Iwa nomejwah ya nonchipawakeh, maya amo non nochteh.

¹¹ Jesús okimatia akin kitemaktiskia, yika okijo: “Amo nochteh nonchipawakeh.”

¹² Ijkuak yotlanki okimikxipajpk itlamachtijkawah, oksepa okimokentili ikapa iwa omotlalito kan mesa, iwa okinmili:

—¿Nonkajsikamatih tlan onikchi nomawah? ¹³ Nomejwah nonnechnotsah Tlamachti iwa Noteko, iwa kuali tlan nonkijtoah, porke milák, Ne Nomotlamachti iwa Nomoteko.

¹⁴ Iwa tla Ne Nomoteko iwa Nomotlamachti onomechinapkili nomokxiwah, ijkó noiwa moneki ximosepanikxipajpkakah. ¹⁵ Porke ijkó kemi Ne onikchi moneki no ijkó xikchiwah. ¹⁶ De milajka, de milajka nomechilia se tlakéwale amo okachi weyijkatitok ke iteko. Ijkó noiwa, se tlatitlánili amo okachi weyijkatitok ke akin okitítlanki. ¹⁷ Tla nonkajsikamatih iwa nonkichiwah tlan nomechilijtok, nonkipiaskeh miak pakílistli.

¹⁸ 'Tlan nikijtoa amo para nochteh nomejwah. Ne nikinmixmati inyolo akimeh onikimpéjpenki. Pero nika mochiwas tlan kijtoa n tiotlajkuíloli: “N tlakatl akin nowa tlapaloa, omíxkopki nowa.”

Sal. 41:9 ¹⁹ Axa nomechilia noch

ni, para ijkuak ijkó tlamocheiwas, xikneltokakah Ne Ni Cristo. ²⁰ De milajka, de milajka nomechilia: Akin kiselia akin Ne niktitlani, Ne nechselia, iwa akin Ne nechselia, noiwa kiselia Akin onechaltítlanki.

Jesús kinmilia Judas kitemaktis

(Mt. 26:20-25; Mr. 14:17-21; Lc. 22:21-23)

²¹ Ijkuak Jesús okimijto ninteh tlájtolteh, saikpanoa oyoltélinki iwa okinyekili:

—De milajka, de milajka nomechilia, seme de nomejwah nechtemaktis.

²² Ijkuakó n itlamachtijkawah opé motlatlajtlatah, porke amo okimatiah akin okitenejtoka. ²³ Seme de yejwah non Jesús okitlasojtlaya, omonakasiktekak itech Jesús ijkuak otlakuajtokah. ²⁴ Simón Pedro okichtakaili n Juan makitlajtlani n Jesús akin okitenejtoka.

²⁵ Ijkuakó okachi omijkuani inawak Jesús iwa okitlajtlani:

—Noteko, ¿akin mitstemaktis?

²⁶ Jesús okinankili:

—Nikajakis siki paj, iwa akin Ne nikmakas, ye nechtemaktis.

Ijkuakó Jesú okajaki n paj iwa okonmák n Judas Iscariote, ipiltsi n Simón. ²⁷ Ijkuak Judas okikua n paj, n diablo okalak itech iyolo. Ijkuakó Jesús okili:

—Tlan tikchiwas sansemi xikchiwa.

²⁸ Nion se de yejwah, akimeh otlakuajtokah itech mesa okajsikama tleka n Jesús ijkó okili n Judas. ²⁹ Kemi Judas okipixtoka n tomi, yejwah okijejyekoliayah chamo Jesús okili makikoati tlan monekis para n ilwítl de Paskua, noso itla makintliokoli n próbesteh.

³⁰ Ijkuak Judas yokikua n paj non Jesús okonmák, sanima okiski, iwa ya yotleyuak.

Se yankuik tlanawátili

³¹ Satepa ijkuak Judas yokiski, Jesús okijo:

—Axa moteititia noweyijkachiwalis Ne Akin onimochi ni tlakatl, iwa iweyijkachiwalis Dios motenextia itech tlan Ne nikchiwa. ³² Tla Ne nikteititis iweyijkachiwalis Dios, ijkuakó Dios noiwa kiteititis noweyijkachiwalis, iwa san nima ijkó kichiwas. ³³ Nopilwah, mach ok wejkawas niyetos nomawah. Nomejwah nonnechtemoskeh. Pero ijkó kemi onikinmili n judíos axa nomejwah nomechilia: Kan Ne nio, nomejwah mach weletis nonyaskeh. ³⁴ Ne nomechmaka se yankuik tlanawátili: Ximosepantlasojtlakah, ijkó kemi Ne nomechtlasojtla, ijkó moneki ximosepantlasojtlakah. ³⁵ Tla nomejwah nonmosepantlasojtlah, nochteh n tlaltikpaktlakah nomechitaskeh nomejwah de milajka notlamachtijkawah.

Jesús kitematiltia Pedro kijtos amo kixmati

(Mt. 26:31-35; Mr. 14:27-31; Lc. 22:31-34)

³⁶ Simón Pedro okitlajtlani n Jesús:

—Tejwatsi, ¿kan timuikas?

Jesús okinankili:

—Kan Ne nimuikas, axa mach weletis tias nowa. Pero satepa weletis tias nowa.

³⁷ Pedro okili:

—Noteko, ¿tleka axa amo weletis nias mowa? ¡Tla moneki, asta nikmokawilis manechmiktikah por Tejwatsi!

³⁸ Jesús okinankili:

—¿Timotemaktis nopatka? De milajka, de milajka nimitsilia, achto de tlakuikas n kaxtil, te tikjtos eyi welta amo techixmati.

14

Jesús Ye n ojtli non tewika inawak Notajtsi Dios

¹ 'Amo ximotekipachojtinemikah. Xikneltokakah Dios iwa techneltokakah Ne noiwa.

² Icha Notajtsi onka miak lojar kan se chantitos. Tla amo ijkó yetoskia, Ne nomechiliskia. Yika, Ne nio ompa nomechmajmaniliti se lojar. ³ Satepa ijkuak yonia iwa yonomechmajmanili non lojar, oksepa niwalmokopas iwa nomechwikas nowa, nonyetoskeh kan Ne niyatos. ⁴ Kan Ne nio, nomejwah ya nonkixmatokeh n ojtli.

⁵ Ijkuakó Tomás okili:

—Noteko, tejwah mach tikmatih kanon timuika, ¿kenomi tikixmatiskeh non ojtli?

⁶ Jesús okinankili:

—Ne Ni ojtli nontewika inawak Dios, Ne nomechnonotsa ika milák tlájtoli, iwa Ne Akin kichiwa xiyolitokah. Sanwel akin nechtlakita weletis kalakiti inawak Notajtsi.

⁷ Tla nomejwah nonnechixmatiskah, noiwa nonkixmatiskah Notajtsi, axa ya nonkixmatokeh, porke ya nonkiitiwitseh.

⁸ Ijkuakó Felipe okili:

—Tejwatsi, techixmatilti Toweyitajtsi iwa ika no, ya kuali.

⁹ Jesús okili:

—Felipe, yowejka nika nomowah, ¿iwa ayamó techixmati? Akin yonechitak kijtosneki yokitak Notajtsi. Yika ¿kenijki te tikjitoa manomechixmatilti Notajtsi? ¹⁰ ¿Amo tikneltoka Ne nika itech Notajtsi iwa Ye kajki notech? Nochi tlan Ne nomechtlapowia, amo notech kisa, yej Notajtsi non kajki notech, kichiwa tlan Ye kimonekiltia.

¹¹ Techneltokakah Ne nika iwa Notajtsi, iwa Notajtsi kajki nowa, noso tla amo ijkó, techneltokakah por tlan nikchiwa. ¹² De milajka, de milajka nomechilia: Akin nechneltoka, noiwa weletis kichiwas tlan Ne nikchiwa. Iwa weletis kinchiwas okachi weyi, porke Ne nio inawak Notajtsi. ¹³ Nochi tlan nonkitlajtlaniskeh Notajtsi ika Notoka, Ne nikchiwas, para makiseli weyílistli Notajtsi por Ne. *Stg. 4:3* ¹⁴ Tla itla nonkitlajtlaniskeh ika Notoka Ne nikchiwas.

Jesús okijo kualtitlanis n Espíritu Santo

¹⁵ 'Tla nomejwah nonnechtlaosjtlah, xikchiwakah tlan kijtoa notlanawatil. ¹⁶ Iwa Ne niklatlaujts Notajtsi manomechtitlanili ok se teyolchika, para nochipa mayeto nomowah. ¹⁷ N tlaltikpaktlakah amo weletih kiseliah n Espíritu non techajsikamatiltiah tlan milák porke amo kitah nion kixmatih. Pero nomejwah nonkixmatih porke Ye kajki nomowah iwa nochipa yetos nomowah. ¹⁸ Amo nomechkawas nonmiknomeh, niwalmokopas iwa nomowah niyatos. ¹⁹ Mach ok wejkawas iwa ayakmó nechitaskeh n tlaltikpaktlakah, pero nomejwah nonnechitaskeh. Porke kemi Ne niyolitok, nomejwah noiwa nonyolitoskeh. ²⁰ Itech neká tonati nomejwah nonkajskamatishkeh Ne nika iwa Notajtsi, iwa nomejwah nonkateh nowa, iwa Ne nika nomowah. ²¹ Akin kixmati notlanawatil, iwa kichiwa tlan kijtoa, non tlakatl nechtlasojtla. Iwa akin nechtlasojtla, Notajtsi kitlasojtla iwa Ne noijkó niktlasojtla iwa nimoteittitis inawak.

²² Ijkuakó non ok se Judas okitlajtlani:

—Noteko ḡtleka timoteixmatiltis tonawak, iwa amo innawak n tlaltikpaktlakah?

²³ Jesús okinankili:

—Akin nechtlasojtla kijtosneki kichiwa tlan nikijtoa. Notajtsi kitlasojtla, iwa Notajtsi iwa Ne timochantikiweh íwa. ²⁴ Iwa akin amo nechtlasojtla, amo kitlakita notlajtol. N tlájtoli tlan nomejwah nonkinkaktokeh, mach Ne notlajtol yej itlajtol Notajtsi Akin onechaltílanki.

²⁵ 'Ne onomechili nochí ni ijkuak onikatka nomowah. ²⁶ Pero n teyolchika, Ye n Espíritu Santo Akin Notajtsi kualtitlanis ika Notoka, Ye nochí nomechajsikamatiltis, iwa nomechilnamiktis nochí tlan Ne yonomechili.

²⁷ 'Noyolsewilis nomechkajtewilia, noyolsewilis nomechmaka. Iwa amo kemi non kitemakah n tlaltikpaktlakah. Amo ximosotlawakah nion ximawikah. ²⁸ Nomejwah yononkikakeh tlan onikijo, onomechili nias iwa oksepa niwalmokopas para niyetos nomowah. Tla de milajka nonnechtlasojtlaskiah, nompakiskiah ijkuak onomechili nio íwa Notajtsi, porke Notajtsi okachi weyijkatitok ke Ne. ²⁹ Ne achto yonomechili ijkó tlamoche, yika ijkuak ijkó tlamoche, nomejwah xitlaneltokakah.

³⁰ 'Ayakmó niwejkawas nomechtlapowis, porke yompa wits non kinnawatia n tlakah de nin tlaltíkpaktli. Ye amitla weletis nechtoktis. ³¹ Nikchiwas tlan nechnawatia Notajtsi, para ijkó makimatikah n tlaltikpaktlakah, Ne niktlasojtla Notajtsi.

'Ximoketsakah.

15

Jesús Ye n de milajka uvaskuawitl

¹ 'Ne n de milajka uvaskuawitl, iwa Notajtsi Ye n uvastékitki. ² Tla se nomamayo amo tlaaki, Notajtsi kitsonteki. Pero tla kuali tlaaki kichijchipawa para okachi matlaaki. ³ Nomejwah yononmochipajkeh, ika notlajtol non Ne yonomechili. ⁴ Xiseititokah nowa, kemi Ne niseititok nomowah. Nion se imamayo n uvaskuawitl amo weletis tlaakis tla amo salitos itech itlaktsongo. Ijkó noiwa, amo weletis nonkitemakaskeh tlakilo tla nomejwah amo nonseititoskeh nowa.

⁵ 'Ne niuvaskuawitl iwa nomejwah nomamayowah. Akin salitok nowa iwa Ne íwa, kitemakas miak itlakilo. Porke tla amo nonsalitoskeh nowa, amitla weletis nonkichiwaskeh. ⁶ Akin amo seititok nowa, kitlamotlaskeh kala iwa wakis kemi imamayowah n uvaskuawitl non kinmoololoah, iwa kintlamotla ijtik tletl iwa ompa tlatlah.

⁷ 'Tla nomejwah nonseititoskeh nowa iwa notlajtol kajki ijtik nomoyolo, xiktlajtlanikah san tlan nonkinekih iwa nomechmakas. ⁸ Notajtsi kiselia weyílistli ijkuak nomejwah nonkitemakah miak nomotlakilo, iwa ijkó mota nomejwah milák notlamachtijkawah. ⁹ Ne nomechtlasojtla kemi Notajtsi nechtlasojtla, xiyetokah nochipa ika notlasojtlalis. ¹⁰ Tla nonkitlakitah tlan nomechnawatia, nochipa nomechtlasojtas, ijkó kemi Ne niktlakita tlan nechnawatia Notajtsi, yika Ye nechtlasojtla.

¹¹ 'Ne nomechilia nochí ni para xipakikah kemi Ne nipaki, iwa ijkó xitentokah ika nopakilis. ¹² Ye ni tlan nomechnawatia: Ximotlasojtlakah non nochteh ijkó kemi Ne nomechtlasojtla. ¹³ Akin motemakas makimiktikah ipatka itlakaikniyah, saikpanoa kintlasojtla. Saikpanoa kintlasojtla itlakaikniyah tla motemakas makimiktikah impatka. ¹⁴ Nomejwah de milajka notlakaikniyah tla nonkichiwh tlan nomechnawatia.

¹⁵ Ayakmó nomechnotsas notlakawah, porke se tlakéwali amo kimati tlan kichiwa iteko. Ne nomechnotsas notlakaikniyah, porke yonomechmatilti nochí tlan Notajtsi onechili.

¹⁶ 'Nomejwah amo ononnechpejpenkeh, yej Ne onomechpéjpenki, iwa onomechmakihi n tekitl para xiwiah iwa xiktemakakah miak nomotlakilo, iwa nomotlakilo mawejkawa. Ijkó nochí tlan nonkitlajtlaniliskeh Notajtsi ika Notoka, Ye nomechmakas.

¹⁷ Ye ni tlan Ne nomechnawatia: Ximosepantlasojtlakah.

N tlaltikpaktlakah kikokoliah n Jesús iwa akimeh tlaneltokah

¹⁸ 'Tla n tlaltikpaktlakah nomechkokoliah, xikmatikah Ne acharto yonechkokolijkeh.
¹⁹ Tla nomejwah ok nontlajtlakolchijtinemiskiah kemi kichiwah n tlaltikpaktlakah, yejwah nomechtlasojtlauskiah kemi yejwah motlasojothal. Pero kemi Ne onomechpéjpenki de intlajko n tlajtlakolchijkeh, yika yejwah nomechtlawelitah porke ayakmó nonkichiwah tlan yejwah kichiwah. ²⁰ Xikilnamikakah tlan onomechili: "Nion se tlakewali okachi ke iteko." Tla Ne onechtotojtokakeh, noiwa nomejwah nomechtotojtokaskeh, iwa tla okitlakitakeh notlajtol, noiwa kitlakitaskeh nomotlajtol. ²¹ Nochi ni nomechtoktiskeh por nonnechtlakitah. Porke yejwah amo kixmatih Akin onechaltlanki.

²² 'Tla Ne amo niwalaskia iwa nion amo nikintlapowiskia, amo kipiaskiah tlajtlácoli. Pero axa amo weletis kijtoskeh amo kimpiah tlajtlákolteh. ²³ Porke akin Ne nechkokolia, noiwa kikokolia Notajtsi. ²⁴ Yejwah amo kipiaskiah tlajtlácoli tla Ne amo nikinchiwaskia milagros inmixpa. Pero maya okimitakeh, yejwah nechkokoliah iwa kikokolia Notajtsi. ²⁵ Ijkí otlamochi para mamochiwa tlan ijkuitlakolteh intlanawatil, kan kijtoa: "Onechkokolijkeh san por okinekeh."

Sal. 35:19; 69:4

²⁶ 'Pero ikuak wits Akin teyolchikawa, n Espíritu non kitemachtia tlan milajka, non Ne nomechtitlanilis de inawak Notajtsi. Ye nomechtlapowis de Ne. ²⁷ Iwa nomejwah noiwa nontetlapowiskeh de Ne, porke ononkatkah nowa ikuak sakinika onikpewalti notekei.

16

¹ 'Ne nomechilia nochi ni para amo xikkawakah nontlaneltokaskeh nowa.
² Nomechkixtiskeh kan nomosinagogas. Iwa ajsiki tonati ikuak aka nomechmiktis, kijtos okichi se kuali tektil inawak Dios. ³ Ijkó kichiwaskeh porke amo okixmatkeh Notajtsi nion Ne. ⁴ Ijkí nomechilia para ikuak ijkó tlamoche was xikilnamikakah Ne yonomechilijka.

Tlan kichiwa n Espíritu Santo

⁵ 'Axa nio inawak Akin onechaltlanki; iwa nion se de nomejwah nechtlajtlania kan nio? ⁶ Ken yonomechili ninteh tlajtolteh axa nonmoyolkokoah. ⁷ Pero Ne nomechilia tlan milák: Okachi kuali manimuika, porke tla amo nio, Akin teyolchikawa amo weletis wits nonmonawak. Pero tla Ne nimukas, nomechmatiltlanilis Akin teyolchikawa. ⁸ Ikuak Ye wits, kinmajsikamatiltis n tlaltikpaktlakah kateh itech tlajtlácoli. Iwa kenomi weletis yetoskeh kuali inawak Dios. Iwa kinmajsikamatiltis Dios se tonati kijtos akin tlajtlakole iwa akin amó. ⁹ N Espíritu kinmajsikamatiltis kateh itech tlajtlakole akimeh amo nechneltokah. ¹⁰ Noiwa kinmajsikamatiltis tlan yekmilawak. Porke Ne nio íwa Notajtsi iwa nomejwah ayakmó nonnechitaskeh. ¹¹ Kinmajsikamatiltis Dios se tonati kijtos akin tlajtlakole iwa akin amó, porke akin tlanawatijtok itech nin tlaltíkpaktli, yokitlajtlakoltijkeh.

¹² 'Nikpia okachi tlan moneki nomechilis, pero axa amo weletis nonkajsikamatiskeh. ¹³ Ikuak wits n Espíritu, Ye nomechmatiltis nochi tlan milák. Porke amo nomechmatiltis san tlan itech kisa, yej nomechmatiltis nochi tlan kikaki. Iwa nomechmatiltis nochi tlan satepa tlamoche was. ¹⁴ N Espíritu kiteititis nomawistilis, ken kiselis tlan noaxka iwa nomechmatiltis. ¹⁵ Nochi tlan iaxka Notajtsi, noiwa noaxka. Yika onomechili n Espíritu, kiselis tlan noaxka iwa nomechmatiltis.

N neyolkókoli mokopas paklistli

¹⁶ 'Ayakmó wejkawas nonnechitaskeh, iwa satepa, oksepa nonnechitaskeh. Porke Ne nimuika inawak Notajtsi.

¹⁷ Ikuakó, sikimeh itlamachti kawah omotlatlajtlanijkeh:

—¿Tlan kijtosneki tlan techilia? Kijtoa sa kanaj kech tonati ayakmó tikitaseskeh, iwa amo wejkawas oksepa tikitaseskeh, noiwa kijtoa yas inawak Itajtsi. ¹⁸ Iwa okimoliayah: ¿tlan kijtosneki ikuak kijtoa ke ayakmó wejkawas? Mach tikajskamatih tlan kineki techilis.

¹⁹ Jesú斯 okajsikama yejwah okinekiah kitlajtlaniskeh tlan kijtosneki tlan okinmili. Ijkuakó okinmili:

—¿Nonmotlatlajtlaniah tlan kijtosneki ijkuak onikijo: Ayakmó wejkawas nonnechitaskeh, iwa satepa, oksepa nonnechitaskeh? ²⁰ De milajka, de milajka nomechilia, nomejwah nonchokaskeh iwa nonmoyolkokoskeh, pero n tlaltikpaktlakah pakiskeh. Maya nonmoyolkokoskeh, nomoneyolkokol mokopas pakílistli. ²¹ Ijkuak se siwatl ya kipati ikone, peva motekipachoa porke yoajsiko ora mokokos. Pero satepa, ijkuak yotlákatki ikone, kilkawa itlaijyowilis iwa paki porke yotlákatki se konetl itech nin tlaltípkaktli. ²² Ijkó nomejwah, axa nonmoyolkokoah, pero Ne nomechitas oksepa, iwa nonpakiskeh, iwa non yolpakílistli, amaka weletis nomechkixtilis.

²³ Ijkuak ajsiki non tonati, ayakmitla nonnechtlatlajtlaniskeh. De milajka, de milajka nomechilia, Notajtsi nomechmakas nochi tlan nonkitlajtlaniliskeh ika Notoka. ²⁴ Asta axa nomejwah amitla nonkitlajtlaniliah ika Notoka. Xiktlatlajtlanikah ijkó nonkiseliskeh, ijkó nonkipiaskeh miak pakílistli.

Cristo Jesú斯 okitlanili n tlajtlákoli

²⁵ 'Nochi ni yonomechtlapowi ika tlapoálistli, pero ajsiki n tonati ijkuak ayakmó nomechtlapowis ijkó, yej nomechyekajsikamatiltis Akin Notajtsi. ²⁶ Itech neká tonati nomejwah weletis itla nonkitlajtlaniliskeh Notajtsi ika Notoka. Ayakmó monekis Ne niktlatlaniis Notajtsi por nomejwah. ²⁷ Notajtsi inewia nomechtlasojtla porke nomejwah nonnechtlatlasojtlah iwa ken nonkineltokah Ne niwalewatok de Dios. ²⁸ Ne oníkiski inawak Notajtsi iwa oniwala itech nin tlaltípkaktli, iwa axa nikajtewa nin tlaltípkaktli iwa nimokopas inawak Notajtsi.

²⁹ Ijkuakó itlamachtijkawah okilijkeh:

—Axa kema yotikajsikamatkeh motlajtol, iwa ayakmó techtlapowia ika tlapoálistli.

³⁰ Axa ya tikmatih Tejwatsi nochi tikmati, iwa mach ok moneki se mamitstlajtlan itla. Yika tikneltokah Tejwatsi tiwalewatok de Dios.

³¹ Jesú斯 okinnankili:

—¿Axa kema ya nonnechneltokah? ³² Ya ajsitiwits n ora iwa ayakmó wejkawas, ijkuak nomejwah nonmoxexeloskeh iwa nonyaskeh nomochajcha. Nonnechkajtewaskeh noselti. Pero Ne amo nika noselti, porke Notajtsi kajki nowa. ³³ Nochi ni nomechilia, para xikpiakah yolsewílistli. Nomejwah nontlaijyowiskeh itech nin tlaltípkaktli, pero amo ximosotlawakah porke Ne yoníktlanki akin kinawatia nin tlaltípkaktli.

Jesú斯 motiotsajtsilia por itlamachtijkawah

¹ Ijkuak Jesú斯 otlanki otlajto, oajkotláchixki ilwikak iwa okijo:

—Notajtsi, n ora yoajsiko. Xikweyijkatlali Mokone para ijkó Mokone noiwa mamitsweyijkatili. ² Tejwatsi otechtlali manikinnawati nochteh n tlaltikpaktlakah, para manikinmaka yolílistli kan ilwikak nochteh akimeh otechinmák. ³ Tla mitsixmatiskeh sanwel Tejwatsi n de milajka Dios, iwa Cristo Jesú斯, Akin Tejwatsi otikwaltítlanki, kipiaskeh n yolílistli tlan ayik tlamic.

⁴ 'Ne yonimitsweyili itech nin tlaltípkaktli. Iwa yoniktlami n tekitl non otechnawati manikchiwa. ⁵ Axa kiné, Notajtsi, techweyijkatili monawak, ika n weyílistli non onikpiaya monawak desde ijkuak ayamó okatka n tlaltípkaktli.

⁶ 'Ne yonikinmatilti Akin Tejwatsi akimeh Tejwatsi otikimpéjpenki itech nin tlaltípkaktli. Yejwah okatkah moaxkawah, pero Tejwatsi otechinmactili, iwa axa kineltokah motlajtol. ⁷ Axa ya kimatih nochi tlan nikpia Tejwatsi otechmák. ⁸ Porke nochi tlan Tejwatsi otechili, Ne yonikinmili, iwa yejwah yokineltokakeh. Iwa yokajskamatkeh milák Ne niwalewatok monawak, iwa yokineltokakeh Tejwatsi otechaltítlanki.

⁹ 'Ne nimitstlatlaujtia por yejwah. Amo nimitstlatlaujtia por oksikimeh tlaltikpaktlakah, yej por akimeh Tejwatsi otechinmák, porke moaxkawah. ¹⁰ Nochi tlan noaxka, noiwa moaxka, iwa tlan moaxka, noiwa noaxka, iwa noweyijkachiwalis monextia intech.

¹¹ 'Ne ayakmó niyetos itech nin tlaltíkpaktli porke ya nio mowa, pero yejwah ok mokawah itech nin tlaltíkpaktli. Noweyitajtsi, xikinmokuitlawi ika moweletilis non otechinmák, para mayekseititokah kemi Tejwatsi iwa Ne tiseititokeh. ¹² Ijkuak Ne onikatka inwash itech nin tlaltíkpaktli, Ne onikinmokuitlawiaya ika moweletilis akimeh otechinmák, iwa onikimpalewiaya. Iwa nion se de yejwah omoixpolo, sanwel akin yomoixpolojka para mamochiwa tlan kijtoa itlajkuilol Dios.

¹³ 'Pero axa ya nio mowa, iwa nikijtoa nin tlájtoli ijkuak ok nika itech nin tlaltíkpaktli, para yejwah makipiakah miak pakílistli itech inyolo ijkó kemi Ne nikpia. ¹⁴ Ne yonikinmatilti motlajtol notlamachtijkawah, pero n tlaltikpaktlakah kinkokoliah, porke yejwah ayakmó de nin tlaltíkpaktli. Ijkó kemi Ne amo de nin tlaltíkpaktli. ¹⁵ Amo nimitstlatlaujtia xikinkixti de itech nin tlaltíkpaktli, yej xikinyekmokuitlawi para amo makinkajkayawa n amokualtlakatl. ¹⁶ Ijkó kemi Ne amo de nin tlaltíkpaktli, yejwah noiwa ayakmó de nin tlaltíkpaktli. ¹⁷ Xikinyolchipawa ika motlajtol, motlajtol ye tlan milák. ¹⁸ Ijkó kemi Tejwatsi otechaltítlanki innawak n tlaltikpaktlakah, ijkó noiwa Ne nikintitlani innawak n tlaltikpaktlakah. ¹⁹ Ne yoniyékniki por yejwah, para yejwah noiwa mayeknemikah por motlajtol non milák.

²⁰ 'Ne amo nimotlatlaujtia san por notlamachtijkawah, yej noiwa por non satepa tlaneltokaskeh nonawak, ijkuak notlamachtijkawah kitematiltiskeh notlajtol, ²¹ para maseititokah nochteh, ijkó kemi Tejwatsi iwa Ne tiseititokeh. Iwa yejwah noiwa maseititokah towah, para makitakah n tlaltikpaktlakah Tejwatsi otechaltítlanki. ²² Ne yonikinmák n weyílistli non Tejwatsi otechmák, para ijkó yejwah maseititokah, ijkó kemi tejwah tiseititokeh. ²³ Ne niyetos intech, iwa Tejwatsi tiyetos notech, para ijkó yejwah de milajka maseititokah. Iwa ijkó n tlaltikpaktlakah makimatikah Tejwatsi otechaltítlanki, iwa milák tikintlasoxtla ijkó kemi Tejwatsi techtlasoxtla.

²⁴ 'Notajtsi, akimeh Tejwatsi otechinmaktili, nikneki mayetokah nowa kan Ne niyetos, para makitakah momawistilis non otechmák, porke techtlasoxtla desde ijkuak ayamó okatka n tlaltíkpaktli. ²⁵ Notajtsi yolmilajka, n tlaltikpaktlakah amó omitsixmatkeh. Pero Ne onimitsixa, iwa ninteh non kateh towah okimatkeh Tejwatsi otechaltítlanki. ²⁶ Ne onikinmatilti motoka, iwa ok nikinmatiltijtos, para n tlasoxtlálistli non ika techtlasoxtla mayeto intech iwa Ne niyetos intech.

18

Kikitskiah n Jesús

(Mt. 26:47-56; Mr. 14:43-50; Lc. 22:47-53)

¹ Ijkuak Jesús otlanki okimijo ninteh tlájtoltéh, okiski iwa itlamachtijkawah iwa oyajkeh ik nepa lado de n barranka de Cadrón. Ompa okatka se werto, Jesús iwa itlamachtijkawah ompa okalakeh. ² Judas, akin kitemaktiskia n Jesús, noiwa okixmatia non lojar, porke Jesús iwa itlamachtijkawah miak welta ompa omoololoayah. ³ Ijkó kiné, Judas okinyakantiwalaya miakeh soldadojteh iwa sikimeh tlamokuitlawijkeh de n Weyi Tiopa. Ninteh okwalintitlankeh n tiopixkeh non tlayakantokeh iwa fariseos. Yejwah okwalinwikayah kuaujmeh non xotlatiwitseh iwa lintérnajteh iwa téposteh. ⁴ Jesús yokimatiá nochí tlan mochiwaskia, yika okinyakanamikito iwa okinmili:

—¿Akin nonkitemoah?

⁵ Yejwah okinankilijkeh:

—Tiktemojtiwitseh n Jesús de Nazaret.

Ye okinmili:

—Ne Ni Jesús.

Noiwa ompa omoketoka n Judas non okitemaktijtoka n Jesús. ⁶ Ijkuak Jesús okinmili: “Ne Ni Jesús”, yejwah otsinkiskeh iwa oajketiajkeh owetsito ipan tlali. ⁷ Ijkuakó Jesús oksepa okintlajtlani:

—¿Akin nonkitemoah?

Yejwah okilijkeh:

—Tiktemoah n Jesús de Nazaret.

⁸ Jesús oksepa okinmili:

—Yonomechili Ne Ni Jesús. Tla Ne nonnechtemoah, xikinkawilikah mawiah ninteh.

⁹ Ijkó okijo para mamochiwa tlan Jesús okijtojka: “Akimeh Tejwatsi otechinmák, nion se omoixpolo.” ¹⁰ Ijkuakó Pedro okwalkópinki iespada iwa okitekili inakas non iyekma n Malco, itékitki n tiópixki non okachi otlayakantoka. ¹¹ Jesús okili n Pedro:

—¡Xiktlaati moespada! Notajtsi kineki manikpano nin tlaijywílistli, moneki ijkó manipano maya tekoko.

Kiwakah n Jesús inawak Anás n tiópixki non okachi otlayakantoka

(Mt. 26:57-58; Mr. 14:53-54; Lc. 22:54)

¹² Ijkuakó n kapita, iwa isoldadojwah, iwa n soldádojteh non kimokuitlawiah n Weyi Tiopa, okikitsijkeh n Jesús, okimailpijkeh iwa okiwikakeh. ¹³ Acharto okiwikakeh inawak Anás porke okatka imonta n Caifás. Nin Caifás okatka weyi tiópixki non xiwitl. ¹⁴ Nin Caifás yokintlatlalwijkena non de Sanedrín* okachi kuali mamiki sanwel se tlakatl, iwa amo nochteh n judíojteh.

Jn. 11:49-51

Pedro kijtoa amo kixmati n Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedro iwa n ok se imomachti san wejka okwaltokayah n Jesús. Non ok se imomachti omoixmatia iwa n weyi tiópixki Anás, yika ye okalak kan okiwikakeh n Jesús. ¹⁶ Pero n Pedro omoka san kaltempa. Yika, non ok se imomachti non omixmatia iwan weyi tiópixki, omotlapowi iwan siwatl non okimokuitlawiya n kaltentli iwa okili makikalaki n Pedro. ¹⁷ Ijkuakó n siwatl okitlajtlani n Pedro:

—¿Amo te noiwa imomachti non tlakatl?

Pedro okinankili:

—Amó, mach ne.

¹⁸ N tlakewalteh iwa n tlamokuitlawijkeh okitlalijkeh se tlékuili porke osewaya, iwa omototonijtokah. Pedro noiwa omikuani inakastla n tlékuili.

Anás kitlatsintokia Jesús

(Mt. 26:59-66; Mr. 14:55-64; Lc. 22:66-71)

¹⁹ N weyi tiópixki Anás, opé kitlatsintokia Jesús akimeh itlamachtijkawah iwa tlan okinmachtiaya. ²⁰ Jesús okinankili:

—Ne onikintlapowiaya inmixpa nochteh n tlakah. Ne ixmostla onitemachtiaya itech sinagogas iwa kan toweyi Tiopa kan moololoah nochteh n judíojteh, iwa amitla san ichtaka oniktemachti. ²¹ ¿Tleka Ne techtlatlajtlania? Xikintlajtlani akimeh onechkakeh, iwa yejwah mamitsilikah tlan onikinmiliaya. Yejwah kuali kimatokeh tlan onikijto.

²² Ijkuak Jesús ijkí okijo, se non kimokuitlawia de n Weyi Tiopa, okiixtlatsini iwa okili:

—¿Ijkó tiknankilia n weyi tiópixki?

²³ Jesús okinankili:

—Tla onikijto itla amokuali, techili. Pero tla onikijto tlan milák, ¿tleka techixtlatsinia?

²⁴ Ijkuakó Anás okitítlanki n Jesús maijilpiti inawak Caifás n weyi tiópixki.

Pedro ome welta kijtoa amo kixmati n Jesús

(Mt. 26:71-75; Mr. 14:69-72; Lc. 22:58-62)

²⁵ Pedro ok omoketoka inakastla n tlékuili iwa ompa okitlajtlanjkeh:

—¿Amo te noiwa se de itlamachtijkawah?

* 18:14 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kuali kitlakitah itlanawatil Moisés.

Pedro mach okimokuiti, iwa okijo:

—Amó, mach ne.

²⁶ Ijkuakó se itlákau n weyi tiópixki non ken okitaya n tlakéwale akin Pedro okinakast-sontek, okitlajtlani:

—¿Amo te noiwa onimitsitak iwan Ye, kan werto?

²⁷ Pedro oksepa okijo amo kixmati, iwa san nima se kaxtil otlakuúk.

Jesús inawak Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ijkuakó okiskeh icha n Caifás iwa okiwikakeh n Jesús ichan Poncio Pilato. Iwa ken yotlanestiwalaya n judíojteh amo okalakeh icha n Pilato para amo moyolijtlakoskeh. Yejwah okinekiah yetoskeh yolchipawakeh ijkuak kikuaskeh n tlákuali de Paskua.

²⁹ Ijkuakó Pilato owálkiski, iwa okinmili:

—¿Tleka nonkiteiliah nin tlakatl?

³⁰ Yejwah okinankilijkeh:

—Tla nin tlakatl amo kichijtinemiskia tlan amokuali, mach timitsmaktiliskiah.

³¹ Ijkuakó Pilato okinmili:

—Xikwikakah iwa nomejwah xiktlajtlakoltikah kemi kijtoa nomotlanawatil.

N tlayakankeh judíojteh okilijkeh:

—Nomotlanawatilis amo techkawilia aka matikmiktikah.

³² Ijkó otlamochi kemi Jesús okijtojka kenomi mikiskia. *Jn. 3:14, 12:32* ³³ Pilato oksepa okalak kan palasio. Okínotski n Jesús iwa okitlajtlani:

—¿Te tirey de judíojteh?

³⁴ Jesús okinankili:

—¿Tlan techtlajtlania, motech kisa, noso san por oksikimeh omitstlapowijkeh de Ne?

³⁵ Pilato okinankili:

—¡Ne mach ni judío! Innewiah mokniwah iwa n tiopixkeh non tlayakantokeh nomak omitstemaktijkeh. ¿Tlan otikchi?

³⁶ Ijkuakó Jesús okinankili:

—Notekiwajyo amo kajki itech nin tlaltíkpaktli. Porke tla ijkó yetoskia, notlakawah motekilmakaskiah para amo manechtemaktikah inmak n judíojteh. Pero Ne amo nitlanawatia nika.

³⁷ Ijkuakó Pilato okili:

—Tla ijkó, ¿te tirey?

Jesús okinankili:

—Ne Ni Rey ijkó kemi te yotikijo. Ne onitlákatki para nietos Ni Rey iwa oniwala itech nin tlaltíkpaktli para niktematiltis tlan milák. Nochteh akimeh kixmatih iwa kijtoh tlan milák, weleti kikakih notlajtol.

³⁸ Pilato okitlajtlani:

—¿Tlan kijtosneki milák?

Kitemaktiah Jesús para kimiktiskeh

(Mt. 27:15-31; Mr. 15:6-20; Lc. 23:13-25)

Ijkuak Pilato ijkó okitlajtlani n Jesús, oksepa okiski okintlapowito n judíojteh, iwa okinmili:

—Ne amo nikkajsi nion se tlajtlákoli itech nin tlakatl. ³⁹ Pero nomejwah ya nonkimatokeh trato nikkajkawa seme de nontsaktokeh itech ilwitl de Paskua. ¿Nonkinekih manikkajkawa n Rey de Israel?

⁴⁰ Ijkuakó, nochteh otsajtsikeh:

—¡Ye amó! ¡Xikkajkawa n Barrabás!

Nin Barrabás okatka tlachtek iwa okimpajoloaya n tlakah.

19

¹ Ijkuakó Pilato otlanawati makiwitekikah n Jesús. ² N soldadojteh okichijchiwilijkeh se korona ika witstli iwa okitlalilijkeh itech itsonteko, iwa okikentilijkeh se kapa chichiliktik. ³ Iwa omikuaniayah inawak Jesús iwa okiliayah:

—¡Timitsweyiliah, Rey de judío jteh!

Iwa okixtlatsinayah.

⁴ Pilato oksepa owálkiski iwa okinmili:

—Techkakikah, nika onikkixti para xikmatikah amo nikkajsi itech Ye itla amo kuali.

⁵ Ijkuak Jesús okiski, okiwikaya ipan itsonteko n korona non okichijchijkeh ika witstli, noiwa okiwikaya n kapa chichiliktik. Ijkuakó Pilato okinmili:

—¡Xiktakah, nika kajki n tlakatl!

⁶ Ijkuak okitakeh n tiopixkeh non tlayakantokeh iwa n soldadojteh non kimokuitlaw-iah n Weyi Tiopa, opé tsajtsih:

—¡Xikkrusifikasi, xikkrusifikasi!

Pilato okinmili:

—Xikwikakah nomejwah, iwa xikkrusifikasi, porke ne amo nikajsi tlan ika niktla-jtlakoltis.

⁷ Pero n tlayakankeh judío jteh okinankilijkeh:

—Tejwah tikpiyah se tlanawátili, iwa non tlanawátili kijtoa mamiki non tlakatl, porke Ye inewia omotene Ikone Dios.

⁸ Ijkuak Pilato okikak tlan okilijkeh, okachi omaujki. ⁹ Pilato oksepa okalak kan palasio iwa okitlajtlani n Jesús:

—¿Te, de kani tiwits?

Pero Jesús mach okinankili.

¹⁰ Ijkuakó Pilato okili:

—¿Amo technankilis? ¿Mach amo tikmati ne weletis nikimilis mamitskrusifikasi, noso mamitskajkawakah?

¹¹ Jesús okinankili:

—Mach weletis titlanawatiskia notech tla Dios amo mitsmakaskia non tekiwajyotl. Yika, akin momak onechtemakti, okachi tlajtlakole ke te.

¹² Pilato okitemoliaya kenikki kikajkawas n Jesús, pero n tlayakankeh judío jteh okachi otsatsajtsiah:

—¡Tla tikkajkawas non tlakatl, tikixpanawis n César, porke akin motenewa rey, kijtosneki kikokolia n César!

¹³ Ijkuak Pilato okinkak ninteh tlájtolteh, okikixti n Jesús, iwa Pilato omotlali kan tlaixkomaka, itech se lojar non itoka Tlateyotitok non itech tlájtoli hebreo itoka Gábata.

¹⁴ Non tonati yomotlatlalijtokah para n ilwítl de Paskua, ijkuakó yokatka kemi tlajko tonati, Pilato okinmili n judío jteh:

—¡Nikan kajki nomorey!

¹⁵ Iwa yejwah otsajtsikeh:

—¡Xikixti! ¡Mamiki! ¡Xikkrusifikasi!

Pilato okinmili:

—¿Nonkinekih manikkrusifikasi nomorey?

Pero n tiopixkeh non tlayakantokeh otlanankilijkeh:

—¡Tejwah mach tikpiyah ok se rey, sanwel César!

¹⁶ Ijkuakó Pilato okinmactili n Jesús para makikrusifikasi, iwa yejwah okiwakeh.

Kikrusifikasi n Jesús

(Mt. 27:32-44; Mr. 15:21-32; Lc. 23:26-43)

¹⁷ Ijkuak Jesús okiski de Jerusalén, okimamajtiaya ikrus imilajkayo n lojar non itoka Miketsontekomatl, non itech tlájtoli hebreo omonotsaya Gólgota. ¹⁸ Ompa okikrusifikasi, jekoh n Jesús iwa n ok ome tlakah ik inajnakastla. ¹⁹ Pilato okichijchi se tlajkuíloli iwa otlanawati makitlalilikah ik ikuatsontla. N tlajkuíloli okijtoaya: “Jesús de Nazaret,

Rey de judíos.” ²⁰ Miakeh judíojteh okiamapoah, porke kan okikrusifikarojkeh n Jesú amo wejka de Jerusalén, iwa oijkeilitoka itech tlájtoli hebreo, latín iwa griego. ²¹ Yika n tiopixkeh non tlayakantokeh okilijkeh n Pilato:

—Amo xikikuilo “Rey de judíojteh”; yej xikikuilo “Akin motenewa Rey de judíojteh.”

²² Pero Pilato okinnankili:

—Tlan yonikikuilo, yonikikuilo.

²³ Ijkuak n soldadojteh yokikrusifikarojkeh n Jesú, nawi okinmoxexelilijkeh itlakenwah. Pero kemi imanto oseititoka ²⁴ n soldadojteh okimolijkeh:

—Amo matiktsomonikah, yej matikawiltikah, san akin kitlanis.

Ijkó omochi tlan oijkeilitoka itech itlajkuilol Dios: “Okinmoxexelilijkeh notlakenwah, iwa okimotlatlanilijkeh nomanto.” ^{Sal. 22:18} Iwa ijkó okichijkeh n soldadojteh.

²⁵ Iwa inakastla ikrus n Jesú, okatka imamá, iwa iwelti imamá, María isiwa n Cleofas, iwa n María de Magdala. ²⁶ Ijkuak Jesú okitak imamá inakastla itlamachtijkau Juan, okili imamá:

—Siwatl, ompa kajki mokone.

²⁷ Otlanki okili n Juan:

—Xikita, ompa kajki momamá.

Desde ijkuakó itlamachtijkau okiseli icha.

Jesús mikki

(Mt. 27:45-56; Mr. 15:33-41; Lc. 23:44-49)

²⁸ Satepa, ijkuak Jesú okitak nochí iteki yomochi, iwa para mamochiwa tlan kijtoa itlajkuilol Dios, Ye okijo:

—¡Niamiki!

²⁹ Ompa okatka se tekontsi non okipiaya vinagre. Yejwah okipolakijkeh se esponja itech non vinagre, okitsekojkeh itech se kuawitl de isopo iwa okimakakeh n Jesú makoni.

^{Sal. 69:21} ³⁰ Ijkuak Jesú okiyeko n vinagre okijo:

—¡Nochi yomochi!

Omokuatolo iwa omikki.

Se soldado okikespantsopiti n Jesú

³¹ Se tonati achto de n ilwítl de Paskua, n judíojteh amo okinekiah mamokawakah n kuerpojteh itech krus itech sábado, porke okatka weyi tonati. Yika okitlatlautijkeh n Pilato makinmetspostekikah akimeh okinkrusifikarojkah, iwa makinmachiwakah.

³² Ijkuakó n soldadojteh oyajkeh okinmetspostekitoh akimeh okrusifikaritokah inajnakastla n Jesú. ³³ Pero ijkuak omijkuanijkeh inawak Jesú, kemi okitakeh yomikki, ayakmó okimetspostekeh. ³⁴ Pero seme de n soldadojteh okikespantsopiti ika se kuawitl yakawitstik, iwa sanima okiski estli iwa atl.

³⁵ Ne nonewia onikitak nochí ni, iwa tlan nomechmatiltia milák. Nikmatok tlan nikijtoa milák, para nomejwah noíwa xitlaneltokakah. ³⁶ Nochi ni otlamochi kemi kijtoa itlajkuilol Dios: “Nion se iomio kipostekiliskeh.” ^{Ex. 12:46; Nm. 9:12; Sal. 34:20} ³⁷ Noíwa oksika kijtoa: “Kitaskeh akin okikespantsopitijkeh.” ^{Zac. 12:10}

Kitookah n Jesú

(Mt. 27:57-61; Mr. 15:42-47; Lc. 23:50-56)

³⁸ Satepa, José de Arimatea okitlatlaujtito n Pilato makikawili makiwika ikuerpo Jesú. Nin José okatka imomachti n Jesú san ichtaka porke okinmawiliaya n tiopixkeh judíojteh. N Pilato okikawili n José makiwika n kuerpo. ³⁹ Noíwa Nicodemo non se yúali omotlapowito iwan Jesú, okalakito kan okatka ikuerpo Jesú iwa okiwikaya kemi sempóali iwa n májtlaktli (30) kilo ajwiajkayotl non okichijchijkeh ika mirra iwa áloe. ⁴⁰ Okitemowijkeh ikuerpo Jesú iwa okikekemelojkeh ika tsót solteh non okinmajwialijkeh kemi kichiwah n judíojteh ijkuak okintookayah inmikenwah. ⁴¹ Kan okikrusifikarojkeh n Jesú okatka se werto, iwa itech non werto okatka se yankuik

miketékochtli, kan ayamaka okitookayah. ⁴² Ompa okitookakeh n Jesús porke n miketékochtli amo wejka okatka de Jerusalén iwa n weyi tonati yowalajsia.

20

Jesús moyolitia

(Mt. 28:1-10; Mr. 16:1-8; Lc. 24:1-12)

¹ N domingo, semi kuinal ikuak ok otleyuatoka, María de Magdala oyá kan okitookakeh n Jesús. Iwa ikuak okalakito, okitak yokachijkeh n tetl non okikamatsaktoka n miketékochtli. ² Ijkuakó omotlelo María iwa oyá kan okatka n Pedro iwa n Juan non Jesús okitlasoijtlaya, iwa okinmili:

—Yokiwikakeh ikuerpo n Toteko Jesús de kan miketékochtli, iwa amo tikmatih kan okikawatoh.

³ Pedro iwa Juan okiskeh iwa oyajkeh okitatoh n miketékochtli. ⁴ Sansikah omotleloayah, pero Juan okachi omotlelo ke Pedro iwa achto okalakito kan miketékochtli. ⁵ Juan oontláchixki tlajitik, iwa okimitak n tsótsoleh ompa okatkah, pero mach okalak. ⁶ San nima okalakiko n Pedro iwa okalaktíwetski kan miketékochtli. Ye noiwa okimitak n tsótsoleh ompa okatkah, ⁷ iwa n mantajtsótsoli non ika okuakemelitoka n Jesús, ixkoya okatka. ⁸ Ijkuakó Juan okalak kan miketékochtli, iwa ikuak okitak, otlaneltokak. ⁹ Porke achto, ayamó okajskamatiah itlajkuilol Dios, Jesús moyolitiskia de kan mikemeh. ¹⁰ Ijkuakó imomachtijkawah omokopkeh inchajcha.

Jesús kimonextilia María de Magdala

(Mr. 16:9-11)

¹¹ Pero María de Magdala omoka kaltempa chokatok inakastla n miketékochtli. Keman ochokatoka oontláchixki ijtk n miketékochtli, ¹² okimitak ome ángelteh ika intlakeh istak, ninteh ángelteh oewatokah kan achto owlantoka ikuerpo Jesús, se ik ikuatsontla iwa ok se ikxitla. ¹³ N ángelteh okitlajtlanijkeh:

—Siwatl, ¿tleka tichoka?

Ye okinmili:

—Porke okiwikakeh ikuerpo Noteko iwa amo nikmati kan okikawatoh.

¹⁴ Ijkuak ijkó okinmili, omókopki iwa okitak n Jesús ompa moketok, pero amo okixma kox ye n Jesús. ¹⁵ Ijkuakó Jesús okitlajtlani:

—Siwatl, ¿tleka tichoka? ¿Akin tiktemoa?

María okimoli chamo non tlakatl ye non okimokuitlawiaya n werto, iwa okili:

—Tata, tla otikwik ikuerpo, techili kan otikkawato, iwa ne nikwikas.

¹⁶ Ijkuakó Jesús okili:

—¡María!

Ye omokoptíwetski iwa okili ika tlájtoli hebreo:

—¡Raboni! —non tlájtoli kijtosneki Tlamachti.

¹⁷ Jesús okili:

—¡Amo techtsakuil!, porke ayamó nitlejko íwa Notajtsi. Pero xio xikinmiliti nokniyah nitlejkos íwa Notajtsi, Akin noiwa Nomotata, íwa Nodios, akin noiwa Nomodios.

¹⁸ Ijkuakó María de Magdala okinmatiltito n momachtijkeh nik ye okitak Inteko, iwa Ye okinmili nochí ni.

Jesús kinmonextilia itlamachtijkawah

(Mt. 28:16-20; Mr. 16:14-18; Lc. 24:36-49)

¹⁹ Ijkuak otiotlatik, itlamachtijkawah n Jesús oololitakah iwa omokaltsakeh porke okinmawiliyah n judíoijteh. Ijkuakó Jesús okalak iwa omoketsato tlatlajkotia iwa okinmili:

—¡Xikpiakah yolsewílistli!

²⁰ Ijkuak ijkó okinmili, okimititi imawah iwa ikespa. Yejwah opakeh porke oksepa okitakeh Inteko. ²¹ Jesús oksepa okinmili:

—¡Xikpiakah yolsewílistli! Kemi Notajtsi onechtítlanki, ijkó Ne nomechtitlani.

²² Ijkuak ijkí okijto, okinmíjpitski iwa okinmili:

—Xikselikah n Espíritu Santo. ²³ Akimeh nonkintlapojpolwiliskeh intlajtlakolwah, mokawaskeh chipawakeh. Pero akimeh amo nonkintlapojpolwiliskeh intlajtlakolwah, mokawaskeh itech tlajtlácoli.

Tomás kita n Jesús

²⁴ Tomás, seme de n májtlaktli iwa ome itlamachtijkawah, non okiliayah kuatsi, amo ompa okatka iwan oksikimeh itlamachtijkawah ijkuak owala n Jesús. ²⁵ Satepa, n oksikimeh imomachtijkawah okilijkeh n Tomás:

—Yotikitakeh n Toteko Jesús.

Pero Tomás okinmili:

—Tla amo nikimitas imawah iwa tla amo nikkalakis nomajpil kan okintsoponilijkeh n klavos, iwa nikkalakis noma ikespa, ayik nikneltokas.

²⁶ Chikweyi tonati satepa, itlamachtijkawah oksepa okaltsaktokah, iwa Tomás noiya ompa okatka. Maya n kaltentli otsaktoka, Jesús okalak iwa omóketski tlatlajkotia iwa okinmili:

—¡Xikpiakah yolsewílistli!

²⁷ Otlanki okili n Tomás:

—Nika xiktlali momajpil, iwa xikinmita nomawah. Xikikuani moma iwa xikkalaki kan nokespa. Iwa sansemi xitlaneltoka.

²⁸ Ijkuakó Tomás okili:

—¡Noteko iwa Nodios!

²⁹ Jesús okili:

—Tomás, otitlaneltokak porke otechitak. ¡Miak pakílistli kipiaskeh akimeh amo onechitakeh, iwa nechneltokaskeh!

Nin tlajkuíloli omoijkuilo para xitlaneltokakah

³⁰ Jesús okinchi ok miaktikeh milagrojiteh inmixpah itlamachtijkawah non amo ijkuilitokeh itech nin amatlajkuíloli. ³¹ Pero nin tlajkuíloli omoijkuilo para xikneltokakah Jesús Ye n Cristo Ikone Dios. Iwa tla nomejwah nonkineltokaskeh, nonkipiaskeh yolílistli ika Itoka.

21

Jesús okinmonextili chikome itlamachtijkawah

¹ Satepa, Jesús oksepa okinmonextili itlamachtijkawah itempa n lago de Tiberias. Iwa ijkí okinmonextili: ² Ompa sansikah okatkah Simón Pedro, Tomás non okiliayah kuatsi, Natanael non de Caná de Galilea, itelpochwah n Zebedeo iwa n ok ome itlamachtijkawah n Jesús. ³ Iwa Simón Pedro okinmili:

—Nio nimichmati.

Yejwah okinankilijkeh:

—Tejwah noiya tiawih mowa.

Yejwah otlejkokeh itech se barka iwa omichmaatoh, pero non yúali amitla michi okikitskijkeh. ⁴ Ijkuak yotlanestiwalaya, Jesús omoketsato itempa n lago, pero itlamachtijkawah amo okimatiah kox Ye n Jesús. ⁵ Ijkuakó okinmili:

—Nopilwah, ¿nonkipiah siki michi?

Yejwah okinankilijkeh:

—Amó.

⁶ Ijkuakó Jesús okinmili:

—Xikontlamotlakah n michayatl iyekma n barka iwa nonkinmajsiskeh michimeh.

Yejwah ijkó okichijkeh, iwa ayakmó oweletiah okikixtiyah n michayatl, porke miaktikeh michimeh okinkitskijkeh. ⁷ Ijkuakó Juan non Jesús okitlasojtlaya okili n Pedro:

—¡Ye n Toteko Jesús!

Ijkuak Simón Pedro okikak Ye n Jesús, okimotlalili itlakeh porke okatka xipetstik iwa onmotlamotlak ijtik atl. ⁸ N oksikimeh itlamachtijkawah okalakitoh itempa n atl itech

barka sa kitilantiwihi n michayatl tentiwits ika michimeh, porke sa kanaj mákuili poali metro okatkah itempa n atl.⁹ Ijkuak okiskeh, okitakeh siki tlekyoli xotlatok, iwa ikpak okatka michi, iwa paj.¹⁰ Jesús okinmili:

—Xikualinwikakah sikimeh michimeh non sakin ononkinkixtijkeh.

¹¹ Simón Pedro otlejkok kan barka iwa okitilantia asta itempa n lago n michayatl tenti ika se siento iwa n tlajko iwa n eyi (153) wejweyi michimeh. Iwa maya n michimeh okatkah miaktikeh n michayatl amo okojkótonki.¹² Ijkuakó Jesús okinmili:

—Ximotlamajsewikh.

Nion se itlamachtijkau omixewi okitlajtlani Akin Ye, porke yokimatiah Ye Jesús.

¹³ Otlanki Jesús owalmikuani, okónanki n paj iwa okinmajmák itlamachtijkawah, iwa noijkó okichi iwa n michimeh.

¹⁴ Ika ni ya eyi welta okinmonextili itlamachtijkawah satepa de omoyoliti.

Jesús kitlapowia Simón Pedro

¹⁵ Ijkuak yotlankeh omotlamajsewijkah, Jesús okili n Simón Pedro:

—¿Simón ipiltsi n Juan, techtlasojtla okachi ke ninteh?

Pedro okinankili:

—Noteko Tejwatsi kuali tikmatok nimitsneki.

Jesús okili:

—Techinmokuitlawili noichkawah.

¹⁶ Jesús oksepa okitlajtlani:

—Simón ipiltsi n Juan, ¿techtlasojtla?

Pedro okinankili:

—Noteko, Tejwatsi kuali tikmatok nimitsneki.

Jesús oksepa okili:

—Techinmokuitlawili noichkawah.

¹⁷ Jesús okitlajtlani ipan eyi welta:

—¿Simón Pedro ipiltsi n Juan, techneki?

Pedro omoyolkoko porke Jesús ayakmó okitlajtlani techtlasojtla ipan eyi welta, porke sa iksemi okitlajtlani kox okinekia. Pedro okinankili:

—Noteko, Tejwatsi kuali tikmatok nimitsneki.

Jesús okili:

—Techinmokuitlawili noichkawah.¹⁸ De milajka, de milajka nimitsilia, ijkuak otikatka titélpochtli, te monevia otikonakiaya motlake, iwa otiaya san kan ik te otiknechia. Pero ijkuak tiweweijtis, sa tикинмакокуис momawah iwa ok se mitstlalilis motlakeh iwa mitswikas kan amo tiknekis tias.

¹⁹ Ijkuak Jesús ijkó okijo, okinekia kajsikamatiltis n Pedro kenijke mikiskia iwa ijkó kiweyiliskia Dios. Satepa okili:

—Xiwiki nowa.

Jesús tlajtoa de Juan

²⁰ Ijkuak Pedro owalmókopki okitak okwalintokaya itlamachtijkau akin Jesús okitlajtlaya. Ye omonakasikték itech ielpa ijkuak okimomajsewijkah n yuallákuáli de Paskua iwa okitlajtlanjka akin kitemaktiskia.²¹ Ijkuak Pedro okitak itlamachtijkau n Jesús, okitlajtlani:

—Noteko, iwa nin tlakatl, ¿tlan mochiwas?

²² Jesús okinankili:

—Tla Ne nikmonekiltis mamokawa asta ijkuak Ne niwalmokopas, te mach moteki. Te xiwiki nowa.

²³ Ijkuakó non tlájtoli opé momati itech nochteh non okineltokakeh, iwa okijoayah non imomachtijkau amo mikiskia. Pero Jesús amo okijo amo mikiskia, Ye okijo: “Tla Ne nikmonekiltis mamokawa asta ijkuak Ne niwalmokopas, te mach moteki.”

²⁴ Ye nin imomachtijkau akin tetlapowia de tlan otlamochi iwa nika okikuilo. Iwa tejwah kuali tikmatokeh kijtoa tlan milák.

²⁵ Iwa okachi miak onka tlan okichi n Jesús. Tla mijkuiloskia nochi tlan Ye okichi, n tlajkuílolteh amo akiskiah itech nin tlaltíkpaktli.

Tlan okichijkeh Itlatitlanilwah Cristo

Jesús okisentlalili itlatematiijkawah kintitlanilis n Espíritu Santo

¹ Noknitsi Teófilo non saikpanoa tiweyixtok: Itech non sakinika noamatlajkuilol, onikikuilo nochí tlan Jesús okichi iwa otlamachti desde ikuak okipewalti iteki, ² asta n tonati ikuak otleykok ilwikak. Ikuak ya muikaskia, ika iweletilis n Espíritu Santo okimpépenki itlatitlanilwah iwa okinnawatijtewak tlan kichiwaskiah. ³ Satepa ikuak yomoyoliti, Jesús inewia okinmonenextili ipan ome pójali tonatijmeh itlatitlanilwah, para makitakah Ye milák yolitok, iwa okintlapowiaya kenijki Dios tlanawatia.

⁴ Ikuak okatka iwa itlatitlanilwah, Jesús okinnawati amo mawiah de Jerusalén. Iwa okinmili:

—Xikchiakah mamochiwa tlan Notajtsi Dios onomechili, ijkó kemi Ne noiwá yonomechili. ⁵ Milák, Juan otlakuaateki ika atl, pero sa kanaj kech tonati, Dios nomechkuatekis ika Espíritu Santo.

Jesús tlejko ilwikak

⁶ Akimeh okatkah iwan Jesús, okitlajtlanjeh:

—Tejwatsi, ¿axa tikinmakixtis n tlaltipaktlakah de Israel iwa tikinmakas se tlanawati?

⁷ Jesús okinnankili:

—Nomejwah mach nomoteki tlan tonati noso kemanía Totajtsi Dios kichiwas iteki. Sanwel Ye tlanawatia itech nochí tlan kichiwa. ⁸ Ikuak n Espíritu Santo wits nomotech, nonkiseliskeh weletílistli iwa nonyaskeh nontetlapowitiweh notlajtol itech Jerusalén, Judea, Samaria; iwa itech nochí n tlaltípkaktli.

⁹ Ikuak Jesús yotlanki okinmili nin tlájtoli, yejwah ok okontlajtlatokah, Jesús opé moajkokui iwa okitakeh kenijki okiwikakeh ilwikak. Iwa san nima se mextri okwalmókenki, iwa ayakmó okitakeh. ¹⁰ Yejwah okitlajtlatokah n Jesús kenomi otleykotia ilwikak. Ikuakó ome tlakah non otlakentitokah ika intlakeh istak owalmonextijkeh innakastla.

¹¹ Yejwah okimiljkeh:

—Tlakah de Galilea, ¿tleka ononmokajkeh nontlachixtokeh ilwikak? Nin Jesús Akin okatka nomowah iwa yokiwikakeh ilwikak, oksepa walmokopas ijkó kemi ononkitakeh oyá.

Kipejpenah n Matías mayeto ipatka n Judas

¹² Ikuakó itlatitlanilwah owaltemokeh de kan olivostepetl onejnentiajkeh sanwel se kilómetro iwa okalakitoj Jerusalén. Intlanawatilis okinkawiliaya n judíojeteh manejnemikah san achó itech sábado. ¹³ Ikuak oajsitoh Jerusalén, okalakeh itech kali iwa otleykokeh kan omokalotiaya. Ompa okatka:

Pedro,
Jacobo,
Juan,
Andrés,
Felipe,
Tomás,
Bartolomé,
Mateo,
Jacobo ipiltsi n Alfeo,
Simón n Zelote (Kananista)*
iwa Judas itelpoch n Jacobo.

¹⁴ Yejwah iwa oksikimeh siwameh omoololoayah nochí tonati iwa motiotsajtsiliskeh. Noiwa ompa okatkah, María imamá n Jesús iwa ikniwah n Jesús.

* ^{1:13} Simón tewa iwan partido de n Kananistas. Nonteh Kananistas se partido non okinekiah moixkoyantiskeh de n tekiwa romano.

¹⁵ Se tonati ompa okatkah kemi chikwase pójali (120) tokniyah non okineltokayah Cristo Jesús. Pedro omóketski tlatlajkotia, iwa okinmili:

¹⁶ —Nokniyah, techkakikah yowejka n rey David okikuilo tlan okili n Espíritu Santo, tlan Judas kichiawskia, ikuak okinyákanki akimeh okikitskijkeh n Jesús. *Sal. 41:9* ¹⁷ Judas towa okatka, noiji towah otekitia. ¹⁸ Pero tikmatokeh ika non tomi non okimakakeh ika tlan amokuali okichi, okiko se tlali. Iwa owetski ika itsonteko iwa otلالاتسایانکی iwa ochitonkeh ikuitlaxkolwah. ¹⁹ Ikuak non ochantitokah Jerusalén okimatkeh, non tlali okitlaliljkeh itoka Hacéldama, non itech tlájtoli hebreo kijtosneki: Tlali de estli. ²⁰ Porke itech n Salmos ijkí kijtojtok:

Icha mamokawa iselti,
iwa amaka ompa machanchiwa.

Sal. 69:25

Iwa itech ok se Salmo kijtoa:

Ok se makonanili iteki.

Sal. 109:8

²¹ 'Nika kateh sikimeh tlakah non otechwikatinenkeh nochipa ikuak n Toteko Jesús onentinemia towah, ²² desde ikuak Juan okikuaateki n Jesús iwa asta ikuak otlejkok ilwikak. Yika moneki seme de yejwah matechmoseitili, iwa sansikah matitetlapowikah Jesús yomoyoliti.

²³ Ikuakó okimpejpenkeh ome: José non okinotsayah Barsabás, akin noiwa okiliayah Yolmilajka, iwa Matías. ²⁴ Iwa ijkí omototsajtsiljkeh:

—Toteko Dios, Tejwatsi tikmati tlan kipixtokeh itech inyolo nochteh n tlakah. Techajskamatilti katlie de ninteh ome tlakah yotikmopejpenili, ²⁵ para makichiwa n tektil non Judas okika, porke ye oyá kan inewia okimotlanili.

²⁶ Ikuakó okipejpenkeh sawel se, iwa okítlanki Matías, akin san nima non tonati omoseitili iwa oksikimeh májtlaktli iwa n se tlatematiltjkeh.

2

Totajtsi Dios kualtitlani n Espíritu Santo

¹ Ikuak oajsiko n ilwitl de Pentecostés, nochteh non okineltokakeh n Cristo Jesús okatkah sansikah itech se kali.

² San nima owaltlatékuinki kan ilwikak, kemi ikuak tlaxojpitsa se ejekatl chikaktik, iwa omonawaloti ijlik nochi n kali kan yejwah oewatokah. ³ Ikuakó okinmonextiljkeh sikimeh kemi nenépilteh milintokeh non omoxexelojkeh impah nochteh. ⁴ Iwa nochteh okiseljkeh n Espíritu Santo, iwa opé tlajtoah ika tlatlamanteh tlájtoltéh. Iwa okijoayah tlan n Espíritu Santo okinmiliaya makijtokah.

⁵ Itech nonteh tonatijmeh, ompa Jerusalén okatkah miakeh judío(jteh) non satlawel okimopantiyah itlanawatil Moisés. Ninteh judío(jteh) ovalajkeh de nochi lado de nin tlaltípkaktli. ⁶ Ikuak okikakeh non tlatekuinílistli, san nima owalmooolojkeh miakeh tlakah, iwa mach ok okimatiah tlan kijtoskeh, porke yejwah opé kikaki kintlapowiah ika intlajtol. ⁷ Yejwah satlawel omotlajtlachialtjkeh, iwa okijtojkeh:

—¿Amo de Galilea nochteh ninteh non tlajtojtokeh? ⁸ ¿Tleka kiné, tikinkakih tlajtoah ika totlajtol non tejwah ipan otitlakatkeh? ⁹ Nika kateh sikimeh tlakah de Partia, de Media, de Elam, de Mesopotamia, de Judea, de Capadocia, de Ponto iwa de Asia, ¹⁰ de Frigia iwa de Panfilia, de Egipto iwa de tlalmeh de África, non kateh okachi tlayakapa de Cirene. Nika noiwa chantitokeh sikimeh tlakah de Roma. ¹¹ Noiwa nika kateh sikimeh tlakah non ovalajkeh de Creta iwa de Arabia. Iwa ika tejwah totlajtol tikinkakih kenijke yejwah kimijtoah n milagros non Dios yokinchi.

¹² Nochteh san omotlajtlachialtiyah iwa mach okimatiah tlan kijtoskeh, iwa omotlatlajtlaniayah:

—¿Tlan kijtosneki nochi ni?

¹³ Pero oksikimeh san otepíjpiniawiayah, iwa okijoayah:

—¡Ninteh tlakah wintitokeh!

Pedro omóketski iwa opé tlajtoa

¹⁴ Ijkuakó Pedro omóketski iwa n májtlakteh iwa n se tlatematiltjkeh, iwa chikawak opé tlajtoa:

—Judíos iwa nochteh akimeh nonchanchijtokeh nika Jerusalén, xikmatikah nochi ni, iwa kuali xikkakikah tlan nomechilis. ¹⁵ Ninteh tlakah amo wintitokeh kemi nomejwah nonkimoliah, porke wel ok kualka, sikan las nueve de kuinal. ¹⁶ Porke nochi tlan axa panotok, ye noni tlan yowejka okijto n profeta Joel:

¹⁷ N Totajtsi Dios kijtoa:

Itech sa iksemi tonatijmeh,
niktitlanis no Espíritu itech nochteh n tlaltikpaktlakah.
Nomopilwah iwa nomochpochwah kijtoskeh tlan tlamoche was satepa.
Nomotelpochwah kinmitaskeh neskayolteh
iwa n tetajtsitsinteh tejtermikiskeh.

¹⁸ Itech nekateh tonatijmeh niktitlanis no Espíritu itech n tlakah iwa siwameh akimeh tekiti nonawak,
iwa tetlapowiskeh tlan satepa tlamoche was.

¹⁹ Tlakpak kan ilwikak iwa tlatsintla itech tlaltíkpaktli:
nikinteititis neskayolteh,
estli, tletli iwa méxpoktli.

²⁰ N tonati ayakmó tlawis,
iwa n metsi chichilewis kemi estli,
achto de maajsiki itonati n Toteko,
non tonati yetos weyi iwa mawistik.

²¹ Iwa nochteh akimeh kitene waskeh Itoka n Toteko, Ye kinmakixtis.

²² 'Tlakah de Israel, xikkakikah tlan nomechilis: Jesús de Nazaret, Dios okipéjpenki. Nomejwah kuali nonkimatokeh, porke Dios okimák weletlistli para makinchiwa wejweyi neskaloyteh nomoixpa, kemi nomejwah kuali nonkimatokeh. ²³ Pero nomejwah ononkikitsijkeh iwa ononkitemaktijkeh inmak tlakah tlajtlakolejkeh, iwa yejwah okimiktijkeh ipan krus, ijkó kemi Dios yokimatia iwa okimonekilti ijkó mamochiwa.

²⁴ Pero Totajtsi Dios okiyoliti. Ye okitekixtili imak n mikílistli, porke n mikílistli mach owéletki okítlanki. ²⁵ N rey David otajto de Cristo Jesús ijkuak okijto:

Nochipa onikitaya n Toteko noyakapa;
amitla weletis nechmojtis, porke ye kajki nomayekma.

²⁶ Yika niyolpaki,
iwa nitlakuika ika pakílistli,
iwa maya niwilantos,
kuali nikmatok oksepa nimoyolitis.

²⁷ Porke mach tikkawas noalma kan miktla,
nion tikkawas maijtlakawi ikuerpo Mokone yolchipawak.

²⁸ Otechimititi n ojmeh non nechwikah kan nochipa niyolitos,
iwa tikchiwas satlawel maniyolpaki ijkuak niyetos monawak.

²⁹ 'Nokniwah, kuali tikmatokeh totata rey David omikki iwa okitookakeh, porke asta axa tikmatokeh kan omotook. ³⁰ Pero David okatka profeta, iwa kuali okimatiá n Dios okisentlali seme de iixwiwah non walaskia okachi satepa yetoskia n Cristo. Ye mochiwaskia rey kemi okatka n David. ³¹ Ijkó, kemi yaskia inewia kontlajtlatok, David okijto Cristo moyolitiskia iwa Dios amo kikawaskia ikuerpo maijtlakawi miktla.

³² Dios okiyoliti n Jesús iwa tinochteh otikitakeh. ³³ Ijkó kiné, ik iyekma Totajtsi Dios okiweyijklalí n Jesús, iwa Jesús okiseli n Espíritu Santo non Itajtsi yokijtojka kitemakas. Iwa axa yotechaltílanili n Espíritu Santo non axa nonkitah iwa nonkikakih. ³⁴ David amo otlejkok ilwikak. Pero inewia okijto:

Notajtsi Dios okili Noteko:

"Ximoyayanti noyekma,

³⁵ asta manikintlali non mitskokolia itlampa mokxiwah."

Sal. 110:1

³⁶ 'Tlakah de Israel, kuali xikmatikah, nin Jesús Akin nomejwah ononkikrusifikarojkeh, Dios okiweiyikatlali para mayeto Nomoteko iwa Nomotemakixti.

³⁷ Ijkuak ijkó okikakeh, nochteh omoyolkokojkeh iwa okitlajtlanijkeh n Pedro iwa n oksikimeh tlatislanilti:

—Tokniyah, ¿tlan moneki matikchiwakah?

³⁸ Ijkuakó Pedro okinnankili:

—Xiklikah Dios manomechtlapojpolwi iwa xiktikitakah, iwa ximotekawilikah manomechkuatekikah itech Itoka n Cristo Jesús, ijkó Dios nomechtlapojpolwis de nomotlajtlakolwah iwa nonkiseliskeh n Espíritu Santo. ³⁹ Nin tlájtoli non yowejka omosentlali omochi para nomejwah iwa nomopilwah, noiva para nochteh akimeh Totajtsi Dios kinekis kinmakixtis itech nochi n tlaltíkpaktli.

⁴⁰ Pedro ok okintlapowia yá n tokniyah íwa ika miak chikawálistli okimiliaya:

—¡Ximomakixtikah de n tlaijyowílistli non kiseliskeh akimeh tlajtlakolchijtinemih!

⁴¹ Ijkó kiné, akimeh okikakeh tlan Pedro okinmachtí, omokuaatekijkeh; iwa non tonati omoseitilijkeh iwan tokniyah non kineltokah Cristo Jesús kemi eyi mil tlakah. ⁴² Iwa nochteh omochijchikawayah iwa okichiwayah tlan n tlatematiltijkeh okinmachtiayah, omoyekwikayah, omotrotsajtsiliayah iwa omoololoayah para kisepankuaskeh n paj.

Kenomi omoyekwikayah non sikinika okineltokakeh Cristo Jesús

⁴³ Nochteh omotlajtlachialtiyah, porke itlatitlanilwah n Cristo okinchiwayah miakeh milagros iwa okinextiayah tlan amayik omotaya. ⁴⁴ Nochteh non okineltokakeh omoyekwikayah, iwa okimosepanxexeliliayah tlan okipiayah. ⁴⁵ Okinemakayah nochi tlan okipiayah, iwa okinxejxeliliayah n tomi akimeh okimpoloaya. ⁴⁶ Ixmostla omoololoayah kan Weyi Tiopa, iwa incha okisepankuayah n paj, iwa sansikah omotlamajsewiayah ika pakflistli. ⁴⁷ Okiweiyikachiwayah Dios, iwa nochteh n tlakah de non altepetl okinyekitayah. Ixmostla omomiakiliayah non okineltokayah akimeh n Toteko Dios okinmakixtijiaya.

3

Pedro kipajtia se tlakatl non amo weleti nejnemi

¹ Se tonati, Pedro iwa n Juan oyajkeh kan Weyi Tiopa kemi las tres de tiotlak. Non ora nochteh omotrotsajtsiliayah. ² Nochi tonati ompa okatka se tlakatl non amo weleti nejnemi. Okonkawayah kan ikalte n Weyi Tiopa non omonotsaya Kuajkualtsi, iwa ompa okintlajtlaniliaya tomi akimeh ompa okalakiah. ³ Ijkuak ye non amo weleti nejnemi okitak n Pedro iwa n Juan, yokalaktiayah tiopa, okintlajtlanili tomi. ⁴ Ijkuakó Pedro iwa Juan okontlajtlatakeh, iwa Pedro okili n tlakatl:

—Techalita.

⁵ N tlakatl okinyektlajtlatak, porke okimoli chamo kimakaskiah itla. ⁶ Pero Pedro okili:

—Amo nikpia oro nion plata, pero tlan nikpixtok nimitsmaka: Itech Itoka n Cristo Jesús de Nazaret, ¡ximoketsa iwa xinejnemi!

⁷ Ijkuakó Pedro okontlanki ika imayekma iwa okiketsalti, iwa san nima omoyekmilajkeh ikxiomio wah. ⁸ Ijkuakó non amo oweletia onejnemia owalmóketski iwa opé nejnemi. Iwa okalak inwah kan Weyi Tiopa, nejnenti iwa ajkotsekuinti iwa okiweiyikachiwaya Dios. ⁹ Nochteh okitakeh n tlakatl kenijki onejnemia iwa okiweiyikachiwaya Dios. ¹⁰ Nochteh okiyekixmatkeh n tlakatl porke nochi tonati omotominijtlaniaya ikaltempa n Weyi Tiopa kan kaltentli non kilia Kuajkualtsi, iwa omotlajtlachialtijkeh por tlan otlamochijkah.

Pedro tenonotsa kan Portal de Salomón

¹¹ N tlakatl non opajtik ayakmó okinkawayá n Pedro nion Juan. Nochteh n tlakah omotlajtlachialtijkeh iwa omotlelojkeh okimitatoh kan korréedor non kiliah Portal de Salomón. ¹² Ijkuak ijkó okitak, Pedro okinmili:

—Tlakah de Israel, ¿tleka nonmotlajtlachialtiah? Techsentlajtlatah kemi yetoskia tejwah tonewiah otikpajtjkeh nin tlakatl; noso kemi yetoskia tikualteh titlakah, iwa ika toteletilis otikchijkeh manejnemi. ¹³ Pero amo ijkó kemi non kimoliah; porke Idios Abraham, Isaac, Jacob iwa nochteh totatawah, Ye Akin okipajti n kókoxki iwa okiweyijkatlali Ikone Jesús, Akin nomejwah ononkitemaktijkeh inmak n tekiwajkeh, iwa ikuak Pilato okinekia kikajkawas, nomejwah mach ononkinekeh. ¹⁴ Ikuak onomechtlahtlanijkeh kox ononkinekiah makikajkawakah Akin yolchipawak iwa yekmilajka, nomejwah mach ononkinekeh, yej ononkitlajtlankeh makikajkawakah se tlakatl non temiki. ¹⁵ Ijkó nomejwah ononkimiktijkeh Akin weleti kichiwa se mayolito nochipa. Pero Dios okiyoliti, iwa noni tejwah kuali tikmatokeh porke otiktakeh. ¹⁶ Nin tlakatl non kajki nomoyakapa, non nomejwah kuali nonkixmatih, Dios okipajti porke titlaneltokah itech iweletilis n Jesús. Iwa por tikneltokah n Jesús, kemi nochteh nomejwah nonweletih nonkitah.

¹⁷ 'Nokniyah, kuali nikmatok ikuak nomejwah iwa n tlanawatijkeh ononkimiktijkeh n Jesús, mach ononkimatiyah tlan ononkichiwayah. ¹⁸ Ijkó Dios okichi tlan achto yokitematiltjika ika intlajtol iprofetajwah. Nochteh yejwah okijtojkeh Cristo tlaijyowiskia. ¹⁹ Yika, ayakmó xikchiwakah tlajtlácoli iwa xiktlakitakah Dios. Ijkó Ye kilkawas nochi tlan amo kuali ononkichijskeh, iwa nomechmakas yankuik chikawálistli, ²⁰ iwa kualtitlanis n Jesús, Akin yowejka okipéjpenki para mayeto n Cristo. ²¹ Pero axa, Cristo Jesús ok moneki mayeto ilwikak asta ikuak Dios tlamis kiyankuilis nochi tlan onka ilwikak iwa ipa n tlaltíkpaktli. Dios ya wejkawitl ijkó okijto ika intlajtol n profetas. ²² Yika, Moisés okinmili totatawah: "Ijkó kemi n Toteko Dios onechtítlanki nomonawak, noiwa nomechtitlanilis se profeta non kisas de nomejwah. Xikneltokilikah nochi tlan Ye nomechilis. ²³ Porke akin amo kitlakitas non profeta, ayakmó kikawiliskeh mayeto tewa iwan tlakah de Israel."

²⁴ 'Samuel iwa nochteh n profetas non satepa oneskeh, noiwa otetlapowijkeh tlan tlamochejtok itech ninteh tonatijmeh. ²⁵ Nomejwah nontepilwah de nekateh profetas; iwa Dios nomechmakas tlan okinkakiti kinmakas totatawah ikuak okili n Abraham: "Por moxwiyah, Dios kintiochiwas nochteh n tlaltikpaktlakah." ²⁶ Ikuak Dios okiyoliti Ikone, achto onomechtitlanili nomonawak, para manomechtiochiwa, iwa ijkó xikkawakah tlan amokuali nonkichijsinemih.

4

Pedro iwa n Juan innawak tekiwajkeh

¹ Pedro iwa n Juan ok okintlapowijtokah n tlakah. Ikuakó okalakikoh n tiopixkeh iwa n tlanawati non okinnawatiaya n tlamokuitlawijkeh de kan Weyi Tiopa iwa n saduseos. ² Satlawel okualantiwalayah porke Pedro iwa Juan okinmachtiayah n tlakah, iwa okinmiliyah non yomikkeh moyolitiskeh porke Jesús omoyoliti de kan mikemeh. ³ Ikuakó okinkitskijkeh iwa okintsakuatoh, iwa ompa okinkajtejkeh non tonati porke yotleyuatoka. ⁴ Pero miakeh akimeh okikakeh intlajtol, okineltokakeh Cristo Jesús; iwa san tlakah okatkah kemi mákuili mil.

⁵ Ikuak owalmostlatik, n tlayakankeh judíojteh, n tetajmeh non tlayakantokeh kan Weyi Tiopa iwa n tlamachtijkeh de itlanawatil Moisés, omoololojkeh kan altepetl de Jerusalén. ⁶ Ompa okatka Anás n tiópixki non okachi otlayakantoka. Noiwa ompa okatka Caifás, Juan, Alejandro iwa n oksikimeh ichanejkawah n Anás. ⁷ Ikuakó okwalinnotsatoh n Pedro iwa n Juan iwa okinketskeh tlatlajkotia, iwa okintlajtlanijkeh:

—¿Akin onomechmák non tekiwajyotl, noso akin onomechili xikpajtikah nin tlakatl?

⁸ Ikuakó Pedro, non okipixtoka ichikawalis n Espíritu Santo, okinmili:

—Wejweyi tekiwajkeh iwa tetajmeh de Israel: ⁹ Ijkó kemi nomejwah nontechtlajtlanijkeh, kenijki otikpajtjkeh n kókoxki, iwa nonkinekeh nonkimatiskeh kenomi opajtik.

¹⁰ Tomechmatiltiah inyakapah nochteh n tlakah de Israel para makimatiyah nin tlakatl non kajki nomoyakapah, opajtik ika Itoka n Cristo Jesús non de Nazaret, Akin nomejwah ononkimiktijkeh itech krus, iwa Dios okiyoliti de kan mikemeh. ¹¹ Nin Jesús, Ye n tetl

Akin nomejwah nonkalchijchijkéh ononkitlakaltechojkeh, pero nin tetl omochiwako non okachi tetlakxili. ¹² Mach onka ok se tlakatl akin weletis techmakixtis, porke Dios mach otechmák ok se tlakatl itech nin tlaltípkaktli para inawak matimomakixtikah.

¹³ Ijkuak okitakeh kenijki Pedro iwa n Juan mach okimawiliayah tlajtoskeh teixpa, maya amo kanaj omoixtlamachtijkéh, satlawel omotlajtlachialtijkéh. Ijkuakó okajsikamatkeh milák onemiah iwan Jesús. ¹⁴ Yika amitla oweletkeh okimilijkéh porke n tlakatl non okipajtijkéh ompa inwah omoketoka. ¹⁵ Ijkuakó okwalinkixtijkéh de kan Sanedrín,* iwa nochteh n tekiwajkeh ompa omokajkeh para motlapowiskeh tlan kichiwaskeh. ¹⁶ Iwa okimoliayah:

—¿Tlan tikchiwaskeh iwa ninteh tlakah? Nochteh non chantitokeh nika Jerusalén kimatih okichijkéh se weyi milagro, iwa amo weletis tikijtoskeh amo milák. ¹⁷ Yika, para ayakmó okachi mamoxitini nin tlájtoli, matikinmomojtikah, para ayakmó matlamachtijtinemikah de Jesús.

¹⁸ Ijkuakó oksepa okinnotskeh mawalkalakikah iwa okinnawatijkéh ayakmó matetlapowikah nion matlamachtikah de Jesús. ¹⁹ Pero Pedro iwa n Juan ijkí okinnankilijkéh:

—Kuali xikyejyekolikah nomejwah, kox kuali inawak Dios tlan nomejwah nontechnawatiah, ¿akin okachi moneki se makitlakita, nomejwah noso Dios? ²⁰ Mach weletis san tejwah matikpixtokah tlan otiktakeh iwa otikkakeh.

²¹ Ijkuakó n tekiwajkeh okinmomojtijkéh, pero okinkajkeh mawiah. Amo okajsikeh kenijki kintlaijyowitziskeh, porke nochteh n tlakah okiweyijkachiwayah Dios por neká tlakatl non opajtik. ²² Iwa n tlakatl non opajtik ika non milagro, yokipiaya okachi de ome pójali xiwitl.

Non kineltokah Cristo Jesús kitlajtlaniliah Dios makimaka chikawálistli

²³ Keman okinkajkeh mawiah, Pedro iwa n Juan oyajkeh kan okatkah inmikniyah, iwa okimilijkéh nochí tlan n tetajmeh non tlayakantokeh kan Weyi Tiopa okimilijkah.

²⁴ Ijkuak yokikakeh nochí tlan okimilijkéh, nochteh omotrotsajtsilijkéh iwa okijtokeh:

—Totajtsi Dios, Tejwatsi otikchijchi n ilwikak, iwa n tlaltípkaktli, n weyi atl iwa nochí tlan intech onka. ²⁵ Tejwatsi ika iweletilis n Espíritu Santo iwa ika itlajtol motékitki David, otikijo:

¿Tleka nochteh n tlaltípkaktlakah onewah mopa?

¿Iwa tleka nochteh san tlan kajsih kichiwah?

²⁶ N wejweyi tlanawatijkéh de nin tlaltípkaktli omoseitilijkéh, iwa n tekiwajkeh de nochteh n altepemeh motlatlalwiskeh iwa onewaskeh ipan Toteko Dios iwa Cristo.

Sal. 2:1-2

²⁷ 'Tíkmatih milák, Herodes Antipas Primero iwa Poncio Pilato omoseitilijkéh nika Jerusalén iwa sikimeh tlakah non amo judíojteh iwa oksikimeh non milák judíojteh, nochteh omoseitilijkéh iwa oonewakeh ipan Jesús Mokone yolchipawak, Akin Tejwatsi otikpéjpenki. ²⁸ Ijkuak oonewakeh ipa, yejwah okichijkéh mamochiwa tlan Tejwatsi yotikmolikha iwa otikmonekilti ijkó mamochiwa. ²⁹ Iwa axa, Toteko Dios, xikita kenijki kinekih techmomojtiskeh, xikchiwa matimoyolchikawakah para matitetlapowikah de motlajtol iwa amitla matechmojti. ³⁰ Iwa ika moweletilis mapajtikah n kokoxkeh, iwa mamochiawah milagros iwa mamonextikah wejweyi neskayolteh iteka Cristo Jesús Mokone yolchipawak.

³¹ Ijkuak yotlankeh omotrotsajtsilijkéh, san nima otlalólinki kan omoololojkeh. Iwa nochteh okiselijkéh n Espíritu Santo, iwa ika yolchikawálistli otetlapowijtinenkeh de itlajtol Totajtsi Dios.

Nochí tlan okipiayah okimosepanxejxelilijkéh

³² Nochteh non kineltokayah n Cristo Jesús san se intlayejyekolis okipiayah, iwa nochí tlan okichiwayah, sansikah okichiwayah. Amaka okijtoaya san ye iaxka tlan okipiaya,

* ^{4:15} Sanedrín: nin grupo kemi de 50 kimajmanah n tetajmeh non tlaixkomakah ijkuak kinteiliah akimeh amo kitlakitah intlanawatil.

yej okimosepanxejxeliliayah.³³ Iwa ika miak weletlistli, itlatitlanilwah otetlapowiayah Toteko Jesús oksepa omoyoliti, iwa Dios saikpanoa okintiochiwaya.³⁴ Nion seme de yej wah itla okipoloaya, porke nochteh akimeh okimpiayah intlalwah noso inkal, okinnemakayah,³⁵ iwa okinmactiliyah n tlatematiltijkeh, iwa yej wah okinxejxeliliyah akimeh okimpoloaya.³⁶ Ijkó okichi se tlakatl non itoka José. Nin José otlákatki kan isla de Chipre iwa owalewatoka de Leví; iwa n tlatematiltijkeh okitlalilijkeh itoka Bernabé, non kijtosneki: Teyolchika.³⁷ Nin tlakatl okinemák itlal iwa n tomi okinmactili n tlatematiltijkeh.

5

Ananías iwa Safira tlajtlakolchiwah

¹ Noiwa ok se tlakatl non itoka Ananías iwa isiwa Safira okinemakakeh intlal.² Iwa nin tlakatl omotlatlalwi iwa isiwa para makimokawakah siki tomi, iwa oksiki okinmactilitoh n tlatematiltijkeh.³ Ijkuakó Pedro okili:

—Ananías, ¿tleka otikkawili n satanás makimoaxkati moyolo, iwa mamatstokti xikkajkayawa n Espíritu Santo, iwa otikchikowi n tomi non omitsmakakeh por motlal?⁴ ¿Mach amo okatka moaxka n tlali? Iwa ijkuak yotknemák, ¿amo noiwa okatka moaxka n tomi? ¿Tleka kiné otikkawili moyolo matlakajkayawa? Amo otikinkajkaya n tlakah, yej otiknekia tikkajkayawas Dios.

⁵ Ijkuak Ananías otlanki okinkak ninteh tlájtoltéh, omikki. Iwa nochteh akimeh okimatkeh tlan otlamochi, tlawel omomojtijkeh.⁶ Ijkuakó ovalajkeh sikimeh telpokameh, okimemelojkeh n miketl iwa okitookatoh.

⁷ Kemi eyi ora satepa, okalakiko isiwa n Ananías, mach okimatia tlan otlamochijka.
⁸ Ijkuakó Pedro okitlajtlani:

—Techili, ¿Nomej wah ononkinamakakeh n tlali, achó kemi nonkijtoah?

N siwatl otlanankili:

—Milák, achó ipati.

⁹ Pedro okili:

—¿Tleka ononmotlatlalwijkeh para nonkiyejyekoskeh Iespíritu n Toteko Dios? Kaltempa kalaktiwitseh akimeh okitookatoh motlakau, iwa axa te noiwa mitstookatiweh.

¹⁰ Ijkuakó Safira owetski ikxitla n Pedro iwa omikki. Ijkuak owalkalakeh n telpokameh, okajsikoh n Safira yomikki, okikixtijkeh iwa okitookatoh inakastla iokich.¹¹ Nochteh n tlaneltokakeh, iwa akimeh okimatkeh tlan otlamochi, satlawel omomojtijkeh.

Itlatitlanilwah Jesús kimpajtiah miakeh tlakah

¹² Itlatitlanilwah Jesús okinnextiayah miakeh neskayolteh iwa tlan tetlajtlachialti ompa Jerusalén, iwa nochteh non okineltokayah n Jesús omoololoayah kan korréedor non kiliah Portal de Salomón.¹³ Iwa n oksikimeh mach omixewiayah moneloskeh inwah, pero nochteh okintlanekiliayah.¹⁴ Iwa omomiakiliayah miakeh tlakah iwa siwameh non okineltokayah n Toteko.¹⁵ Iwa asta okinkixtiayah inkokoxwah itech ojiali, iwa okintlaliayah ipan inkauajtlapech noso ipan impetl para ijkuak panos n Pedro, maya san ika itlasekawilo makoninmaksi iwa ijkó mapajtikah.¹⁶ Noiwa akimeh ochantitokah itech altepemeh non okiyawalojtokah Jerusalén, okwalinwikayah inkokoxwah iwa akimeh okimpiayah espíritus amokualteh, nochteh opajtiah.

Pedro iwa n Juan oksepa konintsakuah

¹⁷ Ijkuakó n tiópixki non okachi otlayakantoka iwa sikimeh saduseos non iwa okatkah, satlawel oxikojmikeh,¹⁸ iwa okinkitskijkeh n tlatematiltijkeh iwa okintsakeh.¹⁹ Pero se yáuli iángel n Toteko okitlapo n kaltentli kan otsaktokah, iwa okinkixtih. Iwa okinmili:

²⁰ —Xiwiah kan Weyi Tiopa, iwa xikinmatiltikah n tlájtoli non kitemaka temakixtlistli.

²¹ Okikakeh, iwa ijkuak owaltláneski oyajkeh kan Weyi Tiopa iwa opé tlamachtiah.

Ijkuakó n tetajmeh non tlayakantokeh kan Weyi Tiopa iwa non íwa okatkah, okin-notskeh mamoololokah nochteh non otlanawatiyah kan Weyi Tiopa. Satepa otlatit-lankeh makinnotsatih n tlatitlanilteh kan otsaktakah. ²² Pero ijkuak n tlamokuitlawijkeh okalakitoh kan otsaktakah n tlatematiltijkeh, ayakmó okinmajsitoh. Iwa owalmokopti-wetskeh otlanawatikoh n tlatematiltijkeh ayakmó ompa okatkah, ²³ iwa okijtokeh:

—Otikkajsitoh n kaltentli kuali tsaktok, iwa n tlamokuitlawijkeh okiyekmokuitlawij-tokah n kaltentli kan otsaktakah n tlatematiltijkeh, pero ijkuak otitlatlapojkeh, amaka otikajsikeh tlajtit.

²⁴ Ijkuak okikakeh nochi ni, n tlayákanki de non otlamokuitlawiayah kan Weyi Tiopa iwan tiopixkeh non otlayakantakah, omotlajtlachialtijkeh iwa omotlajtlaniayah tlan okachi tlamochiwaskia. ²⁵ Ijkuakó okalakiko se tlakatl, iwa okinmili:

—N tlakah akimeh nomejwah nonkintemoah kateh kan Weyi Tiopa, iwa kinmachtij-tokeh n tlakah.

²⁶ Ijkuakó n tlayákanki iwa itlamokuitlawilwah, oyajkeh okwalinnotsatoh n tlatem-atiltijkeh, iwa okwalinwikakeh ika kuali, porke omawiah makinmojmotlakah ika tetl.

²⁷ Ijkuak okwalinwikakeh, okinketsatoh innawak tekiwajkeh, iwa n tiópixki non okachi otlayakantoka okinmili:

²⁸ —Tejwah kuali otomechilijkeh ayakmó xitlamachtikah ika itoka non tlakatl. Pero nomejwah amo ononchtehtlakitakeh, yej itech nochi nin altepetl de Jerusalén yononkiteixmatiltijkeh itlamachtilis non tlakatl. Iwa axa nonkinekih techtlajt-lakoltiskeh de imikilis non tlakatl.

²⁹ Ijkuakó Pedro iwa n oksikimeh tlatematiltijkeh otlanankilikkeh:

—Tejwah tikpiyah tiktakitaskeh tlan Dios kijtoa iwa amo tlan kijtoah n tlakah. ³⁰ Idios totatawah okiyoliti n Jesús, Ye Akin nomejwah ononkimiktijkeh ijkuak ononkikrusi-fikarojkeh ipan krus. ³¹ Dios yokiweyijkachi n Jesús ika iweletilis, iwa okitlali mayeto Tlayákanki iwa Totemakixti. Dios ijkó okichi para nochteh n tlakah de Israel mamoy-olpatlakah inawak iwa makintlapojpolwili intlajtlakolwah. ³² Tejwah otiktakeh iwa otikkakeh tlan tomechtlapowiah sansikah iwa n Espíritu Santo non Dios kinmaka akimeh kitlakitah.

³³ Ijkuak yejwah okikakeh tlan okijtoayah n tlatematiltijkeh, okualankamikeh iwa yokinekih kinmiktiskeh. ³⁴ Pero ompa inwah nonteh tekiwajkeh okatka se tlakatl fariseo non itoka Gamaliel. Ye okatka se tlamachti de itlanawatil Moisés iwa nochteh n tlakah satlawel okitlakitayah. Gamaliel omóketski iwa otlanawati makinkixtikah n tlatematiltijkeh san achitsi. ³⁵ Otlanki okinmili non oksikimeh tekiwajkeh:

—Tetajmeh de Israel, kuali xikitakah tlan nonkinekih nonkintoktiskeh ninteh tlakah.

³⁶ Kuali xikilnamikakah nomejwah, keniji yowejka omonexti se tlakatl non omonotsaya Teudas akin okijoaya weyijkatitok, iwa okinmoyakanalti kemi nawi siento tlakah. Pero ijkuak okimiktijkeh, nochteh akimeh okinyakanaya ochocholojkeh iwa ompa otlanki noch. ³⁷ Okachi satepa, itech nekateh tonatijmeh ijkuak okinmachotijtokah nochteh n tlakah de Israel, omonexti Judas non owalewatoka de Galilea. Ye okinmotlatlalwili miakeh tlakah, pero noiva okimiktijkeh; iwa nochteh akimeh okinyakanaya omoxexelo-jkeh. ³⁸ Ika noni nomechilia, xikinkawakah ninteh tlakah, iwa amo ximokalakikah inwah. Porke tla nin tlamachtílistli noso nin tekitl san yejwah kinekih kichiwaskeh, pojpoliwiis. ³⁹ Pero tla iaxka Dios, mach weletis nonkipojpoloskeh. Ximotlachilikh, amo kichiwa nonkixnamikiskeh Dios.

Iwa n tlayakankeh okitlakamatkeh n Gamaliel.

⁴⁰ Nochteh n tekiwajkeh omoyolsewijkeh ika tlan Gamaliel okinmili. Ijkuakó okin-notsatoh n tlatematiltijkeh, okinwitekeh iwa okinnawatiyah ayakmó matlamachtikah itech Itoka n Jesús, iwa satepa okinkajkajkeh. ⁴¹ N tlatematiltijkeh owalkiskeh de kan okatkah n tekiwajkeh ika miak pakílistli, porke Dios okinkawili matlaijyowikah iwa makimpipinawikah por okitenewayah Itoka n Jesús. ⁴² Iwa nochi tonati itech Weyi Tiopa iwa itech kalmeh, n tlatematiltijkeh otlamachtiayah iwa otetlapowiayah Jesús, Ye n Cristo.

Okimpejpenkeh chikome tlapalewijkeh

¹ Itech nekateh tonatijmeh, kemi okachi omomiakiliyah akimeh okineltokayah itlamachtilis n Cristo Jesús non otlajtoayah griego opé mokuejsoah innawak akimeh otlajtoayah hebreo, porke okijtoayah nochi tonati ikuak omoxejxeloaya n tlákuali, mach okinyektlakualtiyah n iknosiwameh griegas. ² Ikuakó n májtlaktli iwa ome tlatematiltijkeh okinmoololojkeh nochteh non kineltokah Cristo Jesús, iwa okimilijkeh:

—Amo kuali tejwah non tiktematiltiah itlajtol Dios, yej matipewakah matitlatetekakah para matlakuakah. ³ Ijkó kiné tokniwah, okachi kuali nomejwah xikimpejpenakah chikome tokniwah non kineltokah Cristo Jesús, non mayetokah milajkameh, matentokah de n Espíritu iwa makipiakah kuali intlanamikilis. Yejwah xikintlalikah makichiwakah non tekitl.

⁴ 'Tejwah tikchijtoskeh toteki; timotrotsajtsiliskeh iwa titetlapowiskeh de itlajtol Totajtsi Dios.

⁵ Nochteh okiwilitakeh tlan okimilijkeh makichiwakah. Iwa okipejpenkeh n Esteban, ye satlawel okipiaya tlaneltokálisli iwa otentoka de Espíritu Santo. Noiwa okipejpenkeh n Felipe, Prócoro, Nicanor, Timón, Pármenas iwa Nicolás non owalewatoka de Antioquía. Nin Nicolás, ikuak ayamó okineltokaya n Cristo, okiseli intlamachtilis n judíojteh. ⁶ Otlanki okwalinwikakeh innawak tlatematiltijkeh, iwa yejwah okintlalijkeh inmawah impah nonteh chikome tlakah iwa omotrotsajtsilijkeh.

⁷ Itlajtol Totajtsi Dios opé momati sentetl, iwa ompa Jerusalén okachi omomiakiliyah non kineltokah Cristo Jesús. Asta noiwa miakeh tiopixkeh judíojteh otlaneltokakeh inawak Cristo Jesús.

Kikitskiah n Esteban iwa kitsakuah

⁸ Esteban okatka se tlakatl non otentoka ika itlatiochiwalis iwa iweletilis Dios; iwa okinchiwaya wejweyi milagros inmixpa n tlakah non ompa ochantitokah. ⁹ Pero satepa, sikimeh tlakah non omoololoayah kan se sinagoga* non omotokayotiayah Esklavos Libertados, iwa sikimeh tlakah non ovalajkeh de Cirene, de Alejandría, de Cilicia iwa de Asia, opé motlatlajtolkopah iwan Esteban. ¹⁰ Pero amo oweletiah okitlaniah n Esteban, porke n espíritu okichiwaya matlanankili kemi se akin ixtlamati. ¹¹ Ikuakó san ich-taka okintlatlalwijkeh sikimeh tlakah para matlakajkayawakah yejwah okikakeh ikuak Esteban otlajtojtoka fiero de Moisés iwa de Dios. ¹² Ijkó okichijkkeh, okimpajsolijkeh nochteh n tlakah non ompa ochantitokah, noiwa n tetajmeh non tlayakantokeh kan Weyi Tiopa iwa non kitemachtiah n tlanawatlistli. Oyajkeh okikitskitoh n Esteban iwa okiwikakeh kan Sanedrín. ¹³ Noiwa okintemojkeh sikimeh tlakah xolópijteh, para matlakajkayawakah iwa makijtokah:

—Nin tlakatl nochipa tlajtojinemi fiero de tochipawak Weyi Tiopa iwa tlan kijtoa itlanawatil Moisés. ¹⁴ Otikkakeh okijto Jesús de Nazaret kixixitsas nin tiopa iwa kipatlas nochi tlan towejkatata Moisés otechnawati matikchiwakah.

¹⁵ Iwa nochteh n tekiwajkeh iwa akimeh ompa oewatokah, ikuak okiixtlajtlatakeh n Esteban okitakeh ixko omotaya kemi ixko se ángel.

Esteban motlajtolpalewia innawak tekiwajkeh

¹ N tiópixki non okachi otlayakantoka okitlajtlani n Esteban:

—¿Milák tlan kijtojtokeh?

² Esteban otlanankili:

—Nokniwah iwa tetajmeh, techkakikah, Totajtsi Dios non weyijkatitok okimonextili towejkatata Abraham kan tlali de Mesopotamia, achto de mochantiskia kan tlali de Harán, ³ iwa okili: “Xikkakajtewa motlal iwa nochteh non ken tikanmita, iwa xio kan tlali

* 6:9 sinagoga: se kali kan omoololoayah n judíojteh nochí sábado.

non Ne nimitsitisits.” ⁴ Ijkuakó Abraham okikakajte n tlali de Caldea iwa ochanchiwato Harán. Satepa omikki ita, iwa Dios okwalík n Abraham itech nin tlali, kan axa nomejwah nonchantitokeh. ⁵ Pero amitla okiaxkatili itech nin tlali, nion kan kitlalis se ikxi. Pero Dios okikakiti kiaxkatiliskia, iwa keman Abraham mikiskia n tlali kimokawiskiah ipilwah; maya itech nonteh tonatijmeh Abraham ayamó okimpiaya ipilwah. ⁶ Dios noiwa okili, ipilwah chantitoskiah itech oksikimeh tlalmeh kan amo inmaxka, kinnawatijtoskiah iwa tlaijyowijtoskiah nawi siento xiwitl. ⁷ Pero noiwa Dios okili: “Ne nikintlajtlakoltis n tlakah de non altepetl akimeh kintlaijyowiltiskeh mopilwah, satepa kisaskeh de ompa iwa nechtekichiwiliskeh itech nin tlali.” ⁸ Dios omoyekka iwan Abraham, iwa Abraham okisentlali inawak Dios kichiwas n sirkunsión kemi se neskayotl. Yika, ijkuak otlákatki ikone Isaac, ipan chikweyi tonati okisirkunsidaro. ^{Gn. 21:4} Noiwa ijkó okichi Isaac iwa ikone Jacob, iwa Jacob noijsé okichi iwa ipilwah, akimeh oyajkeh tetajmeh de n májtatlktli iwa ome familias de Israel.

⁹ Ninteh májtlakteh iwa ome ipilwah n Jacob, okatkah totatawah. Yejwah oxikojmikeh de inmikni José, iwa okinamakakeh para makiwikakah Egipto. Pero Dios okatka iwan José, ¹⁰ iwa okipalewi itech nochi tlan tlaijyowiaya. Dios okichi mayeto se ixtlámatki n José iwa okipalewi para ijkó n Faraón rey de Egipto makiyekita. Iwa n rey okitlali n José mayeto non okachi weyi tlanawati de ompa Egipto iwa asta makinawatijto icha.

¹¹ Ijkuakó owala miak apisol iwa miak tlaijyowílistli itech nochi n tlali de Egipto iwa de Canaán, iwa totatawah amo okipiayah tlan kikuaskeh. ¹² Pero ijkuak Jacob okima onka miak trigo kan tlali de Egipto, okintítlanki ompa itelpochwah non okatka totatawah. Ijkuakó sakinika oyajkeh Egipto. ¹³ Ijkuak totatawah oksepa oyajkeh Egipto, José omoteixmatilti innawak ikniyah, iwa ijkó n Faraón okima kan owalewatoka n José iwa akimeh ikniyah. ¹⁴ Satepa, José otlatítlanki makualikakah ita Jacob iwa nochteh non ken kinmita. Yejwah okatkah eyi pójali iwa káxtoli por nochteh. ¹⁵ Ijkó n Jacob otémok ochanchiwato kan tlali de Egipto. Satepa ompa omikki, iwa ompa noiwa omijmikeh nochteh totatawah. ¹⁶ Okachi satepa inkuerpojwah okinwikakeh Siquem iwa okintookakeh ijtk miketékochtli non Abraham okinkuiljka ipilwah n Hamor ompa kan tlali de Siquem.

¹⁷ Ijkuak yojsitiwalaya n tonati para mochiwas tlan Dios yokiljka Abraham, n tokniyah de Israel okachi opé momiakiliah ompa Egipto. ¹⁸ Ijkó otlamochi itech tlali de Egipto asta ijkuak opé tlanawatia ok se rey non amo okixma n José. ¹⁹ Nin rey okinkajkaya n tlakah judíojteh iwa okintlaijyowilti totatawah, asta okintokti makinkakajtewakah inselekkonewah para mamikakah. ²⁰ Itech nonteh tonatijmeh otlákatki Moisés. Dios okitlanekili non konetl, iwa itajwah okiskaltijkeh icha san eyi mestli. ²¹ Iwa keman okikajkawatoh n selekkonetl, ichpoch n Faraón, okiwík icha iwa okiskalti kemi yetoskia ikone. ²² Satepa Moisés okixtlamachijkeh ika nochi tlan egipsios okimatiah, ika noni Moisés okatka se tlakatl non kuali oixtlamatia itech nochi tlan okijtoaya iwa tlan okichiwaya.

²³ Ijkuak Moisés yokipiaya ome pójali (40) xiwitl, okintlajpaloto ikniyah n tlakah de Israel. ²⁴ Ompa okitak se tlakatl egipsio okiwitektoka se israelita, ijkuakó Moisés okipalewi iwa okimiki n egipsio. ²⁵ Moisés ijkó okichi porke okimoli chamo ka-jisikamatiskiah n judíojteh Dios okitítlanki para makimpalewi. Pero yejwah mach okaisikamatkeh. ²⁶ Keman owalmostlatik, Moisés okimitak omotekilmakatokah ome tlakah de Israel, ye okinekia kintlakawaltis, iwa okinmili: “Nomejwah nonmiknimel; ¿tleka nonmokojkoah?” ²⁷ Ijkuakó n tlakatl non otlawitektoka okontope n Moisés, iwa okili: “¿Akin omitstlali kemi titekiwa noso kemi titeyolsewi para ximokalaki towah?” ²⁸ ¿Tikneki techmiktis, kemi yala otikmiki n egipsio?” ²⁹ Ijkuak Moisés okikak tlan okili nin tlakatl, ocholo iwa oyá kan tlali de Madián. Ochanchiwato kan amo ialtépeu iwa ompa okímpixki ome ipilwah.

³⁰ Ome pójali (40) xiwitl satepa, se tonati Moisés okatka kan amaka chantí, kan tepetl Sinaí iwa ompa okimonextili se ángel itech se tlátsmoli non otlatlatoka. ³¹ Ijkuak Moisés

okitak non neskayotl, omotlajtlachialti, iwa keman omijuani okachi tlayakapa, ijkuakó okikak itlajtol n Toteko non okiliaya: ³² “Ne Idios nomotatawah, Ne Idios Abraham, Isaac iwa Jacob.” Moisés opé bibioka iwa mach ok omixewiaya kitlajtlatas n tlátsmoli. ³³ Iwa Toteko oksepa okitlapowi iwa, okili: “Xikinkixti mokakuah, porke n tlali kan titlaksatok tlatiochíwali. ³⁴ Ne yonikitak kenomi tlaijywiah nopolwah akimeh kateh Egipto, Ne yonikinkak kenijki chokah, yika oniwalemok onikimpalewiko. Axa, xiwiki, porke nimitstitlanis Egipto.”

³⁵ ¹Maya nomotatawah okitlawelitakeh n Moisés iwa okilijkah: “¿Akin omitsnawati xiyo totonawati iwa toteyolsewi?” Dios okitlali n Moisés kemi tekiwa iwa kemi akin kinkixtiskia totatawah de kan tlali de Egipto ika iweletilis n ángel non okimonextili kan tlátsmoli non otlatlatoka. ³⁶ Ye n Moisés akin okinkixtih totatawah kan tlali de Egipto, iwa Ye okinchi milagros iwa neskayolteh itech non tlali, kan weyi atl non kiliah chichiltik iwa kan amaka chantí, ijkó okichijtínenki itech ome pójali (40) xiwitl. ³⁷ Ye nin Moisés akin okinmili n tlakah de Israel: “Toteko Dios nomechaltitlanilis se profeta non kisas de intech nomokniyah kemi ne onechaltítlanki nomonawak. Xikneltokakah nochí tlan Ye nomechilis.” ³⁸ Ye nin Moisés, akin noiva okatka iwa n tlakah de Israel kan amaka chantí. Noiva ye akin omotlapowi iwa n ángel kan tepetl non itoka Sinaí iwa okinnonotski totatawah. Ye akin okinseli n tlájtolteh non techmachtiah kenijki tiyeknemiskeh iwa otechimpanolteli.

³⁹ ¹Pero totatawah mach okinekeh okitlakitakeh, yej omoixkopkeh inawak iwa okinekiah mokopaskeh Egipto. ⁴⁰ Ijkuakó okilijkah n Aarón: “Techinchijchiwili sikimeh diosmeh non kinchijchiwah ika inma non matechyakanakah porke amo tikmatih tlan omochi n Moisés non otechkixti de kan tlali de Egipto.” ⁴¹ Ijkuakó okichijchijkeh se “dios” kemi se torojkonetl. Okinmiktijkeh sikimeh yolkameh, okinmanilijkah iwa opakeh ijkuak okitakeh tlan okichijchijkeh ika inmawah. ⁴² Pero Dios okinkajka makichiwakah tlan yejwah okinekiah, iwa okinka makinweyilikah n tláwilteh non kateh ilwikak. Ijkó kemi ijkuilitok itech ilibro n profeta:

Tlakah de Israel, itech nonteh ome pójali (40) xiwitl ijkuak ononnentinemiah kan amaka chantí

¿kox Ne ononnechtlamiktilijkeh iwa Ne ononnechtlamanilijkeh?

⁴³ Amó, yej nomejwah ononkimamajtinemiah itiopantsi n “dios” Moloc, iwa n sítlali de n “dios” Renfán, non san nomejwah ononkinchijchijkeh ika nomomawah.

Yika, Ne, nomechkixtis de nomopáis iwa nomechtitlanis okachi tlayakapa de Babilonia. ^{Am.}

^{5:25-27}

⁴⁴ Ijkuak totatawah onemiah kan amaka chantí, okiwikatinemiah n tabernákulo, iwa ompa ijtik oyayah n temeh patlawakeh non intech ojkuilitoka n tlanawátili. Moisés okichijchi nin tabernákulo ijkó kemi Dios okinawati iwa okinextili makichiwah. ⁴⁵ Nin tabernákulo noso mantajtiopantsi non Moisés okichijchi okinmaxkatili totatawah, iwa akimeh ovalajkeh nika iwan Josué, okualikakeh n tabernákulo ijkuak okintlanilijkeh intlal n oksikimeh altepemeh. Dios okinkixtili intlalwah akimeh nika ochantitokah iwa okinmaxkatili totatawah. Iwa ijkó okatka asta n tonatijmeh ijkuak n rey David onemiah.

⁴⁶ Dios okitiochiwaya n David, iwa ye okinekia kichiwas se Weyi Tiopa kan machantito Idios Jacob. ⁴⁷ Pero amo David okichijchijwili iweyitiopa, yej Salomón okichijchijwili.

⁴⁸ Maya tikmatokeh Totajtsi Dios amo chantitok ijtik tiopameh non kinmachijchiwah n tlakah. Kemi okikuilo n profeta Isaías:

⁴⁹ N ilwikak ye kan niewatok, iwa n tlaltíkpaktli kan nikinsewia nokxiwah.

¿Tlan kali nonkinekih nonnechchijchiwiliskeh nomejwah?, kijtoa n Toteko, ¿noso kan weletis nimosewis?

⁵⁰ ¿Mach amo Ne ika noma onikchijchi nochí tlan onka?

^{Is. 66:1-2}

⁵¹ Iwa Esteban noiva okinmili n tlayakankeh:

—Nomejwah ayik nonkinekih nontetlakitaskeh. Ayik nonkinekih nonkikakiskeh nion nonkinekih nonkichiwaskeh tlan Dios nomechnawatia, ijkó kemi kichiwah akimeh amo kixmatih Dios. Ayik nonmotekawiliah manomechyakana n Espíritu Santo, nomejwah ijkó nonkichiwah kemi okichijkeh nomotatawah.⁵² ¿Kox onka se profeta non amo okitlaijyowiltijkeh nomotatawah? Nochtek n profetas akimeh yowejka okitematiltijkeh walaskia neká tlakatl yekmilajka, nomotatawah okimiktijkeh. Iwa axa, nin tlakatl yekmilajka yowitsa, pero nomejwah ononkitemaktijkeh iwa ononkimiktijkeh.⁵³ Iwa maya Dios okinnawati iangelwah manomechmakakah itlanawatil, nomejwah mach ononkitlakitakeh non tlanawátili.

Kimiktiah n Esteban

⁵⁴ Ijkuak n tlayakankeh okikakeh tlan okijo n Esteban, okualankamikeh iwa asta omotlannetsoniayah.⁵⁵ Pero Esteban tentok de Espíritu Santo, oajkotláchixki ilwikak iwa okitak iweyijkachiwalis Dios, noiva okitak n Jesús moketok ik iyekma n Totajtsi Dios.

⁵⁶ Iwa okijo:

—¡Xikitakah! Ne nikita n ilwikak tlapotok, iwa nikita n Jesús Akin omochi tlakatl moketok ik iyekma Dios.

⁵⁷ Ijkuakó yejwah omonakastsajtsakeh, okojtsajtsikeh iwa nochtek oonewakeh ipan Esteban.⁵⁸ Okikixtijkeh kala de kan altepetl iwa ompa okimojmotlakeh ika tetl. Iwa akimeh okimojmotlakeh n Esteban, okinkajtejkeh intlakenwah makimokuitlawilijo se télpochtli non itoka Saulo.

⁵⁹ Iwa ijkuak okimojmotlatokah, Esteban omotrotsajtsili iwa okijo:

—Noteko Jesús, xikseli noespíritu.

⁶⁰ Omotlankuáketski iwa chikaktik okijo:

—¡Noteko, amo xikintlajtlakolti ninteh tlakah!

San nima ijkuak otlanki omotrotsajtsili, omikki.

8

Saulo kintotojtoka non okineltokayah Cristo Jesús

¹ Saulo okimoli kuali makimiktakah n Esteban.

Itech non tonati, non de Jerusalén opé kintotojtokah porke okineltokayah Cristo Jesús. Nochtek ochocholojkeh omotlajtlaatitoh itech tlalmeh de Judea iwa de Samaria, iwa sanwel n tlatematiltijkeh omokajkeh.² Sikimeh tokniwah non okimopantiayah Dios, okitookakeh n Esteban iwa satlawel okichokilijkeh.³ Pero Saulo okintotojtokatinemia non okineltokayah n Cristo, okalakia incha iwa okinkixtiaya kintilantiwits n tlakah iwa n siwameh, iwa okintsakuaya.

Felipe tetlapowia de itlajtol Dios itech tlali de Samaria

⁴ Akimeh ocholojkeh de Jerusalén, sentel kan ik oyayah otetlapowiayah de n kualitlátoli de Dios.⁵ Felipe, oyá kan se altepetl de Samaria iwa ompa opé kintlapowia de Cristo.⁶ Miakeh tlakah omoololoayah iwa ika paklistli okikakiah tlan Felipe okinmiliaya. Okikakiah iwa okimitayah n milagros non ye okinchiwaya.⁷ Porke miakeh tlakah non okimpiayah espíritus amokualteh opajtiah, iwa ijkuak n espíritus amokualteh okisayah inmijtik nonteh kokoxkeh, chikaktik otsajtsiah. Miakeh koxomeh iwa non amo oweletiah onejnemiah noiva opajtiah.⁸ Ika noni, nochtek non ochantitokah itech non altepetl okipaiyah miak paklistli.

⁹ Ompa Samaria ochantitoka se tlakatl non itoka Simón, ye achto otetlajchiwiaya iwa okinkajkayawa n tlakah non ompa ochantitokah, iwa nochtek okimiliaya ye weletini.

¹⁰ Iwa nochtek okikakiah, non okachi tsjitsikitsi asta non okachi ya teta, iwa okijtoayah:

—Nin tlakatl kipia iweletilis Dios.

¹¹ Nochtek oyayah inawak, porke ika itetlajchiwilis miak xiwitl okinkajkaya.¹² Pero ijkuak n tlakah de Samaria okineltokakeh tlan Felipe okinmatiltiaya ijkuak ye okintlapowiaya de Cristo Jesús iwa okinmajsikamatiltiaya tlan kijtosneki itlanawatil Dios,

miakeh tlakah iwa siwameh omokuaatekiyah. ¹³ Asta inewia n Simón otlaneltokak iwa omokuaateki, iwa opé kiwikatinemi n Felipe iwa satlawel omotlajtlachialtiaya ikuak okimitaya n wejweyi milagros iwa neskayolteh non Felipe okinchiwaya.

¹⁴ Iwa ikuak n tlatematiltijkeh non okatkah Jerusalén okimatkeh miakeh tlakah de Samaria yokiselijkeh itlajtol Dios, okititlankeh n Pedro iwa Juan mawiah ompa. ¹⁵ Ikuak Pedro iwa Juan okalakitoh Samaria, omototsajtsilijkeh inawak Dios para nochteh n tokniyah de Samaria non kineltokah Cristo Jesú, makiselikah n Espíritu Santo. ¹⁶ Porke nion seme de yejwah yokiselijka n Espíritu Santo, porke san ok omokuatekijkah itech Itoka n Toteko Jesú. ¹⁷ Ikuakó Pedro iwa n Juan okintlalijkeh inmawah impah, iwa non kineltokah Cristo Jesú, okiselijkeh n Espíritu Santo.

¹⁸ Ikuak Simón okitak n Espíritu Santo owaltemoya ikuak n tlatematiltijkeh okintlaliliayah inmawah impah, okinkakiti kinmakas tomi, ¹⁹ iwa okinmili:

—Noiwa ne techmakakah non weletílistli, para ikuak ne nikintlalis nomawah ipan aka noiwa makiseli n Espíritu Santo.

²⁰ Ikuakó Pedro okili:

—Motomi mapojpoliwi mowa, ken tikyejjekolia tlan Dios kitemaka weleti mokoa ika tomi. ²¹ Te amitla tikpia towah nion mitsnamiki tikchiwas nin tekitl, porke moyolo amo chipawak inawak Dios. ²² Ximolnamiki, iwa xiktlatlauji Dios mamitstlapojpolwi, chamo ijkó mitstlapojpolwilis tlan otikmoli itech moyolo. ²³ Porke nikita moyolo tentok ika miak nexikólistli, iwa n tlajtlákoli mitstakatsojtok.

²⁴ Ikuakó Simón otlanankili:

—Xiktlatlautikah Dios amitla manechajsi ika tlan ononnechilijkeh.

²⁵ Ikuak yotlankeh okinmatiltijkeh itlajtol Toteko, n tlatematiltijkeh omokopkeh Jerusalén. Iwa itech miakeh altepetsitsinteh de Samaria kan ik opanotiayah, otetlapowiayah de n kualitlájtoli de Dios.

Felipe iwa n tlakatl de Etiopía

²⁶ Satepa se iángel n Toteko okili n Felipe:

—Ximoketsa iwa xio kan tlalmeh non kateh ik tlatsintla, xikonana n ojli non temoa de Jerusalén iwa onkisa Gaza.

Ye ni n ojli non panoa kan tlaltejtéyinki. ²⁷ Felipe owalmóketski iwa oyá, iwa itech ojli okajsito se tlakatl de Etiopía. Nin tlakatl okatka eunuco* iwa okatka weyi tekiwa iwa tesorero inawak n reina Kandace akin otlanawatiaya kan tlali de Etiopía. Ye yowalmokopaya de Jerusalén kan okiweyijkachiwato Dios. ²⁸ Nin tlakatl yowalmokopaya kan ialtépeu, oewatotiwala iwan ikarreta iwa okiamapoaya se amatlajuíloli non okikuilo n profeta Isaías. ²⁹ Ikuakó n Espíritu Santo okili n Felipe:

—Xikajsi neká karreta iwa ximonetecho inakastla.

³⁰ Ikuak Felipe okajsito n tlakatl etíope, okikak okiamapoaya itlajkuilol n profeta Isaías, iwa okitlajtlani:

—¿Tikajskamati tlan tikamapa?

³¹ N tlakatl okinankili:

—¿Kenomi nikajskamatis, tla amaka nechajskamatiltia?

Iwa okitlatlauji n Felipe matlejko ipan ikarreta iwa mamotlali inakastla.

³² Iwa ye ni n tlajtoli non okiamapoaya n tekiwa de Etiopía:

Kemi se ichkatsi okiwikakeh kan tlamiktilo;
iwa ijkó kemi se ichkakonel amo tsajtsi ikuak kiximah,
ijkó Ye amitla okijo keman okimktijkeh.

³³ Inmixpah nochteh okipijpinawijkeh iwa amaka okitlajtolpalewi;

¿akin weletis techinmititis ipilwah?,
porke okimktijkeh itech nin tlaltíkpaktli.

Is. 53:7-8

³⁴ N etíope okitlajtlani n Felipe:

* 8:27 eunuco: kijtosneki se tlakatl non ayakmó kelewia siwatl iwa nion amo weleti kimpia ipilwah.

—Nimitstlatlaujtia, techili, ¿de akin tlajtoa n profeta, de ye inewia noso de ok se?

³⁵ Ijkuakó Felipe opé kitlapowia de non tlajkuíoli n etíope kan okiamapoaya, iwa opé kajsikamatiltia n kualitlátjoli de Jesús. ³⁶ Okalakitoh kan okatka atl, iwa n tekiwa etíope okijo:

—Nika onka atl, amaka nechtsakuilia manimokuaateki.

³⁷ Felipe okili:

—Tla milák titlaneltoka ika nochí moyolo, weletis timokuaatekis.

N tlakatl okinankili:

—Nikneltoka Cristo Jesús, Ye Ikone n Totajtsi Dios.

³⁸ Ijkuakó otlanawati makiketsaltikah n karreta, iwa san ken ome otemokeh ijtki atl, iwa Felipe okikuuateki n tlakatl etíope. ³⁹ Ijkuak owalkiskeh ijtki atl, Iespíritu n Toteko Dios okiwík n Felipe, iwa n tekiwa etíope ayakmó oksepa okitak; iwa oyá icha ika pakílistli. ⁴⁰ Pero Felipe okalakito kan altepetl de Azoto, iwa opé kitematiltia n kualitlátjoli de Dios itech miakeh altepemeh asta okalakito Cesarea.

9

Saulo kineltoka n Cristo Jesús

(Hch. 22:6-16; 26:12-18)

¹ Saulo ok otlamomojijtinemia iwa okintemojijtinemia akimeh kineltokah n Toteko Jesús, porke ye okinekia kinmiktis. Ika noni oyá okitato n tiópixki non okachi otlayakantoka, ² okitlajtlanilito makinmaka amameh ixmachotitokeh para ika kinteititis kan sinagogas de Damasco. Iwa ika noni makikawilikah makinkitski n tlakah noso siwameh akimeh okitlakitayah n kualitlátjoli para kualinwikas kintsakuaki Jerusalén. ³ Pero ijkuak oyaya itech ojtli iwa yoonajsia Damasco, se tláwili non ovalaya de ilwikak okualyawalo. ⁴ Ijkuakó n Saulo owetsito ixko tlali, iwa okikak se tlájtolli non okiliaya:

—Saulo, Saulo, ¿tleka techtotojtokatinemi?

⁵ Ijkuakó Saulo otlájtlanki:

—¿Akin tejwatsi Noteko?

Ye okijo:

—Ne Ni Jesús, tleka techtotojtoka. ⁶ Ximoketsa iwa xikalaki kan altepetl. Ompa mitsiliskeh tlan tikchiwas.

⁷ N tlakah non oyayah iwan Saulo, satlawel omomojijkeh ken okikakeh n tlájtolli pero amaka okitakeh. ⁸ Sa okikewaltijkeh n Saulo, pero ijkuak okintlapo ixtololowah mach ok otláchixki. Yika, sa okimatilantiayah iwa okiwakeh Damasco. ⁹ Eyi tonati amo otlachiaya, amitla okikua nion amitla okonik.

¹⁰ Ompa kan altepetl de Damasco ochantitoka se tlakatl non itoka Ananías non okineltokaya Toteko Jesús. N Toteko okimonextili iwa okili:

—¡Ananías!

Ye okinankili:

—Nika nika, Noteko.

¹¹ Ijkuakó n Toteko okili:

Ximoketsa iwa xio kan ojtli non kiliah Milaktik, iwa ijkuak tiajsiti icha n Judas xitlajtlani kox ompa kajki se tlakatl de Tarso non itoka Saulo. Ye ompa mototsajtsilijtok, ¹² ye okimonextili se tlakatl non itoka Ananías, okitak non tlakatl okalakia kan ye kajki iwa ipa okintlaliaya imawah para oksepa matlachia.

¹³ Ijkuak Ananías ijkó okikak, okijo:

—Noteko, miakeh yonechtlapowijkeh tlan iteki non tlakatl, iwa nochí tlan yokintokti akimeh mitsneltokah, non chantitokeh Jerusalén. ¹⁴ Iwa axa yowala nika, ye kualinwika amameh de n tiopixkeh non tlayakantokeh para makinwika makintsakuati nochteh akimeh kitenewah Motoka.

¹⁵ Pero n Toteko okili:

—Xio kan nimitstítlantok, porke non tlakatl yonikmopejpenili para manechteixmatilti innawak non amo judíojteh iwa inmixpah miakeh tlanawatijkeh, iwa innawak n tlakah de Israel. ¹⁶ Ne niktititis kenikki tlaijyowis ikuak nechteixmatiltis.

¹⁷ Ananías oyá kan okalotitoka n Saulo, iwa ikuak okalak okintlali imawah ipan Saulo, iwa okili:

—Nokni Saulo, Noteko Jesús, Akin omitsmonextili itech ojtli kan ik otiwalaya, Ye onechaltílanki para xitlachia oksepa iwa xikseli n Espíritu Santo.

¹⁸ San nima opé tetepewi de kan ixtololawah n Saulo siki kemi itotominyo n michi, iwa oksepa otláchixki. Ikuakó Saulo omóketski iwa okikuatekijkeh. ¹⁹ Iwa ikuak yotlakua, oksepa okónanki chikawálistli iwa ompa omoka kech tonati inwah tokniwah de Damasco non kineltokah n Cristo Jesús.

Saulo tetlapowia de n kualitlátoli kan altepetl de Damasco

²⁰ Satepa, Saulo opé tetlapowia de itlajtol Dios kan sinagogas, iwa okimiliaya Jesús Ye Ikone n Totajtsi Dios. ²¹ Nochtech akimeh okikakiah san omotlajtlachialtiayah, iwa okijoayah:

—¿Amo ye nin tlakatl non nepa kan altepetl de Jerusalén okintemojtinemia iwa okintlajyowiltiayah akimeh motiotsajtsiliah ika Itoka n Jesús? ¿Amo ye non owala okinkitskiko n tokniwah para kintemakatih inmak n tiopixkeh non tlayakantokeh?

²² Pero n Saulo okachi omochikawayá iwa okinkuatlapololtiaya n judíojteh non ochantitokah Damasco, iwa okinmatiltiaya Jesús Ye n Cristo.

Saulo kincholilia sikimeh judíojteh

²³ Ikuak opanokeh sikimeh tonatijmeh ²⁴ omotlatlalwijkeh kimiktiskeh n Saulo. Pero n Saulo okima tlan okinekiah kitoktiskeh n judíojteh. Tlajka iwa n yuak okichichiayah kan ik ikaltenwah n altepetl de Damasco para kimiktiskeh. ²⁵ Pero ikuak yotleyuak, akimeh okineltokayah Cristo Jesús okontlalijkeh n Saulo ijtk se chikiwitl, iwa okitemowijkeh kan ik tepamitl non okiyawalojtoka non altepetl, iwa ocholo.

Saulo kajki Jerusalén

²⁶ Ikuak Saulo okalakito Jerusalén, okinekia moseitilis iwa tokniwah non kineltokah Cristo Jesús. Pero nochtech okimawiliayah porke amo okineltokayah kox ye noiwa yokineltokaya n Cristo. ²⁷ Pero Bernabé okiwík n Saulo innawak n tlatematiltijkeh iwa okintlapowi kenikki n Saulo okitak iwa okitlapowi n Toteko ikuak ovalaya itech ojtli. Noiwa okinmili kenikki ika miak chikawálistli okiteixmatilti itoka n Jesús ikuak okatka kan altepetl de Damasco. ²⁸ Ijkó Saulo omoka Jerusalén inwa n tlaneltokakeh, iwa nochipa onemia sentetl iwa otetlapowijtinemiah ika chikawálistli itech itoka n Toteko Jesús. ²⁹ Noiwa omotlajtolkokopaya iwan judíojteh non otlajtoayah griego, pero yejwah okitemoliayah kenikki kimiktiskeh. ³⁰ Yika, ikuak n tokniwah okimatkeh tlan okinekiah kitoktiskeh, okiwakeh Cesarea, iwa de ompa okititlankeh mawia Tarso.

³¹ Ikuakó non okineltokayah Cristo Jesús okipiayah yolsewílistli itech tlali de Judea, Galilea iwa Samaria. Okachi omoyolchikawayah otlaneltokayah inawak Toteko. Iwa omomiakiliayah ika iweletilis n Espíritu Santo.

Pedro kipajtia n Eneas

³² Ikuak Pedro oyá okintlajpaloto n tokniwah kan omoololoayah, noiwa oyá okimitato akimeh yokineltokayah Cristo Jesús non ochantitokah Lida. ³³ Ompa okajsito se tlakatl non itoka Eneas, non yokiwikaya chikweyi xiwitl wilantok ipan ipetl, porke oikximijmiktoka. ³⁴ Iwa Pedro okili:

—Eneas, Cristo Jesús mitspajtia. Ximewa iwa xikyejektlali mopetl.

Ikuakó Eneas san nima ovalmejtwak. ³⁵ Iwa nochtech non ochantitokah kan altepetl de Lida iwa Sarón okitakeh opajtik n Eneas, okikajkeh tlan achto okineltokayah iwa okineltokakeh n Toteko Jesús.

Pedro kiyolitia n Dorcas

³⁶ Itech nekateh tonatijmeh kan altepetl de Jope ochantitoka se siwatl non okinel-tokaya n Toteko non itoka Tabita, itech tlájtoli griego mijtoa Dorcas. Non siwatl nochipa okichiwaya tlan kuali iwa okimpalewiaya akimeh amitla okipiayah. ³⁷ Pero itech nonteh tonatijmeh Dorcas owalmokoko iwa omikki. Satepa de okipakeh ikuerpo n Dorcas, okiwilankeh tlakpak kan se kuarto. ³⁸ N altepetl de Jope iwan altepetl de Lida mach wejka omotayah, yika san nima ikuak n tokniyah non kineltokah Cristo okimatkeh Pedro okatka Lida, okintitlankeh ome tlakah makilitih:

—Xiwiki san nima.

³⁹ Pedro omóketski iwa oyá inwah. Iwa ikuak yoajsito kan altepetl de Jope, okiwikakeh kan kuarto kan okatka n miketl. Nochteh n iknosiwameh, ochokatokah okiyawalojkeh n Pedro iwa okiititijkeh nochteh n kuemeh iwa n kotomeh non Dorcas okinchijchi ikuak oyolitoka. ⁴⁰ Otlanki n Pedro okinmili makisakah nochteh, ikuakó omotlankuáketski iwa omototsajtsili; otlanki okontlajtlatok n miketl iwa okili:

—¡Tabita, ximewa!

Ikuakó okintlapo ixtololowah, iwa ikuak okitak n Pedro, omotlali. ⁴¹ Pedro okimakitski iwa okiketsalti. Otlanki okínnotski non kineltokah Cristo Jesús iwa n iknosiwameh, iwa okinmaktili yolitok. ⁴² Nin milagro omoma itech nochi altepetl de Jope, iwa miakeh okineltokakeh n Toteko Jesús. ⁴³ Iwa Pedro omoka miakeh tonatijmeh itech non altepetl, icha n Simón non okintekitia kuítlaxteh.

10

Pedro iwa Cornelio

¹ Kan altepetl non itoka Cesarea ochantitoka se tlakatl non itoka Cornelio, ye capita innawak se siento de soldadojteh non okintokayotiah Italianos. ² Cornelio iwa nochi ichantlakawah okimopantiayah iwa okiweyijkachiwayah Dios. Iwa Ye okitemakaya miak tomi para kimpalewis ikniyah n judíojteh akimeh amitla okipiayah, iwa nochipa omototsajtsiliaya inawak Dios. ³ Se tonati kemi las tres de tiotlak, Cornelio okitak se tlawilnextílistli kemi yaskia se tejtemiktok. Okitak se iángel Totajtsi Dios non owalkalak kan ye okatka, iwa okili:

—¡Cornelio!

⁴ Cornelio omoka kisentlajtlatok n ángel porke satlawel okimojti, iwa okijo:

—¿Tlan tikmonekiltia Noteko?

N ángel okili:

—Dios okiseli motiotsajtsilis iwa tlan otikchi ikuak otikimpalewi non amitla kipiah.

⁵ Axa, xikintitlani sikimeh tlakah kan altepetl de Jope para makinotsatih n Simón, akin noienda itoka Pedro. ⁶ Ye mokalotijtok icha n ok se Simón, non kintekiti kuítlaxteh, iwa chantitok itempa n atl, ye mitsilis tlan tikchiwas.

⁷ Ikuak n ángel oyá, Cornelio okínnotski ome itlakawah iwa se isoldado akin okitlakitaya iwa okimopantiaya Dios. ⁸ Cornelio okinmatilti nochi tlan otlamochijka, iwa satepa okintítlanki kan altepetl de Jope.

⁹ Ikuak owalmostlatik kemi tlajko tonati, ikuak oyayah itech ojli iwa yoonajsiah Jope, Pedro otlejkok omototsajtsilito ikpak kali. ¹⁰ Non ora oxitlatlatoka iwa okinekia tlakuas. Pero ikuak okichijchiwilijtokah tlan kikuas, okitak se tlawilnextílistli kemi ikuak se tejtemiki, ¹¹ iwa okitak n ilwikak omotlapo iwa itla kemi se patlawak manta non oilpitiwalaya ik nawi ipuntajwah, owaltemoaya ixko tlali. ¹² Itech non manta owalayah miakeh yokameh de nawi inmikxiwah, yokameh non motilanah ixko tlali iwa totomeh.

¹³ Ikuakó okikak se tlájtoli non okili:

—Ximoketsa Pedro, xitlamikti iwa xitlakua.

¹⁴ Pedro otlanankili:

—Amó, Noteko, porke ayik nikaujtika itla tlan amo chipawak nion itla pitsotik.

¹⁵ N tlájtoli oksepa okínnotski iwa okili:

—Tlan Dios yokichipa, amo xikijto amo chipawak.

¹⁶ Ijkó otlamochi eyi welta, iwa san nima n manta oksepa omókopki ilwikak. ¹⁷ Pedro omoka san tlakaktok, omokuatlapowijtока tlan kijtosneki tlan okimonextili. Ijkuakó okalakikoh kan kaltentli itlakawah n Cornelio non otlajtantiwalayah kan icha n Simón. ¹⁸ Otlakakalatskeh iwa otlajtlankeh kox ompa okalotitoka se tlakatl non itoka Simón, akin noiwa kinotsah Pedro. ¹⁹ Iwa kemi Pedro ok omokuatlapowijtока tlan kijtosneki tlan okimonextili, n Espíritu Santo okili:

—Xikkaki, eyi tlakah mitstemoah. ²⁰ Ximoketsa, xitemo iwa xio inwah. Amo xikmoli kox tias noso amó, porke Ne onikintítlanki.

²¹ Ijkuakó Pedro otemok okinmajsito n tlakah non Cornelio okwalintítlanki, iwa okinmili:

—Ye ne akin nomejwah nonkitemoah, ¿tlan nonkimonekiltiah?

²² Yejwah otlanankiljeh:

—Otechaltítlanki n kapita Cornelio. Ye se tlakatl yekmilajka iwa kitlakita Dios, iwa nochteh n judíojteh kitlakitah iwa kitlasojothal. Se iángel Dios okili mamitsnotsaki iwa xiwia icha, para makikaki nochi tlan tejwatsi tikilis.

²³ Ijkuakó Pedro okinkalaki ijtk icha iwa okinkaloti non yúali. Keman owalmostlatik Pedro oyá inwah. Sikimeh tokniwah de Jope noiwa oyajkeh inwah.

²⁴ Ijkuak owlabktlatik okalakitoh Cesarea kan Cornelio sa okinchixtoka. Noiwa ompa okatka ichantlakawah iwa oksikimeh tlakah non satlawel íwa omowikaya. ²⁵ Ijkuak Pedro okalakito, Cornelio okiski okinselito kan kaltentli iwa san nima owalmotlankuáketski iyakapa para kiweyiliskia. ²⁶ Pero Pedro okiketsalti, iwa okili:

—Ximoketsa, porke ne noiwa san ni tlakatl kemi te.

²⁷ Iwa motlapowijtiwihs okalakeh sansikah. Ompa ijtk kali Pedro okinmajsito miakeh tlakah. ²⁸ Ijkuakó Pedro okinmili:

—Nomejwah kuali nonkimatokeh itlanawatil Moisés amo techkawilia tejwah akimeh ti judíojteh matimonelokah iwa akimeh amo judíojteh, nion matikalaktinemikah incha. Pero Dios yonechititi amaka manikita kemi yaskia amitla ipati noso amo chipawak inawak Dios. ²⁹ Yika, san nima ijkuk onechiljeh maniwiki oniwalewak iwa mach onikijto kox amo niweletis niwits. Axa nikneki nikmatis, tleka onontlatitlankeh manechnotsatih.

³⁰ Ijkuakó Cornelio otlanankili:

—Ya kipia nawi tonati, kemi nin ora las tres de tiotlak, ne onimototsajtsilijtoka nika nochá, ijkukó se tlakatl non otsotlania itlakéh, omoketsako noyakapa. ³¹ Iwa onechili: “Cornelio, Dios okikak motiotsajtsilis iwa Ye okilnamik kenikki tikimpalewia akimeh amitla kipiah. ³² Axa kiné, xikintitlani motlakawah kan altepetl de Jope makinotsatih n Simón akin noiwa itoka Pedro. Ye kalotitok icha n ok se Simón non kintekiti kuitlaxteh iwa chantitok itempa n atl.” ³³ Yika totokatijkak onikintítlanki notlakawah mamitstemotih, iwa kuali otikchi otiwala. Axa nika tikateh tinochteh ixpa n Totajtsi Dios, iwa tiknekih tikkakiskeh nochi tlan Toteko omitsnawati techiliki.

Pedro tetlapowia icha n Cornelio

³⁴ Ijkuakó Pedro opé tlajtoa iwa okijo:

—Axa nikajskamati, Dios amo kintlasojotha san sikimeh, iwa oksikimeh amó, ³⁵ yej itech nochá nin tlaltíkpaktli, Dios kinselia akimeh kitlakitah iwa kichiwha tlan kuali. ³⁶ Totajtsi Dios okwaltítlanki Cristo Jesús makinmatiltiki nochteh n tlakah de Israel n kualitlájtoli non kitemakah yolsewílistli, Jesús Ye n Toteko de tejwah tinochteh. ³⁷ Nomejwah kuali nonkimatokeh nochi tlan opanok kan chantitokeh n judíojteh. Opejki kan tlali de Galilea, ijkuk Juan Bautista otlamachti iwa otlakuaateki. ³⁸ Nomejwah nonkimatokeh kenikki Dios okimák weletílistli n Jesús de Nazaret ika n Espíritu Santo, iwa kenikki Ye okitechiwilijtinemía tlan kuali iwa okimpajtiaya nochteh akimeh otlaijyowijtinemía imak n diablo. Jesús okichi nochá noni porke Dios okipalewiaya. ³⁹ Iwa tejwah kuali tikmatokeh nochi tlan Jesús okichi ompa kan tlali de Judea iwa itech Jerusalén. Pero satepa okimiktjeh ipan se krus. ⁴⁰ Iwa ipan eyi tonati, Dios okiyoliti iwa okichi

matechmonextili tejwah. ⁴¹ Amo okinmonextili nochteh n tlakah, yej sanwel tejwah akimeh Dios achto yotechpejpenka para matiktematiltikah tlan Jesús okichi. Iwa ikuak Jesús omoyoliti, tejwah otitlakuajkeh iwa otikonikeh íwa. ⁴² Noiwa otechnawati matitetlapowikah iwa matikinmatiltikah n tlakah, Dios okitlali n Jesús kemi teyorsewi innawak non yolitokeh iwa akimeh yomikkeh. ⁴³ Iwa ya wejkawitl, nochteh n profetas yotlajtoayah de Jesús, okijtoayah nochteh akimeh tlaneltokaskiah itech Itoka n Jesús, Dios kintlapojpolwiskia de intlajtlakolwah.

N tlakah non amo judíojteh kiseliah n Espíritu Santo

⁴⁴ Pedro ok otlahtojtaka ikuak n Espíritu Santo owala intech nochteh akimeh okikatokah tlan okimiliaya. ⁴⁵ Iwa n judíojteh non okineltokayah Cristo Jesús non ovalajkeh iwan Pedro, san omotlajtlachialtjkeh ikuak okitakeh Dios noiwa okinmák n Espíritu Santo akimeh amo judíojteh. ⁴⁶ Porke okinkakiah otlahtoayah iwa okiweyijkachiwayah Dios ika oksikimeh tlájtolteh. ⁴⁷ Ikuakó Pedro okinmili:

—Ninteh tlakah noiwa yokiselijkeh n Espíritu Santo kemi tejwah, ¿kox onka se akin amo kitekawilis mamokuaatekikah ninteh tlakah?

⁴⁸ Iwa san nima Pedro otlanawati makinkuaatekikah itech Itoka n Cristo Jesús. Otlanki yejwah okitlatlautijkeh n Pedro mamokawa kanaj kech tonati inwah.

11

Pedro oksepa walmokopa Jerusalén

¹ N tlateamtiltjkeh iwa n tokniwah non okatkah Judea akimeh okineltokayah n Cristo Jesús okimatkeh noiwa non amo judíojteh yokineltokakeh tlajtol Dios. ² Iwa ikuak Pedro omókopki Jerusalén, okajwakeh sikimeh judíojteh non osirkunsidaritokah iwa yokineltokakeh n Cristo Jesús. ³ Yejwah okitlajtlanijkeh:

—¿Tleka tikalaktinemi incha non amo sirkunsidaritokeh, iwa titlakuajtinemi inwah?

⁴ Ikuakó Pedro opé kintlapowia nochti tlan omochi, iwa okinmili:

⁵ —Ne onikatka kan altepetl non itoka Jope, iwa ikuak onimotiotsajtsilitjoka, opé kemi yaskia nitejtemiktok, onikitak owaltemok de ilwikak kemi se manta patlawak non oilpitiwalaya itech nawi ipuntajwah iwa omotlaliko noyakapa. ⁶ Ikuak oniontláchixki ijtk non manta, onikinmitak sikimeh yolkameh non okimpiayah nawi inmikxiwah, sikimeh yolkameh tekuanimeh, sikimeh non motilanah ixkotlali iwa miakeh totomeh. ⁷ Iwa onikak se tlájtoli non onechili: “Ximoketsa Pedro, xitlamikti iwa xitlakua.” ⁸ Pero Ne onitlanankili: “Amó, Noteko, porke ayik nikuajtika itla tlan amo chipawak nion itla pitsotik.” ⁹ Ikuakó n tlájtoli non onechaltlapowiaya de ilwikak, oksepa onechili: “Tlan Dios yokichipa, amo xikijo amo chipawak.” ¹⁰ Ijkó otlamochi eyi welta, iwa otlanki san ken kajki oksepa otlejkok ilwikak. ¹¹ Ikuakó eyi tlakah okalakitoh kan onikalotitoka. Yejwah okwalintitlankeh desde Cesarea para manechtemokih. ¹² Iwa n Espíritu Santo onechnawati manio inwah, iwa amo maníkmoli kox nias noso amó. Noiwa nowa oyajkeh ninteh chikwase n tokniwah non nika kateh. Tinochteh otikalakeh ichan se tlakatl, ¹³ non otechtlapowi kenikki ompa icha okitak omoketoka se ángel, iwa okili: “Xikintitlani sikimeh tlakah kan altepetl de Jope makinotsatih n Simón, akin noiwa kinotsah Pedro, ¹⁴ ye mitsilis kenomi nomechtlapojpolwiskeh de nomotlajtlakolwah, te iwa nochti mochantlakawah.” ¹⁵ Iwa ikuak opé nikintlapowia, n Espíritu Santo owala intech, ijkó kemi achto owala totech. ¹⁶ Ikuakó onikilnamik tlan okijo n Toteko: “Milák, Juan otlakuaateki ika atl, pero nomejwah nonmokuaatekiskeh ika n Espíritu Santo.” ¹⁷ Iwa tla Totajtsi Dios noiwa yejwah okinmák tlan tejwah otechtliokoli ikuak otikneltokakeh n Toteko Cristo Jesús, ¿akin ne para nikilis Dios amo ijkó makichiwa?

¹⁸ Ikuak n tokniwah de Jerusalén okikakeh nochti ni tlan Pedro okinmili, omoyolsewi-jkeh iwa okiweyijkachijkeh Dios, iwa okijtokeh:

—¡Axa tikajskamatih Dios noiwa kinkawilia mamolnamikakah non amo judíojteh, iwa makipiakah n semijkak yolílistli!

Kitematiltiah n kualitlátoli kan altepetl de Antioquía

¹⁹ Non tonati ikuak okimiktijeh n Esteban, noiva opé kintotojtokah akimeh noiva okineltokayah Cristo Jesús, iwa sikimeh ochocholojkeh Fenicia, Chipre iwa Antioquía. Ompa okinmatiltijeh itlajtol Dios sanwel n judíojteh. ²⁰ Pero sikimeh non otanel-tokayah itech Cristo Jesús okatkah de Chipre iwa de Cirene. Ikuak okalakikoh kan altepetl de Antioquía noiva opé kitematiltiah n kualitlátoli de Dios n tlakah de Grecia. ²¹ Iweletilis n Toteko Dios okatka inwah iwa okimpalewiaya. Miakeh okineltokakeh iwa omoyolpatlayah inawak Toteko Jesús.

²² Ikuak n tokniwah de Jerusalén non okineltokayah Cristo Jesús okimatkeh tlan opanotoka kan altepetl de Antioquía, okititlankeh n Bernabé mawia ompa. ²³ Ikuak Bernabé okalakito Antioquía iwa okitak kenikki Dios okintiochijtoka, saikpanoa opakmik. Okinyolchika nochteh, iwa okinmili nochipa makitlakitakah n Toteko ika noch inyolo. ²⁴ Bernabé okatka kuali tlakatl, otentoka ika n Espíritu Santo iwa okiyekneltokaya n Toteko. Yika miakeh omoseitiliayah inawak n Toteko.

²⁵ Satepa, Bernabé oyá kan altepetl de Tarso okitemoto n Saulo, iwa ikuak okajsik, okiwík para Antioquía. ²⁶ Saulo iwa Bernabé omokajkeh se xiwitl iwan akimeh kineltokah n Cristo Jesús non ompa ochantitokah, iwa miakeh tlakah okinmachtijeh. Ompa Antioquía opé kintokayotiah cristianos n tokniwah non kineltokah Cristo.

²⁷ Itech nekateh tonatijmeh sikimeh profetas non ovalayah de Jerusalén okalakitoh Antioquía. ²⁸ Iwa seme de yejwah non omonotsaya Ágabo, owlalmóketski iwa ika ichikawalis n Espíritu okinmatilti n tokniwah non ompa okatkah walaskia se weyi apisotl itech noch i tlaltípkaktli. Iwa milák ijkó otlamochi itech nekateh tonatijmeh ikuak Claudio okatka weyi tekiwa de Roma. ²⁹ Ikuakó n tokniwah de Antioquía akimeh okineltokayah n Cristo Jesús, omotlapowijkeh iwa omokajkeh kimpalewiskeh ika tlan weletis, iwa kintitlaniliskeh n tokniwah non ochantitokah Judea. ³⁰ Iwa milák okichijkeh. Nochi tlan okoololojkeh, okimakakeh n Bernabé iwa Saulo, iwa yejwah oyajkeh okinmakatoh n tetajmeh non ompa tlayakantokeh.

12

Kimktiah n Jacobo iwa kitsakuah n Pedro

¹ Itech nekateh tonatijmeh, n rey Herodes Agripa Primero opé kintotojtoka sikimeh tokniwah non kineltokah Cristo Jesús. ² Otlanawati makimiktikah ika espada n Jacobo, ikni n Juan, ³ iwa kemi okitak okiwilitakeh n judíojteh, noiva okitsak n Pedro. Ni otlamochi itech ilwitl de Paskua ikuak mokua n paj non amo kipia levadura. ⁴ Ikuak Herodes okikitski n Pedro, okitsak telpiloya iwa ompa okintlali nanawi soldadojteh para makimokuitlawijtokah. Herodes okimoliaya kikixtis ixpa n tlakah de non altepetl asta mapano n ilwitl de Paskua. ⁵ Ijkó kiné, Pedro otsaktoka telpiloya iwa kuali okimokuitlawijtokah, pero akimeh okineltokayah Cristo Jesús nochipa omototsajtsiliyah por ye.

Dios kikixtia n Pedro de kan otsaktokah

⁶ Pedro okochtoka iwa oilpitoka ika ome kadenajteh, iwa tlanajnakastla ome soldadojteh. Noiva oksikimeh soldadojteh okimokuitlawijtokah kaltempa. Non yúali Herodes okimoli kikixtis n Pedro ikuak tlanesis, iwa kiteixpantis innawak n tlakah de non altepetl. ⁷ Ikuakó ompa kan otsaktoka n Pedro owlamonexti se iángel n Toteko Dios iwa se tláwili okintlawilnextili. N ángel okolini n Pedro kan ikespa, okixiti iwa okili:

—¡Ximejtiwetsi!

Ikuakó n kadenajteh non ika omailpitoka n Pedro, owetskeh. ⁸ Iwa n ángel okili:

—Ximotlajkoilpi iwa ximokakti.

Ikuak Pedro yomotlajkotelini iwa yomokakti, n ángel oksepa okili:

—Xikmokenti mokapa iwa xiwiki nowa.

⁹ Pedro oyá iwan ángel maya amo okimatia kox milák noso amo milák tlan okichiwaya n ángel. Ye okimoliaya chamo san tejtemiktok. ¹⁰ Pero achto okimpanawijkeh sikimeh

soldadojteh non ompa otlamokuitlawijtokah, otlanki okimpanawijkeh oksikimeh soldadojteh. Ijkuak okalakitoh kan sawa de tépostli non okatka itempa n ojtli iselti owalmotlapo, iwa ijkuak yonejnenkeh ok se ojtli sansikah, n ángel okikajte iselti n Pedro.

¹¹ Ijkuakó Pedro okajsikama tlan opanotoka, iwa okijo:

—Axa ya nikajsikamati n Toteko Dios, Ye Akin okwaltílanki iángel, manechpalewki imak Herodes iwa de nochí tlan judíojteh okinekiah nechtoktiskeh.

¹² Ijkuak kuali yokajsikama milák yokiski de kan otsaktoka, Pedro oyá icha n María, ina n Juan akin noiva kinotsah Marcos. Ompa okatkah miakeh non omototsajtsilijtokah.

¹³ Ijkuak Pedro otlakakálatski itech kaltentli non okatka kan patio, se íchpochtli non itoka Rode otlachiato akin otlakakalatoka. ¹⁴ Pero ijkuak okitenkak n Pedro, mach otlatlapo iwa satlawel opaki. Yej omotlelo tlajtitk okimilito, Pedro tlakakalatok itech kaltentli.

¹⁵ Yejwah okiljkeh:

—¡San tikuamimiktik!

Iwa maya ye okimiliaya milák Pedro okatka itech kaltentli, yejwah okijtoayah:

—Mach ye, san iángel.

¹⁶ Pedro omoka tlakakalatok, iwa ijkuak otlatlapojkeh iwa okitakeh, san omotla-jtlachialtijkeh. ¹⁷ Pero Pedro san okimanotski amo matlajtokah. Iwa otlanki opé kintlapowia kenijki Toteko Dios okikixti de kan otsaktoka. Iwa okinmili:

—Nochi tlan onomechili, xikmatiltikah n Jacobo iwa n oksikimeh tokniwah.

Ijkuakó okiski iwa oyajki oksika.

¹⁸ Ijkuak otláneski, n soldadojteh opé mottleloah iwa mach okimatiah tlan kichi-waskeh porke amo okimatiah kan ik oyá n Pedro. ¹⁹ Herodes Agripa Primero ot-lanawati makitemotih n Pedro, pero kemi amo okajsikeh, okintlatsintoki n soldadojteh iwa otlanawati makimiktikah. Satepa Herodes Agripa Primero okiski de Judea iwa ochanchiwato Cesarea.

Mikki n Herodes Agripa Primero

²⁰ Herodes Agripa Primero okualantoka iwa n tlakah non ochantitokah Tiro iwa Sidón, pero yejwah omotlapowijkeh iwa omoyekkajkeh yaskiah kitatiweh n Herodes para makintlapojpolwi. Yika okimotlatlalwijkeh n Blasto akin okatka tekiwa de n rey, para makintlajtolpalewi inawak Agripa, porke n tlakah de Tiro iwa Sidón okonkuiah tlan kikuaskeh kan ipaís n rey. ²¹ Herodes Agripa Primero okitlali se tonati ijkuak motlapowiskia inwah, iwa ijkuak oajsik non tonati, okinmonaki itlakenwah non kinmon-akiah n reyes, omoyayanti iwa opé kintlapowia. ²² Ijkuakó n tlakah opé tsajtsih:

—¡Akin tlajtojtok amo san se tlakatl, yej se dios!

²³ San nima ompa kan okatka, se iángel Toteko Dios okichi mamokokojtiwetsi n Herodes Agripa Primero, porke amo okiweyijkachi Dios, ookuiloak iwa omikki.

²⁴ Pero itlajtol Dios okachi omoxitiniaya, iwa sentetl omotetlapowiaya.

²⁵ Ijkuak Bernabé iwa Saulo yokitlamijkeh inteki kan altepetl de Jerusalén, owalmokopkeh Antioquía iwa okualikakeh inwah n Juan akin noiva itoka Marcos.

13

Bernabé iwa Saulo pewah kitematiltiah itlajtol Dios

¹ Itech altepetl de Antioquía kan omoololoayah non kineltokah Cristo Jesús, okatkah profetas iwa tlamachtijkeh. Yejwah ninteh: Bernabé, Simón akin okitokayotiayah Tliliwik, Lucio de Cirene, Manaén, non omoskalti iwan Herodes Antipas Primero n tlanawati de Galilea, iwa Saulo. ² Se tonati, ijkuak yejwah omototsajtsilijtokah iwa omosaujtokah, n Espíritu Santo okijo:

—Techxelilikah n Bernabé iwa Saulo para makichiwakah n tekitl non yonikimpejpenili.

³ Satepa, ijkuak yotlankeh omototsajtsilijkeh iwa omosaujkeh, okintlalijkeh inmawah impah, iwa okinmakajkeh.

Bernabé iwa Saulo tetlapowiah de itlajtol Dios kan tlali de Chipre

⁴ Satepa, n Espíritu Santo okintítlanki n Bernabé iwa Saulo, iwa oyajkeh Seleucia, iwa ompa otlejkokeh itech se barko iwa oyajkeh Chipre. ⁵ Ijkuak okalakitoh kan altepetl de Salamina non kajki itempa n weyi atl, ompa opé kitematiltiah itlajtol Dios kan insinagogajwah n judíojteh. Juan noiwa oyaya inwah iwa okimpalewiaya. ⁶ Onentinenkeh itech nochi n isla iwa okalakitoh kan altepetl de Pafos, ompa okajsitoh se tetlajchiwi israelita non itoka Barjesús akin otlakajkayawa iwa okijtoaya ye profeta. ⁷ Nin tetlajchiwi omowikaya iwan tekiwa Sergio Paulo, akin okatka se tlakatl ixtlamatin. Ye otlanawati makinnotsatih n Bernabé iwa Saulo, porke okinekia kikakis itemachtilis Dios. ⁸ Pero Barjesús n tetlajchiwi, akin noiwa itoka Elimas, omokuejso iwan Bernabé iwa Saulo, porke amo okinekia makineltoka itlajtol Dios n tekiwa Sergio Paulo. ⁹ Ijkuakó n Saulo, akin noiwa itoka Pablo, kemi okipixtoka n Espíritu Santo, okisentlajtlatak n tetlajchiwi ¹⁰ iwa okili:

—¡Tekajkaya, teyolijtlako! ¡Ikone n diablo iwa tetlawelitak de nochi tlan kuali! ¿Asta kemanía tikinkawas tikinkajkayajtinemis n tlakah para amo makajsikah n milaktik ojli de Dios? ¹¹ Ika noni, n Toteko Dios mitstlajjywiltis iwa ayakmó weletis titlachias kanaj kech tonati, iwa mach weletis tikitas itlawilnextilis n tonati.

San nima n Elimas owalixtlejtlepuyawakeh ixtololowah, iwa sa otlamatemoaya para makimatiilanakah ken ayakmó otlachiaya. ¹² Ijkuak n tekiwa okitak tlan opanok, okineltokak Toteko, porke okitlajtlachialti itlamachtilis.

Pablo iwa Bernabé yawih Antioquía itech tlali de Pisidia

¹³ Pablo iwa akimeh oyayah inwah otlejkokeh itech barko, okiskeh de Pafos iwa oyajkeh kan altepetl de Perge kan tlali de Panfilia. Pero Juan Marcos okinkakajte iwa omókopki Jerusalén. ¹⁴ Satepa okiskeh de Perge iwa oyajkeh kan altepetl de Antioquía, non kajki itech tlali de Pisidia. Iwa itech sábado ijkuak mosewia n judíos, okalakeh kan sinagoga iwa ompa omotlajtlalijkeh. ¹⁵ Satepa, ijkuak yotlankeh okiamapojkeh itlanawatil Moisés iwa intlajkuil n profetas, n tlanawatijkeh de non tiopa, okilijkeh se tlakatl non ompa okatka makoninmiliti n Pablo iwa Bernabé ijkí:

—Nokniyah, tla nonkipiah itla tlájtoli non ika weletis nonkinyolchikawaskeh akimeh nika kateh, weletis nonkijtoskeh.

¹⁶ Ijkuakó Pablo owalmóketski, okinmánotski para san matlakaktokah, iwa okijo:

—Xikkakikah tlakah de Israel, iwa nomejwah akimeh nonkitlakitah Dios: ¹⁷ N Dios de Israel okimpéjpenki totatawah. Ye okiweiyikatlali topueblo maya amo intlal ompa kan okatkah ijkuak okatkah kan tlali de Egipto. Iwa satepa ika iweletilis okinkixti de ompa. ¹⁸ Dios okinxikoli nochi tlan yejwah okichiwayah kan amaka chanti kemi ome pójali (40) xiwitl, ¹⁹ iwa okimpojpolo n tlakah de chikome nasiones non ochantitokah itech tlalmeh de Canaán, iwa nonteh tlalmeh okinmaxkatili totatawah. ²⁰ Satepa, kemi nawisiento iwa ome pójali iwa májtlaktli (450) xiwitl, Dios okintlali jueves non okinnawatijtokah asta nekateh tonatijmeh ijkuak owala n profeta Samuel. ²¹ Ijkuakó yejwah okitlajtlanilijkeh Dios makintlalili se rey para makinnawatijto, iwa Dios okinmák n Saúl akin okinnawatijtoka ome pójali (40) xiwitl. Nin Saúl ye ikone n Cis, iwejkaixwi n Benjamín. ²² Satepa, Dios okipatlak n Saúl, iwa okitlali n David mayeto inrey, iwa Dios okijo: “Yonikajsk David, ikone n Isaí, se tlakatl akin nechpaktia iwa kichiwas nochi tlan Ne nikneki.” ²³ Iwa se ixwi non walewatok de David, Ye n Jesús Akin Dios okitítlanki para makinmakixtiki n tlakah de Israel kemi yowejka okijtojka kititlaniskia. ²⁴ Ijkuak Jesús ayamó ovalaya, n Juan okinmatiltiaya itlajtol Dios n tlakah de Israel, iwa okimiliaya mamoyolpatlakah inawak Dios iwa mamokuaatekikah. ²⁵ Iwa ijkuak Juan yoyaya mikiti, okijo: “Mach ne akin nomejwah non kimoliah, porke nokuitlapa wits se akin ne amo nimixewia nikaktojomas.”

²⁶ 'Nokniyah, nomejwah akimeh nonwalewatokeh de Abraham, iwa nomejwah akimeh amo non judíojteh pero nonkitlakitah Dios: nomejwah nomechtitlaniliah nin

tlájtoli non techmakixtia. ²⁷ Porke akimeh ochanchiwayah Jerusalén iwa intlayakanwah mach okimatiah kox Jesús, nion okajskamatiah intlajtol n profetas maya okiamapoaya itech sinagogas nochí sábado. Yika, ikuak okimktíjkeh n Jesús, innewiah okichíjkeh tlan ya wejkawitl okijtojeh n profetas. ²⁸ Iwa maya amo okipiaya itla tlajtlákoli para kimktiskiah, yejwah okitlajtlaniljkeh n Pilato matlanawati makimktikah. ²⁹ Satepa ikuak okitoktíjkeh n Jesús nochí tlan oikuilitokah. Okitemowíjkeh de kan krus iwa okitookakeh ijtk se miketékochtli. ³⁰ Pero Dios okiyoliti de kan kateh non yomikkeh. ³¹ Iwa miákeh tonatijmeh Jesús okinmonextili akimeh iwa oyajkeh desde Galilea asta Jerusalén. Iwa axa yejwah tetlapowiah de Jesús.

³² Iwa axa, tejwah tomechmatiltijokeh nin kualtlájtoli non yowejka Dios okinmili totatawah kichiwaskiah. ³³ Iwa tejwah ken ipilwah totatawah, Dios yotechchiwili tlan yowejka okinsentlalili totatawah ikuak okiyoliti n Jesús. Kemi ikuilitok itech non ipan ome Salmo: “Te tinokone; iwa axa Ne onimitsyoliti.” ³⁴ Dios yokijtojka kiyolitiskia de kan kateh non yomikkeh para ikuerpo amo maijtlakawi, ijkó kemi okijo itech itlajkuilol Dios: “Nomechmakas notlatiochiwalis non yowejka onikili n David nikmakaskia.” ³⁵ Yika noíwa kijtoa itech ok se Salmo: “Amo tikkawas maijtlakawi ikuerpo Mokone yolchipawak.” ³⁶ Porke milák matikijtokah, ikuak David oyolitoka, okimpalewi ikniyah n judíojteh ijkó kemi Dios okinawati, iwa ikuak omikki omoseitilito iwa itatawah, iwa ikuerpo opajpálanki. ³⁷ Pero neká akin Dios okiyoliti, ikuerpo mach opajpálanki. ³⁸ Nokniyah, nomejwah nonkipiah nonkimatiskeh sanwel Jesús weletis nomechtlapojpolwis de nomotlajtlakol. ³⁹ Nochteh akimeh kineltokah n Jesús, Dios kintlapojpolwia, mach kemi itlanawatil Moisés amo owéletki okintlapojpolwi. ⁴⁰ Yika, kuali ximotlachilikah, amo kichiwa nomopah wetsiki tlan okijuilojkeh n profetas, ikuak okijtojeh:

⁴¹ Xikkakikah, nomejwah tepijpinawijkeh,
ximotlajtlachialtikah iwa xipoliwikah,
porke nikchiwas se weyi neskayotl ikuak ok nonyolitoskeh,
kuajkualtsi yetos iwa mach nonkineltokaskeh
maya aka manomechtlapowi tlan onikchi.

Hab. 1:5

⁴² Ikuak Pablo iwa Bernabé okiskeh de insinagoga n judíojteh, sikimeh non amo judíojteh okintlatlaujtíjkeh oksepa makintlapowiti de nin tlamachtílistli itech non ok se sábado. ⁴³ Ikuak yotlankeh omomachtíjkeh iwa yopé kisah de insinagoga, miákeh judíojteh iwa akimeh yokiseljkah intemachtilis n judíojteh, oyajkeh iwan Pablo iwa Bernabé. Iwa yejwah okimiliayah kuali mamoyekketokah itech itlasoijtlalis Dios. ⁴⁴ Ikuak ovalchikometik, ipan sábado, n altepetl de Antioquía omonoki, porke miaktikeh tlakah non ompa ochantitokah ovalajkeh okikakikoh itlajtol Dios. ⁴⁵ Pero ikuak n judíojteh okitakeh miaktikeh n tlakah omoololojkeh, satlawel oxikojmikeh iwa opé kitlajtolkopah n Pablo iwa fiero okitenewayah. ⁴⁶ Ikuakó n Pablo iwan Bernabé, omoyolchikajkeh iwa okimiliijkeh:

—Omonekia matomechmatiltikah itlajtol Dios achto nomejwah judíojteh. Pero kemi amo nonkinekih nonkiseliskeh, iwa kemi amo nonmomachiliah nonkualteh kemi para nonyolitoskeh nochipa, yika okachi kuali tiawih tikinmatiltitiweh itlajtol Dios akimeh amo judíojteh. ⁴⁷ Porke ijkó otechnawati n Toteko Dios, ikuak okijo:

Onimitslali kemi se tláwili para tikintlawilis nochteh n tlaltikpaktlakah,
iwa sentetl tikimpalewis asta kan tlami n tlaltípkaktli.

Is. 49:6

⁴⁸ Ikuak non amo judíojteh, okikakeh tlan Pablo okijo, oyolpakeh miak iwa opé kijtoah kualtsi itlajtol n Toteko. Iwa okineltokakeh Cristo Jesús nochteh akimeh Dios yokimpejpenka para mayolitokah nochipa. ⁴⁹ Iwa ijkó omotetlapowi itlajtol n Toteko itech nochí neká tlali. ⁵⁰ Pero n judíojteh okintlatlapowijkeh sikimeh siwameh yolmilawakeh non okachi okintlakitayah. Noiwa okintlatlalwijkeh sikimeh tlakah non okachi oweyijkatitokah itech non altepetl para makintotojtakakah n Pablo iwa Bernabé iwa makinkixtikah de ompa. ⁵¹ Ikuakó n tlatematiltíjkeh omokxitsejtselojkeh para

makitakah amo intlajtlakol tla yejwah amo kiseliah itlajtol Dios, iwa oonewakeh kan altepetl de Iconio. ⁵² Pero n tokniyah non kineltokah Cristo Jesús oyoltentokah ika miak pakílistli iwa ika n Espíritu Santo.

14

Pablo iwa Bernabé okalakitoh kan altepetl de Iconio

¹ Ijkuak yokatkah kan altepetl de Iconio, Pablo iwa Bernabé okalakeh sansikah kan insinagoga n judíojteh iwa ika miak weletílistli okintlapowijkeh. Yika, miakeh judíojteh okineltokakeh Cristo Jesús iwa non amo judíojteh noiva. ² Pero n judíojteh non amo okineltokayah Cristo Jesús, okintlatlapowijkeh akimeh amo judíojteh para amo makikakikah n Pablo nion Bernabé. ³ Pero Pablo iwa Bernabé ompa omokajkeh miakeh tonatijmeh iwa otetlapowiayah ika miak yolchikawálistli. Iwa Toteko Dios okinmakaya weletílistli para makinchiwakah milagros iwa wejweyi neskayolteh, iwa ijkó n tlakah makitakah milák tlan yejwah okijtoayah de itlasotlalis Dios. ⁴ Pero n tlakah non ochantitokah Iconio oxexelitokah, sikimeh okatkah iwan judíojteh iwa oksikimeh iwan tlatematiltijkeh. ⁵ Ijkuakó sikimeh judíojteh iwa non amo judíojteh, omotlatlalwijkeh iwan tekiwajkeh para kinwijkaltskeh n tlatematiltijkeh iwa kinmojomotlaskeh ika tetl. ⁶ Pero ijkuak Pablo iwan Bernabé okimatkeh tlan okinekiah kintoktiskeh, ocholojkeh iwa oyajkeh kan altepetl de Listra iwa Derbe, ninteh altepemeh kateh kan tlali de Licaonia. Iwa itech miakeh oksikimeh altepemeh non ik ompa okatkah, ⁷ noiva okitematiltiayah itlajtol Dios.

Pablo kimojmotlah ika tetl kan altepetl de Listra

⁸ Kan altepetl de Listra okatka se tlakatl non amo oweletia onejnemia. Nin tlakatl ompa oewatoka porke ye ijkó otlákatki, iwa ayik onéjenki. ⁹ Nin tlakatl okikaktoka nochi tlan Pablo okijtoaya, Pablo okiyektlajtlatak iwa okitak non tlakatl milák okineltokaya Dios weletis kipajtis. ¹⁰ Ijkuakó Pablo okili ika chikawak tlájtoli:

—Ximoketsa iwa xikinyekmilawa mokxiwah.

Iwa non tlakatl san nima owalmoketewak iwa opé nejnemi. ¹¹ Ijkuak n tlakah de non altepetl okitakeh tlan okichi n Pablo, opé tsajtsih ika intlajtol de Licaonia, iwa okijtoayah:

—¡N diosmeh kemi tlakah yowaltemokeh tonawak!

¹² Iwa okijtoayah Bernabé okatka n dios Júpiter, iwa n Pablo n dios Mercurio, porke ye akin okachi otlajtoaya. ¹³ Itiopa n dios Júpiter okatka inakastla n altepetl de Licaonia, iwa n tiópixki de Júpiter okualinwík torojteh iwa sikimeh koronajteh non okinmajmankeh ika xochitl. Iwa n tiópixki iwa n tlakah de Licaonia okinekiah kinmiktiskeh torojteh para Pablo iwa Bernabé para ika kinweyiliskeh. ¹⁴ Pero ijkuak n Bernabé iwa Pablo okitakeh tlan okinekiah kinchiwiliskeh, omotlakentsotsomotskeh, omoxolkopinkeh iwa opanokeh intsalko nonteh tlakah tsajtsitiwh:

¹⁵ —¡Tlakah! ¿Tleka ijkó nonkichiwh? Tejwah noiva titlakah de nin tlaltíkpaktli kemi nomejwah. Tejwah nika otivalajkeh porke tiknekih tomechiliskeh xikkawakah nochi ni tlan amitla nomechpalewis, noiva otivalajkeh otomechilikoh xiktlakitakah n Totajtsi Dios non yolitok akin okichijchi n ilwikak, n tlaltíkpaktli, n weyi atl iwa nochi tlan itech onka. ¹⁶ Ya wejkawitl, Dios okinkawili nochteh n tlaltíkpaktlah makichiwakah san tlan yejwah okinekeh. ¹⁷ Pero Ye nochipa okimititiaya Akin Cristo ika nochi tlan kuali okinchiliaya. Iwa Ye Akin techaltitlanilia n kiawitl iwa kichiwa kuali matlatlaki, noiva techmaka tlan techpoloa para matikpiakah tlan tikkuskeh iwa matiyetokah ika pakílistli.

¹⁸ Pero maya nochi noni okimilijkeh, owi oweletkeh okintlakawaltijkeh n tlakah de Licaonia para amo makinmiktilikah torojteh non ika okinekiah kinweyiliskeh.

¹⁹ Ijkuakó okalakikoh sikimeh judíojteh de Antioquía iwa de Iconio. Okintlatlalwijkeh n tlakah de Licaonia, iwa okimojmotlakeh n Pablo ika tetl. Ijkuak yejwah okiyeyekolijkeh yomikki, okitlalxotontiajkeh iwa okikixtijkeh de non altepetl. ²⁰ Pero ijkuak n tokniyah

non kineltokah Cristo Jesúś okiyawalojkeh n Pablo, ye omóketski iwa oksepa okalak itech altepetl. Iwa ijkuak owalaneski oyá iwa Bernabé kan altepetl de Derbe.

²¹ Ijkuak yokitematiltijkeh n kualitlátjoli itech n altepetl de Derbe kan miakeh okineltokakeh n Cristo Jesúś, omokopkeh Listra, Iconio iwa Antioquía. ²² Iwa itech nekateh altepemeh okinyolchikajkeh akimeh okineltokayah n Cristo Jesúś, iwa okimilijkeh makineltokakah nochipa. Noiwa okinmili jkeh tla kixikoskeh n tlaijyowílistli weletis kalakiskeh kan Dios tlanawatia. ²³ Noiwa okimpejpenkeh sikimeh tlayakankeh makinyakanakah n tokniwah kan moololoah. Ijkuak yomotrotsajtsilijkeh iwa omosaujkeh, okintlalijkeh imak n Toteko.

Pablo iwa Bernabé mokopah Antioquía kan tlali de Siria

²⁴ Satepa opanokeh kan tlalmeh de Pisidia iwa okalakito Panfilia. ²⁵ Otetlapowijkeh itlajtol Dios kan altepetl de Perge, iwa satepa oyajkeh Atalía.

²⁶ Ompa otlejkokeh itech se barko iwa oyajkeh Antioquía kan achto okintlalijkeh imak Dios para ika itlasojtlalis makimpalewi itech non tekitl non axa yotlankeh okichijkeh.

²⁷ Ijkuak okalakito Antioquía, okinmooololojkeh n tokniwah non kineltokah Cristo Jesúś iwa okinmatiltijkeh nochi tlan okichijkeh ika iweletilis Dios, iwa keniji n Toteko okinyolyamani n tlakah non amo judíojteh para yejwah noiwa makineltokakah n Cristo Jesúś.

²⁸ Pablo iwa Bernabé omokajkeh ompa miakeh tonatijmeh inwah tokniwah non kineltokah Cristo Jesúś.

15

N tokniwah moololoah Jerusalén

¹ Itech nekateh tonatijmeh, sikimeh tlakah non okiskeh de Judea iwa oyajkeh kan altepetl de Antioquía, opé kinmachtiah n tokniwah non amo judíojteh mamosirkundarokah kemi Moisés otlanawatija, tla okinekiah momakixtiskeh. ² Pablo iwa Bernabé omokualanijtokah chikawak iwa nonteh tlakah. Yika Pablo, Bernabé iwan oksikimeh tokniwah, okimpejpenkeh mawiah Jerusalén mamoyektlapowith de n sirkunsisión inwah n tlatematiltijkeh iwa n tlayakankeh de n tokniwah de Jerusalén.

³ N tokniwah de Antioquía, non kineltokah Cristo Jesúś, okintitlankeh mawiah Jerusalén Bernabé iwan Pablo. Ijkuak oyajkeh opanokeh kan ik tlalmeh de Fenicia iwa Samaria. Ompa kan ik oyayah, otetlapowiyah kenomi non amo judíojteh okikajkeh tlan achto okineltokayah iwa yopé kineltokah Dios. Nocheh n tokniwah opakiah ijkuak okikakiah tlan okinmiliyah.

⁴ Ijkuak Pablo iwa Bernabé okalakito Jerusalén, okinselijkeh non okineltokayah Cristo Jesúś, noiwa n tlatematiltijkeh iwa n tlayakankeh. Iwa yejwah okintlapowijkeh nochi tlan Dios okichi inwah. ⁵ Pero sikimeh fariseos non noiwa yokineltokakeh Cristo Jesúś, omoketskeh iwa okijtojkeh:

—N tlakah non amo judíojteh akimeh noiwa yokineltokakeh Cristo Jesúś, moneki mosirkunsidarooskeh. Iwa moneki tikinnawatiskeh makichiwakah tlan kijtoa itlanawatil Moisés.

⁶ Ijkuakó n tlatematiltijkeh iwa n tetajmeh non tlayakantokeh, omoololojkeh para motlapowiskeh tlan kichiwaskeh. ⁷ Ijkuak yomotlapowijkeh, Pedro owalmóketski iwa okinmili:

—Nokniwah, nomejwah kuali nonkimatokeh yowejka Dios onechpéjpenki nomonawak, para manikinmatiltiti n kualitlátjoli akimeh amo judíojteh, iwa ijkó yejwah noiwa matlaneltokakah. ⁸ Iwa Dios, Akin kimati nochi tlan tikmoliah itech toyolo, noiwa okinmák n Espíritu Santo akimeh amo judíojteh ijkó kemi tejwah achto otechmák. Ika noni otechititi de milajka kinselia. ⁹ Dios amo otechseli san tejwah iwa yejwah amó, yej san ken tinochteh otechseli. Yika, ijkó kemi tejwah otechyolchipa Dios, noiwa yejwah okinyolchipa porke okineltokakeh Cristo Jesúś. ¹⁰ Axa, ¿tleka amo nonkineltokah tlan Dios okichi? Iwa nonmochijchikawah nonkintoktiah akimeh yokineltokakeh n Cristo

Jesús makichiwakah tlan nion tejwah, jnion totatawah otiweletkeh otikchijkeh! ¹¹ Okachi kuali, tejwah tikneltokah yotimomakixtijkeh porke Jesús miak otechtlaosjtlak, noiwa yejwah kineltokah.

¹² Ijkuakó nochteh san owalmokajkeh para kikakiskeh tlan Bernabé iwa Pablo okintlapowiayah kenijke Dios okinmák weletílistli para makinchiwakah milagros iwa wejweyi neskáyolteh inmixpah non amo judíojteh. ¹³ Ijkuak yotlankeh otlajtojkeh, Jacobo okijo:

—Nokniyah, techkakikah: ¹⁴ Simón Pedro yotechtlapowi kenomi otlamochi ijkuak sakinika Dios opé kinnotsa akimeh amo judíojteh. Iwa intech okinmopejpeni sikimeh para mayetokah iaxkawah. ¹⁵ Tlan Pedro okijo, ijkó okiski tlan okikuilojkeh n profetas, ijkó kemi kijtoa itech itlajkuilol Dios:

¹⁶ Satepa de nochti ni, oksepa niwalmokopas
iwa nikyekketsas itabernákulo n David non axa wetok;
nikyektlalis tlan omoka,
iwa oksepa nikajkokuis,

¹⁷ para nochteh n tlaltikpaktlakah makitemokah n Toteko:
Nochteh yejwah akimeh yokinmatiltijkeh Notoka.

¹⁸ Ijkó kijtoa n Toteko, Akin ya wejkawitl okitematilti tlan axa mochijtok. *Am. 9:11-12*

¹⁹ 'Yika ne nikjtoa, amo matikinkuejsokah akimeh amo judíojteh iwa yokikajkeh tlan achto okineltokayah iwa axa ya kitlakitah Dios. ²⁰ San matikintlajkuililikah ayakmó makikuakah itla tlan yokinmanilijkeh n diosmeh non kinmachijchiwah. Iwa nion se télpochtli noso íchpochtli mamomekatijtinemi. Ayakmó makikuakah nakatl de n yolkameh non san kintoskamalina, nion makikuakah n tlakuali ika inmessio. ²¹ Porke yowejka onkateh akimeh kitemachtiah itlanawatil Moisés, iwa nochti sábado kitemachtijtiwitseh itech nochteh sinagogajteh.

Kintitlaniliah se amatlajkuíloli non amo judíojteh

²² Ijkuakó n tlatematiltijkeh iwa n tetajmeh non kinyakantokeh tokniyah non kineltokah Cristo Jesús, okimpejpenkeh sikimeh inmikniyah para kintitlaniskeh mawiah iwan Pablo iwa Bernabé kan altepetl de Antioquía. Yejwah okipejpenkeh n Judas, akin noiwa itoka Barsabás, iwa Silas; ningeh tlakah okachi otlayakantokah innawak tokniyah.

²³ Okinmakakeh se amatlajkuíloli non ijkí okijtoaya:

“Tejwah akimeh titlatematiyah, iwa titetajmeh non tikinyakantokeh tokniyah non kineltokah Cristo Jesús, iwa oksikimeh tokniyah non moololoah towah: Tomechontlapaloah nomejwah tokniyah non amo judíojteh iwa nochteh akimeh nonchantitokeh Antioquía iwa itech tlalmeh de Siria iwa Cilicia. ²⁴ Otikmatkeh sikimeh tlakah non san yejwah omonawatijkeh oyajkeh onomechkuatlapololtih ika intlajtolwah. Yejwah onomechilitoh nomejwah monekih nonmosirkunsidarskeh iwa monekih nonkitlakitaskeh itlanawatil Moisés. ²⁵ Yika, yotimotlapowijkeh iwa yotimoyekkajkeh tikimpejpenaskeh sikimeh tokniyah non kineltokah Cristo Jesús. Tikintitlaniskeh manomechitatih sansikah iwa n tokniyah Bernabé iwa Pablo non tikintlasjtlah. ²⁶ Yejwah yokitlalijkeh itech inyolo kitematiltiskeh Itoka n Toteko Cristo Jesús maya makimiktakah. ²⁷ Ika noni tomechtitlaniliah n Judas iwa Silas. Yejwah innewiah nomechyekiliskeh nochti tlan tomechtlajkuilijtokeh. ²⁸ Porke n Espíritu Santo iwa tejwah noiwa, yotikijtokeh amitla ok se tomechnawatiskeh xikchiwakah; sanwel ni tlan milák moneki nonkichiwaskeh: ²⁹ Amo xikkuakah nakatl non yokinmanilijkeh n diosmeh non kinmachijchiwah.

Amo xikkuakah estli nion nakatl de n yolkameh non san okintoskamalinkeh, iwa nion se télpochtli noso íchpochtli mamomekatikah ijkuak ayamó monamiktiah nion mamomekatijtinemikah. Tla nonkichiwaskeh tlan tomechnawatiah, kuali tlan nonkichiwah. Dios manomechtiocia.”

³⁰ Ijkó kiné, oonewakeh akimeh okintitlankeh mawiah Antioquía, iwa san nima ijkuak okalakitoh ompa, okinmooolojkeh n tokniyah non kineltokah Cristo Jesús iwa okinmactilijkeh nin amatlajkuíloli. ³¹ Ijkuak n tokniyah okiamapojkeh tlan okijtoaya n amatlajkuíloli, satlawel opakeh ika tlan okijtoaya non amatlajkuíloli. ³² Iwa kemi Judas

iwa Silas noiva okatkah profetas, okinyolsewijkeh iwa okinyolchikajkeh n tokniyah ika miak tlájtoli. ³³ Yejwah omokajkeh kech tonati ompa. Iwa ikuak ya onewaskiah, n tokniyah okinmakajkeh para mamokopakah innawak akimeh okintitlankah. ³⁴ Pero n Silas okimoli mokawas Antioquía. ³⁵ Pablo iwa n Bernabé noiva omokajkeh Antioquía. Yejwah iwa oksikimeh tokniyah otlamachtiayah iwa otetlapowiayah de itlajtol Toteko.

Pablo oksepa kitelapowia itlajtol Dios

³⁶ Kech tonati satepa, Pablo okili n Bernabé:

—Oksepa matiwiah matikintlajpalotih n tokniyah non kateh itech nochteh n altepe-meh kan yotitetlapowijkeh de itlajtol n Toteko Dios para matikinmitakah.

³⁷ N Bernabé okinek kiwikas n Juan, akin noiva omonotsaya Marcos, ³⁸ pero Pablo ayakmó okinek kiwikas, porke acho n Juan okinkakajtejka ikuak okatkah Panfilia iwa amo okinek otekistik inwah. ³⁹ Iwa kemi amo omoajsikamatkeh, omoxexelojkeh. Bernabé okiwík n Marcos, iwa otlejkok itech se barko iwa oyá Chipre, ⁴⁰ pero Pablo okipéjpenki n Silas. Iwa keman n tokniyah yomotrotsajtsilijkeh para Dios makinwika ika itlasojtlalis, oonewakeh. ⁴¹ Opanokeh ik tlalmeh de Siria iwa Cilicia. Iwa sentetl kan tokniyah non kineltokah Cristo Jesús omoololoayah, Pablo okinyolchikawayá.

16

Timoteo yawi iwan Pablo iwa Silas

¹ Pablo iwa Silas okalakitoh kan altepetl de Derbe iwa de Lstra, ompa okajsitoh se tokni non okineltokaya Cristo Jesús non itoka Timoteo, itelpoch se siwatl israelita non itoka Eunice non otlaneltokaya, pero ita n Timoteo okatka de Grecia. ² Iwa n tokniyah non ochantitokah Lstra iwa Iconio kuali otlaajoayah de Timoteo. ³ Pablo okinekia kiwikas n Timoteo, pero acho okitoki mamosirkunsidaro para amo makualanikah n judíoje non ochantitokah itech nonteh tlalmeh, porke nochteh okimatiah ita n Timoteo griego. ⁴ Iwa itech nochteh n altepemeh kan ik opanotiyah, okinmatiltiayah n tokniyah non kineltokah Cristo Jesús tlan n tlatematiltijkeh iwa n tetajmeh non kinyakantokeh n tokniyah akimeh moololoah Jerusalén okijtojkeh mamochiwa. ⁵ Iwa ijkó nochteh n tokniyah okachi okineltokayah Cristo Jesús, iwa ixmostla okachi omomiakiliayah.

Pablo kimonextilia se tlakatl non kilia mawia Macedonia

⁶ Kemi n Espíritu Santo amo okinkawili matetlapowikah de itlajtol Dios kan tlalmeh de Asia, yika san okimpanawijkeh n altepemeh non kateh itech tlalmeh de Frigia iwa Galacia. ⁷ Iwa ikuak okalakitoh kan motlannah Misia iwa Bitinia, yejwah okinekiah kalakiskeh itech tlali de Bitinia, pero Iespíritu Jesús mach okinkawili. ⁸ Ijkó kiné, san opanotiajkeh ik inakastla n tlali de Misia, asta okalakitoh Troas. ⁹ Non yúali ikuak yokatkah kan tlali de Troas, Dios okitlapowi n Pablo itech itejtemikilis. Ye okitak iyakapa omoketsako se tlakatl de Macedonia non okitlatlaujiaya: “Xiompano ik Macedonia iwa techompalewi.” ¹⁰ Ikuak Pablo okitak non tejtemikílistli, san nima otimotlatlalijkeh para tiaseh Macedonia, porke kuali otikmatiah Dios otechnotoka matiwiah matikinmatiltitih n kualitlátoli de Dios.

Pablo iwa Silas yawih Filipos

¹¹ Ompa kan altepetl de Troas ottitlejkokeh itech se barko iwa otiksenmilajkeh kan ik kajki n isla de Samotracia, iwa ikuak owatláneski otikalakitoh Neápolis. ¹² Satepa otikiskeh de ompa iwa otiajkeh Filipos, se altepetl non okachi weyixtok itech tlalmeh de Macedonia non noiva inmaxka n romanos. Tejwah ompa otimokajkeh kech tonati. ¹³ Se sábado ikuak mosewia n judíos, otikiskeh de non altepetl iwa otikalakitoh inakastla n aweyatl, kan nochipa onmotrotsajtsiliayah n judíoje. Ompa otimotlatlalijkeh iwa opé tikinmatiltiah itlajtol Dios n siwameh non ompa omoololojkah. ¹⁴ Seme de yejwah itoka Lidia. Ye owalewatoka de Tiatira iwa okinamakaya tlakemitl non okachi kuali iwa chichiliklik. Nin siwatl non okiweyijkachiwaya Dios, okikaktoka tlan Pablo okijtoaya.

Iwa Toteko okiyolyamani kuali makikaki nochi tlan Pablo okijoaya. ¹⁵ Otlanki, nin siwatl iwa nochi ifamilia omokuaatekijkeh. Satepa ye otechtlatlauji iwa otechili:

—Tla nomejwah nonkiyejyekolah milák ya nikneltoka n Toteko, xiwikih nocha, ompa nomechkalotis.

Iwa otechtokth matimokawakah.

¹⁶ Se tonati ikuak yotiyah kan nochipa otimotiotsajtsiliyah, itech ojtli otiknamikeh se íchpochtli non okipiaya se espíritu non ika okimatia tlan se mochiwaskia. Iwa ika non tekitl non okichijtinemia non íchpochtli, n tekowajkeh okitlaniah miak tomi.

¹⁷ Nin íchpochtli opé yawi kan ik otiyah tejwah iwa Pablo. Chikawak otsajtsitinemia tokuitlapa, iwa okijoaya:

—¡Ninteh tlakah tekitih inawak Dios non okachi weyijkachitok, iwa nomechmatiltiah keniki nonmomakixtiskeh!

¹⁸ N íchpochtli ijkó okichijtínenki miakeh tonatijmeh, pero se tonati n Pablo ayakmó okixiko, owalmókopki iwa okili n amokuali espíritu non okatka ijtik nin íchpochtli:

—Ika Itoka n Toteko Cristo Jesús, nimitsnawatia, xikisa de itech.

Iwa n amokuali espíritu san nima okikakajte. ¹⁹ Pero ikuak n tekowajkeh de n íchpochtli okitakeh ayakmó kitlaniskiah tomi iwan ye, okikitskijkeh n Pablo iwa Silas iwa okinwikakeh kan portal innawak tekiwajkeh. ²⁰ Okinwikakeh innawak tekiwajkeh iwa okijokeh:

—Ninteh judíojteh kimpajsolojtinemih nochteh n tlakah non nika chantitokeh. ²¹ Iwa tlamachtijtinemih ika ok se tlamachtílistli non tejwah mach tiknekih nion mach weletis tикичиwaskeh, porke tejwah ti romanos.

²² Ikuakó n tlakah de Filipos okualankeh iwa nochteh oonewakeh impah n tlatem-tiltijkeh. Iwa n tekiwajkeh otlanawatijkeh makintlakentsomonikah iwa makin-witekikah ika tlakotl. ²³ Iwa ikuak satlawel yokinwitekeh, okintsakuato, iwa okinawatijkeh n tetsak kuali makinmokuitlawi. ²⁴ Iwa ikuak n tetsak okikak tlan okinawatijkeh, okintsakuato kan okachi tlajtik, iwa okintlalili inmikxiwah intsalko ome kuaujmeh kojyonkeh.

²⁵ Pero ik tlajko yuak, Pablo iwan Silas omotrotsajtsilijtokah iwa okitlakuikilijtokah Dios, iwa n oksikimeh non ompa otsaktokah okinkaktokah. ²⁶ San nima chikaktik owaltlalólinki asta okintsejtselo n temeh kan otlakxilitoka n telpiloya. Ikuakó nochteh n kaltemeh owalmotlapojkeh iwa otojtonkeh inkadenajwah non ika oilpitokah n tlakah non ompa otsaktokah. ²⁷ N tetsak ojjsak, iwa ikuak okimitak n kaltemeh tlajtlapotokeh, okikixti iespada iwa ya momiktiskia, porke okimoli yocholojkeh akimeh ompa otsaktokah. ²⁸ Pero n Pablo okitsajtsili:

—Amo ximokojo, tinchteh nika tikateh.

²⁹ Ikuakó n tetsak okitlájtlanke se tláwili, okalaktiwetski bibiokati omotlankuáketsato ikxitla n Pablo iwan Silas. ³⁰ Otlanki okwalinkixti iwa okintlajtlani:

—Tlahah, ¿tlan moneki nikchiwas para nimomakixtis?

³¹ Yejwah okinankilijkeh:

—Xikneltoka n Toteko Cristo Jesús iwa mitsmakixtis te, iwa nochti mochantlakawah.

³² Iwa Pablo iwa Silas okitlapowijkeh de itlajtol n Totajtsi n tetsak iwa nochteh non inwah ochantitokah. ³³ Iwa san nima non yúali, n tetsak okimpakili kan okinxojxolejkeh, iwa ye iwa nochti ichantlakawah omokuaatekijkeh. ³⁴ Satepa okinwík icha iwa okintlakualti, iwa ye iwa nochteh non ken kinmitah opaktokah porke okineltokakeh Dios.

³⁵ Ikuak owaltláneski, n tekiwajkeh okinnawatijkeh n soldadojteh makitatih n tetsak, para makinkajkawa n Pablo iwan Silas. ³⁶ Ikuakó n tetsak okili n Pablo:

—N tekiwajkeh onechnawatijkeh manomechkajkawa, ya weletis nonyaskeh, xiwiah ika yolsewílistli.

³⁷ Pero Pablo okinmili n tlamokuitlawijkeh:

—Tejwah tiromanos, otechwitekeh teixpa iwa amo achto otechtlatsintokijkeh, yej otechtsakeh; ¿Iwa axa kinekih techkajkawaskeh san ichtaka? ¡Amó! Mawikih yejwah innewiah matechkixtikih.

³⁸ N soldadojteh okinmatiltitoh n tekiwajkeh. Iwa ninteh omaujkeh ikuak okimatkeh Pablo iwan Silas noiva romanos. ³⁹ N tekiwajkeh omotlapojpolwitoh innawak, iwa san nima okinkixtikih de kan otsaktakah iwa okintlatlaujtijkeh mawiah de non altepetl. ⁴⁰ Ikuak Pablo iwa n Silas yokiskeh de kan otsaktakah, oyajkeh icha n Lidia. Ikuak okimatkeh inmikniyah non kineltokah Cristo Jesús okinyolchikajkeh, iwa satepa oyajkeh de ompa.

17

Mopaj soloah n tlakah de Tesalónica

¹ Pablo iwa Silas opanokeh ik Anfípolis iwa Apolonia, iwa okalakitoh Tesalónica, kan okipayah se insinagoga n judío jteh. ² Pablo, ijkó kemi nochipa okichiwaya, oyá kan sinagoga iwa okintlalnamiktiaya itech nonteh eyi sábado. ³ Iwa okinmajsikamatiltiaya Cristo tlaijyowiskia, iwa satepa de mikiskia, moyolitiskia oksepa kemi nestok itech itlajkuilol Dios. Iwa okimiliaya:

—Nin Jesús de akin ne nomechtlapowia, Ye n Cristo.

⁴ Ikuakó sikimeh judío jteh okineltokakeh n Cristo Jesús, iwa omoseitilijkeh iwan Pablo iwa n Silas. Noiva okineltokakeh sikimeh griego jteh non okiweyijkachiwayah Dios. Miakeh siwameh non okachi okintlakitayah itech non altepetl noiva otlaneltokakeh inawak Cristo Jesús. ⁵ Pero sikimeh judío jteh non amo okineltokayah itlajtol Dios, oxikojmikeh iwa okintlatlalwijkeh sikimeh tlakah tlajtlakolchijkeh non san okitokatine-miah ojli para makimpajsolokah n tlakah de non altepetl. Satepa okalakitoh icha n Jasón, okintemojinemiah n Pablo iwa n Silas, para kinkixtiskeh iwa kintemakaskeh inmak n tlakah de non altepetl. ⁶ Pero kemi amo okinmajsikeh ompa, okiwikakeh tlaxotonti n Jasón sansikah iwa n oksikimeh tokniyah non kineltokah Cristo Jesús, iwa okimixpantitoh innawak tekiwajkeh, iwa chikaktik otsajtsikeh:

—¡Ninteh tlakah, akimeh tekuatlapololtijtinemih itech nochi n tlaltíkpaktli, noiva yowalajkeh nika! ⁷ Iwa Jasón okinkaloti icha. Nochteh yejwah mach kitlakitah itlanawatil n torej César de Roma, porke kijtoah onka ok se rey non yejwah kiliaj Jesús.

⁸ Ikuak nochteh n tlakah iwa n tekiwajkeh de non altepetl okikakeh tlan okijtojkeh nonteh tlakah, okachi omopaj solojkeh. ⁹ Pero Jasón iwa non oksikimeh tokniyah okitlaxtlajkeh tlan okintlajtlanilijkeh n tekiwajkeh, iwa okinkajkajkeh.

Pablo iwa Silas yawi Berea

¹⁰ Niman non tonati ikuak otleyuak, n tokniyah non kineltokah Cristo Jesús ok-intitlankeh n Pablo iwa Silas mawiah kan altepetl de Berea. Iwa san nima ikuak okalakitoh, oyajkeh kan insinagoga n judío jteh. ¹¹ Ninteh judío jteh okatkah okachi yolyamankeh ke non ochantitokah Tesalónica. Ika miak pakílistli okiselijkeh itlajtol Totajtsi Dios. Ixmostla okiamapoaya itlajkuilol Dios para kitaskeh kox milák tlan Pablo iwa n Silas okimiliayah. ¹² Ijkó miakeh judío jteh okineltokakeh Cristo Jesús, iwa miakeh siwameh iwa tlakah griegos non okachi okintlakitayah itech non altepetl noiva okineltokakeh. ¹³ Pero ikuak n judío jteh non ochantitokah Tesalónica okimatkeh Pablo noiva yetetlapowijtoka de itlajtol Dios kan altepetl de Berea, oyajkeh okimpajsolotoh n tlakah non ompa ochantitokah. ¹⁴ Pero n tokniyah okilitoh n Pablo mawia de ompa iwa makonana n ojli non onkisa itempa n weyi atl. Pero n Silas iwa Timoteo ok omokajkeh ompa kan altepetl de Berea. ¹⁵ Akimeh oyajkeh iwa n Pablo, okiwikakeh asta Atenas. Satepa owalmokopkeh de ompa iwa okimilikeh n Silas iwa n Timoteo, Pablo okinmili san nima mawiah makajsitih ompa.

Pablo yawi kan altepetl de Atenas

¹⁶ Ijkuak Pablo okichixtoka n Silas iwa n Timoteo kan altepetl de Atenas, saikpanoa omoyolkoko porke okitak itech non altepetl sentetl omokejketokah diostsitsinteh non san kinmachijchiyah. ¹⁷ Iwa ijkó, itech n sinagoga omotlapowiaya iwan judíojteh iwan griegos non okiweyijkachiwayah Dios. Iwa nochí tónati itech tiánkistli okintlapowiaya akimeh ompa omooololoayah. ¹⁸ Sikimeh tlakah ixtlamatkeh non okintokayotiayah epicúreos, iwa n oksikimeh ixtlamatkeh non okintokayotiayah estoicos, opé motlatla-jtolkopah iwan Pablo. Sikimeh okimoliayah:

—¿Tlan kineki techilis nin tekajkaya?

Iwa oksikimeh okijoayah:

—Mati tetlapowijtinemi de oksikimeh diosmeh.

Ijkó okimoliayah porke Pablo okinmatiltiya n kualitlátoli de Jesús iwa de keniji oksepa omoyoliti. ¹⁹ Ijkuakó okikitskijkeh iwa okiwikakeh kan lojar non itoka Areópago, kan nochipa omooololoayah, iwa okitlajtlanijkeh:

—¿Weletis techyekilis tlan kijtosneki nin yankuik tlamachtlistli non te tikualika?

²⁰ Tiktematiltia tlan ayik tikkaktikateh. Yika, tiknekih tikmatiskeh tlan kijtosneki nochí noni.

²¹ Yejwah okinekiah kimatiskeh tlan kijtosneki porke nochteh n tlakah de Atenas, iwa akimeh san ovalajkeh ochanchiwakoh ompa, mach itla ok se okichiwayah, sanwel okiwilliyah kikakiskeh noso kijtojinemiskeh itla yankuik tlájtoli.

²² Ijkuakó Pablo, omoketsato tlatlajkotia kan Areópago, iwa okijo:

—Tlakah de Atenas, ne nikita nomejwah nonkinmopantiah nomodiostsitsiayah.

²³ Porke ikuak onitlajtlachixtinemia kan nomejwah nonkinweyiliyah nomodioswah, onikajsik se artal kan ikuilitok: “Para n Dios non amo tikixmatih”. Neká akin nomejwah nonkimopantiah maya amo nonkixmatih, Ye n Dios de akin ne nomechtlapowia.

²⁴ 'N Dios Akin okichijchi n tlaltípkaktli iwa nochí tlan itech onka, Ye iaxka n ilwikak iwa n tlaltípkaktli. Ye amo chanti itech tiopameh non kinmachijchiyah n tlakah, ²⁵ nion onka itla tlan weletis kimakaskeh n tlakah, porke Ye amitla kipoloa, Ye Akin kichiwa matiyolitokah, iwa techmaka toijyotilis, iwa nochí tlan onka wits de Ye.

²⁶ 'San itech se, Dios okinchijchi nochteh n tlakah para mamochajchantikah ipan nochí n tlaltípkaktli. Iwa Ye okitlali kech xiwitl yolitoskeh iwa kan kipiah mochantiskeh.

²⁷ Dios ijkó okichi, para n tlaltípkaktlakah makitemokah iwa maya san makimatemekah, makajsikah. Maya milák se makijto, Dios amo wejka kajki de tejwah tinochteh. ²⁸ Porke itech Dios tikateh, timoliniah iwa tiyolitokeh. Asta sikimeh tlajkuiloanh okijojkeh: “Tejwah titepilwah de Dios.” ²⁹ Yika, tla tejwah titepilwah de Dios, amo matikmolikah Dios kemi se tlamachijchiwali non tlakah kichijchiyah de oro, plata, noso tetl kemi yejwah kiyeyekolah tlachixtok. ³⁰ Ya wejkawitl, Dios okintlapojpolwi ika tlan okichi-jtinemiah n tlaltípkaktlakah, porke amo okimatiah tlan amo kuali okichiwayah. Pero axa itech nin teh tonatijmeh, Dios kinnawatia nochteh n tlaltípkaktlakah makikawakah nochí tlan amokuali kilnamiktinemih iwa kichijtinemih iwa san Ye makitlakitakah. ³¹ Porke Dios yokitlali se tonati ikuak tlaixkomakas. Ye kichiwas porke Ye yolmilajka iwa kitlalis n Cristo Jesús makichiwa nin tekitl, akin Ye yowejka okipéjpenki. Iwa tinochteh otikmatkeh Dios yokipéjpenki n Jesús ikuak okiyoliti.

³² Pero ikuak okikakeh non yomikkeh moyolitiskeh, sikimeh san okiwetskakeh iwa oksikimeh okijoayah:

—Ok se tonati timitskakiskeh.

³³ Ijkuakó Pablo okinkakajte. ³⁴ Pero sikimeh tlakah okineltokakeh itlajtol Dios iwa oyajkeh iwan Pablo. Seme de yejwah itoka Dionisio, akin noiva okatka tlayákanki kan Areópago, noiva se siwatl non itoka Dámaris, iwa miakeh oksikimeh.

¹ Satepa, Pablo okiski de Atenas iwa oyá kan altepetl de Corinto. ² Ompa okajsito se israelita non itoka Aquila, non owalewatoka de Ponto. Ijkuakó ayamó okachi owejkawayaya, n Aquila iwa isiwa Priscila ovalajkeh de Italia porke n rey Claudio otlanawati makisakah de Roma nochteh n judíojteh. Ijkuakó n Pablo oyá okintlapaloto. ³ Iwa kemi Pablo noiva oweletia okinchijchiwaya manteadojkalmeh kemi yejwah, omoka inwah iwa otekitiyah sansikah. ⁴ Iwa nochí sábado ijkuak mosewia n judíos Pablo okintlapowiayah itech sinagoga, iwa miakeh judíojteh iwa griegos okineltokayah itlajtol Dios.

⁵ Ijkuak Silas iwa Timoteo okalakikoh de Macedonia, Pablo okachi okimosenmák iteki; otetlapowiaya de n kualitlátoli de Dios iwa okimiliaya Jesús Ye n Cristo akin okichixtokah. ⁶ Pero n judíojteh okualankeh iwa opé kiwijkaltiah, ijkuakó n Pablo inmixpa okitsejtselo itlake para makitakah noiva okualanki iwa okinmili:

—Amo notlajtlakol tla amo nonmomakixtiah; ne ayakmó nikpia tlan nikitas. Okachi kuali manomechkawa iwa manio manikinmatiltiti itlajtol Dios non amo judíojteh.

⁷ Okiski de kan sinagoga iwa oyá icha n se tlakatl non itoka Justo, ye okiweyijkachiwaya Dios. Nin tlakatl ochantitoka inakastla n sinagoga. ⁸ Iwa Crispó, se tlayákanki itech sinagoga, okineltokak n Toteko sansikah iwa nochteh ichantlakawah. Noiva miakeh tlakah de Corinto, ijkuak okikakeh itlajtol Dios, okineltokakeh iwa omokuaatekijkeh. ⁹ Ijkuakó, se yúali n Toteko okili n Pablo itech itejtemikilis:

—Amo ximawi, xiktematilti notlajtol iwa ayik ximosotlawa. ¹⁰ Porke Ne nika mowa iwa amaka weletis itla mitstoktis, porke nikimpia miakeh akimeh nechneltokah itech nin altepetl.

¹¹ Yika Pablo omoka Corinto, iwa ompa okitematilti itlajtol Dios se xiwitl iwa n tlajko.

¹² Pero itech n tonatijmeh ijkuak Gálion gobernador kan tlalmeh de Acaya, n judíojteh omotlatlalwijkeh iwa oonewakeh ipan Pablo. Okiwikakeh inawak tekiwa, ¹³ iwa okilijkeh n gobernador:

—Nin tlakatl kintlatlalwijtinemi nochteh n tlakah makiweyijkachiwah Dios, pero amo kemi totlanawatilis kijtoa.

¹⁴ Pablo ya tlajtoskia, ijkuak Gálion okinmili n judíojteh:

—Techkakikah judíojteh, tla nin tlakatl kichiwaskia itla tlan amokuali noso tla temiktiskia, nika nika para nomechkakis. ¹⁵ Pero san tekil nonkipoah tlan nin tlakatl kitemachtia, ika tlájtolteh de tlakah iwa de nomotlanawatilwah, ompa nomejwah xikitakah. Ne amo nikneki niyetos niteyolsewi itech nomotlanawatilwah.

¹⁶ Iwa okwalinkixti de kan jusbado. ¹⁷ Ijkuakó nochteh n griegos okimokitskilijkeh n Sóstenes, tlanawati itech sinagoga, iwa okiwitekeh ompa ixpa n tlanawati Gálion. Pero Gálion omochi kemi amo okitak.

Pablo mokopa Antioquía

¹⁸ Pablo ok omoka Corinto miakeh tonatijmeh. Satepa omomaaka innawak tokniwah non kineltokah Cristo Jesús, iwa oyá kan tlali de Siria sansikah iwan Priscila iwa n Aquila. Ijkuak ya onewaskia de Cencreas, omokúaxinki porke yokitemakaka itlajtol inawak Dios.

¹⁹ Ijkuak okalakitoh kan altepetl de Éfeso, Pablo okinkajteh n Priscila iwa Aquila, iwa oyá kan sinagoga, omotlapowito iwan judíojteh non ompa omoololoayah. ²⁰ Yejwah okitlatlautijkeh n Pablo mamokawa ok kech tonati inwah, pero mach okinek. ²¹ Ijkuakó omomaaka inwah iwa okinmili:

—Tla Dios kimonekiltia, oksepa niwits nomechontlajpaloki.

Iwa oyá de Éfeso itech barko. ²² Ijkuak okalakito kan altepetl de Cesarea, Pablo otlejkok Jerusalén okintlapaloto n tokniwah non ompa omoololoayah, iwa satepa oksepa owaltemok kan altepetl de Antioquía. ²³ Satepa ijkuak yowejka ompa okatka, oksepa okiski iwa opapanotia itech n altepemeh de Galacia iwa Frigia. Iwa okinyolchikajtiaya nochteh n tokniwah.

Apolos tetlapowia de itlajtol Dios kan altepetl de Éfeso

²⁴ Itech nekateh tonatijmeh se israelita non itoka Apolos, non owalaya de se altepetl non itoka Alejandría, oajsiko kan altepetl de Éfeso. Ye okimatia otenonotsaya iwa kuali okixmatia itlajkuilol Dios. ²⁵ Ye kuali okimachtijkeh itlamachtilis Toteko, iwa ikuak otenonotsaya, kualtsi otetlapowiaya. Okitemachiaya de Jesús ika miak chikawálistli, maya ye sanwel okixmatia n tlakuaatekílistli non Juan okitemachti. ²⁶ Apolos opé tetlapowia ika miak yolchikawálistli. Pero ikuak n Priscila iwa Aquila okikakeh, okinotskeh iwa okiyekajskamatiltijkeh itlamachtilis Dios. ²⁷ Satepa ikuak Apolos okijo yas kan tlali de Acaya, n tokniwah okiyolchikajkeh mawia ompa, iwa okintitlanilijkeh se amatlajkuíloli n tokniwah non kineltokah Cristo Jesús non okatkah de Acaya para kuali makiselikah n Apolos. Ikuak okalakito Acaya, okimpalewi miak akimeh Dios ika itlasojoatlalis okichi matlaneltokakah itech Cristo. ²⁸ Apolos omonanankiliaya iwan judíojteh non amo okineltokaya Jesús, iwa ika itemachtilis n tiotlajkuíloli okinnextiliaya Jesús okatka n temakixti.

19

Pablo yawi kan altepetl de Éfeso

¹ Ikuak Apolos ok okatka Corinto, Pablo okintlajpalojtiah kan ik altepemeh non kateh okachi tlakpak, asta okalakito kan altepetl de Éfeso. Ompa okinmajsito sikimeh tokniwah non kineltokah Cristo Jesús. ² Iwa okintlajtlani:

—¿Ononkisijkeh n Espíritu Santo ikuak ononkineltokakeh Cristo Jesús?

Yejwah okinankilijkeh:

—Ayik tikkaki kox onka Espíritu Santo.

³ Ikuakó n Pablo okintlajtlani:

—¿Tlan tlakuaatekílistli ononkisijkeh?

Yejwah okinankilijkeh:

—N tlakuaatekílistli non Juan okitemachti.

⁴ Pablo okinmili:

—Milák, Juan okinmiliaya n tlakah mamokuaatekikah iwa makiteititikah yejwah de milajka okinekiah kikawaskeh tlan amo kuali okichijinemiah, pero okinmiliaya omonekiah kineltokaskeh akin walaskia satepa de ye, kijtosneki makineltokakah n Cristo.

⁵ Ikuak okikakeh tlan Pablo okinmili, omokuaatekijkeh itech Itoka n Toteko Jesús.

⁶ Iwa ikuak Pablo okintlali imawah impah, n Espíritu Santo owala intech iwa opé tlajtoah ika oksikimeh tlájtolteh iwa okitematiltijkeh tlan Dios okinmiliaya tlamocheiwaskia.

⁷ Yejwah okatkah kemi májtlaktli iwa n ome tlakah.

⁸ Eyi mestli Pablo oyaya kan se sinagoga. Ye ompa okitematiltiaya itlajtol Dios ika miak yolchikawálistli. Okinonotsaya n judíojteh noiva makalakikah kan Dios tlanawatijtok. ⁹ Pero sikimeh oyoltlakuawakeh iwa mach okineltokakeh itlajtol Dios, yej teixpa otlajtoayah fiero de n kualtlájtoli. Ikuakó Pablo omoxelo de yejwah, iwa okinwík n tokniwah kan se kali kan momachtilo de se tlakatl non itoka Tirano, iwa ixmostla ompa omotlapowiayah. ¹⁰ Ome xiwitl otetlapowi de itlajtol Dios, iwa ijkó nochteh non ochantitokah itech tlalmeh de Asia, n judíojteh iwa non amo judíojteh okikakeh itlajtol n Toteko Jesús. ¹¹ Iwa Pablo okinchiwaya wejweyih milagros ika iweletilis Dios. ¹² Iwa asta sikimeh pañitojteh noso tsótsoleh non Pablo okintelkojka, okinwikiliayah inkokoxwah, iwa ikuak okintlaliliyah impah, n kokoxkeh opajtiah iwa n espíritus amokualteh okisayah de intech.

¹³ Pero sikimeh judíojteh non okinkixtiayah espíritus amokualteh, noiva okinekiah kinkixtiskeh n espíritus amokualteh ika Itoka n Toteko Jesús, iwa ijkí okimilijkeh n espíritus amokualteh:

—Ika Itoka n Jesús non Pablo kitematiltia tomechnawatiah, xikisakah!

¹⁴ Ijkó okichiwayah chikome itelpochwah se tlakatl non itoka Esceva, akin okatka se tiópixki israelita non okachi otlayakantoka. ¹⁵ Pero ikuak ijkó okichijkeh, n espíritu amokuali okinnankili:

—Nikixmati n Jesú, iwa nikmati akin Pablo; ¿pero akimeh nomejwah?

¹⁶ Iwa san nima ikuak ijkó okinmili, n tlakatl non okipixtoka n espíritu amokuali omokajka impah, iwa kemi non amokuali espíritu okatka satlawel chikaktik, nochteh okinwitek iwa sa okicholilijkeh de non kali xipetstikeh iwa sa ejestikeh. ¹⁷ Nochteh non ochantitokah Éfeso, judíojteh iwa amo judíojteh, okimatkeh iwa satlawel omomojtijkeh, iwa okiyektenewayah Itoka n Toteko Jesú.

¹⁸ Noiwa miakeh non okineltokakeh Cristo Jesú owalayah iwa okimokuitiayah tlan amokuali okichiwayah. ¹⁹ Noiwa miakeh non otetlajchiwayah, okwalinwikakeh intla-jkuilolah non intech omomachtiayah para tetlajchiwiskeh iwa teixpa okinchichino-jkeh. Iwa ikuak okiyeyekolijkeh kech impati nonteh tlajkuilolteh, okijtojkeh ome pójali iwa n májtlaktli mil (50,000) platajtomí. ²⁰ Ijkó itlajtol Totajtsi okachi omoxitiniaya iwa okitenextiaya iweletilis.

²¹ Satepa ikuak nochí ni yopanok, Pablo okitlali itech iyolo yas para Macedonia iwa Acaya iwa asta kalakiti Jerusalén. Noiwa okimoliaya yaskia Roma. ²² Ikuakó Pablo okintítlanki ome itlakawah mawiah Macedonia, Timoteo iwa Erasto, porke ye ok mokawaskia kech tonati itech tlalmeh de Asia.

Kualankamikih n tlakah de Éfeso

²³ Itech nekateh tonatijmeh opé mokuakualaniah n tlakah por n kualitlajtoli de Dios. ²⁴ Otlapewalti se tlakatl non itoka Demetrio, non okinmachijchiwaya ika plata tiopantsitsinteh de se diosa non itoka Diana, iwa akimeh otekitia para Demetrio kuájkuali tomi okitlaniah. ²⁵ Demetrio okinmoololo itlakawah iwa oksikimeh tlakah non noiwa okitekitiah n plata, iwa okinmili:

—Tlakah, nomejwah kuali nonkimatokeh kuali tiktlanih ika nin tekitl non tejwah tikchiwah. ²⁶ Pero ijkó kemi nomejwah nonkitah iwa nonkikakih, nin tlakatl non itoka Pablo kijtojinemi n diostsitsinteh non san kinmachijchiwah n tlakah, amo milák diosmeh. Iwa miakeh tlakah yokineltokakeh tlan kimilia, iwa amo san non de nika Éfeso, yej noiwa itech nochteh altepemeh non kateh kan tlalmeh de Asia. ²⁷ Semi amokuali tlan kichijtinemi, porke weletis tikpoloskeh toteki iwa itiopa n todiosa Diana ayakmó ok kitlakitaseh. Iwa nin diosa non nochteh n tlakah de Asia iwa de nochí n tlaltíkpaktli kiweyiliah, kipolos iweyilis iwa mach ok kiweyiliskeh.

²⁸ Ikuak okikakeh nin tlájtoli, okualankamikeh iwa opé tsajtsih:

—Matikweyilikah n Diana, todiosa de Éfeso!

²⁹ Ijkó, n tlakah de non altepetl okualankamikeh. Okikitsikkeh n Gayo iwa Aristarco, ome tlakah de Macedonia non oyayah iwan Pablo, okintlalxotontiajkeh asta kan kali kan yejwah omoololoayah. ³⁰ Pablo okinekia kalakis ompa para kintlapowis n tlakah, pero n tokniyah non kineltokah Cristo Jesú mach okikawilijkeh. ³¹ Noiwa sikimeh tekiwajkeh de Asia non inwah omowikaya n Pablo, otlatitlankeh makilitih n Pablo amo makalaki ompa kan oololitokeh. ³² Pero ompa kan oololitokah, san de miak okijtoayah, iwa miakeh nion amo okimatiah tleka ompa okatkah. ³³ Pero sikimeh judíojteh okwalkixtijkeh n Alejandro iwa okiketsatoh tlayakapa. Alejandro okíketski ima para ayakmó matsajtsikah, iwa ijkó weletis motlajtolpalewis inawak nonteh tlakah. ³⁴ Pero ikuak n tlakah okimatkeh Alejandro okatka israelita, nochteh otsajtsikeh iwa ijkó otsajtsitokah kemi ome ora:

—Maweyixto n Diana, todiosa de Éfeso!

³⁵ Ikuak n tekiwa non kinmíkuiloa amameh itech non altepetl owéletki okintlakawalti n tlakah de Éfeso, okinmili:

—Tlakah de Éfeso, nochteh kimatokeh tejwah tkmokuitlawiah itiopa n Diana noiwa tkmokuitlawiah itlamachijchiwal Diana non owetsiko de ilwikak.* ³⁶ Iwa kemi amo onka se akin weletis kijtos amo milák, ayakmó okachi xikualanikah iwa amitla xikchiwakah tla amo nonkimatih tlan nonkichiwah. ³⁷ Porke ninteh tlakah non nomejwah ononkual-inwikakeh, amitla fiero okitenejkeh de todiosa nion itla okichtekiljkeh kan itiopa. ³⁸ Tla Demetrio iwa itlakahawh kinekih kiteiliskeh aka, yika onkateh tekiwajkeh kan moteiliskeh. ³⁹ Iwa tla owijtitok tlan nomejwah nonkitlajtlaniih, nonkipiah de nonyaskeh nonmoyektlalitiweh innawak tekiwajkeh. ⁴⁰ Porke tla amó, ika tlan axa opanok weletis techteiliskeh iwa kijtoskeh tikimpajsolojtinemih n tlakah; iwa amitla tikpih tlan ika weletis timotlajtoltolpalewiskeh.

⁴¹ Satepa, ikuak yotlanki okintlapowi, okinmili mawiah nochteh non ompa omoololokeh.

20

Pablo oyá Macedonia iwa Grecia

¹ Ijkuak nochteh n tlakah omoyolsewijkeh, Pablo okinnotski n tokniyah non kineltokah Cristo Jesús. Okinyolchika iwa satepa omomaaka inwah iwa oyá Macedonia. ² Pablo okintlapalajtia nochteh n tokniyah non ochantitokah itech nekateh tlalmeh, iwa ika miak tlájtoli okinyolchikajtiaya asta okalakito Grecia. ³ Ompa omoka eyi mestli, iwa sa okichixtoka tonati para tlejkos itech barko iwa kalakiti kan tlali de Siria, keman okima n judíojteh okinekih kimiktiskeh, okisentlali oksepa panos ik Macedonia. ⁴ Pablo oyaya iwan Sópater de Berea, Aristarco iwa n Segundo non owalewatokah de Tesalónica, Gayo iwa n Timoteo de Derbe, Tíquico iwa n Trófimo non owalewatokah de Asia. ⁵ Ninteh tokniyah otlayakankeh iwa otechchiatoh kan altepetl de Troas. ⁶ Pero tejwah otikiskeh de Filipos satepa de opanok n ilwitl de Paskua ikuak mokua n paj non amo kipia levadura, iwa otiajkeh itech barko iwa ipan mákuili tonati otikinmajsitoh Troas. Ompa otimokajkeh chikome tonati.

Pablo konintlapaloa non kateh kan altepetl de Troas

⁷ N domingo otimooololojkeh para tiksepanguaskeh n paj, iwa Pablo okinmachtijtoka n tokniyah non kineltokah Cristo Jesús. Iwa kemi Pablo onewaskia ikuak tlanesiskia, yika okinmacti asta tlajko yuak. ⁸ Pablo otechmachtijtoka itech se kuarto non okatka tlakpak. Non kuarto okimpiaya miakeh tláwilteh. ⁹ Se télpochtli non itoka Eutico oewatoka kan bentana. Iwa kemi Pablo owejka otemachtijtoka, n télpochtli okochtlamila iwa owalwetsiko desde ipan eyi piso, iwa ikuak okajkokuitoh yomikki. ¹⁰ Ijkuakó n Pablo otemok, omoixtlapacho ipan télpochtli okinawajtek iwa okinmili n tokniyah:

—Amo ximomojtkah, ye yolitok.

¹¹ Otlanki n Pablo oksepa otlejkok kan kuarto, okitlajkotlápanki n paj, iwa okisep-ankuajkeh iwa oksepa okintlapowi asta otláneski. Iwa satepa oyá. ¹² N télpochtli okiwikakeh yolitok, iwa nochteh okachi omoyolchikajkeh.

Pablo kisa de Troas iwa yawi Mileto

¹³ Tejwah otitlayakankeh itech barko iwa otikalakitoh kan altepetl de Asón, ompa otiknotikiskeh n Pablo, ijkó kemi otimokajkeh íwa, porke ye okinek nejnemis. ¹⁴ Ijkuak otimajsitoh iwan Pablo kan altepetl de Asón, otlejkok towah itech barko iwa sansikah otiajkeh para Mitilene. ¹⁵ Otikiskeh de ompa, iwa ikuak owalmostlatik otipanokeh inakastla n isla de Quío, iwa itech ok se tonati otikalakitoh kan altepetl de Samos, kan onkalakiah n barkojteh. Otimosewijkeh itech altepetl non itoka Trogilio, iwa ikuak owalmostlatik otikalakitoh Mileto. ¹⁶ Ijkó otikchijkeh, porke Pablo amo okinek panos ik Éfeso, para amo mokawas miakeh tonatijmeh kan tlalmeh de Asia, porke ye okinekia san nima onajskia Jerusalén, para ompa yetos itech tonati de pentecostés.

* 19:35 se meteorito

Pablo kintlapowia n tlayakankeh kan moololoah ompa Éfeso

¹⁷ Ijkuak Pablo yokatka kan altepetl de Mileto, olatítlanki makinnotsatih n tokniwah de Éfeso non tlayakantokeh non kineltokah Jesús. ¹⁸ Ijkuak ovalajkeh okinmili:

—Nomejwah kuali nonkimatokeh kenijki nimoyekwika nomowah desde neká tonati ijkuak onikalakiko nika Asia. ¹⁹ Ne miak yonitekitik inawak Toteko Jesús, iwa itech nochí oniktlakitak. Miak welta onichokak iwa miak onitlaijyowi por tlan onechtoktijkeh n judíojteh. ²⁰ Amayik onimosotla nomechmatiltis tlan nomechpalewis para nonyeknemiskeh. Iwa teixpa onomechmachti iwa itech nomocha. ²¹ Ne nochteh onikinnonotski, n judíojteh iwa non amo judíojteh, nochteh onikinmili ayakmó makichiwakah tlan amo kuali iwa manemikah kemi Dios kimonekiltia iwa makineltokakah Toteko Cristo Jesús. ²² Iwa axa n Espíritu nechwika Jerusalén, iwa mach nikmati tlan nechchia ompa. ²³ Sanwel nikmatok itech nochteh n altepemeh kan ik nio, n Espíritu Santo nechilia sa nechchixtok telpiloya kan nechtsakuaskeh iwa miak tlaijyowílistli nechchiah. ²⁴ Pero amitla ok se nechtekipachoa, nion manimikki. Ne sanwel niknekiskia nikchiwas nochí tlan Toteko Cristo Jesús onechnawati manikchiwa. Kijtosneki manitetlapowi de n kualitlájtoli non techmatiltia kenijki Dios satlawel techtlasojta.

²⁵ 'Iwa axa kuali nikmatok nion seme de nomejwah, akimeh onomechmatilti tlan Dios kimonekiltia, oksepa nechitas. ²⁶ Yika nikneki axa nomechilis nik amo notlajtlakol tla aka amo momakixtis. ²⁷ Porke ne onomechmatilti nochí tlan Dios kimonekiltia, iwa amitla onomechtlaatili. ²⁸ Yika, ximotlachilikah nomejwah iwa xikinyekwikakah nomokniwah non kineltokah Cristo Jesús, porke n Espíritu Santo onomechtlali kemi nontlajpixkeh para xikinyakanakah akimeh kineltokah n Toteko Jesús, non Ye okinko ika iesso. ²⁹ Porke kuali nikmatok ijkuak ne nias, witseh sikimeh tlakah xolópijteh kintlajtlamiskeh n tokniwah porke yejwah mokopah kemi kokoyomeh tekuanimeh non kintlajtlamiah n ichkameh. ³⁰ Iwa itech nomejwah kisaskeh akimeh kitemachitiskeh tlan amo milák, para kinyakanaskeh akimeh kineltoka Dios. ³¹ Ijkó kiné, ximotlachilikah, iwa kuali xikilnamikakah itech eyi xiwitl onomechnonotsaya, tlajka iwa n yuak, iwa maya onichokaya ayik onimosotla.

³² 'Axa nokniwah, nomechkawa imak Dios iwa imak itlatiochiwalthajtol non kipia weletílistli para nomechyolchikawas iwa nomechmakas se lojar iwa akimeh omotemakakeh inawak. ³³ Amaka onikelewili itomi nion itlake, ³⁴ yej kuali nonkimatokeh onitekitik ika ninleh nomawah para nikmotlanilis tlan ika nipanotos, ne iwa akimeh okatkah nowa. ³⁵ Nochipa onomechititi kenijki moneki nontekitiskeh para nonkimpalewiskeh akimeh amitla kipiah, iwa xikilnamiktakah tlan okijto n Toteko Jesús: "Okachi makipia pakílistli n tlakatl non tlapalewia ika tlan kipia, iwa amo akin kipalewiah."

³⁶ Ijkuak ijkó okijto n Pablo, omotlankuáketski iwa omotrotsajtsili iwan nochteh tokniwah de Éfeso. ³⁷ Nochteh ochokakeh, okinawajtekeh iwa okitennamikeh n Pablo.

³⁸ Iwa saikpanoa omoyolkokojkeh porke n Pablo okinmili ayakmó kitaskiah. Satepa okimakawatoh kan barko.

21

Pablo yawi Jerusalén

¹ Ijkuak otikinkajtejkeh, ottitlejkokeh itech se barko iwa milaktik otiajkeh kan isla de Cos. Ijkuak ovalmostlatik otiajkeh kan isla de Rodas, iwa de ompa otikalakitoh kan altepetl de Pátara. ² Ompa itech non altepetl otikajiskeh se barko non oyaya para Fenicia, ottitlejkokeh itech barko iwa otiajkeh. ³ Ijkuak onejnentoka n barko, otiktakeh n isla de Chipre non otikpanawijkeh ik toopochma iwa otikonmilajkeh para Siria asta otikalakitoh kan altepetl de Tiro ken ompa kitlatemwiliskiah itlamamal n barko. ⁴ Ompa otikinmajsikeh sikimeh tokniwah, iwa otimokajkeh inwah chikome tonati. Yejwah okiljkeh n Pablo amo mawia Jerusalén, ijkó kemi okinnejmachti n Espíritu.

⁵ Pero ijkuak ovalchikometik otikiskeh de ompa. Nochteh tokniwah non kineltokah

Cristo Jesús iwa insiwawah iwa impilwah, otechmakawatoh itempa n weyi atl, iwa ompa otimotlankuaketskeh iwa otimotrotsajtsiljkeh.⁶ Ijkuakó otimonanawajtekeh, iwa otimomakajkeh iwa ottitlejkokeh itech barko iwa yejwah omokopkeh incha.

⁷ Satepa otiajkeh okachi tlayakapa iwa otikalakitoh kan altepetl de Tolemaida. Ompa otikintlapalokeh n tokniwah iwa otimokajkeh inwah se tonati. ⁸ Ijkuak owalmostlatik, otikiskeh de ompa iwa otikalakitoh kan altepetl de Cesarea. De ompa otiajkeh icha n Felipe, non otetlapowiaya n kualitlátoli de Dios. Ye se de n chikome non okintlamayah n tokniwah de Jerusalén. Ompa otimokajkeh icha. ⁹ Felipe okimpiaya nawi ichpochwah non ayamó omonamiktiyah. Yejwah okitematiltiayah tlan okiseliayah de Dios. ¹⁰ Yotikatkah kech tonati ompa ijkuak oajsiko de Judea se profeta non itoka Ágabo, ¹¹ non owala otechtlapaloko. Ye okontílanki n kuítlaxtli non ika omotlajkoilpiaya n Pablo, okimilpi ikxiwah iwa imawah iwa okijo:

—N Espíritu Santo kijtoa, nepa kan altepetl de Jerusalén, n judíojteh ijkí kijilpiskeh n tekowa de nin kuítlaxtli iwa kitemaktiskeh inmak n tlakah non amo judíojteh.

¹² Ijkuak otikkakeh tlan okijo n Ágabo, tejwah iwa non de Cesarea otiktlatlautijkeh n Pablo amo mawia Jerusalén. ¹³ Pero Pablo otechnankili:

—¿Tleka nonchokah iwa nonkichiwah manimoyolkoko? Ne amo nimawi tla nechijilpiskeh noso tla nechmiktiskeh ompa Jerusalén por niktematiltijtinemi Itoka n Toteko Jesús.

¹⁴ Iwa kemi amo okinek techkakis, otikkajkeh iwa sa otikijtojkeh:

—Mamochiwa tlan Dios kimonekiltis.

¹⁵ Ijkuak yopanokeh kechmeh tonatijmeh, otimotlatlalijkeh iwa otiajkeh Jerusalén.

¹⁶ Iwa oyajkeh towah sikimeh tokniwah de Cesarea, yejwah okwalikayah se tlakatl de Chipre non itoka Nasón, nin tlakatl yowejka okineltokaya n Cristo Jesús iwa ye techkalotiskia icha.

Pablo kontlapaloa n Jacobo

¹⁷ Ijkuak otikalakitoh Jerusalén, n tokniwah non kineltokah Cristo Jesús otechselijkeh ika pakílistli. ¹⁸ Ijkuak owalmostlatik, otiajkeh iwan Pablo otiktlapalotoh n Jacobo, noiva ompa okatkah nochteh n tokniwah tetajmeh non tlayakantokeh kan omooololoayah. ¹⁹ Pablo okintlapalo iwa okintlapowi nochí tlan Dios okichi innawak non amo judíojteh ika iteki non Totajtsi Dios okimaktili. ²⁰ Ijkuak okikakeh nochí tlan Pablo okintlapowi, okiweyijkachijkeh Dios. Iwa okilijkeh:

—Toknitsi Pablo, yotikitak onkateh miakteh judíojteh non yotlaneltokakeh, pero nochteh yejwah kijtoah moneki matiktlakitakah itlanawatil Moisés. ²¹ Iwa yokimilijkeh tejwatsi tikanmachtia nochteh n judíojteh non chantitokeh itech oksikimeh altepe-meh, iwa ayakmó makitlakitakah tlan Moisés otlanawati. Noiwa kijtoah te tikanmilia amo makinsirkunsidarokah impilwah nion makichiwakah tlan otechtitijkeh totatawah. ²² ¿Tlan tikchiwaskeh? Porke n tlakah moololoskeh ijkuak kimatiskeh otiwala. ²³ Okachi kuali ijkí xikchiwa: Nika kateh towah nawi tlakah akimeh yokitemakakeh intlajtol inawak Dios. ²⁴ Xikinwika mowah iwa ximochipawati inwah inawak Dios iwa xiktlaxtlawa para makinkuaximakah. Ijkó nochteh kimatiskeh mach milák tlan okintlatlapowijkeh, yej kitaskeh tejwatsi noiwa tiktakita itlanawatil Moisés. ²⁵ Pero n tokniwah non kineltokah Cristo Jesús non amo judíojteh, yotikintlajkuilijkeh iwa otikinmilijkeh amo makintekipacho nochí ni, sanwel amo makikuakah nakatl non yokinmanilijkah n dios-meh non kinmachijchiwah, nion estli, nion nakatl de yolkameh non san kintoskapatskah. Iwa amaka non yomonamikti mamomekatijtinemi.

Kikitsiah n Pablo kan Weyi Tiopa

²⁶ Ijkuakó Pablo okinwík nonteh nawi tlakah, iwa ijkuak owaltláneski sansikah omochipajkeh. Otlanki okalak kan Weyi Tiopa okimilito tlan tonati tlamic mochipawaskeh, iwa kemanía kinmiktiskeh n yolkameh para kinmaniliskeh Dios.

²⁷ Pero ikuak yokitlamiyah chikome tonati de omochipajtokah, sikimeh judíojteh non ovalajkeh de Asia okitakeh n Pablo kan Weyi Tiopa iwa opé kimpaj soloah n tlakah. Okikitskikeh n Pablo ²⁸ iwa otsajtsikeh:

—¡Tlakah de Israel, techpalewikah! Ye nin tlakatl akin sentetl kitemachtijtinemi matikinmixnamikakah itlanawatilwah Moisés, iwa amo matiktlakitakah toweyi Tiopa. Iwa axa noiva yokinkalakih itech toweyi Tiopa sikimeh griegos, iwa okipochewakoh nin chipawak Tiopa.

²⁹ Ijkó okijtoayah porke ompa Jerusalén, yokitakah n Pablo iwa Trófimo non owalewata de Éfeso; yika okimoliyah Pablo noiva yokikalakijka kan Weyi Tiopa.

³⁰ Nochtek n tlakah omopaj solojkeh, iwa owlmooololojtiwetskeh. Ikuakó okikitskikeh n Pablo, okitlalxotontiajkeh iwa okikixtjkeh de kan Weyi Tiopa, iwa okintsaktiwetskeh ikaltenwah. ³¹ Ya kimiktiskiah n Pablo ikuak n soldado tlayákanki romano okima nochtek n tlakah de Jerusalén opajsolitakah. ³² San nima n soldado tlayákanki okinmoololo isoldadojwah iwa okintlelochti kan omopaj solojtokah. Ikuak n tlakah okitakeh n soldado tlayákanki iwa isoldadojwah, okikajkeh n Pablo iwa ayakmó okiwitekeh. ³³ Ikuak n soldado tlayákanki okalakito, okikitski n Pablo iwa otlanawati makijilpiyah ika ome kadenajteh. San nima n soldado tlayákanki okintlajtlani akin ye iwa tlan okichi. ³⁴ Kemi nochtek otsajtsiah, n soldado tlayákanki amitla okajsikamatia, yika otlanawati makitsakuatih n Pablo. ³⁵ Ikuak okalakitoh kan kitsakuaskiah n Pablo, n soldadojteh sa okikechpano jtiyah porke n tlakah saikpanoa okualantokah. ³⁶ Iwa nochtek owa tsitiwalayah inkuitlapa:

—¡Mamikki!

Pablo motlajtolpalevia inmixpah n tlakah

³⁷ Ikuak ya kikalakiskiah kan kuártel, Pablo okili n soldado tláyakanki:

—¿Weletis nimitsontlapowis?

N soldado tlayákanki okinankili:

—¿Titlajtoa griego?

³⁸ Ikuakó n soldado tlayákanki okili:

—¿Amo te n egipcio non yowejka otikixnamik n weyi tlanawati, iwa otikinwík nawi mil temiktijkeh kan tlatjejtéyinki?

³⁹ Pablo otlanankili:

—¡Mach ne! Ne niwalewatok de Israel, iwa onitlákatkí kan altepetl de Tarso, non altepetl weyi kijtosneki itech tlali de Cilicia. Pero nimitslatlaujtia techonkawili manikintlapowi n tlakah.

⁴⁰ N soldado tlayákanki okikawili matlajto, iwa n Pablo omóketski kan nochtek kitaskiah, iwa ika ima okintlakawaltih n tlakah. Ikuakó nochtek san owlomokajkeh iwa Pablo opé tlajtoa ika hebreo, iwa okinmili:

22

¹ —Nokniyah iwa tetajmeh, xikkakikah tlan ika nimotlajtolpalewis nomonawak.

² Ikuak okikakeh okintlapowiaya ika tlájtoli hebreo, san owlomokajkeh. Iwa n Pablo okinmili:

³ —Ne ni judío. Onitlákatkí kan altepetl de Tarso non kajki kan tlali de Cilicia, pero onimoskalti nika Jerusalén, iwa Gamaliel onechixtlamachi itlanawatilwah totatawah. Nochipa nimochijchikawa niktektilia Dios ika nochti noyolo, ijkó kemi nochtek nomejwah nonkichiwah. ⁴ Ya wejkawitl, ne onikintotojtokaya akimeh okitlakitaya itemachtilis n Toteko Jesús, iwa por notlajtlakol miakeh okinmiktijkeh. Ne onikinkitskaya tlakah iwa siwameh iwa onikintskaya. ⁵ N tiópixki non okachi tlayakantok iwa nochtek n tetajmeh non tlayakantokeh kuali kimatekeh ijkó onikchiwah. Porke yejwah innewiah onechinmakayah amatlajkuífolteh para manikinkitski n tokniyah judíojteh non chanchiwah Damasco. Yika onia onikintemoto n tlakah non kineltokah Cristo Jesús para nikualinwicas nika Jerusalén para makintlaijyowiltikah.

*Pablo kintlapowia kenijki okineltokak Jesús
(Hch. 9:1-19; 26:12-18)*

⁶ Se tonati ikuak oniaya itech ojli, kemi ik tlajko tonati iwa yononkalakia Damasco, se chikawak tlawilnextlistli non ovalaya de ilwikak onechyawalo. ⁷ Ikuakó oniwetsito ixko tlali iwa onikak se tlájtoli non onechiliaya: “Saulo, Saulo, ¿tleka techtotojtoka?” ⁸ Ne onitlanankili: “¿Akin Tejwatsi?” Ye onechnankili: “Ne Jesú de Nazaret akin te tiktotojtoka.” ⁹ Non oyayah nowa okitakeh n tláwili iwa omomojijkeh, pero mach okikakeh n tlájtoli akin onechtlapowiaya. ¹⁰ Ikuakó ne onikili: “¿Tlan nikchiwas, Noteko?” Noteko onechili: “Ximoketsa iwa xio Damasco, ompa mitsiliskeh tlan tikchiwas.” ¹¹ Iwa kemi non tláwili onechixmijmikti, ne ayakmó onitlachiaya, yika n tlakah akimeh nowa oyayah sa onechmatilantajkeh asta otikalakitoh Damasco.

¹² ‘Ompa okatka se tlakatl non itoka Ananías, akin okintlakitaya itlanawatilwah Moisés, iwa nochteh n judíojteh non ochantitokah Damasco okitlakitayah. ¹³ Ye owala nonawak iwa onechili: “Nokni Saulo, oksepa xitlachia.” Ikuakó oniwaltláchixki, iwa onikitak Ananías. ¹⁴ Ikuakó onechili: “Idios totatawah omitspéjpenki para xikixmati tlan Ye kimonekiltia, para xikita n Yolmilajka* iwa xikkakili itlajtol. ¹⁵ Te tekteixmatiltis innawak nochteh n tlaltikpaktlakah iwa tixinmatiltis nochti tlan otikitak iwa otikkak. ¹⁶ Iwa axa, ¿tlan tikchia? Ximoketsa, ximokuateki iwa ximochipawa de motlajtlakolwah, iwa xiktenewa itoka.”

Pablo kijtoa kenomi Dios okitílanki makinmatiltiti n kualitlátoli non amo judíojteh

¹⁷ Ikuak onimókopki Jerusalén, onia onimotiotsajtsilito kan Weyi Tiopa, iwa kemi yaskia nitejtemiktok, ¹⁸ onikitak iwa onechiliaya: “Xikistiwetsi de Jerusalén, porke amo kiseliskeh motlajtol ikuak techteixmatiltis.” ¹⁹ Ikuakó ne onikili: “Noteko, yejwah kuali kimatekeh ne onikajkalaktinemia itech nochteh n sinagogas iwa onikinwitekia iwa onikintsakuamigya nochteh akimeh omitsneltokayah. ²⁰ Iwa ikuak okimiktijkeh n Esteban akin omitsteixmatiltiaya, ne ompa onikatka, oniktekawili makimiktikah iwa asta onikinmokuitlawili intlakenwah akimeh okimiktijtokah.” ²¹ Pero Jesú onechili: “Xio, porke Ne nimitstítlanis wejka, innawak non amo judíojteh.”

Pablo imak n soldado tlayákanki

²² Asta ompa okikakilijkeh itlajtol, otlanki opé tsajtsih:

—¡Xikmiktikah non tlakat! ¡Ayakmó mayolito!

²³ Satlawel otsajtsiah iwa tlakpak okintlamotlayah intlakenwah iwa miak tlali okitlamotlayah tlakpak. ²⁴ N soldado tlayákanki otlanawati makikalakikah n Pablo kan kuártel. Otlanki otlanawati makiwitekikah para makijto tleka n tlakah satlawel okualaniah iwa fiero okitsajtsiah. ²⁵ Pero ikuak kuali yokijilpijkeh iwa yoyayah kiwitekitiweh, Pablo okili n kapita non ompa okatka:

—¿Weletis nonkiwitekiskeh se tlakatl romano non ayamó nonkimati kox milák tlajtlakole noso amó?

²⁶ Ikuak n soldado tlayákanki okikak tlan Pablo okijito, totokatijkak okimatiltito n soldado tlanawati iwa okili:

—Kuali xikita tlan tikchiwas, nin tlakatl romano.

²⁷ Ikuakó n soldado tlayákanki owalmikuani inawak Pablo iwa okitlajtlani:

—¿Milák te tiromano?

Pablo okinankili:

—Milák.

²⁸ Ikuakó n soldadojtlayákanki okili:

—Ne oniktlaxtla miak tomi para onimochi ni romano.

Iwa n Pablo okinankili:

—Ne onitlákatki kan altepetl de Tarso, yika ni romano.

²⁹ Yika, akimeh kiwitekiskiah n Pablo okikajkeh; iwa ikuak n soldadojtlayákanki, okima Pablo noienda romano, omauki porke yotlanawatijka makijilpijkeh.

* 22:14 Yolmilajka ye n Cristo Jesú

Pablo kiwakah kan Sanedrín

³⁰ Ijkuak owalmostlatik, n soldado tlayákanki okinekia kimatis tleka n judíojeti okiteiliayah n Pablo. Otlanawati makintojtomilikah n kadenajteh iwa mamoololokah n tiopixkeh non tlayakantokeh iwa nochteh non de Sanedrín[†]. Ijkuakó okikixti n Pablo iwa okiwikak innawak tlayakankeh judíojeteh.

23

Pablo inawak tekiwajkeh de Sanedrín

¹ Pablo okintlajtlatak non de Sanedrín iwa okinmili:

—Nokniyah, asta axa ne kuali ninemi ika notlamachilis chipawak inawak Dios.

² Ijkuakó Ananías n tiópixki non okachi otlayakantoka, okinnawati non okatkah inakastla n Pablo, makikamatlatsinikah. ³ Pero Pablo okinankili:

—Íxkoptli, te noiva Dios mitskamatlatsinis! Tla te nonka tiewatok para techistlakos kemi kijtoa n tlanawátili, ¿tleka kiné tikixpanawia n tlanawátili iwa titlanawatia manechkamatlatsinikah?

⁴ Non ompa okatkah okilijkeh n Pablo:

—¿Timixewia ijkó tiknanankilia n weyi tiópixki de Dios?

⁵ Pablo okijo:

—Nokniyah, ne mach onikmatia kox ye n tiópixki non okachi otlayakantoka; porke itech itlajkuilol Dios kijtoa: “Ayik fiero tiktenewas se tekiwa itech moaltepeu.”

⁶ Ijkuakó Pablo okajsikama sikimeh tekiwajkeh okatkah saduseos iwa oksikimeh fariseos, yika chikaktik okijo:

—Nokniyah, ne nifariseo, iwa miakeh nochantlakawah noiva fariseos; iwa ken nikneltoka non yomikkeh moyolitiskeh, nomejwah nonnechtlajtlakoltiah.

⁷ Ijkuak ijkó okijo n Pablo, n fariseos iwa n saduseos opé motlatlajtolwiah, iwa omoxexelojkeh. ⁸ Porke n saduseos kijtoah non yomikkeh mach moyolitiah. Noiwa kijtoa mach onkateh ángelteh nion espíritus. Pero n fariseos kijtoah nochí ni onka. ⁹ Nochteh otsajtsiah; iwa sikimeh tlamachtijkeh de itlanawatil Moisés, non okatkah iwa n fariseos, owalmokeketskeh iwa okijtojkeh:

—Nin tlakatl amitla fiero okichi. Chamo milák se ángel noso se espíritu okitlapowi. Tejwah amo para tikixnamikiskeh Dios.

¹⁰ Inkualanilis n fariseos iwa n saduseos omókopki se weyi momakalo. N soldado tlayákanki opé majmawi makikitsikah n Pablo iwa fiero makikojkokah. Yika okínnotski sikimeh isoldadojwah para makitekixtilikah iwa oksepa makiwikakah kan kuártel.

¹¹ Ipan ok se tonati ijkuak otleyuak, n Toteko Jesús okimonextili n Pablo iwa okili:

—Pablo, ximoyolchikawa, porke ijkó kemi otechteixmatilti nika Jerusalén, ijkó techteixmatiltis Roma.

Motlatlalwiah kichtakamiktiskeh n Pablo

¹² Ipan ok se tonati, sikimeh judíojeteh omotlatlalwijkeh kimiktiskeh n Pablo, iwa okisentlalijkeh amo tlakuaskeh nion atliskeh asta makimiktikah. ¹³ Iwa nonteh tlakah non okisentlalijkeh ijkó kichiwaskeh, okatkah okachi de ome póali (40) tlakah. ¹⁴ Yejwah oyajkeh okinmitatoh n tiopixkeh non tlayakantokeh iwa n tetajmeh non tlayakantokeh, iwa okinmilijkeh:

—Tejwah yotksentlalijkeh amo titlakuaskeh nion tiatliskeh asta matikmiktikah n Pablo. Iwa tla amó, okachi kuali itla matimochiwakah. ¹⁵ Axa nomejwah, iwa n oksikimeh tekiwajkeh de n Sanedrín, xiktlajtlanilikah n soldado tlayákanki, mostla manomechwalikili n Pablo. Xiklikah nonkinekiah okachi nonkitlatlajtlaniskeh, iwa tejwah sa tikchixtoskeh itech ojtli tkmiktiskeh keman ayamó onkalaki.

¹⁶ Pero itelpoch iwelti n Pablo okima, iwa oyá kan kuártel okimatiltito n Pablo.

¹⁷ Ijkuakó n Pablo okínnotski se soldado tlanawati iwa okili:

[†] 22:30 Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kitlakitah itlanawatil Moisés.

—Xikwika nin télpochtli inawak n soldado tlanawati, porke moneki motlapowis íwa.

¹⁸ N soldado tlayákanki okiwík n télpochtli inawak n soldado tlayákanki, iwa okili:

—Pablo non tsaktok, onéchnotski iwa onechili manimitsalikili nin télpochtli, porke moneki motlapowis mowa.

¹⁹ N soldado okimatílanki n télpochtli, iwa okitlakaltecho iwa okitlajtlani:

—¿Tlan tikneki techilis?

²⁰ N télpochtli okili:

—N tlayakankeh judíos yomotlatlalwijkeh mitstlajtlaniliskeh mostla xikintitlanili n Pablo innawak non de Sanedrín, yejwah mochiwaskeh kemi kinekih itla kiyektlajtlaniskeh. ²¹ Pero amo xikinneltoka; porke okachi de ome póali (40) tlakah ichtaka kichiatiweh, iwa okisentlalijkeh amo tlakuaskeh nion atliskeh asta makimiktakah n Pablo, iwa axa sa kichixtokeh tlan tikjitos.

²² Ijkuakó n soldado tlayákanki, okimaaka n télpochtli iwa okinawati amaka makili tlan okimatilti.

Pablo inawak n gobernador Félix

²³ N soldado tlayákanki okínnotski ome isoldado tlanawatijkeh iwa okinnawati makintlatlalikah ome siento soldadojteh non san nejnemih, eyi póali iwa n májt-lakteh soldadojteh ika inkabayojwah, iwa ome siento non kinwikah tepesteh non yakawitstikeh, iwa okinnawati maonewakah Cesarea las nueve de yuak. ²⁴ Noiwa otlanawati makipecchtekah se kabayo para ipa matlejko n Pablo, iwa okinnawati makiyekmokuitlawikah itech ojtli para kiteixpantiskeh kan n weyi tlanawati Félix. ²⁵ N soldado tlayákanki okijkuilili n gobernador Félix se amatlajkuíloli:

²⁶ “Ne Claudio Lisias itech nin amatlajkuíloli nimitsontlajpaloa tejwatsi gobernador Félix: ²⁷ N judíojteh okikitskijkeh nin tlakatl iwa ya kimiktiskiah, pero ijkuak ne onikma ye romano, onikinwík nosoldadojwah iwa oniktekixtilito. ²⁸ Iwa kemi oniknekia nikmatis tleka okiteiliayah, onikkuík innawak n tekiwajkeh de Sanedrín, ²⁹ iwa ijkuak onikma okiteiliayah san por intlanawatil, ne onikmoli mach para kimiktiskeh, nion para kitsakuaskeh ika noni. ³⁰ Pero ne onikma n judíojteh yomotlatlalwijkeh kimiktiskeh, yika nimitsontlania, iwa akimeh kiteiliah noiwa onikinmili mawiah monawak iwa mamitsilikah tleka kiteiliah. Kuali xiyetia iwa ok se tonati timotlajpaloskeh.”

³¹ N soldadojteh okichijkeh ijkó kemi okinnawatijkeh iwa non yúali okiwakeh n Pablo kan weyi kuártel non itoka Antípatris. ³² Ijkuak owalmostlatik, n soldadojteh non san onejnentiayah owalmokopatoh para Jerusalén, iwa non oyayah ipan kabayo okiwakeh n Pablo. ³³ Ijkuak okalakitoh kan altepetl de Cesarea, okimakakeh n amatlajkuíloli n gobernador Félix noiwa okitemaktijkeh n Pablo. ³⁴ Ijkuak n gobernador okiamapo n amatlajkuíloli, okitlajtlani n Pablo kan otlákatki, iwa ijkuak okima Pablo otlákatki Cilicia, ³⁵ okili:

—Nimitskakis ijkuak witseh akimeh mitsteiliah.

Otlanki otlanawati makiyekmokuitlawikah itech ipalasio n Herodes.

24

Pablo motlajtolpalewia ixpa n Félix

¹ Mákuli tonati satepa, n weyi tiópixki Ananías, okalakito kan altepetl de Cesarea iwa n sikimeh tetajmeh non tlayakantokeh iwa se tlajtolpalewi non itoka Tértulo. Ninteh omoteixpantitoh inawak n gobernador Félix para kiteiliskeh n Pablo. ² Ijkuak okualikakeh n Pablo, Tértulo opé kiteilia, iwa okili n gobernador Félix:

—Satlawel timotlasojkamatih monawak gobernador, porke kuali tikateh, iwa nochí kuali kajki porke saikpanoa tiixtlamati. ³ Por nochí tlan tejwatsi sentel tikchiwa, tejwah tipakih iwa timotlasojkamatih monawak gobernador Félix. ⁴ Iwa kemi amo tiknekih timitsnaktiskeh, timitsonlatlaujtiah xikoninkaki san kanaj kech tlájtolteh. ⁵ Tejwah kuali tikmatokeh nin tlakatl se weyi tekokolismák, iwa san kan ik nentinemi kinpaj-solojinemi n judíojteh; iwa kinyayakantinemi sikimeh tlakah non kinmiliah nazarenos.

⁶ Iwa okinekia tlajtlakolchiwas kan Weyi Tiopa, ika tejwah otikkitsijkeh iwa otiknekiah titksakuaskeh. ⁷ Pero n soldado tlayákanki Lisias omokalaki iwa otechmakixtili n Pablo.

⁸ Iwa trato okinnawati akimeh okiteiliayah mawikih monawak. Axa tejwatsi monevia weletis tikonyolkuitis iwa tikommatis tleka tikteiliah.

⁹ N judíojteh non ompa okalakikoh, okijtoayah milák tlan okijtojtoka n Tértulo.

¹⁰ Ijkuakó n gobernador okimanotski n Pablo para matlajto, iwa Pablo okijo:

—Ika miak pakílistli nimotlajtolpalewis monawak, porke nikmatok tejwatsi yowejka titekiwajtitok itech nin weyi tlali. ¹¹ Tejwatsi monevia weletis tikmatis kox milák tlan nimitsonilijtok noso amó, sakin kipia májtlaktli iwa ome tonati oniajsiko nika Jerusalén onikweyijkachiwako Dios. ¹² Mach onechajsikeh nimokualanijtok nion onechajsikeh nikinxexelojtok n tlakah, nion onikimpajsolojtinemia n tlakah ijtk n Weyi Tiopa, noso kan sinagogas, noso oksika. ¹³ Ijkó kiné, ninteh tlakah mach weletis mitsnextiliskeh tlan ika nechteiliah. ¹⁴ Axa, monawak nikmokuitia ne nikmopantia Dios, Idios notatawah ijkó kemi nechnextilia n yankuik ojtli, non yejwah kitokayotiah sekta, porke nikneltoka nochi tlan ijkuititok itech itlanawatil iwa itech intlajkuilol n profetas. ¹⁵ Ne nikchia inawak Dios tlan yejwah noiva kichiah, nochteh non yomikkeh moyolitiskeh, akimeh otlájt-lakolchijkeh iwa akimeh amó. ¹⁶ Yika, nochipa nikchiwa tlan kuali, para notlamachilis amo manechtlajtlakolti inawak Dios nion innawak n tlakah.

¹⁷ 'Miak xiwitl oniajtoka wejka itech oksikimeh tlalmeh, iwa ijkuak onimókopki kan nopaís, onia onikimpalewito akimeh amitla kipiah iwa oniktemakato notlatliokolil.

¹⁸ Ne ijkó onikchijtoka ijtk n Weyi Tiopa ijkuak sikimeh judíojteh non ovalayah de Asia onechajsitoh ompa. Ijkuakó ne yonimochipajka kemi kijtoa n tlanawátili, iwa mach miakeh ompa okatkah nion aka omopajsoloya. ¹⁹ Tla itla amokuali onikchi iwa kinekih nechteiliskeh, mawikih akimeh ompa okatkah. ²⁰ Iwa tla amó, ninteh akimeh nika kateh makijtakah tlan amokuali onechajxilijkeh ijkuak onimotlajtolpalewijtoka kan Sanedrín.* ²¹ Noso chamo nechteilitokeh porke ijkuak ompa onikatka, inmixpa chikaktik onikijto: "Nomejwah axa nonnechtajtlakoltiah porke nikneltoka moyolitiskeh non yomikkeh."

²² Ijkuak Félix okikak tlan Pablo okijo, iwa ye kuali okimatia tlan kijtosneki n ojtli de Cristo, okika nochi para ok se tonati iwa okinmili:

—Ijkuak wits n soldado tlayákanki Lisias nikyektlajtlanis tleka nonkiteiliah, iwa ijkuakó nikitas tlan nikchiwas iwan Pablo.

²³ Ijkuakó Félix okinawati n soldado tlanawati ok matsakto n Pablo, pero makinkawili non iwa omowikaya makitlapalokih iwa makimakakih tlan kipolos.

²⁴ Kech tonati satepa, oksepa owala n gobernador Félix iwa Drusila isiwa, ye israelita. Félix otlanawati makinotsatih n Pablo para makitlapowiki de n kualitlátoli de Cristo Jesús. ²⁵ Pablo opé kitlapowia keniji moneki mayeknemi, iwa keniji se moyeknawatis. Noiwa okili Dios se tonati techtlaxtlawaltis nochi tlan otikchijkeh, ika noni Félix omomojti iwa okili:

—San ika ye. Ijkuak nimajxilis oksepa nitlatitlanis mamitsnotsatih.

²⁶ N gobernador Félix tekil otlatitlania makinotsatih n Pablo para motlapowis íwa, porke okinekia makimaka itla tomi para kikajkawas. ²⁷ Ome xiwitl ijkó okichijtoka n gobernador Félix asta ijkuak omopatlak iwa okalak n Porcio Festo. Iwa kemi Félix okinekia kuali mokawas iwan judíojteh, okika n Pablo matsakto.

Pablo ixpa n gobernador Festo

¹ Festo owala okiseliko iteki de gobernador, iwa eyi tonati satepa okiski de Cesarea iwa oyá Jerusalén. ² Ompa n tiopixkeh non tlayakantokeh iwa n tlayakankeh judíojteh

* ^{24:20} Sanedrín: nin grupo kimajmanah kemi 50 tetajmeh non tlaixkomakah ijkuak kinteiliah akimeh amo kuali kitlakitah intlanawatil.

oyajkeh inawak n gobernador Festo okiteilitoh n Pablo. ³ Iwa okitlatlautijkeh matlanawati makualikakah n Pablo ompa Jerusalén. Ijkí okilijkeh porke omotlatlalwijkeh kimonepachwiskeh n Pablo itech ojtli para kimiktiskeh. ⁴ Pero Festo okinmili Pablo otsaktoka Cesarea, iwa kech tonati satepa ye yaskia ompa. ⁵ Iwa okinmili:

—Yika, akimeh nika nontekiwajkeh xiwiah nowa Cesarea, iwa tla non tlakatl okichi itla amokuali, ompa weletis nonkiteiliskeh.

⁶ N gobernador Festo okatka kan altepetl de Jerusalén san kemi chikweyi noso májt-laktli tonati, iwa omókopki kan altepetl de Cesarea. Ijkuak owalmostlatik omoyayanti kan jusgado, iwa otlanawati makualikilikah n Pablo. ⁷ Ijkuak Pablo okalakito ixpa n gobernador, omopachojkeh n judíojteh non ovalajkeh de Jerusalén. Opé kiteiliah san de miak, pero mach itla oweletkeh okinextilijkeh. ⁸ Ijkuakó Pablo, opé motlajtolpalewia ika nin tlájtoli:

—Ne mach onikchi itla tlajtlákoli, nion itech intlanawatilwah n judíojteh nion ijtki n Weyi Tiopa. Nion onikixpanawi n rey César.

⁹ Pero kemi n gobernador Festo okinekia mokawas kuali iwan judíojteh, okitlajtlani n Pablo:

—¿Tikneki tias Jerusalén para ompa nimitstlatsintokis?

¹⁰ Pablo otlanankili:

—Ya nika ixpa n César kan tlaixkomaka, kan moneki manechtlatsintokikah ika tlan nechteiliah. Tejwatsi kuali tikmatok, amo onikchi itla amokuali innawak n judíojteh. ¹¹ Porke tla onikchi itla amokuali iwa moneki manechmiktikah, jmanechmiktikah! Pero tla san nechtlamamaltijtokeh iwa amo milák niktewikilia, amaka weletis nechtemakas inmak n tlayakankeh judíojteh. Ne nikneki manechwikakah inawak n weyi tlanawati César para ye manechtlatsintoki.

¹² Satepa ijkuak n gobernador Festo yokintlajtolti non oksikimeh itekiwajkawah, okili n Pablo:

—Te otikmotlajtlanili matimitswikakah inawak n César. Tias inawak.

Pablo ixpa n rey Agripa Segundo iwa n Berenice

¹³ Kech tonati satepa, n rey Agripa Segundo* iwa n Berenice† oyajkeh Cesarea okitlajpalotoh n gobernador Festo. ¹⁴ Iwa kemi ompa omokajkeh miakeh tonatijmeh, Festo okitlapowi n rey Agripa tleka otsaktoka n Pablo, iwa okili:

—Nika kajki se tlakatl akin Félix okitsaktewak. ¹⁵ Iwa ijkuak onikatka Jerusalén, n tiopixkeh non tlayakantokeh iwa n tetajmeh non tlayakantokeh kan Weyi Tiopa okiteilikoh nonawak, iwa onechtlajtlanilijkeh maniktlajtlakolti. ¹⁶ Ne onikinnankili n tlanawatijkeh romanos mach kitekawiliah aka makimiktikah tla ayamó achto motlajtolpalewia innawak akimeh kiteiliah. ¹⁷ Yika, ijkuak yejwah ovalajkeh nika, san nima ipan ok se tonati onimoyayanti kan nitlaixkomaka iwa onitlanawati makualikakah non tlakatl. ¹⁸ Pero akimeh okiteilikoh n Pablo, mach itla okijtokeh ika tlan ne onikyejyekoliaya. ¹⁹ Sanwel okiteiliayah de intlamachtilis, iwa de se tlakatl non itoka Jesús, Akin yomikki iwa Pablo kijtoa yolitok. ²⁰ Iwa kemi ne amo onikmatia tlan nikchiwas, oniktlajtlani n Pablo kox okinekia yas Jerusalén para ompa makitlatsintokikah. ²¹ Pero kemi ye okimotlajtlanili makitlatsintoki n César Augusto, onitlanawati matsakto asta ijkuak weletis niktitlanis inawak n César.

²² Ijkuakó Agripa okili n Festo:

—Ne noiya niknekiskia nikkakis non tlakatl.

Festo okinankili:

—Niman mostla weletis tikkakis.

²³ Ijkuak owalmostlatik, Agripa Segundo iwa Berenice okalakikoh kan kiyolwitiskiah n Pablo, okalakeh tlakentitiwitseh ika kuájkuali tlakemtl kemi motlakentiah n wejweyi tlanawatijkeh itech nin tlaltíkpaktli. Noiya ovalajkeh n soldado tlayakankeh iwa n

* 25:13 Marcos Julio Agripa Segundo: okatka tekone de Herodes Agripa Primero. † 25:13 Berenice: iwelti n Herodes Agripa Primero iwa Herodes Felipe Primero.

tekiwajkeh de non altepetl. N gobernador Festo otlanawati makualikakah n Pablo.
²⁴ Ijkuakó n gobernador Festo okijo:

—Rey Agripa, iwa nochteh akimeh nika nonkateh, nika kajki n tlakatl akin nomejwah nonkiteiliah. Iwa nika Cesarea iwa Jerusalén, miakeh tlayakankeh judíojteh kiteiliah nonawak, iwa nechtajtlaniliah manikmiki. ²⁵ Pero ne mach itla weyi tlajtlácoli onikajsik kemi para se makimikti, iwa kemi ye inewia okimotlajtlanili makitlatsintoki n César, yika onikmoli niktitlanis inawak. ²⁶ Iwa kemi amo nikaksi itla tlan ika weletis niktlajkuililis n César, yika nomechalikilia nin tlakatl, iwa okachi monawak tejwatsi rey Agripa, para tejwatsi xiktlatsintoki iwa ijkó manikpia itla tlan ika niktlajkuililis n César. ²⁷ Porke ne nikita amo kuali ka maniktitlani se non tsaktok iwa amo manikteili tleka kiteiliah.

26

Pablo motlajtolpalewia inawak n rey Agripa

¹ Ijkuakó n rey Agripa okili n Pablo:

—Weletis timotlajtolpalewis.

Ijkuakó Pablo okajkok ima iwa ijkí opé tlajtoa:

² —Niyolpaki miak porke weletis ntlajtos monawak rey Agripa, iwa nimotlajtolpalewis de nochí tlan nechteiliah n tlayakankeh judíojteh. ³ Iwa okachi, porke tejwatsi kuali tikmatok nochí tlan tejwah akimeh tjudíojteh ya wejkawitl tikchijtiwitseh, iwa tikmatok tlan techtoktia matimotlatlajtolwikah. Yika nimitsontlatlaujtia xikonkaki nochí tlan nikijtos.

Pablo kimokuitia teixpa keniji onemia keman ayamó okineltokaya Cristo Jesús

⁴ 'Nochteh n judíojteh kuali kimatekeh keniji oninenki kan altepetl de Tarso iwa kan altepetl de Jerusalén desde ni chokotsi. ⁵ Yejwah yowejka nechixmatih onikatka nifariseo, iwa onikatka seme de akimeh okachi tkmopantiah totlanawatil. ⁶ Iwa axa nika onechalikakeh nechteiliah. Nechteiliah porke nikneltoka Dios kinyolitis akimeh yomikkeh, kemi Ye okisentlali kichiwas ijkua okinkakiti totatawah. ⁷ N tlakah non walewatokeh itech n májtlakteh iwa ome familias de Israel kichiah mamochiwa tlan Dios okinkakiti, yika kiweyijkachiwah iwa tlajka iwa n yuak kimopantiah. Iwa porke ne noiya nikneltoka tlan yejwah kineltokah, yika axa, tejwatsi rey Agripa, n judíojteh nechteiliah.
⁸ Nomejwah nonkineltokah Dios kinyolitia non yomikkeh.

Pablo kimokuitia keniji okintlaijywiltiaya non kineltokah Cristo Jesús

⁹ 'Ya wejkawitl, ne onikmoliaya omonekia manikintlaijywilti akimeh kineltokah Jesúis de Nazaret. ¹⁰ Ijkó onikchi kan altepetl de Jerusalén. Ika intlanekilis n tiopixkeh non tlayakantokeh onikintsak miakeh tlakah non kineltokah Cristo Jesúis. Iwa ijkua okiyeyekoliayah kinmiktiskeh ne onikjito kuali ka. ¹¹ Miak welta ne onikintlaijywiltiaya itech n sinagogas iwa onikintoktiaya makijtokah itla pitsotik de Cristo Jesúis. Satlawel onechkualaniayah, yika wejka onikintemojtinemia itech miakeh altepemeh.

Pablo oksepa kintlapowia keniji okineltokak n Jesúis

(Hch. 9:1-19; 22:6-16)

¹² 'Ika intlanekilis n tiopixkeh non tlayakantokeh iwa n tetajmeh non tlayakantokeh, se tonati oniaya nikintemoti n tlakah non kineltokah Jesúis kan altepetl de Damasco.

¹³ Pero ik tlajko tonati, ijkua oniaya itech ojtli onikitak se tláwili non owalaya de kan ilwikak okachi teixmijmiki ke n tonati. Non tláwili onechyawalo, iwa akimeh oyayah nowa noiya okinyawalo. ¹⁴ Tinochteh otiwewetsitoh ixko tlali, iwa onikak se tlájtoli non onechiliaya ika tlájtoli hebreo: "Saulo, Saulo, ¿tela techtotojtoka? Monewia timoko-jkojtok, kemi ijkua se toro kiteliksa itla yakawitstik iwa san ye inewia mokojko." ¹⁵ Ne oniktlajtlani: "¿Akin tejwatsi Noteko?" Ye onechnankili: "Ne Jesúis, akin te tiktotojtoka."

¹⁶ Pero ximoketsa, porke ne onimitsmonextili para xiyeto notékitki iwa xiktematilti tlan axa yotikitak iwa tlan satepa nimitsnextilijtias. ¹⁷ Ne nimitsmokuitlawis inmak n judíojteh iwa inmak non amo judíojteh, kan axa nimitstitlani ¹⁸ para tikanmixtlajtlapost

iwa ayakmó manemikah kan tlatleyua yej manemikah kan onka tláwili para ayakmó makinmapixto n satanás, yej makitlakitakah Dios; iwa manechneltokakah, iwa ijkó makiselikah tlapojpolwílistli iwa se tlatliokólili inwah akimeh Dios yokinmopejpenili.”

Pablo kichiwa tlan Dios okinawati ikuak okimonextili

¹⁹ Ijkó kiné, tejwatsi rey Agripa, ne oniktlakama tlan onechnawati non tlájtoli non onikak de ilwikak. ²⁰ Aacho onikinmatilti itlajtol Dios akimeh chantitokeh Damasco, otlanki akimeh kateh Jerusalén iwa itech nochin tlali de Judea. Noiwa non amo judíojteh onikintlalwi makinkawakah intlajtlakolwah iwa makichiwakah tlan kuali inawak Dios, para mamota de milajka omoyolpatlakeh. ²¹ Yika, n judíojteh onechkitskijkeh kan Weyi Tiopa iwa okinekah nechmiktiskeh. ²² Pero ken Dios onechpalewi ya nika nitlanti, nikinmatiltjitiwits itlajtol Dios akimeh weyijkatitokeh iwa non tsitsikitikeh. Ayik itla oksé onikinmili tlamochiwaskia, sanwel tlan okijojkeh n profetas iwa Moisés, ²³ Cristo tlaijyowiskia, iwa ikuak mikiskia, Ye aacho moyolitiskia de kan mikemeh, iwa kitematiltiskia itlajtol Dios innawak n judíojteh iwa non amo judíojteh.

Pablo kichijchikawa n rey Agripa Segundo matlaneltoka

²⁴ Ikuak Pablo okimijo ninteh tlájtoltéh non ika omotlajtolpalewiaya, Festo otsajtsik: —¡Yotikuatlapolo, Pablo! Yotikuatlapolo porke saikpanoa otimoixtlamachti.

²⁵ Pero Pablo otlanankili:

—Tejwatsi gobernador Festo, mach nikuatlapolojtok. Tlan nikijtoa kuali kajki iwa milák. ²⁶ Nika kajki n rey Agripa, akin kuali kimiati tlan nikijtojtok, yika nimixewia nitlajtoa ika yolchikawálistli ipxa, ken kuali nikmatok ye ya kimatok tlan nikijtojtok, porke nochin tlan mochijtiwits, amo san moichtakachijtiwits. ²⁷ Rey Agripa, ¿tikneltoka tlan okijojkeh n profetas? Ne kuali nikmatok tikneltoka.

²⁸ N rey Agripa okinankili:

—Sa ika achitsi otikchiwaya manimokopa nicristiano.

²⁹ Pablo okili:

—Tla sa ika achitsi noso ika miak, niktlajtlanilia Dios makichiwa tejwatsi noiwa xikneltoka Cristo Jesús. Pero amo san tejwatsi, yej noiwa nochteh akimeh nika nechkaktokeh, mamoyolkopakah kemi ne. Pero amo maikxiilpitokah ika kadena kemi ne.

³⁰ Ikuak Pablo okimijo ninteh tlájtoltéh, n rey Agripa omóketski iwan Berenice, noiwa Festo iwa nochteh non ompa okatkah, ³¹ iwa inmixkoya omotlapowitoh. Iwa okimoliayah:

—Nin tlakatl amitla fiero okichi kemi para se makimiki, nion amo para tsaktos.

³² Iwa Agripa okili n Festo:

—Nin tlakatl weletiskia tikkajkawaskiah, tla amo kitlajtlaniskia yas inawak César.

Pablo kititlanih Roma

¹ Ikuak okijojkeh techtitlaniskeh Italia, Pablo iwa n oksikimeh tlakah non noiwa oikxilpitayah, okinmaktilijkeh n soldado tlanawati non itoka Julio. Ye okatka kapita de se siento de soldadojteh iaxkawah n César Augusto. ² Ottitlejkokeh itech se barko non ovalaya de kan puerto de Adramitio iwa ya onewaskia Asia. Noiwa okatka towah Aristarco, se tlakatl de Tesalónica non kajki kan tlali de Macedonia. ³ Iwa ikuak owalmostlatik otikalakitoh kan puerto de Sidón; ompa n soldadojtlanawati Julio opé kiyeknotsa n Pablo iwa okikawili makintlajpaloti non iwa omowikaya para makipalewikah. ⁴ Ikuak otikiskeh de kan puerto de Sidón ipan barko, otikonmilajkeh kan ik isla de Chipre, porke n ejekatl otechixnamiktiwalaya. ⁵ Otitlakotontiajkeh itech weyi atl iwa otipanokeh iyakapa n altepetl de Cilicia iwa Panfilia. Satepa otikalakitoh kan altepetl de Mira non kajki kan tlali de Licia.

⁶ Ompa n soldado tlanawati okitak se barko non ovalaya de kan altepetl de Alejandría iwa oyaya para Italia, iwa n ye otechnawati matitlejkokah itech non barko. ⁷ Otipanokeh

miak tonati ipan weyi atl porke yolik onejnemia n barko, ika satlawel otiwejkajkeh iwa ika miak tlaijyowlistli otikalakitoh iyakapa n altepetl de Gnído. Iwa kemi n ejekatl ok otechixnamiktiwalaya, otikyawalojkeh n isla de Creta iwa otipanokeh iyakapa n altepetl non itoka Salmón. ⁸ Semi owi otiajkeh ik nochi tlátentli asta otikalakitoh kan puerto non kiliah Buenos Puertos. Non puerto mach ok wejka okatka de kan altepetl non itoka Lasea.

⁹ Miakeh tonatijmeh yotinejnentokah itech weyi atl. Yokatka temohti para se yas itech weyi atl, ken yoajsitiwalaya n sewaya, iwa ikuak osewaya okinmixnamiktiwalaya n ejekatl chikaktik. Noiwa yopanoka n ilwítl de Yom Kippur* keman mosawah n judíojteh. Yika, Pablo okintlapowi akimeh ompa oyayah, ¹⁰ iwa okinmili:

—Tlakah, nikita mach ok weletis tiaskeh okachi itech weyi atl porke weletis itla timochiwaskeh. Iwa amo san tikpoloskeh n barko iwa itlamamal, yej asta tejwah noiwa weletis timikiskeh.

¹¹ Pero n soldado tlanawati okachi okineltokaya n tekowa de n barko iwa akin okinejnemitiaya, iwa amo okikakia tlan okiliaya n Pablo. ¹² Iwa kemi non puerto amo okatka kuali para se mokawas ompa itech sewaya, miakeh okijtojkeh okachi kuali matikisakah de ompa. Matikyejekokah chamo tonkalakitiweh Fenice, se puerto de Creta non tlachixtok kan ik kalaki tonati iwa ompa timochiaskiah asta mapano n sewaya.

Tlawelchikawak kiawi iwa ejeka itech weyi atl

¹³ Iwa kemi okitakeh opé nejmantsi ejeka ik tlatsintla, okimolijkeh chamo ya weletiskia onewaskiah. Okiskeh de ompa, iwa san ik tlátentli okiyawalojtajkeh n isla de Creta.

¹⁴ Iwa ayamó wejka oyayah ikuak se ejekatl chikaktik kemi se siklón okimomakako n barko. ¹⁵ N ejekatl opé kiwika n barko. Iwa kemi ayakmó otiweletkeh otiknejnemitiayah n barko, otikkawilijkeh makiwika n ejekatl. ¹⁶ Otipanokeh ikuitlapa se isla non itoka Clauda, kan ik ejekatl amo chikawak otlawitekia, iwa ika miak tekitl otiweletkeh otiktlejkoltijkeh n barkajtsi non okitilantiwalaya n barko. ¹⁷ Satepa ikuak yokitlejkoltijkeh n barkajtsi, okitlajkoilpijkeh n weyi barko ika miak mekatl; iwa kemi okimawiliyah maixtsoponiti ijtk xali non kiliah Sirte, okintemowilijkeh ilonajwah iwa sa ijkó okikajkeh makiwika n ejekatl. ¹⁸ Iwa ikuak owalmostlatik, ok oejekatoka chikaktik, okitlamochiliijkeh siki itlamamal n barko ijtk atl; ¹⁹ iwa ikuak obiktlatik, innewiah ika inmawah okintlamotlakeh ijtk weyi atl ilonajwah iwa oksiki tlan okitekitiltiayah itech barko. ²⁰ Miakeh tonatijmeh otlamixtentoka iwa amo otiktakeh nion tonati nion sítlalteh, iwa ika neká chikaktik kiawiejekatl non topa owetsia otikmolijkeh timikiskiah.

²¹ Kemi ya miak tonati amo otitlakuayah, Pablo omóketski tlatlajkotia iwa okijo:

—Tlakah, okachi kuali nonnechkakiskiah iwa amo tikasaskiah de Creta. Ijkó amo titlaijyowiskiah nion nonkipoloskiah itlamamal n barko. ²² Pero amo ximosotlawakah, porke maya tikpoloskeh n barko, nion se de nomejwah mikkis. ²³ Porke nin yúali onechmonextili se iángel Dios, akin niteaxka inawak iwa niktektilia. ²⁴ N ángel onechili: “Amo ximawi Pablo, porke tikpia de timoteixpantiti inawak n César, iwa por te Dios amo kikawas mamikki nion se non kateh mowah itech nin barko.” ²⁵ Yika, ximoyolchikawakah tlakah, porke ne nikneltoka Dios, iwa kuali nikmatok Ye kichiwas nochi tlan iángel onechili. ²⁶ Pero moneki matechtlamotlati n ejekatl inakastla n isla.

N barko omokawato itempa n isla

²⁷ Ikuak opanokeh májtlaktli iwa nawi tonati, non yúali n ejekatl otechwiwikaya itech weyi atl non itoka Adriático. Iwa kemi ik tlajko yúali akimeh okinejnemitiayah n barko, okimachiliayah ya onajsiah kan onka tlali. ²⁸ Ikuakó okitamachijkeh n atl kox ok wejkatla, iwa okipiaya sempóali iwa n káxtoli iwa n se metro (36) tlawejkatla. Okachi tlayakapa oksepa okitamachijkeh iwa okipiaya sempóali iwa n chikome (27) metro tlawejkatla. ²⁹ Ken okimawiliyah kimomakatiweh itla weyi tetl, okinkajkajkeh

* 27:9 Yom Kippur: Nochi xiwitl n judíojteh omosawayah itlajkotia n septiembre para motlapojojpolwiskeh inawak Dios de intlajtlakolwah.

nawi wejweyi ganchojteh de tépostli ik ikuitlapa n barko para makitsekakah, iwa sa okichixtokah matlanestiwetsi. ³⁰ Pero akimeh okinejnemitiayah n barko okinekiah choloskeh, iwa opé kitemowiah n barkajtsi non okitekitiltiayah ikuak oapolakia n barko. Yejwah omochijkeh yawih kinkajkawatiweh ijtk n weyi atl n téposteh ik iyakapa n barko para kitsekoskeh. ³¹ Ikuakó Pablo okili n soldado tlanawati iwa isoldadojwah:

—Tla ninteh tlakah amo mokawah itech barko, nomejwah noiva nonmikiskeh.

³² Ikuakó n soldadojteh okintekeh n mekameh non ika oilpitoka n barkajtsi iwa okikajkeh makiwika n atl.

³³ Ikuak yotlatlanestiwalaya, Pablo okinyolchikawaya nochteh matlakuakah, iwa okinmili:

—Yokaxtoltik iwa nomejwah amo nonkochtikateh nion itla nonkikuajtikateh.

³⁴ Nomechtlatlaujtia xitlakuakah para nonkipiaskeh chikawálistli, porke amaka de nomejwah kipolos nion se itsonkal.

³⁵ Ikuak ijkí okijto n Pablo, okónanki se paj, omotlasojkama inawak Dios inmixpa n nochteh, okitlajkotlápangi iwa opé kikua. ³⁶ San nima nochteh omoyolchikajkeh iwa opé tlakuah. ³⁷ Nochteh akimeh otayah itech barko, otikatkah ome siento iwa n eyi pójali iwa n káxtoli iwa n se (276). ³⁸ Iwa ikuak nochteh kuali yoixwikeh, okontlamotlakeh n trigo ijtk atl para maejkautia n barko.

Apolaki n barko

³⁹ Ikuak otláneski, n tlakah non okinejnemitiayah n barko mach omixmoskalijkeh kan okatkah, pero okitakeh se weyi imamayo n weyi atl iwa onkalaktoka itech non tlali, iwa ompa okinekiah kijkuaniskeh n barko, porke omotaya okatka miak xali.

⁴⁰ Okintejekeh n mekameh non ika oilpitokah n téposteh non okitsekojtokah n barko, iwa ompa okinkajkeh ijtk atl. Okinkaxanijkeh n mekameh non ika oilpitoka n timón non kiyakana n barko. Okitlejkoltijkeh ilona n barko para makinejnemiti n ejekatl, satepa n barko opé mijkuania ik tlátentli. ⁴¹ Pero okalakito kan omoixnamikiah ome ameh, iwa n barko oyakatsoponito ijtk xali iwa ompa omoka, iwa opé xixini ik ikuitlapa, porke n amemélolteh omotlawitekiah chikaktik ipan barko. ⁴² Ikuakó n soldadojteh okinekiah kinmiktiskeh n tlakah non konintsakuaskiah, para amo mamotlamotlakah ijtk atl iwa machocholokah. ⁴³ Pero n soldado tlanawati okinekia kipalewis n Pablo, iwa amo okitekawili makinmiktikah, yej okinnawati akimeh oweletiah ajkuiah achto mamokajkawakah ijtk atl para makalakitih tlátentli, ⁴⁴ iwa akimeh amo oweletiah ajkuiah, okinnawati mawiah ipan tablajteh noso ipan kuaujmeh non opostekah de n barko. Iwa ijkó nochteh okalakito tlátentli.

28

Pablo okalakito kan isla non itoka Malta

¹ Ikuak yotimomakixtjkeh tinchteh, otechilijkeh non isla itoka Malta. ² Non ompa ochanchiwayah otechyekselijkeh; okixotlaltijkeh se weyi tlékuili, iwa kemi okiaujtoka iwa osewatoka, otechtalwijkeh matimijkuanikah iyakapa n tlékuili. ³ Ikuakó Pablo okoololoto siki kuawitl non yowaki. Pero ikuak okontlamotlak n kuawitl ijtk tletl, se koatl owalkistewak, iwa omopilo itech ima. ⁴ Ikuak n tlakah non ochantitokah itech non isla okitakeh n koatl pilkatok itech ima n Pablo, okimolijkeh:

—Nin tlakatl se temikti, porke maya omomakixti itech weyi atl, mach kikawiliah mayolito.

⁵ Pero Pablo omomatsejtselo iwa n koatl owetski ijtk tletl, iwa ye amitla omochi.

⁶ Nochteh okichixtokah maposawa ima, noso mawetsi ya miketl. Pero kemi owejka omochixtokah iwa amitla omochiwaya, okipatlakeh intlayejyekolis iwa opé kijtoah Pablo se dios.

⁷ Ik ompa okatkah sikimeh tlalmeh non okatkah iaxkawah se tlakatl non itoka Publio. Ye otlanawatiaya itech non isla, iwa eyi tonati otechkaloti icha iwa otechtakualti.

⁸ Ita n Publio owetoka porke okipiaya totonik iwa tsonkuálaktli. Pablo okitlajpaloto

n kókoxki, omotrotsajtsili iwa ipa okintlali imawah iwa okipajti. ⁹ Satepa ikuak ijkó opanok, akimeh ochantitokah itech non isla iwa omokokoayah, owalayah inawak Pablo iwa ye okimpajtiaya. ¹⁰ Iwa satlawel otechtlatikateh, iwa ikuak ya tioneawskiah itech barko, otechmakakeh nochi tlan tkmonekiltiskiah itech ojtli.

Pablo onkalaki Roma

¹¹ Satepa de otikatkah eyi mestli itech non isla, ottitlejkokeh itech se barko non ompa okichixki mapano n sewaya. Non barko owalewatoka de kan altepetl de Alejandría iwa ik iyakapa okipiaya inmixneskayo de Cástor iwa Pólux. ¹² Satepa otikalakitoh kan altepetl de Siracusa, iwa ompa otimokajkeh eyi tonati, ¹³ otlanki otiajkeh itech se barko ik nochi tlátentli iwa otikalakitoh kan altepetl de Regio. Ikuak owlmostlatik, opé ejeka ik tlatsintlilik, iwa ipan ome tonati otikalakitoh kan altepetl de Puteoli. ¹⁴ Ompa otikinmajsitoh sikimeh tokniyah, yejwah otechtlalwijkeh matimokawakah inwah chikome tonati, satepa otikiskeh iwa otiajkeh Roma. ¹⁵ Ikuak tokniyah non ochantitokah Roma okimatkeh yotiayah para ompa, ovalajkeh otechnamikikoh kan tiánkistli de Apio iwa oksikimeh okachi tlayakapa kan kiliah Tres Tabernas. Iwa ikuak Pablo okimitak, omotlasojkama inawak Dios iwa omoyolchika. ¹⁶ Ikuak otikalakitoh Roma, Pablo okikawilijkeh mamokalotiti ixkoya iwa se soldado okimokuitlawijtoka.

Pablo tetlapowia de Jesús kan altepetl de Roma

¹⁷ Eyi tonati satepa, Pablo olatítlanki makinnotsatih akimeh otlayakantokah innawak judíojteh ompa Roma. Iwa ikuak yomoololojkeh okinmili:

—Nokniyah, maya amo onikinmixnamik n tokniyah judíojteh, nion onikinmixpanawi intlanawatilwah totatawah, maya ijkó, yejwah onechtemaktijkeh inmak n tlakah de Roma kan Jerusalén. ¹⁸ Ikuak onechyolkuitijkeh okinekiah nechkajkawaskeh, porke amitla amokuali okajiskeh kemi para nechmiktiskeh. ¹⁹ Pero n judíojteh amo okitekawilijkeh, yika onikmotlajtlanili maniwiki inawak n rey César para ye manehtlajtlakolti, pero ne amo oniwala onikinteiliko nokniyah. ²⁰ Yika, ne onoméchnotski para nomechitas iwa para nimotlapowis nomowah; porke nikneltoka Cristo Jesús yowala, yika ne axa niikxilpitok ika kadena.

²¹ Ikuakó okilijkeh:

—Tejwah mach tikseltikateh nion se amatlajkułoli non wits de kan altepetl de Judea matlajtojiwki de te, nion aka tokni akin nika wits fiero mitstenewa. ²² Pero tiknekih tikkakiskeh tlan te tikjtoa, porke tikmatih sentetl n tlakah fiero tlajtoah de nin yankuik tlamachtílistli.

²³ Ijkó kiné, okitlalijkeh se tonati, iwa miakeh tokniyah omooololojkeh kan Pablo omokalotiaya. Iwa desde kualka asta tiótlaki, Pablo okinmatilti kenijki Dios tlanawatia. Iwa okichiwaya makineltokakah n Jesús ika itlanawatil Moisés iwa ika intlajkuilol n profetas. ²⁴ Sikimeh okiselijkeh tlan Pablo okijtoaya, pero oksikimeh mach okineltokakeh.

²⁵ Iwa kemi amo nochteh okineltokakeh, opé yajyawih. Ikuakó Pablo okinmili:

—Milák tlan n Espíritu Santo okintlapowi totatawah ika itlajtol n profeta Isaías, ikuak okijo:

²⁶ Xio iwa xikinmili nekateh tlakah:
Nomejwah nontlakakiskeh pero mach nonkajsikamatiskeh,
iwa maya nontlachiaskeh mach itla nonkitaskeh.

²⁷ Porke ninteh tlakah oyoltlakuawakeh,
iwa mach yektlakakih,
iwa ixtsaktokeh,
para amo matlachiakah ika inmixtololowah,
nion matlakakikah ika innakaswah,
nion makimachilikah itech inyolo,
nion mamoyolpatlakah nonawak,
para manikimpajti.

Is. 6:9-10

²⁸ Axa xikmatikah, nin itemakixtilis Dios pewas kinmatiltiskeh non amo judíojteh, iwa yejwah kikakiskeh.

²⁹ Ijkuak Pablo ijkó otlajto, n judíojteh okiskeh iwa oyajkeh mokualanijtiwih.

³⁰ Pablo omoka ome xiwitl ompa Roma itech se kali kan okitlanejtoka, iwa okinseliaya nochteh akimeh okontlapaloayah. ³¹ Iwa okintlapowiaya kenikki Dios tlanawatia, iwa okinmachiaya itlajtol Toteko Cristo Jesús. Amayik opinawaya iwa amaka itla okiliaya.

San Pablo kintlajkuililia n Romanos

Pablo kintlajkuililia n tokniyah tlaneltokakeh non chantitokeh Roma

¹ Ne Pablo, niktekitilia n Cristo Jesús. Dios onéchnotski iwa onechpéjpenki maniktem-atilti n kualtlájtoli de Dios.

² Nin kualtlájtoli, yowejka Dios okinkakiti itech itlajkuilol, ikuak iprofetajwah okijkuijokeh. ³ Nin kualtlájtoli kinextia Cristo Jesús otlákatki kemi tejwah titlakatih, iwa walewatok itech rey David. ⁴ Pero ikuak omoyoliti de kan kateh non yomikkeh, n Espíritu Santo okinmatilti nochteh Cristo milák Ikone n Totajtsi Dios iwa kipia weletílistli. ⁵ Por Cristo Jesús, Dios onechnextili itlasojtlalis iwa onechtítlanki para maniktetlapowi itlajtol, iwa ijkó nochteh n tlaltípkaktlakah makineltokakah iwa makitlakitakah. ⁶ Nomejwah noiva Dios onoméchnotski para xiyetokah iaxkawah n Cristo Jesús. ⁷ Yika, nomechtajkuililia nomejwah akimeh nonchantitokeh Roma. Dios nomechtasojtla iwa onoméchnotski para xiyetokah nonyolchipawakeh inawak. Totajtsi Dios iwa Toteko Cristo Jesús manomechmakakah intlatiochiwalis iwa inyolsewilis.

Pablo kineki yas Roma

⁸ Achte nimotlasojkamati inawak Dios itech itoka n Toteko Cristo Jesús, por nochteh nomejwah. Porke itech nochti n tlaltípkaktli, motlapowia de nomotlaneltokalis.

⁹ Porke Dios kuali kimatok, iwa niktekitilia ika nochti noespíritu keman niktematilitia n kualtlájtoli de Ikone, iwa ne nochipa nomechilnamiki ikuak nimotiotsajtsilia.

¹⁰ Ixmostla niklatlaujta Dios, manechkawili manomechontlajpaloti, tla ye kimonekiltia.

¹¹ Porke nikneki nomechitas iwa nomechtiochiwas ika n Espíritu para ijkó okachi ximochikawah. ¹² Ijkí nomechilia para matimoyolchikawah tosepah itech totlaneltokalis non tiksepampixtokeh.

¹³ Nokniyah, nikneki xikmatikah, miak welta niknektok nias nomechtajpaloti, pero asta axa itla nechtsakuilia iwa amo weleti nio. Yowejka niknektok nias nomechitati para nikinmoololotí oksikimeh tokniyah non kateh nomowah, ijkó kemi onikinmoololo oksikimeh tokniyah non amo judíojteh. ¹⁴ Porke ye non notei, iwa saman trato nikpia de nikintlapowis akimeh tlajtoah griego iwa akimeh amó, akimeh ixtlamatih iwa akimeh amo ixtlamatih. ¹⁵ Yika, sa nimochixtok nomechmatiltiti n kualtlájtoli de Dios nomejwah akimeh nonchantitokeh Roma.

N kualtlájtoli de Dios kipia weletílistli

¹⁶ Ne amo nipinawa niktetlapowis n kualtlájtoli, porke ye iweletilis Dios para mamomakixtikah nochteh akimeh kineltokah. Achte oajsito kan judíojteh, pero axa noiva oajsito kan amo judíojteh.

¹⁷ Porke n kualtlájtoli non temakixtia techititia keniji Dios techita tichipawakeh ikuak titlaneltokah inawak. Sanwel ika totlaneltokalis, kemi kijtoa itlajkuilol Dios: “N yolchipawak ika itlaneltokalis yolitos.” *Hab. 2:4*

Intlajtlakol n tlaltípkaktlakah

¹⁸ De milajka, ikuanilis Dios moteititia de ilwikak, impan nochteh n tlakah amokualteh iwa non amo kitlakita Dios, iwa por non tlajtlácole non kichiwah, kitsakuilia tlan milák, para oksikimeh amo makimatikah. ¹⁹ Nochteh n tlaltípkaktlakah kimatih onka Dios, porke Ye inewia kinmoititia. ²⁰ Maski se amo weleti kita n Totajtsi Dios, weleti tikitah itech nochti tlan ye okichijchi. Iwa desde ikuak okichijchi n tlaltípkaktli, nochti technextilia onka Dios iwa kipia weletílistli non ayik tlamic, yika, amaka weletis kijtos amo okimatia kox onka Dios. ²¹ Maya okimatkeh Dios milák onka, amo okiweiyijkachijkeh nion omotlasojkamatkeh inawak. Yej ok se okichijkeh iwa san tlan okinekeh opé kiyejyekolah tlan amitla ipati. Semi oyoltlakuawakeh iwa asta mach ok itla weletih

kajsikamatih. ²² Yejwah momachiliah ixtlamatkeh, pero san kuatlapolojtokeh. ²³ Yejwah ayakmó kiweyijkachiwah Dios non ayik mikki, yej kinweyiliah diosmeh kemi tlakah non mikkih, kemi totomeh, koameh iwa non kimpiah nawi inmikxiwah, ninteh san kinmachijchiwah n tlakah akimeh noiwa mikkih.

²⁴ Yika Dios okinkajka makichijtinemikah san tlan pitsotik kelewia inkuerpo iwa tepinati nochí tlan kimotktijtinemih. ²⁵ Porke okipatlakeh Dios non de milajka, iwa okineltokakeh tlan amo milák. Okitlakitakeh iwa okiweyilijkeh nochí tlan Dios okichijchi, iwa amo okiweyijkachijkeh Dios, Akin moneki se makiweyijkachiwa nochipa. Ijkó mamochiwa.

²⁶ Yika, Dios okinkajka makichiwakah tlan amo kuali kelewia inkuerpo. Iwa axa asta n siwameh yomoixkopkeh iwa yopé mowilitah san yejwah. ²⁷ Ijkó noiwa, sikimeh tlakah ayakmó kineki kochiskeh iwan insiwa, porke yopé chikawak kinmelewiah oksikimeh tlakah iwa kinekih kochiskeh inwah. Semi weyi tepinati tlan kimotktijtinemih, iwa ijkó inselti kimotlaniliah tlaijywiskeh ika kokólisteh non kinmajsih itech tlan amo kuali kichiwah.

²⁸ Yika, kemi amo okinekeh kichiwaskeh tlan Dios kijtoa, Dios okinkajka itech intlan-namiklis pitsotik, iwa opé kichiwah tlan amo moneki kichiwaskeh. ²⁹ Tentokeh ika tlan amokuali. Mopitsotilitjinemih ika inkuerpo, amo yolmilajkameh, tominápisteh iwa teixpolojkeh. Semi xíkojteh, temiktijkeh, kichiwah mamokualanikah oksikimeh, tekajkaya-jkeh, kinmixtlapololtiah oksikimeh itech tlan pitsotik, iwa xolópijteh, ³⁰ tepojpojkeh, kikokoliah Dios, tlawijwikaltiah, moweyiliah iwa xankuameh. Satlawel kimatih kenomi kitemachtiskeh tlan amokuali, amo kintlakitah intajwah, ³¹ amo kimatih tlakakah, amo kichiwah tlan kijtoah, amo kimatih tetlaosjtlah, amo kimatih tetlapojojpolwiah, iwa amo kimatih teiknomatih. ³² Nonteh tlakah kuali kimatih tlan Dios yotlanawati, yejwah kuali kimatih akimeh ijkó kichiwah kuali mamikikah, pero mixewia ok kichijtinemih tlajtlácoli, iwa kita ika pakílistli ikuak oksikimeh ijkó kichiwah.

2

Dios techyolkuitis ika tlan milák

¹ Ijkó kiné, tla te titepojpoa amo mitstlapojpolwiskeh, mach mitsita akin te, porke ikuak tikpojpoa se mokni, san te monewia timotlajtlakoltia, porke noiwa tikchiwa tlan yejwah kichiwah. ² Tejwah tikmatokeh Dios kintlaijyowiltis kemi moneki, akimeh ijkó kichiwah. ³ Iwa te, non tikinpojpoa oksikimeh iwa noiwa tikchiwa tlan yejwah kichiwah, amo xikmoli ticholos ikuak Dios tetlaijyowiltis. ⁴ Mach amo tikmati tikixnamiki itlasojoatlalios Dios, iwa amo tikkajskamati iteiknomatilis mitstoktia ximoyolpatla. ⁵ Pero te yotiyoltakuawak iwa amo tikneki timoyolpatlas inawak Dios. Yika san te monewia tikmotetemilijtok miak tlaijywílistli. Non tlaijywílistli wetsis mopa itech neká tonati ikuak Dios wits kintlajtlakoltiki ika tlan milák akimeh okichijkeh tlan amokuali. ⁶ Ikuak Dios tetlaxtlawiki ijkó kemi ti sejsemeh otkchijkeh: ⁷ Dios kinmakas yankuik nemílistli akimeh kitemoa imawistilis, iwa kinyektenewaskeh iwa kinmakas tlan onka ilwikak akimeh nochipa kichiwah tlan kuali. ⁸ Pero Dios kintlaijyowiltis ika ikualanilis nekateh akimeh moweyiliah iwa amo kitlakitah tlan milák, yej kichiwah tlan amokuali. ⁹ Yetos tlaijywílistli iwa neyolkócoli para nochteh non kichijtinemih tlan amokuali, achto n judíojteh iwa non amo judíos noiwa. ¹⁰ Pero akimeh kichiwah tlan kuali, Dios kichiwas makinweyijkatlalikah iwa makintlakitakah. Noiwa kinmakas yolsewílistli, achto n judíojteh iwa non amo judíos noiwa.

¹¹ Porke Dios amo san techikotlasojojtla, ¹² yika, nochteh akimeh kichiwah tlajtlácoli iwa amo kixmatih n tlanawatlistli, mikiskeh maya amo okixmatkeh non tlanawatlistli. Iwa akimeh kichiwah tlajtlácoli iwa kixmatih n tlanawatílistli, Dios kinmixkomakas ika tlan kijtoa non tlanawatílistli. ¹³ Porke Dios amo kinmita yolmilajkameh akimeh san kikakih n tlanawátili, yej akimeh kichiwah. ¹⁴ N tlakah non amo judíojteh, non amo kipiah n tlanawátili, pero kichiwah tlan kijtoa n tlanawátili maya amo kixmatih, yejwah

innewiah kipixtokeh intlanawatil. ¹⁵ Iwa ika tlan kichiwah kiteititah nik kipixtokeh non tlanawátili itech inyolo. Iwa intlayeheyekolis kiteititia, iwa tlan kiyeyekolah kintelis noso kintlapojpolwis, ¹⁶ itech neká iksemi tonati ikuak Dios kinmixkomakas n tlaltik-paktlakah. Ijkó kemi kijtoa n kualitájtoli de Cristo Jesús non ne niktetlapowijtinemi. *Ap. 20.11-15*

N tlanawátili iwa n judíojteh

¹⁷ Pero te tikijtoa ti judío, iwa timotlaxilia itech motlanawatil iwa timoweyilia itech Modios. ¹⁸ Tikixmati tlan Dios kipaktia, iwa n tlanawátili mitsititia keniji tikpejpenas tlan okachi kuali. ¹⁹ Tkmolia tikmati kenomi tikinyakanas akimeh amo tlachiah, iwa tikmachilia tiweletis tikintlawilis akimeh nemih kan tleyua. ²⁰ Timomachilia tikmati kenomi tikinmachtis akimeh amitla kimatih, iwa keniji tikinyakanas akimeh ok kateh kemi kokoneh inawak Dios, porke kemi tikpixtok n tlanawátili timomachilia tiixtlamatini iwa tikixmati nochi tlan milák. ²¹ Yika, tla te tikinmachtia oksikimeh, ¿tleka amo timomachtia san te monevia? Iwa tla tikinmilia oksikimeh amokuali se matlachteki, ¿tleka te titlachteki? ²² Tla te monevia tikijtoa amo kuali se mamomekat, ¿tleka timomekatia? Tla te tikinkokolia n diosmeh non kinmachihiwah, ¿tleka titlachteki kan intiopa? ²³ Semi timoweyilia porke tikixmati itlanawatil Moisés, pero tikixpanawia Dios porke amo tiktakita non tlanawátili. ²⁴ Yika itlajkuil Dios kijtoa: “Akimeh amo judíojteh tlajtoah fiero de Dios por nomotlajtlakol.” *Ez. 36:20*

²⁵ Milák, akin mosirkunsidaroa iwa kichiwa tlan kijtoa itlanawatil Moisés, n sirkun-sisión kipalewia. Pero tla amo tiktakita n tlanawátili, mach itla ipati mosirkunsisión. ²⁶ Yika akin amo kajki sirkunsidado pero kichiwa tlan kijtoa n tlanawátili, Dios kita kemi yetoskia sirkunsidado maya amo kajki sirkunsidado. ²⁷ Akin amo sirkunsidaratok itech ikuerpo, pero kichiwa tlan kijtoa n tlanawátili, mitstlajtlakoltis te akin amo tiktakita non tlanawátili maya tikpixtok itlajkuil iwa tisirkunsidaratok. ²⁸ Porke mach ti judío san por tisirkunsidaratok itech mokuerpo. N de milajka sirkunsisión amo non techtlaliliah itech tokuerpo. ²⁹ Se non de milajka judío, ye akin kitlakita Dios ika nochí iyolo, iwa kajki sirkunsidado itech iyolo. Non sirkunsisión techtlalilia n Espíritu iwa amo porke se kitlakita tlan kijtoa itlanawatil Moisés. Yika, se mochiwa judío, porke Dios ijkó techita, iwa amo por tlan kijtoah n tlakah.

3

Dios kichiwa tlan kijtoa

¹ Ijkó kiné, ¿tlan kipalewia se tlakatl mayeto judío? noso ¿tlan ipati n sirkunsisión? ² Sa tlawel ipati. Achto, Dios okinmaktili itlajtol n judíojteh. ³ Pero ¿tlanón mochiwaskeh tla sikimeh de yejwah ayakmó kineltokah? ¿Nonkiyeheyekolah Dios noiwa ayakmó kichiwas tlan yokijto? ⁴ ¡Ayik! Dios nochipa kijtoa tlan milák, maya nochteh n tlakah mayetokah tekajkayajkeh. Kemi kijtoa itlajkuil Dios:

Ika tlan tikijtoa, timoteixmatiltis tikijtoa tlan milák,
iwa titlatlanis ikuak mitstlatsintokiskeh. *Sal. 51:4*

⁵ Pero tla tejwah titlajtlakchiwah tikteititah Dios Ye yolmilajka, tla ijkó, ¿tlanón tikijtoskeh? ¿Weletis tikijtoskeh amokuali tlan Dios kichiwa por techtlaijyowiltia? Nitlajtoa kemi tlajtoah n tlaltikpaktlakah. ⁶ ¡Mach ijkó! Porke tla Dios kichiwa tlan amokuali, ¿kenomi weletis kintlajtlakoltis n tlaltikpaktlakah?

⁷ Pero ikuak ne nitlakajkayawa nikteititia okachi itlajtol Dios milák, iwa okachi kiselia weylistli, ¿tleka kiné non nechteilia kemi nitlajtlakole? ⁸ Ijkó kiné: ¿Tleka se amo kichiwa tlan amokuali para mawiki tlan kuali? Ye ni tlan sikimeh techpojpojinemih, tejwah ijkó titlamachtiah. Pero akimeh ijkó kijtojinemih, kuali makintlajiyowiltikah.

Tinochteh titlajtlakolejkeh

⁹ ¿Tlan tikijtoskeh? ¿Tejwah ti judíos okachi tikualteh ke non amo judíos? ¡Amó! Porke yomotak n judíojteh iwa non amo judíojteh, tinochteh titlajtlakolejkeh. ¹⁰ Itlajkuilol Dios kijtoa:

Amo onka nion se tlakatl yekmilajka, nion se.

¹¹ Amo onka nion se non makajsikamati tlan Dios kimonekiltia; amo onka nion se non de milajka kitemoa Dios.

¹² Nochteh okonankeh ok se ojtli, nochteh omoixpolojkeh.

Amo onka nion se non makichiwa tlan kuali, nion se.

Sal. 14:1-3; Ec. 7:20

¹³ Intoskak kemi se miketékochtli non tlapotok;

Ika innenepil tlakajkayajtinemih.

Itech intentsi kipixtokeh beneno kemi se koatl.

¹⁴ Intlajtol tentok ika tlan amo kuali iwa tlan teyolkoko.

Sal. 10:7

¹⁵ Ika inmikxiwah motleloah para temiktiskeh.

Is. 59:7

¹⁶ Sentel kan ik yawih texixiniah iwa teixpoloah.

¹⁷ Iwa amo kixmatih n ojtli non kinmakas yolsewílistli.

Is. 59:8

¹⁸ Iwa amo kilnamikih kox moneki se makiimakajsi Dios.

Sal. 36:1

¹⁹ Kuali tikmatokeh nik nochi tlan ijkuitlakol itech n tlanawatílistli, kinmilia akimeh kinnawatijtok non tlanawatílistli. Yika, nochteh makitsakuakah inkamak iwa kitemakaskeh kuenta inawak Dios. ²⁰ Porke amaka weletis motlajtlakolchipawas inawak Dios por kitlakita tlan kijtoa n tlanawatílistli, porke n tlanawatílistli sanwel techititia tejwah titlajtlakolejkeh.

Timomakixtiah por titlaneltokah inawak Cristo

²¹ Pero axa, ayakmó matikonwilanakah n tlanawatílistli, Dios yotechmatiltiko kenomi techtlapojpolwia inawak, iwa ye noni tlan tikajsikamatih ikuak tikitah n tlanawatílistli iwa nochi intlajkuilol n profetas. ²² Ikuak tikneltokah Cristo Jesús, ikuakó Dios techita tichipawakeh de nochi totlajtlakol. Dios ijkó kinmita nochteh akimeh kineltokah, iwa amo san sikimeh iwa oksikimeh amó. ²³ Porke nochteh otlajtlakolchijkeh, iwa okimopolilijkeh iweyijkachiwalis Dios. ²⁴ Pero Dios ika iteiknomatilis techchipawa tinochteh san iki, akimeh tikneltokah, porke Cristo Jesús okitlaxtla ika ieso por totlajtlakolwah. ²⁵ Totajtsi okiteixpanti n Cristo kemi se tlamanali ikuak okitoya ieso, para ika matechtlapojpolwikah tla tikneltokah. Ijkó okichi para technextilis keniji yekmilajka. Yowejka, Ye okichi kemi amo okimitak totlajtlakolwah. ²⁶ Pero axa itech ninteh tonatijmeh Dios techititia Ye kichiwa tlan kuali, porke Ye ya techita tichipawakeh de nochi totlajtlakolwah ikuak titlaneltokah inawak Cristo Jesús.

²⁷ Ijkó kiné, ¿kanin ka n weyijkachiwálistli? ¡Opojpoliwik! ¡Tleka!, por tlan se kichiwa. ¡Amó!, yej por tikneltokah Cristo Jesús.

²⁸ Kuali tikmatokeh Dios kitlapojpolwia n tlakatl non kitlalia itlaneltokalis itech Cristo Jesús, iwa amo por kitlakita n tlanawatílistli.

²⁹ N Totajtsi Dios amo sanwel Dios de n judíojteh. Ye noiva Dios de nochteh non amo judíojteh. Milák, Ye noiva Dios de nochteh n tlaltikpaktlakah. ³⁰ Porke sanwel se Dios onka, iwa Ye kinmita yolchipawakeh nochteh akimeh kineltokah n Cristo Jesús, iwa amo kita kox kateh sirkunsidos noso amó. ³¹ Axa, ¿kijtosneki tiktektiltijtokeh n tlaneltokálistli para tiktsiksintiliskeh n tlanawatílistli? ¡Amó! Yej tikteititiah kipia ichikawalis.

Matiktakah tlan okichi Abraham

¹ Axa, tlan weletis tikkajsiskeh, ¿tlan okitlanki towejkatata Abraham? ² Tla Abraham okiseli Dios kemi yekmilajka por tlan okichi, ye kipiaskia tlan ika moweyiliskia innawak oksikimeh tlakah, pero amo inawak Dios. ³ Yika, n tiotlajkuiloli kijtoa, “Dios okiseli Abraham, porke Abraham okineltokak, yika Dios okitak kemi se tlakatl yolchipawak.” *Gn. 15:6* ⁴ Ijkó kiné, se tetlakewáli, ikuak kitlaxtlawiah, itlaxtlawil amo kitliokolia, yej

kimakah porke ya kiwikiliah. ⁵ Pero tla se tlakatl amitla kichiwa para momakixtis, pero kineltoka Dios kitlapojpolwis porke ye kintlapojpolwia n tlajtlakolejkeh, Dios kiselia non tlakatl porke inawak otlaneltokak. ⁶ Inewia n David okijo, satlawel miak tlatiochiwálistli kipia neká tlakatl non Dios kiselia kemi yolchipawak iwa amo kita tlan yokichijka non tlakatl. ⁷ David okijo:

¡Dios kintiochiwas nekateh akimeh Dios kintlapojpolwia de nochí tlan amokuali okichijkeh iwa kinmilkawilia intlajtlakolwah!

⁸ Miak pakílistli kipia n tlakatl akin Totajtsi amo kitilia tlan amokuali okichi. *Sal. 32:1-2*

⁹ Milák, n tlatiochiwálistli weletis kipiaskeh non kateh sirkunsidados, iwa non amo kateh sirkunsidados. Dios okiseli Abraham kemi se tlakatl yolchipawak por itlaneltokalis.

¹⁰ ¿Kemanía Dios okijo Abraham okatka se tlakatl yolchipawak? ¿Ijkuak omosirkun-sidaro, noso ijkuak ayamó? Amo satepa, yej achtó de mosirkunsidaro. ¹¹ Iwa satepa, Abraham okiseli n sirkunsión itech inakayo, kemi se ixneskayotl noso kemi se señas non ika motaskia nik Dios achtó okitak Abraham yolchipawak porke milák okineltokak. Yika Abraham omochiwako teta de nochteh akimeh milák kineltokah Dios maya amo kateh sirkunsidados, iwa ijkó Dios noiwa kinselia kemi yolchipawakeh. ¹² Milák, Abraham teta de akimeh kateh sirkunsidados, pero amo san por kateh sirkunsidados, yej porke milák kineltokah Dios kemi Abraham okineltokaya desde ijkuak ayamó okatka sirkunsidado.

Dios okimák n Abraham tlan yokilijka por okineltokak

¹³ Dios okitlajtolsentlalili n Abraham iwa iwejkaixwiwah kinmaxxatiliskia n tlaltíkpaktli. Okisentlalili, amo por Abraham okitlakitak tlan kijtoa n tlanawatílistli, yej por okineltokak Dios. Yika por itlaneltokalis, Dios okiseli n Abraham. ¹⁴ Porke tla akimeh kitlakitah n tlanawatílistli sanwel yejwah kiseliskiah tlan Dios yokijo techaxkatilis, n tlaneltokálistli ayakmó kipiaskia ipati, iwa tlan Dios okisentlali noiwa kipoloskia ipati. ¹⁵ Porke kan onka se tlanawátili iwa amo kitlakitah kitlajiyowiltiah akin amo kitlakita. Pero kan amo onka tlanawátili, amaka weletis kitlajtlakoltiskeh.

¹⁶ Yika, tlan Dios okisentlalili Abraham iwa nochteh iwejkaixwiwah, wits ika tlanel-tokálistli. Ijkó kiné, Dios amo okisentlalili sanwel akimeh kitlakitah n tlanawatílistli, yej noiwa para nochteh akimeh tlaneltokah kemi Abraham otlaneltokak. Axa Abraham mochiwa teta de nochteh akimeh tlaneltokah. ¹⁷ Kemi kijtoa n tiotlajkuíoli: “Onimitst-lali titeta itech miaktikeh tlaltikpaktlakah.” *Gn. 17:5*

Porke Dios non Abraham okineltokak, kinyolitia non yomikkeh, iwa kinotsa tlan ayamó onka kemi ya yetoskia.

¹⁸ Dios okisentlalili Abraham kimpías miaktikeh ipilwah, Abraham amo okimatia kenomi tlamo-chiwaskia, maya ijkó okineltokak Dios. Yika, Abraham omochi “teta de miaktikeh tlaltikpaktlakah”. *Gn. 15:5*

¹⁹ Abraham amo okipolo itlaneltokalis, maya yokipiaya makuilipóali xiwitl iwa yokimatia ye iwa isiwa Sara satlawel ya tetajtsitsinteh iwa ya mikiskiah, yika ayakmó weletiskiah kimpia-skiah impilwah. ²⁰ Abraham mach okimoli kox milák noso amo milák tlan Dios okikakiti kimakas. Yej okachi okineltokak iwa omoyolchikawayá inawak Dios iwa okiweyijkachiwaya. ²¹ Abraham kuali okimatia Dios kipia weletílistli para kichiwas nochí tlan kisentlalia kitemakas: ²² Yika Dios okitak Abraham kemi yolchipawak por itlaneltokalis. *Gn. 15:6*

²³ Tlan omojkuilo itech itlaneltokalis Abraham, amo san para ye omojkuilo, ²⁴ yej noiwa omojkuilo por tejwah, porke ika totlaneltokalis, Dios noiwa techselia kemi tiyolchipawakeh akimeh tikneltokah akin okiyoliti n Jesús Toteko, ²⁵ akin okitemaktijkeh para makajkokuika itech krus por totlajtlakolwah, iwa omoyoliti para matitlaneltokakah inawak.

Pakilstli iwa yolsewílistli

¹ Ijkó kiné, ken otikneltokakeh Cristo Jesús ya tikpiah yolsewílistli, iwa axa Dios ya techita tiyolchipawakeh. ² Yika, por Cristo Jesús iwa ken otikneltokakeh, kuali titlakxilitokeh iwa tipakih, porke tikmatokeh tiyetoskeh ilwikak inawak Dios. ³ Iwa amo san noni, noiya tipakih ikuak titlaijyowiah, porke tikmatokeh ikuak titlaijyowiah techpalewia para matitlaxikakah. ⁴ Iwa ikuak tikxikoah nochí tlaijyowílistli, okachi timoyekchikawah. Ikuak timoyekchikawah okachi timoyolchikawah. ⁵ Iwa kuali tikmatokeh nik tikselsiskeh tlan Dios yokisentlali techmakas, porke Dios yokitemiti toyolo ika miak tlasojtlálistli non Iespíritu Santo otechmák.

⁶ Porke neká tonati ikuak toneviah amo otiweletiah otimomakixtiyah, Cristo owala omikiko por nochteh n tlajtlakolejkeh. ⁷ Mach aka kinekis motekawilis makimiktikah ipatka ok se tlakatl; maya mayeto de milajka kuali tlakatl, pero mixewis aka kinekis makimiktikah ipatka se akin kualitlakatl. ⁸ Pero Dios techtitia itlasojtlalis keman Cristo Jesús omikki topatka, maya otikatkah tlajtlakolejkeh. ⁹ Iwa axa tla Dios ya techita tiyolchipawakeh de totlajtlakolwah por iesso n Cristo Jesús Akin okitoya ikuak okimiktjkeh, axa okachi kuali tikmatih Cristo techmakixtis de ikualanilis Dios. ¹⁰ Porke tla Dios otechtlapojpolwi ika imikilis Ikone ikuak tejwah ok otikkokoliayah, axa okachi tla Ye yotechtlapojpolwi, yotimomakixtjkeh por Cristo Jesús. ¹¹ Iwa amo san noni, yej noiya titlawelpakih inawak Dios por tlan okichi n Toteko Cristo Jesús. Yika, por Cristo yotimoyekkajkeh inawak Dios.

Adán iwa Cristo

¹² Ijkó kiné, por itlajtlakol se tlakatl n tlajtlákoli okalak itech nin tlaltípkaktli iwa okualík mikílistli, ijkó noiya nochteh mikkih porke nochteh tlajtlakolchijkeh. ¹³ Ikuak itlanawatil Moisés ayamó okatka, yokatka miak tlajtlákoli itech nin tlaltípkaktli. Pero kan amo moixmati n tlanawatílistli, amaka kitlajtlakoltiskeh. ¹⁴ Pero nochteh n tlaltípkaktlakah non onenkeh desde Adán asta Moisés omikkeh porke okichijtinenekeh tlajtlákoli, pero mach por amo okitlakitakeh se tlanawátili, kemi okichi Adán; akin amo okitlakitak itlanawatil Dios. Pero Adán omotaya kemi non satepa walaskia.

¹⁵ Pero itlajtlakol Adán, mach weletis motamachiwas ika tlan Dios techtliokolia. Porke ika itlajtlakol se tlakatl, miakeh omikkeh. Pero n tlasojtlálistli iwa n tlatliokólili wits de Dios iwa momiakilia san por se tlakatl, Ye, Cristo Jesús. Okachi weyi kijtosneki iwa miakteh tlakah kimpalewia. ¹⁶ Itlajtlakol Adán mach weletis motamachiwas ika itemakixtilis non Dios techtliokolia. San por se tlajtlákoli, owala tlaijyowilis Dios intech n tlaltípkaktlakah. Pero maya miak tlajtlákoli okichijkeh n tlaltípkaktlakah, axa Totajtsi Dios techmaka n tlatliokólili non kichiwa matechita Dios ken tichipawakeh de totlajtlakolwah. ¹⁷ Porke tla ika itlajtlakol se tlakatl, Adán, nochteh n tlakah mikkih, axa akimeh kiseliah n weyi tlatliokólili ika n tetlapojpolwílistli non Dios kitemaka saniji, yolitoskeh nochipa san por se tlakatl, Ye, Cristo Jesús.

¹⁸ Por itlajtlakol Adán nochteh n tlakah okintlajtlakoltijkeh, ijkó noiya por se tlakatl non Itoka Cristo Jesús, non okichiwako tlan kuali. Nochteh n tlakah weletis yetoskeh chipawakeh de intlajtlakol para yeknemiskeh. ¹⁹ Kijtosneki, por se tlakatl non amo otetlakitak, miakeh omokopkeh tlajtlakolejkeh. Pero ijkó noiya, por se tlakatl, Cristo non otetlakitak, miakeh tlakah yetoskeh chipawakeh de intlajtlakol.

²⁰ Itlanawatilis Moisés owala para matikmatikah miak tlajtlákoli tikpiah, pero ikuak tikmatih miak tlajtlákoli tikpiah, iteiknomatilis Dios omomiakili. ²¹ Yika, ijkó kemi n tlajtlákoli otlanawatijitalayah iwa okualík mikílistli, axa noiya itlasojtlalis Dios matlanawati ika iyekmilawalis para matikpiakah nemílistli nochipa, por Toteko Cristo Jesús.

6

Yotimikkeh itech totlajtlakolwah pero tiyolitokeh iwan Cristo Jesús

¹ ¿Tlan tikijtoskeh? ¿Okachi titlajtlakolchijtinemiskeh para mamomiakili iteiknomatilis Dios? ² ¡Saman amó! Porke tla tejwah yotimikkeh imak tlajtlákoli, ¿kenijki ok weletis titlajtlakolchijtinemiskeh? ³ ¿Mach amo nonkimatih nomejwah nochteh akimeh timoseitiliah iwan Cristo Jesús ikuak timokuuatekiah, noiya timoseitiliah itech imikilis? ⁴ Porke ikuak otimokuuatekijkeh, otechtookakeh sansikah iwan Cristo, iwa otimiktakah para satepa matechyolitikah iwa axa tiyolitoskeh nochipa kan ilwikak. Ijkó noiya Totajtsi Dios ika iweletilis okiyoliti n Cristo Jesús.

⁵ Porke tla tejwah yotimoseitilijkeh iwan Cristo itech imikilis, noiya otimoseitilijkeh ikuak Ye omoyoliti. ⁶ Ya tikmatokeh, tlan achto otikchiwayah opojpoliwik ikuak okikrusifikarojkeh n Cristo, para mapojpoliwi ichikawalis tlan amo kuali kelewia tokuerpo, iwa ayakmó matechmapixto n tlajtlákoli. ⁷ Porke akin yomikki, ayakmó kichijtinemi tlajtlákoli. ⁸ Yika, tla tejwah yotimikkeh iwan Cristo, tikneltokah noiya tiyolitoskeh iwan Ye, ⁹ porke tikmatokeh Cristo Jesús yomoyoliti itsalko n mikemeh, iwa ayik oksepa mikkis. N mikílistli ayakmó kinawatia n Cristo. ¹⁰ Ikuak Cristo omikki, omikki san semi imak tlajtlákoli. Pero ikuak omoyoliti, omoyoliti para kichiwas tlan Dios kimonekiltia. ¹¹ Ijkó noiya, xikajskamatikah nomejwah yononmikeh imak n tlajtlákoli, pero nonyolitokeh para Dios por nonseititokeh iwan Cristo Jesús Toteko.

¹² Yika, nomejwah amo xikkawilikah manomechnawati n tlajtlákoli itech nomokuerpo non mikkis, para amo manomechtojtopewa itech tlan amokuali kineki kichiwas nomokuerpo. ¹³ Amo xiktemakakah nomokuerpo itech tlajtlákoli para kichiwas tlan amokuali. Yej ximotemaktkah inawak Dios kemi yaskia ononmikkeh iwa ononmoyolitijkeh. Xiktemakakah nomokuerpo ika yekmilawálistli para Dios. ¹⁴ Ijkó n tlajtlákoli ayakmó kipias weletílistli nomotech, porke nomejwah ayakmó nonkateh imak itlanawatil Moisés yej nonkateh imak itlasojoatlalis Dios.

Ya ti iaxkawah Dios para tikchiwaskeh tlan kuali

¹⁵ Ijkó kiné, ¿okachi titlajtlakolchiwaskeh porke amo tikateh imak itlanawatil Moisés, yej itech itlasojoatlalis Dios? ¡Amó! ¡Ayik ijkó xikmolikah! ¹⁶ Nomejwah kuali nonkimatih, tla aka tlakatl motemaktia kemi tlanémaktli imak se iteko moneki makitlakita, tla nomejwah itla nonkitlakitah nonmochiwah nontlanémakteh, ijkó kiné, tla tiktakita n tlajtlákoli, noni kualika mikílistli, pero tla tiktakitas Dios, mochiwa Moteko para tikchiwas tlan kuali. ¹⁷ Niktla sojcamati Dios porke maya achto ononmotemaktijkah itech tlajtlákoli kemi nonyetoskiah nontlanémakteh, nomejwah ya nonkitlakitah ika nomoyolo n tlamachtílistli non onomechmatiltijkeh. ¹⁸ Axa ken ayakmó nomechnawatia n tlajtlákoli, nomejwah axa ya nontlanémakteh itech n yekmilawálistli. ¹⁹ Nomechtlapowia kemi se tlaltikpaktlakatl, ijkó kemi achto ononkitemaktijkeh nomokuerpo kemi tlanémaktli itech tlan pitsotik, iwa itech tlan amokuali para nontlajtlakolchiwaskeh, axa, xiktemakifikah nomokuerpo kemi tlanémaktli para nonkichiwaskeh n yekmilawálistli iwa para nomechyolchipawaskeh.

²⁰ Ikuak ononilpitokah itech tlajtlákoli, nomejwah mach ononnemiah ika nomoyolo chipawak. ²¹ Pero, ¿tlan ononkitlankeh de nochí tlan ononkichijsinenkeh, ika tlan axa nompinawah? Porke nochí non tlajtlákoli kualika mikílistli. ²² Pero axa nomejwah ayakmó nomechmapixtok n tlajtlákoli, yej axa ya nonteaxkatitokeh inawak Dios para nonkitlakitaskeh. Noni kema nomechpalewia, porke kichiwa xinemikah ika nomoyolo chipawak inawak Dios, iwa nonkipiaskeh nemílistli non ayik tlami kan ilwikak. ²³ Porke n tlajtlákoli tetlaxtlawia ika mikílistli, pero tlan Dios kitetliokolia ye n nemílistli non ayik tlami keman tiseititokeh iwan Toteko Cristo Jesús.

7

Axa titeaxkawah inawak Cristo

¹ Nokniwah, nomejwah akimeh nonkixmatih itlanawatil Moisés, ya nonkimatih nik non tlanawátili sanwel tlanawatia ikuak se yolitok. ² Xikkakikah, n tlanawátili kijtoa, se siwatl non yomonamikti trato seititos iwan iokich tla ok onka. Pero tla iokich mikki, ompa tlami nochí, iwa makisa itech non tlanawátili non okipixtoka iwan iokich. ³ Yika, tla non siwatl monepanoa iwa ok se tlakatl iwa iokich ok onka, kijtosneki san kimomekatijtok non tlakatl. Pero tla iokich mikki, n tlanawátili ayakmó kinawatijtos iwa ye ya weletis monamiktis iwa n ok se tlakatl, iwa mach ok san kimomekatijtos.

⁴ Ijkó kiné nokniwah, nomejwah noiwa yononmikkeh inawak non tlanawátili keman ononmikkeh iwan Cristo, para xiyetokah nonteaxkawah de Akin omoyoliti de kan mike-meh, para ijkó se weletis kichiwas tlan Dios kineki. ⁵ Porke ikuak ok otikchiwayah tlan tokuerpo okelewiaya, nochipa otechyoltlanaya n tlajtlákoli para matikchiwakah tlan amo kuali. Nochipa otikchiwayah tlan itlanawatil Moisés okijoaya amo matikchiwakah, iwa n tlajtlákoli otechwikaya matimikikah. ⁶ Pero axa yotimikkeh imak n tlanawátili non otechmapixtoka, iwa ayakmitla techtsakuilia para tikmopantiskeh Dios itech nin yánkuik nemílistli non techmaka n Espíritu, iwa amo itech n ya wewe tlanawátili non ijkuitlítok.

N tlajtlákoli non kajki notech

⁷ Axa, ¿tlan tikitoskeh? ¿N tlanawátili, ye tlajtlákoli? ¡Amó! Pero tla amo por n tlanawátili ne amo nikixmatiskia tlan se kelevia tlajtlákoli. Porke n tlanawátili kijtoa: “Amo xikelewi tlan amo moaxka.”

Éx. 20:17

⁸ Pero n tlajtlákoli omokitski itech n tlanawátili, iwa onechtokti manikchiwa tlan amo oniknekia porke n tlajtlákoli omokitski itech n tlanawátili, porke kan amo onka tlanawátili n tlajtlákoli kemi yetoskia yomikki. ⁹ Yowejka amo onikixmatia n tlanawátili, pero ikuak n tlanawátili owala, n tlajtlákoli omoyoliti, iwa ne onimik. ¹⁰ Ika noni, axa mota itlanawatil Moisés non kichiwaskia maniyolito, san onechmák nomikilis. ¹¹ Porke n tlajtlákoli omopalewi itech n tlanawátili iwa onechkajkaya, iwa ika non tlanawátili onechmikti.

¹² Yika, inewia n tlanawátili chipawak, iwa tlan tlanawatia noiwa chipawak, yekmilajka iwa kuali. ¹³ Ijkó kiné, ¿kijtosneki n tlanawátili onechwk manimiki? ¡Amó! N tlajtlákoli ye akin onechmikti, iwa ijkó omotenexti nik milák tlajtlákoli. N tlajtlákoli mach omotaya ikuak amo okatka n tlanawátili, yika itlanawatil Moisés okitenexti n tlajtlákoli mach kuali.

¹⁴ Tikmatih n tlanawatlistli walewatok itech Espíritu. Pero ne ni tlaltikpaktlakatl onimonamák imak tlajtlákoli. ¹⁵ Amo nikajskamatí tlan nikchiwa, porke amo nikchiwa tlan ne nikneki, yej nikchiwa tlan ne nikkokolia. ¹⁶ Pero tlan amo nikneki nikchiwas, ye nikchiwa, ompa nikajskamatí n tlanawátili milák kuali. ¹⁷ Ijkó kiné, ayakmó ne akin nikchiwa, yej kichiwa n tlajtlákoli non kajki noijtik. ¹⁸ Ne nikmati itech nonemilis amitla kuali onka, ne niknekiskia nikchiwas tlan milák, pero amo niweleti nikchiwa. ¹⁹ Amo nikchiwa tlan milák non ne nikneki, yej nikchiwa tlan amo kuali non amo nikneki. ²⁰ Axa, tla nikchiwa non amo nikneki nikchiwas, ayakmó ne akin kichiwa, yej n tlajtlákoli non kajki noijtik.

²¹ Yika, ikuak nikneki nikchiwas tlan kuali, nikita nin tlanawátili amo kuali kajki noijtik. ²² Ijtik noyolo nechpaktia itlanawatil Dios, ²³ pero noiwa nikita noijtik onka ok se tlanawatlistli, ye tlan nechyoltiana manitlatlajkolchiwa, non kixnamiki notlalnamikilis, ye ichikawalis n tlajtlákoli non kajki noijtik iwa nechilpítok.

²⁴ ¡Nimialma! ¿Akin weletis nechmakixtis itech nin kuerpo non nechwika manimiki? ²⁵ Sanwel Dios weleti ika tlan Cristo Jesúz okichiwako. ¡Niktlasojkamati Dios! Iwa ika notlayejyekolis nikchiwa tlan kijtoa itlanawatilis Dios, pero ika nokuerpo nikneki nikchiwas itlanawatilis n tlajtlákoli.

¹ Ijkó kiné, amo kintlajtlakoltiskeh akimeh seititokeh iwan Cristo Jesús, porke nonteh ayakmó nemí kemi nemí n tlaltikpaktlakah, yej nemí kemi kinyakana n Espíritu. ² Porke itlanawatilis n Espíritu non kitemaka yolílistli por Cristo Jesús onechmakixti imak iweletilis n tlajtlákoli iwa imak iweletilis n mikílistli. ³ N tlanawatílistli amo owéletki otechmakixti imak toelewilis, yika Dios okítlanki Ikone kemi seme de tejwah ti tlaltikpaktlakah. Jesús omikki iwa omotemakti kemi tlamánali para kintlaxtlawas totlajtlakolwah, iwa ijkó okipojpolo ichikawalis n tlajtlákoli. ⁴ Dios ijkó okichi para tejwah matiweletikah matikchiwakah tlan kijtoa n tlanawátili, porke ayakmó tinemih kemi nemí n tlaltikpaktlakah, yej kemi n Espíritu kineki.

⁵ Porke akimeh nemih kemi nemí n tlaltikpaktlakah, okachi kintekipachoa tlan onka itech nin tlaltíkpaktli, pero akimeh nemih kemi n Espíritu kineki, yejwah okachi kintekipachoa kichiwaskeh tlan n Espíritu kineki. ⁶ Iwa akin sa kilnamiktok kichiwas tlan ikuerpo kelewie, san semi moixpolos. Pero akin motekipachoa kichiwas tlan n Espíritu kineki, yolitos iwa kipias yolsewílistli. ⁷ Itlayejeylekolis n tlajtlakolchi kikokoliah Dios. Porke amo kinekih kitlakitaskeh nion weletih kichiwhah tlan kijtoa n tlanawátili. ⁸ Yika, akimeh sanwel kinekih kichijtinemiskeh tlan kichiwhah n tlaltikpaktlakah amo weletih kipaktiah Dios.

⁹ Pero tla Iespíritu Dios chanchiwa nomotech, nomejwah ayakmó nonkichijtinemih tlan kelewiah n tlaltikpaktlakah, yej nonnemí kemi kineki n Espíritu. Akin amo kipixtok Iespíritu n Cristo, amo seititok iwan Cristo. ¹⁰ Pero tla Cristo kajki itech nomoyolo, maya n tlajtlákoli yokimiki nomokuerpo, n Espíritu yolitok nomotech porke Dios yonomechyolchipa de nomotlajtlakolwah. ¹¹ Iwa tla itech nomoyolo chanchiwa Iespíritu Dios Akin okiyoliti n Jesús ikuak okimiktijkeh, ika non Espíritu non kajki itech nomoyolo, Dios kiyolitis nomokuerpo non mikki.

¹² Ijkó kiné, nokniwhah, tikpiyah se weyi tekitl, pero amo matinemikah kemi nemí n tlaltikpaktlakah. ¹³ Porke tla nomejwah nonkichijtinemiskeh tlan nomokuerpo kineki, nonmikiskeh. Pero tla ika n Espíritu nonkipojpoloah nochi tlajtlákoli tlan nomokuerpo kichijtiniemi, ikuakó nonyolitoskeh nochipa.

¹⁴ Nochteh akimeh kinyakana Iespíritu Dios, yejwah tepilwah de Dios. ¹⁵ Porke amo ononkiselijkeh se espíritu non teijilpia iwa manomechtokti oksepa ximawikah, yej ononkiselijkeh n Espíritu non ika nonmochiwah ipilwah Dios. Iwa nin Espíritu techkawilia matikijtokah: “¡Abba, Totajtsi!” ¹⁶ Nin Espíritu moseitilia iwan toespíritu iwa techilia tejwah ya ti tepilwah de Dios. ¹⁷ Iwa ken ya titepilwah de Dios, noienda tikselskeh tlan Dios yokijto techtlaaxkatilis sansikah iwa n Cristo, porke axa noienda tejwah titlaijyowiah iwa n Cristo para satepa noienda tiyetoskeh ilwikak iwan Ye.

N weyílistli non satepa tikpiaskeh

¹⁸ Kuali nikmatok n tlaijyowílistli non axa tipanoah mach weletis motamachiwas iwa n weyílistli non satepa tikpiaskeh. ¹⁹ Porke nochí tlan Dios okichijchi, sa kichixtok tonati para mamonextikah akimeh ipilwah Dios. ²⁰ Porke nochí tlan Dios okichijchi ojtlakawik, pero amo por ye inewia okinek ijtlakawis, yej porke Dios ijkó okimonekilti. Pero maya ijkó omochi, ok onka tlan itech se weletis moyolchikajtos ²¹ porke ajsiki n tonati ikuak nochí tlan onka itech nin tlaltíkpaktli momakixtis, iwa ayakmó ijtlakawis. Ikuakó momakixtiskeh ipilwah n Dios iwa ijkó sansikah kipiaskeh weyílistli. ²² Tejwah tikmatih nochí tlan Dios okichijchi asta axa tenna iwa choka kemi se siwatí ikuak ya kipati ikone. ²³ Iwa amo san tlan Dios okichijchi tlaijyowia, yej tejwah noienda akimeh ya tikpixtokeh n Espíritu Santo non Dios yotechmák kemi se tlayakánali para matikmatikah tlan satepa techmakas. Tejwah noienda satlawel timoyolkokoah, iwa sa tikchixtokeh tonati ikuak Dios techselis kemi ipilwah, ikuak kiyankuilis tokuerpo non mikki. ²⁴ Porke ika tlan otikchiayah otechmakixtijkeh; pero tlan otikchiayah ayakmó tikchiah porke yotiktakeh. Porke tlan se yokitak, ayakmó para kichias. ²⁵ Pero tla tikchiah tlan ayamó tikitah, matikyekchiakah ika pakílistli iwa amo matimosotlawakah.

²⁶ Ijkó noiwa n Espíritu techpalewia ikuak timosotlawah. Porke amo timotioitsajtsiliah kemi moneki, pero inewia n Espíritu motlatlaujtia inawak Dios por tejwah, ika tiotsajtsílistli non tejwah amo tiweletih tiktenkixtiah ika totlajtol. ²⁷ Iwa Dios, Akin kixmati toyolo, kimati tlan n Espíritu kineki techilis porke n Espíritu motlatlaujtia kemi Dios kipaktia por akimeh iaxkawah.

Tejwah titlatlanih porke tikateh iwa n Cristo

²⁸ Tejwah tikmatih nochteh akimeh kitlasojtlah Dios, nochí tlan kichiwah kimpalewia, porke okimpejpenki iwa okinnotski para inwa kichiwas tlan Ye yokimoli. ²⁹ Porke akimeh Dios yokinmixmatia desde ikuak ayamó okatka n tlaltípkaktli, Ye okimonekilti mayetokah kemi ikone, para ijkó ikone mayeto intetiachka de miaktikeh iknimeh. ³⁰ Iwa akimeh Dios okimonekilti mayetokah iaxkawah, Ye okinnotski. Iwa akimeh okinnotski, Dios okimitak ya chipawakeh de intlajtlakol. Iwa akimeh okimitak ya chipawakeh de intlajtlakol, noiwa okinmák iweyilis non Ye kipia.

³¹ ¿Tlan weletis tikijtoskeh de nochí ni? Tla Dios kajki towah, ¿akin weletis itla techtoktis? ³² Dios amo okiyolkoko kitemaktis ikone, yej okitemakti makimiktikah topatka. Axa ¿nonkineltokah amo techmakas sansikah iwan ikone non kitlasojtla nochí tlan techilia techmakas? ³³ ¿Akin weletis kintelis akimeh Dios yokimpéjpenki?, amaka, porke inewia Dios yokintlapojpolwi. ³⁴ ¡Axa amaka techtlajtlakoltis! Cristo Jesús Ye Akin omikki iwa oksepa omoyoliti iwa ewatok ik iyekma n Totajtsi Dios kan motlatlaujtijtok por tejwah. ³⁵ ¿Akin weletis techachiwas de itlasojtlalis Cristo?

¿N tlaijywílistli,
n neyolkókoli,
tla techtotojtokah,
n apisol,
tla techpoloa totlakeh
noso por timikiskeh?

³⁶ Kemi kijtoa itlajkuil Dios:

Por timitsneltokah, n tlakah nochipa kinekih techmiktiskeh;
techitah kemi ichkameh non kinwikah kan tlamiktilo.

Sal. 44:22

³⁷ Pero itech nochí ni tlan tipanoah, Cristo techmaka chikawálistli para matitlatlanikah porke Ye techtlasojtla. ³⁸ Kuali nikmatok amitla weletis techachiwas de itech itlasojtlalis Dios.

Nion tla timikiskeh,
nion tla tiyolitoskeh,
nion ángelteh,
nion inweletilis noso inchikawalis n espíritus amokualteh,
nion tlan axa tipanotokeh
nion tlan sikan wits,
³⁹ nion tlan wejkapa,
nion tlan wejkatla,
nion itla ok se tlan Dios okichijchi
weletis techachiwas de itech itlasojtlalis, non Ye techmaka por Toteko Cristo Jesús.

Dios okimpéjpenki n tlakah de Israel

¹ Ne nikijtoa tlan milák porke nitlaneltoka inawak Cristo, iwa amo nitlakajkayawa, porke n Espíritu Santo kiyakantinemí notlalnamikilis, iwa notlalnamikilis nechilia milák tlan nikijtoa. ² Ne sa tlawel nimoyolkokoa iwa itech noyolo nochipa onka neyolkókoli,

³ porke asta ne nonewia niknekiskia manechtlajtlakoltikah, manechachiwakah de inawak Cristo, tla ika noni weletiskia nikinmakixtiskia nokniwah judíos non ken nikinmita.

⁴ Yejwah walewatokeh de intech tlakah de Israel, iwa Dios okinseli kemi ipilwah. Dios okatka inwah ika iweyijkachiwalis iwa omoyekka inwah, noiwa okinmák itlanawatil,

okinmili kenomi kiweyijkachiwaskeh iwa okinkakiti tlan kinmakaskia. ⁵ Yejwah noiva walewatokeh intech totatawah; Abraham, Isaac iwa Jacob, iwa Cristo Akin otlakatiko kemi tejwah titlakah de nin tlaltípkaktli noiva intech walewatok. Iwa Cristo Ye Dios Akin tlanawatijtok itech nochi, ¡Akin moneki matikweyilikah nochipa! Ijkó mamochiwa.

⁶ Pero amo kijtosneki tlan Dios okinkakiti n judíojteh amo omochi; yej ika noni mota nik amo nochteh akimeh walewatokeh de Israel milák ipilwah Dios. ⁷ Amo nochteh non walewatokeh de Abraham milák ipilwah, porke Dios okili n Abraham: “Sanwel ipilwah mokone Isaac mitsinmakas mowejkaixwiwah.” *Gn. 21:12* ⁸ Noni kijtosneki, amo nochteh akimeh ixwiwah Abraham milák ipilwah Dios, yej sanwel akimeh kineltokah tlan Dios okikakiti Abraham, iwa kenjki momakixtiskeh akimeh kineltokaskeh n kualitlájtoli. ⁹ Ye ni tlan Dios okisentlali kimakas Abraham: “Nikan se xiwitl niwits, iwa mosiwa Sara kipias se ikone.” *Gn. 18:10*

¹⁰ Iwa amo san noni. N ome ipilwah n Rebeca san se inta okipixkeh, ye totata Isaac. ¹¹ Ayamó otlakatiah n kuatsitsinteh nion ayamó okichiwayah tlan kuali noso tlan amokuali keman Dios okili n Rebeca: ¹² “Mokone non teteachka kitekitilis non tsoyotl.” *Gn. 25:23* ¹³ Ijkó kemi kijtoa itlajkuilol Dios: “Satlawel oniktlasojtlak n Jacob, pero Esaú oniktlawelitak.” *Mal. 1:1-2* Ijkó omotak sanwel Dios kijtoa akin kipejpenas, ijkó kemi Ye kimonekiltia; iwa sanwel Ye kijtoa akin kinotsas iwa amo kita tlan yokichi.

¹⁴ ¿Tlan tikijtoskeh kiné? ¿Tikijtoskeh Dios mach ompa tlan kichiwa? ¡Amó, ayik ijkó xikmolikah! ¹⁵ Porke Dios okili n Moisés: “Niklapojpolwis akin Ne niknekis niklapojpolwis, iwa nikiknomatis akin Ne niknekis nikiknomatis.” *Éx. 33:19* ¹⁶ Yika, itlasojtlalis Dios amo tikselialah san por tiknekih noso por timochijchikawah ika itla tekitl, yej tikselialah porke Ye techiknomati. ¹⁷ Porke itech itlajkuilol Dios kilia n rey de Egipto: “Onimitstlali tirey para motech nikteitis noweletilis, iwa para makixmatikah Notoka itech nochi n tlaltípkaktli.” *Éx. 9:16* ¹⁸ Ijkó kiné, Dios kiknomati akin Ye kineki niknomatis, iwa kiyoltlakuawa akin Ye kineki kiyoltlakuawaltis.

¹⁹ Pero te weletis techilis: “Tla ijkó kiné, ¿tleka Dios kintlajtlakoltia n tlakah, porke akin weletis kixnamikis Dios?” ²⁰ ¡Mialma nokni! ¡Akin te para timotlatlajtolkopas iwan Dios? Weletis n xoktsi kilis akin okichijchi: “¿Tleka ijkí otechchijchi?” ²¹ Porke akin kinchijchiwa xoktsimeh weletis kichijchiwas ika n sokitl san tlan ye kineki; ika non sokitl weletis kichijchiwas se xoktsi non motekitiltia ikuak ilwichiwah, iwa ok se xoktsi non ixmostla kitekitiltiah.

²² Dios okinek kiteitis ikualanilis iwa iweletilis, yika yokinxiko nekateh akimeh okimotlanilijkeh kintlajiyowiltis iwa iksemi tonati kimpojpolos. ²³ Ye ijkó okichi para kiteitis iweyijkachiwalis para akimeh Ye kinmiknomati, iwa akimeh Ye achto okimpéjpenki para makiselikah mawistílistli. ²⁴ Dios amo okinnotski sanwel non walewatokeh itech judíojteh, yej noiva okinnotski akimeh amo judíojteh.

²⁵ Kemi kijtoa itlajkuilol n profeta Oseas: Akimeh amo okatkah noaltepetlakawah, nikinnotsas noaltepetlakawah, iwa akimeh amo onikintlasojtlaya, axa nikintlasojtas. *Os. 2:23*

²⁶ Iwa kan achto onomechilijkeh: “Nomejwah amo nopilwah”, ompa nomechnotsaskeh nontepilwah de Dios non yolitok. *Os. 1:10*

²⁷ Isaías noiva okinteneh n tlakah de Israel iwa okijto: “Maya non walewatokeh de Israel mayetokah senmiakteh kemi xali non kajki itempa n weyi atl, san kanaj kechmeh momakixtiskeh, ²⁸ porke n Toteko Weletini kichiwas itech nin tlaltípkaktli tlan Ye yokijto, iwa san totokatijkak nochi kichiwas.” *Is. 10:22* ²⁹ Ijkó kemi yowejka okijto Isaías: Tla n Toteko non saikpanoa Weletini, amo techinkawiliskia towejkaixwiwah, timochiaskiah kemi n altepemeh de Sodoma iwa Gomorra. *Is. 1:9*

Ijkuak titlaneltokah inawak Cristo tikajsih tlapojojpolwílistli

³⁰ ¿Tlan tikijtoskeh? Akimeh amo judíos, non amo okitemoayah kenjki motlapojojpolwiskeh inawak Dios okachi okajsikeh tlapojojpolwílistli por okineltokakeh. ³¹ Pero

n Israelitas, maya omochijchikawayah kajsiskeh se yekmilawálistli ika intlanawatilis, amo oweletkeh. ³² ¿Iwa tleka amo oweletkeh? Amo oweletkeh porke okinekiah motlapojpolwiskeh ika tlan kijtoa intlanawatilis, ika tlan okichiwayah para Dios iwa amo por intlaneltokalis. Yika omoikxitlanwijkeh ipan “tetl non teikxitlanwia”, ³³ kemi kijtoa n tiotlajkuíloli:

Xikitakah, Ne niktlalia itech Sión se tetl non ika moikxitlanwiskeh, se tetl non kintoktis mawetsikah; akin tlaneltokas ítech, ayik mopijpinatis.

Is. 28:16

10

¹ Nokniyah, ika nocheh noyolo niklatlaujtia Dios mamomakixtikah nochteh n tlakah de Israel. ² Porke ne nikmatok yejwah kimopantiah Dios ika nocheh inyolo, pero amo kiyekajskamatih. ³ Yejwah amo kimatih keniji Dios tetlapojpolwia, yej innnewiah kitemoliah tlan ika motlapojpolwiskeh inawak Dios. Iwa amo kinekih kitlakitaskeh tlan Dios yokijto itech itlajtol. ⁴ Porke itech Cristo omochiwako nocheh tlan kijtoa itlanawatil. Iwa ijkó nochteh akimeh kineltokah n Cristo, Dios kinmita ya chipawakeh de intlajtlakol.

⁵ Moisés yowejka okikuilo keniji motlapojpolwia inawak Dios neká tlakatl non kinekih motlapojpolwia ika tlan kijtoa n tlanawátili, iwa ijkí okijto: “Akin kichiwas nocheh tlan kijtoa n tlanawátili, yolitos por non tlanawátili.” *Lv. 18:5 **

⁶ Pero Dios ya techita tichipawakeh de totlajtlakolwah porke titlaneltokah inawak Cristo. Porke itlajkuilol Dios ijkí kijtoa: “Amo xikijto itech moyolo: ¿Keniji niweletis nitlejkos ilwikak?”, —noni kijtosneki oksepa tikneki mawaltemo n Cristo—, ⁷ nion xikijto: ¿Akin temos kan kateh non yomikeh? —noni kijtosneki tikneki makikixtitih n Cristo kan kateh non yomikeh. ⁸ Itlajkuilol Dios noiwa kijtoa: “Itlajtol Dios kajki monawak, itech mokamak iwa itech moyolo.” *Dt. 30:14*

⁹ Ye ni n tlajtoli non tejwah tikneltokah iwa tiktematiltiah: ⁹ Tla ika mokamak tikijtos Cristo Jesúz ye Moteko, iwa itech moyolo tikneltoka Dios okiyoliti de kan mikemeh, Dios mitsmakixtis. ¹⁰ Porke ika moyolo titlaneltoka iwa Dios mitsita tichipawak, pero ika mokamak tiktematiltia tikneltoka Cristo para mitsmakixtis.

¹¹ N tiotlajkuíloli kijtoa: “Nochteh akimeh kineltokah n Cristo, ayik mopijpinatiskeh.” *Is. 28:16* ¹² Porke Dios amo sanwel kintlasoxtla n judíojteh iwa non oksikimeh amó, porke tinochteh tikpiyah san se Toteko. Iwa Ye satlawel kintiochiwa nochteh akimeh kitlajtlaniliah makimpalewi. ¹³ Porke nochteh akimeh kitlajtlaniliskeh n Toteko makintlapojpolwi, Ye kinmakixtis. *Joel 2:32*

¹⁴ Pero, ¿kenomi kitlajtlaniliskeh n Toteko makintlapojpolwi tla ayamó kineltokah? ¿Iwa kenomi kineltokaskeh, tla ayamó keman kikakih akin Dios? ¿Iwa kenomi kikakiskeh, tla amaka kinmatiltia itlajtol? ¹⁵ ¿Iwa kenomi kitematiltiskeh n kualitlátjoli tla amaka kintitlani? Kemi kijtoa n tiotlajkuíloli: “¡Satlawel miak pakílistli ikuak tikselsis akin kualikah yolsewílistli iwa kitematiltia n kualitlátjoli!” *Is. 52:7*

¹⁶ Pero amo nochteh kineltokah n kualitlátjoli non techmakixtia. Ijkó kemi Isaías okikuilo: “Noteko, ¿akin okineltokak tlan tiktematiltiah?” *Is. 53:1* ¹⁷ Ijkó kiné, titlaneltokah ikuak tikkakih n kualitlátjoli, iwa tlan tikkakih, ye itemachtilis Cristo.

¹⁸ Pero ne nomechtajtlania: ¿Kox amo okikakeh n kualitlátjoli? ¡Milák, okikakeh! Intlajtol omokak itech nocheh tlan tlaltíkpaktli, iwa intlamachtilis yomoma sentetl asta kan tlami nin tlaltíkpaktli. *Sal. 19:4*

¹⁹ Oksepa nitlajtlani: ¿Kox n tlakah de Israel ayamó kajskamatih? Moisés noiwa kijtoa: Ne nomechtoktis xichawatikah iwa oksikimeh tlakah non amo judíojteh; iwa nomechtoktis xikualanikah iwa oksikimeh tlakah non amo tetlakita. *Dt. 32:21*

²⁰ Noiwa Isaías omixewi okijto:
Akimeh amo onechtemoayah, onechajsikeh;

* ^{10:5} Moisés kijtoa nochteh n judíojteh moneki mamosirkunsidarakoh ikuak kipiah chikweyi tonati de otlakatkeh. N sirkunsión ye tlan okintekiliyah inmewayo non kikuatsaktok intlakayo.

iwa akimeh amo otlajtlaniah Akin Ne, onikinmoititi.

Is. 65:1

²¹ Isaías noiwa okikuilo de n tlakah de Israel, iwa okijo: “Nochi tonati nikinnotok sikimeh tlakah non amo tetlakitakeh iwa teixnamikeh.”

Is. 65:2

11

San sikimeh tlakah de Israel Dios okinmakixti

¹ Axa, nitlajtlani: ¿Kox Dios okinmilka itlaneltokawah de Israel? ¡Amó! Porke ne noiwa niisraelita, niwalewatok itech Abraham iwa niteixwi de Benjamín. ² Dios yowejka okinmitak n judíojteh kemi ipilwah; iwa asta axa amo kinmixnamiki. ¿Mach amó nonkimatih tlan kijtoa n tiotlajku'loli de n tiotlajto Elías, ompa nestok keniji okinteili n tlakah de Israel ikuak omotrotsajtsilsilitoka inawak Dios? Ye okijo: ³ “Noteko, yokinmiktijkeh motiotlajtojkawah iwa yokinxixitskeh moartalwah, iwa axa sanwel ne onimoka, iwa ne noiwa kinekih nechmiktiskeh.”

1 Re. 19:10

⁴ Pero okinnankili Dios: “Onikinmoxelili chikome mil tlakah non ayik omotlankuaketskeh ixpa n dios tlachijchíwali Baal.”

1 Re. 19:18

⁵ Ijkó axa, itech ninneh tonatijmeh, yomokajkeh kanaj kechmeh tlakah, non Dios ika itlasojoatlalis okimpéjpenki.

⁶ Iwa tla Dios okimpéjpenki por itlasojoatlalis, kijtosneki amo se momakixtia por itla kuali se kichiwa. Porke tla Dios kimpejpenaskia por okichijkeh itla kuali, kijtosneki ayakmó monekiskia itlasojoatlalis Dios.

⁷ Ijkó kiné, n tlakah de Israel amo okajsikeh tlan okitemoayah, pero akimeh Dios okimpéjpenki okajsikeh tlapojpolwílistli. Pero non oksikimeh oyoltlakuawakeh. ⁸ Kemi kijtoa n tiotlajku'loli: “Dios okinkawili mamoyoltlakuawakah, okinmák inmixtololowah non amo tlachiah, iwa innakaswah non amo tlakakih, iwa asta axa ijkó kateh.”

Dt. 29:4

⁹ David noiwa kijtoa:

Inmilwiyah mamokopakah kemi ayatl kan monepachwiah, kan moikxitlanwiah iwa ijkó motlaijyowiltiah.

¹⁰ Inmixtololowah ayakmó matlachiakah, iwa nochipa mamotompocho inkuitlapah.

Sal. 69:22-23

Kenomi Dios kinmakixtia non amo judíojteh

¹¹ Axa ne nitlajtlani: ¿N judíojteh ikuak omoikxitlanwijkeh ompa omokajkeh? ¡Amo! Porke ikuak n judíojteh amo okitlakitakeh Dios, non amo judíojteh oweletkeh omomakixtijkeh. Yika, n judíojteh xikojmikih. ¹² Ijkó kiné, keman n judíojteh amo okineltokakeh Dios, non amo judíojteh okiselijkeh itlatiochiwalis Dios. ¡Okachi kintiochiwas Dios tla n judíojteh moyolpatlaskeh inawak Dios!

¹³ Pero nikneki nomechilis se tlájtoli nomejwah akimeh amo non judíojteh. Dios onechtítlanki manikinmatiltiti itlajtol akimeh amo judíojteh, yika ne nikmopantia noteki. ¹⁴ Porke nikneki sikimeh judíojteh kemi ne, machawatikah nomowa para makinekikah momakixtiskeh kemi nomejwah, iwa ijkó mamomakixtikah sikimeh. ¹⁵ Ikuak Dios okinmixnamik n judíojteh, okajsikeh tlapojpolwílistli inawak Dios non amo judíojteh, yika, ikuak Dios kinselis n judíojteh ¿amo okachi yetos pakílistli? Kemi ikuak moyolitía se non yomikki. ¹⁶ Porke ikuak tikaxkatiliah Dios se paj non tikixtiah itech siki textli, noiwa nochi n textli iaxka Dios.

Nm. 15:19

Iwa tla inelwayo se kuawitl iaxka Dios, noiwa imamayowah n kuawitl iaxkawah.

¹⁷ Sikimeh judíojteh, kemi non de milajka imamayowah n olivoskuawitl okimpostekeh, iwa te non amo ti israelita impatka omitssalojkeh. Ijkó otikpixki kuali nelwatl de non olivos. ¹⁸ Pero amo ximoweyili inwa imamayowah n olivoskuawitl, tla te timoweyiliah, amo te akin tikchikajtok n nelwatl, yej n nelwatl mitschikajtok.

¹⁹ Weletis tikmolis: “Milák ijkó, pero imamayowah n olivoskuawitl okinmatsayankeh iwa ne onechsalokeh ítech.” ²⁰ Milák. Okinmatsayankeh porke yejwah amo otlaneltokakeh, iwa te kuali titlakxilitok por otitlaneltokak. Yika amo ximoweyili, yej xikiimakajsi. ²¹ Porke tla Dios okinmatsayankih non Ye imamayowah, te noiwa weletis mitsmatsayanás. ²² Xikita, Dios saikpanoa teiknoma, pero noiwa kema tetlaijyowilti.

Ye kintlaijyowiltia akimeh yowetskeh. Ye noiwa saikpanoa teiknomá. Pero moneki xiseitito íwa. Tla amó, te noiwa mitsmatsayanas. ²³ Iwa tla n judíojteh kineltokaskeh n Cristo, oksepa kinsaloskeh itech n olivoskuawitl, porke Dios satlawel weletini iwa weletis kinsalos oksepa kan okimpostekeh. ²⁴ Porke tla te omitstekeh itech se olivoskuawitl non iselti oixwak kan tlakuaujyo, iwa omitssalojkeh itech se olivoskuawitl non kuali, jamo tikyejyekolia okachi amo owi kinsaloskeh n judíojteh itech olivoskuawitl kan okinmatekeh!

Non de israel momakixtiskeh

²⁵ Nokniwah, nikneki kuali xikmatikah tlan Dios yokimolijka kichiwas iwa amaka okimatia, para amo xikmolikah satlawel nonmixtlamatinlh: sikimeh judíojteh oyolt-lakuawakeh, pero sanwel asta makalakikah nochteh non amo de Israel. ²⁶ Ijkuak ijkó tlamochiwas, nochteh n tlakah de Israel momakixtiskeh, kemi kijtoa n tiotlajkuíloli:

N Temakixti walewatos de kan altepetl de Sión,
iwa kinchipawas nochteh ipilwah n Jacob ika tlan pitsotik okichiwayah.

²⁷ Iwa ijkó mochiwas tlan yowejka onikinsentlalilih kichiwaskia inwah,
ijkuak kinkixtilis intlajtlakolwah.

Is. 59:20

²⁸ Ijkuak non amo judíojteh okineltokakeh n kualtlájtoli, n judíojteh okikokolijkeh Dios. Pero Dios yejwah kintlasoijta porke okinseli inwejkatatawah. ²⁹ Porke tlan Dios kitemaka amo oksepa kitekixtilia, nion mitsachiwa tla omítsnotski. ³⁰ Achto nomejwah, amo ononkitlakitayah Dios, pero kemi n judíojteh amo okitlakitakeh, Dios onomechiknomá nomejwah. ³¹ Ijkó noiwa, yejwah amo okitlakitakeh para Dios manomechiknomá ijkó kemi axa yejwah kinmiknomati. ³² Yika, Dios otechka nomejwah iwa tejwah matitlajtlakolchiwakah, para ijkó matechiknomati.

³³ ¡Milák, kema weyi iteiknomatilis Dios, iwa kema weyi iixtlamatilis! Iwa iajsikamatilis, amaka weleti kiteajsikamatiltia tlan Dios kichiwa, nion amaka kajsikamati tlan kichiwa nion kenomi kichiwa. ³⁴ Noso, “¿akin weleti kajsikamati itlaye jyekolis n Toteko?, noso ¿akin okiixtlamachtí? *Is. 40:13* ³⁵ ¿Akin achto itla okitlickoli n Toteko, para makiseli itlaxtlawil?”

³⁶ Porke nochí tlan onka, walewatok de Dios, iwa onka por Ye, iwa Ye nochí iaxka. *Job 41:11*

¡Matikweyilikah Totajtsi Dios nochipa! Ijkó mamochiwa.

12

N yankuik nemílistli

¹ Nokniwah, nomechtlatlaujtitia ika iteiknomatilis Dios, ximotemaktikah nomejwah nomonewiah kemi se tlamíktli non yolitok, chipawak ijkó kemi Ye kipaktia. Ye ni tlan milák ipati inawak Dios. ² Ayakmó xinemikah kemi nemih n tlaltikpaktlakah, yej xikpatlakah nomotlaye jyekolis para ijkó manomechyankuili nomonemilis. Ijkó weletis nonkimatiskeh tlan kimonekiltia Dios, xikchiwakah tlan kuali, tlan kipaktia, iwa tlan yekmilajka.

³ Dios satlawel onechiknomá iwa onechmák nin tekitl para manomechili tlan moneki nonkichiwaskeh, yika nomechilia ayik xikmolikah nomejwah okachi nonkualteh ke oksikimeh, yej ximoyejyekolah ijkó kemi Dios onomechmajmák nomotlaneltokalis.

⁴ Porke ijkó kemi se kuerpo sasalitok ika miakeh iomiwah, amo nochteh kichiwah san se tekitl. ⁵ Ijkó noiwa tejwah, maya timiaktikeh, timochijtokeh san se kuerpo itech Cristo, iwa tisejsemeh tisosalitokeh itech non kuerpo.

⁶ Dios otechmajmák tlatlamantli toteki, ijkó kemi Ye okimonekilti techmajmakas. Yika, tla Dios okichi matiweletikah, matiktetlapowikah itlajtol non tikselialah de Ye, moneki tikchiwaskeh ijkó kemi tikneltokah Cristo. ⁷ Tla Dios otechmák n tekitl para matitepalewikah, matikinyekpalewikah. Akin weleti tlamahtia, makimopanti mayek-tlamachti. ⁸ Akin kimati teyolchikawa, makinyolchikawa oksikimeh. Akin kitemaka itla,

makitemaka ika kuali iyolo. Akin teyakana, mamochijchikawa kuali mateyakana; akin kimpalewia akimeh kimpoloa tlan ika panotoskeh, makimpalewi ika pakflistli.

Kenomi moneki manemikah n tlaneltokakeh

⁹ Nonnochteh ximotlasojtlakah ika nomoyolo chipawak. Xiktlawelitakah nochi tlan amokuali, iwa xikchiwakah tlan kuali. ¹⁰ Ximotlasojtlakah non nochteh kemi nonmiknimeh, iwa okachi ximosepantlasojtlakah nomejwah akimeh non kineltokah Cristo.

¹¹ Ximochijchikawah, amo xiyetokah nontlatsijkeh, iwa ika nochi nomoyolo xiktektilikah n Toteko.

¹² Nochipa xipaktinemikah ika tlan nomechchia ilwikak. Amo ximosotlawakah ikuak nontlaijyowiah, yej nochipa ximotrotsajtsiljtokah.

¹³ Xikimpalewikah n tokniyah ika tlan kimpoloa, iwa xikinyekslikah akimeh nomechontlajpaloah.

¹⁴ Xiktlajtlanilikah Dios makintiochiwa akimeh nomechtlijyowiltiah, amo xiktlajtlanilikah makintlaijyowiltkah, yej makintiochiwakah.

¹⁵ Xipakikah inwah akimeh pakih, iwa xichokakah inwah akimeh chokah.

¹⁶ Ximoyekwikakah non nochteh. Amo ximoweyilikah, yej xiyetokah nonyolyamankeh kemi akimeh kimatih tetlakitah. Amo ximomachilikah nonmixtlamatkeh.

¹⁷ Tla aka nomechtoktia itla amokuali, nomejwah amo xikmokopilikah, yej nochipa xikchiwakah tlan kuali immixpa n nochteh. ¹⁸ Asta kan weletis, nomejwah xiktemolikah keniji nonmoyekwikaskeh ika yolsewlistli iwan nochteh. ¹⁹ Notlasojknih, tla nomechtoktiah tlan amokuali, amo san nomejwah ximomakopakah, yej xikkawilikah Dios, Ye, makintlaijyowilti. Porke n tiotlajkuíloli kijtoa: “Sanwel Ne nitetlaijyowiltis; Ne nitetlaxtlawis, kijtoa n Toteko.” ^{Dt. 32:35} ²⁰ N tiotlajkuíloli noiva kijtoa: “Tla mokokolikni apismiki, xikmaka tlan kikuas; iwa tla amiki, xikmaka maatli. Porke tla ijkó tikchiwas, ye pinawatinemis.” ^{Pr. 25:21-22} ²¹ Amo xikmokawili mamitstlani tlan amokuali, yej ika tlan kuali xiktlanili tlan amokuali.

13

¹ Nochteh n tlakah moneki makintlakitakah n tekiwajkeh. Porke amo onka se tekiwa non Dios amo okitlali, porke nochteh n tekiwajkeh non axa tlanawatijtokeh, Dios okintlali. ² Yika, akin amo kintlakita n tekiwajkeh, kijtosneki amo kitlakita tlan Dios okitlali. Iwa akimeh amo kinekih kintlakitaskeh, innewiah kimotemolijtokeh makintlaijyowiltkah. ³ Porke n tekiwajkeh amo kateh para makinmawilikah akimeh kichiwah tlan kuali, yej para mamawikah akimeh kichijinemih tlan amokuali. Tla te amo tikneki mamitsmomojtikah n tekiwajkeh; xikchiwa tlan kuali iwa n tekiwajkeh mit-syekitaskeh. ⁴ Porke n tekiwajkeh Dios okintlali para mamitspalewikah. Pero tla tikchiwa tlan amokuali, xikinmawili, porke weletis tlanawatiskeh mamitstlaijyowiltkah. Yej wah itekitwah Dios iwa kateh para kintlaijyowiltiskeh akimeh kichiwah tlan amokuali. ⁵ Yika, nomejwah xikintlakitakah n tekiwajkeh amo san para amo makualanikah, yej por nonkimatokeh ijkó moneki nonkichiwaskeh. ⁶ Ika noni nomejwah nonkitlaxtlawah impuestos; porke n tekiwajkeh kichijtokeh n tekitl non Dios okinmák makichiwakah.

⁷ Xiktlaxtlawakah nochi tlan moneki nonkitlaxtlawaskeh. Xiktlaxtlawakah impuestos, xiktlaxtlawakah patente, iwa akin moneki xiktlakitakah, xiktlakitakah, iwa akin moneki nonkiweijkamatiskeh, xikweijkamatikah. ⁸ Amaka itla xikwikilikah, yej ximotlasojtlakah non nochteh; porke akin kitlasojtla itlakaikni, ika noni yokichi tlan kijtoa n tlanawatílistli. ⁹ Porke n tlanawatílistli kijtoa: “Amo ximomekati, amo xiteichtakamikti, amo xitlachteki, amo xitlakajkayawa, amo xikelewi tlan amo moaxka.” ^{Ex. 20:13-15,17}

Nochteh ninteh iwa n oksikimeh tlanawátilteh mochiwah san se, iwa ye ni tlan kijtosneki: “Xiktlasojtla mokni kemi te timotlasojtla.” ^{Lv. 19:18} ¹⁰ Akin kimi tetlasojtla, amo kinchiwilia tlan amokuali n oksikimeh. Yika akin milák tetlasojtla, ika noni ya kichijtok nochi tlan kijtoa n tlanawátili.

¹¹ Kuali xikitakah itech tlan tonatijmeh tikateh, xikmatikah ayakmó para tikochtoskeh. Porke n tonati ikuak techmakixtis Cristo ayakmó ka wejka, kemi ikuak sakin otitlaneltokakeh. ¹² N yúali ya panoti iwa ya tlanestiwits; yika matikkawakah nochi tlan amokuali, tlan se kichiwa ikuak se nemi itech tleyuálistli iwa matimoyankuilikah kemi akimeh nemih itech tláwili. ¹³ Matinemikah ika totlalnamikilis chipawak kemi se nemi ikuak tlanestok. Amo matinemikah itech ilwimeh kan tlatlakualo, nion matitlawantinemikah, amo matikchijtinemikah tlan amokuali kiyoltilana tokuerpo, amo matimokualantinemikah nion matixikojmikikah. ¹⁴ Yej okachi kuali, matimotlakentikah ika ichikawalis n Toteko Cristo Jesús, iwa amo matiknekikah matikchiwakah tlan pitsotik.

14

Amo xikpijinawi mokni akin ayamó chikawak itlaneltokalis

¹ Tla se mokni ayamó chikawak itlaneltokalis, xikyekseli iwa amo ximotlatlajtolkopa íwa, tla ayamó mitsajsikamati. ² Kuali xikmatikah, sikimeh tokniyah kineltokah weleti kikuah nochi tlákuali, iwa onkateh oksikimeh non amo chikawak intlaneltokalis, kikuah san kilitl. ³ Yika, akin kikua nochi tlákuali, amo makipojpoa akin kikua san kilitl, iwa akin kikua san kilitl, amo makipojpoa akin kikua nochi tlákuali, porke Totajtsi Dios yotechseli tinchteh. ⁴ Ijkó kiné, ¿tleka tikpojpoa itlakewal ok se tlakatl? Tla kichiwa kuali noso amokuali, ompa ye makita. Pero kuali mokawas íwa, porke Toteko Weletini para kipalewis makichiwa tlan kuali.

⁵ Noiwa sikimeh tokniyah kijtoah se tonati okachi ipati ke ok se tonati, iwa oksikimeh kimoliah nochteh n tonatijmeh san se impati. Nochteh kuali makimatokah itech inyolo tleka ijkó kiyeyjekolah. ⁶ Akin mosewia itech se tonati, mosewia porke kineki kiweyijkachiwas Toteko Dios. Iwa akin amo mosewia itech non tonati, amo mosewia porke kineki kiweyijkachiwas Toteko Dios. Iwa akin kikua nochi tlákuali, kikua para kiweyijkachiwas Toteko Dios, porke motlasojkamati inawak. Iwa akin kikua san kilitl, ijkó kichiwa para kiweyijkachiwas Toteko Dios, iwa motlasojkamati inawak.

⁷ Porke amaka tlakatl yolitok san por ye kineki monawatis, nion amaka tlakatl mikki san por ye kineki mikkis. ⁸ Porke tla tiyolitokeh, tiyolitokeh para tiktektiliskeh n Toteko; iwa tla timikiskeh, timikiskeh para Toteko Jesús. Ijkó kiné, tla tiyolitoskeh noso tla timikiskeh, tejwah ti teaxkawah inawak Toteko. ⁹ Porke Cristo omikki iwa oksepa omoyoliti, para yetos Inteko de akimeh yomikkeh iwa de akimeh yolitokeh.

¹⁰ Iwa axa, ¿te, tleka tikpojpoa mokni? Noso ¿tleka tiktawelita? Kuali xikmati tinchteh timoteixpantiskeh inawak Cristo iwa Ye kijtos akin tlajtlakole iwa akin amó.

¹¹ Porke ijkuitlakolchiwa:
Ne niyolitok, kijtoa n Toteko Dios,
nochteh motlankuaketsaskeh nonawak
iwa nochteh kijtoskeh teixpa milák Ne Ni Dios. Is. 45:23

¹² Ijkó kiné, tosejselti tigmokuitiskeh inawak Dios nochi tlan otikchijkeh.

Xikpalewi mokni amo matlajtlakolchiwa

¹³ Yika, nomechilia ayakmó ximopojojtinemikah. Yej ximoyekwikakah iwa amo xikchiwakah itla non makikxitlanwi nomokni, nion xiktoptikah matlajtlakolchiwa. ¹⁴ Ne kuali nikmati amitla tlákuali techijtlakoa, ne kuali nikmati porke nikneltoka Cristo Jesús, pero tla aka kimolia itla tlákuali amo chipawak, non tlákuali amo chipawak para ye. ¹⁵ Ijkó kiné, tla te tikiyolkokoa se mokni por tlan tikkua, kijtosneki amo tiktglasojtla mokni. Amo xikchiwa mamoixpolo se tokni akin Cristo omikki por ye, san por tikkua itla tlákuali. ¹⁶ Amo xiktekawilikah, makijtokah nonkichiwah n amokuali, maya nomejwah nonkimatokeh kuali tlan nonkichiwah. ¹⁷ Porke kan Dios tlanawatia amitla kijtosneki tlan se kikua noso tlan se koni, yej okachi weyi kijtosneki matikpiakah toyeknemilis, yolsewílistli, pakílistli, nochi noni sanwel techmaka n Espíritu Santo. ¹⁸ Akin ijkó kimopantia Cristo, kipaktia Dios iwa n tlakah kiseliah.

¹⁹ Ijkó kiné, matiktemokah nochí tlan techmaka yolsewílistli, iwa matimosepam-palewikah para okachi mamoskalti totlaneltokalis. ²⁰ Amo xikijtlako iteki n Totajtsi Dios san por siki tlákuali non te tikua. Kuali momatok nochí tlákuali chipawak. Amokuali tla tikkuaah itla iwa ika noni tiktuktiah matlajtlakolchiwa se tokni. ²¹ Satlawel kuali tla amo tikkusas nakatl, nion tikonis vino, nion tikchiwas itla non ika matlajtlakolchiwa mokni.

²² N tlaneltokálistli non te tikpíxtok, kuali matlakxilito inawak Dios. ¡Miak pakílistli kipia n tlakatl akin itlalnamikilis amo kitlajtlakoltia por tlan kichiwa, iwa kineltoka tlan kichijtok kuali kajki! ²³ Pero akin kikua siki tlákuali iwa itlalnamikilis kiteilia, kichiwa tlajtlákoli ikuak kikua, porke maya okikua, kiyolkuajtok. Iwa nochí tlan se kichiwa iwa tlami kiyolkuajtinemi, noni tlajtlákoli.

15

Matikimpaktikah oksikimeh, iwa amo san tejwah matimopaktikah

¹ Akimeh tichikawakeh itech totlaneltokalis, moneki matikimpalewikah akimeh amo chikawak intlaneltokalis, iwa amo san tejwah matimopaktikah. ² Tisejsemeh moneki matikpaktikah se tokni iwa ijkó okachi moskaltis itlaneltokalis itech Cristo. ³ Porke nion Cristo okichi san tlan ye inewia opipaktiaya, yej itech Ye omochi tlan kijtoa n tiotlajkuíloli: “Intlawikaltlis akimeh omitswikaltijkeh nopaj owetsiko.” *Sal. 69:9* ⁴ Nochi tlan yowejka omojkuilo itech tiotlajkuíloli, omojkuilo para matimoixtlamachtikah, para matikchiakah ika yolsewílistli tlan Ye yokijo techmakas. ⁵ Iwa Dios, Akin teyolsewia iwa teyolchikawa, manomechpalewi para ximosepanyekwikakah, ijkó kemi Cristo Jesús kineki. ⁶ Iwa ijkó nonnochteh, san ika se nomotlájtol, xikweyijkachiwakah Dios, Itajtsi n Toteko Cristo Jesús.

Kinmatiltiah n kualtlájtoli akimeh amo judíojteh

⁷ Ijkó kiné, ximoselikah non nochteh, ijkó kemi Cristo otechseli, para matikweyilikah Totajtsi Dios. ⁸ Porke ne nikijtoa, Cristo owala kemi se tlakéwali para n judíojteh, para mamochiwa tlan Dios okinsentlalili towejkatatawah, iwa ijkó makitakah Dios kichiwa tlan kijtoa. ⁹ Cristo noiwa owala innawak n tlaltikpaktlakah para makiweyijkachiwakah Dios porke Ye satlawel teiknomati, kemi kijtoa n tiotlajkuíloli:

Yika, nimitsmawistilis innawak miakteh tlakah non amo judíojteh,
iwa niktakuikilis Motoka para ika nimitsweyilis. *Sal. 18:49*

¹⁰ Noiwa kijtoa n tiotlajkuíloli:

Nomejwah akimeh amo non judíojteh,
xipakikah iwan itlaneltokawah Dios. *Dt. 32:43*

¹¹ Iwa oksika noiwa kijtoa:

Xikweyijkachiwakah Toteko, nochteh akimeh amo judíojteh,
iwa nochteh n tlaltikpaktlakah xiktlakuikilikah. *Sal. 117:1*

¹² Isaías noiwa okikuilo:

Tlakatis se iwejkaixwi n Isaí,
ye majkokuis iwa kinnawatis miakeh tlalmeh kan amo judíojteh,
iwa yejwah moyolchikajtoskeh ítech. *Is. 11:10*

¹³ Iwa Dios Akin itech se moyolchikawa, manomechmaka miak pakílistli iwa yolsewílistli ikuak itech nontlaneltokah, para nontentoskeh ika iweletilis n Espíritu Santo.

N tekitl non Dios okimaktili n Pablo

¹⁴ Nokniwhah, kuali nikmatok nomejwah satlawel nonteiknomatih iwa kuali nonmixt-lamatih, iwa nonkimatih keniji nonmononotsaskeh. ¹⁵ Pero itech nin amatlajkuíloli onimixewi nomechijilis ika yekmilajka tlájtoli, para amo xikilkawakah. Ijkí nikchiwa porke Dios ika iteiknomatilis onechnawati manikchiwa, ¹⁶ maniktekichiwi n Cristo kan amo judíojteh. N tekitl non ne nikchiwa, niktematiltia n kuali tlájtoli non temakixtia,

para nochteh non amo judíojteh mayetokah kemi se tlamánali inawak Dios non Ye kinselis, non n Espíritu Santo yokinchipa.

¹⁷ Yika, nikpiaskia tlan ika nimosijsinis inawak Cristo Jesú, por niktekichiwilia. ¹⁸ Porke amo nimixewiskia nomechtlapowis ika tlan ne onikchi, yej sanwel tlan Cristo okichi notech para manikinmachtí akimeh amo judíojteh kenomi kitlakitaskeh Dios. Iwa yejwah okineltokakeh Dios ika tlan onikinmachtí iwa ika tlan onechitakeh onikchi, ¹⁹ ika neskáyolteh iwa milagros non onikinchi ika iweletilis n Espíritu Santo. Iwa ijkó, desde Jerusalén asta kan tlali de Ilírico, yonitetlapowijtín enki de n kualitlájtoli de Cristo non techmakixtia. ²⁰ Ijkó, ne onimochijchika niktetlapowis n kualitlájtoli non temakixtia kan ayamó kema okikakiah itoka n Cristo, porke amo oniknek nitetlapowis kan ok se yotekitik. ²¹ Yej nikchiwa kemi kijtoa n tiotlajkuíloli:

Kitaskeh akimeh ayik okintlapowijkeh de Ye,
iwa kajsikamatiskeh akimeh ayik okikakiah de Ye.

Is. 52:15

Pablo kimolia yas Roma

²² Yika, maya satlawel oniknektoka nias nomechontlajpaloti, mach owéletki onia. ²³ Pero axa kemi yoniktlami noteki itech ninteh tlalmeh, iwa kemi yowejka niknektok nias nomechonitatih, ²⁴ ikuak nias Spaña ik ompa nomechontlajpalojtikisas. Iwa ikuak yonípixki non pakílistli, chamo nomejwah weletis nonnechpalewiskeh ika tlan nechpolos para maniajsiti Spaña. ²⁵ Pero axa nio Jerusalén, nikimpalewiti non ompa chantitokeh iwa iaxkawah Dios. ²⁶ Porke n tokniyah de Macedonia iwa Acaya ika pakílistli okoololojkeh siki tomi para kintitlaniliskeh tokniyah próbesteh de Jerusalén. ²⁷ Yejwah okimolijkeh omonekia ijkó kichiwaskeh, porke okimachiliayah kinwikiliah miak; porke ijkó kemi n tlaneltokakeh judíojteh okitejtemakakeh tlan Dios okintliokoli innawak inmikniyah non amo judíojteh, ninteh moneki makinpalewikah n tlaneltokakeh judíos ika tlan yejwah kipiah. ²⁸ Ijkó kiné, ikuak yotlanki onikchi nin tekitl iwa yonikinmaktli nin tomi, nionewas Spaña iwa ik ompa nomechontlajpalojtikisas. ²⁹ Ne kuali nikmatok, ikuak ne nias nomechitati, nikwikas miak tlatiochiwálistli non Cristo kitemaka.

³⁰ Nokniyah nomechtlatlaughtia, por Toteko Cristo Jesú iwa por n tlasojtlálistli non n Espíritu techmaka, nomejwah noiva ximotrotsajtsilikah para Dios manechpalewi. ³¹ Nokniyah nomechtlatlaughtia, por Toteko Cristo Jesú iwa por n tlasojtlálistli non n Espíritu techmaka, nomejwah noiva ximotrotsajtsilikah para Dios manechpalewi. ³² Iwa tla Dios kimonekiltis, manechkawili maniajsiti nomowah ika pakílistli iwa ompa nimosewis. ³³ N Totajtsi Dios Akin techmaka yolsewílistli, mayeto nomowah. Ijkó mamochiwa.

16

Pablo kintlatlajpaloa non kinmixmati

¹ Nikneki xikyekselikah se tokni siwatl non itoka Febe. Ye tekipanoa itech tiopa iwan tokniyah tlaneltokakeh non moololoah Cencreas. ² Kuali xikyekselikah itech Itoka n Toteko, kemi moneki iwan tokniyah tlaneltokakeh, iwa xikpalewikah ika tlan kipoloa. Porke ye miakeh yokimpalewi, asta ne noiva onechpalewi.

³ Xiktlajpalakah n Priscila iwa n Aquila, yejwah noijkl kitekitiliah Cristo Jesú ijkó kemi ne. ⁴ Yejwah omixewijkeh onechpalewijkeh maya noiva ya kinmiktiskiah. Yika nimotlasojkamati innawak iwa amo san ne, yej noiva motlasojkamatih n tokniyah non de oksikimeh tiopameh non amo judíos. ⁵ Noiva xikintlajpalakah n tokniyah non kineltokah Cristo Jesú non moololoah icha n Priscila iwa n Aquila. Xiktlajpalakah notlasoj Epeneto; ye akin achto okineltokak Cristo kan tlali de Acaya. ⁶ Xikontlajpalakah n María, akin miak yotekitik nomonawak. ⁷ Xikintlajpalakah nokniyah non kineltokah Cristo Jesú, Andrónico iwa Junias, yejwah ken nikinmita, inwah onitsaktoka. Nochteh n tlatematiltijkeh kintlakitah, yejwah achto okineltokakeh Cristo, iwa ne satepa.

⁸ Xikontlajpalokah n Amplias, nokni non satlawel niktlasojtla akin noiwa kineltoka n Toteko. ⁹ Xikontlajpalokah n Urbano, akin towah kitekitilia n Toteko Cristo Jesús, iwa Estaquis, notlasoj. ¹⁰ Xikontlajpalokah Apeles, akin milák kineltoka Cristo. Noiwa xikonintlajpalokah ichanejkawah n Aristóbulo.

¹¹ Xikontlajpalokah n israelita Herodión non ken nikita, iwa ichanejkawah n Narciso akimeh noiwa kineltokah n Toteko Jesús. ¹² Xikontlajpalokah n Trifena iwa n Trifosa akimeh noiwa tekitih itech iteki n Toteko Jesús; noiwa xikontlajpalokah toknitsi Pérsida, akin miak yotekitik inawak Toteko Jesús. ¹³ Xikontlajpalokah n Rufo, non Dios okimopejpenili, noiwa xiktlajpalokah ína, ye kajki kemi yetoskia nomamá. ¹⁴ Xikontlapalokah Asíncrito, Flegonte, Hermes, Patrobas, Hermas iwa nochteh tokniwah non inwah kateh. ¹⁵ Noiwa xikontlajpalokah n Filólogo iwa n Julia, Nereo iwa iwelti. Noiwa Olimpas iwa nochteh n tokniwah non inwah kateh.

¹⁶ Ximosepantlajpalokah iwa ximoixtenamikikah ika chipawak nomoyolo. Nochteh tokniwah tlaneltokakeh nomechontlajpalooah.

¹⁷ Nokniwah, nomechtlatlaujtia kuali xikinmitakah akimeh kinekih kinxexeloskeh tokniwah iwa tekuatlapololtiah ika tlan kitemachtiah, porke yejwah amo kitemachtiah tlan yonomechmachtijkeh. Amo inwah ximowikakah, ¹⁸ porke nonteh amo kitekichi-wiliah n Toteko Cristo Jesús, yej san intlalax kitekitiliah. Iwa ika inyamankatljitol kinkajkayajtinemih akimeh amo kiyekajksikamatih. ¹⁹ Nochteh n tokniwah kimatokeh nomejwah nonkichiwah tlan Dios kineki; yika nipaki, iwa nikneki xiyetokah nomixtلاماتkeh para nonkichiwaskeh tlan kuali, iwa amo para nonkichiwaskeh tlan amokuali. ²⁰ Iwa Dios non teyorsewia, san nima kitlajtlaksas n satanás itlampa nomokxiwah. Itlasojtlalis Toteko Cristo Jesús mayeto nomowah.

²¹ Nomechontlajpaloa Timoteo akin nowa tekiti. Noiwa nomechontlajpaloh nokniwah judíojteh Lucio, Jasón iwa Sosípater non ken nikinmita.

²² Ne, Tercio, akin onikikuilo nin amatlajkuíloli, noiwa nomechontlajpaloa itech itoka n Toteko Jesús.

²³ Noiwa nomechontlajpaloa Gayo, akin icha nimokalotijtok, iwa kitetlanetijtok icha para ompa mamoololokah nochteh n tokniwah non kineltokah Cristo Jesús.

Nomechontlajpaloa Erasto, ye n tominololo itech nin altepetl, iwa n tokni Cuarto noiwa nomechontlajpaloa.

²⁴ N Toteko Cristo Jesús manomechtiochiwa nochteh nomejwah.

Pablo kiweyijkachiwa Dios

²⁵ Axa, matikweyilikah Totajtsi Dios, Akin weletis okachi nomechchikawas ika n kualtlájtoli non ne niktematiltia iwa itemachtilis n Toteko Cristo Jesús. Ye tlan yowejka amaka okimatia porke Dios ayamó okinekia makixmatikah, ²⁶ pero axa yomoteix-matiltiko ika intlajkuilwah n profetas, ijkó kemi Dios Akin nochipa yolitok otlanawati. Nin tlamachtlistli non ayamakah okimatia, axa yomotetlapowi sentetl para nochteh n tlaltikpaktlakah makineltokakah iwa makitlakitakah Dios.

²⁷ ¡N Totajtsi Dios, Akin sanwel Ye saikpanoa ixtlamati, nochipa matikweyilikah ika tlan Cristo Jesús kichiwa totech!

Ijkó mamochiwa.

San Pablo sakinika kintlajkuilia non de Corinto

Pablo kintlajkuilia n tlaneltokakeh de Corinto

¹ Ne Pablo, Dios onechnotski iwa ika itlanekilis okimonekilti maniyeto itlatematilti n Cristo Jesús, san sika iwa n tokni Sóstenes, ² tomechtajkuiliah nomejwah tokniwah tlaneltokakeh akimeh nonchantitokeh Corinto, akimeh iaxkawah Dios iwa nonseititokeh iwan Cristo Jesús. Dios onoméchnotski xiyetokah iaxkawah, san sika iwan nochteh non kiteneva Itoka n Toteko Cristo Jesús, non yejwah Inteko iwa tejwah noiva Toteko. ³ Dios Totajtsi iwa n Toteko Cristo Jesús manomechmakakah intiochiwalis iwa inyorsewilis.

Pablo motlasojkamati inawak Dios

⁴ Nochipa nimotlasojkamati inawak Dios por nomejwah, ken onomechtiochi por Cristo Jesús. ⁵ Por nonseititokeh iwa n Cristo, Dios onomechmák nochitiochiwalis non wits de ilwikak, itech nochitlan nonkijtoah iwa itech nochitlan ixtlamatílistli. ⁶ Ijkó kiné, nochitlan yomijto de Cristo, ya yomochiwako nomotech. ⁷ Yika, amitla nomechpoloa tlan Dios kitetliokolia, ikuak nonkichiah n tonati keman Toteko Cristo Jesús walmokopas. ⁸ Ye nomechchikajtos asta iksemi, para amaka manomechtajtlakolti asta itonati n Toteko Cristo Jesús. ⁹ Dios nochipa kichiwa tlan kijto, iwa Ye onoméchnotski para xiseititokah iwan Ikone Cristo Jesús, Toteko.

Amo ximoxexelokah

¹⁰ Nokniwah, itech Itoka n Toteko Cristo Jesús, nomechtlatlaujtia ximoajsikamatikah iwa amo ximoxexelokah. Okachi kuali ximoyekwikakah iwa ximokuanamikikah. ¹¹ Nokniwah, ijkí nomechilia, porke ichanejkawah n Cloé yonechtlapowijkeh sikimeh de nomejwah nonmixtokatokeh. ¹² Ika ni nikneki nomechilis sikimeh de nomejwah nonkijtoah: “Ne nika iwan Pablo”.

Oksikimeh kijtoah: “Ne nika iwan Apolos”.

Oksikimeh “Ne nika iwan Pedro”.

Iwa oksikimeh: “Ne nika iwan Cristo.” ¹³ ¿Nonkiyejyekoliah Cristo xexelitok? Noso ¿ne Pablo onimik nomopatka ipan krus? ¿Noso onomechkuatekijkeh itech notoka? ¹⁴ Niktlasojkamati Dios porke mach aka ok se onikkuaateki, sanwel Crispo iwa n Gayo; ¹⁵ ijkó, amaka weletis kijtojtinemis omokuaateki itech notoka. ¹⁶ Noiwa onikinkuaateki ichanejkawah n Estéfanus, iwa amo nikilnamiki kox aka ok se onikkuaateki. ¹⁷ Porke Cristo amo onechtítlanki manitlakuaateki, yej onechtítlanki maniktematilti n kualtlájtoli non temakixtia, pero amo onechtítlanki manitetlapowi ika kuájkuali tlájtoli, porke tlamo sanenka omikki n Cristo.

Cristo Ye ichikawalis iwa ixtlamatilis Dios

¹⁸ Para akimeh moixpolojtinemih, kijtoah mach itla ipati tlan motemachtia de imikilis n Cristo itech krus. Pero tejwah akimeh timomakixtijtokeh, tikneltokah nin tlájtoli ye iweletilis Dios. ¹⁹ N tiotlajkuífoli kijto:

Nikimpojpolilis tlan satlawel kimatih n ixtlamatkeh,

iwa akimeh nochit kajsikamatih nikchiwas ayakmitla makajsikamatikah. ^{Is. 29:14}

²⁰ ¿Kanin ka n ixtlámatki noso kanin ka n tlamachti noso non kimolia nochit kimiati? Inmixtlamátilis n tlaltikpaktlakah, Dios okíkopki itech tlan tepinati. ²¹ Dios, Akin kimiati tlan kichiwa, amo okinkawili n tlaltikpaktlakah makixmatikah san ika yejwah inmixtlamátilis, yej Dios okinek kinmakixtis ika itemachtilis “tontotik” akimeh kineltokah.

²² N judíojteh kinekih kinmitaskeh milagros, iwa n tlakah de Grecia kitemoah ixtlamachtlis, ²³ pero tejwah tiktematiltiah n Cristo, Akin okikrusifikasikeh. N judíojteh kinkuejsoa tlan titetlapowiah, iwa non amo judíojteh kijtoah mach kipia tlalnamikílistli. ²⁴ Pero akimeh Dios yokínnotski, judíojteh noso amo judíojteh, Cristo

ye ichikawalis iwa iixtlamatilis Dios. ²⁵ Porke tlan kimoliah amitla ipati itech iixtlamatilis Dios, okachi kipia ixtlamatlistli ke inmixtlamatilis n tlaltikpaktlakah. Iwa tlan kimoliah amo chikawak de Dios, okachi chikawak ke inchikawalis n tlaltikpaktlakah. ²⁶ Nokniwah, xikajskamatikah Dios onoméchnotski, maya n tlaltikpaktlakah kijtoah nomejwah mach nonmixtlamatkeh, noso nomechitah amo nonweyijkatitokeh nion nomechitah nontominyojkeh. ²⁷ Pero Dios, okimpéjpenki non amo ixtlamatkeh itech nin tlaltíkpaktli, para kimpipinatis non motenewah ixtlamatkeh, iwa okimpéjpenki non amo chikawakeh, para kimpipinatis akimeh motenewah chikawakeh. ²⁸ Noiwa Dios okimpéjpenki akimeh itech nin tlaltíkpaktli amaka kintlakitah iwa amaka kinyekita, matikijtokah non amitla impati, para kimpojpolilis impati akimeh satlawel kimatih moweyiliah. ²⁹ Ijkó amaka weletis moweyijkachiwas ixpa n Dios. ³⁰ Yika, inewia Dios okichi xiseititokah iwan Cristo Jesús, noiwa okichi n Cristo mayeto toixtlamatilis, iwa por Cristo tiyolchipawatokeh ika iesso. ³¹ Ijkó kiné, kemi kijtoa n tiotlajkuíloli: “Tla aka kineki moweyijkachiwas, okachi kuali makiweyijkachiwa Toteko.” *Jr. 9:24*

2

Itemachtilis Cristo Akin okikrusifikarokeh

¹ Nokniwah, ikuak ne onomechmatiltito tlan milák okichiwako Ikone Dios, ne mach onomechtlapowi ika intlajtol ixtlamatkeh nion ika kuájkuali tlájtoli. ² Porke ikuak onikatka nomowah, mach itla ok se oniknek nomechmachtis, yej sanwel de Cristo Jesús Akin okikrusifikarokeh. ³ Ikuak onikatka nomowah onechpoloaya nochikawalis iwa satlawel onimawia. ⁴ Ikuak onomechmatilti itemachtilis Cristo, amo oniknek nomechtlaneltoktis ika kuajkuali tlájtoli, yej ika ichikawalis n Espíritu iwa iweletilis Dios, ⁵ para ijkó nomotlaneltokalis matlaxilito itech iweletilis Dios iwa amo itech inmixtlamatilis n tlakah.

Dios techmoixmatiltia ika Iespíritu

⁶ Yika, timotlapowiah ika ixtlamatílistli inwah akimeh yochikawak n tlaneltokalis. Pero nin ixtlamatílistli amo walewa itech nin tlaltíkpaktli, nion intech akimeh tlanawatiah itech nin tlaltíkpaktli non pojpoliwiseh. ⁷ Ijkó kiné, tikteixmatiltiah iixtlamatilis Dios, nin ixtlamatílistli amaka okimatis iwa amo onestoka, nin ixtlamatilis kijtosneki itemakixtilis Dios, non yokipejpenka para techaxkatis desde ikuak ayamó okichijchiwaya n tlaltíkpaktli. ⁸ Nion se tlanawati itech nin tlaltíkpaktli okajskama nin iixtlamatilis Dios. Porke tla kajsikamatiskiah, amo tlanawatiskiah makikrusifikarokah n Toteko Cristo Jesús, Akin nochipa weyijkatitok. ⁹ Kemi kijtoa n tiotlajkuíloli:

Amaka okitak,
amaka okikak,

nion amaka tlakatl okajskama tlan Dios okijo kinmakas akimeh kintlasojtla. *Is. 64:4*

¹⁰ Dios otechnextili ika Iespíritu nochí tlan amaka okimatis, porke Iespíritu nochí kimiati asta tlan Totajtsi Dios kiyolpixtok.

¹¹ Porke nion se tlakatl kimiati tlan kiyolpixtok ok se tlakatl, sanwel n espíritu non kajki ijtkí kimiati tlan kipia itech iyolo. Ijkó noiwa, amaka kimiati tlan kiyeyekolia n Totajtsi Dios, sanwel Iespíritu Dios kimiati. ¹² Tejwah amo otikselijkeh se espíritu de nin tlaltíkpaktli, yej otikselijkeh Iespíritu Dios, para matikajskamatikah nochí tlan Dios itech iteiknomatilis otechtllokoli. ¹³ Tejwah titlajtoah ika tlájtoltéh non Iespíritu n Dios otechinmajsikamatilti, iwa amo ika tlájtoltéh non san tonewiah otikinmomachtijkeh. Ijkó tikinmajsikamatiltiah tlan n Espíritu kimonekiltia, akimeh kipiah n Espíritu itech inyolo.

¹⁴ Pero akimeh amo kipiah Iespíritu n Totajtsi Dios itech inyolo, amo kiseliah n ixtlamatílistli non Dios kitemaka ika Iespíritu, porke kimoliah san se kuatlapolojtok. Amo weletih kajsikamatih, porke non tlamachtílistli sanwel kajsikamatih akimeh kipiah n Espíritu. ¹⁵ Pero akin kipia Iespíritu n Dios, nochí kitemoa iwa nochí kixmatih. Pero akimeh amo kipiah n Espíritu, amo weleti kajsikamati akimeh ejé kipiah n Espíritu.

¹⁶ Porke n tiotlajku'loli kijtoa: “¿Akin kímati tlan kiyejyekolia Toteko? ¿Akin weletis kimachtis Dios?”

Is. 40:13

Perotejwah tikajskamatih itlayeheyekolis n Cristo.

3

Tiitekitkeh Dios

¹ Nokniwah, ne mach oniwéletki onomechnónotski kemi nikinnonotsa akimeh kinyakana n Espíritu Santo, yej onomechnonotski kemi akimeh ok kichijtinemih tlan yejwah kinekih, kemi nonyaskiah nonselekkokoneh inawak Cristo. ² Onomechmachti ika tlájtoli non amo tekio, porke nomejwah kemi nonselekkokoneh non amo weletih tlakuah, yej san ok chichih, iwa asta axa ayamó nonweletih nonkiyekkajskamatih. ³ Porke tla ok nonxikojmikih, iwa amo nonmoyekwikah iwa nonmoxexeloah, kijtosneki ok non tlaltikpaktlakah, porke nonkimokawiliah manomechyoltilana tlan kineki nomokuerpo kemi kichiwah nochteh n tlaltikpaktlakah.

⁴ Porke ikuak aka kijtoa: “Ne nika iwan Pablo”, iwa ok se kijtoa: “Ne nika iwan Apolos”. Tla ijkó nonkiyeyekolah, nonkichiwah kemi kichiwah n tlaltikpaktlakah.

⁵ Porke, ¿akin Pablo?, noso ¿akin Apolos? Tejwah sanwel tiktektiliah Dios, iwa nomejwah ononkineltokakeh n Toteko ika tlan otomechmatiltjkeh. Yika, tejwah sanwel otikchijkeh n tekitl tlan Dios otechnawati matikchiwakah.

⁶ Ne Pablo onitook, Apolos okaateki, pero Dios, Ye akin okiskalti. ⁷ Ijkó kiné, akin tooka, iwa akin kiaatekia, amitla impati, yej Dios Akin kiskaltia n tlátoktli.

⁸ Akin tooka iwa akin kiaatekia, san se impati, pero Dios kintlaxtlawis ijkó kemi otekitekeh. ⁹ Porke tejwah san titlapalewijkeh itech iteki Dios, iwa nomejwah nonkateh kemi itlal non Dios kitekititok.

Nomejwah noiwa kemi se kali non Dios kimochijchiwilijtok.

¹⁰ Ne Pablo nika kemi se kalchijchi, non Dios onechkawili maniktsimpewalti n kali, pero ok se okitlali makiskalti non kali. Iwa tinchteh moneki matiktlachilikah kenijkeh tikiskaltiskeh non kali. ¹¹ Porke amaka weletis kitsimpewaltis ok se kali, porke n atlátentli ya kajki iwa Ye n Cristo. ¹² Se kalchijchi weletis kiskaltis se kali ipan non atlátentli ika oro, plata ika temeh non tsotsotlanih, noso ika kuawitl, oasakatl noso akatl. ¹³ Pero nochitikitl non otikchijkeh motenextis itech n iksemi tonati, porke itech neká tonati toteki moyejyekos ika tletl, iwa nochitikitl tlatlas iwa nochitikitl kixikos n tletl. ¹⁴ Tla iteki se tlakatl kixikos n tletl, Dios kuali kitlaxtlawis. ¹⁵ Pero tla iteki amo okixiko n tletl, kipolos nochitikitl, pero weletis momakixtis kemi ikuak aka tlakatl kicholilia n tletl.

¹⁶ ¿Mach amo nonkimati nomejwah icha Dios, iwa Iespíritu Dios chantitok nomotech? ¹⁷ Tla se tlakatl kixixinia itiopa Dios, Dios kipojpolos non tlakatl. Porke itiopa Dios tiochitok, iwa non tiopa nomejwah nonkimajmanah.

¹⁸ Amaka mamokajkayawa. Tla aka momachilia semi ixtlamati itech nin tlaltíkpaktli, mamochiwa kemi se non amitla kímati, para ijkó yetos se non milák ixtlamati. ¹⁹ Porke inmixtlamatilis n tlaltikpaktlakah amitla ipati ixpa n Dios. Kemi ikuilitok: “Dios kinkajkawa n ixtlamatkeh mamokajkayawah inselti.”

Job 5:13

²⁰ Noiwa kijtoa: “N Toteko kímati intlayeheyekolis n ixtlamatinih, amitla ipati.”

Sal. 94:11

²¹ Yika, amaka mamoweyijkamati por inmixtlamatilis n tlaltikpaktlakah, porke nochitikitl tlan onka nomoaxka.

²² Pablo,

Apolos,

Pedro,

n tlaltíkpaktli,

n yolílistli,

n mikílistli,

tlan axa onka,

noso tlan satepa yetos,

nochi nomoaxka, ²³ iwa nomejwah nonteaxkawah inawak Cristo, iwa Cristo teaxka inawak Dios.

4

Inteki itlatitlanilwah Dios

¹ Ijkó moneki matechitakah n tlakah kemi titekitkeh de Cristo, iwa matiktematiltikah itlajtol Dios non olaatitoka. ² Ijkó kiné, akin kiselia se tekitl, moneki mayeto yekmilajka.

³ Pero ne mach nimotekipachoa tla nomejwah noso n tekiwajkeh de nin tlaltíkpaktli nechistlakoa. Iwa nion ne nimixewis nikijtos kox kuali noteki noso amó. ⁴ Porke maya notlalnamikilis amo nechteilia, amo kijtosneki amo nikpia tlajtlácoli. Porke Noteko kijtos kox nitlajtlakole noso amó. ⁵ Ijkó kiné, amaka san nima xiktlajtlakoltikah, yej ximochiakah maajsiki n tonati ikuak Toteko wits iwa kinextis tlan tlaatitok itech iyolo n tlakatl, n Toteko kichiwas mamonexti tlan se okichi, ikuakó se kiselis tlan okimotlanili.

⁶ Nokniyah, ijkí nomechtlapowia para manomechpalewi. Ne Pablo yonomechajsika-matilti Apolos iwa ne san titekitkeh inawak Dios. Ijkí nomechtlapowia para amaka makixpanawi itlajkuil Dios, iwa amaka makiweyili se tlamachti iwa ok se makitlawelita.

⁷ Yika, ¿akin omitsili okachi miak timopati? ¿Mach amo Dios omitsmactili nochí tlan tikpia? Iwa tla Ye omitsmactili, ¿tleka timoweyilia kemi yaskia san te monewia otikmotlanili?

⁸ Nomejwah ayakmitla nomechpoloa, ya nonkitlawelpiah nochí tlan ononkinekeh. Nomejwah yononmochijkeh wejweyi reyes, iwa tejwah onontechilkajkeh. ¡Nipakiskia tla de milajka nomejwah nonyaskiah wejweyi reyes, iwa ijkó titlanawatijtoskiah sansikah! ⁹ Ne nikita ken yaskia Dios otechka sa iksemi tejwah akimeh titetlapowiah de itlajtol Dios. Tikateh kemi non ya kinmiktitiweh. Nochteh techmawisoah, asta n ángelteh iwa n tlaltíkpaktlakah. ¹⁰ N tlakah techitah mach ok ajsitok totlalnamikilis porke titlamachtiah de Cristo, pero nomejwah nonmomachiliah nonmixtlamatkeh itech itlajtol Cristo. Tejwah amo tichikawakeh, iwa nomejwah nonchikawakeh. N tlaltíkpaktlakah techtlawelitah iwa nomejwah nomechtlakitah. ¹¹ Asta axa, tejwah tiapismikih, tiamikih iwa amo tikpia tlan tkmokentiskeh, n tlakah techtlaijyowiltiah iwa amo tikpia tocha, ¹² tisotlawah ikuak titekitih ika tomawah. Ikuak n tlakah fiero techtenewah, tejwah tiktlatlaujtiah Dios makintiochiwa, ikuak techtotojtokah tejwah tikxikoah. ¹³ Tla techpojpoah, tejwah tikinyeknotsah. Iwa asta axa n tlaltíkpaktlakah techitah kemi se tlásoli noso kemi itla non ayakmó kuali.

¹⁴ Amo nomechtlajkuililia para nomechpijpinatis, yej para nomechnonotsas kemi nikinnonotsa nopolwah non nikintlasojtla. ¹⁵ Porke maya nonkimpiajkeh májtlaktli mil temachtijkeh, amo nonkimpiajkeh nomotajwah, ne onitlapewalti onomechmachti itemachtilis Cristo, yika ne onimochi kemi nomota. ¹⁶ Ijkó kiné, nomechtlatlaujtia xikchiwakah ijkó kemi ne nikchiwa.

¹⁷ Yika, nomechtitlanilia n Timoteo, nokone akin niktlasojtla itech Toteko. Ye nomechilnamiktis kenijke onínenki ixpa n Cristo, ijkó kemi niktemachtia kan moololoah n tokniyah non kineltokah Cristo Jesús. ¹⁸ Sikimeh de nomejwah semi nonmowey-italiah, porke non kimoliah mach nias nomechitati. ¹⁹ Pero, tla Dios kimonekiltia, nias nomechitati san nima. Ikuakó nikitas kox milák kipiah weletílistli nekateh akimeh satlawel moweyiliah, noso san kimatih tlatlajtoah. ²⁰ Porke n tlakah non kimokawiliah Dios makinnawati amo san tlatlajtoah, yej kinextia ichikawalis Dios itech innemilis. ²¹ ¿Tlan nonkinekeh? ¿Nonkinekeh manomechtlaijyowiltiti?, noso ¿nonkinekeh manomechtlapowiti ika tlasojtlálistli iwa ika tlájtoli yámanki?

5

Xiktotokakah n tlakatl non omonepano iwa ichawana

¹ Yomoma seme de nomejwah omonepano iwan ichawana. Nin se weyi tlajtlácoli, asta non amo kineltokah Dios mach para ijkó kichiwaskeh.

² ¡Iwa maya ijkó nomejwah ok nonmoweyiliah! ¡Okachi kuali nonyetoskiah ika neyolkókoli! Akin okichi nin weyi tlajtlácoli xiktotokakah iwa ayakmó mamoseitili nomowah. ³ Maya ne amo nika nomowah, noespíritu kajki nomowah, iwa yonik-tlajtlakolti akin okichi non weyi tlajtlácoli, kemi ne niyetoskia ompa nomowah. ⁴ Ximoololokah itech Itoka n Toteko Cristo Jesús, iwa ne niyetos nomowah itech noe-spíritu. Iwa iweletilis n Toteko yetos nomowah. ⁵ Non tlakatl moneki makitemaktikah imak satanás para makitlaijyowilti ikuerpo, iwa ijkó n Toteko makimakixti iespíritu non tlakatl itech neká iksemi tonati ikuak Cristo wits.

⁶ Nomejwah amo ximoweyilikah ika tlan nonkichijtokeh. ¿Ayamó nonkikakih n tlájtoli non kijtoa: “Achitsi levadura kisamawa nochi n textli”? ⁷ Yika, xikmokixtilikah nochi tlan nomechyolijtlakojtok, para xiyetokah kemi n paj non mokua itech ilwitz de paskuah, non kichijchiwah ika n yankuik textli non amo kipia levadura, porke Cristo okimiktijkeh topatka kemi n ichkatsi non okimikiyah itech ilwitz de Paskua.

⁸ Ijkó, n paj non kipia levadura kijtosneki ye n tlajtlácoli iwa nochi tlan amokuali se kichiwa. Okachi kuali matikchiwah nin ilwitz de Paskua ika de milajka toyolo chipawak, iwa matiyetokah kemi n paj non amo kipia levadura.

⁹ Itech non ok se noamatlajkuil onomechili amo ximonelokah iwa non momekatiah. ¹⁰ Ika tlan onomechili amo kijtosneki ximoxelokah de akimeh momekatijtinemih, n tominápitah, n ichtekah, noso akimeh kinweyiliah n diosmeh non san kinmachijchiwah, porke para ayakmó nonmowikaskeh inwah, san semi nonkikakajtewaskiah nin tlaltípkaktli. ¹¹ Tlan ne oniknek nomechilis ye ni: Amo ximowikakah iwa akin kijtoa nomokni itech Cristo, iwa ok momekatijtinemi, noso tominápitli, noso kinweyilia diosmeh non kinmachijchiwah, noso xolópijtli, tlawanki, noso tlachtek, iwa non tlakatl nion amo íwa xitlakuakah. ¹² Porke ne amo oniwala onikintlajtlakoltiko non amo kixmatih Dios. Pero nomejwah moneki nonkintlajtlakoltiskeh n tlaneltokakeh non moololoah nomowah. ¹³ Yika moneki xikkixtikah non tlajtlakole nomonawak.

6

Amo ximotejteilikah inmixpa n tekiwajkeh non amo kitlakitah Dios

¹ Ikuak nomejwah nonkinekih nonmoteiliskeh iwan ok se tokni, ¿tleka nonmixewiah non yawi nonmotejteilitiweh ixpa se tekiwa non amo kitlakitah Dios? Iwa amo non yawi ixpa se non tlayakantok non kineltokah Cristo Jesús. ² ¿Mach amo nonkimatih nomejwah akimeh nonkitlakitah Dios nonkinmixkomakaskeh n tlaltípkaktlah? Iwa tla nomejwah nonkinmixkomakaskeh, ¿mach amo nonweletiskeh nonkinyolsewiskeh akimeh moteiliah san ika amitla? ³ ¿Amo nonkimatih noiya tikinmixkomakaskeh n ángelteh? ¡Tla ijkó, okachi tiweletiskeh tikinyolsewiskeh akimeh motejteiliah itech nin tlaltípkaktli! ⁴ Tla nonmokualaniah iwa aka ok se, ¿tleka nonmoteiliah ixpa n tekiwajkeh non amo kitlakitah Dios? ⁵ Ijkí onomechili para xipinawakah. ¿Mach amo onka se nomokni tlaneltokak akin kimatis keniji nomechnonotsas ikuak nonmokualaniah? ⁶ Ikuak se tokni mokualania iwa ok se tokni, ¿kox kuali ka mawiah mamoteilith innawak tekiwajkeh non amo kitlakitah Dios?

⁷ De milajka, nomechilia, tla ok nonmokuakualaniah iwa n oksikimeh nomokniwah, sanenka nochi tlan ya nonkichiwah. Okachi kuali xikijyowikah tlan amokuali nomechtoktiah, noso xikmokawilikah manomechtlachtekikah. ⁸ Pero nomejwah nonkichiwah tlan amo kuali iwa asta nonkintlachtekiliah nomokniwah.

⁹ ¿Mach amo nonkimatih akimeh amo yolchipawakeh amo weletis kalakiskeh kan Dios tlanelwatijtok? Amo manomechkajkayawakah; porke nochteh akimeh

kochtinemih itech tlajtlácoli,
akimeh kinweyiliah diosmeh non kinmachijchiwah,
akimeh momekatijtinemih,
akimeh kichijtinemih tlan pitsotik iwa tetlajyalti,
n tlakah non kinmelewiah n tlakah,

¹⁰ n tlachtekeh,
n tominápisteh,
n tlawankeh,
n tepojpojkeh,
iwa akimeh tekjkayawah para tlachtekiskeh,
mach kalakiskeh kan Dios tlanawatijtok.

¹¹ Sikimeh de nomejwah achto ijkó ononkichijtinemiah. Pero axa ya nonyolchipawakeh, iwa ya nonteaxkawah inawak Dios. Iwa axa Dios ya kajki nomowah, por Cristo Jesús iwa por Iespíritu Dios.

Amo matikpitsotilikah tokuerpo porke ika tikweyiliah Toteko

¹² Ijkí mijtoa: “Nochi tlan ne niknekis nikchiwas, weletis nikchiwas”, pero amo nochi nechpalewis. Milák weletis nikchiwas san tlan niknekis, pero amo nikmokawilis itla manechyoltilana. ¹³ Nochi tlákuali omochi para totlalax, iwa totlalax para makiseli n tlákuali, pero se tonati Dios kimpojpolos san ken ome. Noijki tokuerpo amo omochijchi para matiawlnemikah, yej tokuerpo omochijchi para matikweyilikah n Toteko, iwa n Toteko machantito totech. ¹⁴ Iwa ijkó kemi Dios okiyoliti n Toteko, noiwa tejwah techyolitis ika iweletilis.

¹⁵ ¿Mach amo nonkimatih nochteh nomejwah nonseititokeh itech ikuerpo n Cristo? Tla ijkó, ne akin niseititok itech ikuerpo n Cristo, ¿weletis nikseitiliti nokuerpo iwan ikuerpo se awilsiwatl? ¡Ayik! ¹⁶ ¿Mach amo nonkimatih ikuak se tlakatl moseitilia iwan se awilsiwatl, mokopah san se kuerpo? Porke itlajkuilol Dios kijtoa: “Yejwah ome mochiwa san se.” ¹⁷ Pero akin moseitilia iwan Toteko, mochiwa sa se itech espíritu.

¹⁸ Xikcholilikah n awilnemílistli. Nochi tlajtlákoli tlan se kichiwa, mokawa páñixko itech ikuerpo, pero akin momekatia, tlajtlakolchiwa iwa inewia kijtlakoa ikuerpo. ¹⁹ ¿Amo nonkimatih nomokuerpo icha n Espíritu Santo non Dios onomechmák, iwa n Espíritu Santo yolitok nomotech? Iwa nomokuerpo mach ok nomoaxka, ²⁰ porke Dios onomechko saikpanoa patio. Yika, moneki nonkiweyijkachiwaskeh Dios ika nomokuerpo iwa ika nomoespíritu, porke nochti iaxka n Dios.

7

Ijkí moneki manemikah non yomonamiktijkeh

¹ Axa, manomechnankili tlan ononnechtlahtlanijkeh ikuak ononnechtlahtlajkuilijkeh. Milák, kuali ka tla se tlakatl amo monamiktis; ² pero kemi miakeh momekatiah, okachi kuali nochti tlakatl makipia isiwa, iwa nochti siwatl makipia iokich. ³ N teokich moneki mamotemakti san iwa isiwa, iwa n tesiba mamotemakti san iwa iokich. ⁴ Porke n siwatl non ya kipia iokich, ikuerpo ayakmó iaxka, yej iaxka iokich. Noiwa n tlakatl non ya kipia isiwa, ikuerpo ayakmó iaxka, yej iaxka isiwa. ⁵ Yika, amo ximonenekikah. Pero tla nonmomeh yononmoyekkajkeh nonkochiskeh nonmijixkoyah kanaj kech tonati para non motiotsajtsiliskeh, kuali ka. Pero satepa oksepa ximoseitilikah. Amo kichiwa ayakmó nonweletiskeh nonmoxikoskeh, iwa n satanás nomechyotilanas para xitljatlakolchiwakah.

⁶ Tlan nomechilijtok, amo xikitakah kemi se tlanawátili, yej tla nonkitah kuali ka, ijkó xikchiwakah. ⁷ Ne niknekiskia nochteh n tlakah mayetokah kemi ne, pero tisejsemeh Dios otechmajmák tlatlámantli toyalis.

⁸ Yika, ne nikinmilia n telpochwewemeh iwa n iknosiwameh, okachi kuali mamokawakah inselti kemi ne. ⁹ Pero tla amo nonmoxikoah, ximonamiktikah. Porke okachi kuali ximonamiktikah, para amo manomechyotilana tlan kelewia nomokuerpo.

¹⁰ Pero akimeh yomonamiktijkeh, ijkí nikinnawatia, n tesiba amo makikajkawa iokich. Nin tlanawátili amo noaxka, yej Toteko Dios itlanawatil. ¹¹ Pero tla n tesiba kikajkawa iokich, ayakmó oksepa mamonamikti, noso mamotlapojpolwi iwa n iokich, iwa n teokich amo makikajkawa isiwa.

¹² N oksikimeh, nikinmilia tlan ne nikyejyekolia; iwa amo tlan Toteko kijtoa: tla se tokni kipia isiwa amo tlaneltokak, pero isiwa kineki yetos íwa, non tokni amo makikajkawa isiwa. ¹³ Iwa tla se siwatl kipia iokich amo tlaneltokak, iwa ye kineki yetos íwa, amo makikajkawa iokich. ¹⁴ Porke n teokich non amo tlaneltokak kiselia itlatiochiwalis Dios por isiwa. Iwa n siwatl non amo tlaneltokak, kiselia itlatiochiwalis Dios por iokich. Tla amo ijkó yetoskia, nomopilwah mach kiseliskiah itlatiochiwalis Dios, pero axa yolchipawakeh. ¹⁵ Pero tla n teokich noso n tesiba non amo kineltokah Cristo, mochijchikawa kikajkawas se tokni, makikajkawa. Porke Dios otéchnotski para matiyetokah ika yolsewilistli. ¹⁶ ¿Ken tikmati te siwatl, kox weletis tikpalewis mokich iwa Dios kimakixtis? ¿Noso te tlakatl ken tikmati kox satepa Dios kimakixtis mosiwa?

¹⁷ Tisejsemeh matipakikah ika tlan Toteko otechmajmák ijkó kemi ikuak otéchnotski, nochi ni nikinnajnawatia n tokniwah tlaneltokakeh. ¹⁸ Tla Dios kinotsas aka non ya kajki sirkunsidado, ijkó mamokawa. Iwa tla aka okínotski non ayamó kajki sirkunsidado ijkó mamokawa. ¹⁹ Amitla ipati tla se kajki sirkunsidado noso amó, tlan milák ipati, matikintlakitakah itlanawatilwah Dios. ²⁰ Yika, nonsejsemeh mamokawa kemi ikuak Dios okínotski. ²¹ Tla aka okatka tlanémaktli* ikuak okineltokak Cristo, amo mamotekipacho, pero tla aka weletis momakixtis imak iteko, mamomakixti. ²² Akin okatka tlanémaktli ikuak okínotski n Toteko, axa non tlakatl yomákiski iwa ya weletis kitekitilis n Toteko. Iwa akin omonawatiaya san ye inewia axa ya kajki kemi tlanémaktli inawak Cristo. ²³ Dios saikpanoa onomechko patío, ayakmó oksepa ximokawilikah manomechchiwah nontlanémakteh. ²⁴ Ijkó kiné nokniwah, ximokawakah ijkó kemi ikuak Dios onoméchnotski.

²⁵ Para akimeh ayamó nonmonamiktiah, amo nikpia itla yankuik tlanawátili tlan Toteko nomechnawatia, pero kualiká tla nonkichiwaskeh tlan ne nikyejyekolia porke Dios ika itlasojtlalis nechyakana. ²⁶ Ne nikyejyekolia okachi kuali tla se tlakatl noso se siwatl mokawa kemi kajki, porke ninteh tonatijmeh saikpanoa owijkeh. ²⁷ Tla tikpia mosiwa, amo xikkajkawa, iwa tla ayamó tikpia mosiwa, amo xikmotemoli. ²⁸ Pero tla se tlakatl monamiktia, amo tlajtlakolchiwa, iwa tla se íchpochtli monamiktia, noiva amo tlajtlakolchiwa. Pero akimeh monamiktiah, panoskeh itech miak tlaijywílistli, ne niknekiskia amo ijkó mapanokah.

²⁹ Nokniwah, tlan ne nikneki xikajsikamatikah ye ni: ayakmó tikpiah miak tonati. Yika, akimeh ya kipiah insiwa manemikah kemi akimeh ayamó monamiktiah, para makitekitilikah n Toteko. ³⁰ Akimeh moyolkokojtokeh, manemikah kemi amo moyolkokojtoskiah; akimeh yolpaktekeh, manemikah kemi amo yolpaktoskiah; iwa akimeh motlajtlakowiah, makichiwah kemi amo yetoskia inmaxka tlan okimokowijkeh. ³¹ Akimeh kinyolpaktia tlan onka itech nin tlaltíkpaktli, ayakmó makimokawilikah makinyoltilanto; porke tlan onka itech nin tlaltíkpaktli, pojpoliwi.

³² Ne niknekiskia amitla manomechtekipacho. Ikuak se tlakatl ayamó monamiktia, okachi kitekipachoa kenjki kitekitilis n Toteko. ³³ Pero ikuak yomonamikti, okachi kitekipachoa tlan onka itech nin tlaltíkpaktli para kipaktis isiwa, ³⁴ iwa itlayejyekolis xexelitok. N siwatl non ayamó kipia iokich iwa non ok íchpochtli okachi kitekipachoa kiyolpaktiskeh Toteko. Pero se siwatl non ya kipia iokich, okachi kitekipachoa tlan onka itech nin tlaltíkpaktli para kipaktis iokich. ³⁵ Nochi ni nomechilia para nomechpalewis, iwa amo para nomechtakawaltis. Xinemikah ika nomoyolo chipawak para ijkó nochipa nonkitekitiliskeh n Toteko.

³⁶ Tla se teta, kiyeyekolia okachi kuali mamonamikti ichpoch porke ya kipia xiwitl, makikawili tla kiyeyekolia kuali tlan kichijtok. N íchpochtli weletis monamiktis iwa amo tlajtlakolchiwa. ³⁷ Pero tla ok se teta, kitlalia itech iyolo iwa kiyeyekolia okachi kuali amo mamonamikti ichpoch, kuali tlan kichiwa. ³⁸ Yika, tla se teta kitemaktia ichpoch

* 7:21 Esklavos: kijtosneki ikuak n tlakah okitewikiliayah miak tomi iwa ayakmó oweletiah okikopayah omotemak-tiayah imak iteko.

mamonamikti, kuali ka. Pero tla se teta kineki ichpoch mamokawa iselti para kimopantis Dios, okachi kuali kichiwa.

³⁹ Se siwatl non ya kipia iokich kinawatijtos iokich tla ok onka. Pero tla iokich yomikki, n iknosiwatl weletis oksepa monamiktis iwa akin ye kinekis, pero mayeto se tlakatl non kineltoka Toteko Dios. ⁴⁰ Pero, tla ayakmó kinekis monamiktis, ne nikijtoa okachi kipias pakílistli. Ye ni tlan ne nikyejyekolia, ijkí nomechilia porke nikneltoka Iespíritu Dios onechinmák ninteh tlájtolteh para manomechnonotsa.

8

N tlákuali non se kimana

¹ Tlan axa nomechilis kox weletis nonkuaskeh n tlákuali non nonkimanah. Tinocchteh tikpiyah ixtlamatílistli, n ixtlamatílistli san ika se moweyiliah. Pero n tlaso-jtlálistli kichikawa totlaneltokalis. ² Tla aka kimolia ya kimati itla, kitenextia ayamitla kimati kemi moneki kimatis. ³ Pero tla aka kitlasojtla Dios, Dios kuali kiyekixmati.

⁴ Yika, tla tikkuskeh noso amo tikkuskeh n nakatl non yokinmanilijkah n diosmeh non kinmachijchiwah, tikmatokeh amitla impati itech nin tlaltíkpaktli, porke sanwel se Dios onka. ⁵ Porke maski mayetokah miakeh diosmeh iwa tekowajkeh kan ilwikak noso itech tlaltíkpaktli, ⁶ tejwah san se Dios tikpiyah, Totajtsi. Totajtsi okichijchi nochí tlan onka, iwa tejwah tiyolitokeh para Ye. Onka san se Toteko, Ye n Cristo Jesús. Iwa por Ye omochi nochí tlan onka itech nin tlaltíkpaktli, iwa tejwah noiwa tiyolitokeh por Ye.

⁷ Pero amo nochteh n tlaneltokakeh kimatih. Sikimeh non yomomatkeh kinweyiliah diosmeh non kinmachijchiwah, ok kikuah n tlákuali non kinmaniliah nonteh diosmeh non kinmachijchiwah ika sokitl, iwa inmixtlamachilis ken amo chikawak, kimachiliah okichijkeh tlajtlácoli. ⁸ Milák, tlan tikuah amo techyolchipawa inawak Dios. Porke amo okachi tiyolchipawatoskeh tla tikkuskeh, nion okachi timotlajtlakoltiskeh tla amo tikkuskeh. ⁹ Pero ximotlachilikah amo xikchiwakah itla tlan ika weletis kitlajtlakolchij-waltis nomokni, non ayamó chikawak itlaneltokalis itech Cristo. ¹⁰ Matikijtokah, tla se tokni non amo chikawak itlaneltokalis mitsita titlakuajtok kan kintlamaniliah n diosmeh non san kinmachijchiwah, ye weletis moyolchikawas kikuas tlan te tikkujtok. ¹¹ Iwa kemi te ya tikmati, tikchiwa mamoixpatho mokni non ayamó chikawak itlaneltokalis itech Cristo Jesús, Akin omikki por ye. ¹² Ijkó kiné, ikuak tikinkojkoia intlayejyekolis mokniwah non ayamó chikawak intlaneltokalis, nomejwah nontlajtlakolchijtokeh inawak Cristo. ¹³ Yika, tla niktlajtlakolchiwaltia se nokni ika tlan nikkuas, ayik nikkuas non nakatl, para amo maniktlajtlakolchiwalti nokni.

9

Tlan kichiwa se itlatematiilti Cristo

¹ ¿Mach amo niweletis nikchiwas tlan oksikimeh tlatematiltjkeh kichiwa, iwa nikmotlanilis tlan yejwah kimotlaniliah? Ne onikitak n Toteko Jesús, iwa nomejwah ononkineltokakeh ikuak onomechmatilti tlajtol Toteko. ² Tla innawak oksikimeh ne amo nitlatitlánili, para nomejwah ne nitlatitlánili, porke nomejwah ononkineltokakeh Cristo Jesús ikuak ne onomechmacti, iwa ika noni nomotech motenextia notekei milák nitlatitlánili.

³ Tla aka amo kipaktia tlan nikchiwa, ijkí nimotlajtolpalewis: ⁴ Kemi nitlatitlánili weletis nikmomajsewis iwa nikonis nochí tlan nechmakaskeh, ⁵ noiwa niweletis nikwikatinemis se nosiwa non kineltoka Cristo Jesús, ijkó kemi kichiwa n oksikimeh itlatitlániliwah Dios, ikniwah n Toteko, iwa Pedro. ⁶ ¿Noso nonkiyejyekolah san ne iwa Bernabé tikpiyah titekitiskeh para tikmotlaniliskeh tlan tikkuskeh? ⁷ Tla aka tekkititok kemi soldado, amo kipia ok se iteki para ika tlakuas. Akin kitooka uvas, noiwa kinkua. Akin tlajpia ¿amo koni lechi ikuak tlapatska? ⁸ Iwa amo xikmolikah san ne nikyejyekolia tlan nomechilijtok, porke itech itlanawatil Moisés noiwa ijkó kijtoa. ⁹ Itech itlanawatil Moisés ikuilitok: “Amo xiktlalili itempoxa n toro ikuak kitlaksa n trigo.” *Dt. 25:4*

Dios amo ijkó okijto, por kintekipachoa n torojteh, ¹⁰ yej techajsikamatiltia. Nin tlanawátili omoikuilo para matimopalewikah. Porke akin kitekiti n tlali iwa akin pixka, mochiah ika pakílistli para kiseliskeh tlan inmaxka. ¹¹ Yika, tla tejwah otiktookakeh itlajtol Dios itech nomoyolo, ijkó noiva weletis tikseliskeh itla tlan ika tipanotoskeh. ¹² Tla oksikimeh tlamachtijkeh nonkinmakah tlan ika panotoskeh, nomejwah okachi moneki techpalewiskeh.

Per tejwah amo tomechtatlajtlaniliah techpalewikah. Yej nochí tikxikojtiwitseh, para amo tiktsakuiliskeh n kualitlátoli non temakixtia. ¹³ Nomejwah kuali nonkimatokeh, akimeh tekitih kan Weyi Tiopa, kikuah tlan onka itech tiopa, iwa akimeh tlayektlaliah kan artal kan se tlamana, kiseliah tlan kimana. ¹⁴ Ijkó noiva, Toteko otlanawati akimeh kitemachtijtinemih itlajtol, mapanotiwah ika tlan kinmakah akimeh kinmachtiah. ¹⁵ Pero ne amo oniktektilti nomonawak nin tlanawátili, amo ijkí nomechtajkuililia para techmakakah itla. ¡Okachi kuali manimiki pero amo manikpolo nin pakílistli non nikpia!

¹⁶ Ne amo nimosijsinia por niktetlapowia n kualitlátoli non temakixtia. Porke notech powi maniktetlapowi. ¡Nimialma tla amo oniktetlapowi! ¹⁷ Yika, tla nitlamachtijtinemi porke nechpaktia nitlamachtijtinemis, nikmotlanilis notlatliokolil. Pero tla nitlamachtia porke onechnawatijkeh, trato nitlamachtijtinemis, porke Dios onechmaktili nin tekil. ¹⁸ Ijkó kiné, ¿katlie notlaxtlawil? Ne nikselia notlaxtlawil ijkuaq niktetlapowia n kualitlátoli iwa amitla niktlani. Ijkó nikchiwa iwa amo nikintlajtlanilia tlan yonikmotlanili por niktetlapowia itlajtol Dios.

¹⁹ Maya amaka inawak niteaxkatitok, ne nimoteaxkatia inmixpa n nochteh, para okachi miakeh manikintlaneltokti. ²⁰ Ijkuaq nika iwan judíojteh nimochiwa kemi njudío, para manikintlaneltokti inawak Cristo, akimeh kitlakitah intlanawatil, maya ne ayakmó niktlakita n tlanawatílistli nikchiwa kemi niktlakitas, para nikintlaneltoktis akimeh kitlakitah non tlanawatílistli. ²¹ Ijkó noiva, ijkuaq nika iwa non amo kitlakitah intlanawatil, nimochiwa kemi yejwah, maya nikmatok moneki niktlakitas intlanawatil Dios, porke nika itech itlanawatil Cristo. ²² Ijkuaq nika iwa non ayamó chikawak intlaneltokalis ne nikinmoiknitia, ne ijkó nimochiwa para makineltokakah Cristo iwa para sikimeh mamomakixtikah. ²³ Ne ijkó nikchiwa para miakeh makikakikah n kualitlátoli, iwa ne noiva manikseli n tlatiochiwálistli, non kualika nin kualitlátoli.

²⁴ Nomejwah kuali nonkimatih ijkuaq se motleloa kan motlatlanih, miakeh motleloah, pero sanwel se tlatlani iwa sanwel ye kiseliah n tlatliokólili. Ijkó nomejwah ximotlelokah iwa xitlatlanikah. ²⁵ Nochteh akimeh motlatlanih, momalwiah para amitla makinkojko. Ijkó kichiwah san por kinekih kitlaniskeh se korona non kinkuaonakiltiah iwa sa niman waki. Pero tejwah timochijchikawah para tikseliskeh se tlatliokólili non ayik piliwis. ²⁶ Pero ne mach nimotleloa san ken wetsi, nion sanenka nimotekilmaka kemi niktekilmakatoska n ejekatl, ²⁷ yej niknajnawatia nokuerpo iwa niktoktia manechtlakita, para amo san ne nonewia nimokawas kala, ijkuaq yotlanki onikinmachtí oksikimeh.

10

Pablo kinnonotsa amo makinweyilikah diosmeh non san kinmachijchiwah

¹ Nokniyah, nikneki xikmatikah, ya wejkawitl towejkatatawah onenkeh itlampa se mextli, iwa nochteh opanokeh itlajko n weyi atl non itoka chichiltik. ² Ijkó nochteh omokuaatekijkeh itech mextli iwa itech weyi atl para techyakanas Moisés. ³ Iwa nochteh okisepanmajsewijkeh n tlákuali non owaltemok de ilwikak non Dios okintitlanili. ⁴ Iwa nochteh okonikeh san se atl. Porke okoniayah n atl non omextoka itech non Tetl, iwa non Tetl oyaya inwah. Iwa non Tetl Ye n Cristo. ⁵ Pero san ome okipaktijkeh Dios, yika nochteh non oksikimeh omijmikeh kan tlaltejtéyinki.

⁶ Nochi ni otlamochi para tejwah matikkajksikamatikah, para amo matiknekikah tlan amokuali, kemi yejwah okichijkeh. ⁷ Yika, nomejwah amo xikinweyilikah diosmeh non san kinmachijchiwah, kemi sikimeh okichijkeh. Itlajkuilol Dios kijtoa: “Yejwah

omotlajtlalijkeh, otlakuajkeh iwa otlawankeh iwa satepa omijtotijkeh inmixpa in diost-sitsiwah.”

Éx. 32:6 ⁸ Amo matimomekatikah kemi sikimeh de

yejwah okichijkeh, iwa omikeh sempóali iwa eyi mil (23,000) san itech se tonati. ⁹ Nion amo matikyejyekokah n Toteko, kemi sikimeh de yejwah okichijkeh, iwa omikkeh ikuak okinkuajkuajkeh n koameh. ¹⁰ Nion xikixtokilikah Dios kemi sikimeh okichijkeh, yika okinmijmikti n ángel non temiktiani.

¹¹ Nochi ni okijyowijkeh towejkatatawah. Omoikuilo itech tiotlajkuíloli para matikil-namiktakah iwa amo ijkó matikchiwakah, tejwah akimeh tiyolitokeh itech ninteh iksemi tonatijmeh. ¹² Yika, akin kimolia amitla weletis kitlajtlakolchiwaltis, kuali mamotlaxili iwa mamotlachili para amo matlajtlakolchiwa. ¹³ Nochi tlan nomechyoltilana, noiwa mochiwah nochteh n tlaltikpaktlakah. Pero kemi Dios nochipa kiyekchiwa tlan kijtoa, Ye amo kitekawilis manomechyoltilana okachi tla ayakmó nontlaxikoah. Ye nomechilis kenomi nonmakisaskeh, iwa ijkó nontlaxikoskeh.

¹⁴ Yika, notlasojknihamo xikinweyijkachiwakah diosmeh non san kinmachijchiwah. ¹⁵ Ne nomechtlapowia porke nikmati nonteajsikamatkeh, nomejwah xikyejyekolikah tlan nomechilia. ¹⁶ Ikuak tiktlajtlaniliah Dios makitiochiwa n vino non tikonih itech isena n Toteko, tiknextiah timoseitilijtokeh iwan Cristo por iesso non okitoya. Iwa ikuak tiksepanmajsewiah n paj non tiktlapanah, tiknextiah Cristo okitemák ikuerpo iwa omikki topatka. ¹⁷ Maya tejwah timiaktikeh, tinochteh tikkua san se paj, yika timochiwah san se kuerpo.

¹⁸ Xikinmitakah n tlakah de Israel, akimeh kikuah tlan yokimankeh itech artal, yejwah moseitiliah ika tlan kimanah kan artal. ¹⁹ ¿Tlan nikijtoa? N “dios” non san kinmachijchiwah amitla ipati, nion amitla ipati tlan se kimana iyakapa non “dios”. ²⁰ Akimeh kitlamaniyah non “dios” kitlamaniyah n demóniojteh iwa amo Dios, iwa ne amo nikneki xikinmoiknitakah akimeh kintlamaniyah n demóniojteh. ²¹ Mach weletis nonkoniskeh itech ikopa n Toteko, iwa itech inkopa n demóniojteh. Nion weletis nontlakuaskeh itech imesa n Toteko, iwa itech inmesa n demóniojteh. ²² Noso, ¿nonkinekih machawati n Toteko? ¿Kox tejwah okachi tichikawakeh ke Ye?

Matikimpalewikah akimeh ayamó chickawak intlaneltokalis

²³ Milák, tejwah weletis tikchiwaskeh san tlan tejwah tiknekiskeh pero amo nochi techpalewis. Weletis tikchiwaskeh san tlan tejwah tiknekiskeh pero amo techpalewis para okachi mamochikawa totlaneltokalis. ²⁴ Amaka mamotekipacho tlan ye kineki kichiwas, yej noiwa mamotekipacho kenomi kinyolchikawas oksikimeh.

²⁵ Nomejwah weletis nonkikuaskeh nochi n nakatl non monamaka tiánkistli, iwa amitla xitlajtlanikah, para amo manomechyolkua jto nomotlalnamikilis. ²⁶ Porke n tlaltípkaktli, iwa nochi tlan onka itech, iaxka n Toteko.

²⁷ Tla aka non amo tlaneltokak nomechtlalwia xitlakuatih icha, xikkuakah nochi tlan nomechmakas. Amo xiktlajtlanikah kox okimanki, para amo manomechyolkua jto nomotlalnamikilis. ²⁸ Pero tla aka nomechilia: “Nin nakatl yokinmanilijkah n diosmeh non san kinmachijchiwah.” Ikuakó kiné amo xikkua non nakatl, para amo tiktlajtlakolchiwaltis akin ijkó omitsili, iwa para amo tikkojkos itlalnamikilis. ²⁹ Nomechtlapowijtok de intlannamikilis oksikimeh, amo nomotlalnamikilis.

“¿Tleka amo niweleti nikchiwa tlan ne nikmolia kuali ka, san por ok se kiyejyekolia amokuali?” ³⁰ Tla niklasojkamati Dios ikuak itla nikmomajsewia, ¿tleka nechpojpoah ikuak nikkuá? ³¹ Ijkó, tla nontlakuah, noso nonkonih, noso itla ok se nonkichiwah, nochi xikchiwakah para nonkiweyijkachiwakesh n Totajtsi Dios. ³² Amitla xikchiwakah non ika nonkintoktiskeh matlajtlakolchiwakah n judíojteh, noso se non amo judío, noso se non ya kitlakita Dios. ³³ Ne niktemolia kenijki nikimpaktis nochteh. Amo nikmotemolia san tlan ne nechpalewis, yej tlan oksikimeh kimpalewis para mamomakixtikah.

Keniki moneki mayetokah n siwameh kan nonmoololoah

² Nokniwah, nipaki nomowah porke nochipa nonnechilnamiktokeh iwa nonkitlakitah n tlamachtílistli non onomechmachtí. ³ Nikneki xikajskamatikah Cristo Ye n tláyákanki, itech nochí tlakatl non kitlakita. Iwa n teokich ye akin kiyakana isíwa, ijkó kemi Dios kinawatia Cristo. ⁴ Tla se tlakatl mokuatlakentia ijkuaq motiotsajtsilia noso ijkuaq kitemachtia n Tlájtoli de Dios, kijtosneki amo kitlakita Cristo. ⁵ Pero tla se siwatl amo mokuatlakentia ijkuaq motiotsajtsilia noso ijkuaq kijtoa itla tlájtoli non Dios okimák, kipijpinatia iokich, porke tla ijkó kichiwa kijtosneki kemi kuaxintoskia. ⁶ Tla se siwatl amo mokuatlakentia, okachi kuali makimotekili nochí itsonkal. Pero tla pinawa mokuaximas, mamokuatlakenti. ⁷ N tlakatl amo moneki mamokuatlakenti, porke ye kitenextia itlachialis iwa iweyijkachiwalis Dios. Pero n siwatl kitenextia iweyilis n tlakatl. ⁸ Porke ijkuaq Dios okichijchi n tlakatl, amo okikixti itech siwatl, yej n siwatl, okikixti itech tlakatl. ⁹ Dios amo okichijchi n tlakatl para n siwatl, yej okichijchi n siwatl para n tlakatl. ¹⁰ Yika, moneki n siwatl mamokuatlakenti para makitakah n ángelteh milák kitlakita iokich. ¹¹ Maya ijkó, inawak Toteko nion tlakatl nion siwatl ijixkoyantitokeh. ¹² Porke maya n siwatl walewatok itech tlakatl, noiwa n tlakatl tlakati itech siwatl. Pero nochí walewa de Dios.

¹³ Nomejwah xikyejyekolikah kox kuali tla se siwatl amo mokuatlakentia keman motiotsajtsilia. ¹⁴ Totlánamikilis techilia tepinati tla se tlakatl nemis ika itsonkal weyak. ¹⁵ Pero n siwatl amo tepinati makipia itsonkal weyak, porke Dios okimák itsonkal para ika mamokuatsakua. ¹⁶ Pero tla aka kineki kixnamikis nin tlamachtílistli, makimati tejwah nion itlaneltokawah Dios, tikixmatih ok se tlamachtílistli.

Sikimeh de Corinto mach okitlakitayah isena n Toteko

¹⁷ Ne nikneki nomechilis amo nechpaktia tlan nonkichiwah, porke ijkuaq nonmoololoah amo nonmoyolchikawah, yej nonkintlawelitah n oksikimeh. ¹⁸ Ijkuaq nonmoololoah, nikkaki nonmoxexeloah, iwa mati nikneltoka. ¹⁹ Porke moneki nonmoxexeloskeh para ijkó mamota akimeh de milajka kitlakitah Dios. *Mt. 13:24-*

³⁰ ²⁰ Yika, ijkuaq nonmoololoah para nonkimomajsewiskeh isena n Toteko, mach ok ye tlan nonkichiwah. ²¹ Porke ijkuaq nonmotlamajsewiah, pewa nonmoijixkoyantiah iwa nonkimotlatlaniliah tlan nonkimomajsewiskeh. Ijkó sikimeh mokawah apismiktokeh iwa oksikimeh asta mowintiah. ²² ¿Mach amo nonkipiah nomocha kan weletis nontlakuaskeh iwa nonkoniskeh? Yika nomechilia, ijkuaq ijkó nonkichiwah, nonkiteititiah mach nonkintlasojtlah nomokniwah, iwa nonkimpipinatiah akimeh amitla kipiah. Iwa axa, ¿tlan weletis nomechilis? ¿Nomechilis kuali tlan nonkichiwah? ¡Kan mayeto kuali!

Isena n Toteko Jesús

(Mt. 26:26-29; Mr. 14:22-25; Lc. 22:14-20)

²³ Porke tlan Toteko otechititi, ye noni tlan ne nomechmachtia: Non yúali ijkuaq kitemaktiskiah n Toteko Jesús, okónanki n paj, ²⁴ iwa ijkuaq yomotlasojkama inawak Dios, okitlápanki n paj iwa okijo: “Xikmomajsewikh; Ye ni nokuerpo non niktemaka por nomejwah. Ijkó xikchiwakah para nonnechilnamikiskeh.” ²⁵ Ijkó noiwa, ijkuaq yomotlamajsewijkeh, okónanki n vino iwa okijo: “Nin vino ye noesso tlan ika timoyekkawah, ijkuaq nonkoniskeh, techilnamikikah.” ²⁶ Nochipa ijkuaq nonkuaskeh nin paj iwa nonkoniskeh nin vino, nomejwah nonkinextiah imikilis n Toteko Jesús, asta Ye walmuikas.

Kenomi moneki se kimomajsewishes isena n Toteko

²⁷ Ijkó kiné, akin kikuas n paj noso koni ivino n Toteko Jesús, pero amo kemi Toteko kimonekiltia, tlajtlakolchiwa inawak ikuero iwa iesso n Toteko Cristo Jesús. ²⁸ Yika, nomejwah nomonewiah ximoyejyekokah kox kuali nomotlayejyekolis inawak Dios ijkuaq ya nonkimomajsewiskeh n paj iwa ya nonkonitiweh n vino. ²⁹ Dios kitlaijyowiltis akin kikuas non paj noso konis non vino, porke amo kitlakita imikilis n Toteko Cristo.

³⁰ Yika miakeh nomokniwah amo chikawakeh, sikimeh nochipa mokokoah, iwa sikimeh

yomikkeh.* ³¹ Pero tla san tejwah timotlakitaskiah, amaka techtlajtlakoltiskia. ³² Pero ikuak techtlajtlakoltia n Toteko, Ye techtlaijyowiltiah, para amo matechtlaijyowiltikah iwa non amo kineltokah.

³³ Yika, nokniyah, ikuak nonmoololoah para nonkimomajsewiskeh isena n Toteko Jesús, ximochiakah non nochteh para sansikah nonmotlamajsewiskeh. ³⁴ Tla aka xitlatla, matlakuajtewa icha, para ijkó Dios amo manomechtlajtlakolti porke amo ye tlan nonkichiwah ikuak nonmoololoah.

Oksiki nikyektlalis ikuak nomechonitati.

12

N weletílistli non techmaka n Espíritu

¹ Nokniyah, nikneki xikmatikah ke n Espíritu techmajmaka iweletilis tinochteh. ² Nomejwah kuali nonkimatih, ikuak ayamó ononkineltokayah Cristo Jesús, onomech-toktiayah xikinweyilikah diosmeh non kinmachijchiwah iwa amo tlajtoah. ³ Yika, axa nikneki kuali xikmatikah akin tlajtoa ika iweletilis n Espíritu amo weletis kiwijwikaltis n Cristo Jesús. Noiwa akin amo tlajtoa ika iweletilis n Espíritu, mach weletis kijtos, “¡Jesús, Ye Noteko!”

⁴ Onka tlatlámantli tlatliokólili non se weletis kiselis, pero san se Espíritu akin kitemaka. ⁵ Onka tlatlámantli toteki tlan ika weletis tiktekichiwiñiskeh, pero onka san se Toteko. ⁶ Weletis tikchiwaskeh san miak, pero onka san se Dios akin kichiwa nochi tekitl intech n tlakah. ⁷ N Espíritu sejse kinmaka se weletílistli para manomechompalewi.

⁸ Sikimeh n Espíritu kinmaka weletílistli para matetlapowikah ika ixtlamatílistli.

Iwa oksikimeh kinmaka weletílistli para matlajtokah tlan oksikimeh amo okimatiah.

⁹ Iwa oksikimeh, n Espíritu kinmaka weletílistli para matlaneltokakah.

Oksikimeh kiseliah weletílistli para makimpajtikah kokoxkeh san ika se Espíritu.

¹⁰ Oksikimeh, n Espíritu kinmaka weletílistli para makinchiwakah milagros, iwa oksikimeh para matetlapowikah tlan Dios kineki matikchiwakah.

Oksikimeh, n Espíritu kinchiwa mayetokah ixtlamatkeh para makimaticah katliejmeh tlajtojtokeh ika Espíritu iwa katliejmeh amó.

Oksikimeh, n Espíritu Santo kinmaka weletílistli para matlajtokah ika oksikimeh tlájtolteh.

Iwa oksikimeh, n Espíritu kinmaka weletílistli para makinmajsikamatikah nonteh tlájtolteh yankuikeh iwa makijtokah tlanón kijtosnekih.

¹¹ Pero nochí noni kichiwa non san Ye se Espíritu, Akin kinxejxelilia iweletilis nochteh ijkó kemi Ye kimonekiltia.

Tinochteh tikateh san itech se kuerpo

¹² Cristo kemi se kuerpo non kimpia miakeh iomiowah, iwa ninteh iomiowah maya miakeh kimajmana san se kuerpo. ¹³ Porke tejwah tinochteh, tla tiyetoskeh tijudíojteh noso amo tijudíojteh, titlanémakteh noso amó, ikuak otimokuaatekijkeh, axa ya tkmajmana san se kuerpo porke tikpiyah san se Espíritu, iwa tinochteh otitlaonikeh san itech non Espíritu.

¹⁴ Se kuerpo amo majmantok san ika se omitl, yej ika miakeh omiomeh. ¹⁵ Tla se tokxi kijtoskia: “Ne amo nimaitl, yika ne amo niteaxka itech nin kuerpo”, amo por noni ayakmó yetos teaxka itech non kuerpo. ¹⁶ Iwa tla se tonakas kijtoskia: “Ne amo niixtololotl, yika ne amo niteaxka itech nin kuerpo”, amo por noni ayakmó yetos teaxka itech non kuerpo. ¹⁷ Yika, tla nochí n kuerpo yaskia ixtololotl, ¿kenomi titlajnekuiskiah? Noso tla nochí n kuerpo yaskia nácastli, ¿kenomi titlajnekuiskiah? ¹⁸ Pero Dios okimájmani tokuerpo kemi Ye okimonekilti. ¹⁹ Tla nochí tokuerpo yaskia ixtololotl, ¿kenomi yaskia tokuerpo? ²⁰ Yika, maya tikpiyah toma, tonakas, toixtololo noso tokxi, san se kuerpo tikpiyah.

* 11:30 N griego kipia kochih. Xikitakah 1 Ts. 4:15.

²¹ Toixtololo amo weletis kilis n toma: “Amo techpoloa”; nion totsontekó weletis kinmilis tokxiwah: “Amo nonnechpoloah.” ²² Mach ijkó, porke tlan itech tokuerpo tikmoliah amo chikawak, ye tlan okachi moneki. ²³ Tlan tikmoliah amo weyi kijtosneki itech tokuerpo, ye tlan okachi tikmokuitlawiah. Iwa tlan itech tokuerpo nikmolia amo okachi ipati, ye tlan okachi tikyektlakentia. ²⁴ Porke tlan okachi kualtsi itech tokuerpo, amo moneki matikyekchijchiwakah. Ijkó Dios okiyekchijchi tokuerpo para tlan tikmoliah amo okachi ipati, moneki mamotlakita okachi. ²⁵ Ijkó okichijchi para amo mamoxexelo tokuerpo, yej nochí tlan kimajmantok tokuerpo mamosepantlachilikah. ²⁶ Yika, ikuak se tokxi noso se toma mokokoa, nochí tokuerpo tlajyowia. Iwa tla se tokxi noso se toma okachi tikmokuitlawiah, nochí tokuerpo mokawa ika pakílistli.

²⁷ Ijkó kiné, nochteh nomejwah nonkimajmanah ikuerpo n Cristo, iwa non sejsemeh non sasalitokeh itech non kuerpo.

²⁸ Ijkó, Dios okinmajmak tlatlamantli tekitl non Ye okinpéjpenki. Achto, okintlali tlatematiltijkeh,
satepa non kitematiltiah itlajtol Dios non Ye kinmilia makitematiltakah,
satepa, tlamachtijkeh,
satepa, non kinchiwah milagros,
satepa, non kimpajtiah kokoxkeh,
oksikimeh non tlapalewiah,
oksikimeh non tlayakana,
iwa oksikimeh matlajtokah ika oksikimeh tlájtolteh.

²⁹ Xikitakah, amo nochteh tlatematiltijkeh, nion amo nochteh profetas. Amo nochteh tlamachtijkeh, nion amo nochteh kinchiwah milagros. ³⁰ Amo nochteh okiselijkeh weletílistli para kimpajtiskeh kokoxkeh, amo nochteh tlajtoah ika oksikimeh tlájtolteh, nion amo nochteh weletih kiteajsikamatiltiah tlan kijtoah nonteh tlájtolteh.

³¹ Nomejwah xiktlajtlanilikah manomechmaka tlan okachi kuali itlatliokolil Dios.

Pero ne nomechititis ok se nemílistli tlan okachi ipati.

13

N tlasojaxtli okachi weyi kijtosneki

¹ Tla ne nitlajtoa ika intlajtol nochteh n tlaltikpaktlah iwa ika intlajtol n ángelteh, pero amo nitelasoxtla, notlajtol amitla ipati, yej san tekuini, noso san chalani kemi se tépostli. ² Tla nikselia itlajtol Dios, iwa nikaysikamatiskia nochí tlan oksikimeh amo kajskamatih, iwa niyetoskia satlawel niixtlamati, iwa tla nitlaneltokaskia asta nikinmíkuanis tepemeh, pero amo nitelasoxtla, amitla nopati. ³ Tla nikxejxeloa nochí tlan nikpia, iwa tla nimotemaktia manechchichinokah, pero amo nitelasoxtla, amitla nopati.

⁴ Akin tetlasoxtla, kímati texikoa; semi yolyámanki iwa amo xikojmiki; amo xankuatl nion moweyilia. ⁵ Amo tlawijwikaltia nion kítemoa san tlan ye kipaktia; amo kímati kualani nion tekokolia. ⁶ Amo paki ikuak kinmita oksikimeh tlajyowiah por intlajtlakol, yej paki ikuak pankisa tlan milák. ⁷ Akin tetlasoxtla nochí kijyowia, nochí kineltoka, kímati moyekchia iwa nochí kixikoa.

⁸ N tlasojaxtli ayik tlamic. Pero ajsiki tonati akimeh omotlapowiaya iwan Dios ayakmó motlapowiskeh íwa, nion ayakmakah tlajtos ika oksikimeh tlájtolteh, nion ayakmó motekitiltis n ixtlamatílistli. ⁹ Porke san siki tikmatokeh, iwa ikuak tlajtoa Dios, san siki tikteajsikamatiltiah. ¹⁰ Pero ikuak nochí tikajsikamatiskeh, ikuakó tlamic nochí non amo moteajsikamati.

¹¹ Ikuak onikatka ni chokotsi, onitlajtoaya, onikyejyekoliaya iwa onitlaajsikamatia kemi nichokotsi. Pero ikuak onimochi nitlakatl, onika tlan onikchiwaya ikuak onikatka nichokotsi. ¹² Ijkó noíwa, axa titlachiah kemi itla non amo moyekita itech se teskatl. Pero itech n iksemi tonati, timoixtlajtlataskeh. Axá san achitsi nikixmati, pero ikuakó nikyekixmatis, ijkó kemi Dios nechyekixmati. ¹³ Ijkó kiné, nochipa tikpiaskeh tlaneltokálistli,

noiwa tikpiaskeh tlan itech timoyolchikajtoskeh iwa nochipa timotlasojtlaskeh. Pero tlan okachi ipati itech ninteh eyi, ye n tlasojtlalistli.

14

Pablo kinnonotsa akimeh tlajtoah ika oksikimeh tlájtolteh

¹ Ijkó kiné, nomejwah okachi ximotlasoxtlakah, iwa xiktlajtlanilikah n Espíritu manomechpalewi para kuali nonkiteajsikamatiltiskeh itlajtol Dios. ² Porke akin tlajtoa ika ok se tlájtoli, motlapowia iwan Dios iwa amo iwan tokniwah, porke amaka kajsikamati tlan kijtoa. Non tokni tlajtoa ika n Espíritu, pero amaka kajsikamati. ³ Pero akin kitematiltia tlan Dios kineki makimaticah, okachi kinmiskaltilia intlaneltokalis, kinyolchikawa iwa kinyolsewia. ⁴ Akin tlajtoa ika ok se tlájtoli, san ye mochikawa itlaneltokalis. Pero akin kiteajsikamatiltia tlan Dios okili makinnextili n tlaneltokakeh, okachi kinmiskaltiliah intlaneltokalis iwa kinchikawa.

⁵ Ne niknekiskia nochteh nomejwah xitlajtokah ika oksikimeh tlájtolteh. Pero okachi niknekiskia xikteajsikamatiltikah tlan Dios kineki xikmatikah. Porke okachi ipati matikteajsikamatiltikah tlan Dios kineki matikmatikah iwa amo san matitlajtokah ika oksikimeh tlájtolteh. Pero tla nonweletih nonkinmajsikamatiltiah nonteh tlájtolteh, kuali ka, para mamoskalti intlaneltokalis n tokniwah tlaneltokakeh. ⁶ Yika nokniwah, mach itla ipati tla nias iwa pewas nomechtlapowis ika oksikimeh tlájtolteh, ejé nomechpalewiskia tla nomechnextiliskia itla yankuik noso itla tlan Dios kineki xikmatikah.

⁷ Xikkakikah: tla se arpa iwa se akatlapítzali kipiaskiah san se tlatsotsonálistli, amo tikmatiskiah katlie kitsotsontokeh. ⁸ Ijkuak motekil makatiweh, tla n tlapítzali amo moyekkaki, n soldados amo motlatlaliah. ⁹ Noijkó nomejwah: tla itech nomotlajtol amo nonkijtoah tlájtoli tlan weletis moajsikamatis, ¿kenijki aka weletis kajsikamatis tlan nonkijtoah? Tla ijkó nontlajtoah, tlan nonkijtoah san kiwika n ejekatl iwa amo tepalewia. ¹⁰ Itech nin tlaltípkaktli nochteh n tlaltípkaktlakah kipiah intlajtol, iwa nochi tlájtoli moajsikamatih kan ijkó tlajtoah. ¹¹ Pero tla ne amo nikajsikamatis itlajtol ijkuak aka nechtlapowia, ne nikitas kemi se non amo chanti itech noaltepeu, iwa ye noijkó nechitas. ¹² Yika, tla nomejwah satlawel nonmochijchikawah nonkichiwaskeh nochi tekitl, okachi kuali xikpankixtikah n tekitl non ika weletis nonkimpalewiskeh nomokniwah tlaneltokakeh.

¹³ Yika, ijkuak aka tlajtoa ika ok se tlájtoli, makitlajtlanili Dios maweleti makimajsikamatilti tlan kijtosneki non tlájtoli. ¹⁴ Porke tla nimototsajtsilia ika se tlájtoli non amaka kixmati, nimototsajtsilia itech noespíritu, pero itech notlalnamikilis amitla mokawa. ¹⁵ ¿Tlanón nikchiwas kiné? Nimototsajtsilis ika noespíritu pero noiwa ika notlalnamikilis. Nitlakuikas ika noespíritu, pero noiwa ika notlalnamikilis. ¹⁶ Porke tla tikweyilia Dios san ika moespíritu, mokni akin mitskaktok amo weletis moseitilis itech motiotsajtsilis, porke amo kajsikamati tlanón tikijtoa. ¹⁷ Yika, maya kualtsi timotiotsajtsilia ijkuak timotlasojkamati inawak Dios, mokni akin mitskaktok mach itla kipalewia para okachi matlaneltoka. ¹⁸ Nimotlasojkamati inawak Dios porke niweleti nitlajtoa ika oksikimeh tlájtolteh, okachi ke nomejwah. ¹⁹ Pero ijkuak nimoseitilia iwa n tokniwah non kineltokah Cristo Jesú, okachi nikwelita nikijtos san kanaj mákuil tlájtoli non kuali makajsikamatikah, iwa amo májtlaktli mil tlájtolteh non amo weletis kajsikamatiskeh.

²⁰ Nokniwah, amo xitlayeje yekolikah kemi pípilteh. Xiyetokah kemi pípilteh ijkuak kichiwas tlan amokuali, pero xitlalnamiktakah kemi tlakah yekmilajkameh. ²¹ Itech tiotlajkuíloli kijtoa: “Nikintitlanis tlakah non tlajtoah ika oksikimeh tlájtolteh para makinnonotsakah ninteh tlakah. Maya ijkó nikchiwas, ninteh tlakah amo nechkakiskeh kijtoa n Toteko.” *Is. 28:11* ²² Ijkó kiné, ijkuak Dios kichiwa aka matlajto ika ok se tlájtoli, kintlajtllachialtia non ayamó kineltokah Cristo iwa amo non yokineltokakeh. Pero akin weleti kinmajsikamatiltia itlajtol Dios, kimpalewia n tokniwah non kineltokah Cristo iwa

amó non ayamó kineltakah. ²³ Yika, ikuak nonmooololoah nomejwah non yononkinel-tokakeh Cristo iwa non nochteh pewe non motiotsajtsiliah ika oksikimeh tlájtolteh, iwa onkalakih sikimeh non ayamó kineltakah Dios, *¿amo kimoliskeh yononkuatlapolokeh?* ²⁴ Pero tla non nochteh nonkiteajsikamatiltijtokeh tlan Dios kineki xikmatikah, iwa kalaki se non ayamó kineltaka Dios, ye motlajtlakoltis iwa moyolpatlas ikuak kikakis nochi tlan nomejwah nonkijtoah. ²⁵ Ijkó nochi tlan kitlaatijtok itech iyolo monextis, ikuakó ye motlankuaketsas iwa kiweyilis Dios, iwa kijtos Dios milák kajki nomowah.

Nochi mamochiwa kemi moneki

²⁶ Ijkó kiné nokniyah, ye ni tlan moneki nonkichiwaskeh ikuak nonmoooloskeh: sikimeh makintlakuikakah salmos, oksikimeh matlamachtikah, oksikimeh makitem-atiltikah tlan achto Dios okitlaatijtaka iwa axa okinnextili, oksikimeh matlajtokah ika oksikimeh tlájtolteh, iwa oksikimeh makinteajsikamatiltikah nonteh oksikimeh tlájtolteh. Nochi ni mamochiwa para makimpalewi n tokniyah makineltakah Cristo Jesús. ²⁷ Iwa tla onkateh non tlajtoah ika oksikimeh tlájtolteh, matlajtokah san kanaj ome noso eyi, iwa se por se. Pero aka makiteajsikamatilti tlan kijtojtokeh. ²⁸ Pero tla amaka weleti kinteajsikamatiltia nonteh tlájtolteh, okachi kuali amaka matlajto ika nonteh oksikimeh tlájtolteh, yej san mamotlapowikah iwan Dios itech inyolo. ²⁹ Ijkó noiwa, tla onkateh akimeh weletih kiteajsikamatiltiah tlan Dios kinmatiltia, san kanaj ome noso eyi matlajtokah, iwa n oksikimeh kuali makitakah kox milák tlan okijtojkeh. ³⁰ Pero tla Dios kimaka ok se tlájtoli se tokni non ompa ewatok, non tlajtojtok ayakmó matlajto. ³¹ Ijkó, nochteh nomejwah akimeh nonkiseliah itlajtol Dios, moneki se por se matlajtokah. Iwa ijkó nochteh makajsikah iwa mamoyolchikajtiwiah. ³² Ikuak se espíritu kinextilia itla tlájtoli aka tiotlajto, ye kinawatia non espíritu iwa n tiotlajto weletis tlajtos noso amó. ³³ Porke Dios mach kiwilita san nochteh matlajtokah porke mach tikmatiskeh tlan kijtoah, Ye kiwilita nochi kuali matikyekchiwakah.

Ijkó kemi kichiwah kan moololoah n oksikimeh tokniyah non kineltakah Cristo Jesús, ³⁴ n siwameh amo matlajtokah kan nonmooololoah, yejwah san matlakaktokah, iwa matetlakitakah, kemi kijtoa itlanawatilis Dios. ³⁵ Tla n siwameh kinekih itla kimatiskeh, makintlajtlanikah inmokich itech kali, porke amokuali se siwatl amo matetlakita kan nonmooololoah.

³⁶ Xikilnamikikah, itlajtol Dios amo achto owala nomonawak, nion mach san nomejwah akimeh ononkiselijkeh. ³⁷ Tla aka kimolia milák kineltaka Dios, noso kimolia iespíritu Dios kiyakana, makitlakita tlan nomechtajkuililijtok. ³⁸ Pero tla amo kitlakita tlan ne nomechtajkuililia, noiwa amo xiktlakitakah itemachtilis.

³⁹ Nokniyah, xiktlawelnekikah nonkiteixmatiltiskeh itlajtol Dios, iwa amo xikint-lakawaltikah akimeh tlajtoah ika oksikimeh tlájtolteh. ⁴⁰ Pero nochi xikyekchiwakah ika kuali iwa kemi moneki.

15

Cristo Jesús omoyoliti

¹ Nokniyah, nikneki xikilnamikikah n kualitlátoli non ne onomechmatilti. Ye ni n kualitlátoli non nomejwah ononkiselijkeh, iwa axa itech nontlaxilitokeh. ² Noiwa ika nin kualitlátoli nomejwah nonmomakixtiskeh, tla nonkineltokaskeh tlan onomech-matilti, iwa tla amo sanenka onontlaneltokakeh.

³ Ne onomechmachtí tlan achto ne onechmachtijkeh. Ikuak tejwah otitlajtlakolchi-wayah, Cristo omikki topatka kemi yokijtojka itlajkuilol Dios. ⁴ Okitookakeh, iwa ipan eyi tonati omoyoliti, ijkó kemi noiwa yokijtojka n tiotlajkuiloli, ⁵ iwa ikuak omoyoliti, achto okimonextili n Pedro*, iwa satepa okinmonextili n májtlaktli iwa n ome tlatematiltijkeh.

⁶ Okachi satepa okinmonextili mákuili siento tokniyah. Miakeh ok onkateh, iwa sikimeh yomikkeh. ⁷ Satepa okimonextili n Jacobo, iwa satepa nochteh n tlatematiltijkeh.

* 15:5 n griego kijtoa Cefas, kijtosneki Pedro

⁸ Sa iksemi, ne noiva onechmonextili, kemi se konetl non yopanok tonati para tlakatis. ⁹ Porke ne innawak n oksikimeh tlatematiltijkeh okachi amitla nopati, iwa nion amo nechnamiki manechnotsakah nitlatematilti, porke yowejka onikintlaijyowiltijjtínenki akimeh okineltokayah Cristo. ¹⁰ Pero ken Dios onechtlasojtlak axa ni itlatematilti. Iwa iteiknomatilis nonawak amo sanenka, porke innawak n oksikimeh tlatematiltijkeh, ne okachi yonitekitik. Pero amo ne onikchi, yej Dios ika iteiknomatilis non kajki nowa. ¹¹ Iwa maya yejwah otetlapowijkeh, noso ne onitetlapowi, san ye n temachtílistli non ika ononkineltokakeh Cristo.

N tonati ikuak Dios kinyolitis non yomikkeh

¹² Pero tla tejwah tomechmachtiah Cristo omoyoliti de kan mikemeh, ¿tleka sikimeh nonkijtoah ke non yomikkeh mach ok moyolitiskeh? ¹³ Porke tla non yomikkeh ayakmó moyolitiskeh, kijtosneki Cristo mach omoyoliti. ¹⁴ Tla Cristo amo omoyoliti, tlan tejwah titetlapowiah amitla ipati, iwa nomotlaneltokalis amitla ipati. ¹⁵ Tla Cristo amo omoyoliti, tejwah timochiwah titekajkayajkeh, porke tejwah yotitetlapowijkeh Dios okiyoliti n Cristo, iwa tla non yomikkeh ayakmó moyolitiah kijtosneki amo milák Dios okiyoliti n Cristo. ¹⁶ Porke tla non yomikkeh ayakmó weletih moyolitiah, nion Cristo omoyoliti. ¹⁷ Iwa tla Cristo amo omoyoliti, sanenka nomotlaneltokalis iwa ok nonkateh itech nomotlajtlakol. ¹⁸ Noiva tla ijkó yetoskia, non yomikkeh iwa okineltokakeh Cristo, opolikeh. ¹⁹ Tla tikneltokah ke Cristo techpalewia sanwel ikuak tiyolitokeh itech nin tlaltípkaktli, timiálmasteh iwa okachi amitla topatih innawak nochteh n tlaltípkaktlah.

²⁰ De milajka, ¡Cristo omikki iwa omoyoliti! Ye omochi Akin achto omoyoliti para ayakmó mikkis. Axa kuali tikmatokeh, akimeh yomikkeh, moyolitiskeh. ²¹ Porke ijkó yej n mikílistli owala por se tlakatl (Adán), ijkó noiva por se tlakatl (Jesús) moyolitiskeh non yomikkeh. ²² Ijkó kemi nochteh n tlaltípkaktlah mikkih porke walewatokeh de Adán, ijkó noiva nochteh akimeh tiktlakitah Cristo, nochipa yolitoskeh por Ye. ²³ Pero nochteh motojtokatiaskeh kemi Dios kineki: Achto Cristo omoyoliti, satepa, ikuak Ye walmuikas, nochteh iaxkawah, moyolitiskeh. ²⁴ Ikuakó waltlajtlamis nin tlaltípkaktli. Non tonati Cristo kimpojpolos nochteh n wejweyi tlayakankeh, n tekiwajkeh iwan chikawálisteh non kateh ilwikak. Ikuakó kinmaktilis Itajtsi Dios nochteh akimeh okineltokakeh. ²⁵ Porke Cristo pewas tlanawatis asta ikuak Dios kintlalilis itlampa ikxiyah nochteh akimeh okikokoliayah. ²⁶ Iwa ikokolikni non sa iksemi kipojpolos ye n mikílistli. Porke Dios okitlali nochitlampa ikxiyah n Cristo. ²⁷ N tiotlajkuíloli kijtoa: Dios nochitlampa ikxiyah n Cristo. ²⁸ Sal. 8:6 Ikuak Cristo ya nochitlampa ikxiyah nochteh akimeh okimaktili para makinawatijto, amo kijtosneki noiva kinawatijtos Dios, porke Ye Akin nochitlampa ikxiyah n Cristo. ²⁹ Tla non yomikkeh ayakmó moyolitiskeh, ¿tleka sikimeh mokuaatekiah impatka non yomikkeh? Tla amo nonkineltokah ke non yomikkeh moyolitiskeh ¿tleka ijkó nonkichiwhah?

³⁰ ¿Tleka tejwah tikateh imak n owijkayotl? ³¹ Maya ijkó, niyolpaki porke yononkineltokakeh Cristo Jesús Toteko. ³² Ikuak onikatka Éfeso, miakeh tlakah onechixnamikeh kemi yaskiah yolkameh tekuanimeh. Pero ¿tlan onikmotlanili? Tla milák non yomikkeh ayakmó moyolitiskeh, okachi kuali matikchiwakah kemi sikimeh kijtoah:

Matitlakuakah iwa matikonikah, porke mostla timikiskeh.

Is. 22:13

³³ Amo xikmokawilikah manomechkajkayawah. Kemi kijtoa se tlájtoli:
Tla nonnemiskeh iwa akimeh kichiwhah tlan amokuali, kipatlaskeh nomotlayejyekolis iwa nomechijtlakoskeh.

Pr. 22:25

³⁴ Nomejwah ximoyolpatlakah iwa ximilajkanemikah, iwa ayakmó xitlajtlakolchiwakah, porke non sikimeh amo kixmati Dios. Ijkí nomechilia para xipinawakah.

Kenomi moyolitiskeh non yomikkeh

³⁵ Chamo aka tlajtlanis: “¿Kenomi, moyolitiskeh non yomikkeh? ¿Tlan kuerpo kipiaskeh?” ³⁶ San kuatlapolojtok akin ijkó tlajtlani. Porke ikuak itla xínachtli kitookah, achto palani ijtkí tlali iwa satepa ixwa. ³⁷ Amo motooka ixiuyyo n tlátoktli, yej nonkitookah itla xínachtli de trigo noso ok se xínachtli. ³⁸ Iwa ikuak ixwa n tlátoktli, Dios kimaka ixiuyyotsi kemi Ye kimonekiltia, iwa sejseñ xínachtli tlatlámantli moxiuyyotia. ³⁹ Amo nochí nakatl san se intlachialis kipiah: n tlakah, n yolkameh, n totomeh, iwa n michimeh, nochteh tlatlámantli innakayo kipiah. ⁴⁰ Kan ilwikak iwa kan tlaltípkaktli onkateh kuerpos, pero non kateh kan ilwikak kipiah mawistílistli iwa non kateh kan tlaltípkaktli ok se inkualtsinyo. ⁴¹ Itlawilnextilis n tonati, mach kemi itlawilnextilis n metsi, noijkó intlawilnextilis n sítlaltek mach kemi itlawilnextilis n tonati iwa n metsi, iwa nochteh n sítlaltek tlatlámantli intlawilnextilis kipiah. ⁴² Ijkó tlamochiwas ikuak moyolitiskeh non yomikkeh. Kintookah iwa palani, pero majkokuis se kuerpo non ayakmó ijtlakawis. ⁴³ Ikuak kitookah se miketl satlawel kinyolkokoah, pero ikuak moyolitis non miketl, kipias mawistílistli. Tlan kitookah wíjwixtik, moyolitia ika chikawálistli. ⁴⁴ Kitookah se tlakatl de nin tlaltípkaktli, pero moyolitia se tlakatl de ilwikak.

Tla onkateh tlaltípkaktlah, noiva onkateh tlakah de ilwikak. ⁴⁵ N tiotlajkuíloli kijtoa: Non achto tlakatl itoka Adán, omochi se tlakatl non oyolitoka.

Pero non sa iksemi Adán, Ye n Cristo non kichiwa se mayolito. ⁴⁶ Yika, amo achto tikséliyah tokuerpo de ilwikak, yej achto tikséliyah tokuerpo de nin tlaltípkaktli, iwa satepa tokuerpo de ilwikak. ⁴⁷ Non sakinika tlakatl, *Adán*, Dios okichijchi ika tlali, itech nin tlaltípkaktli. Pero n ojpatiah tlakatl Ye Toteko walewatok de ilwikak. ⁴⁸ N tlaltípkaktlah kateh kemi Adán akin chijchitok ika tlali. Pero n tlakah non nemih kemi Dios kimonekiltia, yetoskeh kemi Cristo non walewatok de ilwikak. ⁴⁹ Se mota kemi tlakatl de nin tlali, noijkó se motas kemi non owala de ilwikak.

⁵⁰ Nokniyah, nikneki nomechilis, tonakayo iwan toesso mach weletis kintlaxkatiliskeh kan ilwikak, kan ayik tlapalani. ⁵¹ Xikakikah, nikneki nomechmatiltis tlan achto amaka okimatis: Amo tinochteh timikiskeh. Pero Dios tinochteh techpatilis tokuerpo. ⁵² Totokatíjkak, kemi ikuak se ijkuejkueyoni, ikuak mokakis n saiksemi tlapítSalí non yomikkeh moyolitiskeh iwa ayik palaniskeh. Iwa tejwah techmakas se yankuik kuerpo. ⁵³ Porke tokuerpo non amo wejkawa, motlakentis ika ok se kuerpo non nochipa wejkawas. Iwa tokuerpo non mikki, motlakentis ika ok se non ayik mikkis. ⁵⁴ Iwa ikuak tokuerpo non palani yomopatlak ika se kuerpo non nochipa wejkawas, iwa ikuak tokuerpo non mikki yomopatlak ika se kuerpo non ayik mikkis, ikuakó mochiwas nochí tlan kijtoa n tiotlajkuíloli:

N weletílistli okwaltolo n mikílistli.

Is. 25:8

⁵⁵ ¡Mialma mikílistli! ¿Kan omoka momintsi non ika otechkojkoaya?

¿Mikílistli kanin ka moweletilis?

Os. 13:14

⁵⁶ Imintsi n tlajtlákoli kimaka chikawálistli n mikílistli, iwa n tlajtlákoli kimaka chikawálistli n tlanawatílistli. ⁵⁷ Pero matiktlasojkamatikah Dios, porke Ye techmaka iweletilis para tiktlaniliskeh n mikílistli por Toteko Cristo Jesús.

⁵⁸ Yika, notlasojikniyah xiyejtlaxilitokah iwa nochipa xiyejnemikah iwan Toteko, xikmopantikah iteki n Toteko. Ya nonkimatokeh, n tekitl non tiksepanchiwah, amo sanenka.

16

Koololoa tomi para kimpalewiskeh n tokniyah de Jerusalén

¹ Ikuak nonkoololoskeh n tomi non ika nonkimpalewiskeh n tokniyah de Jerusalén, xikchiwah kemi yonikinnajnawati n tokniyah de Galacia. ² Itech ipewaya n semana, nonnochteh xikxelokah siki nomotomi ijkó kemi ononkimotlanilijkeh* itech

* ^{16:2} Nochi domingo nomechtlaxtlawiah nomotomi de samano iwa nonkipiah para nonkimpalewiskeh nomokniyah.

nomoteki. Sa xikoololojitiwah para amo sakin pewas nonkoololoskeh ikuak niajsiti nomonawak.³ Iwa ikuak nomechajsiti, nikintitlanis Jerusalén n tokniwah non nomejwah nonkimpejpenaskeh. Nikinmakas amatlajkuilolteh, para makinwikilikah iwan tomi non okitemakakeh para n tokniwah de Jerusalén.⁴ Iwa tla nikitas moneki manio, inwash nias.

Pablo kiteilia tlan kineki kichiwas

⁵ Ikuak nias nomechitati, napanotikisas kan tlali de Macedonia, iwa satepa niajsiti Corinto kan nonchantitokeh.⁶ Chamo weletis nimokawas ompa nomowah kanaj kech tonati, noso nimokawas ompa asta mapano n sewaya, iwa satepa nomejwah weletis nonnechpalewiskeh ika tlan monekis para maniajsiti kan nio.⁷ Pero amo nikneki san nomechitikisas, yej nikneki nimokawas nomowah kanaj kech tonati, tla Dios kimonekiltia.⁸ Pero nimokawas nika Éfeso asta mapano n ilwitz de Pentecostés,⁹ porke nikita sa tlawel weletis niktektilis Dios iwa miakeh kineltokaskeh, maya onkateh miakeh akimeh amo kimpaktia tlan nikchiwa.

¹⁰ Iwa tla ik ompa kalakiti n Timoteo, xikyekselikah iwa mayeto ika pakílistli, porke ye noiwa kitekitilia n Toteko ijkó kemi ne.¹¹ Yika, amo xiktlawelitakah, yej xikpalewikh ika tlan kimonekiltis para manechajsiki ika kuali, porke nikchixtok manechajsiki sansikah iwa oksikimeh tokniwah non iwa witseh.

¹² Tokni Apolos yoniktlatlauji mawia iwan oksikimeh tokniwah manomechontlajpalotih, pero axa ye mach okinek. Pero ikuak majxilis, yas nomechitati.

Pablo momakawa

¹³ Kuali xitlachixtokah, kuali xitlaneltokakah, ximochijchikawah iwa ximoyolchikajtakah.¹⁴ Nochi tlan nonkichiwaskeh, xikchiwah ika tlasojtlálistli.

¹⁵ Nokniwah, nomejwah ya nonkimatokeh Estéfanis iwan ichanikniwah, yejwah acho okineltokakeh Cristo Jesúz ikuak okixmatkeh itlajtol ompa kan tlali de Acaya. Yejwah yokiyoltalijkeh kintekichiwiliskeh n tokniwah non kineltokah Cristo Jesúz.¹⁶ Yika, nikneki nomejwah xikintlakitakah n tokniwah nontekitih kemi yejwah, noiwa akimeh tepalewiah iwa tekitih.¹⁷ Nipaki porke ovalajkeh n Estéfanis, Fortunato iwa Acaico. Porke yejwah onechpalewijkeh nomopatka.¹⁸ Yejwah nechyolchikajtokeh kemi nomejwah onomechylchikajkeh. N tlakah kemi yejwah kuali matikintlakitakah.

¹⁹ N tokniwah non moololoah Asia nomechontlajpaloha. Aquila iwa Priscila, iwa n tokniwah non moololoah incha, noiwa nomechontlajpaloha itech Itoka n Toteko Jesúz.

²⁰ Nochteh n tokniwah non nika kateh nomechontlajpaloha. Ximotlatlajpalokah non nochteh iwa ika chipawak nomoyolo ximoixtenamikikah.

²¹ Ne Pablo nomechtajpaloa. Nomechtajkuililia ika noma.

²² Tla aka amo kitlasojtla n Toteko, makitlajtlakoltikah. ¡Xiliki Toteko Jesúz!

²³ Iteiknomatilis n Toteko Cristo Jesúz mayeto nomowah.

²⁴ Nonnochteh nomechtasojtla ika itlasojtlalis Cristo Jesúz.

San Pablo ojpa kintlajkuililia non de Corinto

Pablo kintlajkuililia n tlaneltokakeh de Corinto

¹ Ne Pablo, Dios okimonekilti maniyeto itlatematilti n Cristo Jesús. Ne iwan Timoteo tikijkuilolah nin amatlajkuíloli para n tokniwah non moololoah Corinto iwa nochteh akimeh nonchantitokeh itech nochteh n tlalmeh de Acaya.* ² Totajtsi Dios iwan Toteko Cristo Jesús manomechtiochiwakah iwa makichiwakah xiyetokah ika yolsewílistli.

Keniji otlaijyowijtinenki Pablo

³ Matikweyijkachiwakah Dios, Itajtsi n Toteko Cristo Jesús. Ye n Teta non nochipa techiknomati iwa nochipa techyolchikawa. ⁴ Ye nochipa techyolchikawa ikuak titlaijyowiah, para ijkó tejwah noiwa matikinyolchikawakah akimeh tlaijyowiah, ijkó kemi Dios techyolchikawa. ⁵ Porke ijkó kemi titlaijyowiah kemi Cristo otlaijyowiko, noiwa por Cristo tikseliah miak yolsewílistli.

⁶ Yika, tla tejwah titlaijyowiah, titlaijyowiah para nomejwah okachi ximoyolchikawakah iwa ximomakixtikah. Iwa tla Dios techyolchikawa, techyolchikawa para nomejwah noiwa ximoyolchikawakah, iwa ijkó noiwa nonkinxikoskeh n tlaijyowílisteh non tejwah ipa tipanotiwitseh. ⁷ Tejwah timoyolchikawah nomonawak, porke tikmatih ijkó kemi nontlaijyowiah kemi tejwah, noijkó nonmoyolchikawaskeh.

⁸ Nokniwah, tiknekih xikmatikah keniji otitlaijyowijtinenkeh kan tlalmeh de Asia. Sa ken otikxikojkeh non tlaijyowílistli, asta otikmolaiyah timikiskiah. ⁹ Otikmachiliyah kemi non ya kinmiktitiweh. Noni otechpalewi para amo matikneltokakah nochi weletis tikchiwaskeh, yej okachi matitlaneltokakah inawak Dios Akin kinyolitía non yomikkeh. ¹⁰ Dios otechmakixti, iwa techmakixtis imak mikílistli. Tejwah timoyolchikajtinemih itech Dios, iwa Ye nochipa techmakixtijtinemi, ¹¹ tla nomejwah nontechpalewiskeh ika nomotrotsajtsilis. Tla miakeh non motrotsajtsiliah para Dios matechpalewi, noiwa miakeh kitlasojkamatiskeh Dios ikuak tejwah techtiochiwas.

Tleka Pablo amo oyá Corinto

¹² Satlawel tipakih, porke totlalnamikilis techmatiltia nochipa tinemih ika toyolo chipawak, iwa timilajkameh ixpa n tlaltikpaktlakah, iwa okachi nomonawak. Iwa tla tiweletih tinemih ika toyolo chipawak, amo por saikpanoa ti ixtlamatih, yej porke Dios ika itlasojtlalis techpalewia matiyeknemikah. ¹³ Itech toamatlajkuilolwah amitla ok se tomechtlajkuililiah, yej san tlan weletis nonkiamapoaskeh iwa weletis nonkajsikamatikah. Nikneki kuali xikyekajsikamatikah. ¹⁴ Maya axa, ayamó nochi nonkajsikamatih ikuak Toteko Jesús walmokopas, nomejwah weletis nompakiskeh por tlan otomechmachtijkeh. Noiwa tejwah tipakiskeh nomowah.

¹⁵ Ye ni tlan nechylchikawa, iwa yika oniknektona achtó nomejwah nomechonitaskia, iwa ikuak niwalmokopas, nomechtlajpalos oksepa. ¹⁶ Ne onikmoli nomechontlajpalos ikuak niaskia Macedonia, iwa ikuak niwalmokopaskia oksepa nomechontlajpalotkisaskia. Ijkó nomejwah nonnechonmakawah para maniajsiti Judea. ¹⁷ Ikuak ijkí onikmoli nikchiwas, ¿san ijkí onikyejyekoli? Amo nikchiwa kemi n tlaltikpaktlakah non san kijtoah ejé, ejé; iwa san nima kijtoah, amó. ¹⁸ Pero Dios kuali kimatok tejwah amo tomechiliah “ejé” iwa tlami amo tikchiwah. ¹⁹ Porke ikone n Totajtsi Dios, Cristo Jesús akin Silvano, Timoteo iwa ne Pablo tiktematiltijtinemih nomoixpa, ayik okijo “ejé” iwa san nima “amó”, yej nochipa “ejé”. ²⁰ Porke itech Cristo Jesús tikseliah nochi tlan Dios okisentlali techmakas. Yika, por Cristo tikitoh “ijkó mamochiwa”; iwa ijkó Dios kiselia weyílistli. ²¹ Dios Ye Akin techchikawa tejwah iwa nomejwah itech Cristo. Iwa ya

* 1:1 Acaya: ninteh tlalmeh kateh tlatsintlawik de Grecia

tikateh iaxkawah. ²² Ye yotechneskayoti ika Iespíritu itech toyolo, kemi se tlayakánali tlan satepa tikseliskeh.

²³ Dios kuali kimatok amo niajtila Corinto kemi onikmoliaya, porke amo oniknek nomechyolkokoti. ²⁴ Amo tiknekih tomechnajnawatiskeh kenomi nonkipiaskeh tlaneltokálistli, porke nomejwah ya nonchikawakeh itech tlan nonkineltokah, yej tiknekih titekitiskeh nomowah para xikpiakah okachi pakílistli.

2

¹ Yika, ne onikmoli amo nomechontlajpaloti para ximoyolkokokah. ² Porke tla ne nikchiwa ximoyolkokokah, ¿akin nechyolpaktis amo san nomejwah non ne onikinyolkoko? ³ Yika, ijkó onomechtajkuilili, porke amo oniknek nias san para nimoyolkokos por tlan nonkichiwah, porke nomejwah nonkateh para nonnechmakaskeh pakílistli. Ne kuali nikmatok, tla ne niyolpaktoskia nomejwah noiva nompaktoskiah. ⁴ Porke ikuak onomechtajkuilili, satlawel onimotekipachoaya iwa onimoyolkokoaya iwa onichokaya. Pero amo onomechtajkuilili para nomechyolkokos, yej para xikmatikah satlawel nomechtasojtla.

Xiklapojpolwikah akin otlajtlakolchi

⁵ Tla aka onechyolkoko, amo san ne onechyolkoko, matikijtokah nomejwah noiva para amo manitlajtolpano. ⁶ Tla nomejwah yononkitlajtlakoltijkeh non tokni, san ika noni ya kuali. ⁷ Yika, axa moneki xiklapojpolwikah iwa xikyolchikawakah, amo kichiwa saikpanoa moyolkokos iwa mosotlawas. ⁸ Yika ne nomechtlatlatlaujtia xikititikah milák nonkitlasojtlah. ⁹ Itech ok se noamatlajkuilol yonomechnajnawati ijkó xikchiwakah, para nomechyejyekos kox milák nonkitlakitah tlan nomechnawatia. ¹⁰ Tla aka nonkitlapojpolwiskeh tlan amo kuali okichi, ne noiva niklapojpolwis. Tla okatka itla tlan motetlapojpolwis, yoniklapojpolwi por nomejwah inawak Cristo. ¹¹ Ne yoniklapojpolwi para amo kichiwa techtlanis n satanás, porke kuali tikixmatih kenomi tlakajkayawa.

Pablo amo yekkajki kan altepetl de Troas

¹² Ikuak onikalakito Troas para niktetlapowis n kualitlajtoli de Cristo, onikitak amitla nechtsakuilis para nikintlapowis. ¹³ Pero noyolojtsi, amokuali omomachiliaya, porke amo onikajsito n tokni Tito. Yika, onimomaaka iwa n tokniwah de Troas iwa onia para Macedonia.

Titlatlanih ikuak tikneltokah Cristo

¹⁴ Pero titlasojkamatih Dios, porke Ye Akin kichiwa matitlatlanikah por tikateh itech Cristo. Ika n tekitl non otechmactili, totech kinextia itlasojtlalis, kemi se ajwiálistli non sentetl xitini. ¹⁵ Porke tejwah kemi itla ajwiálistli non Cristo kimaktilia Dios, iwa non ajwiálistli xitini ixpa akimeh momakixtiah iwa ixpa akimeh moixpoloah. ¹⁶ Para akimeh moixpoloah, nin ajwiálistli kijnekuuh kemi itla tsojyak non temiktia. Pero akimeh momakixtiah, kijnekuuh kemi itla ajwiálistli non kinmaka yolílistli. Pero ¿akin weleti kiyekchiwa nin tekitl non Dios otechmactili? ¹⁷ Tejwah amo tiktemachtijtinemih itlajtol Totajtsi Dios san para titklaniskeh tomi, kemi ik nonka sikimeh kichijtinemih, Dios kuali techita titetlapowiah tlan milák, porke Cristo otechtítlanki matiktekitilikah iwa matiseititokah íwa.

3

Pablo kitemachtia se yankuik tlajtoli non Dios okisentlali

¹ Ikuak ijkí tikjtoah, ¿nomejwah nonkimoliah chamo san tejwah tonewiah timoweyiliah nomonawak? Noso, ¿moneki matomechixpantilikah se amatlajkuíloli kan matlajto kuali de tejwah, noso matomechtajtlanilikah se amatlajkuíloli kemi oksikimeh kichiwah? ² Amó, mach ok moneki, porke nomejwah nonkixnextiah toteki, iwa nomejwah kemi se amatlajkuíloli non ikuilitok itech toyolo, akimeh nochteh n tlakah

weletis kixmatiskeh iwa kipotoskeh. ³ Nomejwah kemi se amatlajkuíloli non Cristo okikuilo non tejwah otikititlankeh. Nomejwah se amatlajkuíloli non amo ijkuitlak ika tlápali, yej ika Iespíritu Dios Akin nochipa yolitok. Nin amatlajkuíloli amo ijkuitlak itech se tetl patlawak, yej itech inyolo n tlaltikpaktlah.

⁴ Tejwah timoyolchikawa inawak Dios, ika Cristo Jesús. ⁵ Amo tikijoah nochi weleti tikchiwah toselti, yej nochi tlan tiweletih tikchiwah, Dios techpalewia matikchiwakah. ⁶ Dios otechmák weletílistli para matitekitkah itech nin yankuik tlájtoli, non amo motlakxilia itech itla tlanawátili. Yej itech se tlájtoli non ika timoyekkawah kisa de itech Espíritu. Porke n tlanawatílistli kualika mikílistli, pero n Espíritu kitemaka yolílistli.

⁷ Itlanawatil Moisés omikuilo itech patlawak tetl, iwa owala ika se weyi tlawilnextílistli. Ijkuak Moisés okiseli non patlawak tetl, ixko otsotlania iwa n tlakah de Israel amo oweletiah okiixtlajtlataya, pero maya n tlanawátili ijkó owala, itsotlanilis oseujtiaya. Tla non tlanawátili otetlaijyowiltiaya ika mikílistli iwa oneski ika tlawilnextílistli, ⁸ jaxa okachi kipias tlawilnextílistli n yankuik tlájtoli non kitematiltiskeh ika n Espíritu! ⁹ Tla n tlanawátili non otetlajtlakoltiaya ika mikílistli, okitetlapowijkeh ika miak tlawilnextílistli, jaxa okachi miak weyílistli kipia itlajtol Dios non techtoktia matiyetokah tiyolchipawakeh inawak! ¹⁰ Porke n tlanawátili non yowejka okipiaya tlawilnextílistli, axa ayakmó kipia tlawilnextílistli, porke nin yankuik tlájtoli kipia okachi weyi itlawilnextilis. ¹¹ Porke tlan amo owejka okipixki tlawilnextílistli, okachi miak kipias tlawilnextílistli tlan ayik pojpoliwi.

¹² Yika ken timoyolchikajtokeh itech tlan milák, titlajtoah ika weletílistli. ¹³ Tejwah amo tikchiwah kemi Moisés, non omoixtsakuaya ika se tsótsoli para n tlakah de Israel amo makitakah ya pojpoliti non tsotlanílistli non ayakmó tsotlantoskia. ¹⁴ Pero yejwah mach okajsikamatia porke omotsak inmixtlamatilis, asta axa, ijkuak kiama poah non achto tiotlajkuíloli, amo weletih kajsikamatih porke ixtsaktokeh ika se tsótsoli. Pero ika Cristo weletis moixtlajtlaposteh. ¹⁵ Iwa asta axa ijkuak kiama poah itlanawatil Moisés, mach itla kajsikamatih, porke kipixtokeh kemi se tsótsoli non kinmixtsakuilijtok intlanamikilis. ¹⁶ Pero ijkuak aka kineltoka n Totajtsi Dios, moachiwa tlan okixtsaktoka itlanamikilis. ¹⁷ Porke n Toteko Ye n Espíritu, iwa kan kajki Iespíritu Toteko ayakmó tiilpitox itech tlajtlákoli. ¹⁸ Iwa kemi tejwah ayakmó tiixtlakentitokeh, tejwah tikateh kemi se teskatl non tiknextiah iweyilis n Toteko Dios. Ijkó tejwah tonewia timochiwashéh okachi kemi Toteko. Porke nochi tonati tikpiyah itlawilnextilis Toteko, Ye Akin techmaka n Espíritu.

4

Itlatemati tilwah Cristo

¹ Yika amo matimosotlawakah, porke Dios, techiknomati iwa Ye yotechmaktili nin tek-
itl. ² Yotikkajkeh nochi tlan moichtakachiwa iwa tepinati. Amo titlakajkayajtinemih nion
tikpapatlah itlamachtilis Dios. Yej tejwah tiktemachtiah tlan milák, iwa timotemaktiah
innawak oksikimeh, para yejwah makijtokah kox kuali tlan tikchiwah ixpa n Dios. ³ Pero
tla n kualitlájtoli non tejwah tiktematiltiah amo kajsikamatih, sanwel amo kajsikamatih
akimeh moixpoloah. ⁴ Porke kemi yejwah amo tlaneltokah, n *dios*
non kinawatijtok nin tlaltíkpaktli kinmixtlapoyawaltia para amo makajskamatikah,
iwa para amo makitakah itlawilnextilis n kualitlájtoli de Cristo non weyijkatitok, Ye
Akin kixnextia n Dios non yolitok. ⁵ Ijkuak titetlapowiah, amo tikintlapowiah tlan
tejwah tikchiwah, yej titetlapowiah Jesús Ye n Toteko, iwa tejwah timochiwah kemi
nomotekitwah, por tiktasojtlá Jesús. ⁶ Porke inewia Dios okijo: “Kan achto otleyuatoka,
n tláwili tsotlanis.” Ye Akin okitlawili toyolo, para ika non tlawilnextílistli matiweletikah
matikixmatikah iweyilis Dios, non tsotlani itech ijkotsi Toteko Cristo. *Gn. 1:3*

Nochipa matitlaneltokakah inawak Dios

⁷ Pero tikpixtokeh nin totlaneltokalis non tlawel miak ipati ijtek nin xoktsi*, para mamota n weletlistli amo toaxka, yej wits de Dios. ⁸ Yika, maya nochipa timotekipachojtokeh, nochipa timakisah; iwa maya tikpiyah tlan techtekipachoa, ayik timosotlawah. ⁹ Maya techtotojtokah, amo techilkawa, maya techtlamotla, amo techpojpoloskeh. ¹⁰ San kan ik tiawih, tikkakah itech tokuerpo imikilis n Jesùs, para matiktenextikah kenikki yolitok n Jesùs totech. ¹¹ Porke tiyolitokeh, weletis techmiktiskeh porke tiktektiliah n Jesùs, para ijkó weletis tikixnextiskeh Jesùs yolitok itech tokuerpo non mikki. ¹² Yika tejwah titemaktitokeh imak mikílistli para nomejwah xiylitolakah.

¹³ N tiotlajkuíoli kijtoa: “Onitlaneltokak, yika onitlajto.” Yika, tejwah noiwa, ika non totlaneltokalis, titetlapowiah. ¹⁴ Porke tikmatih Dios, Akin okiyoliti n Toteko Jesùs, noiwa tejwah techyolitis iwan Jesùs, iwa sansikah nomowah techwikas kan ye muistika. ¹⁵ Nochi tlan titlaijyowiah, kuali manomechpalewi. Porke tla miakeh kiseliskeh itlati-ochiwalis Dios, noiwa miakeh kitlasojkamatiskeh, iwa ijkó okachi tikweyiliskeh Dios.

¹⁶ Yika, ayik timosotlawah, porke maya tokuerpo wewejeti iwa tlanti, toespíritu moyankuiliyi iwa mochikajti. ¹⁷ Porke tlan tikijyowiah itech nin tlaltíkpaktli, amo wel chikawak iwa san panoa. Pero techalikilia se weylistli non ayik tlami, iwa non weyijkachiwálistli saikpanoa mawistik. ¹⁸ Porke amo tiktلالiah totlachialis itech tlan mota, yej itech tlan amo mota. Porke nochi tlan mota amo wejkawa, pero tlan amo mota, nochipa wejkawas.

5

Tocha kan ilwikak

¹ Tikmatih tokuerpo pojpoliwis kemi se kali non amo wejkawa itech nin tlaltíkpaktli. Dios techmakas ok se kuerpo ompa ilwikak non ayik pojpoliwis, iwa tokuerpo mach yetos kemi se kali non kichijchiwah n tlakah. ² Milák, ok tiyolitokeh itech nin tokuerpo titenna, titlaijyowiah, iwa ya tiknekiskiah tikyankuileiskeh tocha kan ilwikak, ³ para ika matitlakentitokah iwa amo matiyetokah tixipetstikeh. ⁴ Milák ok tiyolitokeh itech nin kuerpo, titenna iwa timosotlawah. Amo kijtosneki tiknekiah matechkixtilikah tokuerpo non ya wewe, yej tiknekiah makiyankuilikah tokuerpo, para mapojpoliwi tokuerpo non mikki iwa matikpiakah se kuerpo non ayik mikki. ⁵ Dios Ye Akin ijkó otechtlali, iwa yotechmák n Espíritu para matikmatikah tikselsiskeh tlan otechkakiti.

⁶ Yika nochipa timoyolchikawah, porke kuali tikmatih ijkauak tinentinemih itech nin tokuerpo, kijtosneki ayamó tichantitokeh sansikah iwan Toteko. ⁷ Yika, tejwah tinemih ika tlaneltokálistli maya amo tikitah. ⁸ Pero timoyolchikawah, iwa tiknekiskiah yotikkajkeh nin kuerpo para matichanchiwatih iwan Toteko. ⁹ Yika maya ok tiyolitokeh itech nin tokuerpo noso ayakmó, tejwah nochipa tiknekiah tikyolpaktiskeh n Toteko. ¹⁰ Porke tejwah tinochteh timoteixpantiskeh kan Cristo tlaixkomaka, para techyolkuitis iwa techtlaxtlawis ika tlan kuali noso tlan amokuali otikchijkeh, ijkauak otiyolitokah itech nin tokuerpo.

N temachtílistli non teyorsewia

¹¹ Yika, ken tikmatih tikiimakajsi n Toteko, timochijchikawah tikinyolpatlaskeh n tlaltíkpaktlah para makitlakitakah Dios. Ye kuali techixmatok, iwa nikneki nomejwah noiwa kuali techixmatikah. ¹² Amo xikijtokah oksepa san tejwah timoweyiliah nomonawak, yej tiknekiah xiylolopaktokah por n tekil non tikchijtinemih. Ijkó xiweletikah xikinnankilikah akimeh moweyiliah porke oksikimeh kuali kintenewah pero amo kimatihi tlan kipixtokeh ijtek inyolo. ¹³ Tla techiliah yotikuatlapolojkeh, ika noni matikweyilikah Dios. Iwa tla techiliah titlalnamikilisejkeh, tikateh para tomechpalewiskeh. ¹⁴ Itlasojtlalis Cristo Jesùs technawatia ijkó matikchiwakah, porke kuali tikmatih Ye okimikijkeh topatka, iwa noni kijtosneki tinochteh otimikeh iwan Cristo. ^{Ro. 14:7-} ⁸ ¹⁵ Cristo omikki por nochteh n tlaltíkpaktlah, para akimeh yolitokeh ayakmó san

* 4:7 xoktsi kijtosneki tokuerpo

yejwah mamonawatikah, yej makichiwakah tlan Cristo kimonekiltia, Akin omikki iwa omoyoliti por yejwah. ¹⁶ Yika, tejwah ayakmó tikanmistlakoah oksikimeh kemi kichiwah n tlaltikpaktlakah; maya yowejka noiva ijkó otikistlakojkeh n Cristo, axa ayakmó ijkó tikchiwah. ¹⁷ Ijkó kiné, akin kajki inawak Cristo, mochiwa se yankuik tlakatl. Nochi tlan achto okichiwaya pojpoliwi, iwa axa nochi moyankuilia.

¹⁸ Nochi tlan onka Dios techmaka, iwa otechyekseli itech Cristo, iwa otechnawati matikinmatiltikah kenikki nochteh weletis kuali yetoskeh íwa. ¹⁹ Yika, por Cristo Jesúz, Dios omoyolsewi iwan nochteh n tlaltikpaktlakah. Ayakmó okimitak intlajtlakolwah n tlakah. Tejwah otechnawatih matiktematiltikah n kualitlajtoli kenikki se weletis yetos kuali iwan Dios. ²⁰ Ijkó kiné, tejwah tiwitseh nomonawak porke Cristo techtitlani. Kemi yaskia inewia Dios nomechtlatlaujtia ximoyolkopakah inawak. Yika, kemi Cristo techaltitlani, tomechtlatlaujtiah: xiyetokah ika kuali inawak Dios. ²¹ Cristo ayik otlajtlakolchi. Pero Dios okinmamaltili totlajtlakolwah kemi yaskia Ye otlajtlakolchi. Iwa ken tiseititokeh iwan Cristo, ayakmó techita titlajtlakolejkeh.

6

¹ Ijkó kiné, kemi titekitkeh itech nin tekitl non Dios otechmactili, tomechtlatlaujtiah amo san xikawilmaticah iteiknomatilis Dios, non Ye yonomechnextili. ² Porke itech itlajkuilok kijtoa:

Ijkuak otéchnotski onimitskak,
itech tonati ijkuak omonekia timomakixtis onimitspalewi.
Iwa axa ye nin tonati ijkuak Dios nomechmakixtis. *Is. 49:8*

³ Amitla tikchiwah non makixitlanwi aka tokni, para amaka makixnamiki toteki. ⁴ Yej ika nochi tlan tikchiwah, tikixnextiah milák titekitih inawak Dios, porke nochi tikxikoah ijkuak titlaijyowiah, keman itla techpoloa, noso itla techtekipachojtinemi, noso ijkuak techwitekih. ⁵ Miak welta yotechtsakeh. Miakeh tlakah techixnamikih iwa chikawak titekititinemih. Kualchiwa amo tikochih iwa kualchiwa amo titlakuah. ⁶ Noiva tiktetitiah tinemih

ika toyolo chipawak,
ika toixtlamatilis,
ika totlaxikolis itech tlaijyowílistli,
ika n teiknomatílistli non tomechpialiah,
por n Espíritu Santo non kajki towah,
iwa totlasojoatlalis chipawak.

⁷ Yika, otomechmachtijkeh tlan milák iwa Dios okitenexti iweletilis itech nochi tlan otikchijkeh. Iwa nochipa tichipaujanemi para timotlajtoltolpalewiskeh ijkuak techixnamikih. ⁸ Sikimeh techtlakitah iwa sikimeh amo techtlakitah. Kanaj amo techseliah iwa kanaj techyekseliah kemi yekmilajkameh. Noiva kanaj techiliah titekajkayajkeh maya tikanmiliah tlan milák. ⁹ Kualchiwa techitah kemi non amo techixmatiskiah, maya ya techixmatih. Kimoliah ya timikitiweh, pero ok tiyolitokeh, techtlaijyowiltiah, pero amo techmiktiah. ¹⁰ Maya techitah tiixpachiwi, tejwah tiyolpaktekeh, maya nesi amitla topatih, miakeh tikanpalewiah tlan ika panotoskeh, iwa tikpiyah tlan okachi ipati.

¹¹ Tokniwah de Corinto, yotomechtlapowijkeh ika milák totlajtol, iwa yotomechmatiltijkeh tlan okipiaya toyolo. ¹² Tejwah tomechtlasojtlah miak. Pero nomejwah amo nontechtlasojtlah kemi tejwah. ¹³ Nomechtlatlaujtia kemi ijkuak se tetakinyeknonotsa ipilwah: techontlasojtlakah kemi ne nomechtlasojtlah.

Amo ximowikatinemikah inwah akimeh amo kitlakitah Cristo

¹⁴ Amo ximowikatinemikah inwah akimeh amo kitlakitah Cristo. ¿Kox weletis moseitilis tlan kuali iwan tlan amokuali? Noso ¿weletis yetoskeh sansikah n tláwili iwa n tleyuálistli? ¹⁵ ¿Weletis moyekwikaskeh Cristo iwan satanás? Noso ¿weletis moyekwikaskeh se tlaneltokak iwa se non amo tlaneltokak? ¹⁶ ¿Kox weletis sansikah

yetoskeh itiopa n Dios iwa n diosmeh non kinmachijchiwah? Tejwah timochiwah icha n Dios non yolitok, ijkó kemi Ye inewia okijo:

Niyolitos iwa niyetos inwah;
Ne niyetos in Dios,

iwa yejwah yetoskeh noaxkawah.

Lv. 26:12

¹⁷ Yika noiya kijtoa n Toteko Dios:

Xikinkakajtewakah, iwa ayakmó inwah ximonelokah;
amo xiktelkokah tlan teyolijtlakoa.

Ijkuakó Ne nomechselis.

Is. 52:11

¹⁸ Ne niyetos nomotajtsi,

iwa nomejwah nonyetoskeh nopolwah iwa nochpochwah,

kijtoa n Toteko Dios non satlawel weletini.

2 Sa. 7:14

7

¹ Ijkó kiné nokniwah non satlawel nomechtlaosjta, kemi ninteh tlájtolteh yotechkak-itijkeh, moneki tinemiskeh kuali iwa amo matikchiwakah tlan weletis kijtlakos tokuerpo iwa toespíritu. Matiktlakitakah Dios, iwa matiktlasojtlakah iwa nochipa matikmopantikah.

Pablo yolpaki innawak n tlakah de Corinto

² ¡Techselikah itech nomoyolo! Amaka itla amo kuali otikchiwilijkeh, nion aka otikititijkeh se amo kuali ojtli, nion amaka otikkajkayajkeh. ³ Amo ijkí nikjtoa para nomechtlaajtlakoltis. Porke ne yonomechili nomejwah nonkateh itech noyolo. Tla tiyolitoskeh noso timikiskeh, nochipa nomechpixtos itech noyolo. ⁴ Ne kuali nikmatok nomejwah nonnechpalewiskeh iwa amo nonnechkawaskeh noselti, iwa nonkichiwah manimosisisi iwa maniyolpaki por nomejwah. Maya nipanoa itech miak tlajiyowílistli, mach nimosotlawa, yej ika no niyolpaki.

⁵ Ijkuak otiajsikoh Macedonia, mach timosewijtikateh, yej sentetl techixnamikih iwa techtlajiyowiltiah, iwa toyolo satlawel mawi. ⁶ Pero Dios, Akin kinyolchikawa akimeh mosotlawah, otechyolchika ijkuak okalakiko Tito. ⁷ Iwa amo san por Tito owala, yej porke nomejwah ononkiyolchikajkeh ijkuak ononkiyekselijkeh. Ye otechili ika nochi nomoyolo nonkinekeh nontechitaskeh, iwa otechmatilti kenikki nonmoyolkokoah iwa nonmotekipachoah por ne. Ijkuak ijkó onikma, okachi onipak.

⁸ Maya amo onomechpakti tlan onomechtlaikuilili, amo nimolnamikki. San kech tonati onechtekipacho porke onikma onomechyolkoko. ⁹ Axa nipaki. Pero amo por ononmoyolkokojkeh, yej porke ijkuak ononmoyolkokojkeh okichi ximoyolpatlakah inawak Dios. Nomejwah ononkixikojkeh n neyolkókoli iwa Dios okipakti, yika tejwah amaka itla otiktoktijkeh. ¹⁰ Porke n neyolkókoli non Dios techmaka, techpalewia para matimoyolpatlakah iwa techmakixtia. Noso n neyolkókoli de nin tlaltípkaktli, kualika mikílistli. ¹¹ Nomejwah ononkixikojkeh n neyolkókoli kemi Dios kimonekiltia, axa jxikitakah kenomi onomechpalewi! Onomechaisikamatilti tlan amokuali ononkichiwah. Onomechtokti xikualanikah iwa ximawikah. Otlanki ononkinekeh nonnechitaskeh, iwa ononkitakeh kuali ka nonkitlajiyowiltiskeh neká akin otajtlakolchijka. Itech nochi ni, nomejwah ononkitenextijkeh mach ononkipiayah itla tlajtlákoli. ¹² Ijkó kiné, ijkuak onomechtitlanili non amatlajuíloli, amo onomechtitlanili por neká akin otajtlakolchi nion por neká akin okijyowi n tlajtlákoli, yej para mamota kenikki nonmotekipachoah por tejwah ixpa n Dios. ¹³ Ye ni tlan techyolchikawa.

Pero okachi tipakih porke tikitah n Tito satlawel yolpaktok, porke nochteh ononkiyolchikajkeh. ¹⁴ Amo onimopijpinati ixpa Tito, ijkuak onikili nimosisnia de nomejwah. Porke milák nochi tlan tejwah tomechiliah, ijkó nochi kuali okisato kemi otikilijkah n Tito. ¹⁵ Iwa Tito okachi nomechtlaosjta ijkuak kilnamiki kenikki non nochteh ononkitlakitakeh iwa kenikki ononkiselijkeh iwa ononkimopantijkeh. ¹⁶ Satlawel nipaki porke nomejwah nonkichiwah tlan se nomechilia, yika nomechneltoka.

Kintlatliokoliah tokniwah de Jerusalén

¹ Nokniwah, axa tiknekih tomechmatiltiskeh kenomi itlasojoatlalis Dios yomotenexti iwan tokniwah de Macedonia. ² Maya ipan miak tlaijyowílistli yopanokeh, yejwah kipiah pakílistli, iwa maya semi próbesteh, yejwah miak yokitemakakeh kemi se non kitlawelpia. ³ Ne nonewia onikinmitak kenomi ika pakílistli okitemakakeh nochí tlan oweletkeh iwa okachi okitemakakeh. ⁴ Yejwah otechtlatlautijkeh matikinkawilikah noiva makimpalewikah n tokniwah. ⁵ Iwa amo kemi otikchiayah, porke achtó omotemaktijkeh imak Dios iwa satepa tonawak, para kichiwaskeh tlan Dios kimonekiltia. ⁶ Yika otiktlatlautijkeh n Tito makoololoti nomotlatliokolil, ijkó kemi okipewalti ijkó noiva makiyektlami n tekitl. ⁷ Yika, nomejwah okachi non tlayakantokeh itech nochí. Nomejwah

semi nontlaneltokah,
semi kuali non tlamachtiah,
semi non ixtlamatih,
semi nonteyolchikawah
iwa semi techtlasojtlah.

Ijkó kiné, kemi nomejwah nonpankisa itech nochí, nika weletis motas keniji nonkim-palewiskeh n próbesteh ika nomotomi.

⁸ Amo nomechilia kemi se tlanawátili, sanwel nikneki xikmatikah kenomi sikimeh ika miak pakílistli tlapalewiah, para nikitas kox milák nontetlasojojtla. ⁹ Nomejwah ya nonkixmatih itlasojoatlalis n Toteko Cristo Jesús. Ye nochí okipiaya kan ilwikak, pero kemi saikpanoa techtlasojtla, nochí okwalkakajte para ijkó nomejwah xiktlawelpiakah.

¹⁰ Nikneki nomechilia kemi se tlanawátili, sanwel nikneki xikmatikah kenomi sikimeh ika miak pakílistli tlapalewiah, para nikitas kox milák nontetlasojojtla. ¹¹ Yika, ijkó nomejwah ika pakílistli ononkimolijkeh nonkoololoskeh se tlatliokólili, ijkó noiva xikyakatlamikah nomoteki iwa xiktemakakah kemi nonkipiah. ¹² Porke tla se tlakatl ika nochí iyolo kitemaka kech ye weleti kitemaka, Dios kiselia, porke Ye amo techtlajtlanilia tlan amo tikpiah.

¹³ Amo nomechilia xikinmakakah miak akimeh kimpoloa iwa tlamicheh nomejwah noiva manomechpolo, yej moneki nion yejwah nion nomejwah amitla manomechpolo.

¹⁴ Nomejwah axa nonkipiah tlan ika weletis nonkim-palewiskeh. Mostla noso biktla yejwah kipiaskeh tlan nomejwah nomechpolos. Ijkó, nochipa ximosepampapalewikah.

¹⁵ Kemi kijtoa n tiotlajkuíloli: “Akin okoololo miak, amo okípixki okachi; iwa akin amo miak okoololo, mach okipolo.”

Ex. 16:18

Tito iwa itekipanojkawah

¹⁶ Nimotlasojkamati inawak Dios, porke Ye okichi mamotekipacho n Tito, ijkó kemi ne nimotekipachoa por nomejwah. ¹⁷ Ijkuak otiktlajtlanilijkeh manomechitati n Tito, amo sanwel okinek yas, yej ika miak pakílistli oyá onomechontlajpaloto.

¹⁸ Sansikah iwa n Tito tiktítlantokeh se tokni non kineltoka Dios, non kitlakitah nochteh tokniwah por kuali kichiwa iteki ijkuak tetlapowia de n kualitlajtoli. ¹⁹ Iwa amo san noni, yej nochteh tokniwah okipejpenkeh non tokni mawia towah iwa matechpalewi matiktemakatih n tlatliokólili. Tikchijtokeh nin tekitl porke tiknekih tikweyiliskeh n Toteko Dios iwa tiktenextiskeh sa tiknektokeh titepalewiskeh. ²⁰ Ijkó otikchijkeh para amo makijtokah tikchikowiskeh non tomi. ²¹ Tiknekih tikisaskeh tchipawakeh itech nin tekitl, iwa amo sanwel ixpa n Toteko Dios, yej noiva inmixpah nochteh tokniwah.

²² Sansikah iwa nonteh tokniwah, tomechtitlanilijtokeh ok se tokni non yotiki-takeh kiwilita tepalewies, iwa axa okachi porke kuali moyolchikawa nomowah. ²³ Tla aka tlajtlani akí n Tito, xikilikah ye tekiti nowa para tomechpalewiskeh. Noso tla nomechtlajtlaniah akimeh ninteh ok ome tokniwah, xikinmilikah kintitlanih n tokniwah non moololoah nika, iwa kimawistiliah Cristo Jesús. ²⁴ Yika, xikintlasojoatlakah ninteh

tokniwah, ijkó innewiah kitaskeh milák tlan onikimilih, iwa ijkó kajsikamatiskeh tleka kuali tomechyektenewah.

9

Koololoah tomi para n tokniwah

¹ Keman norkinpalewiskeh n tokniwah tlaneltokakeh, ayakmó moneki manomechtlajkuilili. ² Porke ya nikmatok nomejwah nonkimatih nontepalewiah. Iwa ikuak nika inwah non chantitokeh Macedonia, nikinmilia nomejwah non de Acaya yosexiujtik sa non mochixtokeh non tepalewiskeh. Yika ikuak tokniwah de Macedonia okimatkeh non tepalewiskeh, noiva miakeh omoyolchikajkeh tlapalewiskeh. ³ Axa nomechintitlanilia ninteh tokniwah makitakah milák sa nonmochixtokeh. Nomechnejmachtia sa ximochixtokah para makitakah milák tlan onikimili. ⁴ Amo kichiwa sikimeh de Macedonia yaskeh nowa iwa nomechajsitiweh ayamó nonmotlatlaliah. Noni techpijpinatis, iwa okachi nomejwah, ken yotikintlapowijkeh sa nonmochixtokeh nontepalewiskeh. ⁵ Yika onikitak kuali ka manikintlajtlanili ninteh tokniwah sa matlayakanakah manomechitatih, iwa matlamikah makoololokah n tomi non nomejwah yononkijtokeh nonkitemakaskeh. Ijkó nomotlatliokolil sa yetos, iwa motas milák ononkitemakakeh porke nontetlasojtlah, iwa amo san por otomechchijchikajkeh.

⁶ Kuali xikilnamikakah tlan nomechilia: Akin amo miak tooka, amo miak kipixka; iwa akin miak tooka, miak kipixka. ⁷ Xiktemakakah ijkó kemi yononkitlajkeh itech nomoyolo, amo manomechixkoko nion xiktemakakah ikuak nomechchijchikawah, porke Dios kitlasojtlah akin kitemaka ika pakílistli. ⁸ Dios weletis nomechtiochiwas para amitla manomechpolo, iwa ijkó nochipa xikpiakah tlan nonkimonekiltiskeh iwa ijkó weletis nonkimpalewiskeh oksikimeh. ⁹ N tiotlajkuiloli kijtoa:

Dios okinxejxelilah tlan iaxka n próbesteh,
iwa iyekchiwalis nochipa wejkawas.

¹⁰ Dios, Akin kitemaka n xínachtli non se kitooka iwa kitemaka tlan se kimomajsewia, nomechmakas tlan nonkimonekiltiskeh ikuak nontlatookaskeh, iwa kiskaltis iwa kuali kitlakiltis nomotlatookal iwa ijkó nochipa xiweletikah xitepalewikhah. ¹¹ Ijkó nomejwah nonkitlawelpiaskeh iwa weletis nonkimpalewiskeh oksikimeh ika pakílistli. Iwa ikuak tejwah tikanwikiliskeh nomotlatliokolil, motlasojkamatishkeh inawak Dios. ¹² Nin tomi non nomejwah nonkintitlaniliah, amo sanwel kimpalewia itech tlan kimpoloa, yej noiva kichiwa mamotlasojkamatikah inawak Dios. ¹³ Iwa yejwah kiwayijkachiwash Dios, porke nin tomi kinnextilis nomejwah milák nonkitlakitah tlan kijtoa n kualitlajtoli de Cristo. Noiva yejwah kitlakitaskah Totajtsi Dios por nomotlatliokolil non nomejwah nonkitemakah para yejwah iwa para nochteh. ¹⁴ Iwa yejwah noiva motiotsajtsiliskeh por nomejwah, iwa nomechtlasojkamatishkeh porke Dios okinnextili itlasojtlalis nomotech. ¹⁵ ¡Timotlasojkamatih inawak Dios porke otechmá se tlatliokólili weyijkachitok, non amo tiweletih tikteajsikamatiltiah ika tlájtoli!

10

Pablo kipia tekiwajyotl kemi itlateimatilti n Cristo

¹ Ne Pablo, nomechtlatlaujtia ika itlasojtlalis iwa iteiknomatilis Cristo. Sikimeh kijtoah ikuak nika nomowah satlawel niyolyámanki, iwa keman wejka nika nomechtlajkuililia ika chikawak tlájtoli. ² Ijkó kiné, nomechtlatlaujtia ikuak nias nomechitati, amo techtoktikah manikintlapowi ika chikawak tlájtoli akimeh techteiliah san intemachtilis n tlakah tiktemachtiah. Porke yoniksentralli nikinchikawaknonotsas akimeh nechtlajtoltemolah. ³ Maya titlaltikpaktlakah, ayakmó tinemih kemi n tlaltikpaktlakah. ⁴ Porke tlan tejwah tiktektiltiah amo walewa nika n tlaltíkpaktli, yej kipia weletílisti de Dios para kimpolos espíritus amokualteh. ⁵ Ijkó tikpojpoloah nochi tlan amo kuali kixnamiki, iwa amo kitekawilia mamotematilti itlajtol Dios. Nochteh akimeh ijkó kiyejyekoliah tikintoktiah makitlakita Cristo. ⁶ Ikuak tikitaskeh nomejwah kuali

ya nonkitlakitah Cristo, tejwah tikintlaijyowiltiskeh akimeh amo kinekih kitlakitaskeh Cristo.

⁷ Nomejwah san nonkitah tlanón se kichiwa. Tla aka kimolia ye de Cristo, kuali xikmatikah tejwah noiva de Cristo. ⁸ Maya nimoweyilia ika noteckiwajyo, amo nippinawa, porke n Toteko otecmák ichikawalis iwa itlanawatil para tomechylchikawaskeh iwa amo para tomechsojsotlawaskeh. ⁹ Amo xikyejyekolikah nikneki nomechmomojtit ika noamatlajkuilolah. ¹⁰ Sikimeh kijtoah noamatlajkuilolah techikawaknonotsah, pero ikuak nika teixpa, nechita amo nichikawak iwa ikuak nitlajtoa amaka kipaktia. ¹¹ Pero akin ijkó kijtojtinemi, kuali makimati ke ijkó kemi tomechnonotsah chikawak ikuak tomechtajkuililiah ikuak wejka tikateh, ijkó noiva tomechnonotsaskeh chikawak ikuak tiyetoskeh nomowah.

¹² Tejwah amo timixewiah timotamachiwaskeh noso tikchiwaskeh kemi kichiwhah akimeh innewiah moweyiliah. Porke ikuak motamachiwhah iwan oksikimeh iwa motlatlanah, san yejwah innewiah moweyiliah. Yika, tlan yejwah kichiwhah amitla ipati. ¹³ Pero tejwah amo timoweyiliskeh ika tlan amo tikpiyah, yej tiktlakitaskeh tlan Dios otechnawati matikchiwakah, iwa Ye otecmák nin tlanawátili para matomechnonotsakah nomejwah akimeh nonchantitokeh Corinto. ¹⁴ Yika, amo otikchijkeh tlan amo otechnawatijkeh ikuak otikalakitoh kan nomejwah. Porke tejwah acho otikalakitoh kan nomejwah ika n kualitlátoli de Cristo. ¹⁵ Iwa amo timoweyiliah ika oksikimeh inteki. Yej kuali tikmatokeh tla okachi nontlaneltokah, weletis titekitiskeh nomowah, pero sanwel kan otechnajnawatijkeh. ¹⁶ Noiva tiknekih tiktetlapowitiweh n kualitlátoli, okachi wejka de kan nomejwah nonkateh, iwa amo timoweyiliskeh ika oksikimeh inteki.

¹⁷ Tla aka kineki moweyilis, mamoweyili ika tlan Toteko kichiwa. *Jr.*
^{9:24} ¹⁸ Porke n tlakatl non kiyekseliah, amo ye akin inewia moyektenewa, yej neka akin Toteko kiyektenewa.

11

Pablo de milajka itlatematilti Dios

¹ Chamo weletis nonkixikoskeh kanaj kech tlájtoli, kemi se tlakatl non yokuatlapolo, milák nonnechxikoah. ² Ne nichawati nomonawak ijkó kemi Dios nomechtlasojtla, iwa yonomechteaxkati imak Cristo, kemi se íchpochtli chipawak non monamiktia iwan iokich. ³ Iwa ijkó kemi n koatl okikajkaya n Eva ika xolopijkayotl, ne nimawi manomechkajkayawah iwa ayakmó xikneltokakah n Cristo. ⁴ Nomejwah nonkin-seliah akimeh nomechmatiltiah ok se Jesús non tejwah amo otomechmatiltijkeh. Iwa nonkineltokah ok se espíritu, iwa nomejwah ya nonkipixtokeh se. Kenomi nonweletih nonkiseliah ok se tlamachtílistli iwa amo kemi non tejwah otomechmachtijkeh. ⁵ San ne nikmolia ne noiva nopati kemi n oksikimeh tlatematiltijkeh non momachiliah semi wejweyijtikeh, akimeh nomejwah nonkinneltokah.

⁶ Maya nimotlajtolpoloa ikuak nitlajtoa, ne kuali nikmati tlan niktemachtia. Nochteh nomejwah yononkitakeh itech tekil non tikchijtinemih.

⁷ ¿Kox amokuali onikchi ikuak onimoiknomá nomonawak, iwa amo onomechili techtlaxlawikah ikuak onomechmatilti itlajtol Dios? ⁸ Ne onikinkixtili n tomi oksikimeh tlaneltokakeh, iwa ika onipanotoka ikuak onomechmatilti itlajtol Dios. ⁹ Keman onikatka nomowah iwa itla onechpolo, amaka oniktlajtlanili porke n tokniwhah non ovalajkeh de Macedonia onechmakakeh nochitlan onechpoloaya. Iwa ijkó onikchi porke amo oniknek nomechtekimakas, iwa ijkó nochipa nikchiwas. ¹⁰ Ijkó kuali nikmatok milák nikixmati tlan Cristo kimonekiltia, ijkó noiva nikmatok itech nochitlan de Acaya, amaka weletis nechixnamikis. ¹¹ ¿Tleka? ¿Mach amo nomechtlasojtla? Dios kuali kimatok kenomi nomechontlasojtla.

¹² Pero tlan nikchijtiwits, ok nikchijtinemis, para mamoteixmatiltikah nekateh akimeh motenewah noiva tlatematiltijkeh kemi tejwah. ¹³ Porke ninth amo milák tlatilniltih, yej san tekajkayajkeh, iwa motlakentiah kemi yaskiah itlatitlanilwah n Cristo.

¹⁴ Iwa ni, amo tetlajtlachialti porke inewia n satanás kimi moixpatla kemi se ángel non tsotlani. ¹⁵ Yika, amo matechtlajtlachialti tla noiwa itekitwah moixpatlah kemi yaskiah tekitkeh yolchipawakeh. ¡Yejwah kiseliskeh intlaxtlawil ijkó kemi kichiwah!

Kenomi otlaijyowijtineni Pablo

¹⁶ Oksepa techkawilikah manomechili: Amaka makimoli ne yonikuatlapolo, tla ijkó non kimoliah, techkawilikah manomechtlapowi kemi se non yokuatlapolo, iwa ne noiwa manimoweyili achitsi. ¹⁷ Tlan axa nomechilia amo onechnawati Toteko, yej san kemi yaskia yonikuatlapolo porke nomechilia nikneki nimoweyilis. ¹⁸ Ijkó kemi miakeh moweyiliah por tlan weletih kichiwah, ne noiwa nimoweyilis. ¹⁹ Nomejwah non kimoliah non ixtlamatih, iwa non kinkakih ika pakílistli akimeh kuatlapolojtokeh. ²⁰ Iwa nonkilitah nonkinkakiskeh nekateh akimeh nomechtekimiktiah noso nomechkajkayawah, nomechtlawelitah iwa nomechixtlatsiniah. ²¹ Maya nipinawa nikijtos, ¡tejwah mach optimixewijkeh ijkó otomechtoktijkeh!

Tla oksikimeh mixewiah moweyiliah, noiwa ne weletis nimixewis maya tlan nomechilia nikijtoa kemi tlajtoa se non yokuatlapolo. ²² ¿Yejwah hebreos? Ne noiwa. ¿Yejwah tlakah de Israel? Ne noiwa. ¿Yejwah teixwiyah de Abraham? Ne noiwa. ²³ ¿Yejwah itekitwah Cristo? Ne okachi ni tlakewali de Cristo, maya nitlajtojtok kemi se non yokuatlapolo. Ne okachi yonitekitik, ne okachi yonechwhitekeh, miak welta yonechtsakeh, iwa miak welta ya nechmiktiskiah. ²⁴ Iwa mákuili welta n judíojteh onechtsonwitekeh ika sempóali iwa káxtoli iwa nawi (39) tsonwitekílisteh non kinotsah azote. ²⁵ Eyi welta onechkuaujtenkeh, iwa se welta onechmojmotlakeh ika tetl. Eyi welta oapolak n barko non itech oniaya, iwa se welta onimoka se tonati iwa se yúali itlajko n weyi atl. ²⁶ Ne wejka yoninentínenki, iwa miak welta onimokokopato itempa n miketékochtl ikuak oniaya itech río, inmak tlachtekeh, inmak nokniyah n judíojteh iwa inmak non amo judíojteh. Noiwa onikchikoitak n mikílistli itech weyi altepetl, kan amaka chantí, itech weyi atl, iwa inmak akimeh motenewah kineltokah Dios. ²⁷ Miak tekipachólistli iwa tlaijyowlílistli yonipanok. Miak welta onimokochmikti, kanaj amo onikpiaya tlan nikkuas nion tlan nikonis, yika miak welta oniajapismik, iwa miak welta onisekmik porke amo onikpiaya tlan nikmokentis.

²⁸ Nuchi ni nikijyowia, pero noiwa ixmostla nechtekipachoa kenomi kateh sentetl n tokniyah. ²⁹ Tla aka mokokoa noiwa ne nikmachilia ikokolis. Tla se tokni kitoktia ok se tokni mawetsi itech tlajtlácoli, ne nechyolkokoa. ³⁰ Tla onka itla tlan ika weletis nimoweyilis, sanwel nimoweyilis ikuak nikita amo nichikawak. ³¹ Totajtsi Dios, Itajtsi n Toteko Cristo Jesús, Akin nochipa moneki matikweyijkachiwakah, Ye kimatok milák tlan ne nikijtoa. ³² Ikuak onikatka Damasco, n weyi tlanawati non okitekitiliaya n rey Aretas, okintlali tlamokuitlawijkeh makimokuitlawijtokah n kaltentli de non altepetl, para ikuak nikisaskia ik ompa manechkitsikah iwa manechtsakuatih, ³³ pero ik se bentana kan tepamitl, onechtemowijkeh ijtik se weyi chikiwitl, iwa ijkó onikcholili n rey.

12

Dios okinextili n Pablo tlan onka ilwikak

¹ Ne amitla niktlani tla san ne nimoweyilia, moneki manomechtlapowi tlan Toteko onechnextili iwa onechajskamatilti. ² Nikixmati se tlakatl non kineltoka Cristo, non ya kipia májtlaktli iwa n nawi xiwitl okiwakakeh ipan eyi ilwikak. Amo nikmati kox okiwakakeh ika ikuerpo noso san iespíritu, sanwel Dios kimi. ³ Amo nikmati kox ika ikuerpo noso amo ika ikuerpo okiwakakeh, sanwel Dios kimi. ⁴ Okiwikakeh xochitlalpan, iwa ompa okinkak tlájtolteh non amaka tlakah kikawiliah makinmijto.

⁵ Ne weletis nimoweyilis de se tlakatl kemi ye, pero amo nimoweyilis san ne nonewia, yej sanwel ikuak nimomachilia amo nichikawak. ⁶ Tla ne niknekiskia nimoweyiliskia, noni amo kijtosneki yonikuatlapolo, yej sanwel nomechilijtoskia tlan milák. Pero ne

amo ijkó nikchiwa porke amo nikneki aka makimoli okachi nimoweyilia ika tlan nechitaskeh nikchiwa, noso nechkakiskeh nikijtoa,⁷ nochi tlan Dios onechnextili saikpanoa kuajkualtsi. Iwa para ne amo manimoweyili ika tlan Toteko onechnextili, onechkawili matsoponto kemi itla witstli kemi yaskia n satanás onechtlalili itech nokuerpo, para manechtlaijyowilti.⁸ Eyi welta yoniktlajtlanili n Toteko manechkixtili nin tlajiyowílistli. ⁹ Pero n Toteko onechili: “Tikpixtok notlasojtlalis, amitla ok se mitspoloa; noweletilis okachi motenextia itech non amo chikawakeh.” Yika nipaki ken amo nichikawak, para notech mamotenexti iweletilis Cristo. ¹⁰ Iwa nipaki keman itla nechyoltiana, ikuak nechwijwikaltiah, keman itla nechpoloa, keman nechtotojtokah iwa keman nitlajiyowia por Cristo; porke keman amo nichikawak, Cristo nechchikawa.

Pablo motekipachoa por n tlaneltokakeh de Corinto

¹¹ Kemi se non yokuatlapolo onimoweyitene, pero nomejwah ononnechtokejeh ijkó manikchiwa. Omonekia nomejwah kuali nontlajtoskiah de ne. Pero ne noiya nopati kemi nekateh wejweyi tlatitlaniltih akimeh nomejwah nonkintokatinemih maya ne amitla nopati. ¹² Itech noteki non onikchi ika miak noyolika nomowah, omotak ika neskayolteh tetlajtlachialtijeh iwa ika milagros non onikinchi ika iweletilis Dios. Ika noni, moteixmatiltia ne de milajka itlatematilti. ¹³ Nomejwah amo onomechitak kemi amitla nomopati innawak n oksikimeh tokniwah. Pero chamo ejé ijkó onomechitak, porke amo onomechtekimák, ¡techtlapojpolwikah por amo onomechtekimák!

¹⁴ Axa ya nimotlatlajitok nomechtlajpaloti, iwa ika ni, ya eyi welta nomechontlajpalos, porke amo niktemoa tlan nonkipiah, yej nomejwah nomechtemoa, porke n tetajmeh kipiah de koololoskeh tomi para impilwah, iwa amo n tepilwah para intajwah. ¹⁵ Iwa ne ika noch i noyolo niktemakas noch tlan nikpia, iwa asta manechmiktikah para nomejwah ximomakixtikah; maya nikita ikuak ne okachi nomechtlasojtla, nomejwah okachi ayakmó nonnechtlasojtlah.

¹⁶ Porke sikimeh maya kijtoah amitla onomechtlajtlanili, kijtoah ke ika noixtlamatilis onomechkajkaya. ¹⁷ ¿Kox onomechkajkaya, ikuak onomechtitlanili aka tokni? ¹⁸ Ne oniktlatlaujti Tito manomechtlajpaloti, iwa oniktitlanki mawia iwa n ok se tokni. ¿Onomechkajkaya n Tito? ¿Mach amo milák san ken tiomeh timilajkanemih itech san se totlamachtilis?

¹⁹ Chamo non kimoliah tejwah san timotlajtolpalewijtokeh nomowah. Pero amo ijkó; Dios iwa n Cristo kimatokeh milák tlan tomechiliah. Nokniwah non semi nomechtlasojtla, ijkí nikchiwa para okachi ximoskaltikah itech nomotlaneltokalis. ²⁰ Porke nimawi kenikji nomechajsiti ikuak nias nomechitati, chamo amo nomechajsiti kemi ne niknekiskia, iwa chamo nion nomejwah nonnechitaskeh kemi nomejwah nonnekiskiah.

Nikmawilia nomechajsiti,
nonmokujtokeh,
nonmoxikoah,
nonmokualanijtokeh,
nonmoxexeloah,
nonxolopijteh,
nontepojoah,
nonmoweyiliah,
noso manomechajsiti nonpapajsolitokeh.

²¹ Noiya nimawi tla ikuak nias nomechtlajpaloti Nodios manechpijpinati nomoixpa, iwa tlawel manichoka ika tlan nonkichiwah, nomejwah yonontlajtlakolchijtinenkeh iwa ayamó nonyekmilajkanemih, nonmomekatiah iwan ok nonkichiwah tlan pitsotik.

¹ Ika ni ya eyi welta nomechontlajpaloti. Tla itla nonkiyektlaliskeh moneki mayetokah ome noso eyi tokniwah akimeh milák okitakeh tlan otlamochi. ^{Dt. 19:15}

² Ne achto yonomechilijka ikuak onomechtajpaloto, iwa axa oksepa nomechilia kemi niyetoskia ompa nomowah. Nitlajkuiloa para akimeh otlajtlakolchikjeh, iwan oksikimeh noiwa, tla oksepa nias amo nomechiknomatis. ³ Ikuakó nomejwah nonkajsikamatiskeh milák Cristo kitenkixtia itlajtol notech. Iwa Cristo amo monextia nomonawak kemi se non amo kipia chikawálistli, yej kiteititia iweletilis nomotech. ⁴ Milák, Cristo okikrusifikarjkeh kemi se non amo chikawak, pero axa yolitok ika iweletilis Dios. Ijkó noiwa timochiwah kemi Ye, pero tla tiseititoskeh iwan Cristo tiyolitoskeh ika iweletilis Dios para tomechpalewiskeh.

⁵ Nomejwah nomonewiah ximoyejyekakah kox milák nonkipiah tlaneltokálistli. Ijkó nonkimatiskeh kox nonteaxkawah inawak Cristo, noso san nonmíxkopeteh. ⁶ Pero nikneki nomonewiah xikajsikamatikah, tejwah milák titeaxkawah inawak Cristo. ⁷ Tejwah timotrotsajtsiliah inawak Dios, para amo xikchiwah tlan amokuali. Amo timotrotsajtsiliah para xikitakah kuali tikchiwah toteki, yej para xikchiwah tlan kuali; maya oksikimeh makijtokah mach ompa tlan tikchiwah. ⁸ Porke amo onka tlan ika weletis tikixnamikiskeh tlan milák, yej sanwel tikchiwah tlan kipalewia tlan milák. ⁹ Yika, tejwah tipakih ikuak tikitah amo tichikawakeh iwa nomejwah nonchikawakeh, iwa timotrotsajtsilijtoskeh para ixmostla ximoyolchipajtiwah. ¹⁰ Axa ken ayamó nomechontlajpaloa, nomechtajkuililia para ikuak nias nomechitati, amo chikawak manomechnonotsa ika n tekiwajyotl non Toteko Dios onechmactili, para mamoskalti nomotlaneltokalis iwa amo para nomechpojpolilis.

Pablo iksemi momakawa

¹¹ Iwa axa nokniwah xiypakikah, ximoskaltijtiwah itech itlajtol Dios, xiyecknemikah, ximoyolchikawakah iwa ximosepanyekwikakah. Iwa Dios non teyolsewia iwa tetlasojtla, yetos nomowah. ¹² Ximosepantlajalokah iwa ika chipawak nomoyolo ximoixtenamikakah.

Nochtek n tokniwah non kineltokah Cristo Jesús nomechontlajpalolah.

¹³ Iteiknomatilis Toteko Cristo Jesús, itlasojtlalis Dios, iwa isepanyekuikalis n Espíritu Santo mayeto nomowah.

San Pablo kintlajkuililia non de Galacia

Pablo kintlajkuililia n tlaneltokakeh non chantitokeh Galacia

¹ Ne, Pablo, nitlatitlanili. Amo onechtítlanki nion onechtekítlali aka tlakatl, yej inewia Cristo Jesús, iwa n Totajtsi Dios Akin okiyoliti n Jesús ikuak omikki, yejwah onechmakakeh nin tekítl. ² Ne, iwa nochteh tokniwah akimeh kateh nowa, tomechontlajkuililiah nomejwah tlaneltokakeh akimeh chantitokeh kan tlali de Galacia. ³ Totajtsi Dios iwa n Toteko Cristo Jesús manomechmakakah intiochiwalis iwa inyolsewilis. ⁴ Akin omotemák makimiktikah para kintlaxtlawas totlajtlakolwah, iwa ijkó techmakixtis imak tlajtlákoli non onka itech nin amokuali tlaltípkaktli. Ijkó okiyekchi tlan Totajtsi Dios okimonekilti. ⁵ ¡Matikweyilikah nochipa n Dios! Ijkó mamochiwa.

Amo onka ok se tlamachtílistli non maweleti matemakixti

⁶ Satlawel nechtatlachialtia keniji nomejwah ya nonkikajtiwih Dios, Akin onoméch-notski ika n tlaosjtlálistli non Cristo techpialia, iwa yopé nonkineltokah ok se tlamachtílistli. ⁷ Amo kijtosneki onka ok se kualtlájtoli de Dios. Yej onkateh sikimeh akimeh kinekih nomechkuatlapololtiskeh iwa kipatlaskeh n kualtlájtoli de Cristo. ⁸ Tla aka, san akin yetos, maya seme de tejwah noso se ángel de ilwikak, nomechmachtia ok se tlájtoli non tejwah amo ijkó otomechmachtijkeh, mawetsi ipa ikualanilis Dios iwa makitlaijyowilti. ⁹ Ne yonomechilika iwa axa oksepa nomechilia: Tla aka tlakatl nomechmachtiki ika ok se tlájtoli non makijto noiwa techmakixtia, pero amo kemi non yotomechmatiltijkah, ma Dios makitlaijyowilti ika ikualanilis.

¹⁰ ¿Nomejwah nonkiyejekolah niktemojtinemi manechyekitakah n tlakah noso manechyekita Dios? Nonkiyejekolah nikneki nimokawas kuali iwan tlakah. Tla san niktemoskia nimokawas kuali iwan tlakah, ayakmó niyetoskia itetlakewal Cristo.

Pablo kitemachtia tlan Dios okinextili

¹¹ Nikneki xikmatikah nokniwah, nin kualtlájtoli non kichiwa ximomakixtikah non ne niktetlapowia, amaka tlakatl onechititi. ¹² Amo onechmactili aka tlakatl, nion aka onechmachti, yej inewia n Cristo Jesús onechmatilti.

¹³ Nomejwah ya nonkimatih tlan onikchiwaya ikuak oniktlakitaya intlamachtilis n judíojteh. Ne onikintotojtokaya akimeh okineltokayah Cristo Jesús, porke oniknekaia nikimpojpolos. ¹⁴ Itech intlamachtilis n judíojteh, miakeh non inwah onimoskalti onikintlaniaya, porke ne okachi onikmopantiaya tlan onechkajtewiljkeh iwa onechmachtijkeh nowejkatatawah. ¹⁵ Pero ikuak ayamó onitlakatia, Dios ika itlaosjtlalis onechpéjpenki para maniyeto itékitki. Yika, ikuak Ye okimonekilti, ¹⁶ onechixmatilti ikone, para manikinmatilti n kualtlájtoli non kichiwa mamomakixtikah non amo judíojteh. Ikuak ijkó otlamochi, amaka inawak onimotlajtoltito, ¹⁷ nion onikinmitato Jerusalén akimeh achto Dios okintlali mayetokah itlatitlanilwah. Yej san nima onia Arabia, iwa satepa oksepa oniwalmókopki Damasco.

¹⁸ Iwa eyi xiwitl satepa onia Jerusalén onikontlajpaloto n Pedro, iwa ompa onimoka káxtoli tonatijmeh iwan ye. ¹⁹ Pero ikuak ompa onikatka amaka ok se tlatitlanili onikitak, sanwel Jacobo, ikni n Toteko Jesús. ²⁰ Dios kuali kimatok nochí tlan nomechikuililjtok milák.

²¹ Satepa, onia kan tlalmeh de Siria iwa Cilicia. ²² Pero ayamó onechixmatiah n tlaneltokakeh de Cristo, non chantitokeh kan tlali de Judea. ²³ San okikakiah tlan okijtoayah non oksikimeh: “N tlakatl non achto okinekia kipojpolos n kualtlájtoli de Cristo Jesús, axa inewia tetlapowijitinemi de nin tlájtoli.” ²⁴ Iwa, okiweyijkachiwayah Dios ika tlan onikinmatiltiaya.

2

N oksikimeh itlatitlanilwah n Totajtsi Dios kiyekseliah n Pablo

¹ Ijkuak yopanok májtatlktli iwa nawi xiwitl, oksepa onia Jerusalén. Ijkuakó onikinwík n Bernabé iwa n Tito. ² Onia Jerusalén porke Dios onechnextili maniwia ompa. Iwa ompa, oksika onimotlapowi, iwa onikinmajsikamatilti n kualtlájtoli non temakixtia non ne nikinmatiltia non amo judíojteh. Ijkó onikchi para amaka makijto sanenka tlan nikchijtok. ³ Pero maya nowa okatka n Tito, mach okitoktijkeh mamosirkunsidaro, porke ye amo judío. ⁴ Milák noiva ompa okatkah sikimeh tlakah non omotenewayah tokniwah pero mach milák. Ninteh san ichtaka okalakeh kan otimooololoayah san para techist-lakoskeh kenikki otiveletkeh otimomatojtonkeh imak intlanawatil, yejwah okinekiah techtoktiskeh matiktlakitakah intlanawatil. ⁵ Pero tejwah amo otikmokawilijkeh oksepa matechilpikah itech itlanawatil Moisés, porke nochipa otiknekiah mayeto nomowah n kualtlájtoli non techmakixtia.

⁶ Pero nekateh tokniwah non tlayakantokeh, amitla yankuik onechnawatijkeh manikchiwa. Ne mach noteki tla yejwah wejweyi tlayakankeh noso amó, porke Dios amo san techikotlasojtla. ⁷ Yika, yejwah okajsíamatkeh Dios onechnawati manikinmatilti nin kualtlájtoli non temakixtia, akimeh amo judíojteh, ijkó kemi Pedro okinawatijkeh makinmatiltiti n kualtlájtoli n judíojteh. ⁸ Porke Dios Akin okinawati n Pedro makinmatiltiti n kualtlájtoli n judíojteh, Ye Akin noiva onechtítlanki manikinmatiltiti n kualtlájtoli non amo judíojteh.

⁹ Yika Jacobo, Pedro iwa Juan, akimeh okachi otlayakantakah, okajsíamatkeh Dios onechmactili nin tekitl, yika onechmatlajpalojkeh iwa onechselijkeh ne iwa Bernabé. Okitayah kuali tejwah matikintlapowikah non amo judíojteh, iwa yejwah kintlapowiskiah n judíojteh. ¹⁰ Yejwah otechtlatlautijkeh amo matikinmilkawakah n tokniwah akimeh amitla okipiayah, iwa ye ni tlan onikmoli nikchiwas.

Pablo kajwa n Pedro kan tlali de Antioquía

¹¹ Pero ijkuak Pedro owala Antioquía, onikili ixkotika amokuali tlan okichijtoka. ¹² Porke achto otlakuaya inwah non amo judíojteh iwa omowikaya inwah, pero ijkuak okalakikoh sikimeh tlakah non Jacobo okwalintítlanki, Pedro opé moixkoyantia innawak non amo judíojteh. Ayakmó okinek otlakua inwah, porke okinmawiliaya n tlakah akimeh okijtoayah mamosirkunsidarakah. ¹³ Ijkuakó n oksikimeh judíojteh non kineltakah Cristo Jesús iwa ochantitokah Antioquía, noiva okipixkeh ome inmixko, porke okichijkeh kemi Pedro okichi, iwa asta Bernabé noiva ijkó okichi. ¹⁴ Pero ijkuak onikinmitak amo okichijtakah kemi kitemachtia n kualtlájtoli de Dios non temakixtia, inyakapa nocteh tokniwah non ompa okatkah, onikili n Pedro: “Maya te ti judío, tikchijtinemi kemi kichiwah non amo judíojteh, iwa amo kemi n judíojteh; ¿kenikki kiné tikinchijchikawa akimeh amo judíojteh mamokopakah judíojteh?”

Ika totlaneltokalis Dios techita tiyolchipawakeh

¹⁵ Tejwah otitlakatkeh Israel yika tijudíojteh, iwa amo kemi non amo judíojteh, tlajtlakolchijkeh. ¹⁶ Pero kuali tikmatokeh amaka kitlapojpolwiskeh por okichi tlan tlanawatia n tlanawátili de Dios, yej se momakixtia tla se kitlalia itlaneltokalis itech Cristo Jesús. Yika, tejwah noiva yotikneltokakeh Cristo Jesús, para Dios matechtlapopolwi por yotitlaneltokakeh inawak iwa amo por tikchiwah tlan kijtoa n tlanawátili. Porke amaka weletis momakixtis sanwel por kitlakita n tlanawátili.

¹⁷ Axa, tla tikneltakah yotechtlapojpolwijkeh por otikneltokakeh Cristo, ika noni motenextia tejwah titlajtlakolejkeh. ¿Kijtosneki Cristo techtoktia matiyetokah titlajtlakolejkeh? ¡Amó, ayik ijkó matikmolikah! ¹⁸ Pero tla oksepa niktlakita itlanawatil Moisés non ayakmó oniktlakitaya, nimotlajtlakoltia. ¹⁹ Porke inawak n tlanawátili ne yonimik iwa ayakmó weleti nechnawatia, axa niyolitok sanwel para Dios. ²⁰ Ijkuak Cristo omikki ipan krus ne noiva onimik. Yika, axa mach ok ne akin niyolitok, yej Cristo yolitok notech. Iwa tla axa niyolitok itech nin kuerpo, niyolitok porke onikneltokak ikone n

Totajtsi Dios, Akin satlawel onechtlasojtlak iwa omotemák makimiktikah nopatka. ²¹ Ne mach nikneki nikixpanawis itlasojtlalis Dios; porke tla timotlapojpolwiskiah inawak Dios san por tikneltokah itlanawatil Moisés, sanenka omikki n Cristo.

3

Tikselia n Espíritu tla tikneltokah Cristo

¹ ¡Miálmasteh Gálatas, nontlapolojtokeh!

¿Akin onomechtajchiwi, para amo xikneltokakah n kualtlájtoli non milák? Itech totemachtilis otomechajsikamatiltijkeh kenomi nonkitaskiah ika nomoixtololowah n Cristo Jesús Akin omikki itech krus. ² Sanwel nikneki technankilikah tlan nomecht-lajtlanis: ¿Ononkiselijkeh Iespíritu n Dios por ononkitlakitakeh n tlanawatílistli noso por ononkineltokakeh n Cristo? ³ ¡Semi amo nontlakakih! Nomejwah opé non nemih iwan Espíritu ikuak onontlaneltokakeh inawak Cristo. Iwa axa, ¿nonkinekih nonkichiwaskeh tlan kijtoa itlanawatil Moisés para weletis nonyetoskeh kemi Dios kineki? ⁴ ¿Nonkiyejekolah amitla onomechpalewi nochí tlan yonontlaijyowijkeh? ⁵ Ijkuak Dios nomechmaka Iespíritu iwa nomechchiwilia milagros, ¿tleka kichiwa? Amo kichiwa por nonkitlakitah tlan kijtoa itlanawatil Moisés yej por ononkineltokakeh tlan ononkikakeh de Cristo.

⁶ Abraham okineltokak Dios, yika Dios okiyekseli kemi yolchipawak. ⁷ Yika, kuali xikmatikah akimeh milák iwejkaixwiyah Abraham yejwah akimeh milák tlaneltokah. ⁸ N tiotlajkuíloli okijo tlan satepa tlamoichiawaskia ika non amo judíos, por intlaneltokalis. Dios okisentlalili n Abraham ninteh kualtlájtolteh: “Por motlaneltokalis nikintiochiwas nochteh n tlaltikpaktlakah.” *Gn. 12:3*

⁹ Ijkó kiné, nochteh akimeh kineltokah, Dios kintiochiwa sansikah iwan Abraham.

¹⁰ Pero akimeh moyolchikawah itech itlanawatil Moisés, kateh itech tlajtlákoli. Porke n tiotlajkuíloli kijtoa: “Miak tlaijywílistli kipias akin amo makiyekchiwa tlan kijtoa n tlanawátili.” *Dt. 27:26*

¹¹ Yika, kuali moajsikamati, amaka weleti momakixtia de itlajtlakolwah san por kichiwa tlan kijtoa n tlanawatílistli; porke n tiotlajkuíloli kijtoa: “N yolchipawak ika itlaneltokalis yolitos.” *Hab. 2:4* ¹² Porke n tlanawatílistli amo motlaxilia itech n tlaneltokálistli, yej kijtoa: “Akin kineki yolitos iwa kitlakitas n tlanawátili, moneki makitlakita nochí tlan kinawatia non tlanawátili.” *Lv. 18:5*

¹³ Cristo okitlaxtlawako totemakixtilis non otechmamaltaya n tlanawatili ikuak omotlajtlakolmamaltiko por tejwah. Porke kajki ikuilitok: “Satlawel kitlajtlakoltia akin kipiloah itech se kuawitil.” *Dt. 21:23* ¹⁴ Ijkí otlamochi para n tlatiochiwálistli non Dios okisentlalili n Abraham makinmakakah por Cristo, akimeh amo judíojteh, iwa ijkó nochteh matikselikah ika totlaneltokalis itech n Espíritu non Dios techmaka.

N Tlanawátili iwa n tlájtoli non Dios okisentlali

¹⁵ Nokniyah, techkawilikah manomechajsikamatilti tlan kijtosneki nin tlájtoli non Dios okisentlali. Ijkuak ome tlakah kisepantlaliah se tlájtoli itech se amatl, amaka weletis kixpanawis noso itla kajxitilis. ¹⁶ Ijkó kiné, Dios okisentlalili Abraham iwa iwejkaixwi. Amo kijtoa: “Para nochteh iwejkaixwiyah”, kemi yaskiah miakeh, porke amo miakeh yej san se: “Para akin motech walewatos.” Sanwel Ye n Cristo. ¹⁷ Ye nin tlan ne nikijtoa: Dios okisentlalili Abraham, iwa omotlajtolsenka íwa. Yika itlanawatilis, non owala nawi siento iwa sempóali iwa n májtlaktli (430) xiwitl satepa, mach weletis kipojpolos tlan Dios okisentlali nion kipolilis ipati tlan Dios yokijto kimakas Abraham. ¹⁸ Yika, tlan Dios okisentlali techaxkatalis amo tikselialia por tiktakitah n tlanawatílistli, porke tla tikselialia por tiktakitah n tlanawatílistli ayakmó yetoskia porke Dios okisentlali ika itlajtol. Pero Dios okitiochi n Abraham ijkó kemi okili kitiochiawaskia sanjki.

¹⁹ Tla ijkó, ¿tlan ipati itlanawatil? Non tlanawátili otechmactilijkeh para matikasikamatikah tlan tlajtlákoli iwa tlan amó, iwa sanwel motekitiltiskia asta ikuak ayamó owalaya Akin Dios okisentlali kualtitlanis. Non tlanawátili n ángelteh okimactilijkeh

n Moisés, iwa tejwah otikselijkeh imak Moisés. ²⁰ Ijkuak Dios okisentlali kitiochiwas n Abraham, inewia Dios okili iwa amo omonek aka ok se matetlapowiki, porke Dios inewia okichi.

Pablo kiteajskamatiltia tleka omotlali itlanawatil Moisés

²¹ ¿Kox weletis n tlanawatílistli kixnamikis tlan Dios okisentlali kichiwas? ¡Amó, ayik! Porke tla motemakaskia se tlanawátili non weletiskia techmakaskia yolílistli, ijkuakó ya tichipawatoskiah de totlajtlakolwah inawak Dios. ²² N tiotlajkuiloli kijtoa, tinochteh techmapixtok n tlajtlákoli, ijkó nochteh akimeh kineltokaskeh n Cristo, makiselikah tlan Dios okisentlali kinmakas.

²³ Ijkuak ayamó otikmatiah tlan tlaneltokálistli, n tlanawátili otechmapixtoka asta ijkuak omoteixmatilti n tlaneltokálistli. ²⁴ Ijkó kiné, n tlanawatílistli okatka kemi akin techmokuitlawia asta ijkuak owala Cristo. Iwa ijkó matimochipawakah por Ye. ²⁵ Iwa axa, kemi yotikneltokakeh n Cristo, itlanawatil Moisés ayakmó moneki matechyakanto.

²⁶ Porke nonnochteh nontepilwah de Dios por nonkineltokah Cristo Jesús. ²⁷ Porke nochteh akimeh omokuaatekijkeh itech Itoka n Cristo, yomoyankuiktlakentijkeh de Cristo. ²⁸ Axa inawak Dios, ayakmó onkateh judíos noso amo judíos, tlanemakteh noso san yejwah monawatiah, noso tlakatl noso siwatl, porke tinochteh tiseititokeh iwan Cristo Jesús. ²⁹ Tla nomejwah non iaxkawah Cristo, milák nonteixwiyah de Abraham, iwa nonkiseliskeh tlan Dios okisentlalili kimakas Abraham.

4

¹ Ye ni tlan nikneki xikajskamatikah: Ijkuak ok chokotsi n tekone akin kitlaaxkatiskeh, kajki san kemi se itlakewal n teta, maya momatok ye iaxka nochí tlan kipia ita. ² Onkateh akimeh kimokuitlawiah non chokotsi iwa kitiliah tlan okiavaxkatiijkeh. Satepa ijkuak motlami tlakatl, ya weletis kiselis tlan iaxka. ³ Tejwah ijkó otipanokeh, ijkuak otikatkah titelpokameh otechyoltlanaya nochí tlan okichiwayah n tlaltikpaktlakah. ⁴ Pero ijkuak oajsiko n tonati, Dios okwaltílanki Ikone non otlákatki itech siwatl, iwa omoskalti imak n tlanawatílistli. ⁵ Ye okitlaxtla iwa okinmakixti akimeh okatkah imak non tlanawátili, ijkó Dios otechseli kemi ipilwah.

⁶ Iwa ken ya titepilwah, Dios okitílanki itech toyolo Iespíritu Ikone, iwa Iespíritu techpalewia matiknotsakah: “¡Abba, Totata!” ⁷ Ijkó kiné, te ayakmó tika kemi se tetlakéwali inawak Dios, yej titekone. Iwa tla titekone noiva Dios mitstlaaxkatalis.

Pablo motekipachoa por non kineltokah Cristo Jesús

⁸ Ijkuak nomejwah ayamó ononkixmatiah Totajtsi, ononkinmopantiayah n diosmeh non kinmachijchiwah non amo milák diosmeh. ⁹ Pero axa nomejwah ya nonkixmatih Dios, noso okachi kuali Dios ya nomechixmati. ¿Kenijki oksepa nonkinekih nonkitlakitaskeh tlan amitla ipati nion tepalewia, iwa oksepa manomechmapixtinemi? ¹⁰ Nomejwah ok non kilwichiwiliah se tonati, yankuik mestli, yankuik xiwitl noso itla ok se tonati. ¹¹ Kualchiwa nechtekipachoa kox amo sanenka n tekítli non onikchi nomowah.

¹² Nokniwah nomechtlatlaujtia ximokopakah kemi ne, ijkó kemi ne onimokopki kemi nomejwah. Nomejwah ayik itla amokuali ononnechtoktijkeh. ¹³ Nomejwah kuali nonkimatokeh ijkuak sakinika onomechmachti n kualitlajtoli de Dios non techmakixtia, ne onimokokoaya. ¹⁴ Maya onomechtekimák ika nokokolis non onikpiaya, nomejwah mach ononnechtlawelitakeh nion onomechtlajyalti. Yej ononnechyejkselijkeh kemi se iángel Dios; noso kemi ne nonewia niyetoskia Cristo Jesús. ¹⁵ ¿Kani omoka non pakílistli non ononnechpialiyah? Ne kuali nikmatok, nomejwah asta nonkinkopinaskiah nomoixtololowah iwa nonnechinmakaskiah. ¹⁶ Iwa axa, ¿nomejwah nonnechkokoliah por onomechili tlan milák?

¹⁷ Nekateh tlamachtijkeh tekajkayajkeh kinekih xikitakah nonkinmopantiah, pero amo ika kuali inyolo kichiwas. Yejwah kinekih nomechxeloskeh tonawak, para nonyaskeh inwah. ¹⁸ Semi kuali tla sikimeh nomechmopantiah, pero mayeto ika kuali inyolo nochipa, iwa amo san ijkuak nika nomowah. ¹⁹ Nopilwah, oksepa nitlaijyowijtok

por nomejwah, kemi ikuak se siwatl ya kipati ikone, asta mayeto Cristo itech nomoyolo. ²⁰ ¡Niknekiskia axa niyatos nomowah iwa nomechnonotsas ika noyamankatljtol, porke ayakmó nikmati tlan okachi nomechilis!

Agar iwa Sara

²¹ Nomejwah akimeh nonkinekih nonkitlakitaskeh itlanawatil Moisés, techilikah: ¿amo nonkikaktikateh tlan kijtoa non tlanawátili? ²² Itlajkuilol Dios kijtoa Abraham okímpixki ome ipilwah: se iwan iteska Agar, iwa ok se iwa isiwa Sara. ²³ Agar okípixki se ikone non itoka Ismael kemi nochí siwatl kipia ikone, pero n Sara okípixki ikone Isaac para mamochiwa nochí tlan Dios okisentlali kichiwaskia para Abraham. ²⁴ Ninteh ome siwameh kinteajsikamatiltiah ninteh ome tlájtolteh non Dios okisentlali. Agar kiteititia n tlájtoli non Dios okisentlali kan tepetl Sinaí, iwa akimeh kitlakitah non tlanawátili, ijlpitokeh itech. ²⁵ ¡Agar kitenextia n tepetl non itoka Sinaí non kajki kan tlali de Arabia!, ye n axa Jerusalén. Nin altepetl iwa ipilwah kateh kemi yaskia ilpitokeh itech nin tlanawátili. ²⁶ Pero n Jerusalén non kajki ilwikak amo kajki imak non tlanawátili, iwa tejwah titepilwah de non Jerusalén. ²⁷ N tiotlajkuiloli kijtoa:

Xipaki te siwatl non amo tikimpia mopilwah;
xitsajtsi ika pakílistli te non amo tikixmati kenikki tekoko ikuak se siwatl kipia se ikone.
Porke n siwatl non okikakajtejkeh kimpias okachi ipilwah
iwa amo n siwatl non kipia iokich.

Is. 54:1

²⁸ Nokniwah, tejwah timochiwah kemi Isaac, tejwah titepilwah non Dios okisentlali kimakas n Abraham. ²⁹ Pero ijkó kemi Ismael, non otlákatki kemi tlakatih nochteh n kokoneh, okitlawelitak n Isaac, non otlákatki ika iweletilis Espíritu. Ijkó axa noiwa tlamochijtok. ³⁰ Pero itlajkuilol Dios technextilia tlan Dios okili Abraham: “Xikixti de mocha moteska Agar iwa ikone, porke ikone moteska amo weletis tiktlaaxkatiskeh sansikah iwa n ikone mosiwa Sara.”

Gn. 21:10

³¹ Ijkó kiné nokniwah, tejwah amo ipilwah Agar non okatka tlanémaktli,* yej titepilwah de Sara non amayik okatka tlanémaktli.

5

Cristo otechtojtomako imak tlanawatili

¹ Cristo otechtojtomako imak tlanawatílistli. Yika xiyeknemikah, iwa amo xikmokawilikah oksepa manomechijilpi n tlanawátili. ² ¡Xikkakikah! Ne Pablo, nomechilia: Tla nomejwah nonmokawiliah manomechsirkunsidarakah, amo okachi nomechpalewis Cristo. ³ Oksepa nomechilia, nochí tlakatl akin kimokawilia makisirkunsidarakah moneki kichiwas nochí tlan kijtoa n tlanawatílistli. ⁴ Nomejwah akimeh nonkinekih manomechitakah kemi non yolchipawakeh por nonkitlakitah n tlanawatílistli, yonommoixkoyantijkeh de Cristo, iwa ayakmó nonkateh itech ikualtilis Dios. ⁵ Tejwah tikmatokeh n Espíritu techpalewia, iwa tikneltokah Dios techtlapojpolwis por totlaneltokalis. ⁶ Porke tla tikateh iwan Cristo Jesús, amitla ipati tla tisirkunsidaritokeh noso amó. Tlan milák ipati, matikneltokakah Cristo Jesús, iwa ika non tlaneltokálistli matimotlasoijtlakah.

⁷ Nomejwah ya kuali ononyayah. ¿Akin onomechtoktih ayakmó xiktlakitakah tlan milák? ⁸ Porke non tlamachtílistli amo walewatok itech neká akin onoméchnotski. ⁹ Kuali xikmatikah: “San ika achitsi levadura kisamawa nochí n textli.” ¹⁰ Ne nomech-neltoka mach nonkikawaskah tlan nonkineltokah itech Cristo. Pero Dios kitlaijyowiltis neká akin nomechkuatlapololtijtinemi, maya san akin yetos.

¹¹ Nokniwah, tla ne ok niktemachtijtinemiska n sirkunsión, n judíojteh amo nechtotojtokaskiah, porke tla ijkó yetoskia, amo kimpajsoloskia tlan niktemachtia de

* ^{4:31} Esklava: Achto ikuak se siwatl okitewikiliya miak tomi iwa ayakmó oweletia okikopaya omokawayá esklava. Satepa n tlakatl non okiwikiliya non tomi, okinamakaya kemi yolkameh monamakah. Iwa ijkó okimokopiliya itomi, iwa ikuak okitekitiliya n siwatl non omoko amitla okitlania. Iwa iteko okipixtoka itech icha iwa okitekitiliya san tlan oras okinekia porke amo okipixtoka kemi se tlakewale yej kemi se esklava.

ikrus n Cristo. ¹² Pero akimeh nomechchijchikawah ximosirkunsidarokah, jniknekiskia yejwah innewiah san semi makimotekilikah intlakayo!

¹³ Nokniyah Dios onoméchnotski para ayakmó xiilpitokah itech non tlanawátili, pero noni amo kijtosneki weletis nonkichiwaskeh nochi tlan amokuali kelewiea nomokuerpo. Yej okachi kuali ximosepampapalewikah ika tlasojtlálistli. ¹⁴ Porke nochi n tlanawatílistli mochiwa sa se tlanawátili: “Xiktlaejtla mokni kemi te monevia timotlaejtla.” ¹⁵ Pero tla san nomejwah nonmokuah iwa nonmotlawelitah, ximotlachilikh, amo kichiwa san nomejwah nonmotlajtlamiskeh.

Tlan kineki tokuerpo amo ye tlan kineki n Espíritu

¹⁶ Yika nomechilia: Xikkawilikah manomechyakana n Espíritu, iwa ijkó amo nomechy-oltilanas tlan amokuali kelewiea nomokuerpo. ¹⁷ Porke tlan kelewiea tokuerpo, kixnamiki tlan kipaktia Iespíritu Dios, iwa n Espíritu kikokolia tlan amokuali kelewiea tokuerpo. Ninteh ome mixnamikih, yika amo nonweletih nonkichiwaskeh tlan nonkinekiskiah. ¹⁸ Tla nomechyakantinemi n Espíritu, ayakmó nomechnawatijtok n tlanawátili.

¹⁹ Amo owi motah akimeh kichiwaskeh tlan kinyoltilana inkuerpo:

momekatijtinemih,
kichiwaskeh tlan pitsotik,
kichiwaskeh tlan teixpolo,
²⁰ kinweyiliah diosmeh non san kinmachijchiwaskeh,
tetlajchiwiah,
tekokolah,
kichiwaskeh mamokuakualanikah oksikimeh,
chawatih,
kualankamikih,
kichiwaskeh itla san para makinmitakah,
kinxexeloah n tokniwaskeh,
kinmachtiah tlan amo milák,
²¹ xikojmikih,
tlawankeh,
fiero mopaktiah itech ilwimeh,
iwa kinchiwaskeh oksikimeh tlajtlákolteh kemi ninneh.

Ne nomechilia, kemi achto yonomechili, akimeh ijkó kichiwaskeh mach kalakiskeh ilwikak kan Dios tlanawatijtok.

²² Pero ikuak n Espíritu kiyakana se tlakatl, ye ni tlan kichiwaskeh:

tetlaejtla,
kipia pakílistli,
kipia yolsewílistli,
nochi kixikoa,
kuali tlakatl,
teiknomati,
tlaneltokak,
²³ yolyamanki,
kuali monawatia.

Akimeh ijkí moyakanah n tlanawatílistli amo weleti kinnawatia. ²⁴ Iwa akimeh iaxkawah Cristo, mach ok kimokawiliah makinyoltilana tlan kineki inkuerpo, kemi yaskia yokikrusifikarojkeh tlan amo kuali kelewiea inkuerpo. ²⁵ Ijkó kiné, tla n Espíritu techmakah tonemilis matikmokawilikah matechyakana n Espíritu.

²⁶ Amo matimoweyilikah, nion matimoxijxikokah iwan totlaneltokaikniyah.

Matimosepampapalewikah

¹ Nokniyah, tla aka tokni owalwetski itech tlajtlácoli, nomejwah akimeh nomechyakantinemi n Espíritu, xikpalewikah mamoyektlali. Pero xiknonotsakah

ika kuali nomoyolo, iwa ximotlachilikah amo kichiwa noiwa nomechyoltanas n tlajtlákoli. ² Ximosepampapalewikah nonnochteh ijkuak itla nomechtekipachoa, ijkó nonkitlakitaskeh tlan kijtoa itlanawatil Cristo.

³ Akin kimolia weyijkatitok, iwa amo milák, san ye inewia mokajkayawah. ⁴ Yika, san tejwah matimoyejyekokah kox kuali tinemih, iwa tla tikmachiliah kuali tiyeknemih, matipakikah iwa amo matikimitakah kox kuali noso amo kuali tlan kichiwa oksikimeh.

⁵ Porke tinochteh moneki matikyekchiwakah toteki.

⁶ Akin kiselia ixtlamatflistli itech itlajtol Dios, makipalewi ika tlan panotos akin kiixtlamachtia.

⁷ Amo ximokajkayawah: amaka weletis kikajkayawas Dios. Nochteh kipixkah tlan kitookah. ⁸ Tla se tlakatl kichiwa san tlan kineki ikuerpo, san ye inewia kimotemolia imikilis. Pero akin kichiwa tlan kimonekiltia n Espíritu, kiselis nemílistli non ayik tlamis.

⁹ Ijkó kiné, nochipa matikchiwakah tlan kuali iwa amo matimosotlawakah, porke ajsiki n tonati tipixkaskeh, tla amo timosotlawah. ¹⁰ Yika, ijkuak weletis tикиnparewiskeh tokniyah tlaneltokakeh, matikinparewikedah.

Pablo kinnejmachtia n tokniyah iwa momakawa inwah

¹¹ Nokniyah, xikitakah kenijki ika wejweyi tlajkuílolteh nonewia ika noma nomechontlajkuilijtok. ¹² Nekateh akimeh nomechchijchikawah ximosirkunsidarakah, kichiwa san para kimpaktiskeh n oksikimeh, iwa ijkó amo makintotojtokakah por kineltokah n Cristo Jesú. ¹³ Porke akimeh kateh sirkunsidados amo kiyektlakitah n tlanawatflistli. Pero yejwah kinekih ximosirkunsidarakah, san para moweyiliskeh iwa makijtokah ononkimokawilijkeh ximosirkunsidarakah itech nomokuerpo. ¹⁴ Pero ne amo nikneki nimoweyilis, yej ne nikneki nimoweyilis ika imikilis n Toteko Cristo Jesú ipan krus. Porke ika imikilis Cristo ipan krus, omikki noch tlan onechyoltanaya, iwa ne ayakmó niteaxka itech nin tlaltíkpaktli. ¹⁵ Amitla ipati kox tisirkunsidaritokeh noso amó, tlan milák ipati se makiyankuili iyolo. ¹⁶ Makiselikah yolsewílistli iwa teiknomatílistli nochteh akimeh kitlakitah nin tlanawátili, iwa nochteh akimeh milák iaxkawah Dios.

¹⁷ Axa ik tlayakapa ayakmó nikneki aka manechtlajtoltemoli, porke itech nokuerpo nestok kenomi onechtlijyowitzijkeh ken nikneltoka Jesú.

¹⁸ Nokniyah iteiknomatilis Toteko Cristo Jesú mayeto iwan nomoespíritu. Ijkó mamochiwa.

San Pablo kintlajkuililia non de Éfeso

Pablo kintlajkuililia n tokniwah de Éfeso

¹ Ne Pablo, akin Dios okimonekilti maniyeto itlatitlanil n Cristo Jesús. Ne nomechtla- jkuililia nomejwah non nonchantitokeh Éfeso, nomejwah akimeh nonteaxkawah de Dios iwa nonkineltokah Cristo Jesús. ² Totajtsi Dios iwan Toteko Cristo Jesús, manomech- makakah intlatiochiwalis iwa inyosewilis.

Totajtsi Dios techmaka itiochiwalis por Cristo Jesús

³ Maweyijkachito Dios, Itajtsi n Toteko Cristo Jesús, Akin yotechtiichi ika nochitlaciochiwálistli tlan onka ilwikak por Cristo. ⁴ Dios otechpéjpenki por Cristo desde ikuak ayamó okatka n tlaltíkpaktli, para matiyetokah tiyolchipawakeh por itlasojoatlal is iwa amo matikpiakah tlajtlákoli inawak. ⁵ Dios, okisentlali techseliskia kemi titepilwah por Cristo Jesús, ijkó kemi Ye okimonekilti. ⁶ Yika, nochipa tikweyijkachiwah Dios por itlasojoatlal is non techpialia por tikateh iwan Ikone non satlawel kitlasojojtla. ⁷ Iwa Cristo ika iesso okintlaxtla totlajtlakolwah, iwa Dios yotechtlapojpolwi por itlasojoatlal is non saikpanoa. ⁸ Dios okipixki teiknomatilis ikuak otechmák nochitlacomatlis iwa tlalnamikílistli. ⁹ Iwa otechmatilti tlan Ye kimonekiltia, iwa tlan Ye inewia okijto kichiwasquia non amaka okimati. ¹⁰ Ye ni tlan kichiwas ikuak ajsiki n tonati, Dios kiseitilis nochitlan onka ilwikak iwa itech n tlaltíkpaktli imak Cristo para makinawatijto.

¹¹ Akimeh tikateh iwan Cristo, Dios yotechpéjpenki desde achto para matikselikah tlan yotechkakitijkeh techmakaskeh. Iwa nochitlan onka mochiwas kemi Dios yokijto kichiwas, Akin nochitlan onka kichiwas kemi Ye kimonekiltia. ¹² Ijkó, tejwah akimeh achto yotikneltokakeh Cristo, matinemikah kemi Ye kiwelita para ijkó weletis kiyektenewaskeh iweylis. ¹³ Nomejwah, ononkikakeh n kualitlátoli de Dios non temakixtia iwa ononkineltokakeh n Cristo Jesús. Onomechneskayotijkeh iwan Ye, ika Iespíritu Santo non Ye okisentlali kitemakas. ¹⁴ Dios ika n Espíritu Santo kisentlalia techmakas tlan yotechkakitijkeh techmakas. Ikuak Ye kinmopejpenis iwa yokitlaxtla totemakixtilis non Ye iaxkawah. Para makiweyijkachiwah por iweylis.

Pablo kitlatlaujta Dios makinmaka ixtlamatílistli n tlaneltokakeh

¹⁵ Yika, ne kuali nikmatok nomejwah nonkineltokah n Toteko Cristo Jesús iwa nonkintlasojo- lah akimeh kitlakitah Dios, ¹⁶ amo nimosotlawa nimotiotssajtsilis iwa nimotlasojojkamatis por nomejwah. ¹⁷ Niktlajtlanilia Dios Itajtsi n Toteko Cristo Jesús, n Totajtsi non weyikajtitok, manomechmaka ixtlamatílistli iwa mamotenexti nomotech por Iespíritu.

¹⁸ Noiwa niktlajtlanilia Dios manomechtlawili nomotlalnamikilis*, iwa ijkó nonkimatiskeh tlan para onomechnotski iwa tlan nomechmakas. Porke weyi iwa mawistik tlan Ye kinmaxkatilis iaxkawah. ¹⁹ Iwa xikmatika sa weyijtik iweletilis, non amo keman tlamic, non techpalewia akimeh tikneltokah. Nin weletílistli ye non Dios okitenexti ika miak chikawálalistli, ²⁰ ikuak okiyoliti n Cristo de kan mikemeh iwa okiyayanti ik iyekma ompa ilwikak. ²¹ Dios okimák n Cristo weyi tekiwájyotl, iwa okiweyijkatlali ipan nochteh n tekiwajkeh, n tlanawatijkeh, iwa ipan nochitlan onka iwa nochitlan motenewa itech ninteh tonatijmeh, iwa non satepa witseh. ²² Dios okitlali nochitlan iikxitla n Cristo, iwa Ye okitlali tlayákanki de nochteh n tlaneltokakeh non tikmajmana itlapejpenilwah. ²³ Tejwah ye ikuerpo n Cristo iwa Ye n tlayákanki. Porke ika Cristo nochitlan ajsitok iwa amitla kipoloa.

* 1:18 n griego kijtoa ixtololowah de nomoyolo

¹ Dios onomechyliti ikuak nomejwah ononmiktakah itech nomotlajtlakol. ² Nomejwah ononkichiwayah tlan kichiwayah n tlaltikpaktlakah. Ononkichiwayah tlan kiwilita non tlanawatia kan ejekatl, iwa axa kinyakantok akimeh amo kitlakitah Dios. ³ Itech oksikimeh tonatijmeh tejwah noiva ijkó otikchiwayah. Otikchijtinenkeh tlan kichiwayah n tlaltikpaktlakah, iwa tlan amo kuali otechyoltlanaya. Yika, ika totlajtlakol wah yotikmotlanilijtokah n tlaijyowílistli non kiseliskeh akimeh tlajtlakolchijtinemih. ⁴ Pero Dios ken satlawel teiknoma, iwa ken miak techtlasojtla, ⁵ maya ok otimiktakah por totlajtlakol wah, Ye okichi matiyolitakah sansikah iwan Cristo Jesú. Yika, Dios otechmakixtiko porke otechtlasojtla. ⁶ Dios noiva otechyoliti sansikah iwan Cristo Jesú, iwa otechyayanti iwan Ye, kan ilwikak. ⁷ Ijkó okichi, para kiteitisit isech tonatijmeh non sakin witsek kenijki saikpanoa techtlasojtla iwa saikpanoa techiknomati por Cristo Jesú. ⁸ Yika por itlasojtlalis Dios, nomejwah ononmomakixtijkeh por ononkinetokakeh, amo nomotech kisa, yej porke Dios onomechtliokoli. ⁹ Amo onomechmaktilijkeh n temakixtílistli por ononkichiukeh tlan kuali, para amaka mamoweyili. ¹⁰ Tejwah Dios otexchijchi, otexchijchi para matikchiwakah tlan kuali kemi Cristo, Dios ijkó yokimajmanka matikchiwakah.

Ika imikilis Cristo, Dios otechtlapojpolwi

¹¹ Ijkó kiné, nomejwah akimeh amo non judío jteh xikilnamikikah kenomi ononkatkah. Nomejwah akimeh amo nonmixewayotekih, nomechtokayotiah amo non “sirkunsidados”* nekateh akimeh monotsah “sirkunsidados” non san kinmixewayotekih n tlakah, iwa motokayotiah sirkunsidados. ¹² Achto nomejwah mach ononkixmatiah n Cristo, nion amo ononkatkah judío jteh, nion ononkimatiah tlan Dios okinmili kinmakas n judíos ikuak omosenka inwah. Amitla ononkipiayah tlan ika nonmoyolchikajtoskiah itech nin tlaltípkaktli nion ononkixmatiah Dios. ¹³ Pero axa nomejwah akimeh achto ononkatkah wejka de Dios, axa por iesso Cristo Jesú ya nonkateh íwa. ¹⁴ Cristo Jesú otechalikili yolsewílistli: Ikuak Cristo omikki itech krus okichi kemi yaskia okixitini se tepamitl non okintlajkoxelojtokah judío jteh iwa non amo judío jteh porke omokokoliaya, iwa okinseitilik. ¹⁵ Ika imikilis, Cristo okichiwako mapojpoliwi n tlanawátili non achto otlanawatijtoka. De nonteh ome altepemeh san se yankuik altepetl okitlali, non mayeto itech Cristo. Ijkó sansikah okinseitili iwa okinyolyankuili n tlakah para mayetokah kemi Ye, iwa makipiakah yolsewílistli. ¹⁶ Cristo omikki itech krus para mamotlapojpolwikah iwan Dios nochteh n judío jteh iwa non amo judío jteh, iwa okichi mayetokah íwa kemi yaskia san se cuerpo. Ijkó Dios okipojpolo n nexikólistli non okipiaya se iwan ok se.

¹⁷ Cristo owala iwa okitematilti n kualitlajtoli de yolsewílistli. Onomechmatilti nomejwah akimeh ononkatkah wejka de Dios, noiva okinmatilti non amo wejka okatkah. ¹⁸ Yika, por Cristo, tjudío jteh noso amo tjudío jteh weletis timijkuaniskeh kan Totajtsi Dios san ika se Espíritu. ¹⁹ Yika, nomejwah akimeh amo non judío jteh ayakmó nonkateh kemi se non san mokalotiah, yej noiva nomechaxkatalis nomejwah tlan iaxka n Dios. Axa nomejwah noiva yononmochijkeh ipilwah n Dios. ²⁰ Nomejwah kemi se weyi kali, iwa nontlakxilitokeh itech intlamachtilis n tlatalánilti iwa n profetas. Cristo Jesú, Ye non okachi weyi tetl, non kitlakxilijtok non kali. ²¹ Iwa kemi nin kali tlakxilitok itech Cristo, moajkokti iwa moyekiskaltiji asta mamotlamiti se tiokali chipawak para Toteko. ²² Ijkó nomejwah ken nonseititokeh iwan Cristo, nonnochteh nonmoseitiliah para nonkimajmanaskeh san se kali iwa ompa chantis Dios ika Iespíritu.

3

Dios kititlani n Pablo makinmatilti n kualitlajtoli non amo judío jteh

¹ Ne Pablo, ni tsaktok por onomechmatilti nomejwah akimeh amo judío jteh n kualitlajtoli de Cristo. ² Nomejwah kuali nonkimatokeh, por itlasojtlalis Dios onechmák nin tekil para nomechpalewis. ³ Dios onechnextili tlan achto otlaatitoka, iwa onechmatilti,

* 2:11 insirkunsisos: okintokayotayah insirkunsisos nochteh non amo okikuaewayotekiah intlakayo.

ijkó kemi achto yonomechtajkuilili kech tlájtoli. ⁴ Ijkuak non kiama poaskeh tlan nomechtajkuililia, nonkajsikamatiskeh milák nikmati tlan Cristo onechmatilti. ⁵ Semi yowejka, amo okititi nion se tlaltikpaktlakatl tlan Dios okisentlali kichiwas. Pero axa, ika Iespíritu yokinnextili itlatitlanilwah iwa iprofetajwah yolchipawakeh. ⁶ Iwa ye ni tlan amaka okimatia: n kualitlátoli de Dios non techmakixtia, techmatiltia nomejwah akimeh amo non judíojteh noiva nomechtlaaxkatiskeh iwan judíojteh. Noiva nomechmatiltia nomejwah ya nonseititokeh itech ikuerpo n Cristo, iwa nonkiseliskeh tlan Dios okisentlali kinmakas akimeh kineltokah Cristo Jesú.

⁷ Dios satlawel onechtlasojtlak iwa ika iweletilis onechtliokoli nin tekitl para maniktematilti n kualitlátoli. ⁸ Maski amitla nopati innawak n yekmilajkameh non iaxkawah Dios, Ye onechtliokoli nin tekitl para manikinmatilti non amo judíojteh n kualitlátoli non amaka weleti kajsikamati. ⁹ Onechtlali manikinmajsikamatilti n tlaltikpaktlakah nochi tlan Dios yowejka okitlatijtoka, Ye Akin okichijchi nochi tlan onka.

¹⁰ Axa ijkí moneki, nochteh akimeh kineltokah Cristo, makiteixmatiltikah iixtlamatilis, iweletilis iwa ichikawalis Dios, para makixmatikah akimeh tlanawatiah tlakpak.

¹¹ Dios ijkí okichi por Toteko Cristo Jesú, kemi Ye yokimolijka kichiwaskia desde ijkuak ayamó okatka n tlaltíkpaktli. ¹² Iwa axa kemi ya tikneltokah Cristo Jesú, timijkuaniah inawak Dios, iwa ayakmitla tikmawiliah por n tlaneltokálistli non tikpiyah itech. ¹³ Yika, nomechtlatlaujtia amo ximosotlawakah ijkuak nonnechitah nitlaijyowijtok, xiypakakah porke non tlaijyowílistli nomechpalewis iwa nomechmaka tlakitálistli.

Itlasojtlalis Cristo

¹⁴ Yika, nimotlankuaketsa inawak Dios Itajtsi n Toteko Cristo Jesú. ¹⁵ Akin itech motenewah intokah, kan ilwikak iwa itech tlaltíkpaktli. ¹⁶ Niktlatlatlaujtia Notajtsi manomechmaka tlan Ye kitlawelpia itech iweyilis, noiva nomechmaka weletílistli iwa chikawálistli itech nomoyolo por Iespíritu, ¹⁷ para machantito Cristo itech nomoyolo porke ijkó nonkineltokah. Ijkó nomejwah xitlakxilitokah iwa kuali xinelwayotitokah itech nomotetlasojtlalis. ¹⁸ Ijkó nomejwah nonweletiskeh nonkajsikamatiskeh iwan nochteh n tokniwah non kineltokah Cristo Jesú, kenjiki saikpanoa

patlawak

weyak

wejkatla iwa

wejkapa

itlasojtlalis n Toteko Dios.

¹⁹ Yika, niktlajtlanilia Dios, xikixmatikah non tlasojtlálistli, non kipanawia nochi tlan tikixmatih, para ijkó nonweletiskeh nonkiseliskeh nochi tlan Dios kipixtok para nomejwah.

²⁰ Matikweyilikah Dios, Akin kipia miak weletílistli para kichiwas okachi miak de tlan tejwah tiktlajtlani noso tiknejnewiliah por iweletilis non tekiti totech.

²¹ Matikweyijkachiwakah nochipa Dios kan timololoah, por Cristo Jesú tejwah akimeh Ye otéchnotski, por nochteh non sakin tlakatijtiaskeh, axa iwa nochipa!

N Espíritu Santo techseitilijtok

¹ Ne Pablo, nitsaktok por niktektilia n Toteko Jesú, nomechtlatlaujtia xiyeknemikah kemi moneki, porke nomejwah Dios onoméchnotski para xiyetokah iaxkawah. ² Nochipa ximoiknelikah iwa xitenotsakah, ximosepanyekwikakah iwa ximosepanxikokah ika tla- sojtlálistli. ³ Ximochijchikawakah para n Espíritu maseitito nomowah, ika n yolsewílistli, non seititok nomowah. ⁴ Onka san se cuerpo, iwa onka san se Espíritu, iwa onka san se tlan tikchiah akimeh Dios otéchnotski. ⁵ Onka san se Toteko, san se totlaneltokalis, iwa san se totlakuaatekilis. ⁶ San se Todios, iwa Totajtsi tikpiyah, Akin tlanawatia totech, Ye tekiti totech iwa kajki itech tinchteh.

⁷ Tinchteh otikinselijkeh tlatiokolilteh non Cristo okinek techinmakas. ⁸ Yika itlajkuilol Dios kijtoa:

Cristo otlejkok ilwikak,
okitsakuato tlan otechmapixtoka,
iwa okinmák iweletilis n tlakah kemi se tlatliokólili. Sal. 68:18
⁹ Iwa, ¿tlan kijtosneki “otlejkok ilwikak”? Kijtosneki achto otemok nika ipan tlaltík-paktli kan okachi tlawejkatla. ¹⁰ Akin otemok, Ye Akin oksepa otlejkok ilwikak kan okachi tlakpak, para Ye kitemitis nochi tlan onka. ¹¹ Ye inewia okinmajmák sejse inteki,
sikimeh okintlali mayetokah tlatitlánilti,
oksikimeh profetas,
oksikimeh matetlapowikah n kualitlájtoli,
oksikimeh okintlali mayetokah tlajpixkeh,
oksikimeh temachtijkeh.

¹² Ijkó okinmititi iaxkawah para maweletikah matekitikah iwa matikyekiskaltikah ikuerpo Cristo, ¹³ asta tinochteh matiajsitih matiseititokah itech totlaneltokalis iwa tinochteh matikyekixmatikah Ikone Dios. Noiwa matimoyekchikawakah kemi se tlakatl yekmilajka, ijkó timoskaltiskeh iwa timotlamitiweh kemi Cristo. ¹⁴ Ayakmó tiyetoskeh kemi tikokoneh, non san kipapatlah intlanamikilis ikuak kikakih itla ok se yankuik tlamachtílistli, iwa kimokawiliah makinkajkayawakah nekateh akimeh kinekih kinku-atlapololtiskeh para kinwikaskeh itech oksikimeh ojmeh non amo kualteh. ¹⁵ Nochipa matitetlapowikah tlan milák ika totlasojoatlalis, iwa ijkó timoskaltijtiaskeh íwa n Cristo porke Ye itsonteko n kuerpo. ¹⁶ Iwa por Cristo nochi n kuerpo moseitilijtih iwa mosalojtiwihs nochteh n omiomeh. Iwa ikuak nochi kuali tekitih, kuali moskaltijtih iwa mochikajti ika tlasojoatlálistli.

Cristo okichi matiyolitokah nochipa

¹⁷ Ye ni tlan nomechnawatia itech Itoka n Toteko Jesú: Ayakmó xinentinemikah kemi nemih akimeh amo kineltokah Dios, porke yejwah moixpolojtinemih itech tlan amo kuali kiyeyekolah. ¹⁸ Intlanamikilis kajki kan tleyuálistli, yejwah amo kipiah n nemílistli non Dios kitemaka, porke oyoltlakuawakeh, yika, amo kajsikamatih tlan Dios kineki makichiwakah. ¹⁹ Yejwah ayakmó pinawah iwa yomosenkajkajkeh itech tlan kelewiea, iwa amo ixwihi kichijtinemiskeh nochi tlan teyolijtlakoa. ²⁰ Pero nomejwah amo ononkixmatkeh n Cristo para axa ijkó nonkichijtinemiskeh. ²¹ Tla de milajka ononkikakeh n Jesú, iwa onomechmachti, nomejwah ononkajksamatkeh Ye kijtoa tlan milák. ²² Kemi yonomechititjkeh, xikkawakah tlan achto ononkichijtinemiah, porke nochi noni onomechixpoloaya iwa onomechyolijtlakoaya ika tlan okelewiaya nomokuerpo, ²³ iwa xikyankuilikah nomoixtlamatilis ika nomoespíritu. ²⁴ Ijkó ximoyolpatlakah, ika se yankuik nomonemilis kemi Ye inewia yetoskia ika se nomonemilis chipawak iwa yekmilajka.

²⁵ Yika, ayakmó ximokajkayawakah, yej nochipa xikijtokah tlan milák, porke tinochteh titeaxkawah itech ikuerpo Cristo.

²⁶ Tla nonkualanih, amo xitlajtlakolchiwakah. Amo xikkawilikah makalaki n tonati iwa nomejwah ayamó nonmoyolsewiah. ²⁷ Amo xikkawilikah n diablo manomechka-jkayawaki para nonkichiwaskeh tlan amokuali.

²⁸ Akin otlachtekia, ayakmó matlachteki, yej mapewa matekiti ika imawah para makipia tlan ika kimpalewis akimeh kimpoloa.

²⁹ Amo xikimijtokah tlájtolteh pitsotikeh, yej xiktenewakah kuali tlájtoli tlan ika kinyolchikawas, kimpalewis iwa kintiochiwas akimeh kikakih non tlájtoli. ³⁰ Amo xikchiwakah mamoyolkoko Iespíritu Santo n Totajtsi Dios, porke ika n Espíritu onomech-neskayotijkeh kemi iaxkawah Dios, asta ikuak ajsiki n tonati ikuak Ye nomechselis non yolchipawakeh.

³¹ Xikkawakah nochi tlan nomechkuejsoa, iwa nomotlawelitalis, ayakmó ximotsatsajtsikah, nion ximowijwikaltikah, iwa xikmokixtilikah nochi tlan amokuali. ³² Moneki xiyetokah nonkualtentlakah iwa xiteiknomatikah. Ximosepantlapojpolwikah ijkó kemi Dios otechtlapojpolwi por Cristo.

Kenomi kipiah de yeknemiskeh ipilwah n Dios

¹ Nomejwah akimeh ya nontepilwah de Dios, ximilajkanemikah kemi Ye yekmilajka. ² Nochipa xitetlasojtlakah kemi Cristo otechtlasojtlak, iwa omotemakti para makimiktakah topatka kemi se tlamánali ajwiak inawak Dios.

³ Kemi nomejwah ya nonchipawakeh inawak Dios, ayakmó xikintenewakah akimeh momekatiah, nion itla ok se tlajtlácoli, noso akimeh kitlawelneki kipiaskeh tomi. ⁴ Amo xipitsotlajtokah ika tlan tepinati, nion xikinmijtokah tlájtolteh non amo milajkameh, porke ayakmó technamiki ijkó titlajtojtinemiskeh, yej nochipa ximotlasojkamatikah inawak Dios. ⁵ Porke ya nonkimatokeh, tla aka momekatia, noso kichijtinemi tlajtlácoli, noso kitlawelneki tomi, kijtosneki kemi kiweyilijtoskia se “dios” non san kimachijchiwah, nochteh akimeh ijkó kichiwah, amo kalakiskeh kan tlanawatia Cristo iwa Dios. ⁶ Amaka manomechkajkayawa ika tlájtolteh non amitla impati, porke ikualanilis Dios, wits ipan nochteh akimeh kichiwah tlajtlácoli, iwa amo tetlakitah. ⁷ Yika, amo ximonelokah, inwah akimeh ijkó kichiwah.

⁸ Itech oksikimeh tonatijmeh nomejwah ononnemiah kan tleyua, pero axa ya nonnemih itech tlawilnextílistli, porke Toteko Dios nomechyakantinemi. Yika, xiyecknemikah kemi non ya kipiah itlawil n Toteko Dios, ⁹ porke itlawil Dios techyolpatla, iwa kichiwa matitetlasojtlakah, matikjtokah tlan milák iwa matiyetokah timilajkameh. ¹⁰ Yika, xikmatikah tlanón kipaktia n Toteko. ¹¹ Amo xikchiwakah tlan amo tepalewia non kichiwah akimeh nemih kan tleyua, okachi kuali xikinmilikah amokuali tlan kichiwah. ¹² Porke satlawel tepinati tiktenewaskeh tlan yejwah kiichtakachijtinemih. ¹³ Pero noch tlan kitlawilia n tláwili, mota kenijke kajki. ¹⁴ Porke n tláwili kichiwa mamota noch. Yika kijtoa:

Xiijsa te non tikochtok

ximewa te non tika kemi timiktok,
iwa Cristo mitstlawilis itech monemilis.

Is. 60:1

¹⁵ Ijkó kiné, ximotlachilikah kenijke nonnentinemih. Amo xinemikah kemi non amitla kinekih kajsikamatikah, yej xiyecknemikah kemi non ya kixmatih itlajtol Dios. ¹⁶ Yika xikintiotlikah n tonatijmeh iwa nochipa xikchiwakah noch tlan kuali kemi Dios kimonekiltia, porke itech ninneh tonatijmeh yomomiakili tlan amokuali. ¹⁷ Xitlalnamiktokah para ijkó nonkajsikamatikah tlan Dios kimonekiltia xikchiwakah. ¹⁸ Amo ximotlawantikah, porke noni teixpoloa, okachi kuali, matemi nomoyolo ika n Espíritu, para ye manomechyakana. ¹⁹ Ximosepanyolchikawakah iwa xikintlakuikakah salmos, tlakuíkalteh, tiotlakuikálisgeh, iwa xikweyilikah n Toteko Dios ika noch nomoyolo. ²⁰ Nochipa matimotlasojkamatikah inawak n Totajtsi Dios por noch tlan nonkiselijtokeh, itech Itoka n Toteko Cristo Jesús.

Kenomi moneki mamoyekwikakah non yomonamiktkjkeh

²¹ Ximosepantlakitakah, ijkó motas milák nonkitlakitah Cristo.

²² Nomejwah siwameh, moneki xikmokawilikah manomechyakana nomookich, ijkó kemi nonmotekawiliah manomechyakana n Toteko Cristo. ²³ Porke n tlakatl ye akin kiyakanas isawa, ijkó kemi Cristo kinyakana akimeh kineltokah, noiwa Ye Akin kin-makixtia n tokniwah non kineltokah iwa kimajmanah ikuerpo. ²⁴ Ijkó kemi non Dios okimpéjpenki kitlakitah Cristo, ijkó noiwa n siwameh moneki makitlakitakah inmokich.

²⁵ Tlakatl non yotimonamikti, xiktlasojtla mosiwa, ijkó kemi Cristo otechtlasojtlak tejwah non Dios okimpéjpenki iwa omotemakti para makimiktakah por tejwah. ²⁶ Iwa Ye okimoyolchipawili ika atl, non atl ye itlajtol, ²⁷ para techixpantis ixpa, tejwah non Dios okimpéjpenki kemi se tiopa non tsotlantok, chipawak amo xojxolochtik nion itla ok se non makijtlako, ijkó Ye kineki matietokah tichipawakeh iwa amo matikpiakah tlajtlácoli. ²⁸ Noiwa moneki n tlakatl makitlasojtlak isawa, kemi ye inewia kitlasojtla ikuerpo. Porke akin kitlasojtla isawa, noiwa ye motlasojtla. ²⁹ Porke amaka kikokolia

ikuerpo, yej kimalwia iwa kitlakualtia. Ijkó noiva kichiwa Cristo inwah non kimajmanah ikuerpo.³⁰ Tejwah tkmajmanah ikuerpo n Cristo. ³¹ Yika itlajkuilol Dios kijtoa: “N tlakatl kikajtewas ita iwa ina iwa moseitilis iwan isiwa. Ijkó n tlakatl iwan siwatl mochiwaskeh sa se kuerpo.” ^{Gr. 2:24} ³² Nin tlájtoli, owi moajsíkamati, pero ne nitlajtojtok de Cristo iwa de non moololoah itech Itoka. ³³ Ijkó noiva, nochi tlakatl makitlasojtla isiwa kemi ye inewia motlasojtla, iwa n tesíwa noiva makitlakita iokich.

6

Tepilwah iwa tetajmeh

¹ Tepilwah, xikintlakitakah nomotajwah, porke ijkó otlanawati Dios. ² “Xiktlakita mopapá iwa xiktlakita momamá,” ye n achto tlanawátili non kipia tiochiwálistli, ³ “ijkó tikpias miak pakílistli iwa tiyolitos miak xiwitl itech nin tlali.” ^{Ex. 20:12; Dt. 5:16}

⁴ Nomejwah tetajmeh, amo xikinkuakualanikah nomopilwah, yej xikinyekiskaltikah ika tlanonotsálistli iwa ika itlajtol n Toteko.

⁵ Nomejwah akimeh nomechpixtokeh kemi tlanémakteh,* xiktlakitakah nomoteko iwa xikiimakajsíkah. Xiktektilikah ika nochi nomoyolo kemi non kitekitiliskia Toteko Cristo Jesús.

⁶ Amo xiyektekikah sanwel ijkuaak nomoteko nomechalitok, san para non-mokawaskeh kuali inawak, yej kuali xikchiwakah nomoteki kemi nontekitkeh de Cristo, iwa ijkó nochipa xikchiwakah ika pakílistli tlan Dios kimonekiltia. ⁷ Xikchiwakah nomoteki ika pakílistli, kemi nonkitekitilijtoskiah n Toteko Cristo, iwa amo xikmolikah titekititokeh san para se tlakatl. ⁸ Porke ya nonkimatokeh tla aka tlanémaktli noso amo tlanémaktli, n Toteko kitlaxtlawis tla kichiwas tlan kuali.

⁹ Iwa nomejwah tekowajkeh, noiva moneki ijkó xikchiwakah iwa nomotekitwah, iwa amo san xikinmomojtítokah. Xiklnamikikah nomejwah iwa yejwah nonkipiah san se Nomoteko itech ilwikak, iwa Dios amo san se kitlawelita iwa ok se amó.

N chikawálistli non Dios techmaka

¹⁰ Nokniwah, Ximochijchikawakah itech ichikawalis n Toteko Cristo. ¹¹ Ximopalewikah ika iweletilis non Dios nomechmaka, iwa ijkó weletis nonkitlaniskeh n amokualitlakatl ijkuaak kinekis nomechkajkayawas. ¹² Porke amo timotekilmakatokeh iwan tlakah non kipiah inmesso kemi tejwah, yej iwan espíritus amokualteh non nemih tlakpak, iwa kipiah weletílistli. Yejwah kinnawatijtokeh akimeh kichijtinemih tlan amokuali ken nemih itech tleyuálistli. ¹³ Yika, xiktektilikah n chikawálistli non Dios onomechmák ika nontlaxikoskeh ijkuaak wits n tonati ijkuaak nomechyoltlanaki n amokualitlakatl, iwa ijkó xiktlanilikah iwa ximochikawakah iwa ximoyekketokah. ¹⁴ Ijkó kiné, ximoyekketokah, ximotlajkotelinikah ika n milák tlájtoli, iwa xitlakentitokah kemi ijkuaak se soldado konakia ikoto de tépostli para makipalewi. ¹⁵ Sa ximokaktikah para nontetlapowitiweh de n kualtlájtoli non techmaka yolsewfílistli, ijkó kemi mokaktia se soldado ijkuaak yawi motekilmakati. ¹⁶ Noiva xikpiakah nomotlaneltokalis kemi se tépostli non ika nonmopalewiskeh iwa nonkitsakuiliskeh ijkuaak n diablo nomechmojmotlas ika kuawitl non xotlatok. ¹⁷ Ximokuaonakiltikah n tépostli non ika timomakixtiah, noiva xikpiakah itlajtol Dios kemi se espada non techmaka n Espíritu Santo. ¹⁸ Nochipa ximotrotsajtsilikh, iwa n Espíritu Santo manomechyakana ijkuaak nonmotlatlaujitiskeh iwa nonkitlajtlaniliskeh Dios manomechpalewi. Ixmoxpantrotsajtsiljtokah iwa amo ximosotlawakah, yej nochipa xiktlatlaujistikah Dios makimpalewi nomokniwah non iaxkawah Dios. ¹⁹ Noiva xiktlatlaujistikah n Toteko manechpalewi, iwa manechinmaka tlájtoltéh ijkuaak monekis nitetlapowis. Iwa manechmaka yolchikawálistli iwa maniweleti manikinteajsíkamatilti non amo kixmatih de n kualtlájtoli. ²⁰ Dios onechtítlanki manitetlapowiti de n kualtlájtoli de

* 6:5 Achto ijkuaak n tlakah okitewikiliayah miak tomi iwa ayakmó oweletiah okikopayah omotemaktiayah esklavos.

Dios non techmakixtia non ika axa onechtsakeh. Ximotrotsajtsilikah manimoyolchikawa manitetlapowi nin kualitlajtoli kemi moneki.

Pablo iksemi momakawa

²¹ Tokni Tíquico totlasoj, se kuali tepalewi itech iteki n Toteko nomechmatiltis kenomi nika iwa tlan nikchijtok. ²² Yika nomechtitlanilia para manomechili kenomi tikateh, iwa manomechyołchikawa.

²³ Dios Totajtsi, iwa n Toteko Cristo Jesús makinmakakah n tokniwah yolsewílistli, tla-sojtlálistli iwa tlaneltokálistli. ²⁴ Dios makintiochiwa nochteh akimeh milák kitlasoјtlah n Toteko Cristo Jesús, ika tlaожtlálistli non ayik tlami.

San Pablo kintlajkuililia non de Filpos

Pablo kan tsaktok, kintlajkuililia n tlaneltokakeh de Filpos

¹ Ne Pablo iwan tokni Timoteo, tlakéwalteh de Cristo Jesús, tomechtlapaloah akimeh tlayakanah, iwa nochteh akimeh nomechpalewiah, non chantitokeh Filpos. Nomejwah iaxkawah Dios iwa nonseititokeh iwan Cristo Jesús. ² Totajtsi Dios iwa n Toteko Cristo Jesús manomechmakakah inkualtilis iwa inyolsewilis.

Pablo motiotsajtsilia por akimeh kineltokah Cristo Jesús

³ Nochipa nimotlasojkamati inawak Dios keman nomechilnamiki, ⁴ iwa nochipa keman nimotiotsajtsilia por nomejwah, nikchiwa ika pakílistli. ⁵ Porke desde ikuak ononkiselijkeh n kualtlájtoli non temakixtia, nomejwah nontekititiwitseh nowa, para makikakikah n kualtlájtoli. ⁶ Kuali nikmatok Dios Akin opé kichiwa se kuali tekitl itech nomoyolo, kiyekchijtias asta ikuak Cristo Jesús oksepa walmokopas. ⁷ Ijkó nikyejyekolia de nomejwah, porke nochipa nomechwikatinemi itech noyolo, iwa sansikah tkselah itlatiochiwalis Dios, maya nitsaktos, noso ikuak nika inmixpah n tekiwajkeh niknextia n kualtlájtoli non tlajtoa de noch iwan milák. ⁸ Dios kuali kimatok kenjki nomechtlasojtlia ika noch iwoyolo kemi Cristo Jesús nomechtlasojtlia. ⁹ Ne niktlajtlanilia Dios keman nimotiotsajtsilia xikpiakah okachi miak tlaosjtlálistli, iwa xikpiakah okachi ixlamatílistli iwa tlalnamiklistli. ¹⁰ Ijkó nochipa nonkimatiskeh ken ijki nonkipejpenaskeh tlan okachi kuali. Ijkó weletis nonkipiaskeh se nemílistli chipawak, ijkó amaka weletis itla nomechtlajtlakoltis itech neká tonati keman Cristo wits. *Ap. 20:11*

¹¹ Ijkó Cristo nomechpalewis. Nochipa xiweletikah xikchiwakah tlan kuali, iwa ijkó Dios kiselis iweyilis iwa kuali kiyektenewaskeh.

Ne sanwel niyolitok para Cristo

¹² Nokniwah, nikneki xikmatikah, noch iwan tlaijywílistli tlan itech yonipanok, okachi okipalewi mamoxitini n kualtlájtoli. ¹³ Yika, n soldados non kimokuitlawijtokeh n palasio iwa nochteh oksikimeh kuali kimatokeh ne nitsaktok porke nitetlapowia de itlajtol Cristo. ¹⁴ Iwa kemi okimatkeh nitsaktok, miakeh tokniwah tlaneltokakeh, omoyolchikajkeh tetlapowiskeh de itlajtol Dios, iwa asta ayakmó mawi.

¹⁵ Milák, sikimeh kitetlapowiah itemachtilis Cristo san por xikojmikih nowa iwa kinekih nechixpanawiskeh, pero oksikimeh kitemachtiah ika kuali inyolo. ¹⁶ Ninteh tetlapowiah de Cristo ken milák kitlasojothal. Yejwah kuali kimatokeh nitsaktok por oniktetlapowiaya itlajtol Cristo. ¹⁷ Pero oksikimeh tetlapowiah de itlajtol Cristo san por kinekih nechixpanawiskeh. Yejwah kinekih okachi manimoyolkoko nika kan nitsaktok. ¹⁸ Amo tleno, tla yejwah tetlapowiah ika kuali noso amó, ne nochipa nipaktos, porke yejwah tetlapowiah de Cristo.

Iwa okachi niyolpaki, ¹⁹ ken kuali nikmati nimakisas, ken nomejwah nonkitlajtlanilijtokeh Dios manechpalewi, iwa Iespíritu Cristo Jesús noiwa nechpalewia. ²⁰ Ne amo niknekiskia nikchiwas itla tlan ika nimopijpinatis, yej okachi manimoyolchikawa para niktetlapowis itlajtol Dios, para mamotenexti notech iweyilis Cristo, maya tla ok niyolitos noso nechmiktiskeh. ²¹ Tla ne niyolitos, niyolitos para Cristo. Iwa tla ne nimiki nikselsis notlatliokolil. ²² Pero tla ok niyolitos itech nin cuerpo, okachi miakeh weletis nikinyakanas inawak Cristo, yika mach ok nikmati tlan okachi kuali. ²³ Iwa amo nikmati tlan okachi nikmonekiltia: kualchiwa niknekiskia manimiki para maniyeto iwan Cristo, noni okachi kuali. ²⁴ Pero nomonawak, okachi kuali maniyolito. ²⁵ Iwa axa ne ya nikmatok moneki manomechpalewi, yika nikneki niyolitos para manomechpalewi ximoskaltikah iwa xikpiakah pakílistli itech nomotlaneltokalis. ²⁶ Yika ikuak oksepa nomowah nietos, nomejwah okachi nonkiweyiliskeh n Cristo ikuak oksepa nomowah nietos.

²⁷ Yika, nomejwah xiyeñkemikah kemi akimeh yokiselijkeh n kualitlátoli. Ijkó tla ne nias nomechontlajpaloti noso wejka ninemis, ne niknekis nikkakis nonmilajkanemih sansikah iwa nonkipiah san se nomoyolo. Iwa nikneki nikkakis nontekitih san ika se tlamachtílistli para oksikimeh makineltokakah n kualitlátoli. ²⁸ Iwa amo xikmotekawilikah manomechmomojtikah akimeh nomechkokoliah, porke ikuak nomechkokoliskeh por nontetlapowiah n kualitlátoli, yejwah kitenextiskeh moixpolojokeh, pero nomejwah nomechmakixtis. Ye wits de Dios. ²⁹ Ken Dios okimonekilti xitlaneltokakah inawak Cristo, yej noiva okimonekilti xitlaijyowikah por Ye. ³⁰ Nomejwah ya nonkimatokeh kenjki se tlaijyowia, iwa axa yononkikakeh nitlaijyowijtinemi.

2

Cristo omoiknoma iwa Dios okiweyili

¹ Tla Cristo nomechyolchikajtok, tla itlasojoatlalis nomechyolsewia, tla Iespíritu nomechyakantinemi, tla milák nontetlasojotlah iwa nonteiknomatih, ² xikchiwakah maniyolpaki. Ximoyekwikakah non nochteh. Ximosepantlasojoatlakah, iwa ximokuuanamikakah keman itla nonkichiwaskeh. ³ Amitla xikchiwakah san por aka nonkinekih nonkixpanawiskeh, noso para manomechweyilikah, yej ximoiknomatikah tenawak, iwa xikinmitakah n oksikimeh kemi okachi weyijkatitokeh. ⁴ Amaka makimotemoli san tlan ye kipalewia, yej makitemo tlan ika weletis kimpalewis oksikimeh. ⁵ Xikpiakah nomotlayejyekolis ijkó kemi Cristo okípixki, ikuak owala itech nin tlaltíkpaktli.

⁶ Maya Cristo noiva Dios,

amo omochijchika makiweyilikah kemi Dios,

⁷ yej okika nochí tlan okipiaya,

iwa omochiwako kemi se tetlakewáli,

Ye otlakatki kemi tlakatih n tlakah itech nin tlaltíkpaktli.

⁸ Ikuak yomochiwako tlakatl,

omoikneli inawak Itajtsi Dios

iwa okitlakitak asta imikilis,

iwa omikki itech se krus.*

⁹ Yika, Totajtsi Dios okiweyijkatlali,

iwa okimák se Itoka non okachi weyi ke oksikimeh intokah,

¹⁰ ijkó, ikuak kitenewaskeh Itoka n Jesús, mamotlankuaketsakah nochteh akimeh kateh

ilwikak,

akimeh nemih ipan tlaltíkpaktli,

iwa akimeh kateh itlampa tlali.

¹¹ Ijkó nochteh makiyekixmatikah

iwa makimokuitikah Cristo Jesús Ye Inteko,

iwa ijkó Totajtsi Dios makiseli weyílistli.

N tlaneltokakeh tláwilteh itech nin tlaltíkpaktli

¹² Notlasojikniyah, ijkó kemi nochipa nonnechtlakitah ikuak nika nomowah, okachi techtlakitakah axa maya wejka nika. Xikmosenmakakah itech nomotemakixtilis ika miak tetlakitálistli iwa mawílistli. ¹³ Porke Dios Ye akin nomechtlalilia itech nomoyolo tlan kuali nonkichiwaskeh, iwa nomechpalewia xikinchiwakah, ijkó kemi Ye kimonekilia.

¹⁴ Xikyekchiwakah nomotekih iwa amo ximoixtokatokah, ¹⁵ para amaka manomechtlajtlakolti, intsalko n amokualteh iwa n tlajtlakolchijkeh, xiyeñkemikah para manomechitakah milák ipilwah Dios. Nomejwah nontlawiah kemi n sítlalteh ixpa n tlaltíkpaktlah. ¹⁶ Nonkinnextiliah n kualitlátoli non ika yolitoskeh nochipa. Iwa ikuak Cristo wits, satlawel nipakis porke nikmatis amo sanenka onitekitik nomowah. ¹⁷ Iwa maya manechkixtilikah noyolilis, ika mamoajxiti n tlamanali non nomejwah nonkimaniliah

* ^{2:8} Krus: satlawel tepinati keman se tlakatl okipiloayah itech se krus para ompa mamiki

Dios ika nomotaneltokalis, ne nipaki iwa nipaki nomowah. ¹⁸ Nomejwah noiwa xiypakikah iwa xipaktokah nowa.

Timoteo iwa Epafroditoyawih Filipos

¹⁹ Tla Toteko Cristo Jesús kimonekiltis, san nima niktitlanis n Timoteo manomechonitati. Ne nipakis ikuak nechmatiltis keniji nonkateh. ²⁰ Porke sanwel Timoteo satlawel motlamia por nomejwah kemi ne. ²¹ Nochteh n oksikimeh okachi kintekipachoa san tlan yejwah kinekih iwa amo tlan Cristo Jesús kimonekiltia. ²² Nomejwah kuali nonkimatokeh keniji yektekiti n Timoteo, iwa nonkimatokeh noiwa keniji onechpalewi kemi se tekone non kipalewia ita, ikuak otitetlapowijkeh n kualitlátoli. ²³ San manikmati tlan kichiwaskeh nowa nomechontitlanilis n Timoteo. ²⁴ Malki kuali nikmatok Dios nechkawilis manomechontlajpaloti san nima.

²⁵ Ne nikyejyekolia, kualiká noiwa manomechontitlanili n tokni Epafrodit, akin nomejwah ononkualtitlankeh manechpalewiki itech tlan monekis, iwa ye otekkititínenki iwa otlaijyowijtinenki nowa kemi se soldado. ²⁶ Ye san okinektoka yas nomechitati, iwa omotekipachojtinemia ken nomejwah ononkimatkeh ye chikawak omokokoaya. ²⁷ Iwa milák chikawak omokokoaya, iwa ya mikskia. Pero Dios okiknama, iwa amo san ye okiknama, yej ne noiwa onechiknama, yika okipajti para ne noiwa ayakmó okachi manimoyolkokojtinemi. ²⁸ Yika axa sannima nikneki nomechontitlanilis n Epafrodit, para xiypakikah ikuak oksepa nonkitaskeh. Iwa ne ayakmó okachi manimotekipachojtinemi. ²⁹ Xikselikah ika pakílistli kemi nonkinseliah nochteh n tokniyah non kateh iwan Toteko Jesús, iwa nochipa xikintlakitakah akimeh nemih kemi ye. ³⁰ San ika achitsi ya mikskia por okitekitilijtuka Cristo, iwa onechpalewiko itech tlan nomejwah amo ononweletkeh nomonewiah ononkichiwakoh.

3

Sanwel itech Cristo niktlalijtok notlachialis

¹ Axa nokniyah, xipakikah itech Toteko. Ne amo nimosotlawa tla oksepa nomechijkuililis tlan yonomechijkuilili, porke nikmatok kuali nomechchikawas nomejwah.

² Ximotlachilikah de n tlakah amokualteh, non ken chichimeh.* Yejwah tlamachtiah iwa kijtoah moneki nonmosirkunsidarskeh para Dios weletis nomechmakixtis. ³ Porke tejwah milák tisirkunsidaritokeh itech toyolo, amo yejwah. Tejwah tikweyijkachiwah Dios ika n Espíritu, tipakih porke titeaxkawah de Cristo Jesús, iwa amo tiktlalia totlanetokalis itech ichikawalis aka tlakatl. ⁴ Ne noiwa nikpia tlan ika weletis nimoweyilis. Tla aka kichiwaschia itla tlan ika momakixtiskia, ne okachi. ⁵ Onechsirkunsidarojkeh ikuak onikpiaya chikweyi tonati de onitlakatki. Ne ni tlakatl de Israel, iwa ne iwejkaixwi n Benjamín. Ne milák ni hebreo notajwah hebreos. Iwa ne fariseo, iwa onikmopantiaya intlanawatilis n judíos.† ⁶ Ne onikchawatiliaya notlanawatilis, yika onikintotojtokaya akimeh okineltokayah Cristo. Satlawel onikmopantiaya n tlanawatílistli, yika amaka itla onechiliaya. ⁷ Yika, nochí noni tlan achto itech onimoweyiliaya, axa nikajskamati amitla ipati ixpa Cristo. ⁸ Iwa nochí tlan achto onikmoliaya ipati, axa nikita mach itla ipati porke yonikixma Noteko Cristo Jesús Akin kipanawia nochí tlan onikmoliaya ipati. Por Cristo, nochí tlan onikpixtoka yonikpolo. Porke nikita kemi tlájsoli, yika axa nimochijchikawa nikmotlanilis n Cristo ⁹ para Íwa niseititos. Axa Dios nechyeksilia, amo por oniktlakitak n tlanawatílistli, yej onechyochipa por onikneltokak Cristo. ¹⁰ Nikneki okachi nikyekixmatis n Cristo, iwa nikneki nikixmatis n weletílistli non Ye okípixi ikuak omoyoliti de kan mikemeh. Noiwa nikneki nitlaijyowis kemi Ye otlaijyowi maya manechmiktikah kemi Ye. ¹¹ Porke ne noiwa nikneki nimoyolitis ikuak moyolitiskeh non yomikkeh.

* 3:2 N judójteh okinnotsayah nochteh non amo judójteh ‘chichimeh’. Pablo kintelia yejwah innewiah kateh kemi ‘chichimeh’.

† 3:5 Fariseos: Se partido de akimeh okitlakitayah iwa semi okimopantiayah itlanawatil Moisés iwa nochí tlan yejwah okajxitilijkah. Iwa okintoktiayah n oksikimeh makitlakitakah tlan yejwah otlamachtiayah.

Matimochijchikawah tikanakitiweh kan Dios moitstika

¹² Amo yonikajsik nochi tlan oniksentralli nikajsis, nion satlawel ya niyolchipawak. Pero nimochijchikawa weletis nikajxilis niyolitos nochipa ijkó kemi Cristo onechajsik.

¹³ Nokniwah, amo nomechilia yonikalakito kan oniknekia nikalakiti. Pero ne axa nikmosenmaka tlan nikita okachi ipati, iwa ye ni tlan ne nikchiwa, nikilkawa nochi tlan omoka tlakuitlapa, iwa nikmosenmaka nikajsiti tlan yonikitak tlayakapa. ¹⁴ Nikneki nokyektlamis noteke non Dios onechmák para weletis nikselsis notlatliokolil non Ye techmajmakas kan ilwikak por tikateh iwan Cristo Jesús.

¹⁵ Yika, tinochteh akimeh yochikawak totlaneltokalis, moneki ijkó matikyejyekolikah. Iwa tla seme de tejwah ok se kiyejyekolia, Dios kajsikamatiltis. ¹⁶ Ijkó kiné, tlan yotikajxilijkeh moneki matimoajsikamatikah iwa nochipa matiyeknemikah ijkó kemi ya tkyekchijtiwitseh.

¹⁷ Nokniwah, xinemikah kemi ne niyeknemi, iwa xikchiwah tlan kichiwah akimeh yeknemih, ijkó kemi tejwah otomechmachtijkeh. ¹⁸ Ne yonomechiliwalaya, iwa axa nichoka keman oksepa nomechilia, onkateh miakeh akimeh kitlawelitah ikrus n Cristo kemi yetoskia amitla ipati. ¹⁹ Ninteh kimpojpoloskeh. N dios de yejwah sanwel tlan kelewia, iwa moweylijah ika tlan tepinati. Sanwel kinekih kipiaskeh tlan onka itech nin tlaltípkaktli. Yika kimpojpoloskeh. ²⁰ Pero tejwah, tocha kajki ilwikak, iwa sa tikchixtokeh ika miak pakílistli mawalmokopa Totemakixti, Ye Toteko Cristo Jesús. ²¹ Ye kiyankuilis tokuerpo non mikki, iwa techmakas se yankuik kuerpo mawistik kemi non de Ye. Cristo kipia weletílistli para ijkó kichiwas, porke Ye weleti kichiwa makitlakita nochi tlan onka.

4

Nochipa xipakikah itech Toteko

¹ Yika, notlasojikniwah non satlawel nomechilnamikih, nomejwah nopakilis iwa notlatliokolilwah, nochipa ximochikawah inawak Toteko.

² Niklatlaujtia n Evodia iwa n Síntike mamoyekwikakah kemi iknimeh inawak Toteko.

³ Iwa te Sísgo, nokni non nochipa otechpalewijtenki, nimitstlatlaujtia xikinpalewi n Evodia iwa n Síntike. Yejwah chikawak otekitekeh nowa ikuak otiktematiltijkeh n kualtlájtoli sansikah iwa n Clemente iwa n oksikimeh tokniwah. Intokah ya ikuilitok itech Amatlajkuíloli kan machiotitokeh akimeh kiseliskeh Yolílistli. *Ap. 20:12*

⁴ Nochipa xipakikah itech Toteko. Oksepa nomechilia: ¡Xipakikah itech Toteko!

⁵ Nochteh manomechixmatikah non teajsikamatkeh. N Toteko Jesús ya wits.

⁶ Amitla manomechtekipacho, yej nochipa xikilikah n Toteko tlan nonkinekih keman nonmotiotsajtsiliah, xiktlajtlanilikah iwa ximotlasojkamatikah. ⁷ Iyolsewilis Dios, non amaka weleti kajsikamati, kimokuitlawis nomoyolo iwa nomotlayejyekolis por Cristo Jesús.

Nochipa xikilnamiktakah tlan kuali

⁸ Nokniwah, ye ni tlan sa iksemi nikneki nomechilis: nochipa xikpixtokah itech nomotlamachilis

 tlan milák,
 tlan kipia nonkitlakitaskeh,
 tlan mijmilaktik,
 tlan chipawak,
 tlan teyolpakti iwa
 tlan moneki se kiyektenewas.

Xikilnamikakah nochi tlan kuali iwa tlan moneki se kuali kiyektenewas.

⁹ Xikchiwah tlan onomechmacthi, tlan onomechnajnwati, tlan onomechili iwa tlan ononkitakeh onikchi: ijkó xikchiwah, iwa Totajtsi Dios Akin kichiwa matikpiakah yolsewílistli, yetos nomowah.

Pablo kintlasojkamati akimeh okipalewijkeh

¹⁰ Ne satlawel nipaki inawak Toteko ken oksepa ononnechilnamikeh. Kuali nikmatok nomejwah ayik ononnechilkajkeh iwa ononkinekiyah nonnechpalewiskeh, pero amo ononkimatiah kenomi. ¹¹ Amo ijkí nomechilia porke nechpoloa. Ne nipaki san ika tlan nikpia. ¹² Nikmatok kenijki nipayos ikuak onka san achitsi noso ikuak onka miak. Noiwa nikmati kenijki nikchiwas ikuak niapismiki noso niixwitok, iwa amo nechmojtia tla niktlawelpias noso tla amitla nikpias. ¹³ Nochi weleti nikchiwa, ken Cristo nechmaka chikawálistli. ¹⁴ Maski ijkó nomejwah kuali ononkichijkeh ikuak ononnechpalewijkeh itech notlaijyowilis.

¹⁵ Ikuak opé niktematiltia n kuali tlájtoli, nomejwah nokniyah de Filipos kuali nonkimatokeh sanwel nomejwah ononnechpalewijkeh ika siki tomi, iwa nion aka ok se onechpalewi. ¹⁶ Ikuak onichanchiwaya Tesalónica, nomejwah miak welta ononnechtitlanilijkeh tlan ika manipano. ¹⁷ Amo niktemoa techmakakah tlan ika nipayos, yej nikneki xikmiakilikah nomotlatliokolil ixpa n Dios. ¹⁸ Ne axa ya nikpia nochi tlan onechpoloaya, iwa ika tlan Epafroditononkimakakeh manechmaktiliki, ayakmitla nechpoloa. Tlan nomejwah ononnechmakakeh Dios kipaktia, iwa kiselia kemi se ajwiálistli non kualtsi ajwiak. ¹⁹ Notajtsi Dios nomechmakas nochi tlan nomechpoloa, ika iweyilis non Ye kipia itech Cristo Jesús. ²⁰ ¡Nochipa matikweyijkachiwakah Totajtsi Dios! Ijkó mamochiwa.

Pablo momakawa

²¹ Xikonintlajpalojtikisakah nochteh n tokniyah yolchipawakeh itech Cristo Jesús. N tokniyah non kateh nowa noiwa nomechtalajpalolah. ²² Nochteh non nika kateh iwa teaxkawah inawak Dios, nomechontlajpalolah, iwa okachi n tokniyah non tekítitokeh icha n César.

²³ Itlasojtlalis n Toteko Cristo Jesús mayeto nomowa iwan nomoespíritu.

San Pablo kintlajkuililia non de Colosas

Pablo kintlajkuililia n tlaneltokakeh de Colosas

¹ Ne Pablo, Dios okimonekilti maniyeto itlatematilti n Cristo Jesús. Ne iwa n tokni Timoteo, ² nomechtlajkuililiah nomejwah tokniyah de Colosas akimeh nonteaxkawah inawak Dios:
Dios manomechtiochiwa ika iyekchiwalis iwa manomechmaka yolsewílistli itech nomoyo-lo.

Pablo motiotsajtsilia por tokniyah de Colosas

³ Nochipa timotlasojkamatih inawak Dios Itajtsi n Toteko Cristo Jesús ikuak tim-otiotsajtsiliah por nomejwah. ⁴ Porke yotikmatkeh keniji milák nonkineltakah n Toteko Cristo Jesús, iwa kuali nonkintlasojojtlah nomokniyah iaxkawah Dios. ⁵ Nomejwah nonmoyolchikawah itech tlan nomechchia ilwikak. Porke nochí ni yononkikakeh omotetlapowi ikuak ononkimatkeh n de milajka kualitlátoli. ⁶ Nin kualitlátoli non onomechtlapowijkeh, sentetl itech nin tlaltíkpaktli motetlapowijtinemi iwa miakeh kineltokatokeh. Ijkó kemi opé tlamochiwa nomowah desde neká tonati ikuak sakin onomechtlapowijkeh itlasojojtlalis Dios, iwa nomejwah ononkajsikamatkeh milák Dios nomechtlasojtla. ⁷ Nin kualitlátoli onomechajsikamatilti tokni non tiktlasojtlah Epafras akin tekiti towah. Nomejwah ya nonkimatokeh ye se kuali tékitki inawak Cristo. ⁸ Ye yotechtlapowi kenomi nonkateh iwa otechmatilti keniji nonitetlasojtlah ika ichikawalis n Espíritu.

⁹ Yika, keman otikmatkeh, opé timototsajtsiliah inawak Dios para makichiwa tlan Ye kimonekiltia. Iwa itech nomoespíritu makichiwa xiixtlamatikah iwa nochí kuali xikajsikamatikah. ¹⁰ Ijkó weletis nonyeknemiskeh kemi kipiah de yeknemiskeh akimeh milák iaxkawah n Toteko, iwa nochipa weletis nonkichiwaskeh tlan kuali iwa tlan kipaktia, iwa ixmostla okachi nonkixmatiskeh n Totajtsi Dios. ¹¹ Tejwah tiktlajtlaniliah Dios manomechchikawa ika iweletilis non weyixtok, para xikxikokah n tlaijywílistli ika chikawálistli iwa pakílistli, ¹² iwa nochipa matiktlasojkamatikah n Totajtsi Dios porke yotechtyolyankuili para matikselikah tlan toaxka iwa n nochteh akimeh iaxkawah iwa nemih itech tláwili. ¹³ Dios otechmakixti imak iweletilis n tleyuálistli, iwa otechtlali kan tlanawatia Ikone non saikpanoa kitlasojtla, ¹⁴ Akin otechmakixti, iwa otechtlapojpolwi de totlajtlakolwah.

Cristo Ye Akin nochí kinawatia

¹⁵ Dios, Akin amo mota, omoteititiko itech Ikone,
Akin okatka teteachka de nochí tlan Dios okichijchi.

¹⁶ Por Cristo, Dios okichijchi nochí tlan onka kan ilwikak iwa itech tlaltíkpaktli,
nochí tlan amo mota iwa nochí tlan mota.

Noiwa okinchijchi n espíritus non tlanawatiah,
iwa kipiah weletílistli ipan nochí tlan onka,
iwa tlan omochijchi por Ye iwa para Ye.

¹⁷ Cristo yokatka ikuak ayamitla okatka,
iwa ika ichikawalis nochí tlan onka kuali kajki.

¹⁸ Iwa nomejwah noiwa ya nonkimatokeh Cristo kinyakana akimeh kineltokah,
iwa akimeh kineltokah kimajmanah ikuerpo.

Iwa Cristo kiyolitjtok non kuerpo,
Ye Akin tetiachka omoyoliti de kan mikemeh,
para Ye matlanawatijto itech nochí tlan onka.

¹⁹ Ijkó Dios okinek kinextis nochí iweyilis itech Cristo Jesús,

²⁰ Dios noiwa okimonekilti nochí tlan onka itech nin tlaltíkpaktli iwa tlan onka ilwikak
makipia tlapojpolwílistli inawak,

iwa non tlapoipolwílistli otechmák ika tlan Cristo Jesús okichi ikuak omikki iwa okitoya iesso ipan krus.

²¹ Achto, nomejwah ononkatkah wejka de Dios por tlan amo kuali ononkiyejjekoliayah iwa ononkichijtinemiah. ²² Pero axa Dios ken okinekia nomechtlalis iyakapa nonyolchipawakeh iwa nion se tlajtlácoli xikpiakah nion itla amo kuali manomechtatlakolti. Onomechtlapojpolwi ika imikilis Cristo Jesús non okijyowi itech ikuerpo. ²³ Yika, moneki xiyecktlaxxilitokah iwa nochipa xikneltokakah ika nochi nomoyolo tlan ononkikakeh itech nin kualtlájtoli non temakixtia. Nin kualtlájtoli motetlapowijtok itech nochi n tlaltípkaktli, iwa ne Pablo, nitlapalewia mamotetlapowi nin kualtlájtoli.

Pablo kinmatiltia n kualtlájtoli

²⁴ Axa nipaki maya nitlaijyowia por nomejwah, porke ijkó nikajxitiji itech nokuerpo tlan okipolo kiyowis Cristo Jesús por akimeh kineltokah, yejwah non kimajmanah ikuerpo. ²⁵ Dios onechtlali manitekiki para n tokniyah iwa manomechmatilti nochi itlajtol Dios. ²⁶ Ijkó kemi moneki makixmatikah tlan yowejka Dios okitlaatijtoka iwa amaka okinextiliaya, pero axa Ye yokinnextiliko akimeh iaxkawah. ²⁷ Dios okimonekilti makixmatikah akimeh iaxkawah nin weyi iwa kuajkualtsi tlatliokólili non kinmakas akimeh amo judíojteh. Iwa ye ni tlan nomejwah amo ononkimatiah, Cristo axa yolitok nomotech. Yika nonmoyolchikajtokeh itech tlan nonkiseliskeh ilwikak.

²⁸ Tejwah titetlapowiah de itlajtol Cristo, iwa nochteh tikinyeknonotsah makajsikamatikah kuali, iwa mapewa mamoyekiskaltijtiwiah asta mamochikawakah kemi Cristo.

²⁹ Ye ni tlan ika nimotekimaka, iwa nimochijchikawa ika nochi n chikawálistli iwa n weletílistli non Cristo nechmaka.

2

¹ Nikneki xikmatikah satlawel nimochijchikawa ni tekiti por nomejwah, iwa por non chantitokeh Laodisea, noiwa por nochteh non amo nechixmatih. ² Nimotekimaka para yejwah mamoyolchikawakah iwa mamotlasojoatlakah, iwa ika kuali intlnamikilis, okachi mamochikawakah para makixmatikah tlan yowejka okitlaatijtoka Dios. Non tlatliokólili non otlaatitoka, Ye n Cristo. ³ Porke itech Cristo tlaatitok tlan miak ipati de tlan se weletis tlaixmatis iwa tlan se weletis kajsikamatis. ⁴ Ni nomechilia para amaka manomechkajkayawa ika kualtsi tlájtoli non amo milák. ⁵ Porke maya amo nonewia nika nomowah, noespíritu kajki nomowah, iwa nipaki ikuak nikmati nomejwah kuali nonyeknemih iwa nochipa nontlaneltokah itech Cristo.

⁶ Yika, ijkó kemi ononkiselikeh n Toteko Cristo Jesús, ijkó ixpa xinemikah, ⁷ ximoyektlaxilikah iwa ximoskaltijtiwiah itech Ye, iwa xiyecktlaneltokakah kemi onomechmachtijkeh, iwa nochipa ximotlasojkamatikah inawak Dios. ⁸ Ximotlachilikah; amo kichiwa nomechkuatlapololtiskeh iwa nomechkajkayawaskeh nekateh tlamachtiijkeh ika tlamachtílisteh non amitla impati, porke yejwah amo kitemachtiah itlajtol Cristo, yej san tlan kiyeyekolah n tlaltípkaktlakah. ⁹ Porke nochi tlan kajki itech Dios, moixmatiltia itech Cristo. ¹⁰ Nomejwah nonkipixtokeh Dios itech nomoyolo, porke nonkitlakitah Cristo. Iwa Ye kinnawatia nochteh espíritus non kipiah weletílistli iwa tlanawatiah.

N sirkunsión de Cristo

¹¹ Iwa nomejwah akimeh nonkineltokah Cristo, noiwa nonsirkunsidaritokeh, pero amo porke onomechsirkunsidarojkeh itech nomonakayo, yej porke Cristo yonomechinkixtiliko nomotlajtlakolwah. Ye ni n sirkunsión non Cristo techmaka.

¹² Porke ikuak ononmokuaatekijkeh, noni kijtosneki onomechtookakeh iwan Cristo, iwa ijkó noiwa onomechyolitijkeh iwan Ye, porke ononkineltokakeh iweletilis Dios okiyoliti de kan mikemeh. ¹³ Achto nomejwah ononmiktakah ixpa n Dios, porke onontlajtlakolchijtinemiah iwa porke amo ononsirkunsidaritokah. Pero axa Dios yonomechyoliti iwa Cristo, iwa yonomechtlapojpolwi de nochteh nomotlajtlakolwah.

¹⁴ Dios yotechtlapojpolwi nochi tlan yotktewikiliayah por amo otiktlakitakeh n

tlanawátili. Yika Ye okipojpolo itech krus nochí tlan amo otiweletiah otiktlaxtlawayah.
¹⁵ Ijkuak Cristo omikki itech krus, okinkixtili inweletilis iwa n tekiwajyotl n espíritus amokualteh. Iwa ijkuak yokiwikayah kimiktitiweh, okiteititi kenijki okintlantokah n espíritus amokualteh.

Xiktemokah tlan milák ipati ixpa n Dios

¹⁶ Yika, amaka manomechpijpinawi por tlan nonkikuah noso nonkonih, noso por amo non ilwichiwah ijkuak yankuik metsi, noso por amo nonkintlakitah n sábados tonatijmeh ijkuak mosewia n judíos. ¹⁷ Porke nochí noni, san otechixnextiliaya kemi se tlasekawilo Akin satepa walaskia, iwa Akin milák satepa walaskia, Ye ikuerpo Cristo. ¹⁸ Amo xikmokawilikah manomechkixtilikah nomotlatliokolil nekateh akimeh san mochijtinemih iknomeh iwa kinweyiliah n ángeles. Yejwah kijtojtinemih itech intejtemikilis kinmonextiliah ángeles. Pero mach milák. Semi moweyiliah san ika tlan yejwah kiyejyekolah. ¹⁹ Yejwah mach kinekih kitlakitaskeh Cristo, Akin techyakana kemi itsonteko tinochteh non tikneltokah. Tejwah tikateh itech Cristo, kemi se kuerpo non sasalitokeh iomiovah, ijkó kemi Dios okimonekilti; iwa timoskaltiah iwa timochikawah ika n chikawálistli non Ye techmaka.

²⁰ Tla nomejwah yononmikkeh iwan Cristo, iwa ayakmó nonkitlakitah tlan kitlakitah n tlaltikpaktlakah, ¿tleka ok nonkimokawiliah manomechyakanakah ika tlanawátilteh kemi ninteh? ²¹ “Amo xikonana, amo xikkua, amo xiktelko.” ²² Nochi tlákuali iwa nochí tlan se koni tlami ijkuak se kitekitiltia, iwa nochí tlan ika onomechnawatiyah san okintlalijkeh n tlaltikpaktlakah. ²³ Tlan yejwah otlanawatijkeh, mota kemi milák techpalewiskia. Porke ijkuak yejwah motlaijyowiltiah iwa moiknotlasojtlah, nesi kemi okachi kimatih kenijki kiweyiliskeh Dios. Pero nochí tlan kichiwhah mach weleti kimpalewia ijkuak kinyoltilana tlan amokuali kelewhah inkuerpo.

3

¹ Yika, tla nomejwah yononmoyolitijkeh iwan Cristo, xiktemokah nochí tlan onka itech ilwikak, kan Cristo ewatok iyekma n Totajtsi Dios. ² Xiktlalikah nomotlachialis itech tlan onka ilwikak, iwa amo itech tlan onka itech nin tlaltíkpaktli. ³ Porke nomejwah yononmikeh iwan Cristo, iwa axa nonkipiah nomoyolitislaatitok iwa Cristo itech Dios. ⁴ Cristo Ye Akin kichiwha matiyolitokah, iwa ijkuak walmuikas, nomejwah íwa nonyetoskeh, iwa nonkisepampiaseh iweyilis.

Tlan achto otikchiwayah moneki pojpoliwiis

⁵ Yika, xikpojpolokah tlan amo kuali kelewhah nomokuerpo. Amaka mamokalakijtinemi iwan se non amo isiwa, nion manemi itech tlan pitsotik, nion mamotemaka imak tlan amokuali kelewhah ikuerpo, nion makitlawelneki tomi, porke tla ijkó nonkichiwhah, noni yaskia kemi nonkinweyiljitoskiah diostsitsinteh. ⁶ Por nochí ni, walmuikas ikualanilis Dios impah akimeh amo kitlakitah. ⁷ Iwa nomejwah, achto ijkó ononnentinemiah itech ninteh tlajtlákolteh.

⁸ Pero axa xikinkawakah nochteh ninteh tlajtlákolteh: Ayakmó xikualankamikikah, ayakmó xikualanikah, ayakmó xitewikaltikah, ayakmó fiero xitlajtokah de oksikimeh, nion ayakmó ximokamanalwikhah. ⁹ Ayakmó ximokajkayawakah, porke nomejwah yononkikajkeh tlan achto onomechyolijtlakoaya iwa yononmoyankuilijskeh. ¹⁰ Pero axa Dios yonomechyankuili. Yika, ximoixtlamachtikah itech Cristo iwa ixmostla ximoyolpatlatiwiáh para nonyetoskeh kemi n Totajtsi Akin otechchijchi. ¹¹ Inawak Dios ayakmitla ipati tla se judío noso amó, tla se kajki sirkunsidado noso amó. Amitla ipati tla se de wejka, tla se amo tlaixmati, tla se tlanémaktli noso amó. Porke Cristo okachi miak ipati ke nochí tlan onka, iwa Ye kajki intech nochteh akimeh kineltokah.

¹² Dios nomechtglasojtla iwa yonomechpéjpenki para xikmajmanakah ialtépeu yolchipawak, yika ximokemelokah ika nochí tlan nomechpalewis iwa xiteiknomatikah, xiktechiwilicah tlan kuali, ximotsikitsintlikah, xiyetokah nonyolyamankeh iwa xitexikokah. ¹³ Xitexikokah iwa ximotlapojpolwikhah. Iwa tla se nomokni onomechchiwili

itla amo kuali, xiktlapojpolwikah, ijkó kemi Cristo onomechtlapojpolwi. ¹⁴ Iwa tlan okachi ipati, iwa weyi kijtosneki: ximotlasojtlakah iwan oksikimeh, porke n tlasojtlálistli, ye tlan techyekseitilia. ¹⁵ Noiwa xikkawilikah Dios makiyakana ika iyolsewilis nomoyolo, yika Dios onoméchnotski para xikmajmanakah san se kuerpo. Iwa nochipa ximotlasojkamatikah.

¹⁶ Itlajtol Cristo machantito nochipa itech nomoyolo. Ximosep洋洋otsakah iwa ximosepanyeakuikakah ika kuali ixtlamatílistli. Xiktlakuikilikah Dios ika nochि nomoyolo ika salmos iwa ika tlakuíkalteh non kiweyiliah, iwa ika tlakuíkalteh non tlatiochiwah.

¹⁷ Iwa nochि tlan nonkichiwah noso nonkijoah, xikchiwakah itech Itoka n Toteko Cristo Jesús, iwa ximotlasojkamatikah inawak Totajtsi Dios itech Cristo Jesús.

Kenomi moneki manemikah tokniwah

¹⁸ Siwameh, xiktlakitakah nomookich, porke ijkó moneki kichiwaskeh akimeh kit-lakitah Dios. ¹⁹ Tlakah, xiktlasojtlakah nomosiwa iwa amo san xikinmajwatokah.

²⁰ Tepilwah, xikintlakitakah nomotajwah porke ijkó kipaktia n Toteko. ²¹ Tetajmeh, amo xikinkuakualanikah nomopilwah, para amo mamosojsotlawakah. ²² Tlanémakti,* xiktlakitakah nomoteko, amo sanwel ikuak nomechonitok, san para kuali nonmokawaskeh iwa, yej xiyekekitikah para nonkipaktiskeh n Toteko. ²³ Nochi tlan nonkichiwah, xikyekchiwakah, kemi nonkichiwilitoskiah n Toteko Cristo Jesús iwa amo san para n tlakah. ²⁴ Porke ya nonkimatokeh, Toteko Dios nomechmakas n tlatliokólili non yonomechili nomechmakas. Porke nonkitekitiliah Cristo akin milák Nomoteko. ²⁵ Pero akin kichiwa tlan amokuali, kiselis itlaxtlawil de tlan amokuali yokichi. Porke Totajtsi Dios amo san techikotlasojtla.

4

¹ Nomejwah tekowajkeh xikinyekwikakah nomotlakawah. Xikilnamikakah nomejwah noiwa nontetlakawah inawak Dios non kajki ilwikak.

² Nochipa ximotrotsajtsilikah, xiijsatokah iwa ximotlasojkamatikah inawak Dios.

³ Noiwa ximotrotsajtsilikah por tejwah, para Dios matechkawili matitetlapowikah de n kualtlájtoli de Cristo, porke por nin kualtlájtoli non amaka okimatia axa onechtsakeh.

⁴ Ximotrotsajtsilikah para ikuak nitetlapowis de nin kualtlájtoli, kuali manikteajsikamatilti.

⁵ Xikmatikah ximowikakah kuali iwa n tlakah non amo kineltakah Dios, para amo sanenka nonkintlapowiskeh. ⁶ Nomotlajtol nochipa mateyolpakti iwa amo xikinsojsotlawakah, iwa xikmatikah kenomi nontlanankiliskeh ikuak itla nomechtlajtlaniskeh.

Pablo kintlajpaloa iwa momakawa

⁷ Tokni Tíquico non satlawel tiktlasojtlah, nomechtlapowis kenomi nika, ye se tekitki yekmilajka iwa nechpalewia itech iteki n Toteko. ⁸ Yika, onomechtitlanili para manomechmatilti kenikki tikateh iwa manomechylchikawa. ⁹ Noiwa yawi tokni non satlawel tiktlasojtlah Onésimo, ye se de nomejwah. Yejwah nomechiliskeh nochि tlan tlamochejtok ik nika.

¹⁰ Nomechtlajpaloa Aristarco, non iwa nitsaktok, noiwa nomechtlajpaloa n Marcos, iprimo n Bernabé. Ya nonkimatokeh kenikki nonkiyekseliskeh n Marcos tla nomechtlajpaloti. ¹¹ Noiwa nomechontlajpaloa Jesús, akin noiwa kinotsa Justo. Sanwel ninteh judío jteh non kineltakah Cristo Jesús tekititiwitseh nowa itech iteki n Totajtsi Dios, iwa akimeh intech nimoyolchikawa. ¹² Noiwa nomechtlajpaloa Epafras, ye de nomoaltepeu iwa kuali kitekitilia n Cristo Jesús. Ye nochipa motrotsajtsilia chikawak por nomejwah para kuali ximokitskjtokah itech Cristo, para xikmosenmakakah itech tlan

* ^{3:22} tlanémakti: Achto ikuak n tlakah okitewikiliyah miak tomi iwa ayakmó oweletiah okikopayah, okinamayah. N tlakatl non okitewikiliyah non tomi, okinamakaya kemi yolkameh monamakah. Iwa ijkó okimokopiliya itomi, iwa ikuak okitekitiliyah n tlakatl non okinko amitla okintlaxtlawiaya. Iwa okimpixtoka icha iwa okintekitiliya san tlan oras okinekia porke amo okinpixtoka kemi tlakéwalteh yej kemi tlanemakti.

Dios kimonekiltia xikchiwakah. ¹³ Ne nonewia onikitak Epafras satlawel motekipachoa por nomejwah, noiwa por non chantitokeh Laodisea iwa Hierápolis. ¹⁴ Nomechtlajpaloa n tepajti Lucas non satlawel niktlasojtla, noiwa n Demas nomechontlajpaloa.

¹⁵ Xikintlajpalokah n tokniwah non chantitokeh Laodisea. Noiwa xiktlajpalokah n Ninfas iwa nochteh non moololoah icha. ¹⁶ Satepa ikuak yononkiamapojkeh nin amatlajku'loli, xikitlanikah Laodisea para ompa makiamapoakah n tokniwah.

Nomejwah noiwa xikamapoakah n amatlajku'loli non yejwah nomechaltitlaniskeh.
¹⁷ Noiwa xikilikah n Arquipo: "Xikyekchiwa n tekitl non Toteko Cristo omitsmaktili."

¹⁸ Ne Pablo, nonewia nomechtlajkuililia. Xikilnamikikah nitsaktok.

Dios manomechtiochiwa ika iyekchialis.

San Pablo sakinika kintlajkuililia non de Tesalónica

Pablo kintlajpaloa n tokniwah de Tesalónica

¹ Pablo, Silvano iwa Timoteo, tomechtajkuililiah tokniwah akimeh nonchanchiwhah Tesalónica, inawak Dios n Teta iwa n Toteko Cristo Jesús:
Xikselikah intlatiochiwalis iwa inyolsewilis.

Miakeh okixmatiah intlaneltokalis non de Tesalónica

² Nochipa timotlasojkamatih inawak Dios por nochteh nomejwah, iwa tomechilnamikih ikuak timotrotsajtsiliah. ³ Ixmostla tikilnamikih iyakapa Dios n Teta, keniji yonontekitikeh ika miak tlaneltokálistli, iwa ika miak tlasojtlálistli nontekititiwitseh. Nomoyolchikawalis itech Cristo Jesús chikawak iwa amo nonmosotlawah. ⁴ Nokniwah, Dios nomechtasojtla, iwa tikmatokeh Ye onomechpéjpenki. ⁵ Porke ikuak otomechmatiltijkeh n kualtlájtoli, amo san ika totlajtol, yej noiva ika n Espíritu Santo iwa iweletilis otikintlaneltoktijkeh. Nomejwah nonkimatokeh otiyeknenkeh ika yolchipawálistli nomowah, para tomechchiwiliskeh tlan kuali.

⁶ Nomejwah noiva opé nonnemih ika nomoyolo chipawak kemi tejwah tinemih ika toyolo chipawak inawak Toteko, iwa maya miak onontlaijyowijkeh, ononkiselijkeh n kualtlájtoli ika pakílistli non techmaka n Espíritu Santo. ⁷ Ika noni, axa kuali nomechtenewah iwa nomechyekitah n tokniwah tlaneltokakeh, non chantitokeh itech tlalmeh de Macedonia iwa Acaya. ⁸ Porke nomejwah yononkixitinijkeh itlajtol n Toteko, iwa amo san itech tlalmeh de Macedonia iwa Acaya, yej sentel kimatokeh kenomi nontlaneltakah inawak Dios, iwa mach ok moneki matomechtenewakah. ⁹ Porke innnewiah techtlapowiah keniji onontechyejkselijkeh ikuak otomechtajpalotoh, iwa keniji ononkinkajkeh n diosmeh non kinmachijchiwhah iwa keniji ononmoyolpatlakeh inawak n de milajka Dios non yolitok, para nonkitekichiwiiskeh. ¹⁰ Noiva nomejwah nonkichixtokeh mawalmokopa de ilwikak n Jesús Ikone n Totajtsi Dios, Akin okiyoliti de kan mikemeh. Jesús Ye Akin techmakixtis de n tlaijyowílistli temohti non wits.

2

N tekitl non Pablo kichiwa itech tlali de Tesalónica

¹ Nokniwah, nomejwah kuali nonkimati amo sanenka otomechtajpalotoh.
² Nomejwah nonkimati, achto yotechwijwikaltijkah iwa yotechtlaijywiltijkah kan altepetl de Filipos. Dios otechpalewi matomechmatiltikah n kualtlájtoli de Dios, ika miak tlaneltokálistli itlajko miak tlaijyowílistli. ³ Porke ikuak otomechmatiltijkeh n kualtlájtoli, amo otomechititijkeh tlan amo milák, nion otomechtlapowijkeh ika totlalnamikilis amo chipawak, nion otomechtlapowijkeh para tomechkajkayawaskeh.
⁴ Yej otomechtlapowijkeh porke Dios yotechyejyekojka iwa otechmák n tekitl para matitetlapowikah de n kualtlájtoli de Dios non techmakixtia. Iwa tejwah titlamachtiah amo san para tikimpaktiskeh n tlakah, yej para tikpaktiskeh n Totajtsi Dios Akin kixmati toyolo. ⁵ Dios kuali kimatok, iwa nomejwah noiva nonkimatokeh tejwah ayik otomechweyilijkeh ika totlajtol wah, nion otiktektiltijkeh n kualtlájtoli para tiktlaniskeh tomi. ⁶ Tejwah mach tiknekih aka matechweyili, nion nomejwah nion oksikimeh, maya otikpiayah tlanawátili para tomechnawatiskiah techmopantikah porke tejwah itlatitlanilwah Cristo. ⁷ Pero tejwah amo ijkó otikchijkeh nomowah, yej otomechtasojtlakeh kemi se tena kintlasojtla iwa kinyekmokuitlawia ipilwah. ⁸ Kemi satlawel tomechtasojtlah, yika otiknekiah tomechmaktiliskeh amo sanwel itlajtol Dios, yej asta toyolilis. ¡Porke satlawel tomechtasojtlah! ⁹ Nokniwah, nomejwah nonkilnamikih keniji otitekitikeh para ika otipanoayah. Ikuak otomechmatiltiayah itlajtol Dios, otitekitiah tlajka iwa n yuak para amaka tiktekimakaskeh.

¹⁰ Nomejwah ononkitakeh, iwa Totajtsi Dios kuali kimatok nomonawak otiyeknenkeh ika toyolo chipawak, iwa ayik aka otiktoktijkeh itla amo kuali kemi para matechtlatlakolti. ¹¹ Noiwa nonkimatih, keniji otomechylchikajkeh iwa otomechyolsewijkeh, kemi se teta kichiwa iwan ipilwah. ¹² Tejwah yotomechylchikajkeh, yotomechyolsewijkeh, iwa yotomechnonotskeh keniji kipiah de yeknemiskeh ipilwah Dios, Akin nomechnotok xiyetokah kan Ye tlanawatia iwa xijselikah iweyilis.

¹³ Yika, tejwah nochipa timotlasojkamatih inawak Dios, porke ikuak nomejwah ononkikakeh itlajtol Dios non tejwah otomechmatiltijkeh, nomejwah ononkiselijkeh kemi milák itlajtol Dios iwa amo san kemi intlajtol n tlakah. Iwa nin tlájtoli milák itlajtol Totajtsi Dios non tekititok itech nomoyolo nomejwah akimeh nontlaneltokah. ¹⁴ Nokniyah, ijkó kemi onomechtaijyowiltijkeh n tlakah de nomaaltepeu, ijkó noiwa okintlaijyowiltijkeh n tlaneltokakeh non chantitokeh Judea akimeh iaxkawah n Cristo, yejwah noiwa okintotojtokakeh n Judíos de inmaltépeu. ¹⁵ Ninteh judíojteh okimktijkeh n Toteko Jesú, ijkó kemi okimktijkeh improfetajwah, iwa tejwah noiwa otechalkixtijkeh de ompa. Yejwah amo kichiwha tlan kipaktia Dios, iwa kintlawelitah nochteh n tlakah. ¹⁶ Porke ikuak tiknekih tikintlapowiskeh non amo judíojteh para mamomakixtikah, amo techkawiliah matikintlapowikah. Yika san yejwah kimotetemilijtokeh okachi tlajtlákoli. Pero axa ikualanilis Dios yowala impah.

Pablo oksepa kineki yas kintlajpaloti non chantitokeh Tesalónica

¹⁷ Nokniyah, ikuak otomechkajtewayah kanaj kech tonati, maya amo otomechitayah, nochipa otomechwikatinemiah itech toyolo, iwa satlawel otiknekiah tomechitatiweh.

¹⁸ Otiknekiah tiaskeh tomechitatiweh, iwa ne Pablo okachi oniknechia nias, pero nochipa otechtsatsakuiliaya n satanás. ¹⁹ Porke akimeh, ¿tla amo nomejwah, akimeh inwah timoyolchikawaskeh, tiyolpakiskeh, iwa timoweyiliskeh inawak Toteko Cristo Jesú, ikuak Ye walmokopas? ²⁰ Milák, nomejwah toweyilis iwa topakilis.

3

¹ Yika, kemi ayakmó okachi otikxikojkeh, otikmolijkeh okachi kuali matimokawakah toselti kan altepetl de Atenas, ² iwa otiktitlankeh tokni Timoteo manomechitati, porke ye itlakewal Dios, iwa yotekitik towah ikuak otiktematiltijkeh n kualitájtoli de Cristo. Yika otiktitlankeh para manomechyekketsa iwa manomechylchikawa itech nomotlaneltokalis, ³ para amaka mamosotlawa ika nochí tlan kijyowia. Porke nomejwah nonkimatokeh moneki matilaijyowikah. ⁴ Iwa ikuak ok otikatkah nomowah, otomechilijkeh tipanoskiah miak tlaijyowílistli; iwa ijkó otlamochi kemi nomejwah yononkimatokah. ⁵ Yika, kemi ayakmó owéletki okachi onikxiko, oniktítlanki n Timoteo manomechitati kenomi ononnemiah itech tlan nontlaneltokah, porke onechtekipachoya nikmatis n tekjkaya yonomechtajtlakolchiwalti, iwa toteki sanenka tlan otikchijkeh.

⁶ Pero axa Timoteo yomokopato ompa Tesalónica, iwa techtlapowia satlawel nonkineltokah Dios iwa keniji saikpanoa nonkimatih nontetlasojtlah. Ye techilia nomejwah nochipa nontechilnamikih ika tlasojoatlalistli iwa nonkinekiskiah nontechitaskeh ijkó kemi tejwah tiknekiskiah tomechitaskiah. ⁷ Yika nokniyah, maya otimotekipachojtokah iwa otitlaijyowijtokah, axa tiyolpakih porke otikmatkeh nomejwah kuali non moyekketokeh itech tlan nonkineltokah. ⁸ Iwa axa ken ya tikmatih kuali nonnemih inawak Dios, tejwah kemi yaskia otimoyolitijkeh. ⁹ Yika mach tikpiyah tlan ika weletis tlakolchiwalti. ¹⁰ Tlajka iwa n yuak tiklatlaujtiah Totajtsi Dios, matechkawili oksepa matomechitatih nomonewiah, iwa ijkó matomechmatiltikah tlan kipoloa nomotlaneltokalis.

¹¹ Totajtsi Dios iwa n Toteko Cristo Jesú, makimonekiltikah techonpalewiskeh para tiweletiskeh tiaskeh tomechontlajpalotiweh. ¹² Iwa Dios manomechchikawa iwa makimiakili okachi nomotlasojtlalis, iwa ximotlasojtlakah non nochteh iwan oksikimeh noiwa xikintlasojtlakah, ijkó kemi tejwah tomechtlasojtlah. ¹³ Makichikawa nomoyolo

iwa xinemikah ika yolchipawálistli inawak, iwa ijkó amaka manomechtajtlakolti ikuak walmuikas Toteko Cristo Jesús iwa n nochteh akimeh iaxkawah.

4

Matinemikah kemi Totajtsi Dios kipaktia

¹ Axa nokniwah, tomechnonotsah iwa tomechnawatiah itech Itoka n Toteko Cristo Jesús, ijkó kemi tejwah otomechmachtijkeh iwa nomejwah ya nonkichijtiwitseh, okachi xiyecknemikah para nonkipaktiskeh Dios. ² Nomejwah ya nonkimatokeh tlan Toteko Cristo Jesús otechnawati matomechnawatikah. ³ Dios kineki ximoyolchipawakah inawak, iwa amaka mamomekatijtiniemi. ⁴ Yika, nochí tlakatl makimati kenomi kiyeknawatis ikuerpo ika chipawálistli iwa tlakitálistli. ⁵ Iwa amo xikkawilikah makelewi itla nomokuerpo kemi kichiwhah akimeh amo kixmatih n Totajtsi Dios. ⁶ Amaka mamixewi makikajkayawa ikni itech itekitl, porke Toteko Dios kitlaijyowiltis chikawak akin ijkó kichiwas, tejwah achto yotomechilijkeh. ⁷ Porke Dios amo otéchnotski para matinemikah itech tlajtlácoli, yej para matinemikah inawak ika toyolo chipawak. ⁸ Ijkó kiné, akin amo kiselia nin tlanawátili, amo kineltoka itlajtol Dios, porke amo wits de n tlaltikpaktlakah, yej wits de Dios, Akin otechmák Iespíritu Santo.

⁹ Axa, mach ok moneki manomechtajkuilili, keniji moneki nonkintlasojtlaskeh tokniwah, porke inewia Totajtsi Dios yonomechmachti keniji moneki nonmotlasojtlaskeh non nochteh. ¹⁰ Porke ya momatok keniji nonkintlasojtlah n tokniwah non chantitokeh kan tlali de Macedonia. Pero axa tokniwah, tomechtlatlaujtiah okachi mamomiacili nomotlasojtlalis. ¹¹ Ximochijchikawakah xietokah ika yolsewílistli, iwa xikchiwakah nomoteki iwa xiyecktekitkah ika nomomawah, ijkó kemi otomechititijkeh. ¹² Ikuakó non amo kineltoka itlajtol Dios nomechitaskeh kenomi nonyeknemih, iwa ayakmó nonmotlajtlaniskeh tlan ika panotoskeh.

Toteko Cristo Jesús oksepa wits

¹³ Nokniwah, tiknekih xikmatikah tlan mochiwaskeh non yomikkeh, para amo ximoyolkokakah kemi n oksikimeh non amo kipiah tlan itech moyolchikajtoskeh. ¹⁴ Porke tejwah tikneltokah Jesús omikki iwa oksepa omoyoliti, yika noiya tikneltokah Dios kinyolitis akimeh yomikkeh iwa okineltokakeh n Toteko Jesús.

¹⁵ Yika, tomechmatiltiah nin itlajtol Toteko Jesús: Ikuak Ye wits, tejwah akimeh axa tiyolitokeh, amo tikinmoyakanaltiskeh non yomikkeh. ¹⁶ Porke inewia n Toteko waltemos de ilwikak ika chikawak tlajtoli kemi se tekiwa. Tlajtos kemi se non kinyakana n ángelteh, iwa tikkakiskeh ikuak kipitsas itlapitsal Dios, ikuakó akimeh omikkeh iwa okineltokakeh n Cristo achto moyolitiskeh. ¹⁷ Tlamis akimeh ok tiyolitoskeh, techwikaskeh inwah ipan mextli para timonamikiskeh iwan Toteko Jesús nepa tlakpak. Iwa ijkó nochipa tiyetoskeh iwan Toteko. ¹⁸ Yika, ximosepanyolchikawakah ika ninteh tlajtolteh.

5

¹ Tokniwah, mach moneki matomechijkuililikah tlan tonati noso tlan ora walmuikas n Toteko. ² Porke nomejwah ya nonkimatokeh ikuak Toteko walmuikas amaka kimiati non tonati, Ye kalakiki ikuak amaka kichia, kemi se yuali ikuak se tlachtek walkalaki.

³ Ikuak n tlaltikpaktlakah kimoliskeh: “Axa kema ya tikateh ika kuali, iwa ya tikpiyah yolsewílistli”, ikuakó kualinmajsiki n tlaixpoliwílistli, kemi ikuak se siwatl pewa ijtikualo ikuak ya kipiati ikone. Iwa amaka weletis cholos. ⁴ Pero nomejwah, nokniwah, ayakmó nonkateh kan tleyua, yika itech neká iksemi tonati ikuak walmuikas Toteko Jesús, amo manomechkochwi kemi se ichtek. ⁵ Porke nochteh nomejwah ya nontepilwah de n tlawili. Tejwah amo titepilwah de n yúali nion de n sentleyuálistli. ⁶ Yika, amo matikochtokah kemi n oksikimeh, yej matiisatokah ika kuali totlanamikilis. ⁷ Porke akimeh kochi, kochi de yuak, iwa akimeh tlawanah, yual wintitokeh. ⁸ Ken tejwah tine-mih itech tlawili, moneki matiisatokah. Matikmoelpankentikah ika totlaneltokalis iwa

ika totlasojoatlalis, iwa matimokuaonakiltikah iwa matikchiakah totemakixtilis. ⁹ Porke Dios amo otechtlatlali para techtlaijyowiltis, yej para techmakixtis por Toteko Cristo Jesús. ¹⁰ Cristo Jesús omikki topatka, tla techajsiki ok tiyolitokeh noso tla yotimijmikeh, noienda matiyolitakah nochipa íwa. ¹¹ Yika, ximosepanyolchikawah iwa ximochikawah ijkó kemi ya nonkichiijtiwitseh.

Pablo kinnonotsa n tlaneltokakeh

¹² Tokniwah, tomechtlatlaujtiah xikintlakitakah akimeh tekititokeh nomowah. Yejwah nomechyakanah iwa nomechnonotsah kemi Toteko kineki xinemikah. ¹³ Xikintlakitakah iwa xikintlasojoatlakah por n tekil non kichijtokeh. Iwa kuali ximoyekwikakah nochteh nomejwah.

¹⁴ Noienda tomechtlatlaujtiah xikinnonotsakah chikawak akimeh amo kinekih tekitiskeh. Xikinyolchikawah akimeh mosotlawah. Xikimpalewakah akimeh amo chikawak intlaneltokalis, iwa xikinmajsikamatiltikah nochteh n oksikimeh.

¹⁵ Tla aka nomechchiwilia tlan amokuali, amo ximomakopakah. Yej nochipa ximosepanchiwilakah tlan kuali.

¹⁶ Nochipa xipaktokah. ¹⁷ Ixmostla ximotrotsajtsilijtokah. ¹⁸ Xiktlasojkamatikah n Totajtsi Dios por nochia tlan nonpanotokeh, porke ye ni tlan Dios kineki xikchiwakah nomejwah akimeh nonkineltokah Cristo Jesús.

¹⁹ Xikyekkakikah tlan nomechiliyah n Espíritu. ²⁰ Amo san xikajawilmaticah n tlajtoli non nomechmatiltiah n profetas. ²¹ Kuali xikkakikah tlan nomechmatiltiah iwa xikmokawikah tlan kuali. ²² Xikkawah nochia tlan amokuali.

²³ Inewia Dios non teyolsewi, sansemi manomechyochipawa iwa makimokuitlawi nomoespíritu, nomoalma iwa nomokuerpo, para amo xikpiakah nion se tlajtlácoli ikuak walmokapas n Toteko Cristo Jesús. ²⁴ Akin onoméchnotski yekmilajka, iwa kiyekchiwas nochia ni.

Pablo iksemi kintlajpaloa iwa kintiochiwa

²⁵ Nokniwah, ximotrotsajtsilikah por tejwah.

²⁶ Xikintlajpalakah nochteh tokniwah iwa ika chipawak nomoyolo xikinixtenamikikah.

²⁷ Nomechtlatlaujtia ika itekiwijyo n Toteko, xikinamapoilikah nin amatlajkuícoli nochteh n tokniwah.

²⁸ Itlatiochiwalis n Toteko Cristo Jesús mayeto nomowah.

San Pablo ojpa kintlajkuililia non de Tesalónica

Pablo kintlajpaloa n tokniwah de Tesalónica

¹ Ne Pablo, Silvano iwa Timoteo, tomechtlajkuililiah nomejwah tokniwah akimeh nonchanchiwah Tesalónica, nomejwah nonseititokeh inawak Dios n Teta iwa n Toteko Cristo Jesús. ² Xikselikah itiochiwalis iwa iyolsewilis n Totajtsi Dios, iwa n Toteko Cristo Jesús.

Pablo kinmiknomati non motekipachaoah

³ Nokniwah, moneki nochipa matimotlasojkamatikah inawak Dios por nomejwah, kemi moneki tikchiwaskeh, porke mochikajti nomotlaneltokalis, iwa nomotlasojtlalis inawak oksikimeh okachi momiakiliji. ⁴ Yika, sentetl kan moololoah n tokniwah non kineltokah Cristo Jesús, tejwah tomechyektenewah innawak, porke maya nomechtotojtokah iwa nomechtlaijyowiltiah, nomejwah nonkixikoah n tlaijyowilitli por nontlaneltokah inawak Cristo Jesús. ⁵ Noni kinextia Dios nochipa kichiwa tlan kuali, ikuak nomechita non yolchipawakeh para nonkalakiskeh kan Ye tlanawatia, yika nontlaijyowijtokeh.

⁶ Tikmatih Dios yekmilajka, yika kintlaijyowiltis akimeh nomechtlaijyowiltiah, ⁷ iwa nomejwah akimeh nontlaijyowiah, Ye kichiwas ximosewikah ijkó kemi tejwah noiwa timosewiskeh, itech neká tonati ikuak Toteko Cristo Jesús waltemos ijtik tletl de ilwikak iwa iangelwah weletinih, ⁸ para kintlaijyowiltis akimeh amo kineltokah Dios nion kitlakitah n kualitlajtoli de Toteko Cristo Jesús. ⁹ Ninteh tlajtlakolchijkeh kintlaijyowilitiskeh ika tlaijyowilitli non ayik tlamis. Iwa wejka kintlamotlaskeh, kan amo weletis kitaskeh iweyilis nion iweletilis n Toteko, ¹⁰ ikuak wits Toteko itech neká tonati para makiweyijkachiwakah iaxkawah iwa kitaskeh ika pakílistli nochteh akimeh okineltokakeh. Nomejwah ononkineltokakeh n kualitlajtoli non tejwah otomechmatiltijkeh.

¹¹ Yika, ixmostla timotrotsajtsiliah por nomejwah, para xinemikah nonyolchipawakeh kemi Ye onoméchnotski para xikneltokakah itlajtol. Nomotech makitekitilti iweletilis, para makisa kuali nochipakakah n tektil non nomejwah nonkinekih nonkichiwaskeh ika tlan axa nonkineltokah. ¹² Iwa ijkó Itoka n Toteko Cristo Jesús kiweyiliskeh por tlan kuali nomejwah nonkichiwah, iwa Ye noiwa nomechweyilis por itlasojtlalis Totajtsi Dios iwa n Toteko Cristo Jesús.

2

Ikuak walmuikas n Toteko Cristo Jesús

¹ Axa nokniwah, ikuak Toteko Cristo Jesús techseitilikih inawak, tomechtlatlaujtiyah ² amo xikmokawilikah manomechixtlapololtikah nion manomechmomojtikah, tla nomechiliskeh okinmatilti se espíritu, noso tla nomechiliah okikakeh noso okiselijkeh se amatlajkuifoli kan nestok tejwah otikijtojkeh yoajsiko itonati n Toteko. ³ ¡Amo xikmokawilikah manomechkajkayawakah! Porke ikuak ajsiki non tonati, miakeh non axa kijtoah kineltokah n Toteko Dios, kitlawelitaskeh, iwa tlamis monextis n tlakatl tetlajtlakolchiwalti, non teaxkatitok miktla. ⁴ Ye nin tetlajtlakolchiwalti non kixnamiki iwa majkokui ixpa nochipakakah n tektil non tonati, miakeh non axa kijtoah kineltokah n Toteko Dios, kitlawelitaskeh, iwa tlamis monextis n tlakatl tetlajtlakolchiwalti, non teaxkatitok miktla. ⁵ Ye nin tetlajtlakolchiwalti non kixnamiki iwa majkokui ixpa nochipakakah n tektil non tonati, miakeh non axa kijtoah kineltokah n Toteko Dios, kitlawelitaskeh, iwa tlamis monextis n tlakatl tetlajtlakolchiwalti, non teaxkatitok miktla. ⁶ Iwa axa nomejwah ya nonkimatih tlan kitsakuilijtok non tlakatl tetlajtlakolchiwalti, para mamotenexti asta ikuak kalakiki non tonati. ⁷ Porke n amokualtlakatl tetlajtlakolchiwalti ya ichtakatekititok; iwa sa kichixtok makachiwakah akin kitsakuilijtok. ⁸ Ikuakó walmonextis neká tetlajtlakolchiwalti, akin Toteko Cristo Jesús kimiktis ika itlajtol weletini, iwa kipojpolos ika itlawilnextilis ikuak wits. ⁹ N satanás kualtitlanis n tetlajtlakolchiwalti, iwa kimakas iweletilis para makinchicha wejweyi milagros iwa neskáyolteh non san ika

⁵ ¿Amo nonkilnamikih, ikuak onikatka nomowah onomechiliaya nochipakakah n tektil non tonati, miakeh non axa kijtoah kineltokah n Toteko Dios, kitlawelitaskeh, iwa tlamis monextis n tlakatl tetlajtlakolchiwalti, non teaxkatitok miktla. ⁶ Iwa axa nomejwah ya nonkimatih tlan kitsakuilijtok non tlakatl tetlajtlakolchiwalti, para mamotenexti asta ikuak kalakiki non tonati. ⁷ Porke n amokualtlakatl tetlajtlakolchiwalti ya ichtakatekititok; iwa sa kichixtok makachiwakah akin kitsakuilijtok. ⁸ Ikuakó walmonextis neká tetlajtlakolchiwalti, akin Toteko Cristo Jesús kimiktis ika itlajtol weletini, iwa kipojpolos ika itlawilnextilis ikuak wits. ⁹ N satanás kualtitlanis n tetlajtlakolchiwalti, iwa kimakas iweletilis para makinchicha wejweyi milagros iwa neskáyolteh non san ika

teixkajkayawas. ¹⁰ Kitekitiltis nochí tlan amokuali para kinkajkayawas akimeh moyakan-tokeh kan amo tlakualka porke amo okinekeh okikakeh tlan milák para momakixtiskeh. ¹¹ Yika, Dios kinkawilia mamokajkayawakah iwa makineltokakah tlan amo milák, ¹² para kintlaijyowiltis nochteh akimeh amo okinekeh kineltokaskeh tlan milák, yej okachi kimpaktia kichiwaskeh tlan amokuali.

Dios otechpéjpenki matimomakixtikah

¹³ Tejwah nochipa moneki timotlasojkamatiskeh inawak Dios por nomejwah, tokniwah non Dios nomechtlaejtla. Porke Totajtsi achto yonomechpéjpenki kemi se tlama-nali para nomechmakixtis por n Espíritu non nomechyolchipawa inawak, iwa ika itlajtol non nomejwah ya nonkineltokah. ¹⁴ Dios onoméchnotski ikuak tejwah otomechtlapowijkeh n kualitlátoli non temakixtia, iwa ijkó nomejwah xikelikah iweyilis n Toteko Cristo Jesús.

¹⁵ Ijkó kiné, nokniwah, ximochikawakah, iwa amo xikilkawakah tlan otomechmachtijkeh tejwah tonewiah noso ika se amatlajkuíloli. ¹⁶ Inewia n Toteko Cristo Jesús, sansikah iwa n Totajtsi Dios, Akin techtlasojtla iwa kichiwa matimochiakah ika paklistli para tiaskeh inawak, kichiwa porke de milajka techiknomati, ¹⁷ manomechyolchikawa iwa manomechmaka chikawálistli para xikijtokah iwa xikchiwakah nochipa tlan kuali.

3

Xiktlajtlanilikah n Totajtsi Dios matechpalewi

¹ Tokniwah, noíwa tomechtlajtlaniliah ximotrotsajtsilikah inawak Dios para matechpalewi, iwa ijkó sentetl makixmatikah itlajtol n Toteko Cristo Jesús, iwa miakeh makiyekselikah ika tlaejtlálistli kemi nomejwah ononkiselijkeh. ² Noíwa ximotrotsajtsilikah para amitla matechtoktikah n tlakah non amo kualteh iwa tlajtlakolchijkeh, porke amo nochteh kineltokah Dios. ³ Pero n Toteko Cristo, nochipa kichiwa tlan kijto, iwa Ye nomechmakas chikawálistli iwa nomechpalewis para amo xiwetsikah imak n amokualtlakatl. ⁴ Iwa tejwah titlaneltokah ixpa n Toteko nomejwah nonkichiwah iwa nochipa nonkichijtoskeh tlan tejwah yotomechnajnawatijkeh. ⁵ N Toteko Jesús makiyakana nomoyolo iwa nochipa xiktlasojtlakah n Totajtsi Dios iwa xiweletikah xikxikokah n tlaijyowílistli kemi Cristo okixiko.

Moneki matitekitikah n tlaneltokakeh

⁶ Tokniwah, tomechnawatiah itech Itoka n Toteko Cristo Jesús, amo ximowikakah iwan tokniwah non amo kinekih tekitiskeh, nion kinekih yeknemiskeh kemi tejwah yotomechmachtijkeh. ⁷ Porke nomejwah kuali nonkimatokeh kenijki nonyeknemiskeh. Porke ikuak otichantitokah nomowah, nochí otikyekchijkeh. ⁸ Amitla otikkuajkeh sanjki. Yej otitekitikeh tlajka iwan yúak, para amaka tiktekimakaskeh. ⁹ Maya otiveletiah tomechtlajtlanilikah techpalewikah, amo ijkó otikchijkeh, yej otitekitikeh iwa nomejwah noijkó xikchiwakah. ¹⁰ Keman otikatkah nomowah, otomechilijkeh tla aka amo kineki tekitis, amo matlakua. ¹¹ Porke otikmatkeh sikimeh de nomejwah san tlan yejwah kinekih kichijtinemih iwa amo kiwilitah tekitiskeh, yej san kintsatsakulijtinemih akimeh kichijtokeh intekih. ¹² Nonteh tokniwah, tikinnawatiah ika n tlanawátili non Toteko Cristo Jesús otechmák, mayektekitikah para kimotlaniliskeh tlan kikuaskeh iwa amo makinkuesokah oksikimeh.

¹³ Nokniwah, nochipa xikchiwakah tlan kuali iwa amo ximosotlawakah. ¹⁴ Tla aka amo kichiwa tlan tikijtoah itech nin amatlajkuíloli, kuali xikitakah akí, iwa ayakmó íwa ximonelokah, para ijkó mapinawa. ¹⁵ Amo xikkokolikah, yej xiknonotsakah porke noíwa nomokni.

Pablo momakawa

¹⁶ Inewia Toteko non kitemaka yolsewílistli, manomechmaka iyolsewilis nochipa itech nochí tlan nonpanoskeh. N Toteko nochipa mayeto nomowah.

¹⁷ Ne Pablo, nomechontlajpaloa iwa nomechijkuililia ika noma. Nochteh noamatla-jkuilolwah ijkí nikinmixmachiotia para xikmatikah milák ne nomechintitlanilia.

¹⁸ N Toteko Cristo Jesús manomechmaka itiochiwalis nochteh nomejwah.

San Pablo sakinika kitlajkuilia n Timoteo

Pablo kitlajkuilia n Timoteo

¹ Ne Pablo, ni itlatitlanil Cristo Jesús ika itlanawatil Dios Totemakixti iwa Cristo Jesús, Akin itech timoyolchikawah. ² Nimitsontlajkuilia Timoteo, akin otimochiwako tinokone ken otikneltokak Cristo Jesús ikuak ne onimitsmatilti itlajtol. Dios Totajtsi iwa Cristo Jesús Toteko mamitstlasojtlakah iwa mamitstiochiwakah iwa mamitsmakakah yolsewílistli.

Monextiskeh tlamachtijkeh tekajkayajkeh

³ Ikuak onia Macedonia, onimitstlatlauji ximokawa Éfeso iwa xikinnawati sikimeh tlakah amo makitemachtkah ok se tlamachtílistli, ⁴ nion makinkakikah tlájtolteh tekamanalwijkeh noso kenijki okichiwayah intatawah ikuak onemiah. Noni san kichiwa mamokualanikah iwa amo techpalewiah matikchiwakah n tekitl non Dios otechnawati matikchiwakah ika tlaneltokálistli.

⁵ Tlan axa nomechnawatijtok, nikneki xikajskamatikah nonkipiah nonmotlasojt-laskeh ika nomoyolo chipawak, kemi tetlasojothal akimeh kipiah intlalnamikilis iwa intlaneltokalis chipawak. ⁶ Sikimeh yokikakajtekkeh nochi tlan kuali, iwa yomoix-polokeh itech nonteh tlájtolteh non amitla impati. ⁷ Yejwah kinekih kitemachtiskeh intlanawatil,* pero nion yejwah innewiah kajsikamatih, amo milák tlan kitemachtiah ika nochi inyolo.

⁸ Tikmatokeh milák kuali itlanawatil Moisés tla se kiyektektiltia kemi Dios kimonek-iltia. ⁹ Noiwa tikmatokeh n tlanawátili mach omoikuilo para akimeh kichiwayah tlan kuali. Yej omoikuilo para non amo teneltokakeh, iwa n tlajtlakolchijkeh, non amo kineltokah Dios iwa fiero kitenewah. Noiwa para non kinmiktiah intajwah, iwa nochteh n temiktjkeh, ¹⁰ noiwa para non ayamó monamiktiah iwa ya pewe momekatiah, iwa n tlakah non kinwilitah tlakah, iwa n kinmichtekih tlakah iwa satepa kinnamakah, noiwa akimeh xolopijtinemih, akimeh kijtojinemih itla tlan amo milák. Nochteh ninteh tlajtlákolteh kixpanawiah n chipawak tlamachtílistli. ¹¹ Ye ni tlan kitemachtia n kualitlajtoli non kuajkualtsi iwa techmakixta, non Dios weyijkatitok onechnawati manitetlapowi.

Pablo motlasojkamati ken Dios teiknomati

¹² Niktlasojkamati n Toteko Cristo Jesús, Akin onechmák chikawálistli para manitetlapowi de itlajtol, porke Ye okitak nikmati niktlakita. ¹³ Achto fiero onitlajtoaya de Cristo iwa onikintotojtokaya iwa onikinwijwikaliya akimeh okineltokayah. Dios onechiknoma maya ne ayamó onikneltokaya, iwa mach onikmatia tlan onikchiwaya. ¹⁴ Ijkó kiné, n Toteko onechiknoma, yika satlawel onechtiochi iwa ijkó manikneltoka iwa manitetlasojtla kemi Cristo Jesús.

¹⁵ Nin tlájtoli milák, iwa nochteh kipiah kineltokaskeh: Cristo Jesús owala nika itech tlaltípkaktli okinmakixtiko n tlajtlakolejkeh, iwa ne okachi nitlajtlakolchi de nochteh n tlajtlakolchijkeh. ¹⁶ Yika, ken ne onikatka okachi amo nikuali, Dios onechiknoma iwa ijkó notech okiteititi kenijki tetlasojotha. Ijkó akimeh kineltokaskeh kipiaskeh yolílistli non ayik tlami. ¹⁷ ¡Yika, matiktlakitakah iwa matikweyilikah Torey non nochipa yolitok, iwa ayik miki, non amaka kitika, non sanwel Ye Dios! ¡Ijkó mamochiwa!

¹⁸ Timoteo nokone, nikneki kuali xikchiwa tlan nimitsnawatia iwa xiktlanili tlan amokuali ika motlaneltokalis iwa ika kuali motlalnamikilis, ijkó kemi n profetas okitenkixtjkeh tlan Dios okinmili tikchiwaskia. ¹⁹ Amo xikchiwa kemi sikimeh non amo okinekeh okikakeh intlalnamikilis iwa ijkó okipolojkeh itlaneltokalis. ²⁰ Ijkó okichijkeh

* ^{1:7} Porke nomejwah nonkikawah tlan Dios technawatia, matikchiwakah iwa san nonkitlakitah tlan okichiwayah nomotatawah. Xikamapa Marcos 7:8-13.

n Himeneo iwa Alejandro, non ne onikintemák imak satanás para mamomachtikah amo fiero makitenewakah Dios.

2

Keniji moneki timotiotsajtsiliskeh

¹ Ne nomechtlanilia ximotiototsajtsilakah por nochteh n tlakah, noiwa xiktlajtlanilikah Dios makintiochiwa iwa makimpalewi itech tlan kimpoloah. Nochipa ximotla-sojkamatikah. ² Ximotiototsajtsilakah por akimeh nomechnawatiah iwa por nochteh n tekiwajkeh, para matiyetokah ika pakílistli iwa mayeto yolsewílistli, iwa matinemikah ika toyolo chipawak inawak Totajtsi Dios itech nochti tlan tikchiwah. ³ Porke ye ni tlan kuali iwa kiyolpaktia Dios Totemakixti, ⁴ Ye kineki mamomakixtikah nochteh iwa makixmatikah tlan milák. ⁵ Sanwel onka se Dios, iwa sanwel se Tlakatl weleti kintlajtolpalewia n tlaltikpaktlakah para Dios makintlapoipolwi: non Tlakatl, Ye n Cristo Jesús. ⁶ Cristo Jesús omotemák makimiktikah para tinochteh otechtlaxtlawili totemakixtilis, iwa nochti noni omoteixmatilti keman oajsik non tonati. ⁷ Yika Dios onechtlali manitetlapowi itlajtol iwa maniyeto itlatematilti, para manikinmachti n kualtlájtoli non amo judíojteh. Amo nitlakajkayawa, milák tlan nikijtoa.

⁸ Yika, sentetl nikneki mamotiototsajtsilakah n tlakah. Iwa ikuak motiototsajtsiliskeh, makinkakukuiyah inmawah ika inyolo chipawak, amo makichiwakah ikuak kualan-tokeh noso ikuak mokuakualanitokeh. ⁹ N siwameh makimotlalilikah intlakeh kemi Dios tlanawatia, iwa amo mamochijchiwakah ika tlakemitl patio, ika oro, ika perlas, amo satlawel makiyektlalikah intsonkal para moweyiliskeh. ¹⁰ Okachi kuali, n tokniyah makinmitakah por tlan kuali kichiwah, kemi moneki makichiwakah n siwameh non ya kitlakitah n Totajtsi Dios. ¹¹ Noiwa n siwameh ikuak moololoah para kikakiskeh itlajtol Dios, moneki san matlakaktokah iwa makimatkah matetlakitakah. ¹² Porke ne amo niktekawilia se siwatl matlamachti nion makinawatijo n tlakatl, yej san mamokajtia. ¹³ Porke Dios achto okichijchi Adán, iwa satepa n Eva. ¹⁴ Amo okikajkayajkeh Adán, yej Eva, iwa ikuak okikajkayajkeh n siwatl, ikuakó oneski n tlajtlákol. ¹⁵ Pero n tesiba momakixtis tla kuali kinmokuitlawis ipilwah, tla kineltokas Toteko Cristo Jesús, tla tetlasojtla, tla nemis ika iyolo chipawak iwa mayeto yekmilajka.

3

Kenomi moneki manemikah n tlayakankeh

¹ Nin tlájtoli non axa nomechilis, milák: tla aka kineki kinyakanas n tokniyah non kineltokah Cristo Jesús, kuali tekitl kineki kichiwas. ² Yika, akin kinyakantinemi n tokniyah, moneki yetos se tlakatl yekmilajka para amaka makiteili tenawak. Non tlakatl makipia san se isiya, iwa mayeto tlalnamikiliso. Noiwa mayeto yekmilajka iwa kuali mamoyekkuika iwan oksikimeh. Nochipa makinyekseli icha akimeh kontlajpalooah, iwa makimati keniji temachtis. ³ Amo matlawana nion san mamokualanijtinemi. Mayeto se kuali tlakatl teyolsewi, iwa amo san makilnamikto n tomi. ⁴ Makimati keniji tlanawatis itech icha, iwa makinmitti ipilwah mateneltokakah iwa matetlakitakah. ⁵ Porke tla se amo kimati kenomi kinyakanas non de icha, amo weletis kinyakanas non moololoah itech Itoka Cristo Jesús. ⁶ Yika, se tlayákanki amo mayeto se non sikan okineltokak Cristo Jesús, amo kichiwa pewas moweyilis iwa wetsis kemi owetski n amokualitlakatl. ⁷ Noiwa se tlayákanki moneki mayeto se akin noiwa makitlakitakah non amo kineltokah Dios, para amo fiero matlajtokah de ye iwa ika no mawetsiti imak n amokualitlakatl.

Kenomi moneki manemikah non tlapalewiah kan mooloah

⁸ Ijkó noiwa akimeh kimpalewiah n tlayakankeh moneki nochteh makinyektlakitakah, makichiwakah tlan kijtoah, amo matlawanakah, nion makitlawelnekikah kitlaniskeh tomi non amo ika kuali motlani. ⁹ Makitlakitakah itlajtol Dios non otomechmatiltjkeh, iwa tejwah tikneltokah. Noiwa makipiakah intlalnamikilis chipawak. ¹⁰ Achto makinyejyekokah kox weletis kichiwaskeh non tekitl, iwa tla nonteh tlakah kuali kichiwah

inteki, ikuakó makintlalikah matekitikah. ¹¹ Insiwa nonteh tlapalewijkeh kipiah de kintlakitaskeh iwa amo matepojpojinemikah, nion matlakajkayawakah. ¹² N tlapalewi moneki makipia san se isiwa, iwa makimati kenijki kinyakanas ipilwah iwa nochteh non de icha. ¹³ Porke n tlapalewijkeh non kiyekchiyah inteki, kimotlaniliyah tlakitálistli iwa ijkó okachi moyolchikawah kintlalwiskeh oksikimeh noiva makineltokakah Cristo Jesús.

Semi weyi tlan Dios otechnextili

¹⁴ Niknekton nias totoka nimitsontlajpaloti, achto nimitstlajkuililia. ¹⁵ Porke tla ok niwejkawas nika, nikneki xikmati kenomi moneki timoyekwikas iwa n tokniyah non kineltokah Cristo Jesús. Yejwah akimeh kimajmanah itlaneltokawah Dios, Akin milák yolitok. Iwa ninteh kitlakxilijtok iwa itech mokitskijtok tlan milák. ¹⁶ Tinochteh tikmatokeh nik weyi kijtosneki tlan Dios otechnextili itech tlan axa tikneltokah:

Ye omochiwako tlakatl, iwa omonextiko tonawak;
n Espíritu okiteixpanti yolchipawak
iwa n ángeles okitakeh.

Otetlapowijkeh de Ye kan chantitokeh non amo judíojteh.

N tlaltikpaktlakah okineltokakeh
iwa Totajtsi Dios okiseli kan ilwikak.

4

Itech iksemi tonatijmeh miakeh ayakmó kineltokaskeh n Cristo Jesús

¹ N Espíritu techyekmatiltia itech iksemi tonatijmeh sikimeh mach ok kineltokaskeh. Yej okachi kintlakitaskeh espíritus tekajkayajkeh iwa intlamachtilis n demonios.

² Kinkakiskeh n íxkopteh iwa tekajkayajkeh, nonteh ayakmó pinawah ikuak kichiwah tlan amokuali, ken sepowi intlamamikilis kemi ikuak sepowi se toma noso se tokxi.

³ Nonteh tlakah tekajkayajkeh mach ok kitekawiliskeh se mamonamikti, nion se makikua itla tlákuali, maya Dios okichijchi noch iwa mokua. Akimeh kineltokah iwa akimeh kixmatih tlan milák, makitlasojkamatikah iwa makimomajsewikh. ⁴ Nochi tlákuali non Dios okichijchi, kuali se kimomajsewikh. Yika, amo ik nepa xiktlalikah, yej xikselikah iwa xiktlasojkamatilikah n Totajtsi Dios. ⁵ Porke ika itlajtol Dios iwa ika tiotsajtsílistli, n tlákuali mokawa chipawak inawak Dios.

Se kuali tékitki de Cristo Jesús

⁶ Tla tikinmachtis n tokniyah noch iwa nimitsilijtok, te tiyetos se kuali tlakewale de Cristo Jesús. Ijkó okachi timochikajtias ika n kualitlájtoli non tejwah tikneltokah iwa ika noch ika tlamachtílistli non otimitsmachtijkeh iwa te tikneltokatiwits. ⁷ Pero amo xikinneltoka n tlapoálisteh non amitla tepalewiah iwa san tekuatlapololtiah. Te okachi ximomachti kenomi timotemakas ika noch moyolo imak Dios, ⁸ tla tiktektiltiah tokuerpo iwa tikchijchikawah, okachitsi techpalewia, pero tla timosenmakaskeh imak Dios okachi techpalewis, porke techmakas noch iwa kuali axa ikuak tiyolitokeh, iwa satepa ikuak oksepa timoyolitiskeh. ⁹ Nin tlájtoli milák iwa moneki nochteh makineltokakah. ¹⁰ Por noni, tejwah titekitih chikawak maya fiero techtoktiah, porke timochixtokeh itech Totajtsi Dios non yolitok, Ye Akin techmakixtia, iwa okachi nekateh akimeh kimopantiah.

¹¹ Ye ni tlan moneki tikinnawatis. ¹² Amitla xikchiwa tlan ika weletis tlajtoskeh fiero de te por ok titélpochtli. Yej motech makitakah n tokniyah

kenijki kipiah de tlajtoskeh,
kenijki yeknemiskeh,
kenijki tetlasojtlaskeh,
kenijki kipiaskeh tlaneltokálistli iwa
kenijki nemiskeh ika inyolo chipawak.

¹³ Asta keman maniajsiti ompa, te nochipa xikimpoilijo n kualitlátoli nochteh n tokniwah xikinyolchikawa iwa xikinmachtí. ¹⁴ Xitekiti ipan tekitl non Dios omitsmák ikuak tokniwah non tlayakantokeh motech okintlalijkeh inmawah. *2 Ti. 1:6*

¹⁵ Xikmosenmaka nochí tlan yonimitsnajnawati, iwa ijkó nochteh kitaskeh tityekchiwa moteki. ¹⁶ Ximotlachili te monewia iwa kuali xikita tlan tiktemachtia, iwa ayik ximosojsotlawa. Tla ijkó tikchiwas, amo san te timomakixtis, yej noiva momakixtiskeh akimeh mitskakiskeh.

5

Kenomi moneki timowikas iwa n mokniwah tlaneltokakeh

¹ Amo xikajwa se non ya tetajtsi, okachi kuali xikyeknonotsa kemi yetoskia mota, iwan telpokameh xikinyeknonotsa kemi yetoskia mokniwah. ² Noiwa n tenantsitsinteh xikinyeknonotsa kemi yetoskia mona, iwan ichpokameh xikinnonotsa ika moyolo chipawak kemi yetoskiah moweltiwhah.

³ Xikimpalewi n iknosiwameh non milák amo kipiah akin kimpalewis. ⁴ Pero tla se iknosiwatl kimpia ipilwah noso ixwiwah, yejwah moneki kipalewiskeh iwa kintlasojtlaskeh intajwah, ijkó kinkopiliskeh n tlasojtlálistli non intajwah yokinmakakeh. Ijkó kipaktiskeh n Toteko Dios. ⁵ Se iknosiwatl non milák yomoka iselti, kitlalia itlaneltokalis inawak Dios, tlajka iwa n yuak motiotsajtsilia iwa kichia makipalewi. ⁶ Pero n iknosiwatl non san mokalakijtinemi iwan tlakah, miktok inawak Dios maya ok yolitok. ⁷ Nochi ni xikinnajnawati para amaka fiero makintenewah. ⁸ Porke tla aka amo kimpalewia non ken kimita, iwa okachi tla amo kimpalewia non de icha, non tlakatl inewia kitenextia mach milák tlaneltoka iwa okachi amokuali kichijtok ke non amo kineltokah n Toteko Dios.

⁹ N iknosiwatl non tkmachotis makipalewikah itech tiopa, moneki mayeto se non ya kipia eyi póali (60) xiwitl iwa ikuak omoka iselti ayakmó oksepa omonamikti. ¹⁰ Mayeto se siwatl non mamoixmato ika tlan kuali okichi, kijtosneki, kuali okinyayákanki ipilwah, otekalotiaya icha, okimpakiliaya inmikxiwah n tokniwah non kineltokah Cristo Jesús. Noiwa ye okimpalewia akimeh otlijyowiayah, noso itla ok se kuali tekitl okitechiwili.

¹¹ Amo xikinmachotikah n iknosiwameh non ayamó kipiah eyi póali (60) xiwitl. Porke ikuak kinyoltiana tlan kelewia inkuerpo, mach ok kinekih kimopantiskeh Cristo iwa oksepa kinekih monamiktiskeh, ¹² ijkó san yejwah motlajtlakolmamaltiah porke amo kichiwhah tlan okisentlalijkeh kichiwaskeh inawak Dios. ¹³ Iwa okachi mokopah tlatsijkeh iwa pewah techankajkalaktinemih, iwa amo san tlatsijkeh, yej noiva mokopah xolópijteh, iwa san kan yetos mokajkalakijtinemih iwa tepojpojinemih iwa kijtojtinemih tlan amo inteki. ¹⁴ Yika ne nikneki non omokajkeh iknosiwameh iwa ok ichpochtikeh, mamonamiktkah, makimpiakah impilwah, iwa makiyekmokuitlawikah incha para amaka makimpojpoa. ¹⁵ Porke sikimeh iknosiwameh ayakmó kineltokah Cristo yej kichiwhah tlan kipaktia satanás.

¹⁶ Tla se siwatl non yokineltokak Cristo, kipia se iknosiwatl non ken kita, moneki kipalewis, para amo makintekimaka n tokniwah. Ijkó yejwah weletiskeh kimpalewiskeh n iknosiwameh non milák amo kipiah akin kimpalewis.

¹⁷ N tlayakankeh non kichiwa kuali inteki, moneki okachi makintlakitakah. Okachi non kitematiltiah iwa kitemachtiah itlajtol Dios. ¹⁸ Porke itlajkuilol Dios kijtoa: “Amo xiktlalili itempoxa n toro ikuak kitlajtlaksatok n trigo.” *Dt. 25:4* Noiwa kijtoa: “N tlakéwale moneki makimakakah itlaxtlawil.” *Lc. 10:7*

¹⁹ Tla seme de nomejwah wits kiteiliki se tokni non tlayakantok, amo san nima xiktlajtlakoltikah tla amo onkateh ome noso eyi akimeh makijtokah tlan milák. ²⁰ Pero akimeh ok kichijtinemih tlajtlákoli, xikinmajwa ixpa n nochteh, ijkó n oksikimeh tokniwah non kineltokah Cristo Jesús mamawikah iwa amo matlajtlakolchiwakah. ²¹ Nimitsnawatia ixpa n Dios, ixpa n Toteko Cristo Jesús, iwa ixpa iangelwah yolchipawakeh, xikchiwa nochí tlan yonimitsnawati, iwa amo san xikpejpena tlan mitspaktia tikchiwas. ²² Ikuak

tikpejpenas se tlayákanki, kuali xikixmati akin tiktlalia, porke tla non tokni kichiwa tlan amo kuali, te noiya mitsonwilanaskeh. Te nochipa xikchiwa tlan kuali.

²³ Kemi nochipa mitskokojitiwits moihti, ayakmó xikoní san atl, noijki xikoní achitsi vino.

²⁴ Intlajtlakolwah sikimeh tlakah san nima motah maya ayamó kintlatsintokiah, pero intlajtlakolwah n oksikimeh, mach niman motah, yej satepa. ²⁵ Ijkó noiya, san nima momati ikuak se kichiwa tlan kuali, iwa kualchiwa maya amo san nima mota tlan kuali se kichiwa, amo weletis tlaatitos nochipa.

6

¹ N tokni non kineltoka Cristo iwa kajki kemi se tlanémaktli,* moneki makitlakita kuali iteko, iwa ijkó amaka fiero kitenevas Itoka Totajtsi Dios nion tlan tiktemachtiah.

² Iwa akimeh tekítih inawak se tekowa non kineltoka n Toteko Jesús, moneki okachi makiyektlakitakah porke noiya tlaneltokakeh. Iwa okachi moneki kiyektektiliskeh, porke akin kitekitilijtokeh, noiya se non kineltoka n Toteko Dios.

Tlan okachi ipati

Xiktemachtia iwa xiktetlapowi de nin tlájtoli. ³ Tla aka tlamachtia iwa amo ye tlan milák itlajtol Cristo Jesús, amo ye tlan kitemachtia n kualitlátoli non tejwah tlaneltokah.

⁴ Akin ijkó tlamachtia mach itla kímati iwa satlawel moweyilia. Ye mochiwa kemi se kokólistli porke nochipa motlanetewiltijtok ika oksikimeh tlájtoltéh, yika wits n nexikólistli, moxexeloah, fiero motenewah iwa ayakmó moneltokah, ⁵ iwa nochipa mokuakualanijtinemih porke amo kuali intlalnamikilis iwa amo kixmatih tlan milák. Non temachti kiyeyjekolia weletis motomintis ika itlajtol Dios. ⁶ Milák, miak ipati iwa techpalewia n kualitlátoli non itech titlaneltokah, pero sanwel akin yolpaki ika tlan kipia. ⁷ Tejwah amitla otikwalikakeh itech nin tlaltípkaktli iwa amitla weletis tikwikaskeh. ⁸ Yika, tla tikpiyah tlan tikkuskeh iwa tlan tilmokentiskeh, san ika ye matipakikah. ⁹ Pero akimeh kinekih motomintiskeh, wetsih imak n tlajtlácoli porke san tlan kajsih pewa kichiwha para okachi kitlaniskeh tomi. Yika nochí no kinkuatlapololtia, iwa mixpojpoloah. ¹⁰ Yika keman se kitlalia iyolo itech tomi, pewa kichiwa nochí tlan amokuali. Miakeh kikawah Dios, iwa san yejwah innnewiah kimotetemiliah intlaijyowilis.

Pablo kiyolchikawa n Timoteo

¹¹ Pero te Timoteo, te titlakatl de Dios, xikcholili nochí ni iwa nochipa ximilajanemi, ximotemakti inawak Dios iwa kuali xitlaneltoka, xitetlasojtla, xikxiko nochí tlan tipanos, iwa ayik ximoweyitlali.

¹² Ximochijchikawa itech motlaneltokalis, iwa xikmoaxkati tlan ika tiyolitos nochipa, non ika omitsotskeh iwa inmixpa n miakeh tokniwha otikijto titlaneltoka. ¹³ Axa, ixpa n Totajtsi Dios, akin kitemaka yolílistli itech nochí tlan onka, iwa ixpa n Cristo Jesús, akin noiya kuali otlajto iyakapa n Poncio Pilato, ne nimitsnawatia ¹⁴ xiktlakita nochí tlan nimitsilia para amaka mamitsixnamiki. Ijkó xikchijto asta mawalmuika Toteko Cristo Jesús. ¹⁵ Ikuak ajsiki non tonati, Dios kinextis n Tlakatl tlatichiwali iwa weletini, Ye n Rey Akin kinnawatijtok nochteh n reyes iwa Tekowa de nochteh n tekowajkeh. ¹⁶ Sanwel Dios Ye Akin ayik mikki, iwa kajki ijtik tlawilnextílistli kan amaka weleti mijkuania. Amaka tlakatl yokitak nion weletis kitas. ¡Nochipa iaxka n weyílistli iwa n weletílistli! Ijkó mamochiwa.

* 6:1 Tlanémaktli: Achto ikuak se tlakatl okitewikiliaya miak tomi iwa ayakmó okikopaya, okinamakaya. N tlakatl non okitewikiliaya non tomi, okinamakaya kemi yolkameh monamakah. Iwa ijkó okimokopiliaya itomi, iwa ikuak okitekitiliaya n tlakatl non okiko amitla okitlaxtlawiaya. Iwa okipixtoka itech icha iwa okitekitiliaya san tlan oras okinekia porke amo okipixtoka kemi se tlakéwale yej kemi se tlanémaktli.

¹⁷ Akimeh kitlawelpiah tomi itech nin tlaltípkaktli, xikinnawati amo mamowey-ijkamatikah, nion makitlalikah inyolo itech tlan kipiah, porke noni kigmati tlami. Okachi kuali, makitlalikah inyolo itech Totajtsi Dios, Akin yolitok iwa techmaka nochitlan techpoloa para matipaktokah. ¹⁸ Xikinnawati makichiwakah nochipa tlan kuali, makitemakakah iwa makixexelokah tlan kipiah, iwa ijkó motomintiskeh inawak Dios. ¹⁹ Ijkó, kipiaskeh kan ilwikak tlan ayik kipolos ipati, iwa kipiaskeh n nemílistli non ayik tlami.

²⁰ Timoteo, kuali xikchiwa tlan Dios omitsnawati. Amo xikinkaki oksikimeh tlájtolteh non amitla impati, nion tlájtolteh tekuatlapololtijkeh. N tlaltípkaktlah kimoliah kuali tlamáchtilli, san ika noni moixkajkayawah. ²¹ Porke sikimeh non okineltokakeh non tlamáchtilli amo kuali, omoixpolojkeh iwa ayakmó tlaneltokah.

Itiochiwalis Dios mayeto nomowah.

San Pablo ojpa kitlajkuililia n Timoteo

Pablo kitlajkuililia n Timoteo

¹ Ne Pablo ni itlatitlanil n Cristo Jesús, Dios ijkó okimonekilti maniktematilti nin yankuik nemílistli non Dios okijo kinmakas akimeh milák kineltokaskeh n Cristo Jesús.

² Nimitstlajkuililia nin amatlajkuíloli te notlasojkone Timoteo, nimotlatlaujtia inawak Dios Totajtsi iwan Toteko Cristo Jesús mamitsmakakah tlatichiwálistli, teiknomatílistli iwa yolsewílistli. ³ Nochipa nimitsilnamiki ikuak nimotiotssajtsilia, tlajka iwa n yuak nimotlasojkamati inawak Notajtsi Dios Akin niktekitilia ika chipawak notlalnamikilis kemi okichijkeh notatawah. ⁴ Ikuak nikilnamiki kenikki otichokak, niknekiskia oksepa nimitsitas iwa ijkó niyolpakis. ⁵ Porke nikilnamiki kenikki milák ika nochí moyolo tikneltoka Dios, ijkó kemi oyektlaneltokakeh monanatsi Loida iwa mona Eunice, iwa ne kuali nikmatok te milák titlaneltoka.

⁶ Yika nimitsilnamiktia xiktekitilti n weletílistli non Dios omitsmák ikuak mopa onimitsintlalili nomawah. ⁷ Dios amo otechmák Iespíritu para matimaujinemikah, yej para matikpiakah weletílistli, matitetlasojtlakah iwa matikmatikah matikxikokah tlan amo kuali techtuktiah. ⁸ Yika, amo xipinawa tiktetlapowis itlajtol Toteko Jesús, nion xipinawa tla nitsaktok. Yej ika iweletilis n Totajtsi Dios xikxiko n tlaijywílistli por tiktetlapowia n kualitlájtoli. ⁹ Dios otechmakixti iwa otéchnotski matinemikah ika toyolo chipawak. Amo por otikchijkeh itla kuali, yej porke Dios ijkó okimonekilti, iwa por ikualtilis non techpialia ken tiseititokeh inawak Cristo Jesús, desde ikuak ayamó okatka nin tlaltípkaktli. ¹⁰ Iwa axa Dios okiteititi itlasojtlalis ikuak owala Totemakixti Cristo Jesús, Akin okitlanki iweletilis n miklistli, iwa por n kualitlájtoli non temakixtia, okitenexti n nemílistli non ayik tlamic.

¹¹ Dios onechtlali maniktematilti nin kualitlájtoli, Ye onechtítlanki kemi itlatitlanil iwa tlamachti inawak non amo judíos. ¹² *1Ti. 2:7*

¹² Yika, ne nitlaijywia, iwa mach nipinawa, ne kuali nikmati akin inawak nitlaneltoka. Noiwa kuali nikmatok Ye kipia weletílistli para kimokuitlawis tlan yoniktlali imak, asta neká tonati ikuak oksepa wits Cristo.

¹³ Nochipa xikinmachti n kualitlájtoli non ne onimitsmachti, iwa xinemi ika tlanel-tokálistli iwa tlasojtlálistli non tikpiyah por tiseititokeh iwan Cristo Jesús. ¹⁴ Ika ichikawalis n Espíritu Santo non kajki itech toyolo, xikmokuitlawi n kuali tlamachtílistli non Dios omitsmactli.

¹⁵ Ijkó ken te ya tikmati, nochteh n tokniwah non chantitokeh Asia onechkakajtejkeh, noiwa n Figelo iwa n Hermógenes. ¹⁶ N Toteko makimiknomati ichanejkawah Onesíforo, ye miak welta onechyolchika, iwa amayik opinawak ikuak onechitak nitsaktok.

¹⁷ Yej ikuak okatka Roma, onechtemojtínenki, iwa amo omosewi asta onechajsik. ¹⁸ N Totajtsi Dios makiknomati n Onesíforo itech iksemi tonati. Timoteo te kuali tikmati kenomi miak otechpalewih n tokni Onesíforo ompa Éfeso.

Xiyeto se kuali isoldado n Cristo Jesús

¹ Te nokone, ximoyolchikawa por tikpiyah ikualtilis Cristo Jesús. ² Tlan te yotechkakili onikijto inmixpah miakeh tlaneltokakeh, noni xikinmachti n tokniwah non milák motemaktiah inawak Dios, ijkó yejwah noiwa kinmachtiskeh oksikimeh.

³ Ijkó kiné, te xikxiko nochí tlaijywílistli, kemi se kuali soldado de Cristo Jesús.

⁴ Nion se soldado weleti mokalakia itech ok se tektil, porke sa mochixtok kichiwas tlan kinawatis akin kiyakana. ⁵ Ijkó noiwa, se non motlatlani iwan oksikimeh, amo kimakah tlan okimotlanili, tla amo okichi kemi omonekia kichiwas. ⁶ Akin tekiti itlala, kuali

makikua achto tlan kitooka. ⁷ Kuali xikyejyekoli tlan nimitsilijtok, iwa Toteko Cristo Jesúis mitsajskamatiltis nochi.

⁸ Xikilnamiki n Cristo Jesúis non walewatok de Rey David, iwa omoyoliti intsalko mikemeh ijkó kemi kijtoa n kualitlátoli non ne niktemachtia. ⁹ Por niktemachtia nin kualitlátoli axa nitlaijyowia, nitsaktok iwa nechixilpiyah ika kadena kemi niyetoskia se temikti. Pero itlajtol Dios amo ilpitok. ¹⁰ Ika no, nochi nikxikoa por akimeh Dios okimpéjpenki. Ijkó yejwah kipiaskeh n temakixtílistli non techmakah Cristo Jesúis iwa ijkó tiyetoskeh nochipa itech imawistilis non ayik tlami.

¹¹ Tlan kijtoa nin tlájtoli milák:

Tla yotimikeh iwan Cristo,
noiwa tiyolitoskeh iwan Ye.

¹² Tla tikxikoah n tlaijyowílistli,
noiwa titlanawatiskeh iwan Ye.
Tla tikitoham oti tixmatih,
Ye noiwa kijtos amo techixmati.

¹³ Maya tejwah amo tikchiwah tlan otikilijkeh,
Ye kichiwa tlan kijtoa,
porke Dios ayik motlajtolpatla.

Xiyeto se kuali tékitki

¹⁴ Xikinmilnamikti n tlaneltokakeh tlan nimitsilis, iwa ixpa n Totajtsi Dios xikinnaj-nawati amo mamotlatlajtolkopakah ika tlájtoltéh non amitla impati, nonteh tlájtoltéh san kinkuatlapololtiah akimeh kinkakih. ¹⁵ Ximochijchikawa xikchiwa tlan kuali, ijkó weletis timoyekixpantis inawak Dios kemi se kuali tékitki non amo kipia tlan ika pinawas, porke tikyektektilia n kualitlátoli non techmatiltia tlan milák. ¹⁶ Amo ximotlatlajtolkopa ika tlájtoltéh non amitla impati, porke akimeh ijkó tlajtoah okachi mokajkawah itech tlan amokuali, ¹⁷ iwa intemachtilis pewas moxijxitinis kemi itla kokólistli non kipalanaltia tokuerpo. Himeneo iwa n Fileto ijkó kichijtinemih, ¹⁸ porke mach ok kitemachtiah tlan milák, iwa kijtojtinemih yopanok n tonati ikuak Dios kinyolitis n mikemeh, iwa ijkó kinkuatlapololtiah sikimeh intlaneltokalis. ¹⁹ Pero itlajtol Dios kajki kemi se tetl non tetlakxilia, iwa kipia se neskayotl: “N Toteko kinmixmatok nochteh iaxkawah”; ^{Nm. 16:5} noiwa kijtoa: “Nochteh akimeh kitenewah itoka n Toteko kipiah kikawaskeh nochi tlan amokuali.”

^{Nm. 16:26}

²⁰ Itech se weyi kali, amo sanwel onkateh xoktsimeh de oro iwa plata, noiwa onkateh de kuawitl iwa tepalkatl. Non patiokeh, motekitiltiah san itech itla ilwitl, iwa non amo patiokeh, nochipa kintekitiltijokeh. ²¹ Yika, tla se kikawa nochi tlan amokuali, yetos kemi se xoktsi non patio imak Toteko Dios, Ye kitekitiltis itech nochi kuali tekitl.

²² Xikcholili tlan amokuali kinyoltilana n telpokameh. Te nochipa xikchiwa tlan kuali, nochipa xitlaneltoka, iwa ika tlasoxtlálistli iwa yolsewílistli ximowika iwa akimeh ika inyolo chipawak kitenewah itokah n Toteko. ²³ Amo xikinkaki tlájtoltéh non amitla impati iwa tekuatlapololtia, porke ya tikmatok sanwel ika se mokualania. ²⁴ Se itékitki n Toteko mach kinamiki mamokualanijtinemi, yej moneki mamoyekwika iwan nochteh. Makimati kenomi tlamachtis iwa makixiko ikuak itla kitoktiah. ²⁵ Iwa ika iyamankatljtol makinnonotsa akimeh amo kinekih tetlakitaskeh, iwa ijkó chamo Dios kinkawilis mamoyolpatlakah para makimatikah tlan milák. ²⁶ Ijkó makimatikah keniji momakixtiskeh de imak n diablo non kinkitskijtok iwa kintoktia makichiwakah san tlan ye kineki.

Kenomi yetoskeh n tlaltikpaktlakah itech iksemi tonatijmeh

¹ Timoteo, noiwa moneki xikmati, itech iksemi tonatijmeh yetos miak tlaijyowílistli.

² N tlakah yetoskeh xíkojteh, satlawel kiwilitaskeh tomi, moweyiliskeh iwa xaxankuatiskeh. Tlajtoskeh fiero de Dios, iwa mach kintlakitaskeh intajwah. Amo kimatiskeh

motlasojkamatiskeh iwa mach ok kitlakitaskeh Dios. ³ Mach kimatiskeh tetlasojtlaskeh nion tetlapojpolwiskeh. Satlawel kiwilitaskeh topojoaskeh iwa amo kixikoskeh tlan amokuali kelewis inkuerpo, tetlaijyowiltiskeh iwa kikokoliskeh tlan kuali. ⁴ Yetoskeh teichtakawijkeh, ayakmó pinawaskeh nion mach itla kixmawiliskeh. Moyolpaktijtine-miskeh ika tlan amo kuali kelewiea inkuerpo, iwa ayakmó kitemoskeh Dios. ⁵ Kichiwaskeh kemi yetoskiah de milajka kineltokah Dios, pero ika tlan kichiwaskeh moixmatiskeh amo milák kineltokah. Iwa nonteh amo inwah ximowika.

⁶ Porke sikimeh de nonteh tlakah kiwilitah techankajkalaktinemiskeh, ika kinkajkayawaskeh n siwameh non amo tlalnamikilisejkeh iwa tlajtlakolejkeh. Ninteh siwameh nochipa kinekokeh mopaktiskeh ika tlan inkuerpo kineki. ⁷ Nochipa momachtijtokeh, pero mach ayik weletih kajsikamatih tlan milák. ⁸ Ijkó kemi Janes iwa n Jambres okixnamikeh n Moisés, ijkó noiva nonteh tlakah kitlawelitah tlan milák. Nonteh tlakah ayakmó kuali tlan kiyeyekolah iwa mach weletih kajsikamatih itlajtol Dios. ⁹ Nonteh mach wejka kalakitiweh, porke nochteh kinmitaskeh kuatlapolojtokeh, ijkó kemi omochijkeh n Janes iwa n Jambres non okixnamikeh n Moisés.

Pablo kinajnawatia n Timoteo

¹⁰ Te tikchijtiwits tlan onimitsmachti, tikmati kenomi niyeknemi, tikmati tlan nikneki nikchiwas, tikixmati notlaneltokalis, tikmati kenomi nikmati nimochia, tikixmati not-lasojtlalis, iwa tikmati kenomi nikxikoa nochi tlan nopa wits. ¹¹ Onechtotojtokakeh iwa onechtaijyowiltijkeh Antioquía, Iconio iwa Listra, iwa nochi tlan nitlaijyowijtiwits pero n Toteko nochipa onechpalewi. ¹² Iwa milák, nochteh akimeh kinekiskeh kimosen-makaskeh Cristo Jesús, san kan yaskeh kintlaijyowiltiskeh. ¹³ Pero non amokualteh iwa tekajkayajkeh okachi kijtlakojtiaskeh inyolo, tlakajkayawaskeh iwa yejwah noiva kinkajkayawaskeh.

¹⁴ Te Timoteo, nochipa xikneltoka tlan omitsmachijkeh, non te yotikyekneltokak. Te kuali tikmatok akin omitsixtlamachti, ¹⁵ desde tiselekonetl tikmatok tlan kijtoa itlajkuil Dios. Ayik xikilkawa tlan kijtoa, porke mitsixtlamachtis iwa mitsmakixtis ken titlaneltoka itech Cristo Jesús. ¹⁶ Nochi tiotlajkuíloli Dios otlanawati makijkuirokah, kuali matechmachtikah, ika matechnonotsakah, ika matechmilawakah iwa matechititikah kenijki tinemiskeh inawak Dios. ¹⁷ Ijkó nochi akin ya tekone inawak Dios, kuali mamoixtlamachti iwa makimati kenijki kichiwas nochi tlan kuali.

4

Nochipa xiktetlapowi itlajtol Totajtsi Dios

¹ Ixpan Dios iwa ixpa n Toteko Cristo Jesús, Akin wits kemi Rey para kintlajtlakoltis non yolitoskeh iwa non yomikkeh, ne saikpanoa nimitstlatlaujtia, ² xiktematilti it-lajtol Dios. Ximochijchikawa xitlajto ikuak kinekiskeh noso ikuak amo kinekiskeh mitskakiskeh. Xikinmajsikamatilti, xikintlakawalti iwa xikinnonotsa, ayik ximosotlawa iwa xikinkajtewiliyi se kuali tlamachtílistli. ³ Porke ajsiki n tonati ikuak mach ok kinekiskeh kikakiskeh n kuali tlamáctili, yej kintemoskeh miakeh temachtijkeh para makimachtikah san tlan yejwah kimpaktis kikakiskeh. ⁴ Ayakmó kikakiskeh tlan milák, yej okachi kinkakiskeh akimeh kimpoah tlapoálisteh non amo milák.

⁵ Pero te nochipa xitlalnamiktinemi, xikxiko nochi tlajiyowílistli, xikmosenmaka xiktetlapowi n kualitlajtoli, iwa nochipa xikyekchiwa n tekitl non Dios omitsmák.

⁶ Ne ya nechmiktiskeh kemi se tlamánali. Ya walajsi n ora para nimikis. ⁷ Ne kuali yonikchi iteki n Dios, kemi se tlakatl non tewa motlatlani, iwa ayik onikpolo notlaneltokalis. ⁸ Axa sa nechchixtok kan ilwikak nokorona non Cristo n teyolsewi yekmilajka nechmakas neká iksemi tonati ikuak Ye wits. Iwa amo san ne nechmaktilis, yej noiva kinmakas nochteh akimeh sa kichixtokeh mawalmuika.

Pablo kinajnawatia n Timoteo

⁹ Xiktemoli keniji san nima techonitaki. ¹⁰ Demas, yonechkakajte, ye okachi okiyoltlanki tlan onka itech nin tlaltípkaktli iwa yoyajki Tesalónica. Crescente oyá Galacia iwa Tito oyá Dalmacia. ¹¹ Sanwel Lucas nowa kajki. Xiktemo n Marcos iwa mowa xikwalika ijkuak tiwits, porke ye weletis nechpalewis itech noteki. ¹² N Tíquico oniktítlanki mawia Éfeso. ¹³ Ijkuak tiwits, techalikili notlakeh non weyak non onikualkajte Troas icha n Carpo. Noiwa techalinwikili noamawah, pero okachi nikneki techalinwikili n ewameh.

¹⁴ Alejandro n teposwitek san miak yonechtokti, n Toteko kitlaxtlawaltis san kemi onechtokti. ¹⁵ Yika, te nojiki ximotlachili de ye, porke kixnamiki tlan tiktemachtiah.

¹⁶ Ijkuak sakinika onimotlajtoltalewi innawak n tekiwajeh, amaka onechpalewi, nochteh onechkakajtejkeh noselti. N Totajtsi Dios makintlapojpolwi. ¹⁷ Pero n Toteko onechpalewi iwa onechmák chikawálistli. Yika, oniwéletki onitetlapowi de n kualitlajtoli non temakixtia iwa onikchi makikakikah nochteh non amo judíojteh. Ijkó Dios onechpalewi iwa amo okitekawili manechmiktakah. ¹⁸ Iwa n Toteko Dios nechmakixtis itech nochti tlan amokuali iwa nechwikas ilwikak kan Ye tlanawatia. ¡Nochipa matikweyilikah Dios! Ijkó mamochiwa.

Pablo iksemi momakawa

¹⁹ Noiwa xikontlajpaloo n Priscila iwa n Aquila, iwa ichanejkawah n Onesíforo.

²⁰ Erasto omoka Corinto, iwa n Trófimo onikualkajte Mileto ken mokokoa. ²¹ Xikchiwa xiwiki achto de mapewa n sewaya. Mitsontlajpalooah n Eubulo, Pudente, Lino, Claudia iwa nochteh n tokniwah non kineltokah Cristo.

²² N Toteko Cristo Jesús mayeto itech moyolo, iwa Dios manomechtiochiwa ika ikualtilis nochteh nomejwah.

San Pablo kitlajkuilia n Tito

Pablo kitlajkuilia n Tito

¹ Ne Pablo, ni itetlakewal Dios iwa ni itlatitlanil Cristo Jesús. Ye onechtítlanki manikintlaneltokti akimeh Dios yokimpéjpenki para kuali makajsikamatikah kenomi tiyeknemiskeh, ² iwa tikchiah nin yankuik nemílistli non Dios non amo tlakajkayawa yotechilih techmakas desde ikuak ayamó okatka nin tlaltípkaktli. ³ Iwa axa, itech ninteh tonatijmeh, Dios Totemakixti otechnextili itlajtol iwa onechmomachiti maniktetlapowi nin tlájtoli. ⁴ Tito, ijkí nimitsontlajkuilia, te tinokone porke san ken tiomeh tikneltokah Dios. Totajtsi Dios iwa Toteko Cristo Jesús mamitstlasojtlakah iwa mamitstiochiwakah iwa mamitsmakah yolsewílistli.

Kenomi moneki manemikah n tlayakankeh

⁵ Ne onimitskajte kan isla de Creta para xikyakatlami n tekitl non ayakmó oniwéletki onikyakatlami, iwa para xikintlali tetajmeh non matlayakantokah kan moololoah n tlaneltokakeh, ijkó kemi onimitsnawati xikchiwa. ⁶ Se akin kinyakanas n tokniwha moneki mayeknemi ika iyolo chipawak ijkó amaka makitlajtlakolti. Amo makajkayawa isiwa, iwa ipilwah makineltokakah Cristo Jesús para amaka makinteili kox amo tetlakitakeh noso teixnamikeh. ⁷ Porke, se akin okitekitlalijkeh makinyakana n tokniwha, imak kipixtok tlan iaxka Dios. Yika nochipa mayeknemi para amaka makitlajtlakolti. Matetlakita, amo mayeto satlawel kuejsi. Amo matlawantinemi nion mamokualanijtinemi, nion makineki tomi non amo chipawak. ⁸ Yej moneki mayeto se tlakatl non ika pakílistli makinseli akimeh kontlajjpaloah icha, makichiwa nochipa tlan kuali, makipia kuali itlalnamikilis, mayeto yolchipawak, mamotemakti inawak Dios, iwa makimati kenomi moyeknawatis. ⁹ Nochipa makitemachti tlan milák kijtoa n kualtlájtoli non okimachtijkeh, para weletis kinyolchikawas oksikimeh ika kuali tlamáchtili, iwa makimati kenomi kinnankilis akimeh kitlajtolkopah.

¹⁰ Porke onkateh miakeh non amo kinekih tetlakitaskeh, iwa tekil kipojtinemih tlan mach itla ipati iwa san tlakajkayajtinemih, ijkó kemi kichiwha akimeh kinekih ok matimosirkunsidarokah. ¹¹ Nonteh moneki matikinkamatsakuakah, porke kinkuatlapololtjtokeh miakeh tokniwha intech inchajcha ika se amo kuali tlamachtílistli san para kitlaniskeh tomi.

¹² Se profeta de ompa Creta, okijo: “N tlakah de Creta xolópijteh, toxkomeh, tlatsíjkeh, iwa sa kemi yolkameh non tekuani.” ¹³ Iwa milák tlan okijo, yika te chikawak xikinnonotsa, para mamochikawa intlaneltokalis inawak Dios, ¹⁴ iwa amo makineltokakah tlan kipojtinemih n judíojteh, nion makintlakitakah akimeh ayakmó kineltokah tlan milák.

¹⁵ Akimeh kipia intlalnamikilis chipawak, nochi tlan onka chipawak, pero akimeh amo tlaneltokah nion kipia chipawak intlalnamikilis, amitla onka chipawak. Asta kipia intlalnamikilis iwa intlamachilis pochiktik. ¹⁶ Yejwah kijtoah kixmatih Dios, pero ika tlan kichijtinemih kinextiah amo milák. Semi tetlajyalti tlan kichijtinemih iwa amo kinekih kichiwaskeh tlan Dios tlanawatia, iwa nion se kuali tekitl weletih kichiwha.

N kuali tlamachtílistli

¹ Tito, nochipa xitlajto kemi kijtoa n kuali tlamachtílistli. ² Xikinmili n tetajmeh non tlayakantokeh mayetokah yekmilajkameh, kuali matlalnamiktakah, iwa matetlakitakah, mayektlaneltokakah, matetlasojtlakah iwa mateajsikamatikah. ³ Noiwa n tenameh non tlayakantokeh manemikah kemi Dios kimonekiltia, iwa amo maxolopijtinemikah, nion mamowintikah. Yej mayetokah tenameh yekmilajkameh para makinnonotsakah ⁴ n siwameh non ok ichpokameh, kenomi moneki kintlasojtlaskeh inmokich iwa impilwah.

⁵ Noiwa makipiakah kuali intlanamikilis, mayetokah yolchipawakeh, makiyekmokuitlawikah incha, mayetokah kualteh n siwameh iwa makintlakitakah inmokich, ijkó amaka kimawistetepewas itlajtol Dios.

⁶ Noiwa xikinyolchikawa n telpokameh manemikah ika kuali intlanamikilis. ⁷ Te monewia kuali xikinmachti iwa mamitsitakah kuali tlan tikchiwa. Ijkuak tikinmachtis, xikinmachti ika moyolo chipawak iwa xiye to tiyekmilajka. ⁸ Ika kuali motlajtol xikin-nonotsa para amaka makijto amo ijkó tikinnonotsa. Ijkó san akin yetos, ijkuak kinekis nomechtajtolkopas, mopijpinatis.

⁹ Xikinnajnawati n tlanémakteh* makintlakitakah intekowajwah. Nochi makichi-wakah ika kuali inyolo iwa amo san matlananankilijtokah, ¹⁰ amo makintlachtekikah, yej makintlachilikah, ijkó oksikimeh makitakah kenikki kualtsi ijkuak itlajtol Dios Totemakixti techyakantinemi itech nochi tlan tikchiwah.

¹¹ Dios, yotechnextili kenikki satlawel techtlasojtla, iwa ika non tlasojtlálistli non Ye techpialia, nochteh n tlaltikpaktlakah weletis momakixtiskeh. ¹² Itlasojojtlalis Dios techmachtia matikkawakah nochi tlan amokuali techyoltlanah itech nin tlaltíkpaktli. Nochipa matinemikah ika totlanamikilis chipawak, matinemikah ika yolsewílistli iwa matikmopantikah Dios. ¹³ Noiwa techtitika matikchixtokah ika pakílistli n iksemi tonati ijkuak walmuikas Toweyi Dios iwa Totemakixti Cristo Jesús ika nochi itlawilnextilis. ¹⁴ Cristo inewia omotemák para techmakixtis imak nochi tlan amokuali, iwa techchipawas de totlajtlakolwah iwa ijkó kinpejpenas tlakah yolchipawakeh, para makihiwakah tlan kuali.

¹⁵ Ye nin tlan moneki tikinmachtis, xikinnonotsa iwa xikinyolchikawa ika miak tekiwajyotl. Iwa amo xiktekawili aka mamitsixpanawi.

3

Tlan moneki makichiwakah n tokniwah non kineltokah Cristo Jesús

¹ Xikinmilnamikti n tlaneltokakeh makintlakitakah n tlanawatijkeh iwa n oksikimeh tekiwajkeh. Iwa sa makichixtokah ijkuak weletis kichiwaskeh tlan kuali. ² Amo matepo-jpoakah, amo mamotekilmakakah, yej mayetokah kualteh n tlakah, iwa mamoyek-wikakah iwan nochteh.

³ Yowejka, tejwah noiwa amaka otiktlakitaya iwa otikchiwaya san tlan tejwah otiknekiah. Otimoixpolojtinemiah iwa otikelewiayah tlan pitsotik. Iwa otikchijtinemiah tlan amokuali iwa otixikojmikiah, otechkokoliayah iwa otitekokoliayah. ⁴ Pero ijkuak Dios Totemakixti okinnextili iteiknomatilis iwa itlasojojtlalis n tlaltikpaktlakah, ⁵ ijkukó otechmakixtiko, amo por tejwah otikchijkeh itla kuali, yej porke Ye satlawel otechknoma, iwa otechmakixti ika Iespíritu Santo. Ye otechpajpak para tikpiaskeh n yankuik nemílistli iwa otechyánkuili. ⁶ Iwa por Cristo Jesús Totemakixti, Dios otechmokemi ika Iespíritu Santo. ⁷ Ika itlasojojtlalis Dios yotechseli kemi tiyolchipawakeh, iwa weletis tikpiaskeh nemílistli non áyik tlamis tla tikchiyah tlan Dios yokijto techaxkatilis.

⁸ Nochi tlan nimitsilijtok milák. Yika nikneki nochipa xikinmilnamiktijo, ijkó akimeh kineltokah Dios nochipa makichiwakah tlan kuali. Nin tlamachtílistli tlawel kuali iwa weletis kimpalewis nochteh. ⁹ Amo ximonanankilikh ika tlájtolteh non amitla impati, nion amo ximonanankilikh ika tlapoálísteh non nomowejkatawah onomechintlapowijkeh noso ika tlan kijtoa intlanawatil. Nochi noni amitla ipati iwa amo nomechpalewia.

¹⁰ Tla aka kinxexeloa n tlaneltokakeh, xiknonotsa se noso ojpatia, iwa tla amo mitskaki, xikonewalti mawia iwa ayakmó xikkawili mawalmokopa. ¹¹ Ika noni ya tikmatis non tlakatl yokikalaki itech itsonteko tlan amokuali, iwa inewia motlajtlakoltia ika tlan kichiwa.

¹² Ijkuak nimitstítlanilis n Artemas noso n Tíquico, techajsiti Nicópolis, porke yonikijto ompa nikpanoltis n sewaya. ¹³ Xikinpalewi ika nochi tlan tiweletis n abogado Zenas, iwa

* ^{2:9} Tlanémakteh: N tlanémakteh kijtosneki non omonamakakeh

n Apolos, amitla makimpolo itech ojtli. ¹⁴ Ijkó tokniwah mamomachtikah makichiwakah tlan kuali iwa matlapalewikah ika tlan moneki akimeh kimpoloa, ijkó innemilis amo mayeto sanenka.

Pablo momakawa iwan Tito

¹⁵ Nochteh akimeh nika kateh nowa mitsontlajpaloh. Ompa techintlajpalili n totlasojikniwah tlaneltokakeh.

Dios manomechtiochiwa nochteh nomejwah.

San Pablo kitlajkuililia Filemón

Pablo kitlajkuililia Filemón

¹ Ne Pablo nitsaktok por niktektilia n Toteko Cristo Jesús. Ne iwan tokni Timoteo, timitsikuililiah nin amatlajkuíloli te Filemón, tokni non satlawel timitstlasoijtlah, ken noiwa titekiti inawak Cristo kemi tejwah. ² Noiwa tikintlajkuililiah nochteh akimeh moololoah mocha, noiwa tikontlapaloah n tokni siwatl Apia, iwan tokni Arquipo akin mach mosotlawa iwa nochipa techpalewijtinemi itech nin tekitl. ³ Totajtsi Dios iwa n Toteko Cristo Jesús, manomechtiowakah iwa manomechmaka yolsewílistli.

Filemón kuali tetlasoijtla iwa kuali tlaneltoka

⁴ Nochipa nimitsilnamiki ikuak nimotlajkamati inawak Dios, ⁵ ken nechiliah te satlawel tikmati titetlasoijtla iwa mitsitah kuali titlaneltoka inawak Toteko Cristo Jesús iwa tikintlasoijtla nochteh akimeh iaxkawah Dios. ⁶ Niktlajtlanilia Totajtsi Dios nochteh akimeh yokineltokakeh Cristo por okitakeh motlaneltokalis, kuali makajskamatikah n tlatiochiwálistli non Cristo Jesús techmaka. ⁷ Miak nipaki, ken titetlasoijtla yika nimoyolchikawa, porke te notlasojknitsi satlawel yotikinyolchika n tokniwhan non kineltoka Cristo Jesús.

Pablo kitlatlaujta n Filemón makitlapojpolwi n Onésimo

⁸ Yika, maya niweleti nimitsnawatis tlan tikchiwas, ⁹ okachi kuali nimitslatlaujta ika notlasoijtlalis. Ne Pablo, ya nitetajtsi, iwa axa nitsaktok por oniktetlapowijtinemia itlajtol Cristo Jesús. ¹⁰ Nimitstlatlaujta por Onésimo, akin yomochiwako nopoltsi ikuak okineltokak Cristo Jesús, nika kan nitsaktok.

¹¹ Itech oksikimeh tonatijmeh Onésimo okatka se motlanemak non amitla oweletia okichiwaya, pero axa kuali tekiti nonawak iwa te noiwa kuali weletis mitstekitilis. ¹² Yika oksepa nimitsontitlanilia, xikseli kemi techseliskia ne nonewia. ¹³ Ne niknekiskia mamokawa nowa, para makichiwa n tekitl non te tikchiwaskia nika kan onechtsakeh por oniktetlapowijtinemia n kualtlájtoli. ¹⁴ Pero ne amo nikneki nikchiwas itla tlan te amo mitspaktia, ijkó tlan te techchiwilis, amo xikchiwa san por nimitsnawatia yej makisa itech moyolo. ¹⁵ Chamo Onésimo omitscholili kech tonati, iwa axa mawalmokopati mamokawa nochipa mowa, ¹⁶ pero axa ayakmó kemi motlanemak, yej kemi mokni non tiktasoijtla. Ne kuali niktlasojtla, pero te okachi xiktlasojtla, amo kemi se tlakatl de nin tlaltípkaktli yej kemi se mokni non kineltoka n Toteko Jesús.

¹⁷ Ijkó kiné, tla milák techita kemi titekipanojkeh, xikyekseli n Onésimo kemi techseliskia ne nonewia. ¹⁸ Tla omitstokti itla amokuali, noso tla itla mitswikilia, ne nimitstlaxtlawilis. ¹⁹ Ne Pablo, nikijkuiloa nin amatlajkuíloli ika noma, para xikmati ne nimitstlaxtlawilis, maya noiwa weletiskia nimitsilnamiktiskia te noiwa techwikilia, asta moalma. ²⁰ Ijkó kiné nokni, kemi tikneltokah Toteko Cristo Jesús, nimitstlatlaujta techonchiwili tlan nimitsontlajtlanilijtok, techyolchikawa kemi tiiknimeh inawak Cristo.

²¹ Nimitstlajkuililia porke nimitsixmatok titetlakitak, iwa kuali nikmatok te tikchiwas okachi de tlan nimitstlajtlanilia. ²² Noiwa nimitstlatlaujta techmajmanili kan nimokalotis ompa mocha, porke nikneltoka nik Dios kikakis nomotlajkamati iwa nechkawilis maniwhia manomechitati.

Pablo momakawa

²³ Mitsontlajpaloa Epafras, akin nowa tsaktok ken iaxka Cristo Jesús. ²⁴ Noiwa mitsontlajpaloa Marcos, Aristarco, Demas iwa Lucas, akimeh nechpalewiah itech noteki.

²⁵ Itlatiochiwalis n Toteko Cristo Jesús mayeto iwan nomoespíritu.

Namatlajkuíloli non omoíkuilo para Hebreos

Dios technonotiwits itech Ikone

¹ Semi ya wejkawitl Dios okintlapowi totatawah miak welta, kualchiwa ika tlájtoli iwa kualchiwa ika itla tejtemikflistli non okinmitaya n profetajteh. ² Iwa axa itech ninteh iksemi tonatijmeh yotechtlapowi ika itlajtol Ikone. Akin kiaxkatilijtok nochi tlan onka, iwa por Ye okichijchi nochi tlan onka itech ilwikak iwa ipan tlaltíkpaktli. ³ Ikone Ye itlawiltstotlanilis n Dios, iwa inewia otechnextiliko Akin Dios, iwa ika itlajtol weletini kichikajtok nochi tlan onka. Iwa satepa ikuak yotechchipa de totlajtlakolwah, omotlali ik iyekma n Totajtsi Dios nepa kan ilwikak.

Ikone Dios okachi weyijkatitok ke n ángelteh

⁴ Ikone Dios yomochiwako okachi weyi ke nochteh n ángelteh, porke Ye okimakakeh Itoka non okachi weyixtok ke yejwah. ⁵ Porke Totajtsi Dios ayik okili se ángel:

Te ti Nokone

Sal. 2:7

Ne axa onimitschijchi;

nion aka ángel okili:

Ne niyetos ita,

iwa ye yetos Nokone.

2 Sam. 7:14

⁶ Keman okitítlanki non san Ye se Ikone itech tlaltíkpaktli, okijo:
Nochteh iangelwah Dios makiweyilikah.

⁷ Iwa ikuak Dios otlajto de iángelwah, ijkí okijo:
Ye kichiwa mayetokah iangelwah espíritus,
iwa itekitwah kintoktia mayetokah tletl.

Sal. 104:4

⁸ Ikuak kiteneva Ikone kijtoa:

Motlanawatilis Tejwatsi Dios, nochipa yetos;
Tejwatsi kuali tiyektlanawatia ken moneki.

⁹ Mitspaktia nochi tlan kuali iwa tikkokolia tlan amokuali.

Yika Dios, Modios omitsmák

Sal. 45:6-7

okachi miak pakílistli ke n oksikimeh non inwah titekiti.

¹⁰ Noiwa kijtoa:

Tejwatsi Toteko Dios keman ayamitla okatka, Tejwatsi otikchijchi n tlaltíkpaktli,
iwa ika momawah otikchijchi n ilwikak.

¹¹ N tlaltíkpaktli iwa ilwikak pojpoliwaskeh, pero Tejwatsi nochipa tiyetos.
Nochi tlan onka wewejtis kemi weweji n tlakemitol.

¹² Tikinkuekuelpachos kemi se tlakemitol,
tikimpatlás kemi aka kipatla itlake.

Pero Tejwatsi amo kema timopatla,
iwa monemilis amo keman tlamis.

Sal. 102:25-27

¹³ Dios ayik okili se ángel:

Ximotlali ik noyekma, asta manikintlali itlampa mokxiwah akimeh mitskokoliah. *Sal.*
110:1

¹⁴ Porke nochteh n ángelteh yejwah san espíritus non tekititokeh inawak Dios, iwa Dios
okwalintítlanki para makimpalewikhak akimeh kinmakixtiskeh.

Kuali matiktlachilikah totemakixtilis

¹ Yika, moneki okachi matikmopantikah n kualitlajtoli tlan yotikakeh, para amo matimoxelokah itech ojtli non Dios yotechititi. ² N kualitlajtoli non yowejka okualikakeh n ángeles, nochi kuali okiski, pero akimeh otlajtlakolchijkeh iwa amo okinekeh okit-lakitakeh Dios, okintlaijyowiltijkeh ken omonekia. ³ Yika, ¿kenomi tejwah ticholoskeh,

sla amo tigmokuitlawiah nin weyi temakixtlistli? Porke achto inewia Toteko Cristo Jesús okitematilti nin kualitlajtoli non techmakixtia, iwa satepa akimeh okikakeh ikuak okitakeh milák tlan kijtoa, tejwah otechmatiltijkeh. ⁴ Totajtsi Dios noiva otechmatilti milák tlan kijtoa n kualitlajtoli. Ye otechnextili itlajtol ika tlan Ye okiteititi, ika miaktekeh milagros non Ye okinchi, iwa ika miakeh neskayolteh non Espíritu Santo kintemaka iwa kinxejxeloa kemi Ye kimonekiltia.

Cristo Jesús omochi tlakatl iwa ijkó techmakixtis

⁵ Dios amo okintekiwati n ángeles para matlanawatikah itech tlaltípkaktli non satepa wits. ⁶ Yej kemi aka okijto itech itlajkuilol Dios:

¿Tlan ipati n tlakatl para tikilnamiktos?,
iwa ¿tlan ipati se tlakatl de nin tlaltípkaktli para timotekipachojtos por ye? *Sal. 8:4*

⁷ N tlakatl okachitsi otiksitsintili ke n ángelteh,
iwa otikchi maweyixto iwa matlanawati. *Sal. 8:5*

⁸ Nochi otikmactili makinawatijto. Otikmák weletílistli itech nochi tlan otikchijchi. Iwa tla Dios okimák weletílistli itech nochi tlan okichijchi, noni kijtosneki nochi tlan onka kinawatis n tlakatl, pero tikonitokeh ayamó nochi kitlakitah. ⁹ Pero axa tikitah n Jesús, akin Dios okitlali okachi tsijtsikitsi ke n ángelteh san kanaj kech tonati. Dios itech itlasojoatlalis okinek mamiki n Cristo por tinocchteh, iwa axa kipia weyílistli iwa mawistílistli porke omikki por tejwah. ¹⁰ Dios okichijchi nochi tlan onka, para Ye inewia, iwa okinekia kintliokolis iweyilis ipilwah. Yika okinekia kiweyilis n Jesús ika n tlaijyowílistli, porke Ye akin techwika imak temakixtlistli. *Jn. 1:3*

¹¹ Akin teyolchipawa kemi non kiyolchipawah walewatokeh san itech se teta. Yika Jesús amo pinawa kinnotsas ikniwah. ¹² Itlajkuilol Dios kijtoa:

Ne nikinmatiltis nokniwah motoka,
iwa nimitsatlakuikilis kan timoololoah. *Sal. 22:22*

¹³ Noiva kijtoa:
Ne nitlaneltokas inawak Dios. *Is. 8:17*

Iwa oksepa kijtoa:
Nika nika, iwan ipilwah non Dios onechinmák. *Is. 8:18*

¹⁴ Ijkó kemi tejwah tikpiyah tonakayo iwa toesso. Ijkó noiva Jesús omochiwako tlakatl kemi nochteh n tlaltípkaktlakah. Yika owéletki omikki iwa ijkó okikixtili iweletilis n amokualitlakatl non okinmiktiaya n tlaltípkaktlakah. ¹⁵ Ijkó okinmakixtiko nochteh akimeh okimawiliayah mikiskeh, iwa itech nochi tonati san noni okintekipachojtinemia.

¹⁶ Pero Jesús amo owala okimpalewiko n ángeles, yej owala okimpalewiko akimeh walewatokeh itech Abraham. ¹⁷ Ika no omonekia Jesús mamochiwa tlakatl kemi tejwah, para mamotlamiti se Tiópixki non teiknomá inawak Dios, iwa para kinkixtilis intlajtlakolwah n tlaltípkaktlakah, por imikilis kemi se tlamíktli. ¹⁸ Iwa ken Jesús inewia otlaijyowi iwa n amokualitlakatl okinekia matlajtlakolchiwa, axa Jesús weleti kimpalewia akimeh noiva n amokualitlakatl kineki matlajtlakolchiwakah.

Jesús okachi weyijkatitok ke Moisés

¹ Nokniwah yolchipawakeh, Dios onomechpéjpenki para xiyetokah iaxkawah. Yika xikyekitakah n Cristo Jesús, porke Ye totlatematilti iwa non okachi weyi tiópixki itech tlan tejwah tikneltokah. ² Porke Jesús nochipa kichiwa tlan Dios kinawatia, ijkó kemi Moisés okichi nochi tlan okinawatijkeh makichiwa inawak n israelitajtlakah. ³ Pero moneki okachi matikweyilikah n Jesús ke Moisés, ijkó kemi tikweyiliah akin okichijchi se kali, iwa amo n kali. ⁴ Nochi kali non tikitah, onka se akin okichijchi, pero nochi tlan onka ilwikak iwa ipan tlaltípkaktli, Dios okichijchi. ⁵ Moisés okitekitili Dios, iwa nochipa okitlakitak, porke okimpalewi itlakaikniwah ijkó kemi Dios okinawati, iwa okijto tlan Dios satepa kijtoskia. ⁶ Pero Cristo ken Ikone Dios, kema tetlakitak iwa

kimpalewia akimeh tikneltokah, iwa nonteh ye n tejwah. Iwa tejwah tkmajmana non ialtepetlakawah tla tikneltokah ika paklistli n temakixtilistli non tkseliskeh.

Ximotlachilikah para amo nonyetoskeh kemi non amo tlaneltokah

- ⁷ Yika, matikchiwakah tlan Espíritu Santo kijtoa:
 Tla axa nonkikakih itlajtol Dios,
⁸ amo ximoyoltlakuawakah, kemi okichijkeh n judíojteh,
 non amo otetlakitakeh kan tlaltejtéyinki.
 Yejwah okinekiah kitaskeh asta kani Dios kinxikoskia ika tlan amokuali okichiwayah.
⁹ Ompa onechyejyekojkeh nomotatawah,
 maya ome pójali xiwitl okitakeh nochi tlan ne onikchi.
¹⁰ Yika onikuálanki inwah nonteh tlakah,
 iwa onikijo: “Inyolo nochipa kineki kichiwas tlan amokuali,
 iwa amo motekawiliah manikinyakana.”
¹¹ Yika onikuálanki inwah, iwa oniksentralli,
 ayik nikinkawilis makalakikah kan Ne onikijo mosewiskia.

Sal. 95:7-11

¹² Nokniyah, kuali ximotlachilikah, amo kichiwa se de nomejwah moyoltlakuawas iwa kipolos itlaneltokalis, iwa moixkoyantis inawak Dios non yolitok. ¹³ Yej nomechilia, nochipa ximosepanyolchikawakah nochi tonati, para ijkó amaka matlajtlakolchiwa, iwa amo manomechtokti xiylotlakuawakah. ¹⁴ Porke tejwah timochiwah iaxkawah Cristo tla nochipa titlaneltokaskeh inawak Ye kemi achto.

¹⁵ Yika kijtoa itlajkuilol Dios:
 Tla itech nin tonati nonkikakih tlan Dios kijtoa,
 amo ximoyoltlakuawakah kemi okichijkeh n judíojteh ikuak okixnamikeh.
¹⁶ ¿Iwa akimeh okikakeh itlajtol Dios iwa amo okitlakamatkeh? Yejwah akimeh Moisés okinkixti de kan tlali de Egipto. ¹⁷ Iwa ¿akimeh nekateh non inwah okualantoka Dios ome pójali (40) xiwitl? Dios okualantoka iwan akimeh otlajtlakolchijkeh, non satepa omijmikeh kan amaka chantí. ¹⁸ ¿Akimeh nekateh non Dios okinmili amo kalakiskiah kan Ye mosewia? Ijkó okinmili akimeh amo okitlakitakeh. ¹⁹ Milák, amo oweletkeh okalakeh kan tlali de Canaán kan mosewiskiah, porke amo okineltokakeh Dios.

4

¹ Ijkó kiné, matimotlachilikah, axa ken ok tikpixtokeh tlan Dios otechsentlalili, amo kichiwa aka mokawas kala iwa amo kalakis itech imosewilis Dios. ² Porke tejwah otikkakeh n kualtlájtoli de Dios, ijkó kemi okikakeh n Israelitas non okiskeh de Egipto. Pero maya okikakeh, mach okimpalewi, porke maya okikakeh mach okineltokakeh.
³ Pero tejwah, akimeh otikneltokakeh non kuali tlájtoli, tikalakiskeh itech imosewilis Dios, ijkó kemi yokijo:

Yika onikuálanki inwah, iwa onikinmilajkaili:
 “Amo nikinkawilis makalakikah kan tlali kan onikinmili mosewiskeh.”
 Ikuak Dios ijkí okijo, otlajtojtoka itech tonati ikuak omosewi ikuak okitlami okichijchi n tlaltíkpaktli. ⁴ Itech tiotlajkuífoli ikuilitok tlan Dios okichi itech chikome tonati:

Dios omosewi ipan chikomeh tonati ikuak otlanki otekítik. *Gn. 2:2*

⁵ Iwa oksepa mijtoa itech itlajkuilol Dios:
 Nomejwah ayik nonkalakiskeh kan Ne nimosewia. *Sal. 95:11*

⁶ Pero ok poliwi oksikimeh makalakikah kan Dios yotlayektlali para se mosewis, iwa akimeh achto okikakeh n kualtlájtoli non temakixtia amo okalakeh porke amo okitlakitatkeh. ⁷ Yika, Dios okipéjpenki ok se tonati: iwa non tonati, ye non axa itech tikateh. Dios otechtlapow de nin tonati non okipéjperki ikuak okili n David makijo:

Tla itech nin tonati nonkikakih tlan Dios nomechilia,
 amo xiktlakuawakah nomoyolo. *Sal. 95:7-8*

⁸ Tla Josué kinyakanaskia n Israelitas kan mosewiskiah, Dios ayakmó oksepa kite-newaskia ok se tonati. ⁹ Pero, tejwah itlaneltokawah n Dios, ok tikchiah neka tonati

ijkuak weletis timosewiskeh iwan Dios. ¹⁰ Porke akin kalaki kan Dios mosewia, mosewia de nochii teki ijkó kemi Dios omosewi ijkuak okitlami iteki. ¹¹ Yika, tejwah matimochijchikawah iwa matikalakakah kan Dios mosewia, amo kichiwa aka de nomejwah kichiwas kemi nekateh non amo otetlakitakeh.

¹² Porke itlajtol Dios yolitok iwa kipia weletílistli. Nin tlájtoli okachi yakawitstik ke se espada non ojka tlateki, keman kalaki tlaxelotji ijtik toyolo iwa toespíritu, iwa techajsikamatiltia tlan kuali iwa tlan amo kuali. ¹³ Amitla onka tlan Dios okichijchi non weletis moixtlaatis inawak, nochii tlan Ye okichijchi, kita ik pánixko iwa ik tlajtik, iwa se tonati timoteixpantitiweh inawak iwa techilis nochii tlan otikchijkeh.

Jesús Ye non okachi Weyi Tiópixki

¹⁴ Jesús Ikone Dios, Ye n Toweyi Tiópixki non yotlejkok ilwikak. Yika tejwah matimoyolchikajtokah iwa nochipa matitaneltokakah. ¹⁵ Tikpiyah se Toweyi Tiópixki non techiknomati, porke Ye inewia okiyejyekojkeh kemi tejwah techyejyekoah pero Ye amo otlajtlakolchi. ¹⁶ Yika, matimijkuanikah ika tlaneltokálistli inawak Totajtsi Dios kan yayantitok. Para matechiknomati ika ikualtilis iwa matechpalewi keman itla techpoloa.

5

¹ Nochi weyi tiópixki judío kipejpenah innawak miakeh tlakah, iwa kitekitlaliah para makintlajtolpalewi n tlakah inawak Dios, iwa kinteixpantis tlamánalteh iwa tlamíktilteh por n tlajtlákolteh. ² Kemi nin tiópixki noiva kimachilia tlan nochteh n tlakah kinyoltlana, yika kinati kinmiknomati akimeh amitla kimatih iwa akimeh moixpolojtinemih itech intlajtlakolwah. ³ Yika, n tiopíxki moneki kinteixpantis tlamíktilteh ixpa n Dios, para makitlapojpolwikah de itlajtlakolwah iwa de intlajtlakolwah n tlakah.

⁴ Amaka weletis yetos tiópixki sanwel por ye kineki, yej Dios kipejpena akin kineki mayeto tiópixki iwa kimaka nin weyílistli kemi okichi iwa n Aarón. ⁵ Ijkó kiné, Cristo amo omochi tiopixkatlayákanki san por Ye okinek, yej Dios okipéjpenki iwa okimák non weyijkachiwálistli. Inewia Dios okili:

Te ti Nokone;
Ne onimitschijchi.

Sal. 2:7

⁶ Iwa ok sika noiva kijtoa:
Te nochipa Titiópixki,
ijkó kemi okatka Melquisedec.

Sal. 110:4

⁷ Ijkuak Cristo onenki itech nin tlaltíkpaktli, chikawak omototsajtsili iwa ochokak; okitlatlauji Dios makimakixti imak mikílistli; iwa Dios okikak porke Cristo nochipa okitlakitak, yika okikak itiotsajtsilis. ⁸ Ijkó kiné, maya Cristo Tekone inawak Dios, ika nochii tlan okijyowi okima kenomi tetlakitas. ⁹ Ijkó, kemi Cristo okichi nochii tlan Dios okinawati, omochi temakixti non kitemakah yolílistli semijkak, innawak nochteh akimeh kitlakitah. ¹⁰ Yika, Totajtsi Dios okitlali weyi Tiópixki ijkó kemi n Melquisedec.

Miálmasteh akimeh kikawah iwa ayakmó kineltokah n Cristo Jesús

¹¹ Onka miak tlan weletis tomechtlapowiskeh de nin tlájtoli, pero achitsi owi tomechajskamatiltiskeh, ken nomejwah yolik nonkajsikamatih. ¹² Nomejwah ya nonyetoskiah nontlamachtijkeh ken yowejka nonkikaktiwitseh nin tlamáchtigli. Pero maya yononwejkajkeh, axa ok nonkinekih se manomechmacthi tlan okachi amo owi se weletis kajsikamatis itech itlamachtilis Dios. Nonkichiwha kemi nonkokoneh, nonkinekih se manomechmaka lechi ken amo nonweletih nonkikuah itla tláktali. ¹³ Porke nochii akin yolitok san ika lechi, kijtosneki ayamó kixmati katlie n kuali tlamachtílistli, ken ok konetl. ¹⁴ Pero akimeh yochikawak intlaneltokalis, ya weletih kikuah nochii tláktali, porke yejwah ya kuali kimatih kiyejyekolah tlan kuali iwa tlan amokuali.

6

¹ Ijkó kiné, ayakmó matikmomachtkah tlan sakinika otechmachtijkeh de Cristo, matimoskaltikah itech totlaneltokalis iwa matiyetokah kemi Cristo. Ayakmó moneki

oksepa matechmachtikah kemi ikuak sakinika otitlaneltokakeh. Kemi otechmachtijkeh matimoyolpatlakah para ayakmó matitlajtlakolchiwakah iwa porke noni techwika imak mikílistli, yej matiktlalikah totlaneltokalis inawak Dios. ² Noiwa otechmachtijkeh tleka se mokuaatekia, iwa tlan kijtosneki ikuak se kintlalilia inmawah impa oksikimeh tokniwah, noiwa otechmachtijkeh kenomi moyolitiskeh n mikemeh iwa keniji Dios kinmixkomakas n tlakah iwa kijtos akimeh tlaijyowiskeh nochipa. ³ Ijkó tikchiwaskeh, tla Dios kimonekiltia.

⁴ Akimeh se tonati okajsikamatkeh n kuali tlájtoli non kitemakah temakixtlistli, iwa okiselijkeh n tlatliokólili non Dios okinmák, okipixkeh n Espíritu Santo itech inyolo ⁵ iwa okixmatkeh itlajtol Dios iwa kipiaskeh weletílistli itech n tonati non satepa wits, ⁶ tla nonteh tlakah oksepa wetsi, ayakmó weletis moyolkopaskeh porke yejwah oksepa kikrusifikasirojtokeh Ikone Dios iwa kipipinatia inmixpa n tlakah. ⁷ N tlali non satlawel kiawilo kitlakiltia kuali itlakilo iwa ijkó Dios kintiochiwa akimeh tookah. ⁸ Pero tla kitlakiltia witstli iwa tetestikxiwitl, amitla ipati non tlali, Dios kitlaijywoltis non tlali iwa satepa kichichinos. ⁹ Totlasojikniwah, maya ijkí tomechtlapowiah, kuali tikmatih nomejwah nonkichiwaskeh tlan kuali ijkó kemi kichiwah n tlakah non Dios yokinmakixti de intlajtlakolwah. ¹⁰ Porke Totajtsi Dios yolmilajka, iwa ayik kilkawas tlan nomejwah ononkichijkeh iwa nonkichijtokeh keman nonkimpalewiah nomokniwah tlaneltokakeh. Ijkó nonkiteixmatiltiah nonkitlasojtlah n Cristo Jesús. ¹¹ Pero tiknekiskiah non nochteh xitepalewikah ika pakílistli asta ikuak nonmikiskeh. Ijkó nonkiseliskeh noch tlan kuali, tlan nonkichihtokeh ika pakílistli. ¹² Amo tiknekih ximokopakah nontlatsijkeh. Yej, xikchiwaskeh kemi kichiwah akimeh kineltokah Dios, porke ijkó nomejwah nonkiseliskeh tlan Dios yonomechsentlalili.

¹³ Porke ikuak Dios okitlajtolsentlalili Abraham, okisentlali ika inewia Itoka, porke amo okatka ok se okachi maweyixto ke Ye, ¹⁴ iwa okijto: “De milajka, miak nimitstiochiwas iwa nimitsinmakas miaktikeh moxwiwah.” ^{Gn. 22:16-17} ¹⁵ Abraham wejkawitl omochixki iwa ijkó okiseli tlan Dios okiljka kimakaskia. ¹⁶ Ikuak n tlakah kinekih moyekkawaskeh, motlajtolsentlali por se akin okachi weyijkatitok, iwa ikuak ijkó kichiwah, ayakmó motlatlajtolkopah. ¹⁷ Yika, Dios okinek kiteititis milák kichiwas tlan okijto, okitlajtolsentlali kitemakaskia tlan yokisentlalijka iwa amitla kipatlaskia. ¹⁸ Ijkó kiné, onka ome tlájtoli non amo weletis mopatlas. Ika no moajsikamati Dios amo weletis techkajkayawas. Noni techyolsewia, ken tejwah tiknekih Dios matechmokuitlawi, iwa tikneltokah Ye techmakas tlan yotechkakitija. ¹⁹ Tlan tejwah tikchiah, tikchiah ika totlaneltokalis, kemi se tépostli ankla non kitsoponia ijtk atl iwa amo kikawilia mamolini n barko, nin tlaneltokálistli techmakah n Cristo, non opanok itsalko n kortina itech itiopa n Dios itech ilwikak iwa okalak itech lojar santo non chipaktik. ²⁰ Jesús ijkó okichi iwa otechtlapoli n lojar inawak Dios, porke Cristo Ye n Weyi Tiópixki semijkak kemi okatka Melquisedec.

Jesús Weyi Tiópixki kemi Melquisedec

¹ Nin Melquisedec, okatka rey de Salem iwa weyi tiópixki inawak Totajtsi Dios. Keman Abraham omokopato kan omotekilmakato iwan oksikimeh reyes non okintlanki, Melquisedec oyá okinamikito Abraham iwa okitiochi, ² iwa Abraham okimák n Melquisedec n májtlaktli por siento de noch tlan okintlanilito akimeh inwah omotekilmák. Melquisedec kijtosneki “Rey yekmilajka”, iwa “Rey de Salem” kijtosneki “Rey teyolsewi”. ³ Amo momati akin ita nion akin ina, noso akimeh itatawah, amo momati kan otlákatki nion kemanía omikki. Ijkó omoteixnextiko kemi Ikone Dios, kemi se weyi tiópixki semijkak.

⁴ Axa kuali xikitakah keniji saikpanoa oweyijkatitoka n Melquisedec, yika inewia totata Abraham okimaktli májtlaktli por siento de tlan okintlanili n reyes kan omotekilmakato. ⁵ Itech itlanawatil Moisés, onka se tlanawátili kan kijtoa, n tiopixkeh non

walewatokeh de Leví makiselikah májtlaktli por siento itech tlan kitlanih inmikniyah judíos, maya yejwah noiya walewatokeh de Abraham. ⁶ Pero maya Melquisedec amo owalewatoka de Leví, Abraham okimák n májtlaktli por siento itech tlan okimotlanilito. Melquisedec okitiochi Abraham akin Dios okisentlali kitiochiwaskia. ⁷ Amaka weletis kixtlatiš akin tlatiochiwa okachi weyijkatitok ke akin kitiochiwa. ⁸ Iwa nika ipan tlaltípkaktli akimeh kiseliah n májtlaktli por siento, san tlaltípkaktlakah non mikkih. Pero itlajkuilol Dios kinextiah ke Melquisedec yolitok. ⁹ Iwa weletis se kijtos Leví iwa nochteh n tiopixkeh non itech walewatokeh, non axa kiseliah májtlaktli por siento itech tlan se kitlani, noiya okitlaxtlawilijkeh n Melquisedec májtlaktli por siento ikuak Abraham okitlaxtlawi. ¹⁰ Porke n tiopixkeh non walewatokeh de Leví maya ayamó otlakatiah, ok okatkah itech iesso Abraham ikuak okinamikito n Melquisedec.

¹¹ N tlakah de Israel okiselijkeh n tlanawátili por n tiopixkeh levitas non walewatokeh de Aarón. Axa, tla non tlanawátili weletiskia kinyektlalis akimeh kitlakitah non tlanawátili, ayakmó monekiskia mamonexti ok se tiópixki kemi non walewatok de Aarón, yej se kemi Melquisedec. ¹² Porke keman mopatla n tiopixkeh, noiya moneki mamopatla n tlanawátili. ¹³ Iwa Jesús, akin nika tlapoa n tiotlajkuíloli, Ye de ok se tribu, kan amaka tiópixki ompa okiski. ¹⁴ Porke kuali momatok Toteko Cristo Jesús walewatok de tribu de Judá, iwa Moisés amitla okijto kox de ompa kisaskiah tiopixkeh.

¹⁵ Iwa okachi moajsikamati ikuak tikital n yankuik tiópixki se kemi Melquisedec. ¹⁶ Jesús amo omochi tiópixki por owalewatoka de se familia kan walewatokeh n tiopixkeh kemi kijtoa itlanawatil Moisés, yej omochi tiópixki porke itech okipiaya n weletílistli non kipia se non ayik mikki. ¹⁷ Porke Dios ijkí tlajtoa de Cristo:

Te se titiópixki non ayik mikkis,

ijkó kemi Melquisedec.

Sal. 110:4

¹⁸ Ika noni, itlanawatil Moisés non achto otechmakakeh ayakmitla ipati, porke amo chikawak iwa amo otechpalewiaya. ¹⁹ Nin tlanawatlistli amaka okichipa de itlajtlakol. Yika, axa tikchia ika pakílistli Dios matechmaka tlan okachi kuali, iwa ijkó ya weleti timikuaniah inawak Dios.

²⁰ Ikuak Dios ijkí okichi, Ye achto okisentlali ijkó mochiwas. ²¹ Ikuak okimpejpenkeh n oksikimeh tiopixkeh amaka itla okisentlali, pero ikuak okipejpenkeh n Cristo, Dios okisentlali. Porke itech itlajkuilol Dios kijtoa:

Noteko okisentlali, iwa ayik kipatlas itlajtol:

“Te nochipa tiyetos tiópixki ik nochipa.”

Sal. 110:4

²² Yika, Jesús Ye akin axa techyekkawa iwan Dios, iwa amo kemi non achto tlanawátili.

²³ Achto otikimpiayah miakeh tiopíxkeh, porke nion seme de yejwah nochipa oyolitokah.

²⁴ Pero kemi Jesús amo mikki, mach aka ok se moneki kipatkayotis iteki kemi tiópixki.

²⁵ Yika, Jesús weletis kinmakixtis semijkak akimeh mijkuaniah inawak Dios por Ye, porke Cristo nochipa yolitok, iwa motlatlautijtos inawak Dios por yejwah.

²⁶ Ijkó kiné, Jesús Ye n Weyi Tiópixki non tejwah otechpoloaya. Ye yolchipawak iwa amitla tlajtlácoli okichi, iwa xelitok de n tlajtlakolejkeh. Iwa okachi weyijkatitok ke n ilwikak. ²⁷ Ye amo moneki kichiwas tlan oksikimeh tiopíxkeh kichiwas. Porke non oksikimeh tiopíxkeh nochí tonati tlamanah inawak Dios para makintlapojpolwili intlajtlakolwah. Iwa satepa tlamanah por intlajtlakolwah oksikimeh tlakah. Pero Jesús amo ijkó okichi, porke ikuak Jesús omikki, san se welta omotemakti kemi se chipawak tlamanali iwa ika noni tinchteh otechtlapojpolwi. ²⁸ N tiopixkeh non kimpejpena kemi kijtoa n tlanawátili, tlajtlakolchiwah. Pero satepa ikuak yokinmák itlanawatil Dios, okisentlali techmakas se tiópixki non Ye Ikone non tlayakantos, akin amayik otlajtlakolchi.

¹ Tlan okachi weyi kijtosneki, tikpiyah se tiopixkatlayákanki non kajki ilwikak, Ye ewatok ik iyekma n Totajtsi Dios, ² Non Tiópixki Ye n Cristo Jesús iwa ompa kichiwa iteki, kan milajka tiopa, non Dios inewia okichijchi iwa amo okichijchijkeh n tlakah. ³ Nochtek n wejweyi tiopixkeh kintlaliah para makitemakakah itla tlamánali iwa tlamíktili para makinchichinokah yolkameh kan artal, yika Jesús noiwa kipia tlan kitemakas imak Dios.

⁴ Tla Jesús yetoskia itech nin tlaltíkpaktli, amo yetoskia tiópixki, porke ok onkateh tiopixkeh non kinteixpantiah tlamánalteh ijkó kemi tlanawatia n tlanawatílistli. ⁵ Pero intekih ninteh tiopixkeh, san nejma technextiliah noso itlasekawilo tlan kichiwha nepa ilwikak. Yika ikuak Moisés kichijchiwaskia n tiopa, Dios okili: “Kuali techkaki, kuali nonkimajmantiaskeh n tiopa, kemi onimitsili nepa kan tepetl.”

Ex.

^{25:40} ⁶ Pero n tekitl non Jesús okiseli okachi weyi ke non yejwah okichiwayah, porke Ye axa omotlajtolsentlali itech tlan okachi ipati, iwa techilia tiyetoskeh okachi kuali.

⁷ Porke tla yetoskia kuali keman sakinika omoyekkajkeh, amo monekiskia mopatlas.

⁸ Pero Dios okitak n tlakah amo okitlakitayah kemi Ye okinekia, iwa okijo:

Ajsiki tonati ikuak niktlalis se yankuik tlájtoli

iwan tlakah de Israel iwan tlakah de Judá.

⁹ Amo nikchiwas kemi onimotlajtolsenka iwa nomowejkatatawhah,

n tonati keman onikinmatilanki iwa onikinkixti de Egipto,

porke amo okichijkeh tlan onikinmili makichiwakah,

yika onikinkajka, kijtoa n Toteko.

¹⁰ Ye ni tlan ika nimotlajtolsenkawas iwan tlakah de Israel itech nekateh tonatijmeh non sakin witseh, ye ni itlajtol Dios:

Nikintlalis notlanawatilwah itech intlamikilis

iwa nikintlalis itech inyolo,

iwa Ne niyetos in Dios

iwa yejwah yetoskeh noaltepetylakawah.

¹¹ Ayakmó monekis aka makimachti se itlakaikni,

nion aka kilis ikni:

—Xikixmati n Toteko Dios—,

porke nochtek nechixmatiskeh,

n kokoneh asta non ya tetajmeh.

¹² Iwa Ne nikintlapojpolwis nochi tlan amokuali okichijkeh,

iwa ayik nikinmilnamikis intlajtlakolwah.

Jr. 31:31-34

¹³ Ikuak Dios kijtoa oksepa inwah nimoyekkawas, kijtosneki ya wewe n tlájtoli non ika omoyekka inwah, iwa tlan ya wewejitotok iwa ya panotok, mach ok wejkawas iwa sannima pojpoliwis.

9

Onka se tlaltikpaktiopa iwa se ilwikaktiopa

¹ Ikuak sakinika Dios omotlajtolsenka, okijo keniji kiweyijkachiwaskiah itech se lojar non san kichijchiwah itech nin tlaltíkpaktli. ² Non tiopa ijkí omochijchi: kan ipewaya n tiopa, omonotsaya lojar Santo, ompa okatka n kandelero iwa n mesa kan omotlaliayah n pameh non oxelitokah para Dios. ³ Iwa okachi tlajtitik, kan otlaikoxelitoka ika weyi tsótsoli, ompa okiliayah Lojar Santísimo. ⁴ Ompa okatka se artal de oro kan okichichinoayah n kópali. Noiwa ompa okatka n tlatiochiwalkaxa non oixaltitoka ika oro. Ijtik non kaxa okatka se xoktsi de oro non okipixtoka n paj non itoka maná, noiwa ompa okatka ibasto Aarón non omokópinki iwan tetl patlawak kan oijkluitokah intlanawatilis.

⁵ Ikpak non tlatiochiwalkaxa okatkah ome ángelteh non intokah querubines, yejwah okitenextiayah Dios ompa okatka ika iweyilis. Nonteh querubines ika inmajaswha okixtsaktokah ikamatsaka n tlatiochiwalkaxa kan motlapojpolwilo. Axa amo weletis timoyektlapowiskeh tlan ompa omochiwaya.

⁶ Keman ya tlamajmantok ompa tlajtik, n tiopixkeh kalakih nochi tonati kan Lojar Santo para kichiwaskeh inteki. ⁷ Pero kan Lojar Santísmo kalaki sanwel n tiopixkatlayákanki san se welta itech se xiwitl. Iwa keman kalaki, kiwika inmessó n yolkameh non ika motlatlaujtis inawak Dios iwa makitlapojpolwikah de itlajtlakolwah iwa de itlajtlakolwah n oksikimeh tlakah. ⁸ Ika noni n Espíritu Santo techajsikamatiltia ikuak okatka n Lojar Santo, amo okalakia kan Lojar Santísmo. ⁹ Nochi ni techititia itech ninteh tonatijmeh, ikuak titlamanañ noso ikuak titlamiktiah, ika noni amo weleti kinchipawiliah intlahnamikilis akimeh ijkó kichiwaskeh. ¹⁰ Nochi ni san itlanawatilwah n tlakah, ikuak se tlakua, noso tlan se koni, noiva kenijki mochipawah ika atl. N tlanawátili sanwel kinmilia tlanón kichiwaskeh, pero amo techpalewia kenijki tinemiskeh. Nonteh tlanawátileh yetoskeh asta Dios matechimpatili ika ok se tlanawatili okachi kuali.

¹¹ Cristo yowala, iwa axa Ye n Tiopixkatlayákanki. Axa Ye techmakah nochi tlan kuali. Porke n tiopa kan Ye tiópixki, okachi kuali iwa milajka. Porke amo san tlakah okichijchijkeh, yika amo de nin tlaltípkaktli. ¹² Cristo okalak kan milák Lojar Santísmo, ayakmó para kimanas inmessó n yolkameh, yej para kitemaktis non Ye iesso. Ye okalak san se wuelta, iwa ijkó okitlaxtla topatka iwa otechmák tonemilis semijkak. ¹³ Achto, inmessó n torojteh iwa n tentsomeh, iwa itlekonex n beserra non okichichinoayah kan artal iwa satepa okitejtepewayah impah akimeh amo chipawakeh okatkah, okipiaya weletílistli para kinchipawas inawak Dios san ik párixko. ¹⁴ Iwa tla inmessó n yolkameh kipia weletílistli, ¡Iesso n Cristo Jesús okachi kipia weletílistli ke inmessó nonteh yolkameh! Porke ika ichikawalis n Espíritu Santo non nochipa yolitok, Cristo inewia omotemák makimiktikah kemi se tlamáñali senchipawak. Iesso techchipawa iwa ya tikmatokeh milák otechchipa. Iwa ijkó ya tiveleti tiktekichiwiliskeh Dios non yolitok.

¹⁵ Cristo techyekkawa itech se yankuik tlájtoli, imikilis Cristo okitlaxtla topatka nochi tlan amokuali otikchijkeh itech non sakinika tlanawátili, iwa akimeh Dios okinnotski maweletikah makiselikah intlatliokolil non Ye yokinkakitijka. ¹⁶ Porke ya nonkimatokeh, ikuak aka mikki, kikajtewa se amatl kan otlaxexelo, nochi tlan kijtoa itech non amatl, weletis mochiwas sanwel tla yomikki akin okitlali non amatl. ¹⁷ Porke non amatl kan kijtojtok otlaxexelo amitla ipati tla akin okikuilo ok yolitok, non amatl amitla ipati asta ikuak miki akin okitlali. ¹⁸ Yika, ikuak Dios okitlali non sakinika tlalamatl, noiva omotlajtolsenka ika estli. ¹⁹ Moisés okinmatilti n tlanawátileh nochteh n israelitas. Otlanki okónanki intsojmio n ichka iwa se isopojuawitl, okinsia itech atl nelitok ika inmessó n torojkokoneh iwa n tentsomeh, satepa okajtselwi n tlanawátili non Moisés okinchijchi, noiva okinmajtselwi nochteh n israelitas. ²⁰ Iwa okinmili: “Nin estli kisentlalia n tlalamatl non Dios onomechtitlanili.” ^{Éx. 24:8} ²¹ Moisés noiva okajtselwi ika estli n tabernáculo iwa nochi tlan ompa okitekitiltiayah ikuak okiweyijkachiwayah Dios. ²² Ijkó kiné, n tlanawátili techititia miak tlajtlácoli omochipawaya ika estli, iwa amitla motlaxtlawah tla amo moyawaya estli.

Imikilis Cristo kipojpoloa n tlajtlácoli

²³ Ijkó kiné, omonekia ninteh tlamítilteh para mochipawas san itlachijchiwilis noso itlasekawilo itech tlan onka ilwikak. Pero tlan milák onka ilwikak kinekih okachi weyi tlamíktli iwa amo san inmessó n yolkameh. ²⁴ Porke Cristo amo okalak itech tabernáculo non san tlakah okichijchijkeh. Noni okatka san se tlachijchiwali kemi n milák tabernáculo non kajki ilwikak. Ye okalak kan ilwikak, kan axa kitlatlautijtok Dios matechtlapojpolwi. ²⁵ N weyi tiopíxki, kalaki nochi xiwitl kan Lojar Santísmo iwa kimana estli non amo iesso, pero Cristo amo okalak miak welta para motemaktis. ²⁶ Tla ijkó yetoschia, Cristo mikiskia miak welta desde ikuak Dios okichijchi n tlaltípkaktli. Pero Ye omonextiko itech ninteh iksemi tonatijmeh iwa inewia omotemák makimiktikah, iwa ijkó, ika iesso okimpojpoloko totlajtlakolwah. ²⁷ Tejwah tinochteh timikiskeh san se welta, iwa satepa Dios techixkomakas. ²⁸ Ijkó noiva Cristo omotemák san se welta para makimiktikah iwa ijkó matechtlapojpolwikah de totlajtlakolwah. Satepa Ye oksepa

walmokopas, iwa ayakmó mikkis por totlajtlakolwah, yej para techmakixtis tejwah akimeh tikchixtokeh mawiki.

10

Itlanawatilis Moisés amo weleti kinkixtia tlajtlákolteh

¹ Itlanawatil Moisés sanwel itlasekawilo tlan satepa walaskia, iwa amo tlan milák techmakaskia. Yika, n tlanawátili amo weleti kinchipawa akimeh yawi nochí xiwitl inawak Dios, iwa kitlamaniliah. ² Tla milák n tlanawatílistli weletiskia kinchipawas tlajtlákolteh, amo momachiliskia tlajtlakolejkeh iwa ayakmó kinmanaskiah yolkameh. ³ Pero nochí xiwitl, ninteh tlamiktilteh sanwel nomechtoktiah xikinmilnamikakah nomotlajtlakolwah, ⁴ porke inmesso n torojteh iwa n tentsomeh non kinmiktiah amo weletih kimpopoaloah tlajtlákolteh.

⁵ Yika, ikuak owala Cristo ipan tlaltípkaktli, Ye okijo: Tejwatsi amo otiknek mamitsinmiktilikah yolkameh nion mamitstlamanilikah, yika otechkawili manitlakatiki iwa satepa manimitsmactili nokuerpo kemi se tlamíktli.

⁶ Tejwatsi amo omitspakti mamitsinmiktilikah yolkameh non okinchichinoayah ipan artal para tikintlapojpolwis de intlajtlakolwah.

⁷ Ijkuakó onikijo: “Nika nika Tejwatsi Dios, ken ikuilitok, nikchiwas tlan Tejwatsi tkmonekiltia.” *Sal. 40:6-8*

⁸ Achto kijtoa, Dios amo kinneki tlamíktilteh, nion matitlamanaakah, nion yolkameh non kinchichinoah ipan artal non techtlajtlakolchipawas, amo kiwelitah maya n tlanawátili kijtoa matitlamanaakah. ⁹ Iwa satepa kijtoa: Nika niwits iwa nikchiwas tlan Tejwatsi Dios tkmonekiltia. Matikjtokah Cristo okinpojpoloko nekateh tlamíktilteh non achto okinchiwayah, iwa okitlali ok se. ¹⁰ Dios yotexchipa de totlajtlakolwah porke Cristo okichi tlan Dios kimonekiltia, ikuak omikki ipan krus, iwa okitemák ikuerpo kemi se tlamíktli san se welta iwa nochipa.

¹¹ N tiópixki judío, nochí tonati kinmana tlamíktilteh, iwa ixmostla kojpatilia tlan kimantok, pero ninteh tlamanalteh mach weletih kimpopoaloah tlajtlákolteh. ¹² Pero Cristo san se welta omotemák makimiktikah para kintlaxtlawas totlajtlakolwah nochipa. Iwa axa ewatok ik iyekma Totajtsi Dios. ¹³ Iwa ompa mochixtok asta ikuak Dios kintlalis itlampa ikxiwah akimeh kikokoliah, ¹⁴ porke san ika se tlamánali, Cristo Jesúś okinsenchipa de intlajtlakolwah nochteh akimeh kinyolchipajtok. ¹⁵ Noiwa nochí ni, n Espíritu Santo techonmatiltia kan kijtoa:

¹⁶ Ye ni n tlájtoli non satepa nimoyekkawas iwan yejwah, kijtoa n Toteko: Niktlalis notlanawatil itech inyolo,
iwa nikinmijkuilos itech intlalnamikilis. *Jr. 31:33*

¹⁷ Iwa kijtoa:

Ayik oksepa nikinmilnamikis
intlajtlakolwah nion tlan amokuali okichijkeh. *Jr. 31:34*

¹⁸ Ijkó kiné, keman yotechtlapojpolwijkeh ayakmó moneki itla makimanakah para matechtlapojpolwikah.

Matimijkuanikah inawak Dios.

¹⁹ Ijkó kiné nokniwah, axa ya weletis tikalakiskeh kan Lojar Santísimo ken Cristo Jesúś okitoya iesso ikuak omikki. ²⁰ Ikuak Jesúś omikki, ikuerpo omochi n yankuik ojtlí yolitok non okitlapo n kortina kan Lojar Santísimo, ²¹ iwa axa Cristo Jesúś Ye n Weyí Tiópixki akin tlayakantok icha n Dios. ²² Matimijkuanikah inawak Dios ika toyolo chipawak iwa kuali matitlaneltokakah, porke Ye yokichipa toyolo nochí tlan amokuali, para ayakmó matimomachilikah titlajtlakolejkeh, ken nochí tokuerpo yokichipa ika atl chipawak. ²³ Axa, kuali matitlaneltokakah itech tlan tikchiah, porke kuali tikmatokeh, Dios techmakas nochí tlan okisentlali techmakas. ²⁴ Matiktemolikah keniji timosepampapalewiskeh, matimotlasoxtlakah iwa matikchiwakah tlan kuali. ²⁵ Yika, nochipa matimololokah iwan oksikimeh tokniwah, amo matikchiwakah kemi sikimeh yomomatkeh amo kinekih

mololoskeh. Tejwah moneki matimosepanyolchikawakah, iwa axa okachi por ya tikitah n tonati ikuak Toteko wits ya walajsi.

²⁶ Porke tla tiknekiskeh titlajtlakolchijtinemiskeh maya ya tikixmati tlan milák, ayakmó weletis techmakaskeh ok se tlamíktli por totlajtlakolwah. ²⁷ Sanwel tikchiah n weyi iwa temohti tlaijyowílistli itech tletl xotlatok non kimpojpolos akimeh kikokoliah Dios. ²⁸ Ikuak aka kixpanawia itlanawatil Moisés, iwa onkateh ome noso eyi akimeh milák okitakeh, ayakmó kitlapojpolwiah nion kiknomatih yej nima kimiktiah. ²⁹ ¡Amo nonkiyejyekoliah okachi kintlaijyowiltiskeh akimeh kixpanawiah Ikone Dios iwa kitah kemi amitla ipati imikilis n Cristo ikuak okitoya iesso! Porke ikuak ijkó kichiwa kimawistetepewa Iespíritu Dios non techtlasojtla. Noiwa kimawistetepewa imikilis n Cristo, non ika omoyekkawako, iwa ika non estli yotechtlapojpolwiko de totlajtlakolwah. ³⁰ Tikmatokeh tlan Totajtsi Dios okijo: “Ne Akin nitelaijyowiltis, iwa Ne nitelaxtlawis.” Dt. 32:35 Noiwa okijo: “Toteko Dios kintlaxtlawiki noso kintlaijyowiltiki itlaneltokawah.” Dt. 32:36 ³¹ ¡Kema temohti tla otiwetsito imak Dios akin nochipa yolitok!

³² Xikinmilnamikikah n tonatijmeh ikuak sakin ononkiselijkeh n kualitlátoli. Maya onomechtlaijyowiltijkeh nomejwah nochipa ononkineltokakeh n kualitlátoli. ³³ Miak welta onomechpijpinatijkeh ikuak teixpa onomechwitekiah, iwa ikuak oksikimeh nomokniyah okintlaijyowiltayah, nomejwah noiwa onontlaijyowiayah. ³⁴ Nomejwah ononkinmiknomatkeh akimeh otsaktokah, iwa ika pakílistli onorkimotekawilijkeh manomechkixtilikah tlan nomoaxka, porke nonkimatokeh itech ilwikak nonkipiah tlan okachi kuali iwa ayik tlami. ³⁵ Amo xikpolokah nomotlaneltokalis itech Cristo, porke nomotlaneltokalis nomechmakas se kuali tlaxtláwili kan ilwikak. ³⁶ Nomejwah xikxikokah nochi n tlaijyowílistli iwa xikchiwakah tlan Dios kineki, iwa ijkó manomechmaka tlan Ye yokijo kitemakas. ³⁷ Itlajkuilol Dios kijtoa:

San nima kalakiki, Akin saman wits,
ayakmó wejkawas.

³⁸ Akin yolmilajka ika itlaneltokalis yolitos.

Pero tla ayakmó nechneltoka,
ayakmó nipaktos íwa.

Hab. 2:3

³⁹ Tejwah, amo kemi nonmotsinkixtiah iwa moixpoloah. Tejwah timopoah iwan nekateh akimeh kineltokah Dios iwa ijkó kinmakixtiah inmalma.

11

N tlaneltokálisli

¹ Ijkó kiné, n tlaneltokálisli ye tlan se kichia ika nochí iyolo, maya se amo kita. ² Dios okinyekseli towejkatatawah ken okineltokakeh.

³ Ika totlaneltokalis tikmatih Dios ika itlajtol okichijchi n tlaltíkpaktli. Nochí tlan axa tikitah, n ilwikak iwa n tlaltikpak, nochí Dios okichijchi itech tlan amo omotaya.

⁴ Abel otlaneltokaya inawak Dios, yika okimanili se tlamíktli iwa Dios okachi okitla-sojkamah ke non de Caín. Dios okiseli Abel yolmilajka iwa okiseli itlamanal. Ijkó kiné, maya Abel yowejka omikki, ok techixtlamachtijtok itlaneltokalis.

⁵ Por itlaneltokalis Enok amo omikki, iwa Dios okiwík kan ilwikak yolitok, yika ayakmó okajiskeh. N tiotlajkuífoli kijtoa, ikuak ayamó okiwikaya Enok, ye okipakti Dios ika iyeknemilis. ⁶ Pero tla se amo kipia tlaneltokálisli, mach weletis tikpaktis Dios, porke akin mijkuania inawak Dios, moneki makineltoka Ye onka, iwa Ye kinmakas intlatliokolil akimeh kitemoah.

⁷ Por itlaneltokalis Noé ikuak Dios okili tlamoichiawaskia, tlan ayamó omotaya, Noé otlaneltokak iwa opé kichijchiwa se weyi barko, non ika kinmakixtiskia non ken kimita. Ika non tlaneltokálisli okintlaijyowiltih nochteh n tlaltikpaktlakah. Ijkó Dios okitak n Noé kemi se tlakatl yolchipawak por okineltokak tlan okili.

⁸ Por itlaneltokalis Abraham, ikuak Dios okínotski, ye okitlakitak iwa oyá kan se tlali non Dios kiaxkatiliskia. Abraham okikakajte itlal iwa amo okimatia kan oyaya. ⁹ Por

itlaneltokalis Abraham ochanchiwaya itech ok se tlali san kemi se néjnenki, kan Dios yokilijka kiaxkatiskia. Abraham ochantitoka ijtk kaltsótsoli ijkó kemi Isaac iwa Jacob, kemi Dios yokinmilija kinmakaskia non tlali. ¹⁰ Abraham okichi tlan Dios okinawati, porke okinekia kitas neká altepetl non kuali yektlakxilitok iwa ayik wetsis, non altepetl Dios okimájmanki iwa okichijchi.

¹¹ Ika non itlaneltokalis Abraham, maya Sara amo oweletia okimpiaya ipilwah iwa okatka ya tenantsi, okiseli itlatiochiwalis Dios iwa okípixki se ikone, porke Abraham okineltokak Dios nochipa kichiwa tlan kijtoa. ¹² Ijkó, maya Abraham yokatka ya tetajtsi iwa sa okichixtoka imikilis, ok oweletki okipixki se ikone iwa satepa okimpíxki satlawel miaktikeh iwejkaixwiwah, non amaka oweletia kimpoaskia, kemi n sítlalteh non kateh ilwikak iwa kemi n xali non kajki itempa n weyi atl.

¹³ Nochteh ninteh tlakah otlaneltokakeh asta omikkeh. Iwa mach okiselijkeh tlan Dios okinmili kinmakas, pero ken otlaneltokakeh, san wejka okitakeh tlan kinmakaskiah iwa opakeh. Iwa okijtojkeh amo omokawakoh itech nin tlaltípkaktli, yej san kech tonati onenemikoh. ¹⁴ Iwa akimeh ijkó kijtoah, kijtosneki ok kitemojtinemih se tlali kan chanchiwaskeh. ¹⁵ Tla yejwah kilnamiktoskiah n tlali kan owalkiskeh, weletiskia oksepa onmokopaskiah kan owalewakeh. ¹⁶ Pero yejwah okitemoayah se tlali okachi kuali kan chanchiwaskeh, kijtosneki okinekiah chanchiwaskeh ilwikak. Yika Dios amo pinawa makilikah Inteko de yejwah, porke Ye yokimmajmanili se altepetl kan ilwikak.

¹⁷ Por itlaneltokalis Abraham, keman Dios okijejyeko, para kimiktis ikone Isaac, Abraham kichiwaskia tlan Dios okinawati porke okineltokaya. ¹⁸ Porke Dios yokilijka: “Ika mokone Isaac tikimpias miaktikeh mowejkaixwiwah.” *Gn. 21:12*

¹⁹ Abraham okimatia Dios kipia weletílistli para kiyolitis se non yomikki, yika weletis tikitoskeh Abraham oksepa okiseli ikone Isaac kemi yetoskia yomikka.

²⁰ Ika itlaneltokalis, Isaac okintiochi n Jacob iwa n Esaú iwa okinmili tlan kiseliskia satepa. ²¹ Noiwa ika itlaneltokalis, ikuak ya mikiskia n Jacob, omotlakxili ipan ibasto iwa okintiochi ipilwah n José, iwa okiweyijkachi Dios. ²² Iwa ika itlaneltokalis ikuak ya mikiskia n José, okinmili n israelitas satepa kisaskiah itech tlali de Egipto, iwa okinnajnawatijtewak tlan kichiwaskiah iwan iomiovah.

²³ Ika intlaneltokalis, ikuak otlákatki Moisés, itajwah okitlatijkeh eyi mestli, porke okitakeh kuajkualtsi n konetl, iwa amo okimawilijkeh itlanawatil n rey akin otlanawatijka makinmiktikah nochteh n kokoneh. ²⁴ Ika itlaneltokalis Moisés ikuak yokatka tlakatl, amo okinek makinotsakah ikone ichpoch n rey de Egipto. ²⁵ Yej okinek sansikah makitlaijyowiltikah iwan ipilwah n Dios, iwa amo san kech tonati mopaktijinemis itech inmelewilis n tlajtlákoli. ²⁶ Moisés okimatia nochí tlan se kijyowia por Cristo, okachi ipati ke nochí tlan okipiaya n rey de Egipto, ken itlachialis yokitlalijka itech n tlatliokólili non Dios kimakaskia. ²⁷ Ika itlaneltokalis Moisés okiski de Egípto, iwa amo okimawili ikualanilis n Rey de Egipto, Moisés amo omosotla, ken okimatia Dios okatka íwa, maya amo okitaya.

²⁸ Ika itlaneltokalis Moisés, okipewalti ilwitl de Paskua. Iwa okinnawati n tlakah de Israel makajselwikah inajnakastla inkaltenwah ika inmessó ichkameh, ijkó n ángel non kualinmiktiskia n kokoneh teteachkameh, amo makinmiki nion se chokotsi teteachka itech impilwah n tlakah de Israel. *Ex. 12:7 29* Iwa ika intlaneltokalis, n tlakah de Israel opanokeh itlajko atl non itoka mar chichiltik kemi yetoskia nejnentiwi ixko tlali waki, iwa ikuak n egipsios okinekiah panoskeh kemi yejwah, oapolakeh iwa omikkeh.

³⁰ Iwa ika intlaneltokalis, n tlakah de Israel onenenkeh iwa okiyawalojkeh chikomeh tonati n weyi tepamitl non kiyawalojtok n altepetl de Jericó iwa owetskeh n tepamimeh.

³¹ Iwa ika itlaneltokalis n awilsiwatl Rahab, amo omikki iwan amo tetlakitakeh, porke okinseli icha n ichtakateistlakojkeh de Israel.

³² ¿Tlan okachi weletis nomechilis? Amo nikajxilis nomechtlapowis de Gedeón, Barac, Sansón, Jefté, David, Samuel iwa n profetas. ³³ Porke otlaneltokayah inawak Dios, yika okintlankeh oksikimeh paísmeh, iwa kuali otekiwajtikeh iwa okiselijkeh nochí tlan

Dios okinmili kinmakas. Iwa okinkamatsakeh liomeh,³⁴ okinsewijkeh wejweyi tleme, oweletkeh omakiskeh ikuak kinmiktiskia ika espada. Non okatka amo chikawakeh okiselijkeh chikawálistli iwa omotlamitoh chikawakeh kan momijmiktilo, iwa okintoktjkeh matsinkisakah n soldadojteh non inkokolikniyah.³⁵ Ika intlaneltokalis sikimeh siwameh, Dios okichi oksepa mamoyolitakah ichantlakawah non yomikkeh.

Oksikimeh tlaneltokakeh mach okikajkeh Dios maya okintlaijyowiltijkeh, yej okimokawilijkeh makinmiktakah, ken yokimatiah moyolitiskiah iwa ijkó kiselskeh ok se yankuik yolitílistli.³⁶ Oksikimeh okimpipinawiayah teixpa iwa okinwitekeh, sikimeh okinmilpiayah ika kadena iwa oksikimeh okintsakuayah.³⁷ Sikimeh okinmiktijkeh ika tetl, sikimeh okintlajkotekeh ika serrote, iwa sikimeh okinmiktijkeh ika espada. Nika iwa nepa onentinemiah ken amo okinkawiliayah machanchiwakah, omotlakentijtinemiah sanwel ika inmewayo n ichkameh noso tentsomeh iwa satlawel próbesteh okatkah. Nochtek okintlawelitayah iwa okintlaijyowiltiayah.³⁸ Ninteh tokniyah okatkah saikpanoa kualteh n tlakah itech nin tlaltíkpaktli. Sentel onentinemiah kan amaka chanti, kan tepeyo, ijtk kúyokteh iwa wejweyi kuevajteh.

³⁹ Nochtek ninteh maya kuali okinselijkeh por intlaneltokalis, amo okiselijkeh tlan okinkakitijkah.⁴⁰ Ijkó otlamochi, para yejwah amo acho makalakiti iwa tejwah satepa. Tlamó Dios kimajmanaskia itla okachi kuali para tejwah.

12

Matiktlalikah totlachialis itech Jesús

¹ Yika, tejwah noiwah, non tikateh intlajko miakeh tokniyah non kuali yokiteititijkeh intlaneltokalis, matiktlakaltechokah nochi tlan techtsakuilia, n tlajtlákoli non techijlpia. Iwa ika miak yolchikawálistli matimotlelokah itech nin ojtli non kajki toyakapa.
² Matiktlalikah totlachialis itech Jesús, porke imak wits nochi totlaneltokalis, porke Ye otechititi kenomi titlaneltokaskeh. Jesús otlaijyowi itech krus, iwa mach omotekipacho kox saikpanoa tepinati ikuak se mikki itech krus, porke okimatiyah satepa de itlaijyowilis kipiaskia miak pakílistli, iwa axa ewatok ik iyekma kan Dios yayantitok.

³ Yika, tla kemania nonmosotlawah, san xikilnamikakah kenomi Jesús okixiko nochi tlan okitoktijkeh n tlajtlakolejkeh.⁴ Porke maya nonkixikojtokeh n tlaijyowílistli para amo nontlajtlakolchiwaskeh, nomejwah ayamaka nomechmiktia.⁵ Nomejwah yononkilkajkeh kenikki Dios kinnonotsa akimeh ipilwah. Ijkí kijtoa n tiotlajkuiloli: Nokone, amo san xikawilmati ikuak Toteko Dios mitsnonotsa, nion ximosotlawa ikuak chikawak mitsajwa.

⁶ Porke Toteko Dios kimilawa akin kitlasojtla, iwa kitsonwiteki akin kiselia kemi ikone.

Pr. 3:11-12

⁷ Xikxikokah keman Dios nomechmilawa, porke amo onka se teta non amo kimilawa ikone.⁸ Porke tla amo timomilawa, kemi se kinmilawa ipilwah, kijtosneki tejwah amo ipilwah n Dios, iwa Ye amo techselia.⁹ Ikuak tejwah otikatkah tikokoneh, totajwah tlaltikpaktlah otechmilawayah, iwa tejwah otikintlakitayah. Axa okachi tikpiyah tiktlakitaskeh Dios, ken Ye Teta de n espíritus, iwa ijkó tikpiaskah yolílistli.¹⁰ Nika ipan tlaltíkpaktli totajwah otechmilawayah kemi yejwah okiyeyekoliayah kuali para matimomilawakah. Pero Dios techmilawa porke milák kineki techpalewis, para matiyetokah tiyolchipawakeh kemi Ye.¹¹ Ikuak aka techmilawa, amo tikwelitah, porke techkokoa. Pero akin moyektlalia kipias yolsewílistli iwa yeknemis.

Xinemikah kemi Dios kineki

¹² Ijkó kiné, xikonanakah chikawálistli, nomomawah amo san machapantokah, iwa nomokxiwah amo san makuijkuatlaxiwakah.¹³ Xiktemokah n ojtli milaktik. Ijkó, nomokxi non omonekuilo, pajtis iwa ayakmó oksepa monekuilos.

¹⁴ Xiktemolikah kenomi weletis nonmoyekwikaskeh non nochtek, akin amo nemis ika iyolo chipawak, ayik kitas Totajtsi Dios.¹⁵ Kuali ximotlachilikah nonnochtek xikajsikah ikualtilis Dios, iwa amaka mayeto kemi n chichik xiwitl non teijtlakoa iwa

kinchichiyltia oksikimeh. ¹⁶ Nion se de nomejwah mamomekati, nion makajawilmati tlan Dios tlanawatia, porke ijkó okichi Esaú, akin okawilo tlan ita kimakaskia kemi teteachka, san por siki tlákuali. ¹⁷ Ijkuak Esaú okinek makitiochiwa ita kemi teteachka, ita ayakmó okitiochi, iwa maya miak ochokak Esaú, ayakmó owéletki okiyektlali tlan okichi.

¹⁸ Nomejwah mach ononmijkuanijkeh kemi n israelitas itsintla n tepetl Sinaí non se weleti kitelkoa, kan oxotlatoka tletl, kan otleyuatoka ika mextli, okatka tleyuálistli iwa chikawak oehekaya. ¹⁹ Noiwa mach ononkikakeh ijkuak okipitskeh se tlapítsali, nion itlajtol Dios ijkuak okintlapowi. Akimeh okikakeh non tlájtoli, okitlatlautijkeh ayakmó okachi makintlapowi, ²⁰ porke ayakmó okixikoayah non tlanawátili non okijoaya: “Tla aka tlakatl noso yolkatl kontlalis ikxi ipan tepetl Sinaí, makimojmotlakah ika tetl asta mamiki.” ^{Éx. 19:12} ²¹ Semi temohti tlan okitayah, yika asta inewia Moisés okijo: “Semi nimomojtia, asta nibibioka.” ^{Dt. 9:19}

²² Pero nomejwah ononmijkuanijkeh kan tepetl Sión, kan weyi altepetl de Dios non yolitok, kijtosneki kan yankuik Jerusalén non kajki ilwikak, innawak miaktikeh ángeles, ²³ ompa ololitokeh ipilwah teteachkameh non machotitokeh kan ilwikak. Nomejwah ya nonkateh ompa inawak Dios n teyolsewi. Noiwa ompakateh inmespíritus n yolchipawakeh. ²⁴ Yonomijkuanijkeh inawak Jesús, Akin techtlajtolpalewia inawak Dios, porke Ye otechalikili n yankuik tlájtoli non Dios otechmák. Iwa ika iesso Jesús non okitoya ijkuak omikki, Dios yotechtlapojpolwi de totlajtlakolwah. Yika Jesús okachi weyijkatitok ke Abel, porke iesso n Abel amo techtlapojpolwia yej kitlajtlani makimiktikah akin okimikti.

²⁵ Ximotlachilikah, amo kichiwa amo nonkikakiskeh Dios Akin nomechnonotsa. Porke amo omakiskeh towejkatatawah non amo okikakeh Dios keman okinnonotsaya kan tepetl Sinaí. Okachi tejwah amo timakisakesh tla amo tikkaki akin techalnonotok desde ilwikak. ²⁶ Itech nekateh tonatijmeh ijkuak Dios okintlapowi n tlakah de israel, otlalólinki. Iwa axa kijtoa: “Oksepa nikchiwas matlalolini, iwa axa amo san tlaltíkpaktli niktsejtselos, yej noiwa n ilwikak.” ^{Hag. 2:6} ²⁷ Iwa ijkuak okijo “oksepa”, non tlájtoli kijtosneki pojpoliwis nochí tlan molinia, iwa mokawas sanwel tlan amo mota. ²⁸ Iwa tejwah Dios techmaka se lojar kan Ye tlanawatijtok iwa ayik molinis. Yika, matiktlasojkamatikah iwa matikweyijkachiwakah ika weyílistli iwa tlasojtlálistli non Ye kipaktia, ²⁹ porke Totajtsi Dios se tletl non nochí kipaatiltia.

13

Kenomi weletis tikpaktis Dios

¹ Nochipa matimosepantlasojtlakah kemi tiiknimeh. ² Nochipa xitekalotikah keman nomechtlajtlaniliah, porke akimeh tekalotiah, amo kimatih okinkalotijkeh ángeles.

³ Xikinmilnamikikah non tsaktokeh, ken yaskia nomejwah inwah nontsaktokeh. Xikinmilnamikikah akimeh kintekipanoltiah, kemi yaskia nomonewiah.

⁴ Nochteh akimeh yomonamiktijkeh moneki mamotlakitakah, machipaujkanemikah iwa amo mamomekatiyah; porke Dios kintlaijywoltis akimeh momekatiyah noso awilnemi, non yomonamiktijkeh iwa non ayamó monamiktiah.

⁵ Amo xikapisnekikah tomi, xipakikah ika tlan ya nonkipiah, porke Dios yokijo: “Ayik nimitskajtewas moselti, nion nimitsilkawas.” ^{Dt. 31:6} ⁶ Yika, tejwah weletis tikijtoskeh ika miak tlaneltokálistli tlan kijtoa itlajtol Dios:

Amo nimawi, amaka weletis itla nechtoktis porke Dios nechpalewia.

⁷ Xikinmilnamikikah n tokniyah tlayakankeh akimeh onomechmachtijkeh itlajtol Dios, xikilnamikikah tlan kuali okichijkeh itech innemilis iwa xikchiwakah tlan yejwah okichijkeh.

⁸ Cristo Ye inewia, yala, axa iwa nochipa. ⁹ Yika, amo xikintlakitakah tlamachtílisteh non amo keman mokakih. Okachi kuali matechchikawa itlasojtlalis Dios, iwa amo

n tlamachtílisteh non kijtoah tlan se weletis kikuas iwa tlan amó, porke nonteh tlamachtílisteh amitla techpalewiah.

¹⁰ N tiopixkeh non otlamanayah kan achto artal, mach para kikuaskeh tlan tikpiah itech toartal. ¹¹ N tiópixki non tlayakantok, kiwika inmesso n yolkameh kan Lojar Santísimo, kemi se tlamánali para kímpojpolos tlajtlákolteh, pero innakayo nonteh yolkameh mochichinoa kala. ¹² Yika, Jesús noiwa okimiktiykeh kala, de n altepetl de Jerusalén, ye omikki para kintlajtlakolchipawas n tlakah ika iesso. ¹³ Ijkó kiné, tejwah noiwha matikisakah iwa matiwiah kan okiwikakeh Jesús, para matechpijpinawikah kemi ye okipijpinawijkeh. ¹⁴ Porke itech nin tlaltíkpaktli amo tikpiah se altepetl non wejkawas nochipa. Tejwah tiktemoah non sakin wits. ¹⁵ Yika, nochipa matikweyijkachiwakah Dios, ika Itoka n Toteko Cristo Jesús, nin weyijkachiwálistli ye n tlamánali non tikpiah tigmakaskeh. Matikweyijkachiwakah ika totlajtol iwa matiktenewakah Itoka. ¹⁶ Iwa amo xikilkawakah nonkichiwaskeh tlan kuali. Xikimpalewakah akimeh amitla kipiah, ye tlan Dios kipaktia.

¹⁷ Xikintlakitakah akimeh nomechyakanah iwa xikchiwakah tlan nomechnawatiah, porke yejwah nomechmokuitlawia, iwa kuali kímatokeh Dios kintlajtlanis kenomi onomechyakankeh. Xikintlakitakah para makichiwakah intekih ika pakílistli, iwa amo san matsoyontokah. Porke noni amitla nomechpalewiah.

¹⁸ Ximotrotsajtsilikah por tejwah. Tejwah kuali tikmatokeh amitla tlajtlácoli tikpiah, porke tiknekih tikchiwaskeh nochi tlan kuali. ¹⁹ Nomechtlatlánilia ximotrotsajtsilikah por ne, para Dios manechkawili sanima manomechitati.

Motrotsajtsilia iwa momakawa inwah

²⁰ N Dios teyolsewi, Ye akin okiyoliti n Toteko Cristo Jesús. Tejwah inawak Jesús kemi tiichkameh, iwa Ye Toweyi Tlájpixki. Ika iesso non okitoya ijkuak omikki, Dios omotlajtolsenka towa semijkak. ²¹ Ye manomechmachti nochi tlan kuali para nonkichiwaskeh tlan Ye kimonekiltia. Iwa por Cristo Jesús, Dios makichiwa itech nomonemilis tlan kimonekiltia. ¡Nochipa maweyijkatito n Toteko Cristo Jesús! Ijkó mamochiwa.

²² Nokniyah, nomechtlatlaujtia xikinselikah ika kuali ninteh tlájtolteh non ika nomechnonotsa, porke san kanaj kech tlájtoli onomechtla jkuilili.

²³ Nikneki xikmatikah tokni Timoteo yokikajkajkeh de kan otsaktoka, iwa tla sanima owala, nikuikas ijkuak nias nomechitati.

²⁴ Xikintlajpalokah nochteh akimeh nomechyakana, iwa nochteh n tokniyah tlanel-tokakeh.

N tokniyah de Italia nomechtla jpaloh.

²⁵ Ikualtilis Dios mayeto nomowa.

Namatlajkuiloli non okijuilo Santiago

Santiago kintlajkuililia non xitintokeh itech nochi n tlaltíkpaktli

¹ Ne, Santiago (Jacobo), ni itlakewal n Totajtsi Dios iwa n Toteko Cristo Jesús, nikintlajpaloa n májtakteh iwa n ome tribus non xitintokeh itech nochi n tlaltíkpaktli.

Dios techmaka ixtlamatílistli

² Nokniwah tlaneltokakeh, xipakikah ikuak nomechyejyekoskeh. ³ Porke ya nonkimatih ikuak kiyeyekoa nomotlaneltokalis, nomechmakah yolsewfílistli. ⁴ Pero xiktemolikah keniji nontlaxikoskeh asta iksemi, iwa ijkó nonyetoskeh okachi non kualteh iwa nonkichiwaskeh nochi tlan nomechnawatiskeh.

⁵ Tla seme de nomejwah amo kipia ixtlamatílistli, makitlajtlanili Dios. Ye nomechmakas miak ixtlamatílistli iwa amo nomechixtokilis. ⁶ Pero, ikuak itla tiktlajtlanis, xiktlajtlani ika nochi motlaneltokalis. Porke akin amo tlaneltoka ikuak kitlajtlani, noni kemi se ameméloli non kajki itech weyi atl, iwa n ejekatl san kiwiwika. ⁷ Akin ijkí iyialis, amo makijto, Dios itla kimakas. ⁸ Porke akin kiwilita kipapatlatos itlayejyekolis, amayik kichiwas tlan kimolia kichiwas.

⁹ Tla aka probe, mapaki porke miak ipati inawak Dios. ¹⁰ Tla aka tominyo, mapaki ikuak kita kemi non amitla ipati. Porke n tominyo kemi se xochitl non amo wejkawa iwa saniman waki. ¹¹ Ikuak kisa n tonati iwa pewa chikawak tona, n xiwitl piliwi iwa wetsi ixochio. Iwa san ompa tlami nochi tlan kuajkualtsi. Ijkó mochiwa n tominyo, nion ye, nion itomi wejkawaskeh.

Matitlaxikokah ikuak itla tipanoah

¹² Miak pakílistli kipias n tlakatl akin kixikoa nochi tlan kiyoltilana, porke ikuak kixikoa, mach ok mikkis. Iwa kiselis ikorona non kijtosneki yolitos nochipa kan ilwikak, non Dios okijto kinmakas akimeh kitlakitah. ¹³ Ikuak itla nomechytillana, amo xikijtokah Dios onomechtokti manomechytillana tlan amo kuali. Porke n amokuali amo weletis kitoktis Dios matlajtlakolchiwa, nion Dios weletis amaka kiyoltilanás matlajtlakolchiwa. ¹⁴ Mach ijkó, se tlakatl wetsi itech tlajtlákoli ikuak kimokawilia makiyoltilana tlan amokuali mokuatlápovijtok. ¹⁵ Yika, tlan amokuali tikyejyekolia tlaakati n tlajtlákoli, iwa ikuak moskaltia n tlajtlákoli techmiktia.

¹⁶ Notlasojikniwah, amo xikuatlapolokah, amo ximokajkayawah. ¹⁷ Nochi tlan kuali iwa yekmilajka wits de ilwikak iwa Dios techmaka. Inewia Dios okinchijchi n sítlalteh non kateh ilwikak, iwa ayik kipatlas. ¹⁸ Dios okinek matitlaakatikah ikuak otikkakeh itlajtol non milák, para matiyetokah titetiachkameh non okachi kuali itlakilo tlan okichijchi.

Matikchiwakah tlan kijtoa n kualitlájtoli

¹⁹ Notlasojikniwah, kuali xikkakikah tlan nomechilis: Nonnochteh san xitlamatokah ikuak nonkinkakiskeh oksikimeh, amo san nima xitlajtokah nion xikuálanikah. ²⁰ Porke ikuak se tlakatl kualantok, amo kichiwa tlan Dios kipaktia. ²¹ Ijkó kiné, xikkawakah nochi tlan teyolijtlakoa iwa nochi tlajtlákoli tlan onka, iwa xiyetokah nonyolyamankeh, iwa xikselikah n kualitlájtoli non yomotook nomotech. Porke non kualitlájtoli kipia weletílistli para nomechmakixtis.

²² Nomejwah amo san xikkakikah itlajtol Dios, yej xikchiwakah tlan kijtoa, porke tla amo nonkichiwasan nonmokajkayajtokeh. ²³ Akin kikaki itlajtol Dios, iwa amo kichiwa tlan kijtoa, noni kemi se tlakatl non moixtlajtlata itech se teskatl, ²⁴ iwa ikuak omoixtlajtlatak, yawi iwa kilkawa kenomi omotaya. ²⁵ Pero akin amo kilkawa tlan kikaki, iwa moyekketsa itech n yekmilajka tlanawátili iwa kimopantia, iwa kichiwa tlan kijtoa non tlanawátili, nochipa paktos ika tlan kichiwa.

²⁶ Tla aka kijtoa satlawel kitlakita Dios pero nemi san ika ikamak, san ye inewia mokajkayajtok iwa ireligión amitla ipati. ²⁷ N milajka tlaneltokálisli ixpa n Dios ye ni:

matikimpalewikhah n iknomeh iwan iknosiwameh ika tlan kimpoloa, iwa matinemikah ika toyolo chipawak iwa amo matechyoltilana tlan onka itech nin tlaltípkaktli.

2

Amo san xitechikotlasojtlakah

¹ Nokniyah, nomejwah akimeh ya nonkineltakah n Toteko Cristo Jesús, amo san sikimeh xikintlanekilikah iwa oksikimeh amó. ² Matikijtokah, kan nonmoololoah onkalaki se tlakatl iwa kiwika se ianiyo de oro iwa kuali tlakentiti, iwa san nima onkalaki ok se tlakatl non semi probe iwa sa tsotsoltik, ³ tla tigmopantia n tlakatl non yektlakentiti iwa tikilia: “Xiliki nika, nika ximoyayanti.” Iwa n tlakatl non probe non sa tsotsoltik, tikilia: “Te nonka ximoketo, noso nika itech tlali ximotlali.” ⁴ ¿Mach amo kijtosneki san sikimeh nonkintlanekiliah iwa oksikimeh amó? Nomejwah nonkichiwhah kemi se teyolsewi, non amo kuali itlayejyekolis.

⁵ Notlasojikniyah, techkakikah tlan nomechilis: Mach amo Dios okimpéjpenki n próbesteh itech nin tlaltípkaktli, para makipiakah miak tlaneltokálistli iwa maki-moaxkatikah tlan Dios yokinkakitija kinmakas akimeh kitlasojtlah. ⁶ Pero nomejwah nonkintlawelitah n próbesteh! Nomejwah kuali nonkimatih akimeh kipiah tomi, kintotojtokah n próbesteh iwa kintsakua. ⁷ Noiwa nonkimatih akimeh kipiah tomi, fiero kitenewa itoka n Toteko akin nomejwah ononkiselikkeh.

⁸ Ijkó kiné, tla milák nonkiyekchiwhah tlan kijtoa n weyi tlanawátili: “Xiktlasojtla mokni kemi te timotlasojtla”, yompa tlan nonkichiwhah. ⁹ Pero tla nomejwah san sikimeh nonkintlanekiliah iwa oksikimeh amó, nonkichijtokeh tlajtlákoli, iwa amo nonkichiwhah tlan kijtoa itlanawatil Dios. ¹⁰ Tla se tlakatl kintlakita n tlanawátilteh, pero kixpanawia san se, ika noni yokinmixpanawi nochteh. ¹¹ Porke inewia Dios okijo: “Amo ximomekati”, noiwa okijo: “Amo xitemikti.” Yika maya amo se momekatijtinemi, pero tla se temiktia, ika noni kixpanawia nochi n tlanawátili. ¹² Yika, kuali xikmatikah tlan nonkijtoah iwa kenomi nonnemih. N tlanawatílistli non temakixtia ye tetlaijyowiltiki itech n iksemi tonati. ¹³ Dios amo kinmiknomatis akimeh amo teiknomatih. Pero akimeh teiknomatih, nonteh kuali makisaskeh itech iksemi tonati.

Totlaneltokalis iwa tlan se kichiwhah

¹⁴ Nokniyah tlaneltokakeh, ¿tlan ipati tla sikimeh de nomejwah nonkijtoah nonkipiah miak tlaneltokálistli inawak Dios, pero amitla kuali nonkichiwhah?, ¿kox weletis nomech-makixtis non nomotlaneltokalis? ¹⁵ Matikijtokah, tla se tokni tlakatl noso siwatl, amo kipia tlan kimokentis nion amo kipia tlan kikuas non tonati, ¹⁶ iwa se de nomejwah kilia: “Ximuikati, xio ika kuali, ximotlakenti iwa xitlakua”, pero amo kimaka tlan koniitok kipoloa, ¡mach itla ipati tlan kilia! ¹⁷ Ijkó noiwa tla aka kijtoa kineltoka Dios pero amo kichiwhah tlan kuali, amitla ipati tlan kijtoa, noni kijtosneki miktok itlaneltokalis.

¹⁸ Pero aka weletis mitsilis: “Te tikpia motlaneltokalis, iwa ne nikchiwa tlan kuali.” Techititi motlaneltokalis iwa techititi tlan kuali tikchiwa, iwa ne nimisitis milák nikneltoka Dios ika tlan kuali nikinchiwilia oksikimeh. ¹⁹ Te tikneltoka sanwel se Dios onka, kualiká tlan tikneltoka. Pero xikmati, noiwa n demóniojteh kineltokah sanwel se Dios onka iwa bibiokah. ²⁰ Pero te tokni akin amo tikneki titlakakis, amitla ipati motlaneltokalis tla amitla tikchiwa. ²¹ Towejkatata Abraham okipakti Dios, ikuak okitlali ikone Isaac ipan artal para kimiktis. Yika Dios okiseli kemi yolchipawak. ²² Itlaneltokalis Abraham omoteititi ika tlan ye okichi. Yika, ika tlan ye okichi itlaneltokalis omoyekajxiti. ²³ Ijkó omochi tlan kijtoa itlajkuil Dios: “Abraham okineltokak Dios, iwa ika itlaneltokalis Dios okiseli kemi se tlakatl yolchipawak.” Ijkó Abraham omochi itlakaikni n Dios.

²⁴ Ijkó kiné, Dios techselia ika tlan tikchiwa, iwa amo ika tlan tikneltokah. ²⁵ Noiwa ijkó otlamochi iwan awilsiwatl Rahab, Dios noiwa okiseli kemi yolchipawak ken okinkaloti iwa okintlaati n ichtakateistlakojkeh itech icha, iwa okimpalewi macholokah itech ok se ojtli. ²⁶ Yika, tla se kuerpo amo kipia espíritu, non kuerpo miktok, ijkó noiwa totlaneltokalis amitla ipati tla amitla tikchiwhah.

Tejwah matiktlakawaltikah tonenepil

¹ Nokniyah, amo san akin yetos makineki mayeto tlamachtí, porke ya nonkimatih, akimeh titlamachtiah moneki kuali matitlamachtikah tla amó, okachi techtlaijyowitziskeh. ² Tinocchteh kualchiwa titlajtolpanoah, iwa tla onka se tlakatl non amo kimati motlapololtia ikuak itla kijtoa, non tlakatl yekmilajka iwa weletis kinawatis nochí ikuerpo. ³ Ikuak tejwah tikkamatepostiah se kabayo techtlakita, ijkó tiweleth tiknawatia nochí ikuerpo. ⁴ Noiwa xikinmitakah n wejweyi barkojteh, maya chikawak maejekato iwa makiwiwika n ejekatl, san ika se tsijtsikitsi timón se tlakatl non kimati weleti kinnejnemitia san kan ik ye kineki. ⁵ Noijkó timochiwa ika tonenepil. Ye non okachi tsijtsikitsi itech tokuerpo, pero ikuak waltlajtoa, weleti kinmijtoa wejweyi tlajtolteh. Kemi se tletsintli, maya san tsijtsikitsi pero weleti kixotlaltia se weyi kuaujyo! ⁶ Tonenepil se tletl, iwa kipia miak weletílistli para kichiwas tlan amokuali. Weletis kijtlakos nochí tonemilis, iwa nin tletl walewa de miktla. ⁷ N tlaltípkaktlakatl weleti kisewilismachtia nochí yolkatl, n totomeh, koameh, iwa n yolkameh non kateh ijtk weyi atl. ⁸ Pero amaka weleti kitlakawaltia inenepil. Tonenepil satlawel amokuali iwa amo kimotekawilia aka makinawati, tentok ika miak beneno non temiktia. ⁹ Ika tonenepil tikweyijkachiwah Totajtsi Dios, iwa ika tonenepil tikinwikaltiah akimeh Dios okinchijchi kemi Ye. ¹⁰ San ika se tokamak tikweyijkachiwah Dios noso titlawikaltia. Nokniyah, amo ye tlan tikchiwha. ¹¹ ¿Kox weletis san itech se améyali kisas atl tsopelik iwa atl non chichik? ¹² Nokniyah, ¿weletis se igoskuawitl kitlakiltis tempíxkistli?, noso ¿se uvaskuawitl weletis kitemakas igos? Ijkó noiwa, amo weletis kisas atl tsopelik iwa atl puyak san itech se améyali.

N ixtlamatílistli non Dios kitemaka

¹³ Tla aka semi ixtlamati iwa nochí kajsikamati, makiteititi ika iyeknemilis itech nochí tlan kichiwa. Iwa tla milák ixtlamati, amo mamoweyili. ¹⁴ Tla nomejwah nonkipiah nexikólistli iwa nontekokolah itech nomoyolo, ayakmó xixankuatikah iwa xikchiwakah tlan milák. ¹⁵ Porke non tlamachtílistli amo walewatok itech Dios, yej san itlamachtilis nin tlaltípkaktli non kitemaka n amokualtlakatl. ¹⁶ Yika kan onka nexikólistli iwa tlanetéwili, ompa xejaxelitokeh iwa onka nochí tlan amokuali. ¹⁷ Pero akimeh kipiah n ixtlamatílistli non Dios kitemaka, amo kichiwha tlan amokuali, yej kitemoah yolsewílistli, yej wah tetlakitah iwa kualteh n tlakah iwan nochteh. Yej wah teiknomatkeh iwa kimatih tepalewiah, iwa nochipa kichiwha tlan kuali. Amo san techikotlasojtlah, nonteh de milajka tlaneltokakeh. ¹⁸ Yika, akimeh mochijchikawah mayeto yolsewílistli innawak nochteh n tlakah, Dios kinmakas yolsewílistli iwa kipiaskeh yeknemílistli.

Xikmopantikah Totajtsi Dios

¹ ¿Kani walewa n tlájtoli non ika pewa nonmokuakualaniah? Walewa nomotech, itech tlan amokuali kiapisneki nomoelewilis. ² Nomejwah nonkinekih itla, pero mach nonweletih nonkipiah, yika nontemiktiah, nonxikojmikih ika tlan ok se kipia, iwa kemi nomejwah amo nonweletih nonkiseliah, pewa nonmokuakualaniah iwa tlami nonmokuah. Amo nonkipiah tlan nonkinekih, porke amo nonkitlajtlaniliah Dios. ³ Iwa tlan nonkitlajtlanilah amo nonkiseliah. Amo nonkiseliah porke nonkitlajtlanilah san para nonkipaktiskeh nomokuerpo. ⁴ ¡Mekatánajteh! ¿Amo nonkimatih, ikuak okachi nonkitlasojojtlah tlan onka itech nin tlaltípkaktli nonmokopah nontetlawelitakeh inawak Dios? Nochi akin kimoknitia tlan amokuali onka itech nin tlaltípkaktli, iselti mokopa ikokolikni n Dios. ⁵ Yika n tiotlajkuíloli kijtoa: “N espíritu non Dios okitlali totech, satlawel kitlasojojla asta kichawatilia.” ⁶ Pero Dios okachi techpalewia ika iteiknomatilis; yika n tiotlajkuíloli kijtoa: “Dios kintlawelita akimeh moweyliah, pero kimpalewia ika

iteiknomatilis akimeh moiknomatih inawak.”

Pr.

3:34 ⁷ Yika, xikmopantikah Dios iwa ximochijchikawah para amo manomechtlanin amokualitlakatl, iwa ye nomechcholilis. ⁸ Xiwalmijkuanakah inawak Dios, iwa Ye mijkuanis nomonawak. ¡Nomejwah akimeh nontlajtlakolchijtinemih, xikinchipawah nomomawah de nomotlajtlakolwah. Akimeh amo yektlakxilitokeh, ximoyolchipawah!

9 Ximotekipachokah, ximoyolkokakah iwa xichokakah. Nomowetskalis mamokopa chokílistli iwa nomopakilis mamokopa neyolkócoli. **10** Ximoiknomatikah inawak Dios, iwa Ye nomechweyijklalnis.

Amo matikpojpoakah se tokni

11 Nokniwah, amo xitepojpoakah. Akin kipojpoa se tokni, mochiwa ken kipojpoaskiah itlanawatilis Dios. **Stg. 2:8** Iwa tla tikpojpoa itlanawatilis Dios, ayakmó tiktakita itlanawatilis, yej tikixnamiki. **12** Pero sanwel onka se Akin okitemák n tlanawátili, Ye Akin temakixtia iwa tetlajtlakoltia, ¿akin te non tikjtoa kox kuali noso amo kuali tlan kichiwa se mokni?

Amo ximotekipachokah ken nonpanoskeh mostla

13 Axa, xikkakikah akimeh nonkijtoah: “Axa noso mostla, tiaskeh itech neká altepetl noso itech ok se altepetl; ompa titlasemanaskeh se xiwitl iwa tiktlaniskeh tomi.”

14 ¿Tleka ijkó nonkijtoah, iwa amo nonkimatih tlan tlamoche was mostla?, ¿tlan ipati nomonemilis?, nomonemilis méxpoktli: porke ijkó kemi monextia, ijkó noiva san walpoliwi. **15** Okachi kuali ijkí xikijtokah: “Tla Dios kimonekiltia matiyolitokah, tikchiwaskeh nin tekitl noso neká ok se.” **16** Pero nomejwah non moweyitlalih itech tlan nonkinekih nonkichiwaskeh, iwa nochi nomoweyilis satlawel amo kuali. **17** Porke akin kimi kichiwa tlan kuali, iwa amo kichiwa, tlajtlakolchiwah.

5

Nikirnonotsa akimeh kitlawelpiah tomi

1 ¡Kuali xitlakakikah nomejwah akimeh nonkipiah tomi! Xichokakah iwa xitsajtsikah por nochi n tlaijywílistli non nomopah wetsis. **2** Nochi tlan nonkipiah palanis, iwa nomotlaken wah kinkuas n tlalxinachi. **3** Nomo oro iwa nomo plata yoxawaloak, iwa non xawalo nomechteilis itech n iksemi tonati, iwa nomechpojpolos kemi tletl, porke ononkoololojkeh miak tomi itech iksemi tonatijmeh. **4** ¡Xikakikah! Nomejwah mach ononkinyektlaxtlawijkeh nomotlakawah. Yejwah tlawelchokah inawak Dios. Iwa Dios weletini non kinyakana isoldadojwah de ilwikak yokinkakilih inchokilis nonteh tetlakéwalteh. **5** Nomejwah akimeh non kipiah tomi, yononmopaxialoltijkeh san kanik nomejwah ononkinekeh, iwa asta yononmotomajkeh kemi torojteh non ya kinwikah kan tlamiktilo. **6** Nomejwah yononkintlajtlakolmamaltijkeh iwa ononkinmiktijkeh akimeh amitla okitewikiliyah, iwa yejwah amo omochijchikajkeh mopaleewiskeh.

Xikxikokah n tlaijywílistli iwa ximotiotstsajtsilikh

7 Yika, nokniwah, ximoyekchiakah asta mawiki n Toteko Cristo. Xikchiwah kemi se non tooka, iwa kineki kipixkas kuali tlakilo, iwa kichia non sikanika kiawitl ikuak tlaselia iwa non iksemi kiawitl. **8** Ijkó nomejwah ximoyekchiakah, iwa amo ximosojsotlawakah, porke n tonati ikuak walmuikas Toteko ya walajsitiwits.

9 Nokniwah, amo ximoixtokakah, ijkó Dios amo nomechtlajtlakoltis, porke Dios n teyolsewi, ya walkalakiki. **10** Nokniwah, xikitakah kenomi otlaijywíjkeh iwa kenomi otlavikojkeh n profetas, non otlajtojkeh itech Itoka n Toteko Dios. **11** Milák, matikinmitakah kateh ika pakílistli akimeh okixikojkeh n tlaijywílistli: Nomejwah nonkimatokeh kenomi Job okixiko nochi n tlaijywílistli, iwa yononkitakeh tlan okimák sa iksemi n Toteko Dios. Porke n Toteko Dios satlawel tetlasoxtlak iwa teiknoma.

¹² Yika, nokniwah, nomejwah amo xikijtokah, “Dios tlachixtok,” noso “n tlaltíkpaktli tlachixtok,” ikuak itla nonkisentlaliah. Tla aka nomechtajtlania itla nomejwah san xitlanankilikah “ejé” noso “amó”. Amitla xikajaxitlikah para amo nonmotlajtlakoltiskeh ixpa n Dios.

¹³ Tla aka motekipachojtinemi, mamotrotsajtsili. Tla aka paki, makiweyili totajtsi Dios iwa makitlakuikili. ¹⁴ Tla aka mokokoa, matlatitlani makinnotsatih n tetajmeh non tlayakantokeh kan nonmoololoah iwa makimotrotsajtsilikh, iwa makixawilikah chiawak itech Itoka n Toteko. ¹⁵ Iwa ikuak motrotsajtsiliah ika tlaneltokálistli, n kókoxki pajtis iwa Toteko kajkokuis iwa tla itla tlajtlácoli okichi, kitlapojpolwilis. ¹⁶ Ijkó kiné, non nochteh xikinmokuitikah nomotlajtlakolwah se iwan ok se, iwa ximosepantrotsajtsilikh para xipajtikah. Porke n tiotsajtsílistli non se tlakatl yolchipawak kichiwa ika noch iyolo, kipia miak weletílistli. ¹⁷ N profeta Elías okatka se tlakatl kemi tejwah, iwa ikuak omotrotsajtsili ika noch iyolo para amo makiawi, amo okiauji eyi xiwitl iwa n tlajko. ¹⁸ Satepa oksepa omotrotsajtsili para makiawi, iwan ilwikak okitemák miak kiawitl, iwa n tlali miak otlatlaki.

¹⁹ Nokniwah, tla aka tokni kikawa n kuali ojtli, iwa ok se tokni kipalewia mawalmokopa, ²⁰ nikneki xikmatikah, akin kitoktia se non tlajtlakolchijtinemi ayakmó matlajtlakolchiwa, kimakixtia imak mikílistli, iwa kichiwa Dios makitlapojpolwi de miaktijkeh tlajtlakolwah.

Non sakinika iamatlajkuilol San Pedro

Pedro kintlajkuililia n tlaneltokakeh non sentel xitintokeh

¹ Ne, Pedro ni itlatematilti n Cristo Jesús, nomechtlajkuililia nochteh nomejwah, akimeh ononmochantitoh wejka, kan tlali de Ponto, Galacia, Capadocia, Asia iwa Bitinia. ² Totajtsi Dios yowejka onomechpéjpenki iwa ijkó kichiwas nomowah kemi yokimoli kichiwas. Dios ika Iespíritu onomechpéjpenki para xiktlakitakah iwa ijkó ximochipawakah ika iesso n Cristo Jesús. Dios manomechmaka miak tlatiochiwálistli iwa manomechmaka iyolsewilis.

Timoyolchikajtinemih itech tlan ye techmakas

³ Matikweyijkatlatlikah Dios Itajtsi n Toteko Cristo Jesús, porke ika imikilis iwa iyolitis n Cristo, otechyankuili toyolilis. Ika iteiknomatilis okipatlak tonemilis. ⁴ Ye kichiwas xikselikah n tlatliokólili non Dios nomechtlaatilitok ilwikak. Non tlatliokólili amo ijtlakawis, amo pochewis, nion piliwis. ⁵ Kemi nomejwah nonkineltokah Dios, Ye nomechpalewia ika iweletilis para xikajxilikah nin temakixtílistli non Ye yokimájmanki para kiteixmatiltis intech iksemi tonati.

⁶ Yika, nomejwah xikpiakah pakílistli, porke nontlaijywiskeh kanaj kech tonati. ⁷ Para momatis kox milák nontlaneltokah, kipiah nonmochiwaskeh kemi n oro. Yika, ken momatis kox milák kuali n oro, trato moyejyekos itech tletl. Akin milák tlaneltoka, kixikoa nochi n tlaijywílistli, iwa okachi miak ipati ke n oro, porke n oro weletis pojpoliwi. Yika, tla nomechyejyekoskeh kox nonkineltokah n Cristo Jesús, iwa tla kuali nonkisaskeh ikuak nomechyejyekoskeh, nomechtlakitaskeh iwa kuali nomechtemewaskeh itech non tonati ikuak Cristo Jesús oksepa walmuikas.

⁸ Nomejwah nonkitlasotlah n Cristo, iwa nonkineltokah maya amo nonkitah. Yika, nomejwah nonpakih ika se weyi pakílistli non amo nonweletih nonkitenkixtiah, ⁹ nomejwah nonnemi ika pakílistli porke ya nonkimatih Dios kimakixtis nomoalma, yika nonkineltokah.

¹⁰ N profetas okimomachtijkeh itlajkuilol Dios, porke okinekiah kimatiskeh kenomi kajsiskeh n temakixtílistli, iwa otetlapowijkeh tlan Dios nomechmakaskia ika itlasotlalis. ¹¹ Ikuak ayamó ovalaya n Cristo itech nin tlaltíkpaktli, Iespíritu okinmachtiaya n profetas tlan Ye tlaijywiskia itech nin tlaltíkpaktli, noiva okinmachtiaya nochi tlan kualtsi satepa panoskia. Iwa n profetas okinekia kimatiskeh akin yetoskia n Cristo iwa kemanía walaskia itech nin tlaltíkpaktli. ¹² Pero Dios okinmajsikamatilti tlan yejwah okitetlapowiayah amo san para yejwah, yej nomejwah noiva. Ye ni n tlanawatílistli non onomechmakakeh nomejwah akimeh onomechititjkeh n kuali tlájtoli. Iwa okichijkeh ika iweletilis n Espíritu Santo non okititlankeh de ilwikak. ¡Nochi ni n ángelteh kinekiskia kitaskeh!

Totajtsi Dios technotsa matinemikah ika toyolo chipawak

¹³ Yika, kuali xitlanamiktakah, iwa kuali xiijsatokah. Ximoyolchikawakah itech tlan Dios ika itlasotlalis nomechmakas ikuak Cristo Jesús monextis. ¹⁴ Kemi tepilwah tetlakitakeh, amo xikchijtinemikah tlan achto ononkichiwayah ikuak ayamó ononkixmatiah Dios. ¹⁵ Okachi kuali xinemikah non yolchipawakeh, porke Dios Akin onomechnotski, Ye yolchipawak. ¹⁶ N tiotlajkuíloli kijtoa: “Xiyetokah nonyolchipawakeh, porke Ne niyolchipawak.”

¹⁷ Yika, tla nomejwah Dios nonkinotsah “Notajtsi” Akin nochteh kinmixkomakas san akin yetos, moneki nochipa xikiimakajsikah axa ikuak ok nonyolitokeh itech nin tlaltíkpaktli. ¹⁸ Dios onomechkixti itech nomonemilis non amitla ipati non onomechititjkeh nonmotatawah. Iwa kuali nonkimatih nin temakixtílistli amo omotlaxtla ika tlan ijtlakawi, kemi n oro noso n plata, ¹⁹ yej ika iesso n Cristo non okachi miak ipati, se ichkatsi

kemi tlamánali, kuali iwa chipawak. ²⁰ Nochi ni, Dios yokijtojka kichiwaskia ikuak ayamó okimajmanaya n tlaltípkaktli, iwa Cristo omonextiko sa itech ninteh iksemi tonatijmeh, iwa ijkó ximomakixtikah nomejwah. ²¹ Ika tlan Cristo okichi nomejwah nonkineltokah Dios, Ye okiyoliti intsalko mikemeh iwa okiweyijkachi. Yika, nomejwah nonkineltokah Dios, iwa kuali nonkimatih Ye nomechmakas nochi tlan okisentlali. ²² Axa nomejwah keman nonkitlakitah n kualtlájtoli non milák, nomejwah yononmoyolchipajkeh iwa nonkinyektlasojtlah nomokniyah tlaneltokakeh. Yika, moneki ximosepantlasojtlakah ika nochi nomoyolo, iwa ika nochi nomochikawalis. ²³ Nomejwah oksepa onontlakatkeh. Onontlakatkeh ika itlajtol Dios non kitemaka yolílistli iwa amo keman tlami. ²⁴ Itlajkuilol Dios kijtoa:

Nochteh n tlaltípkaktlakah kateh kemi xiwitl,
iwa inweyilis kemi ixochio n xiwitl.

N xiwitl waki iwa ixochio wetsi,
²⁵ pero itlajtol Toteko nochipa wejkawas.
Nin tlájtoli ye tlan yonomechmatiltjkeh.

Is. 40:6-8

2

¹ Yika, xikkawakah nochi tlan amo kuali.

Amo xitlakajkayawah,
amo xiyetokah nonmixkopteh,
amo xixikojmikakah,
nion xixolopijtinemikah.

² Ijkó kemi n selekkokaneh, non satlawel kinekih inlechi, ijkó nomejwah xiktemokah itlajtol Dios, iwa ika ximoskaltikah iwa xikpiakah temakixtílistli. ³ Nomejwah yononka-
jsikamatkeh Toteko teiknomatih.

Cristo n tetl non yolitok

⁴ Xiwalmíjkuaniyah inawak Cristo, Ye n tetl non yolitok. N tlakah okitlakaltechojkeh, pero Dios okipejpenki non Tetl non miak kijtosneki. ⁵ Ijkó, nomejwah kemi temeh non yolitokeh, xikkawilikah Dios manomechtektilti. Ijkó makichijchiwa se kali non amo mota, iwa por Cristo Dios kiselia ika pakílistli tlan nonkitlamaniliah kemi tiopíxkeh chipawakeh. ⁶ Yika n tiotlajkuíloli kijtoa:

Ne niktlalia itech altepetl Sión,
se tetl non okachi ipati, tlapejpénali iwa kuajkualtsi.

Iwa akin itech tlaneltokas ayik mopijpinatis. *Is. 28:16*

⁷ Nomejwah akimeh nonkineltokah Dios, nin tetl miak ipati. Pero akimeh amo kineltokah, mochiwa tlan kijtoa n tiotlajkuíloli:

N Tetl non n kalchijchijkeh okachijkeh,
yomochiwako n tetl non okachi tetlakxili. *Sal. 118:22*

⁸ Noiwa kijtoa n tiotlajkuíloli:

Se tetl non teikxitlanwia, iwa se tetl non kichiwa aka mawetsi. *Is. 8:14*

Yejwah moikxitlanwiah porke amo kitlakitah n kualtlájtoli. Ye noni tlan ika ovalajkeh.

⁹ Nomejwah Dios onomechpéjpenki. Nomejwah non tiopixkeh de Dios, nomejwah nonyolchipawakeh, se pueblo non iaxka Dios. Para nonkitematiltiskeh tlan tetlajt-
lachialti kichiwa, Akin onoméchnotski kan tleyuálistli iwa onomechwík xinemikah itech itlawil tetlajtlachialti.

¹⁰ Achto nomejwah amo iaxkawah Dios, pero axa ya tlapejpenilwah Dios, achto amaka onomechiknomatia, pero axa Dios nomechiknomati.

Nochipa xiktekitilikah Dios

¹¹ Notlasojikniyah, nomechtlatlaujtia, kemi akimeh san panoah noso san nejnenkeh itech nin tlaltípkaktli, amo xikkawilikah manomechyoltiana tlan kelewia nomokuerpo, porke noni san nomechixpolos. ¹² Kuali xinemikah inmixpah non amo kineltokah Dios, porke maya axa nomechteiliah kemi non yaskiah amo nonkualteh, yejwah kitaskeh

nochi tlan kuali nonkichiwah iwa kiweyijkachiwaskeh Dios itech neká tonati ikuak Ye kintlaxtlawis kemi moneki.

¹³ Ijkó kemi nomejwah nonkitlakitah Toteko Dios, noiva xikintlakitakah nochteh n tekiwajkeh itech nin tlaltípkaktli, iwa amo sanwel non okachi weyijkatitok, ¹⁴ yej noiva n gobernadores non ye kintlalia para makintlaijyowiltakah akimeh kichiwah tlan amokuali, iwa para makinyekitakah akimeh kichiwah tlan kuali. ¹⁵ Porke Dios kineki xikchiwakah tlan kuali, para nonkinkamatsakuaskeh akimeh amitla kimatih iwa kuamímikteh.

¹⁶ Nomejwah xinemikah kemi non ayakmitla nomechilpijtak, pero amo para nonkichiijinemiskeh tlan amokuali, yej xinemikah kemi itekitwah Dios. ¹⁷ Xikintlakitakah nochteh, xikintlasojoatlakah n tokniwah, xikiimakajsikah Dios, iwa xiktlakitakah n weyi tlanawati.

Matikxikoh n tlaijyowílistli kemi Cristo okixiko

¹⁸ Tetlakéwalteh, xiktlakitakah nomoteko. Amo san akimeh kualteh n tlakah, yej noiva non tetlawelitakeh. ¹⁹ Tla nomechtalaijyowiltiah iwa nomejwah amitla ononkichiijeh xikxikoh, Dios kintiochiwa akimeh ijkó panoah. ²⁰ Tla nomechtalaijyowiltiah por ononkichiijeh tlan amokuali, iwa nonkixikoah, ¿itla ipati non tlaijyowílistli? Pero tla nomechtalaijyowiltiah por ononkichiijeh tlan kuali, iwa kuali nonkixikoah, Dios nomechtiochiwas. ²¹ Ika ye Dios onoméchnotski. Cristo otlaijyowi topatka, ijkó otechititi keniji tikchiwaskeh. ²² Cristo amayik okichi tlajtlákoli, iwa ayik otlaajkaya. ²³ Keman okiwijwikaltiayah, Ye amo okinnankiliaya, ikuak okitlaijyowiltiayah, Ye amo okimiliaya kimokopilis, yej nochí okikawaya imak Dios, non teixkomaka kemi moneki. ²⁴ Cristo inewia itech ikuerpo okinwík kan krus totlajtlakolwah. Iwa ijkó tejwah ayakmó titlajtlakolchiwaskiah, yej tikchiwaskiah tlan kuali. Ye okikojkojkeh iwa ijkó nomejwah ononpajitikeh.

²⁵ Achto nomejwah ononnemiah kemi ichkameh non omoixpolojtinemiah, pero axa yononwalmokopkeh inawak n tlápixki non kinmokuitlawia nomoyolilis.

3

Kenomi moneki mamoyekuikakah non yomonamiktijkeh

¹ Nomejwah siwameh, xiktlakitakah nomookich. Ijkó, non amo tlaneltokakeh, tlaneltokaskeh ikuak nomechitaskeh keniji nontetlakitah, iwa mach ok monekis xiktetlapowikah itlajtol Dios. ² Porke yejwah kitaskeh kenomi nonmoyekuikah iwa nonmotlakitah. ³ Amo san ximochijchiwakah ik páñixko, kemi n siwameh non saikpanoa mochijchiwah, noso kimopipilitah oro, iwa motlakentiah ika kuajkualteh tlakemeh. ⁴ Yej xiyetokah tlakualtsi ik tlajtik, itech nomoyolo, nochí tlan kuali amo poliwi, yej tikpias se espíritu yámanki ika yolsewílistli, ni tlan okachi ipati ixpa n Dios. ⁵ Porke yowejka, n siwameh yolchipawakeh non okimopantiyah Dios, tlan kuajkualtsi okipiayah omonextiaya itech inyolo. Yejwah omoyolchikajtinemiah inawak Dios iwa okintlakiatyah inmokich. ⁶ Kemi Sara okitlakitya Abraham iwa okiliaya “noteko”, nomejwah nonmochiwiatiweh kemi ye, tla nonkichiwah tlan kuali iwa amaka nonkiimakajsih.

⁷ Noiwa te, teokich, xikajsikamati mosiwa, moneki kuali xikmokuitlawi, amo san por kittoa amo chikawakeh, yej porke noiwha kiseliskeh n nemílistli kan ilwikak non Dios yokijo techmakas. Ijkó amitla kitsakuilis nomotrotsajtsilis.

Akimeh kintlaijyowiltiah por kichiwah tlan kuali

⁸ Ye ni tlan moneki xikchiwakah: Nochipa ximoyekwakakah, ximoteiknomatikah iwa ximotlasojoatlakah kemi nonmiknimeh. Xikmatikah xikintlasojoatlakah oksikimeh iwa xiyetokah nonyolyamankeh. ⁹ Tla nomechtoktiah itla amokuali, amo xikmokopilikah, nion xikwijkaltikah akin nomechwijwikaltia, yej xikintiochiwah, porke Dios onomechpéjpenki para xikselikah itlatiochiwali.

¹⁰ Akin kinekis yolitos iwa nochipa paktinemis,

makitlakawalti inenepil para amo mapitsotlajtojtinemi.

Iwa amo matlakajkayajtinemi.

¹¹ Makikawa tlan amokuali iwa makichiwa tlan kuali,
iwa makitemo n yolsewílistli iwa amo makikawah.

¹² Porke Toteko Dios kintlajtlatok n yolchipawakeh,
iwa kinkakilia intiotsajtsilis,
pero kinmixnamiki akimeh kichiwhah tlan amokuali.

Sal. 34:12-16

¹³ Amaka weletis nomechtoktis tlan amokuali, tla nomejwah nochipa nonkichiwhah tlan kuali. ¡Amaka! ¹⁴ Pero tla nomechtlaijyowiltiah por nonkichihtinemih tlan kuali, ¡xipakikah! Iwa amo xikinmawilikah. ¹⁵ Okachi kuali xikweyijkachiwakah Cristo ika nochii nomoyolo, porke Ye Nomoteko. Iwa xikmatikah kenomi nonkinnankiliskeh nochteh akimeh nomechtlajtlaniah tlan nomechylchikajtok. ¹⁶ Xikpiakah yolyamanílistli, xikiimakajsikah Toteko. Kuali xiyeknemikah kemi non tlaneltokakeh itech Cristo para akimeh nomechmawistetepewa, mapinawakah ika tlan kijtoah. ¹⁷ Tla Dios kimonekiltia, okachi kuali manomechtlaijyowiltikah por nonkichiwhah tlan kuali, iwa amo por nonkichihtinemih tlan amokuali.

¹⁸ Cristo san se welta omikki iwa okintlaxtla totlajtlakolwah. Tejwah amo tikualteh, Ye okatka kuali tlakatl, okitlaijyowiltijkeh topatka iwa otechwík inawak Dios, omikki itech ikuerpo pero omoyoliti ika espíritu. ¹⁹ Iwa ijkó okintlapowito n kualtlájtoli n espíritus non tsakteh. ²⁰ Nonteh espíritus amo otetlakitakeh itech tonatijmeh ikuak Noé onemia, Dios omóchixki mamolnamikah, ikuak Noé okichijchiwaya n arka. Sanwel chikweyi omomakixtijkeh imak n weyi kiawitl. ²¹ Non atl, okitenextiko n tlakuaatekílistli non axa nomechmakixtia. Ikuak timokuaatekiah tikteititiah iyolitis Cristo Jesús non yotechmakixtiko. Amo timokuaatekiah para mamochipawa tokuerpo, yej kicipawa totlalnamikilis. ²² Axa Cristo Jesús kajki ilwikak iyekma n Totajtsi Dios, iwa imak kateh ángeles, nochteh non kipiah tekiwajyo itech nin tlaltíkpaktli, iwa nochii tlan kipia weletílistli.

4

Matinemikah kemi Dios kipaktia

¹ Yika, ijkó kemi Cristo otlaijyowi itech ikuerpo ipan krus, nomejwah noiva ijkó nontlaijywiskeh. Porke akin yomikki itech ikuerpo, yokika n tlajtláktoli. ² Ijkó, ayakmó nonkichiwaskeh tlan kineki nomokuerpo ikuak nonyolitoskeh, yej nonkichiwaskeh tlan Dios kimonekiltia. ³ Miak xiwitl nomejwah ononkichihtinenkeh tlan kiwilitah kichiwaskeh akimeh amo kitlakitah Dios. Ononmoixpolojtinemiah iwa ononkichiwayah tlan kelewiah nomokuerpo, onontlawantinemiah, ononmopaktijtinemiah itech ilwimeh pitsotikeh. Iwa tlan okachi tetlajyalti, ononkinweyijkatlaliyah diosmeh non san kinmachijchiwah. ⁴ Akimeh inwah ononnemiah, axa motlajtlachialtiah porke nomejwah ayakmó nonkichiwhah tlan acho ononkichihtinemiah inwah, yika axa nomechpojpoah. ⁵ Pero yejwah moteixpantiskeh ixpa n Dios, Akin sa mochixtok kinmixkomakas akimeh yolitokeh iwa non yomikkeh. ⁶ Yika, noiva okinmatiltijkeh n kualtlájtoli non yomikkeh, porke maya yokinmixkomakakeh kemi kinmixkomakah n tlakah, inmespíritu weletis yolitos inawak Dios.

⁷ Ya walajsi n tonati ikuak nochii pojpoliwi. Yika, nomejwah xinemikah ika nomotlalnamikilis chipawak iwa nochipa ximotrotsajtsilijtokah. ⁸ Tlan okachi moneki, ximosep-antlasojojtlakah, porke akin milák tetlasojojtlá, kimiati tetlapojpolwia. ⁹ Xitekalotikah iwa amo ximotlatlajtolwikah. ¹⁰ Nonnochteh ononkiselijkeh tlatlamantli tektil non Dios onomechmák, xiktektiltikah ikuak nonkimpalewiah nomokniwhah, ijkó nonyetoskeh non kualteh tekitkeh ika ikualtilis Dios. ¹¹ Akin kitelapowia itlajtol Dios, makitematilti kemi yetoskia inewia Dios. Akin weleti tlapalewia makimpalewi oksikimeh, makichiwha ika nochii ichikawalis non Dios okimák. Tla ijkó kichiwha, kichiwas para oksikimeh

makiweyijkatlalikah Dios por Cristo Jesús, porke sanwel Ye iaxka n weylistli iwan tlanawátili. Ijkó mamochiwa.

Xikxikohak n tlaijywílistli akimeh nonkineltokah n Cristo Jesús

¹² Notlasojikniwah, amo manomechtatlachialti keman wits nomopah n tlaijywílistli, kemi nonmochiwaskiah itla tetlajtlachialti. ¹³ Okachi kuali xipakikah ikuak nontlaijywiah ijkó kemi Cristo otlaijyowi, iwa ikuak Cristo walmokopas nomejwah xipakikah ikuak kinextis ichikawalis iwa imawistilis. ¹⁴ Tla aka nomechwikaltiah por nonkineltokah Cristo, xipakikah, porke iweyijkachiwalis iwa Iespíritu Dios nomechken-tijtok. ¹⁵ Yika, tla aka tlaijywia, amo matlaijyowi por otemiki, noso por otlachtek, noso por okitechewiili itla amokuali, noso por omokalaki kan amo iteki. ¹⁶ Pero tla tlaijywia por kineltokah Cristo, amo mapinawa, yej mamotlasojkamati inawak Dios por kitenewa Itoka.

¹⁷ Porke yoajsiko n tonati ikuak Dios pews kinmixkomakas iaxkawah. Tla achto pews n tlaijywílistli towah, ¿kenomi tlamitiweh non amo kitlakitah itlajtol? ¹⁸ Tla se non kuali tlakatl owi momakixtis, ¿kan tlamiti n tlakatl non amo kuali iwa tlajtlakolchijtinemi?

Pr. 11:31 ¹⁹ Ijkó kine, tla Dios kitekawilia nomejwah xitlaijywakah, xikmosenmakakah Akin onomechchijchi, iwa xikchijtinemikah tlan kuali.

5

Xikinnonotsakah akimeh kineltokah Cristo Jesús

¹ Axa, ne nikneki nikinnonotsas non nomechyakantokeh. Ne noiwa nitlayákanki kemi yejwah, iwa kuali nikmati kenomi okitlaijywiltijkeh n Cristo. Iwa kemi yejwah noiwa nikitas itlawilnextilis Dios non kiteixmatiltis: ² Xikinmokuitlawikah ipilwah Dios, kemi se tlájpixki kinmokuitlawia iichkawah. Xikchiwakah ika pakílistli, kemi Dios kineki. Amo san por nomechnawatiah noso por nonkitlaniskeh tomi, yej por nomechpaktia nonkichiwaskeh nomoteki. ³ Amo ximoweyijkatlalikah innawak akimeh nonkinyakanah, kemi non yetoskiah nontekowajkeh, yej xikchiwakah tlan kuali, para akimeh nonkinyakanah, makitakah kenomi nonkichiwah. ⁴ Ijkó, ikuak walmuikas Cristo n Tlápixki non tlayakantok, nomejwah nonkiseliskeh nomotlaxtlawil kan ilwikak, non ayik ijtlakawis.

⁵ Ijkó noiwa, nomejwah telpokameh xikintlakitakah n tetajmeh non tlayakantokeh itech tiopa. Nonnochteh ximosepanyekwikakah. Porke itlajtol Dios kijtoa: Dios kinmixnamiki non moweyijkatlalih, pero kintiochiwa non moiknomath inawak.

Pr. 3:34

⁶ Yika, ximoiknomatikah iwa xikselikah itlanawatilis Dios, iwa Ye nomechweyijkachiwas ikuak monekis. ⁷ Nochi tlan nomechtekipachoah, xiktlalikah imak Dios, porke Ye nomechmokuitlawia.

⁸ Xiisatokah iwa kuali xitlachixtokah. Porke nomokokolikni n amokualitlakatl kite-mojtinemi akin kixpolos, kemi yaskia se lio non kitemojtinemi akin kitlankokototsas iwa kikuas. ⁹ Amo xikmokawilikah manomechtlan i amokualitlakatl, yej nochipa xikneltokakah Dios. Porke ya nonkimatokeh itech nochi n tlaltípkaktli, oksikimeh nomokniwah tlaneltokakeh tlaijywijtokeh kemi nomejwah. ¹⁰ Satepa keman nomejwah yonontlaijywijkeh kanaj kech tonati, Dios nomechyekmilawas, nomechyekchikawas iwa nonyektlaxilitoskeh. Inewia Dios non techmaka nochi tlatiochiwálistli iwa otéch-notski matiyetoka nochipa itech imawistilis por tikateh sansikah iwan Cristo. ¹¹ ¡Ye nochipa iaxka n weletílistli, asta matlami n tlaltípkaktli! Ijkó mamochiwa.

Pedro momakawa

¹² Tokni Silvano onechpalewi iwa okimikuilo notlajtol wah. Ne nikita kuali kineltoka Cristo, iwa itech iweletilis titlaneltokaskeh. Nomechtatlajkuilia para nomechnonotsas iwa xikixmatikah ikualtilis Dios non itech tikateh.

¹³ Noiwa nomechtatlajpaloh n tlaneltokakeh non chanchiwhah Babilonia, non Dios yokinpéjpenki kemi nomejwah, noiwa Marcos, non niklasojtla kemi yaskia nokone.

¹⁴ Ximotlajpalokah non nochteh iwa ximoixtennamikakah kemi nonmiknimeh ika tla-sojtlálistli.

Xikpiakah yolsewílistli nonnochteh akimeh nonkineltokah Cristo Jesús.

N ojpatia iamatlajkuilol San Pedro

Pedro kintlajkuililia akimeh kineltokah Cristo Jesús

¹ Ne, Simón Pedro, itetlakewal Cristo Jesús iwa itlatematilti, nomechtlajkuililia nin atlajkuíloli, nomejwah akimeh nontlaneltokah kemi tejwah, porke Todios iwa Totemakixti Cristo Jesús saikpanoa yekmilajka. ² Niktlajtlanilia Dios miak manomechtlasojtla iwa manomechkawili xiylitoka ika yolsewfistli, iwa nomejwah kuali ya nonkimatih tlan kiwilita Dios iwa n Toteko Cristo Jesús.

Kenomi moneki mayeknemi se non kineltoka Dios

³ Dios okitekitilti ichikawalis iwa ijkó otechmák nochí tlan techpoloa, iwa ijkó matiyetokah kemi Ye kineki. Dios otechmák nochí noni ikuak otechixmatilti n Cristo Jesús. Ika Cristo otechpéjpenki iwa ijkó tiyatoskeh sansikah kan Ye tlanawatia. ⁴ Ijkó Dios yotechmactili tlan otechilijka techmakas non semi weyi iwa miak ipati, ika tlan otechmák, nomejwah ayakmó nontlajtlakolchiwaskeh kemi kichiwah n tlaltipaktlakah, porke tlan kelewie inkuerpo nonteh tlakah, kinmixpoloah oksikimeh.

⁵ Yika, ne nomechnonotsa iwa nomechilia; xiktlalikah nochí nomotlaneltokalis itech Dios, ximochijchikawakah por nonkichiwaskeh tlan kuali iwa okachi nonkiyekixmatiskeh Dios, ⁶ iwa xiktlanilikah

tlan amokuali kiyoltilana nomokuerpo,
noiwa san ximokajtokah

iwa ximotemaktikah inawak Dios.

⁷ Ximoyekuikakah iwa nomokniyah tlaneltokakeh, iwa ximosepantlasojtlakah.

⁸ Tla nomejwah nonkimatih n Cristo Jesús, nonkichiwaskeh nochí tlan yonomechili, iwa okachi kuali nonkichiwaskeh. Iwa ijkó nomonemilis yetos milaktik. ⁹ Pero akin amo kichiwa nochí ni, non tlakatl yetos kemi se non ayakmó yektlachia, iwa yokilka noiwa okitlapojpolwijkeh de itlajtlakolwah tlan achto okinchiwaya. ¹⁰ Yika nokniyah ken Dios yonoméchnotski iwa yonomechpéjpenki, ximochijchikawakah iwa xinemikah ijkó kemi yonomechili, ijkó ayik nonwetsiskeh. ¹¹ Iwa Dios nomechintlapolis ikaltenwah itekiwajkayo n Toteko iwa Totemakixti Cristo Jesús.

N milajka tlamachtílistli

¹² Yika, ne nochipa nomechilnamiktijtos nochí tlan yonomechili, maya nomejwah ya nonkimatokeh iwa ok nonkineltokah tlan milák onomechmachtijkeh. ¹³ Ne nikyejyekolia kuali manomechnonotsa axa ikuak ok niyolitok. ¹⁴ Porke Toteko Cristo Jesús yonechmatilti mach ok niwejkawas niyolitos. ¹⁵ Pero ne nikchiwas nochipa xikilnamiktokah nochí tlan onomechmachtí, maya yonimik.

Akimeh okitakeh iweyilis Cristo

¹⁶ Ikuak otomechmatiltijkeh iweletilis n Cristo iwa kenijiowala, amo otomechpoilijtokah se tlapoálistli non san tejwah otikmajmankeh, yej ika toixtololowah otiktakeh iweyilis n Toteko Cristo Jesús. ¹⁷ Tejwah otikkakeh ikuak Dios okimák n Cristo iweyilis iwa okiweyijkachi, iwa ikuak Dios ika itlajtol non weyixtok okili: “Ye ni Nokone non saikpanoa niktlasojtla, Akin itech nikpia miak pakílistli.” ¹⁸ Tejwah tonewiah otikkakeh non tlájtoli non ovalaya de ilwikak, porke tejwah otikatkah iwan Toteko Cristo Jesús itech neká tepetl non tiocxitok.

¹⁹ Yika, kuali nikmatok, tlan okikuilojkeh n profetas ye tlan milák, yika, kuali xikkakikah nin kualitlátoli, porke nomechilis kenomí non nemiskeh, asta keman tlanesi iwa pankisa n sítlali non kisa kuinal iwa kitlawilia toyolo. ²⁰ Pero kuali xikmatikah tlan nomechilis: nion se tlájtoli non kajki itech itlajkuilol Dios, san sikiméh weletis kajsikamatiskeh, ²¹ porke n profetas ayik okitenkixtijkeh san tlan yejwah okiyejyekoliayah, yej ika iweletilis n Espíritu Santo nochipa okitenkixtijkeh tlan Dios okinekia makitematiltikah.

*Akimeh kitemachtiah tlan amo milák
(Jud. 4-13)*

¹ Itech Israel okitemachtayah sikimeh tiotlajtojkeh tlan amo milák, ijkó noiva yetoskeh tlamachtijkeh tekajkayajkeh nomowah. Yejwah san ichtaka pews kitemachtiskeh san tlan yejwah kiyeyekolah iwa nomechkuatlapololtiskeh, iwa ika noni kitenextiskeh mach milák kineltokah n Toteko Cristo Jesús non okinmakixti; tlan yejwah kichiwah kitlaxtlawaskeh ika se weyi tlaijyowílistli non innewiah kimotemolijtokeh. ² Miakeh tokniwah kichiwaskeh kemi kichiwah nonteh tlamachtijkeh tekajkayajkeh, kichijtinemiskeh san tlan yejwah kinekiskeh. Por intlajtlakol n tokniwah tlajtoskeh fiero de akimeh kineltokah Cristo, porke kitah kenomi innemilis amokuali. ³ Satlawel kiapisnekiskeh tomi, nonteh tlamachtijkeh nomechixpoloskeh ika tlakajkayawálistli. Dios yowejka yokinmajmanili intlaijyowilis nonteh tlamachtijkeh tekajkayajkeh, sa kinchixtok.

⁴ Dios amo okintlapojpolwi n ángelteh non otlajtlakolchijkeh, yej okualintlamotlak miktla iwa okinka ilpitokeh ika kadena kan tleyua para matsaktokah asta maajsiki neká iksemi tonati ikuak Ye wits kinhexeloki iwa kijtos akin yas íwa, iwa akin amó.

⁵ Dios, noiva amo okintlapojpolwi n tlaltikpaktlakah tlajtlakolchijkeh itech nekateh tonatijmeh, ikuak Noé okatka itech nin tlaltíkpaktli, iwa ika se weyi kiawitl non okwaltítlanki okinaapacho nonteh tlakah tlajtlakolejkeh. Dios okimakixtiko sanwel Noé akin nochipa otlanonotsaya manemikah ika inyolo chipawak iwan oksikimeh chikome non ken kimitah. ⁶ Dios noiva okintlaijyowiltih iwa okimpopo non ochantitokah itech altepemeh de Sodoma iwa Gomorra, okinchichino iwa okinkajtek sa tlekónextli, para mamawikah n tlakah tlajtlakolejkeh non satepa nemiskiah itech nin tlaltíkpaktli.

⁷ Pero Dios okimakixti n Lot, n yekmilaka tlakatl, non satlawel okikuejsoaya, porke okimitaya kenikki otlajtlakolchijtinemiah n tlakah. ⁸ Lot ye tlakatl yolchipawak non ochantitoka intlajko nonteh tlakah tlajtlakolchijkeh. Nochi tonati omoyolkokoaya ikuak okitaya iwa okikakia nochí tlan pitsotik okichiwayah. ⁹ Nochi ni technextilia Toteko Dios weleti kinmakixtia akimeh nemih kemi Ye kineki, iwa kinkawa matlaijyowikah non amokualteh, para neká tonati ikuak Ye tetlajtlakolti.

¹⁰ Dios okachi kintlaijyowiltis akimeh kichijtinemih tlan amokuali kelewia inkuerpo, iwa amo kitlakitah itekiwajyo n Toteko. Yejwah moweyijkamatih iwa amo kimiati mawih ikuak fiero kintenewa n chikawálisteh non witseh de ilwikak. ¹¹ Maya n ángelteh kipiah okachi chikawálistli iwa tekiwajyo, amo mixewiah kitenewaskeh itlanawatil Toteko Dios.

¹² Pero ninteh tlakah kemi yolkameh, amo kipia tlalnamikílistli, iwa tlakatih san para makinkitskikah iwa makinniktikah. Yejwah kipojpoah nochí tlan amo weletih kajjsikamatih, pero ninteh tlakah yakatlamitiweh kemi yolkameh, ¹³ innewiah kijyowiskeh nochí tlan okintlaijyowiltijkeh oksikimeh. Porke ixmostla kiwilitah mopaktijtinemiskeh intech tlan amo kuali kelewia inkuerpo. Ninteh tlakah teyolijtlakojkeh iwa teixpolojkeh, porke maya tlakuajtokeh nomowah kan nonmoololoah, kiwilita kichijtoskeh tlan tepinati!

¹⁴ Ninteh tlakah ikuak kitah se siwatl san nima kelewiah, iwa ayik mosotlawa kinchijtinemiskeh tlajtlákolteh. Kintlatlalwiah non ayamó yektlaneltokah, iwa kimiati kenomi tlakajkayawaskeh san para kitlaniskeh tomi. Ninteh tlakah Dios kintlaijyowiltis.

¹⁵ Yejwah yokikakajtejkeh n kuali ojli iwa yomoixpolojkeh. Kitokatinemih itlamachtilis n profeta Balaam itelpoch n Beor, non okinek kitlanis miak tomi ika tlan amokuali okichijtinemia. ¹⁶ Iwa se burra non amo tlajtoa, owatlajto kemi tejwah iwa okajwak para ayakmó makichijtinemi tlan amokuali kemi se non san kuatlapolojtok.

¹⁷ Nonteh tlakah tekajkayajkeh, ken se améyali non amo kipia atl, noiva ken mextli non ejekatl kiwika. Yejwah yokinsenkajkajkeh iwa nochipa tlaijyowitoskeh kan okachi tleyua. ¹⁸ Porke san xaxankuatih ikuak tlajtoah, iwa amitla ipati tlan kijtoah, noiva kintlaneltoktiah makichiwakah tlan yejwah kichiwah, akimeh sa kentsi omoxelojkeh

itech tlan amokuali. ¹⁹ Yejwah kinmiliah kimpalewiskeh para kikawaskeh tlan pitsotik kichiwah, pero yejwah innewiah ilpitokeh itech tlan amokuali. Nochi tlakatl ilpitok itech tlan kiyoltilana. ²⁰ Akimeh yokixmatkeh n Toteko iwa Totemakixti Cristo Jesús, ayakmó makichiwa tlan kichiwah n tlaltikpaktlakah. Tla ijkó oksepa kimokawiliah makinkajkayawa tlan okinyoltilanaya, okachi moyolijtlakoa ke achtio. ²¹ Okachi kuali amo kixmatiskiah n kuali ojtli, iwa amo axa, ikuak yokixmatkeh, kikawah n chipawak tlanawátili non okinmachtijkeh. ²² Pero intech yomochiwako tlan kijtoa neká tlájtoli: “N chichi oksepa kikua itlakopal.” *Pr. 26:11* “N pitsotl non sokin okaltijkeh oksepa mokuitlakpewa itech sokitl.”

3

Ikuak walmuikas n Toteko Jesús

¹ Notlasojikniwah, ika ni ya ome amatlajkuíloli nomechintlajkuililia. Itech ninteh omeh tlajkuilolteh nikneki nomechnonotsas para kuali xitlalnamikakah. ² Xikilnamikakah tlan yowejka okijtojkeh n profetas de itlanawatil n Toteko Cristo Jesús Totemakixti, iwa de n tlatalaniltih non onomechmachtijkeh nomejwah.

³ Kuali xikmatikah, itech iksemi tonatijmeh monextiskeh tlakah non kiwetskaskeh tlan tejwah tikneltokah, iwa kichijtinemiskeh tlan pitsotik. ⁴ Yejwah kijtoskeh: “¿Kanin kajki n Cristo non onomechilijkeh oksepa walmokopas? Yomijmikeh totatawah, iwa itech nin tlaltíkpaktli nochipa san ijkó kajki kemi ikuak opejki.” ⁵ Yejwah amo kinekih kajsikamatiskeh yowejka Dios okichijchi n ilwikak iwa n tlaltíkpaktli, iwa ika itlajtol okixelo n tlali iwa n atl. ⁶ Ika atl iwa ika itlajtol Dios, n tlaltíkpaktli opojpoliwick itech tonatijmeh de Noé. ⁷ Pero n ilwikak iwa n tlaltíkpaktli, Dios kinkajtok para kimpojpolos ika tletl itech neká tonati ikuak Ye kintlajtlakoltis nochteh, iwa kimpojpolos akimeh kichiwah tlan amokuali.

⁸ Notlasojikniwah, amo xikilkawakah tlan nomechilis, Dios amo kipoa se tonati kemi tejwah. Para Dios se tonati ken mil años, iwa mil años kipoa ken se tonati. ⁹ Noni amo kijtosneki Dios yokilka tlan okisentlali kichiwas, kemi sikimeh yowejka kiyeyekolah, yej techchixtok iwa amo kineki aka mamoixpolo, yej tinochteh matimoyolpatlakah inawak.

¹⁰ Pero ikuak Toteko Cristo Jesús walmokopas, kalakiki kemi ikuak se tlachtek kalaki techa. Itech nonteh tonatijmeh tlatekuinis chikawak iwa n ilwikak san walpoliwi, n sítlalteh paatiskeh ika tletl, iwa n tlali iwa nochti tlan onka itech, tlatas.

¹¹ Iwa tla ijkó pojpoliwi nochti tlan onka, ¡moneki nomejwah sanwel xiktlakitakah Dios iwa xikchiwakah nochti tlan kuali! ¹² Xikchiakah maajsiki n tonati non Dios yokitlali, ikuak kinxexelos non kualteh iwa non amokualteh itech nin tlaltíkpaktli. Non tonati n tletl kipojpolos n ilwikak iwa n sítlalteh paatiskeh. ¹³ Pero tejwah tikchiah tlan Dios yokijto techmakas, se yankuik ilwikak iwa se yankuik tlali, iwa ompa yetos milajkachiwálistli.

¹⁴ Yika, notlasojikniwah, ikuak nonmochiah nochti ni matlamochiwa, xikchiwakah nochti tlan kuali para Dios manomechajski ika yolsewílistli iwa non yolchipawakeh.

¹⁵ Kuali xikmatikah n Toteko techmochialia iwa kineki tinocchteh matimomakixtikah; ijkó kemi yonomechijkuilili totlasojikni Pablo, kemi inewia Dios okimák ixtlamatlistli.

¹⁶ Itech nochteh itlajkuilolwah n Pablo nochti ni yonomechili, maya siki tlan onomechili achitsi owi moajsikamati. Yika, non amo kixmatih itlajtol Dios iwa non amo chikawak intlaneltokalis kipatla n kualtlájtoli iwa innewiah moixpoloah.

Sa iksemi nomechilia

¹⁷ Yika, notlasojikniwah, ken ya nonkimatokeh nochti ni, ximotlachilikah, para amo manomechkajkayawakah n tlajtlakolchijkeh, iwa nonwetsiskeh de nomoyeknemilis.

¹⁸ Okachi kuali, ximoskaltikah itech ikualtilis iwa iixtlamatilis n Toteko iwa Totemakixti Cristo Jesús. ¡Iaxka n weyijkachiwalistli n Toteko Cristo Jesús, axa iwa nochipa!

Non sakinika iamatlajkuilol San Juan

N tlájtoli non techmaka yolílistli

¹ Tlan achto yokatka, ikuak nochí opejki, tlan otikkakeh iwa tlan otiktakeh ika toixtololowah, tejwah otiktakeh iwa otikmajmachilijkeh ika tomawah, ye nin tlájtoli non kitemaka yolílistli. ² Nin yolílistli Dios otechnextili, tejwah otiktakeh iwa axa tiktematiltiah. Tejwah tomechmatiltiah nin yolílistli non ayik tlamis, Ye okatka iwan Totajtsi Dios iwa axa otechmonextiliko. ³ Tlan otiktakeh iwa otikkakeh ye tlan tomechmatiltiah, ijkó nomejwah weletis nonseititoskeh towah, ijkó kemi tejwah tiseititokeh iwan Totajtsi Dios iwa Ikone Cristo Jesús. ⁴ Nochi ni tomechijkuililia para mayekajsito nomopakilis.

Dios Ye n Tlápili

⁵ Ye ni n tlájtoli non Jesús otechkakiti iwa axa tejwah tiktematiltiah: Dios Ye n Tlápili, iwa ítech, amo onka tleyuálistli. ⁶ Tla tikijoah tiseititoskeh iwan Dios, pero ok tinemih kan tlatleyua, tixolopijti iwa amo tikijoah tlan milák. ⁷ Pero tla tinemih ítech tlápili, ijkó kemi Dios kajki ítech tlápili, ikuakó tiseititokeh tinochteh. Ika iesso n Jesús, Ikone n Totajtsi Dios, techchipawa nochteh totlajtlakolwah.

⁸ Tla tikijoah amo tikpiyah tlajtlácoli, san tejwah timokajkayawah iwa amo kajki ítech toyolo tlan milák. ⁹ Pero tla tikanmokuitiah totlajtlakolwah, inawak Totajtsi Dios, Ye ke n yekmilajka, techlapojpolwis iwa techchipawas de nochí totlajtlakolwah. ¹⁰ Tla tejwah tikijoah amitla tlajtlácoli tikpiyah, tikxolopijkopah Dios, iwa tlajtol amo kajki totech.

2

Cristo techtlajtolpalewia

¹ Nopilwah, nochí ni nomechijkuililia para amo xitlajtlakolchiwah. Pero tla aka otlajtlakolchi, tikpiyah Akin techtlajtolpalewia inawak Totajtsi Dios, Ye Cristo Jesús, n yolmilajka. ² Cristo Jesús omotemakti iwa okintlaxtla nochteh totlajtlakolwah ika iesso, iwa amo san totlajtlakolwah, yej de nochteh n tlaltikpaktlah.

³ Tla tikchiwah tlan kijtoa itlanawatil Dios, ikuakó tikkajskamati ya tikixmatih. ⁴ Pero tla aka kijtoa: “Ne nikixmati Dios”, pero amo kichiwa tlan kijtoa itlanawatil Dios, non tlakatl xolópigtli iwa tlan milák amo kajki ítech. ⁵ Pero akin kiyekchiwa tlan Dios tlanawatia, ye milák kitlasojtla Dios, ikuakó tikmatih milák tiseititokeh íwa. ⁶ Akin kijtoa seítitok iwan Dios, moneki manemi kemi Cristo onenki.

Se yankuik tlanawátili

⁷ Notlasojkniwah, amo nomechijkuililia se yankuik tlanawátili, nin tlanawátili yowejka ononkipixtokah. Nin tlanawátili san ye non nomejwah yononkikakeh. ⁸ Pero tlan axa nomechijkuililia se yankuik tlanawátili, porke yomotenexti ítech inemilis Jesús iwa ítech nomonemilis, porke n tleyuálistli yakatlanti, iwa yopé tlawia n milajka tlápili.

⁹ Tla aka kimolia kajki ítech tlápili, iwa kikokolia ikni, ok nemi kan tleyua. ¹⁰ Akin kitlasojtla ikni, kajki ítech tlápili, iwa amitla weletis kitoktis mawetsi ítech tlajtlácoli. ¹¹ Iwa akin kikokolia ikni, nemi iwa kajki kan tleyuálistli, iwa amo kimiati kan ik yawi, porke n tleyuálistli amo kikawilia matlachia.

¹² Nopilwantsitsiwah, nomejwah nomechtlajkuililia ken Dios yonomechtlapojpolwi de nomotlajtlakolwah ítech Itoka n Cristo Jesús.

¹³ Tetajmeh, noiwa nomejwah nomechtlajkuililia ken yononkixmatkeh n Cristo Akin yokatka ikuak nochí opéki.

Telpokameh, nomejwah nomechtlajkuililia ken yononkitlanilijkeh n amokualtlakatl. Nomechtlajkuililia nomejwah nopilwantsitsiwah, ken yononkixmatkeh n Totajtsi Dios.

¹⁴ Onomechtajkuilili nomejwah tetajmeh, ken yononkixmatkeh n Cristo Akin yokatka keman ayamitla okatka.

Noiwa onomechtajkuilili nomejwah telpokameh, porke nonchikawakeh iwa tlajtol Dios nonkipixtokeh itech nomoyolo, iwa porke yononkitlanilijkeh n amokualtlakatl.

¹⁵ Ayakmó xiktlaosjtakah tlan onka itech nin tlaltípkaktli nion tlan nika mochiwa. Tla aka kiwilita kichijitinemis tlan kichiwhah n tlaltípkaktlakah tlajtlakolejkeh, non tlakatl amo milák kitlaosjtla n Totajtsi Dios. ¹⁶ Porke nochí tlan onka itech nin tlaltípkaktli tokuerpo kelewiea, toixtololowah noiwa kelewiah tlan kita, iwa tikneki matechweyilikah, nochí noni amo wits de Dios, yej san itech nin tlaltípkaktli. ¹⁷ Nochi tlan onka itech nin tlaltípkaktli ya tlanti, iwa nochí tlan pitsotik, pero akin kichiwhah tlan Dios kineki nochipa yolitos.

Matimotlachilikah de akimeh tekajkayawah

¹⁸ Nopilwantsitsiwah, ya tikateh itech iksemi tonatijmeh, yononkikakeh wits se akin kixnamikis Cristo. Milák, axa miakeh yomonextijkeh non kixnamiki n Cristo, yika tikmatih ya tikateh itech iksemi tonatijmeh. ¹⁹ Yejwah okatkah towa, iwa omoxelojkeh. Ken amo milák okatkah towah, porke tla milák yetoskiah towah, yejwah mokawaskiah towah. Ijkuak omoxelojkeh omotak amo okatka towah.

²⁰ Nomejwah nonkipiah tlan Cristo onomechtliokoli, iwa nochí nonkixmatih. ²¹ Ijkó kiné nomechtajkuililia, porke nomejwah nonkimatih tlan milák, iwa akin ya kimati tlan milák, amo weleti tlakajkayawah.

²² ¿Akin non tekajkaya? Ye akin kijtoa Jesús amo ye n Cristo, ye akin kixnamiki iwa amo kineltoka nion Totajtsi Dios nion Ikone. ²³ Nochi akin kijtoa Jesús amo Ikone Dios, amo kipixtok Dios itech iyolo. Pero akin kipixtok Ikone, noiwa kipixtok Totajtsi Dios.

²⁴ Yika, xiklaatikah itech nomoyolo n kualitlajtoli non achto yonomechmatiltijkeh. Iwa tla mokawa itech nomoyolo tlan achto yononkikakeh, noiwa nomejwah nonseitostkeh iwan Tekone iwan Totajtsi Dios. ²⁵ Tlan Cristo okijo techmakas, ye n nemílistli non amo keman tlamic.

²⁶ Nochi ni onomechijkuilili para xikmatikah akimeh kinekih nomechkajkayawaskeh.

²⁷ Pero nomejwah nonkipixtokeh n tlatliokólili non Cristo Jesús onomechmák. Iwa ayakmó moneki aka manomechmachti, porke inewia n Espíritu nochí nomechmachtia. Iwa nochí tlan nomechmachtia milák, iwa amo san tlakajkayawa. Ijkó kiné, xiseititokah nochipa iwan Cristo, ijkó kemi n Espíritu nomechmachtia.

²⁸ Axa nopilwantsitsiwah, nochipa xiseititokah iwan Cristo, iwa ijkó timoyolchikawaskeh ijkuak monextis, iwa amo matipinawakah ijkuak Ye wits. ²⁹ Iwa kemi nomejwah ya nonkimatih Cristo yekmilajka, noiwa kuali xikmatikah nochteh akimeh kichiwhah tlan kuali, yejwah akimeh milák ipilwah Dios.

3

Ipilwah Dios

¹ Xikitakah kenomi satlawel techtlasojtla Totajtsi Dios, asta technotsa ipilwah, iwa milák tejwah titepilwah. Yika, non amo kineltokah Dios amo techixmatih, porke amo kixmatih akin Dios. ² Notlasojikniwhah, tejwah ya titepilwah de Dios, iwa maya amo tikmatih kenomi tiyestoskeh satepa. Ejé tikmatih ijkuak Cristo Jesús oksepa techmonextiliki, tiyestoskeh kemi Ye, porke tikitaseh kemi Ye tlachixtok. ³ Nochteh akimeh timoyolchikawah itech Cristo, timochijchikawah timoyolchipawah, ijkó kemi Cristo yolchipawak.

⁴ Nochteh akimeh kichiwhah tlajtlákoli, kixpanawia itlanawatil Dios. ⁵ Nomejwah ya nonkimatokeh, Cristo owala itech nin tlaltípkaktli para techinkixtilis totlajtlakolwah, Cristo amo tlajtlakolchiwa nion weletis tlajtlakolchiwas. ⁶ Ijkó kiné, akin moiknitia iwan

Cristo, ayakmó weletis tlajtlakolchijtinemis ken seititok íwa. Iwa akin kiwelita tlajtlakolchiwas, amo kitika Cristo nion kixmati.⁷ Nopilwantsitsiwah, amaka manomechka-jkayawa, nochí akin kitlakita Dios, yolchipawak, ijkó kemi Cristo yolchipawak.⁸ Iwa akin tlajtlakolchijtinemí moiknitia iwan diablo, porke n diablo tlajtlakolchijtiwits desde ikuak Dios okichijchi n tlaltípkaktli. Yika, Ikone n Totajtsi Dios, owala itech nin tlaltípkaktli para kipojpolos nochí tlan kichiwa n diablo.

⁹ Se akin kijtoa ikone n Dios amo tlajtlakolchijtinemí, porke ipilwah Dios ya kipia yankuik nemílistli ijkó kemi Dios yeknemi. Yika se ikone Dios amo para tlajtlakolchijtinemis, porke ye ikone Dios.¹⁰ Weletis tikitas akin ikone n Totajtsi Dios, iwa akin ikone n diablo. Akin amo kichiwa tlan kuali, nion kitlasojtla ikni, amo ikone Dios.

Matimotlasojtlakah tinochteh

¹¹ Nomejwah yononkikakeh desde ikuak ononkineltokakeh n Cristo, iwa otechilijkeh: matimosepantlasojtlakah.¹² Amo matikchiwah kemi Caín, ikone n diablo, non okimiki tla. ¿Iwa tleka okimiki? Porke Caín okichiwaya tlan amokuali, iwa ikni oyeknemia.

¹³ Notlasojkniwah, amo manomechtatlachialti tla nomechkokoliah n tlaltípkaktlah. ¹⁴ Tejwah tikmatokeh mach ok ayik timikiskeh, ken yotikiskeh imak miklistli, iwa axa tiyolitoskeh nochipa porke tikintlasojtlah tokniwah. Se akin amo kitlasojtla ikni, ye ok miktok. ¹⁵ Nochi akin kikokolia ikni, se temikti, iwa nomejwah nonkimatih se temikti amo kipias semijkak yolílistli. ¹⁶ Tejwah tikmatih tlanó n tlasojtlálistli, porke Cristo omotemakti makimiktikah topatka, ijkó noiya tejwah tikpiyah tiktemakaskeh toyolilis por tokniwah tlaneltokakeh. ¹⁷ Tla se non kipia tomi, kita se ikni non kipoloa iwa amo kiknomati, non tlakatl amo tetlasojtla kemi Dios tetlasojtla. ¹⁸ Nopilwantsitsiwah, amo matitetlasojtlakah san ika tokamak noso tonenepil, yej matimosepantlasojtlakah ika tlan tikchiwah.

Matimoyolchikajtokah itech Dios

¹⁹ Ijkó tiveletih tikmatih de milajka titepilwah de Dios, iwa amitla techtsakuilis ikuak timoixpantiskeh inawak,²⁰ tla toyolo techteilia ikuak itla amo kuali tikchiwah, Dios okachi weyi ke toyolo, iwa nochí kimati. ²¹ Ijkó kiné, notlasojkniwah, tla toyolo amo techtlajtlakoltia, amitla techtsakuilia inawak Dios. ²² Ye techmakas nochí tlan tiktlajtlaniliskeh, porke tikintlakitah itlanawatilwah iwa tikchiwah tlan Ye kiwilita. ²³ Noiya Ye technawatia matikneltokakah Ikone Cristo Jesús, iwa matimotlasojtlakah tinochteh kemi Ye otechnawatih. ²⁴ Nochteh akimeh kintlakitah itlanawatilwah Dios, kajki iwan Dios, iwa Dios inwah. Tikmatokeh Ye kajki totech porke tikpoxtokeh Iespíritu.

4

Akin kipia Iespíritu n Dios iwa akin amo kipia

¹ Notlasojkniwah, amo xikinneltokakah akimeh kijtoah kipiah Iespíritu Dios. Achto xikinyejeyekoh kox tlan kijtoah wits de Dios. Porke yomonextijkeh miakeh tekajkaya-jkeh itech nin tlaltípkaktli.² Nomejwah weletis nonkimatiskeh tla se kipia Iespíritu Dios: Akin tlaneltokah Cristo Jesús omochiwako tlakatl itech nin tlaltípkaktli, iaxka Dios.³ Iwa nochí espíritu non amo kiteilia Jesús omochi tlakatl, amo kipia Iespíritu Dios, yej kipia iespíritu akin kikokolia n Cristo. Nomejwah yononkimatih nin espíritu walaskia, iwa ya kajki itech nin tlaltípkaktli.

⁴ Nopilwantsitsiwah, nomejwah iaxkawah Dios iwa yononkintlanilijkeh nekateh tekajkayajkeh, porke Akin kajki nomowah okachi weletini ke akin kajki iwan tlaltípkaktlah.

⁵ Yejwah san tlaltípkaktlah. Yika kitemachtiah tlan onka itech nin tlaltípkaktli, iwa n tlaltípkaktlah kinkakih.⁶ Pero tejwah iaxkawah Dios. Akin kixmati Dios techkaki, pero akin amo de Dios amo techkaki. Ijkó kiné, weleti tikinmixmatih akimeh kinyakantinemi n Espíritu de Dios iwa tikinmixmatih non kijtoa tlan amo milák.

Dios Ye n tetlasojtlálistli

⁷ Notlasojikniyah matimosepantlasojoatlakah, porke Dios iaxka n tlasojoatlálistli. Nochi akin milák tetlasojojla, ikone Dios iwa kixmati Dios. ⁸ Akin amo tetlasojojla ayamó kixmati Dios, porke Dios Ye n tlasojoatlálistli. ⁹ Dios otechnextili techtlasojojla, ikuak okwaltítlanki Cristo itech nin tlaltíkpaktli non san Ye se Ikone, para matikpiakah yolílistli por Cristo. ¹⁰ Ye n tlasojoatlálistli: amo tejwah otiktlasojojtlakeh Dios, Ye otechtlasojojtlak iwa okualtítlanki Ikone para kitemaktis kemi se tlamánali para matechtlapojpolwi de totlajtlakolwah.

¹¹ Notlasojikniyah, tla Dios ijkó yotechtlasojojtlak, tejwah noiva moneki matimosepantlasojoatlakah. ¹² Ayik aka yokitak Dios. Pero tla timosepantlasojojtlah, Dios yetos towa, iwa itlasojojtlalis kajki totech. ¹³ Kuali tikmatokeh tinemih iwan Dios iwa Ye kajki totech, porke yotechmák Iespíritu. ¹⁴ Tejwah tonewiah yotikitakeh iwa tikintlapowiah, Totajtsi Dios okwaltítlanki Ikone, para kinmakixtikis nochteh n tlaltíkpaktlakah. ¹⁵ Nochi akin kiteilia Jesús, Ye Ikone Dios, non tlakatl kajki iwan Dios iwa Dios kajki íwa.

¹⁶ Tejwah yotikixmatkeh iwa yotikneltokakeh Dios techtlasojojla. Dios Ye tlasojoatlálistli, iwa akin tetlasojojla seititok iwan Dios. ¹⁷ Tla milák tikintlasojojla tokniyah, iwa tla timoyekuiyah kemi Cristo Jesús omoyekwík itech nin tlaltíkpaktli, amo matimawikah itech iksemi tonati keman Ye tlaixkomakakih. ¹⁸ Akin kuali tetlasojojla amo mawi. Kan onka tlasojoatlálistli amo onka mawílistli, porke n milák tlasojoatlálistli kachiwa n mawílistli. N mawílistli kiwika tlaijyowílistli, porke akin mawi ayamó kuali tetlasojojla.

¹⁹ Tejwah tiktlasojojla Dios porke Ye achoyo otechtlasojojtlak. ²⁰ Pero tla aka kijtoa: “Ne niktlasojojla Dios”, pero kikokolia ikni, ye xolópijtli. Porke tla amo kitlasojojla se ikni non konitok, kenomi weletis kitlasojojlas Dios non amo kita. ²¹ Ye otechmák nin tlanawátili: Akin kitlasojojla Dios noiva makitlasojojla ikni.

5

Matitlatlanikah itech nin tlaltíkpaktli

¹ Tla tikneltoka Jesús Ye n Cristo, timochiwah ipilwah Dios. Porke tla tiktlasojojla n Teta, noiva moneki matikintlasojoatlakah ipilwah non Teta. ² Tla tejwah tiktlasojojtlah Dios iwa tikintlakitah itlanawatilwah, tikmatih noiwah tikintlasojojtlah ipilwah Dios.

³ Tejwah tiktenextiah tiktlasojojla Dios keman tikintlakitah itlanawatilwah, iwa amo owi se kintlakita. ⁴ Milák, nochi akin kijtoah ikone n Dios, tlatlani itech nochteh tlan amokuali onka itech nin tlaltíkpaktli, iwa nochteh akimeh kineltokah Cristo, nochipa tlatlani itech tlan amokuali. ⁵ Sanwel akin kineltoka Jesús, Ye Ikone Dios, tlatlani itech nin tlaltíkpaktli iwa itech tlan amokuali.

Aki n Cristo

⁶ Cristo Jesús owala itech nin tlaltíkpaktli ika atl iwa ika estli. Iwa amo san ika atl noso ika estli. N Espíritu kijtoa tlan milák, porke Ye yekmilajka. ⁷ Onkateh eyi akimeh kijtoah tlan milák. ⁸ Iwa san ken eyi yomoyekkajkeh, n Espíritu, n atl iwa n estli. ⁹ Tla tikneltokah tlan techmatiltiah n tlakah, okachi matikneltokakah tlan Dios techmatiltia, porke tlan Ye techilia, okachi ipati porke techilia Jesús Ikone. ¹⁰ Akin kineltoka Ikone Dios, kineltoka tlan Dios yokijto. Pero akin amo kineltoka Dios kita kemi xolópijtli, porke amo kineltoka tlan Dios inewia yokijto de Ikone Cristo Jesús. ¹¹ Ijkó Dios yokijto: tejwah yotechmák toyolilis non ayik tlami, iwa nin yolílistli kajki itech Ikone Cristo Jesús. ¹² Yika, akin kipia Ikone Dios, kipia yolílistli, pero akin amo kipia Ikone Dios, amo kipia nin yolílistli.

Sa iksemi tlanonotsa

¹³ Nomechintlajkuililia ninteh tlájtolteh nomejwah akimeh non kineltokah itech Itoka Ikone Dios, para xikmatikah nonkipiah n semijkak yolílistli.

¹⁴ Titlaneltokah inawak Dios, porke tikmatih Ye techkaki tla itla tiktlajtlaniliah non Ye kipaktia. ¹⁵ Iwa ijkó ken tikmatih Dios techkaki ikuak timotrotsajtsiliah, noiva ya tikmatih Ye yotechmák tlan otiktlajtlanilijkeh.

¹⁶ Tla aka kita se ikni kichijtok tlajtlákoli, non amo ika se mikkis, mamotrotsajtsili inawak Dios makitlapojpolwi. Dios kimakas yolílistli non ikni, tla non tlajtlákoli amo tewika kan mikílistli. Pero onka tlajtlákoli non tewika kan mikílistli, iwa amo nomechilia ximotrotsajtsilikah por ye. ¹⁷ Nochi tlan amokuali se kichiwa, tlajtlákoli. Pero amo nochi tlajtlákoli tewika kan mikílistli.

¹⁸ Tikmatih ipilwah n Dios, mach ok paki tlajtlakolchijtinemiskeh, porke tikmatokeh Ikone n Totajtsi Dios kinmokuitlawia, iwa n satanás Amitla weleti kintoktia.

¹⁹ Tikmatokeh tejwah iaxkawah Dios, iwa nochteh n tlaltikpaktlakah non amo kineltokah Dios kinnawatijtok n satanás.

²⁰ Noiwa tikmatokeh Ikone n Totajtsi Dios yowala, iwa yotechmák teajsikamatílistli para matikixmatikah non milák Ye Dios. Tejwah tiseititokeh iwa Ikone Cristo Jesús; Ye n milajka Dios. Ye Akin kitemaka n semijkak yolílistli. ²¹ Nopilwantsitsiwah, amo xikinmotrotikah n diosmeh tlachijchíwalteh.

N ojpatia iamatlajkuilol San Juan

Namechtlajpaloa

¹ Ne Juan, ya ni tetajtsi innawak tokniwah akimeh nikinyakana. Nikintlajkuililia n tlaneltokakeh* non Totajtsi Dios okinpéjpenki, akimeh satlawel nikintlasoxtla, iwa amo san ne nikintlasoxtla, yej noiva nochteh akimeh yokixmatkeh tlan milák. ² Tejwah tomechtlasojtlah porke tikpixtokeh tlan milák itech toyolo, iwa mokawas towah nochipa. ³ Niktlajtlanilia Dios n Teta, iwa Ikone Cristo Jesús, manomechmakakah inkualtilis, inteiknomatilis iwa manomechmakakah inyolsewilis iwa yetoskeh nomowah tlan milák iwa nomechtlasojtlaskeh.

Tlan milák iwa n tlasoxtlálistli

⁴ Miak onechpakti porke onikinmajsito sikimeh de nomejwah non kichijtokeh tlan kijtoah itlajtol Dios non milák, ijkó kemi Totajtsi Dios otechnawatih matikchiwakah. ⁵ Axa, nokniwah† nomechtlatlaughtia matimotlasoxtlakah tinochteh. Nin tlanawatílistli amo yankuik, san ye non otechmachtijkeh ikuak otikselijkeh n Cristo. ⁶ Akin de milajka techtlasojtlah noiva kintlakamati itlanawatilwah Dios. Iwa kemi nomejwah ya nonkimatih desde ikuak ononkiselijkeh n Cristo, Dios technawatia matimosepantlasoxtlakah, ijkó kemi otechmachtijkeh desde ikuak opé tñkeltokah Cristo.

Ximotlachilikah porke nemí miakeh tekajkayajkeh

⁷ Itech nin tlaltíkpaktli nemih miakeh tekajkayajkeh, iwa kijtoah Cristo amo milák owala itech nin tlaltíkpaktli kemi se tlakatl kemi tejwah. Akin ijkó kijtoa, tekajkaya iwa ikokolikni n Cristo. ⁸ Ximotlachilikah, para amo nonkipoloskeh nochí tlan kuali yotikchijkeh, yej ajsitok xikselikah nomotlatliokolil.

⁹ Nochí akin moixkoyantia iwa amo kitlakita itemachtilis Cristo, Dios amo ka íwa. Pero akin nochipa kimopantia tlan Cristo okitemachi, Dios n Teta iwa Ikone nochipa yetoskeh íwa. ¹⁰ Tla aka yawi nomocha iwa amo kiwika itlamachtilis Cristo, amo xikkalakikah nion xikselikah nion xiktlajpalakah, ¹¹ porke akin kitlajpaloa noiva moiknitia ika tlan ye kichijinemi.

Juan otlayolopacho

¹² Miak nikpia tlan nomechtlapowis, pero amo nikneki san nomechtlajkuililis, porke nikneki nias nomechontlajpaloti iwa timotlapowiskeh tonewiah, ijkó niyetos ika miak pakílistli.

¹³ Mitsontlajpaloa n tlaneltokakeh non moiknitiah towah.‡

* 1:1 N griego kipia siwatl iwa mopilwah † 1:5 N griego kipia tejwatsi nokni siwatl ‡ 1:13 N griego kipia nokni siwatl akin Dios okipéjpenki

Neyitipa iamatlajkuilol San Juan

Nomechtlaajpaloa

¹ Ne Juan ya ni tetajtsi, niktlajkuililia n tokni Gayo, akin niktlasojtla.

² Noknitsi, niklatlautia Dios xiyeto ika kuali, noiwā nochī tlan tikchiwa mapankisa, ijkō ken moalma kajki kuali inawak Dios iwa amo ximokoko. ³ Miak onipak ijkuāk ovalajkeh sikimeh tokniwah kan te timoololoa, iwa onechtlapowijkeh tikmopantia itlajtol Dios non milák. ⁴ Amo nikpia okachi pakilistli, keman nikkaki nopilwah kitlakitah itlamachtilis Dios.

Juan tlajtoa kuali de tokni Gayo

⁵ Noknitsi, satlawel kuali tlan tikchiwa ikuak tikimpalewia n tokniwah maya amo tik-inmixmati. ⁶ Yejwah okinmatiltijkeh n tokniwah non nika moololoah kenijki titetlasojta. Nimitsonlatlaujtia, xikimpalewi ika tlan kimpoloa, para amitla makimpolo itech ojtlí, xikinpalewi ijkó kemi Dios kipaktia. ⁷ Porke yejwah kitlasojtla n Toteko Cristo Jesúz, yika oyajkeh okitekitilitoh, iwa amo okiselijkeh tlan okinmakayah akimeh amo kixmatih Dios. ⁸ Yika, tejwah moneki matikimpalewikah nonteh tokniwah, para mamotematilti tlan milák.

Diótrefes amo kineki tetlakitas

⁹ Ne yónikintlajkuilili n tokniwah, pero Diótrefes akin kiwilita tlanawatijtos ompa, amo kineki kikakis tlan niknawatia.

¹⁰ Yika, ikuak ne nias nikajwas, porke techpojpojinemi iwa tlajtoa tlan amo milák de tejwah. Iwa amo san noni, yej noiwá mach kinselia n tokniwah non ompa onkalakih. Iwa akimeh kinekih kinkalotiskeh n tokniwah non ompa onkalakih, mach kinkawilia makinkalotikah iwa san semi kintotoka de kan moololoa.

¹¹ Noknitsi Gayo, amo xiktlachichiwili itech tlan amokuali, yej xikchiwa tlan kuali. Akin kichiwa tlan kuali, milák ikone Dios, pero akin kichiwa tlan amokuali, non tlakatl amo kixmati Dios.

Demetrio se tlakatl yekmilajka

¹² Nochteh kiyektenewah tlan kichiwa n Demetrio, iwa milák tlan kijtoah. Tejwah noiwa tikmatokeh tlan ye kichiwa, iwa nomejwah nonkimatokeh milák tlan tomechiliah.

Juan momakawa ika ninteh tlájtolteh

¹³ Oniknekia miak nomechilis, pero amo oniknek nikijkuilos, ¹⁴ porke nikneki nimit-sonitati, iikuakó weletis timotlapowiskeh tonewia.

¹⁵ N yolsewlyistli mayeto mowa. Mitsontlajpaloh motlakaikniyah. Xikintlajpalonochteh n tokniyah non kateh mowa.

Nin iamatlajkuilol San Judas

Judas kintlajkuililia akimeh Dios okínnotski

¹ Ne Judas niktekitilia Cristo, ne nokni n Jacobo. Nikintlajkuililia akimeh Dios n Teta okínnotski iwa okinxelo mayetokah iaxkawah, ken nonseititokeh iwan Cristo Jesú. ² Xikselikah iteiknomatilis Dios, itlasojtlalis iwa iyorsewili.

Akimeh kitemachtiah tlan amo milák (2 Ped. 2:1-17)

³ Notlasojkniyah, satlawel oniknek nomechtlajkuililis iwa nomechilnamiktis ika totemakixtilis non tiksepampixtokeh, onikmoli kuali manomechtlajkuilili para ximochijchikawah por n tlaneltokálistli non Dios okinmajmak iaxkawah. ⁴ Sikimeh yoichtakakalakeh non yowejkah okimpejpenkeh para kintlaijyowiltiskeh, tlakah amokualteh non okipatlakeh ikualtilis Dios iwa kijtoah weletis titlajtlakolchiwaskeh iwa amo kitlakitah Cristo Jesú non san Ye n Toteko. ⁵ Nomejwah ya nonkimatokeh pero nikneki nomechilnamiktis n Toteko Dios okinkixti n tlakah de Israel kan tlali de Egipto. Satepa okimpopolo non amo okineltokakeh. ⁶ Iwa n ángelteh non amo omokajkeh kan Dios okintlali, iwa ayakmó okinekeh otetlakitakeh iwa okikakajtejkeh incha. Dios okintsak kan sentleyua iwa nochipa ompa kimpixtos asta maajsiki n iksemi tonati. ⁷ Ijkó omochijkeh non ochantitokah Sodoma iwa Gomorra iwa non ik ompa ochantitokah. Yejwah omosenkajkajkeh itech tlan inkuerpo okelewiaya iwa tlan pitsotik. Yika Dios okintlaijyowilti iwa okinkajkah ijtk tletl non ayik sewis para ompa matlaijyowikah. Nochi ni technejmachtia para amo ijkó matikchiwakah.

⁸ Ijkó kiné, ninteh tlakah noiwah kijtlakoah inkuerpo, iwa tejtemikih, amo kintlakitah n tekiwajkeh iwa fiero kintenewah n ángelteh. ⁹ Pero keman arcángel Miguel, omotekilmakatoka iwan diablo okimotlatlanilitokah ikuerpo n Moisés, amo omixewi kiwijwikaltis. Yej san okili: “Ma Dios mamitstlaijyowilti.” ¹⁰ Pero ninteh tlakah, fiero kitenewa asta tlan amo kixmati. Kichiwa kemi n yolkameh kichiwah, nochi tlan onka kixmatih pero amo kajsikamatih yika moyakatlamiah san yejwah.

¹¹ ¡Miálmasteh! Ken kichijtinemih kemi okichi Caín. Iwa ken kinekih kitlaniskeh miak tomi, kichiwah tlan okichi Balaam, iwa mikkih kemi Coré porke okinmixnamik itlatitlanilwah Dios. ¹² Yejwah kichiwah tlan tepinati keman non moololoah iwan nomokniyah iwa nontlakuah, keman nonkilnamikih imikilis Toteko. Ontlakuah iwa mopaktiah iwa amo kitlakitah Dios.

Yejwah kemi mextli non amo kualikah kiawitl non n ejekatl san kinwiwikah, kemi kuaujmeh non ya kitemakaskia intlakilo, ninteh kemi yaskiah yomikkeh, yika san semi kinwiwitlaskeh. ¹³ Yejwah kemi wejweyi ameméoltéh non tlakpak motlatlamotlah iwa kualpankixtiah imposokyo sokitik itempa n weyi atl ika tlan tepinati kichiwa. Noiwa yejwah kateh kemi sítlalteh non yokixpolojkeh ojtli, iwa sa kinchixtok n sentleyuálistli kan tlaijyowitiweh.

¹⁴ Noiwa Enok non otlákatki ipan chikome tlakatl satepa de Adán,* okinteneh ninteh tlakah iwa ijkí okijto: Onikitak n Toteko ompa wits iwa kualinwikah miaktikeh ángeles.

¹⁵ Tetlaxtlawikih iwa kintlaijyowiltis n tlajtlakolejkeh akimeh okichijkeh tlan amokuali iwa fiero okitenewayah.”

¹⁶ Ninteh tlakah amitla kimpaktia, sanwel kinekih innewiah mopakilismakaskeh, san xankuatlajtoah, iwa kinyektenewah oksikimeh san para itla kintlajtlaniliskeh.

Judas kinnonotsa n tlaneltokakeh

* 1:14 Lucas 3:37b-38: Enok otlákatki ipan chikome tlakatl satepa de Adán. Enok ikone n Jared, Jared ikone n Mahalaleel, Mahalaleel ikone n Cainán, iwa n Cainán ikone n Enós, Enós ikone n Set, iwa n Set ikone n Adán, iwa n Adán ikone Dios.

¹⁷ Notlasojikniwah, nomejwah xikilnamikikah tlan yowejka onomechmatiltijkeh itlatitlanilwah n Cristo Jesús. ¹⁸ Yejwah onomechilijkeh: “Itech iksemi tonatijmeh, monextiskeh tlakah non san kiwewetskaskeh itlajtol Dios iwa kinyakanas inmelewilis amo kuali.” ¹⁹ Ninteh tlakah kinxexeloah n tokniwah iwa kichiwah ken kichiwah n tlaltikpaktlakah, iwa amo kipiah n Espíritu.

²⁰ Pero nomejwah notlasojikniwah, nochipa xikneltokakah Dios. Non tlaneltokálistli miak ipati. Ijkuak nonmotiotsajtsiliskeh xikkawilikah n Espíritu Santo manomechili tlan weletis nonkijtoskeh. ²¹ Nochipa ximotlasojtlakah ika itlasojtlalis Dios. Iwa xikchiakah ika pakílistli n iksemi tonati ijkuak n Toteko Cristo Jesús itech iteiknomatilis kichiwas xiylitolkah nochipa kan ilwikak.

²² Xikinmiknomatikah akimeh ayamó chikawak intlaneltokális. ²³ Oksikimeh xikinmakixtikah imak tletl, iwa n oksikimeh xikinmiknomatikah ika mawílistli, iwa xiktlamotlakah intlakeh non yomopitsotili ika intlajtlakolwah.

Judas kiweyilia Dios

²⁴ Dios Totemakixti kipia weletílistli para nomechmokuitlawis iwa amo xiwetsikah itech tlajtlákoli, iwa ika pakílistli nomechteixpantis non chipawakeh ixpa imawistilis,

²⁵ non san Ye se Dios onka non saikpanoa ixtlamatini, Totemakixti, mayeto Íwa n mawistílistli, n weletílistli iwa n tekiwajkayotl axa iwa nochipa.

Ijkó mamochiwa.

Tlan Cristo Jesús okititi itlatitlanil San Juan

Tlan Cristo Jesús okititi n Juan

¹ Ye ni tlan Dios okinextili n Cristo Jesús, iwa ijkó matechnextili tejwah itekitwah tlan ayakmó wejkawas tlamochiwas. Cristo Jesús okitílanki iángel makinextili n Juan akin okitetlapowiaya de itlajtol Jesús. ² Iwa ne akin oniktelapowi nochí tlan onikitak. Nonewia onikseli itlajtol Dios non Cristo Jesús onechmactiliko.

³ Miak mayolpakikah akimeh kiama poah iwa akimeh kikakih iwa kichiwah tlan Dios kitematiltia, porke mach ok wejkawas mochiwas tlan nika ijkuitilitok.

Juan kintlajkuilia n tokniwah non moololoah itech n chikome tiopanmeh

⁴ Ne Juan, nomechtalajkuilia nomejwah akimeh nonkateh intech n chikome tiopanmeh* non kateh itech n tlalmeh de Asia. Dios manomechtiochiwa iwa makichiwa xiyetokah ika yolsewílistli, porke Ye kajki, yokatka iwa wits. Noiwa n chikome espíritus non kateh iyakapa n Dios kan Ye tlanawatijtok, xikselikah tlatiochiwálistli iwa xiyetokah ika yolsewílistli ⁵ iwa de Cristo Jesús Akin inewia okitak. Ye akin achto omoyoliti intsalko mikemeh, iwa itlanawatil kimpanawilia intlanawatil n reyes non tlanawatiah itech nin tlaltíkpaktli. Cristo techtlasojtla iwa ika iesso otechinkixtili totlajtlakolwah, ⁶ iwa otechtlali tireyes iwa titiopixkeh para matikweyilikah Dios non Ye Itajtsi. ¡Weyílistli iwa weletílistli makiselijto nochipa! Ijkó mamochiwa.

⁷ Xikitakah. Cristo wits ipan mextli. Iwa nochteh n tlakah kitaskeh, asta non okikespantsopitijkeh; iwa nochteh n tlaltikpaktlakah chokaskeh ikuak kitaskeh. Milák, ijkó mamochiwa.

⁸ Ne nitlapewaltia iwa ne nitlayakatlamicia, (ijkó kemi abesedario pewa ika A iwa tlami ika Z,) kijtoa n Toteko Dios Akin nochí weleti kichiwa, Akin kajki okatka iwa oksepa wits.

Juan kita n Cristo akin omochi tlakat

⁹ Ne Juan, nomokni, ne noijkó nitlaijyowia kemi nomejwah ken niktlakita n Toteko Cristo Jesús ijkó kemi nomejwah ne noiwa yonikseli n yolchikawálistli non wits de Toteko Cristo Jesús para nikxikos nochí tlan nikijyowia. Ne onitsaktoka kan isla non itoka Patmos por oniktetlapowiaya itlajtol Dios non Cristo Jesús noiwa onechnextiliko. ¹⁰ Se tonati pialoni, n Espíritu Santo owala notech iwa se tlájtoli chikawak kemi se tlapítsali, onikak ik nokuitlapa ¹¹ iwa onechili:

—Xikikuilo itech se amatlajkuíloli nochí tlan tikita iwa xikintitlanili n chikome tiopanmeh non kateh itech tlalmeh de Asia, non kateh Éfeso, Esmirna, Pérgamo, Tiatira, Sardis, Filadelfia iwa non de Laodisea.

¹² Onimoyakákopki para nikitas akin onechtlapowijtoka iwa ikuak yonimókopki onikinmitak chikome kandelerojteh de oro. ¹³ Iwa intlajkotiah nonteh chikome kandelerojteh onikitak se Akin yomochi tlakatl, itlake weyaktik onajsia asta kan ikxitla, iwa kan ielpa opanotoka se patlawak sintia de oro. ¹⁴ Itsonkal istaktik kemi ichkatl noso kemi nieve, iwa ixtololowah oxotlayah kemi yaskia tletl. ¹⁵ Ixkiwah otsotlaniah kemi tépostli de bronse ikuak xoxotlatok ijtk orno, itlajtol otekuinia chikawak kemi ikuak miakeh ameh ijkuyukatokeh. ¹⁶ Itech imayekma okimpixtoka chikome sítlalteh, iwa itech ikamak okistoka se espada non ojka oyektentitoka iwa otlatekia. Ixko chikawak otsotlania kemi n tonati.

¹⁷ Ikuak onikonitak, oniwetsito ikxitla kemi nimiktoskia. Pero Ye onechtelko ika imayekma, iwa onechili:

—Amo ximawi. Ne Akin nitlapewaltia iwa nitlayakatlamicia. ¹⁸ Ne Akin niyolitok; iwa onimiktoka, pero axa niyolitok iwa ayik nimikis. Ne nitlanawatia ipan mikílistli iwa ipan miktlia. ¹⁹ Xikikuilo tlan otikitak, tlan axa panotok iwa tlan satepa tlamochiwas.

* ^{1:4} Tiopanmeh kijtosneki kan moololoah non kineltokah Cristo Jesús.

²⁰ Ye ni tlan kijtosneki n chikome sítlalteh non otikinmitak itech nomayekma, iwa ye ni tlan kijtosneki n chikome kandelerojteh de oro: n chikome sítlalteh, yejwah n chikome ángelteh de n chikome tiopanmeh, iwa n chikome kandelerojteh kijtosneki n chikome tiopanmeh.

2

Juan kintlajkuililia n tlaneltokakeh non moololoah Éfeso

¹ 'Xiktlajkuilili n tlayákanki non kajki Éfeso kan moololoah n tlaneltokakeh: "Ijkí kijto Akin kimpixtok n chikome sítlalteh itech imayekma, non nemi intlajkotiah n chikome kandelerojteh de oro: ² Ne nikmati nochí tlan tikchiwa. Nikmatok kenomi chikawak titekiti iwa kenomi nochí tikxikoa, iwa noijki nikmatok amo tikxikoa tikanmitas n tlajtlakolejkeh. Ne kuali nikmatok yotikinyejecko nekateh non motenewah tlatitlánilti pero mach milák, iwa yotikinmitak san tekajkayajkeh. ³ Miak tlaijyowílistli yotikxiko ika n tekitl non techchwilijtiwits, iwa ayik timosotlajtika. ⁴ Pero onka itla tlan ayakmó nechpaktia: Yotikka n tlasojtlalístli non achtó otikpiaya. ⁵ Xikilnamiki de kan otíwetski, iwa ximoyolpatla iwa xikchiwa tlan achtó otikchiwaya. Porke tla amo timoyolpatla, san nima nias monawak iwa nikachiwas mokandeler. ⁶ Pero tikpia itla tlan nechpaktia: te tiktlawelita tlan kichiwhah n nicolaítas, ye tlan ne noiwa nikkokolia. ⁷ Akin kineki kajsikamatis makikaki tlan n Espíritu kinmilia n tokniwhah: Akimeh tlatlaniskeh, nikinmakas makikuakah itlakilo n kuawitl non kichiwa se mayolito nochipa, non kajki tlatlajkotia kan ixochitlapa Dios."

Juan kintlajkuililia n tlaneltokakeh non moololoah Esmirna

⁸ 'Xiktlajkuilili n tlayákanki non kajki Esmirna kan moololoah n tlaneltokakeh: "Ijkí kijto Akin tlapewaltijtok iwa tlayakatlamia, Akin omikki iwa oksepa omoyoliti: ⁹ Ne nikmati nochí tlan tikchiwa. Nikmatok tlan mitstlaijyowiltia iwa kenijki mitspoloa, maya momatok inawak Dios tiktlawelpia. Noiwa nikmati kenijki fiero mitstenewah akimeh motokayotiah judíojteh iwa amo milák judíojteh, porke yejwah iaxkawah n satanás. ¹⁰ Amo xikmawili n tlaijyowílistli non itech tipanos, porke n diablo kichiwas manomechtsakuakah sikimeh de nomejwah, ijkó nomechyejeckos, iwa nomechtatlajywiltiskeh májtlakteh tonatijmeh. Nochipa xitlaneltokato asta ikuak timikis, iwa ne nimitsmakas mokorona ye n yankuik nemílistli. ¹¹ Akin kineki kajsikamatis makikaki tlan n Espíritu kinmilia n tokniwhah non moololoah itech Itoka Cristo. Nochi akin tlatlanis, mach ok itla weletis kitoktis non ojpatia mikílistli."

Juan kintlajkuililia n tlaneltokakeh non moololoah Pérgamo

¹² 'Xiktlajkuilili n tlayákanki non kajki Pérgamo kan moololoah n tlaneltokakeh: "Ijkí kijto Akin kipixtok n espada yakawitstik non ojka tlateki: ¹³ Ne nikmati nochí tlan tikchiwa iwa kan tichantitok. Tichantitok ompa kan satanás tlanawatijtok, iwa maya ijkó te nochipa tikchiwa tlan Ne nimitsnawatia. Ayik tikilkajtika Notoka, nion ikuak Herodes Antipas akin okitematiltiaya notlajtol okimiktjkeh ompa Pérgamo kan chantitok n satanás. ¹⁴ Pero noiwa tikpia itla tlan amo nikwelita: ompa tikimpixtok sikimeh non amo kinekih kikawaskeh tlan Balaam okitemachti. Balaam okititi n Balac kenomi kintlajtlakolchiwaltis n tlakah de Israel, iwa okintoktih makikuakah tlan yokin-manilijkah n diostsitsinteh non kinmachijchiwah iwa okintojtopewaya maawilnemikah. ¹⁵ Noiwa mowa kateh sikimeh non kineltokah tlan n nicolaítas kitemachtiah. ¹⁶ Yika, ximoyolpatla, porke tla amó, san nima nias nimitsonitati iwa nikintlajyowiltis ika noespada non kisa itech nokamak. ¹⁷ Akin kineki kajsikamatis, makikaki tlan n Espíritu kinmilia n tokniwhah non moololoah itech Itoka Cristo: Nochi akin kixikos tlan amokuali, nikmakas n tlákuáli non itoka maná, non tlaatitok ilwikak; iwa nikmakas se tetsintli istak kan ikuilitos se yankuik itoka, non amaka ok se kixmatis, sanwel akin kiselis."

Juan kintlajkuililia n tlaneltokakeh non moololoah Tiatira

¹⁸ 'Xiktlajkuilili n tlayákanki non kajki Tiatira kan moololoah n tlaneltokakeh: "Ijkí kijtoa Ikone Dios, non ixtololowah xotlatokeh kemi tletl, iwa ikxiwah tsotlantokeh kemi tépostli non itoka bronse. ¹⁹ Ne nikmati nochi tlan tikchiwa. Nikixmati motetlasojojtalis, motlaneltokalis, iwa kenikki tikimpalewia oksikimeh, noiva kemi titlaxikoa ijkuak titlaijyowia, noiva onikma axa titekititok okachi ke achto. ²⁰ Pero onka itla tlan tikchiwa tlan amo nikwelita, ompa tikpixtok n siwatl Jezabel, non kijtoa tetlapowia de itlajtol Dios pero ika tlan kitemachtia kinkajkayawa notekeitwah para mamomekatijtinemikah iwa makikuakah n tlákuali non kinmaniliah n diostsitsinteh non kinmachijchiwah. ²¹ Ne yonikmák kech tonati non siwatl para mamoyolkopa pero ye amo kineki kikawas imekatanajchiwalis. ²² Yika niktlamotlas ixko petlatl ika kokólistli iwa nojki nikintoktis mamokkokah iwa matlaijyowikah akimeh íwa kochtinemih itech tlajtlákoli, tla amo moyolpatlah iwa kikawah n tlajtlákoli non ye kichiwa, ²³ nikinmiktis ipilwah non siwatl ika se chikawak kokólistli. Ijkó nochteh n tokniwah kitaskeh Ne kuali nikmatok nochi tlan kiyeyekoah n tlakah itech intlamachilis iwa tlan kimachiliah ijtek inyolo. Iwa se por se de nomejwah nomechtlaxtlawis ika tlan ononkichijtinenkeh. ²⁴ Pero nomejwah akimeh nonkateh ompa Tiatira, nomejwah akimeh amo nonkichijtinemih tlan Jezabel kitemachtia nion nonkixmatih tlan yejwah kiliah "weyi tlamachtílistli de n satanás non miakeh amo kixmatih", nomejwah mach ok itla ok se nomechnawatia. ²⁵ Pero ayik xikkawakah tlan ya nonkipixtokeh asta maniwiki. ²⁶ Akin tlatlanis iwa kichijtinemis tlan Ne nikwelita makichiwa asta n iksemi tonatijmeh, Ne nikchiwas matlanawati itech nochteh n paísmeh, ²⁷ iwa kinawatijtos kemi akin chikawak tlanawatia ika se tlakotl iwa asta kintlatlapatsas kemi yaskiah xoktsimeh de barro, ijkó kemi Notajtsi okichi noiva Ne manitlanawati. ²⁸ Noiva nikmakas n weyi sítlali non pankisa kualka. ²⁹ Akin kineki kajsikamatis makikaki tlan n Espíritu kinmilia n tokniwah non moololoah itech Itoka Cristo Jesús."

3

Juan kintlajkuililia n tlaneltokakeh non moololoah Sardis

¹ 'Xiktlajkuilili n tlayákanki non kajki Sardis kan moololoah n tlaneltokakeh: "Ijkí kijtoa akin kimpixtok n chikome espíritus de Dios iwa n chikome sítlalteh: Ne nikmati nochi tlan tikchiwa, iwa nikmati moespíritu miktok maya tikijoah tiyolitok. ² Xixa iwa oksepa xikchikawalti motlaneltokalis non yotikpolojtoka, porke yonikitak tlan tikchiwa, ayamó ajsitok inawak Dios. ³ Xikilnamiki n tlamachtílistli non yotikak. Xiktlakita iwa ximoyolpatla inawak Dios. Tla amo tiijsatos, san kemi se ichtek nonkisati monawak, iwa nion amo tigmatis tlan oras niwalkalakiti. ⁴ Noiva nikmatok ompa Sardis tikimpixtok sikimeh non amo okimpochejkeh intlakenwah ika tlajtlákoli. Yejwah nemiskeh nowa ika istaktik intlakeh, porke okimotlanilijkeh. ⁵ Nochi akin tlatlanis kitlaliliskeh istaktik itlake, iwa ayik nikpojpolos itoka ompa itech amatlajkuuloli kan machotitokeh akimeh yolitoskeh nochipa, iwa itoka niknextis iyakapa n Notajtsi iwa iyakapa n iangelwah. ⁶ ¡Akin kineki kajsikamatis makikaki tlan n Espíritu kinmilia nochteh n tokniwah non moololoah itech Itoka Cristo Jesús!"

Juan kintlajkuililia n tlaneltokakeh non moololoah Filadelfia

⁷ 'Xiktlajkuilili n tlayákanki non kajki Filadelfia kan moololoah n tlaneltokakeh: "Ye ni tlan kijtoa akin milák chipawak iwa yolmilajka; akin kipixtok iyabe n rey David, akin ijkuak tlatlapoa amaka ok se weleti tlatsakua, iwa ijkuak tlatsakua, amaka ok se weleti tlatlapoa: ⁸ Ne nikmati nochi tlan tikchiwa. Xikita, oniktlali moyakapa se kaltentli non tlapotok iwa amaka weletis kitsakua; porke maya amo tichikawak, otiktlakitak notlajtol iwa ayik otikixlaati motlaneltokalis non techpialia. ⁹ Xikita, Ne nimitsinmaktilis sikimeh non kineltokatinemih n satanás, akimeh motenewah judíojteh iwa amo milák. Nikintoktis mamotlankuaketsakah mokxitla para makimatiyah kenikki nimitslasojojtla. ¹⁰ Te otikchi tlan onimitsnawati iwa nochi otikxiko, yika ne nimitspalewis ximakisa

itech n tlaijywílistli non wits ipan tlaltíkpaktli. Non ora nikinyejyekos nochteh n tlaltikpaktlakah.¹¹ Niman niwits. Nochipa xikneltokato notlajtol para amaka mamitskixtili mokorona.¹² Akin tlatlanis, niktlalis kemi pilar kan itiopa Nodios, iwa ayik kisas de ompa; itech nikijkuilos itoka Nodios, itoka n yankuik Jerusalén non waltemoa de ilwikak non Ye ialtépeu, iwa itech nikijkuilos yankuik notoka.¹³ ¡Akin kimati tlakaki makikaki tlan n Espíritu kinmilia n tokniwah non moololoah itech Itoka Cristo Jesús!"

Juan kintlajkuililia n tlaneltokakeh non moololoah Laodisea

¹⁴ 'Xiktlajkuilili n tlayákanki non kajki Laodisea kan moololoah n tlaneltokakeh: "Ijkí kijtoa Akin itoka 'Ijkó Mamochiwa', Akin inewia okitak iwa milájka, iwa por Ye Dios okichijchi nochí tlan onka:¹⁵ Ne nikmati nochí tlan tikchiwa. Ne nikmatok te nion tisesek nion titotonik. ¡Okachi kuali tla tiyetoskia tisesek noso titotonik!¹⁶ Pero kemi san tiyámanki, iwa amo tisesek nion titotonik, yika nimitslakopas.¹⁷ Te tikijtoa tiktawelpia, iwa tikijtoa amitla mitspoloa. Pero Ne nikijtoa amo tikajskamati iwa amo tikpia pakílistli, amitla mopati, amitla tikpia, amo titlachia iwa tixipetstik.¹⁸ Yika, xikkaki tlan nimitsilia: nonawak xikkoaki oro chipawak non yokichichipajkeh ijtit tletl iwa ijkó milák tiktawelpias; techkuili tlakemtl istaktik iwa ximotlakenti para ayakmó ximopijpinatijtinemi ijkó kemi tika tixipetstik. Noiwa techkuili pajtli para moixtololowah iwa xikmotlalili itech moixtololowah para ijkó kuali xitlachia.¹⁹ Akimeh Ne nikintlasojtla, nikinnonotsa iwa nikintlajywiltia. Yika, ximochijchikawa techweyili ika nochí moyolo, iwa ximoyolpatla nonawak.²⁰ Techkaki, ne nimoketok mokaltempa, iwa nitlakakalatok, tla aka kikaki notlajtol iwa nechtlatlapolia, ne nikalakis, nitlakuas iwa, iwa ye nowa.

²¹ Akin tlatlanis, nikkawilis mamotlali nowa kan ne nitlanawatijtok, ijkó kemi ne onitlátlnaki iwa onimotlali iwa n Notajtsi kan tlanawatijtok.²² ¡Akin kineki kajsikamatis, makikaki tlan n Espíritu kinmilia n tokniwah non moololoah itech Itoka Cristo Jesús!"

4

Kiweyiliah Dios kan ilwikak

¹ Satepa ikuak ijkó opanok, oniajkotlachixki iwa onikitak otlapotoka se kaltentli kan ilwikak, iwa n tlájtoli non achto onéchnotski, otékuinki chikaktik kemi se tlapítsali, iwa onechili:

—Xiwaltejko nika, iwa nimitsitis nochí tlan satepa tlamochiwas.

² San nima n Espíritu owala notech, iwa onikitak kan ilwikak se weyi yáyantli, iwa ipan non yáyantli aka ompa oewatoka.³ Iwa akin oewatoka itech non yáyantli, omotaya kemi se tetl tsotlantok non itoka jaspe noso kornalina. Iwa non yáyantli okiyawalojtoka se kosamalotl non satlawel otsotlania kemi se tetl non itoka esmeralda.⁴ Non yáyantli okiyawalojtokah sempoali iwa nawi (24) yáyanteh. Iwa ipan nonteh yáyanteh oewatokah sempóali iwa nawi tetajtsitsinteh non istaktlakentitokah, iwa sejse okipixtoka ipan intsontekoh se korona de oro.⁵ Ompa de kan non weyi yáyantli okisaya tlapejpetlanílisteh, otlaijkuyukaya iwa otlatejtekuinia, iwa iyakapa non weyi yáyantli oxotlatokah chikome tláwilteh. Nonteh chikome tláwilteh, yejwah Iespíritus n Dios.⁶ Noiwa iyakapa non weyi yáyantli okatka se weyi atl kemi teskatl.

Tlatlajkotia, iwa ik iyawalojka non weyi yáyantli, okatkah nawi non yolitokeh iwa ik inyakapah iwa ik inkuitlapa okimpiayah miakeh inmixtololowah.⁷ Non otlapewaltijtoka omotaya kemi se lío; non ipan ome omotaya kemi se torojkonetl; non ipan eyi omotaya kemi se tlakatl; iwa non ipan nawi, omotaya kemi se águila non patlanti.⁸ Nonteh nawi non yolitokeh okimpiayah chikwase inmajaswah, ik tlajitik iwa ik pánixko okimpiayah miakeh inmixtololowah. Iwa nochí tonati tlajka iwa n yuak okijoayah:

¡Santo, Santo, Santísimo,

Toteko Dios non semi weletini,

Akin okatka, Akin kajki iwa Akin wits!

⁹ Iwa ijkuak nonteh non yolitokeh kiweyiliah, kimawistiliah iwa motlasojkamatih inawak, Akin ewatok ipan non weyi yáyantli iwa nochipa yolitok. ¹⁰ N sempóali iwa n nawi tetajtsitsinteh motlankuaketsaskeh iyakapa, kiweyiliskeh Akin nochipa yolitok semijkak, iwa kintlaliskeh inkoronajwah ikxitla n weyi yáyantli, iwa kijtoskeh:

¹¹ Toteko Dios, sanwel Tejwatsi moaxka n
weylistli, mawistlistli iwa n weletlistli.
Porke Tejwatsi otikchijchi nochi tlan onka,
iwa tejwatsi otikmonekilti mayetokah, yika otikinchijchi.

5

Juan okitak n amatlajkuíloli iwa n Ichkatsi

¹ Ijkuakó, akin oewatoka ipan weyi yáyantli, onikitili itech ima se amatlajkuíloli non omemelitoka iwa oijkeilitoka ik tliltik iwa ik pánixko, iwa oyekpepechitoka ika chikome seyojteh. ² Iwa onikitak se ángel weletini non okijtoaya ika chikawak tlájtoli:

—¿Akin okachi yolchipawak makitlapo n amatlajkuíloli iwa makintsomoní n seyojteh?

³ Pero nion itech ilwikak nion ipan tlaltíkpaktli nion itlampa tlali, omoajsia se non weletiskia kitlapos nion aka omixewiaya kontlajtlatas n amatlajkuíloli. ⁴ Iwa ne satlawel onichokaya, porke amo omoajsia nion se yolchipawak akin weletiskia kitlapos non amatlajkuíloli iwa kiampaoas. ⁵ Ijkuakó seme de nonteh tetajtsitsinteh onechili:

—Ayakmó xichoka, n lío non iwejkaixwi n Judá iwa n rey David, yotlátlanki iwa Ye weletis kitlapos non amatlajkuíloli iwa kintsomonis n chikome seyojteh.

⁶ Ijkuakó, tlatlajkotia kan kajki n weyi yáyantli, intlajkotiah n nawi non yolitokeh iwa intlajkotiaj n sempóali iwa n nawi tetajtsitsinteh. Onikitak omoketoka se Ichkatsi non omotaya kemi sakin okimiktijkeh. Okimpiaya chikome ikuakuanwah iwa chikome ixtololowah; nonteh ixtololomeh kijtosnekih n chikome espíritus de Dios non Ye okwalintítlanki ipan nochi n tlaltíkpaktli. ⁷ N Ichkatsi omijkuani inawak Dios Akin oewatoka kan iyayan iwa okónanki n amatlajkuíloli non okipixtoka itech imayekma. ⁸ Ijkuak okónanki n amatlajkuíloli, nonteh nawi non yolitokeh, iwa n sempóali iwa n nawi (24) tetajtsitsinteh owetskeh iyakapa n Ichkatsi. Nochteh okipixtokah sejsen arpa iwa okikitskijtiayah sejsen kopalkaxitl non okinchijchijkeh de oro iwa otentokah ika kópali. Non kópali okatka intiotsajtsilis de akimeh iaxkawah Dios. ⁹ Iwa okitlakuikiliayah nin yankuik tlakuíkali:

Sanwel Tejwatsi tiweletis tikonanas n amatlajkuíloli iwa tikintsomonilis iseyojwah; ken omitsmiktijkeh, iwa ika moesso otechko para matiyetokah iaxkawah Dios, itech nochteh n tlaltíkpaktlah, itech nochteh akimeh kipiah ok se intlajtol, itech nochteh n altepemeh iwa oksikimeh wejweyi tlalmeh.

¹⁰ Otechtlali tireyes iwa titiopixkeh inawak Dios, iwa titlanawatijtoskeh ipan nochi n tlaltíkpaktli.

¹¹ Otlanki onontláchixki, iwa onikinmitak miakeh ángelteh okiyawalojtokah n weyi yáyantli, noiwa ompa okatkah n tetajtsitsinteh iwa non nawi non yolitokeh, iwa nochteh otlajtojtokah. Satlawel miakeh miyomeh ompa okatkah, ¹² iwa chikaktik okijtoayah:
¡N Ichkatsi non okimiktijkeh
sanwel Ye mayeto weletini,
iwa nochi mayeto iaxka,
noiwa maixtlamati iwa
mayeto chikawak,
noiwa makitlakitakah, iwa
makiweyilikah iwa
kuali makiyektenewakah!

¹³ Noiwa nochi tlan Dios okichijchi, tlan kajki itech ilwikak, ixko tlali, itlampa tlali iwa itech weyi atl, iwa nochi tlan intech onka, onikak okijtoayah:

¡Akin ewatok itech n weyi yáyantli iwa n Ichkatsi,
 matiktlakuikilikah,
 matiktlakitakah,
 matikweyijkachiwakah,
 iwa nochipa makipia weletílistli,
 axa, iwa nochipa!

¹⁴ Iwa non nawi, non yolitokeh, okijtoayah:
 —¡Ijkó mamochiwa!

Iwa n sempóali iwa n nawi tetajtsitsinteh omotlankuaketsayah iwa okiweyiliayah.

6

N chikome seyojteh

¹ Onikitak kenomi n Ichkatsi okitsomoni seme de n chikome seyojteh, noiwa onikak seme de n nawi non yolitokeh, chikaktik otlajto kemi se tlatekuinflistli iwa okijo:

—¡Xiwiki!

² Onontláchixki iwa onikitak se kabayo istak, iwa akin ipa otlejkotoka okikitskjtoka se arko. Okimakakeh se korona, iwa okistewak kemi se tlatlanki para okachi tlatlanis.

³ Ijkuak n Ichkatsi okitsomoni non ipan ome seyo, non ipan ome kemi yolkatl, onikak okijo:

—¡Xiwiki!

⁴ Iwa okiski ok se kabayo chichiltik, akin ipa otlejkotiaya okiseli se espada iwa weletílistli para kintoktis san yejwah innewiah mamotekilmakakah iwa mamokechtso-jtsontekikah n tlaltikpaktlakah.

⁵ Ijkuak n Ichkatsi okitsomoni non ipan eyi seyo, non ipan eyi kemi yolkatl onikak okijo:

—¡Xiwiki!

Oniontláchixki, iwa onikitak se kabayo tliliwik, iwa akin ipa otlejkotiaya okipixtoka se balansa itech ima. ⁶ Iwa intlajkotiah nonteh nawi non yolitokeh, onikak se tlájtoli non okijtoaya:

—Se kilo trigo noso eyi kilo sebada ipati tlan se tlakéwali kitlani itech se tonati. Pero amo san xikawilti n aseite iwa n vino.

⁷ Ijkuak n Ichkatsi okitsomoni non ipan nawi seyo, non nawi kemi yolkatl onikak okijo:

—¡Xiwiki!

⁸ Oniontláchixki iwa onikitak se kabayo kostik, iwa akin ipa otlejkotiaya omonotsaya Mikflistli, iwa n Miktlá okualtokaya. Iwa akin otlejkotiaya ipan non kabayo okimakakeh weletílistli para makinmijmiki ika espada, ika apisotl, ika kokólisteh iwa ika yolkameh tekuanimeh, se kuarto de akimeh nemí ipan nin tlaltíkpaktli.

⁹ Ijkuak n Ichkatsi okitsomoni non ipan mákuili seyo, itlampa n artal onikitak inmalmajwah akimeh okinkechtsontekeh por okitlakitakeh itlajtol Dios. ¹⁰ Yejwah chikaktik otsajtsia:

—Toteko Dios Yolchipawak Tejwatsi Akin nochipa tikchiwa tlan tikjtoa, ¿asta kemanía tikintlaijyowiltis iwa tikintlaxtlawaltis akimeh otechmiktjkeh ipan nin tlaltíkpaktli?

¹¹ Ijkuak ó kinmajmakakeh intlakeh istak, iwa okimiljkeh mamosewikah ok kechmeh tonatijmeh, asta mamoaixtitkah inmikniwah akimeh noiwa kitekitiliah Cristo, akimeh ok opoliwiah kinniktiskeh kemi yejwah.

¹² Ijkuak n Ichkatsi okitsomoni n chikwase n seyo, oniontláchixki, iwa chikawak otlalólinki. N tonati otlilewik kemi se tlakemtl tliliwik, n metsi ochichilewik kemi estli,

¹³ iwa n sítlalteh owewetsikoh ixko tlali, kemi ijkuak n ejekatl kiwiwixoa se igoskuawitl iwa kitepewilia nochí itlakilo non ok xoxobik. ¹⁴ N ilwikak san ovalpoliwick kemi ijkuak moololoa se amatl, iwa nochteh n tepemeh iwa n tlalmeh non pankistokeh itlajko n weyi atl omijkuanijkeh de kan okatkah.

¹⁵ Iwa n reyes non tlanawatijtokeh itech nin tlaltípkaktli, sansikah iwa n wejweyi teachkameh, noiva non tominyojkeh, n kapitameh, n tekiwajkeh, nochteh n tlakah akimeh tenawak tekitih iwa akimeh inselti monawatiah, nochteh oyajkeh omotlajtlaati-toh tepeyo kan kúyokteh iwa intsalko n wejweyijtikeh temeh. ¹⁶ Iwa okimiliyah n tepemeh iwa n temeh non wejweyijtikeh:

—¡Topa xiwetsikah, iwa techpachokah para amo matechita neká Akin ewatok ipan weyi yáyantli, iwa amo matechkualankaita n Ichkatsi, ¹⁷ porke yoajsiko n tonati iwa techtlaijyowitziskeh! ¡Amaka weletis kixikos inkualanilis!

7

Kinmixkuamachotiah n 144,000

¹ Satepa, onikinmitak nawi ángelteh non omokejketokah itech n nawi itlatenyowah n tlaltípkaktli, okitsakuilijtokah n ejekatl non ik ompa ovalaya, para amo matlaxojpitsa ixko tlali, nion itech weyi atl, nion kan tlakuaujyo. ² Noiwa onikitak ok se ángel non ovalaya kan ik kisa tonati, iwa okualikaya non ika Dios tlaixmachotiskia. Nin ángel, chikaktik okintsaitsili n nawi ángelteh non okiselijkeh weletílistli para makikojkokah n tlaltípkaktli iwa nochti tlan onka itech weyi atl.

³ Iwa okinmili:

—¡Amaka xikkojkokah nion n tlaltípkaktli, nion tlan onka itech weyi atl, nion n wejweyi kuaujmeh, asta matitlamikah matikinmixkuaneskayotikah itekitwah Dios!

⁴ Iwa onikak okintenejkeh 144,000 non okinmixkuaneskayotijkeh, nochteh non wale-watokeh de Israel. ⁵ Okinmixneskayotijkeh

- 12,000 iwejkaixwiwah n Judá;
- 12,000 iwejkaixwiwah n Rubén;
- 12,000 iwejkaixwiwah n Gad;
- ⁶ 12,000 iwejkaixwiwah n Aser;
- 12,000 iwejkaixwiwah n Neftalí;
- 12,000 iwejkaixwiwah n Manasés.
- ⁷ 12,000 iwejkaixwiwah n Simeón;
- 12,000 iwejkaixwiwah n Leví;
- 12,000 iwejkaixwiwah n Isacar;
- ⁸ 12,000 iwejkaixwiwah n Zabulón;
- 12,000 iwejkaixwiwah n José iwa
- 12,000 iwejkaixwiwah n Benjamín.

Senmiaktikeh otlakentitokah ika intlakeh istak

⁹ Ijkuak yotlanki onikitak nochti ni, onikinmitak senmiaktikeh tlaltípkaktlakah non ayakmaka oweletia okimpoaya, omoketokah iyakapa n weyi yáyantli iwa iyakapa n Ichkatsi. Yejwah otlakentitokah ika intlakeh istak, iwa itech inmawah okipixtokah siki soyatl; yejwah ovalajkeh ik nochteh tlalmeh itech nin tlaltípkaktli, de nochti familajteh, iwa de nochti altepemeh non tlatlamantli otlachixtokah iwa tlatlamantli intlajtol okipiayah. ¹⁰ Nochteh otsajtsiah chikawak:

¡Totemakixtilis wits de Todios

iwa n Ichkatsi,

Akin ewatok ipan weyi yáyantli!

¹¹ Iwa n weyi yáyantli iwa n tetajtsitsinteh iwa non nawi non yolitokeh, okatkah tlatlajkotiah, iwa nochteh n ángelteh okinyawalojtokah. Ijkuakó nochteh n ángelteh owalmoixtlapachojkeh iyakapa n weyi yáyantli. Okiweyilijkeh Dios ¹² iwa okijoayah:

¡Ijkó mamochiwa!

Matikyektenewakah, matikweyilikah,

iwa matikmatikah Ye ixtlamati

iwa matimotlasojkamatikah inawak,

iwa sanwel Ye kipia weletílistli iwa chikawálistli.
 Yika, matiktlakitakah Todios axa iwa nochipa.
 ¡Ijkó mamochiwa!

¹³ Ijkuakó seme de n tetajtsitsinteh onechtlajtlani:

—¿Akimeh ninteh non tlakentitokeh ika intlakeh istak, iwa kan walewatokeh?

¹⁴ Ne oniknankili:

—Teta, tejwatsi tikmatok.

Iwa Ye onechili:

—Nika kateh akimeh yopanokeh itech n weyi tlaijyowílistli, yejwah yokimpakeh intlakenwah iwa okinmistayaltijkeh ika iesso n Ichkatsi. ¹⁵ Yika, kateh iyakapa iweyi iyayan Dios, tlajka iwa n yuak kiweyiliah itech iweyitiopa; iwa akin ewatok ipan weyi yáyantli inwah yetos iwa kimpalewijtos. ¹⁶ Mach ok apismikiskeh nion amikiskeh. N tonati ayakmó kintlatis nion kintonalmiktis ¹⁷ porke n Ichkatsi, non kajki tlatlajkotiah kan weyi yáyantli, kinmokuitlawis kemi n tlájpixki kinmokuitlawia iichkawah, iwa kinwikas kan améyali non kichiwa se mayolito; iwa Dios kinwajwachilis inmixayo nochteh yejwah.

8

Non chikome seyo iwa n kopalkaxitl de oro

¹ Ijkuak n Ichkatsi okitsomoni n chikome seyo, san owaltlamoka itech ilwikak kemi tlajko ora. ² Otlanki onikimitak n chikome ángelteh non nochipa kateh iyakapan Dios, iwa okinmajmakakeh sejsen tlapítsali. ³ Satepa ok se ángel owala omoketsako iyakapa n artal de oro non kajki iyakapa n weyi yáyantli iwa okualikaya se kopalkaxitl de oro. Nin ángel okimakakeh miak kópali para ika matlapopochwi ipan artal sansikah ika intiotsajtsilis nochteh n yolchipawakeh. ⁴ Iwa ipokyo n kópali non ika otetlaweyilijtoka n ángel, iwa intiotsajtsilis n yolchipawakeh, sansikah otlejkokeh iwa okalakitoh inawak Dios. ⁵ Ijkuakó n ángel okónanki n kopalkaxitl, okitemiti ika tlekúyoli non okatka kan artal iwa okualtlamotlak ipan tlaltíkpaktli. San nima owaltlatejtekuinki chikawak, otlaijkuyukak, otlapejpétlanki iwa otlalólinki.

N chikome tlapítsalteh

⁶ N chikome ángelteh non okimpixtokah n chikome tlapítsalteh omoyektlatlalijkeh para tlapitsaskeh.

⁷ Non ipan se ángel okípitski itlapitsal, iwa san nima owalmokajka tesiwitl iwa tletl nelitiwits ika estli ipan tlaltíkpaktli. Iwa se tercio de n tlaltíkpaktli otlatlak. Nochi kuawitl iwa xiwitl xoxobik otlatlak.

⁸ Non ipan ome ángel okípitski itlapitsal, iwa okikajkajkeh ijlik weyi atl, kemi se weyi tepetl xotlatiwits, iwa se tercio de n weyi atl omókopki estli.

⁹ Iwa se tercio tlan oyolitoka itech weyi atl omikki, iwa se tercio n barkojteh non onemiah ixko atl okinxixititskeh.

¹⁰ Non ipan eyi ángel okípitski itlapitsal, iwa se weyi sítlali xotlatiwits owalwetsiko ipan se tercio itech nochteh n rios iwa n améyalteh. ¹¹ Non sítlali itoka Chichiktik. Yika se tercio itech nochteh n ameh non kateh ipan tlaltíkpaktli ochichiyakeh, iwa miakeh omijmikeh porke okonikeh non atl.

¹² Non ipan nawi ángel okípitski itlapitsal, ijkuakó se tercio n tónati okualok, noiva se tercio n metsi iwa n se tercio nochteh n sítlaltec osejseujkeh. Yika, tlajka iwa n yuak mach ok oyektlawijkeh.

¹³ Otlanki oniontláchixki, iwa onikitak se águila opatlantinemia itlajko ilwikak, iwa chikawak okijtoaya:

—¡Miálmasteh akimeh nemih ipan tlaltíkpaktli, porke ok poliwi kipitsaskeh intlapitsal non ok eyi ángelteh!

9

¹ Non ipan mákuili ángel okípitski itlapitsal, iwa onikitak se sítlali non owetsiko ipan tlaltípkaktli. Iwa non sítlali okimakakeh n yabe non ika motlapoa non sentlawejkatlantik poso. ² Otlanki okitlapo n sentlawejkatlantik poso, iwa ijtk opé kisa miak poktli kemi ikuak popoka se weyi orno. Iwa n poktli non itech okisaya, okipoktemiti n tonati iwa n ejekatl. ³ Iwa ijtk non poktli okiskeh wejweyi chapulimeh non opatlantinemiah ipan tlaltípkaktli. Nonteh chapulimeh okinmakakeh weletílistli para matlatepinakah kemi yaskiah kolomeh. ⁴ Nonteh kemi chapulimeh, okinnawatijkeh amo makikuajkuakah n xiwitl non onka ipan tlaltípkaktli, nion itla tlan selistok noso itla kuawitl, yej sanwel makintepinakah n tlaltípkaktlakah akimeh amo kipiah ixneskayo Dios itech inmixkuak. ⁵ Pero amo okinkawilijkeh makinmiktikah n tlakah, yej san makinkojkokah mákuili mestli; iwa ikuak nonteh kemi chapulimeh otlatepiniayah, chikawak otekokoaya kemi ikuak tlatepinia se kolotl. ⁶ Itech nonteh tonatijmeh, n tlakah kinekiskeh momiktiskeh pero mach weletis mikiskeh. Iwa maya kinekiskiah mamikikah, n mikílistli kincholilis.

⁷ Ninteh kemi chapulimeh okatkah kemi kabayojteh non kintekitiltiah kan momijmiktilo. Itech intsonteko okiwikayah kemi se korona de oro, iwa otlachixtokah kemi yaskiah tlakah. ⁸ Intsonkal okatka weweyaktik kemi itsonkal se siwatl, iwa intlanwah kemi se lío. ⁹ Iwa innakayo okemelitoka ika se tlakuaktik ewayotl kemi yaskia tépostli. Iwa inmajaswah chikawak oijkuyukayah, kemi miakeh karretajteh non motlelojtiwih kan momijmiktilo. ¹⁰ Okatkah kuitlapilejkeh kemi kolomeh iwa ika otlatepiniayah. Iwa itech inkuitlapil okipiayah weletílistli para kinkojkoskeh n tlakah mákuili mestli. ¹¹ Ninteh kemi chapulimeh okinnawatijtoka n ángel non owalewatoka kan sentlawejkatlantik. Non ángel itech tlájtoli hebreo itoka Abadón, iwa itech tlájtoli griego itoka Apolión, non kijtosneki: Teixpolo.

¹² Iwa opanok nin tlaijywílistli non otlapewaltijtoka. Pero ok ome sokin witseh.

¹³ Non ipan chikwase ángel okípitski itlapitsal, iwa onikak se tlájtoli non okisaya intsalko nonteh nawi kuakuameh non okimpiaya n artal de oro non okatka iyakapan Dios. ¹⁴ Nin tlájtoli okili n chikwase ángel non okipixtoka itlapitsal:

—Xikinkajkawa n nawi ángelteh non ilpitokeh inakastla n weyi río Éufrates.

¹⁵ Ikuakó okinkajkajkeh nonteh nawi ángelteh, porke yowejka okintlalijkah para ikuak ajsiskia non ora, non tonati, non mestli iwa non xiwitl para kinmijmiktiskeh se tercio de nochteh n tlaltípkaktlakah. ¹⁶ Iwa onikak okintenejkeh ome siento miyomeh soldadojteh non omotleloayah ipan kabayo.

¹⁷ Ijkó onikinmitak n kabayojteh itech tlan onechmonextili. Iwa non impah otlejkoitiyah oelpantlakentitokah ika se tépostli patlawak kemi tletl, safiro iwa asufre. Iwa inkabayojwah okipiayah intsonteko kemi liomeh, iwa itech inkamak okikisaya tletl, poktli iwa asufre. ¹⁸ Iwa se tercio nochteh n tlaltípkaktlakah omijmikeh ika ninteh eyi kokólisteh non okisayah itech inkamak n kabayojteh ika tletl, poktli iwa asufre. ¹⁹ Inweletilis nonteh kabayojteh okatka itech inkamak iwa itech inkuitlapil; porke inkuitlapil okatka kemi se koatl non okipiaya itsonteko, iwa ika otekuayah.

²⁰ Pero n oksikimeh tlaltípkaktlakah non amo omijmikeh ika ninteh eyi kokólisteh, amo okikajkeh n tlajtlácoli non okichijtinemiah; yej okiwilitakeh kinweyilijtinemiskeh n demóniojteh iwa n diosmeh non kinmachijchiwah ika oro, plata, bronce, tetl iwa kuawitl, ninteh amo tlachiah, nion tlakakih, nion weletih nejnemih. ²¹ Iwa amo okikajkeh temiktiskeh, tetlajchiwiskeh, momekatijtinemiskeh iwa tlachtekiskeh.

10

N ángel non okipixtoka n librojtsi

¹ Ikuakó onikitak ok se ángel weletini non ottemotiwalaya de ilwikak iwa okiken-tiwalaya se mextli, iwa ipan itsonteko okiyawaloaya se kosamalotl. Ixko otsotlania kemi n tonati, iwa ikxiwah omotayah kemi ome tlakétsali de tletl. ² Itech ima okipixtoka se amatlajkuíloli tlapotok, iwa ika iyekmaikxi otlaksak itech weyi atl, iwa

ika iopochmaikxi otlaksak itech tlali. ³ Otlanki chikawak owaltsajtsik kemi se lío, iwa omokakeh chikome tlatekuinílisteh non okinankilijkeh. ⁴ Ijkuak nonteh chikome tlatekuinílisteh otlanankilijkeh, ne yoniaya nikijuiloti tlan okijtojkeh. San nima onikak se tlájtoli kan ilwikak non onechiliaya:

—Xiklaati tlan okijtojkeh n chikome tlatekuinílisteh, iwa amo xikikuilo.

⁵ Ijkuakó n ángel non onikitak moketok ipan weyi atl iwa n tlali, okajkok imayekma ik ilwikak ⁶ iwa okimilajkaijto ixpa n Dios Akin nochipa yolitok, Akin okichijchi n ilwikak, n tlaltíkpaktli, n weyi atl iwa nochí tlan onka intech, iwa okijo:

—Ayakmó wejkawas n tonati, ⁷ porke ijkuak ajsiki n tonati non ipan chikome ángel kipitsas itlapitsal, ijkuakó panos nochí tlan ayamó okimatiah n tlaltíkpaktlakah, ijkó kemi Dios ya wejkawitl okinmatiltih ika n tiotlajtojkeh.

⁸ N tlájtoli non onechahnotska kan ilwikak oksepa onechtlapowi iwa onechili:

—Xio inawak n ángel non moketok ipan weyi atl iwa ixko tlali, iwa xikonana n amatlajkuíloli tlapotok non kipixtok itech ima.

⁹ Onia kan omoketoka n ángel iwa oniktlajtlanili manechmaka n amatlajkuíloli iwa Ye onechili:

—Xikonana iwa xikuajtiwetsi. Itech mokamak tikmachilis tsopelik kemi n nékuitli, pero mijtik, chichiyas.

¹⁰ Ijkuakó onikkitski n amatlajkuíloli itech ima n ángel iwa onikuajtíwetski; itech nokamak otsopeliak kemi nékuitli, pero ochichiyak ijtik notlalax. ¹¹ Satepa onechilijkeh:

—Oksepa moneki xitetlapowi tlan satepa mochiwaskeh n tlaltíkpaktlakah, n tlalmeh, iwa non kipiah oksikimeh intlajtol iwa n reyes.

11

Ome akimeh milák nochí okitakeh

¹ Onechmakakeh se oatl kemi se tlakotl non ika se tlatamachiwa, iwa onechilijkeh:

—Ximoketsa iwa xiktamachiwa n Weyi Tiopa de Dios iwa n artal, iwa xikimpoa kechmeh non ompa kiweyiliah. ² Amo xiktamachiwa n atrio non kajki ik ikaltempanyo n Weyi Tiopa de Dios, ken yokinmaktilijkeh non amo judíojteh, iwa yejwah kitlajtlaksaskeh n chipawak altepetl ome pójali iwa ome (42) mestli. ³ Ne nikintitlanis ome profetas. Yejwah tlakentitiaskeh ika intlakeh wapawak, para matetlapowikah de notlajtol se mil iwa ome siento iwa n eyi pójali (1,260) tonatijmeh.

⁴ Ninteh ome profetas yejwah n ome olivos noiva n ome kandelerojteh non moketokeh iyakapan Totajtsi Dios Akin tlanawatijtok ipan nin tlaltíkpaktli. ⁵ Tla aka kineki kinkojkos ninteh ome profetas, yejwah kikixtiah tletl itech inkamak, iwa kinmiktiskeh akimeh kinkokoliah. ⁶ Yejwah noiva kipiah weletílistli ken kitsakuaskeh n ilwikak, iwa ijkó amo makiawi itech nonteh tonatijmeh ijkuak tetlapowijtinemiskeh itlajtol Dios. Noiva kipiah weletílistli kenomi n atl kikopaskeh estli, iwa kenomi kitlajiyowiltiskeh n tlaltíkpaktli ika miak kokólisteh, san kech welta kinekiskeh. ⁷ Iwa keman yotlankeh okitematiltijkeh itlajtol Dios, n yolkatl temohti non walkisas ijtik poso sentlawejkatlantik, motekilmakas inwah, kintlanis iwa kinmiktis. ⁸ Inkuerpojwah wilantoskeh itlajko n sókalo kan altepetl de Jerusalén kan Toteko Cristo Jesús okikrusifikarokeh, kan noiva kitokayotiah Sodoma noso Egipto. ⁹ N tlakah itech nochteh n altepemeh, non amo san se intlachialis okipixtokah, noiva non amo san se intlajtol okipiaya itech nochteh n tlalmeh, eyi tónati iwa n tlajko konimitoskeh ompa wilantoskeh inkuerpojwah iwa amo kitekawiliskeh makintlapachokah. ¹⁰ Iwa akimeh chantitokeh ipan tlaltíkpaktli, pakmikiskeh iwa miak mopajpaktiskeh ijkuak kimatiskeh yomikkeh, asta kinmomamakaskeh tlatliokólilteh, porke nonteh ome iprofetajwah Dios, satlawel okintlaijywiltayah. ¹¹ Satepa ijkuak yopanokeh eyi tonatijmeh iwa n tlajko, Dios okinyoliti iwa oksepa omokeketskeh, iwa nochteh non okimitakeh, satlawel omomojijkeh. ¹² San nima nonteh ome tlajtoltlatem-tiltijkeh okikakeh kan ilwikak se tlájtoli chikawak non okimiliaya:

—¡Xiwaltlejkokah nika tlakpak!

Iwa owaltlejkokeh ilwikak ijtik se mexatl, iwa nochteh akimeh okinkokoliyah okim-
itakeh tlejkotiwih. ¹³ Ijkuakó owatlalólinki chikaktik, iwa n májtlaktli itech se siento
de nochteh n kalmeh oewewetskeh, iwa chikome mil tlakah de nin tlali omijmikeh. Iwa
nochteh non amo omijmikeh satlawel omomojtijkeh, iwa opé kiweyiliah Dios non kajki
ilwikak.

¹⁴ Non ipan ome tlaijywílistli yopanok, iwa san nima ompa wits non eyi.

Non ipan chikome tlapítzali

¹⁵ Non chikome ángel okípitski itlapitsal, ijkuakó owalmokakeh sikimeh tlájtolteh kan
ilwikak, non okijtoayah chikawak:

Axa nochteh n altepetlakameh non okinnawatijtokah n tekiwajkeh,
yopanokeh imak Toteko Dios iwa Cristo Jesús;
iwa Ye Akin tlanawatijtos axa iwa nochipa.

¹⁶ Ijkuakó n sempóali iwa n nawi (24) tetajsitsinteh non oyayantitokah iyakapa n Dios,
omoixtlapachojkeh iwa okiweyijkachijkeh Dios. ¹⁷ Iwa okijtokeh:

Timotlasojkamatih monawak Toteko,

Todios weletini,
tejwatsi Akin axa timuistika,
yotimuistikatka iwa tiwalmuikas,
ken yotikonanki weyi moweletilis
iwa yopé titlanawatia.

¹⁸ Nochteh n tlaltipaktlakah okualankeh.

Iwa yoajsiko n tonati ijkuak pewas titetlaijywoltis,
noiwa n tonati ijkuak Tejwatsi tikintlajtlakolmakas non yomikkeh.
Tikintlaxtlawis motekitwah n profetas non okitetlapowijkeh motlajtol.
Nochteh akimeh Tejwatsi moaxkawah iwa kiweyiliah Motoka,
tsitsikitikeh iwa wejweyi,
yoajsiko n tonati ijkuak tikimpojpolos akimeh kijtlakoah n tlaltípkaktli.

¹⁹ Ijkuakó iweyi Tiopa Dios non kajki kan ilwikak, owalmotlapo, iwa ompa okatka
n kaxa non ijtik okimpixtoka n májtlakteh itlanawatilwah. Iwa opé tlapejpetlani,
tlaijkuyuka, tlatejtekuini, tlalolini iwa chikaktik opé tesawi.

12

N siwatl iwa n dragón

¹ Ijkuakó owalmonexti se weyi neskayotl kan ilwikak: onikitak se siwatl okimoken-
titjoka n tonati, n metsi okatka ikxitla, iwa ipan itsonteko okipixtoka se korona non
okimpiaya májtlaktli iwa ome sítlalteh. ² Nin siwatl yokatka kókokki de konetl, iwa
otsajtsia ken ya tlakatiskia ikone. ³ Otlanki itech ilwikak owalmonexti ok se neskayotl:
onikitak se weyi dragón chichiltik non okimpiaya chikome itsontekonwah, májtlaktli
ikuauuanwah iwa sejseñ korona ipan itsontekonwah. ⁴ Ika ikuilapil okinmixtlanki se
tercio de nochteh n sítlalteh non kateh ilwikak iwa okualintepe ipan tlaltípkaktli. Nin
dragón omoketsato iyakapa n siwatl iwa kikualis ikone san nima ijkuak tlakatiskia.

⁵ N siwatl okípixki se ikone chokotsi akin kinnawatijtos nochteh n tlaltipaktlakah
ika chikaktik tlanawátili. Iwa san nima okikixtilijkeh ikone iwa okiwakakeh inawak Dios
kan yayantitok. ⁶ Iwa n siwatl omotlaatito kan amaka chantí, kan Dios okitlamajmanijká
para ompa makitlakualtijtokah se mil iwa ome siento iwa n eyi póali (1260) tonatijmeh.

⁷ Satepa omotekilmakalok itech ilwikak. N ángel Miguel iwa iangelwah omotekil-
makakeh iwa n dragón. Iwa iangelwah n dragón omotekilmakakeh iwa iangelwah n
ángel Miguel. ⁸ Pero n dragón iwa iangelwah otlapolokkeh iwa ayakmó okinkawilijkeh
mamokawakah ilwikak. ⁹ Ijkó okiwalkixtijkeh n weyi dragón, n koatl non yowejka kajki,

non noiva itoka diablo iwa satanás, ye akin kinkajkayawa nochteh n tlaltikpaktlakah. Ye iwa iangelwah okualintlamotlakeh ipan nin tlaltíkpaktli.

¹⁰ Ijkuakó onikak kan ilwikak se tlájtoli chikawak non okijoaya:

—Yoajsiko n tonati ijkuak nochteh iaxkawah Dios kinmakixtiskeh, yoneski iweletilis n Totajtsi Dios iwa yopé tlanawatia. Iwa n Cristo noiva yokeseli tlanawátli; ken yokiwalk-ixtijkeh akin tlajka iwa yuak okinteiliaya tokniwah inawak Totajtsi Dios. ¹¹ N tokniwah yokitlanilijkeh n diablo ika ieso n Ichkatsi iwa ika itlajtol Cristo. Iwa yejwah amo omaujkeh mikiskeh, yej okimosenmakakeh otetlapowijitineneh maya makimiktikah. ¹² Yika, jmayeto miak pakílistli ilwikak, iwa xiylpakakah nomejwah akimeh ompa nonchantitokeh! Pero jmiálmasteh akimeh chantitokeh ipan tlaltíkpaktli iwa itech weyi atl! N diablo yotemok kan nomejwah iwa kualankamiki, ken kimatok mach ok wejkawitl nentinemis.

¹³ Keman n dragón okitak yokualtlamotlakeh ipan tlaltíkpaktli, opé kitotojtokatinemi n siwatl non okípixki ikone. ¹⁴ Pero n siwatl okimakakeh ome wejweyi iajaswah kemi se águila ijkó maweleti makicholili n dragón wejka kan tlaltejtéyinki, kan yokitlamaj-manilijkah, ompa kan kitlakualtijtoskiah eyi xiwitl iwa n tlajko. ¹⁵ N dragón okitlakopki miak atl iwa non atl omókopki kemi se aweyatl iwa makiwika n siwatl. ¹⁶ N tlali okitlapo ikamak iwa okitolo n atl non okitlakopki n dragón, ijkó okipalewi n siwatl. ¹⁷ Yika n dragón okachi okualankamik iwan siwatl, iwa oyajki omotekilmakato iwa n oksikimeh ipilwah n siwatl, akimeh kichiwah tlan Dios tlanawatia iwa kineltokah tlan milák, tlan Cristo Jesús okinmachtí.

¹⁸ N dragón omoketsato ipan xali itempa n weyi atl.

13

N ome yolkameh temojtijkeh

¹ Iwa onikitak opankiski ijtki atl se weyi yolkatl temojoji non okimpiaya chikome itson-tekonwah iwa májtlaktli ikuakuanwah. Intech ikuakuanwah okipiaya sejse n korona, iwa sejse itsontekonwah omachotitoka se tlájtoli fierotik non ika okiwikaltiaya Dios. ² Nin yolkatl non onikitak, omotaya kemi se weyi yolkatl temojoji. Okimpiaya ikxiwah kemi se oso, iwa ikamak kemi se lío. Iwa n dragón okimák iweletilis, iyayan iwa weyi itekiwijayo.

³ Seme de itsontekonwah non yolkatl omotaya kemi satlawel okikojkolijkah iwa ya mikiskia, pero san nima ovalpajtik kan okikojkojka. Iwa nochteh n tlaltikpaktlakah omotlajtlachialtijkeh iwa opé kitlakitah non weyi yolkatl. ⁴ Iwa okiweyilijkeh n dragón porke ye akin okimák itlanawatil n yolkatl temojoji, iwa okiweyilijkeh noiva nin yolkatl temojoji. Okijtojkeh:

—¿Akin ok se kemi nin yolkatl temojoji, iwa akin weletis motekilmakas iwan ye?

⁵ Nin yolkatl noiva okikawilijkeh matlajtolpano iwa matlajto fiero de Dios, noiva okikawilijkeh matlanawatijto ome pójali iwa ome mestli. ⁶ Iwa nin yolkatl temojoji, ijkó okichi, owalmokamatlapo iwa opé fiero kitenewa Dios iwa Itoka, iwa de iweyi Tiopa iwa de nochteh akimeh kateh ilwikak. ⁷ Noiva okikawilijkeh mamotekilmakakah iwa n tokniwah yolchipawakeh asta makintlani. Satepa okitlalijkeh makinnawati nochteh n tlaltikpaktlakah de nochteh n altepemeh, non okipiayah oksikimeh intlajtol, iwa nochti n tlaltíkpaktli. ⁸ Nochteh akimeh intokah amo oikuilitoka itech iamatlajkuilol n Ichkatsi non okimiktijkeh desde ijkuak omochi n tlaltíkpaktli, okiweyilijkeh non yolkatl temojoji. Yejwah akimeh intokah amo machotitok kan nestokeh akimeh yolitoskeh nochipa.

⁹ ¡Tla aka kineki kajsikamatis, kuali makikaki!

¹⁰ Akin moneki motsakuas, kitsakuaskeh. Iwa tla moneki makimiktikah ika tépostli, noiva kimiktiskeh. Yika, akimeh iaxkawah Dios, moneki makixikokah nochti tlaijy-owílistli iwa san matlaneltokakah.

¹¹ Satepa, onikitak ok se weyi yolkatl temojoji, non ovalpanksako ixko tlali. Nin yolkatl okimpiaya ome ikuakuanwah kemi ikuakuanwah se ichka, pero otlajtoaya kemi se dragón. ¹² Iwa chikawak otlanawatiaya, kemi otlanawatiaya n yolkatl temojoji, iwa

chikawak otlanawatiaya ikuak okitekitiliaya n yolkatl temohti. Nin yolkatl, okintokti nochteh n tlaltikpaktlakah makiweyilikah non yolkatl temohti, non san nima opajtik kan okikuakojkojka. ¹³ Noiwa okinchiwaya wejweyi milagros, asta okichiwaya mawetsiki tletl de kan ilwikak itech tlali inmixpah nochteh n tlakah. ¹⁴ Iwa ika nochteh ninteh milagros non okikawilijkeh makinchawa ixpa n yolkatl temohti, ika noni okinkajkaya n tlaltikpaktlakah iwa okinnawati makichijchiwakah ika tetl se estatua non matlachixto kemi neká yolkatl temohti non okikuakojkojka iwa amo omikki. ¹⁵ Iwa non ipan ome yolkatl non omotaya kemi se ichka, okimakakeh weletílistli para makiyoliti iestatua n yolkatl temohti, para maweleti matlajito iwa makinmijmikti nochteh akimeh amo kiweyiliskeh. ¹⁶ Nin yolkatl noiwa okintokti nochteh n tlakah, tsitsikitikeh iwa wejweyih, próbesteh iwa akimeh kitlawelpiah tomi, akimeh tenawak tekitih, iwa akimeh inselti monawatiah, nochteh makinmixneskayotikah. ¹⁷ Iwa amaka weletis tlakoas noso tlane-makas, sanwel akin ipan ixkuak noso itech ima ixmachotitos ika itoka noso ika inúmero non yolkatl. ¹⁸ Nika moneki se non ixtlamati. Akin milák ixtlamati, makiyejyekoli inúmero n yolkatl temohti, porke non número iaxka se tlakatl. Iwa non número ye chikwase n siento iwa n eyi póali iwa n chikwase (666).

14

Intlakuikal n 144,000 judíojteh

¹ Satepa onontláchixki iwa onikitak n Ichkatsi omoketoka ipan Siontepétl. Ompa íwa okatkah se siento iwa ome póali iwa n nawi mil (144,000) tlakah non okipixtokah ijkuitlitol Itoka n Ichkatsi iwa Itoka Itajtsi kan inmixkuak. ² Onikak se tlájtoli kan ilwikak kemi ikuak ijkuyuka miak atl noso ikuak chikawak tlatejtekuini. Omokakia kemi miakeh tlatsotsonkeh kintsotsontoskiah inmarpajwah. ³ Iwa okitlakuikatokah se yankuik tlakuíkali iyakapa n weyi yáyantli, inyakapah n nawi non yolitokeh iwa inyakapah n tetajtsitsinteh. Amaka oweletia okajsia non tlakuíkali, sanwel non se siento iwa ome póali iwa n nawi mil tlakah (144,000) non okintlaçtlawilijkeh intlajtlakolwah itech nochteh n tlaltikpaktlakah. ⁴ Ninteh akimeh omomalwijkeh iwa amo omonamiktijkeh, yawah iwan Ichkatsi san kan ik Ye yawi. Yejwah non okinkojkeh itech nochteh n tlaltikpaktlakah para mayetokah non achto tlamana inawak Dios iwa n Ichkatsi. ⁵ Amo ayik okijojkeh itla tlan amo milák, iwa nion se tlajtlákoli kipiah.

Tlan okijojinemiah n eyi ángelteh

⁶ Ijkuakó onikitak ok se ángel opatlantinemia itlajko ilwikak. Non ángel okiwikaya n kualtlájtoli de Dios non techmakixtia. Oyaya kinmatiltiti nochteh akimeh chantitokeh ipan tlaltíkpaktli, itech nochteh paísmeh, innawak nochteh non tlatlamantli tlachixtokeh, innawak nochteh akimeh tlatlamantli tlajtoah, iwa itech nochteh n altepemeh,

⁷ Iwa chikaktik okijoaya:

—Xiktlakitakah Dios iwa xikweyilikah, porke yojsiko n ora tetlaijywiltis. Xikweyilikah Ye akin okichijchi n ilwikak iwa n tlaltíkpaktli, n weyi atl iwa n améyalteh.

⁸ Ok se ángel onikitak okualtokaya, iwa okijo:

—Yowetski, yowetski n weyi Babilonia, ken okinwijwinti nochteh n tlaltikpaktlakah, iwa ika ielewilis amokuali okinyoltlanki para matlajtlakolchiwakah.

⁹ Otlanki onikitak ok se ángel non ipan eyi, owala iwa chikaktik okijo:

—Tla aka kiweyilia n yolkatl temohti iwa iestatua noso kimokawilia makiixneskayotikah itech ixkuak noso ipan ima, ¹⁰ Dios satlawel kualankamikis iwa chikawak kitlaijywiltis. Dios yokimájmanki se tlaijywílistli ika tletl iwa ika asufre non xotlatok. Iwa iangelwah iwa n Ichkatsi kitaskeh kenijki tlaijywosis. ¹¹ N pokli non kistos kan kintlaijywiltijtoskeh, ayik tlamic kisas. Iwa nochti tonati tlajka iwa yuak kintlaijywiltijtoskeh nekateh akimeh kiweyiliah non yolkatl noso iestatua, noso akimeh kimokawiliah makimixkuamachotikah ika itoka. ¹² Yika, akimeh ya iaxkawah Dios iwa kichiwhah

nochi tlan Ye tlanawatia, iwa milák kineltokah n Jesú, moneki makixikokah nochi tlaijyowílistli, iwa ayik makilkawakah Dios iwa nochipa makineltokakah n Jesú.

¹³ Ijkuakó onikak se tlájtoli kan ilwikak, non onechaliliaya:

—Xikikuilo tlan nimitsilia: “Axa ik tlayakapa Dios kintiochiwas akimeh mikiskeh iwa okineltokakeh n Toteko Cristo Jesú.” —Milák, kijtoa n Espíritu—, yejwah mosewiskeh de intekih non satlawel okinsotlawaya. Iwa tlan kuali okichijkeh yas inwah kan ilwikak.

Motlaoololoa ipan tlaltíkpaktli

¹⁴ Otlanki oniontláchixki, iwa onikitak se mextri istak. Iwa ipan non mextri oewatoka Akin omochi tlakatl. Ipan itsonteko okonakijtoka se korona de oro iwa okimakitskijtoka se os satlawel tlateki. ¹⁵ Iwa ijtek tiopa owálkiski ok se ángel non okitsajtsiliwalaya chikaktik non oewatoka ipan mextri:

—¡Xikonana moos iwa xikoololo n tlakilo, ken yoajsiko n tonati para motekis, iwa yotlachikawak ipan nin tlaltíkpaktli!

¹⁶ Ijkuakó non oewatoka ipan mextri okipanolti ios ixko n tlaltíkpaktli, iwa okitek nochi itlakilo n tlaltíkpaktli.

¹⁷ Ijkuakó onikitak owálkiski ok se ángel ijtek n Weyi Tiopa non kajki ilwikak, noiva okipixtoka se os non satlawel otlatekia. ¹⁸ Iwa kan artal onikitak owálkiski ok se ángel non okinawatiaya n tletl, iwa onikak okualtsajtsili chikawak n ángel non okipixtoka ios non satlawel otlatekia, iwa okili:

—¡Xiktekitilti moos, iwa xikintejteki n uvas non kateh ipan tlaltíkpaktli, ken yoiksikeh!

¹⁹ Iwa n ángel okipanolti ios ixko n tlaltíkpaktli, iwa okitejtek nochi n uvas non okatka ipan nin tlaltíkpaktli, iwa okintlali ijtek se tanke para ompa makimpatskakah. Noni kixnextia ikualanilis Dios non ika tetlajiyowiltiki. ²⁰ N uvasteh okinwikakeh ikaltempa n altepetl iwa ompa makimpatskakeh. Iwa ijtek tanke kan okimpatskakeh, owálkiski miak estli non omajkok asta kan infreno n kabayojteh. Iwa non estli wejka omotlelo, kemi eyi siento kilómetro.

15

N chikome ángelteh iwa n chikome kokólisteh

¹ Otlanki onikitak kan ilwikak ok se weyi iwa tetlajtlachialti neskayotl: onikimitak chikome ángelteh non okwalinwikayah iksemi chikome kokólisteh, non ika otlajtlamia ikualanilis Dios.

² Noiva onikitak kemi se weyi atl non otsolantoka kemi teskatl nelitok ika tletl. Inakastla non weyi atl omoketokah akimeh Dios okinmák inmarpajwah; ningeh akimeh okitlanilijkeh n yolkatl iwa itlachijchiwal, iwa ayik omotlankuaketskeh nion okimokawilijkeh makimixmachotikah ika itlapoalis itoka n yolkatl. ³ Iwa okitlakuikatokah itlakuikal n Moisés itékitki n Dios iwa itlakuikal n Ichkatsi, non ijkí okijoaya:

Saikpanoa weyi iwa kuajkualtsi nochi tlan otikchijchi,

Totajtsi Dios Akin nochi weleti tikchiwa,

nochi tlan tiktemachtia kuali iwa milák,

tejwatsi Tirey de nochteh n tlaltíkpaktlakah.

⁴ ¿Akin amo mitsmawilis Toteko Dios?

¿Akin amo mitsweyilis?

Sanwel Tejwatsi tichipawak,

iwa nochteh n tlaltíkpaktlakah witseh monawak iwa mitsweyiliskeh,

ken kuali yomotak nochi tlan tikchiwa, yekmilajka.

⁵ Satepa ijkuak yopanok nochi ni, oniontláchixki kan ilwikak iwa onikitak kenomi owalmotlapo ichipawak Weyi Tiopa Dios, kan otlatitokah n temeh patlawakeh non intech oijklilitoka itlanawatil Dios. ⁶ Ompa ijtek non chipawak iweyi Tiopa owalkiskeh chikome ángelteh non okualinwikayah n chikome kokólisteh. Otlakentitokah ika intlakenwah de lino chipaktik iwa tsotlantok, iwa oelpanilpitokah ika se sinte non okichijchijkeh ika oro.

⁷ Ijkuakó seme de nonteh nawi non yolitokeh, okinmajmák nonteh chikome ángelteh

sejsem kopa patlawak ika oro non otentokah ika ikualanilis Dios Akin nochipa yolitok.
⁸ Iwa n Weyi Tiopa otenki ika poktli non okikisaya itech iweyletilis iwa iweyletilis Dios, iwa amaka oweletia okalakia ompa, asta ikuak tlamiskiah panoskiah nonteh chikome kokólisteh non okualinwikeh n chikome ángelteh.

16

N chikome kópajteh non otentokah ika ikualanilis Dios

¹ Ijkuakó onikak se tlájtoli chikawak non omokakia owalaya kanik Weyi Tiopa, iwa okimiliaya n chikome ángelteh:

—Xiwiah xikinnokitih ipan tlaltíkpaktli nonteh chikome kópajteh patlawakeh non kiwikah ikualanilis Dios.

² N ángel non tlapewaltia oyá okinokito ikopa patlawak ipan tlaltíkpaktli, iwa nochteh n tlaltíkpaktlakah non oixmachotitokah ika ineskayo n yolkatl iwa okiweyiliyah itlachijchiwal n yolkatl, opé pankisah itech inkuerpo sikimeh sawameh non opatitokah iwa saikpanoa otekokoayah. ³ Non ipan ome ángel okinoki ikopa patlawak ipan weyi atl, iwa nochti n atl omoéskopki kemi ieso ikuak aka kimiktiah, iwa nochteh non yolitokeh iwa onemiah ijtki weyi atl, omijmikeh.

⁴ Non ipan eyi ángel okinokito ikopa patlawak intech nochteh ríos iwa n améyalteh, iwa nochti n atl omoéskopki. ⁵ Otlanki n ángel non kinawatia n atl, onikak okijto:

—Dios, Yolchipawak, Non yokatka, iwa kajki. Tiyekmilajka ken titetlaijyowiltia kemi moneki. ⁶ Mokokolikniyah okinmiktijkeh miakeh yolchipawakeh iwa profetajteh, iwa Tejwatsi yotkinmoniti estli, ¡porke yejwah okimotemolijkeh!

⁷ Noiwa onikak se tlájtoli non owalaya de kan artal, iwa okijtoaya:

—¡Milák, Noteko Dios nochti weletini, kuali otitetlaijyowilti, iwa nochti tlan tikchiwa, yekmilawak!

⁸ Non ipan nawi ángel okinoki ikopa patlawak ipan tonati, iwa n tonati okiseli weletílistli para kintlatis n tlaltíkpaktlakah ika itleyo. ⁹ Iwa nochteh n tlaltíkpaktlakah satlawel otonaltlatlakeh, iwa amo omoyolkopkeh nion okiweyijkachijkeh Dios, yej okachi fiero okitenejkeh neká Akin kipia weletílistli impah nonteh kokólisteh.

¹⁰ Non ipan mákuili ángel okinoki ikopa patlawak kan ewatok n weyi yolkatl temohti, iwa nochti kan ye otlanawatiaya owatlasejseujki. N tlakah omonenepiltetexoayah ken ayakmó okixikoayah n kualólistli. ¹¹ Maya otlaijyowiyah, amo okikajkeh tlan amokuali okichijtinemiah, yej okiwiwikaliyah Dios tleka okintlaijyowiltiaya ika chikawak kualólisteh iwa okinkawili masawatemikah.

¹² Non ipan chikwase ángel okinoki ikopa patlawak ipan weyi río Éufrates, para mawaki non aveyatl iwa mamotlapo se ojtlí kan ik panoskeh n reyes non witseh kan ik kisa tonati.

¹³ Ijkuakó, kan ikamak n dragón, iwa kan ikamak n weyi yolkatl temohti, iwa kan ikamak n profeta tekajkaya, onikimitak owalkiskeh eyi espíritus amokualteh non omotayah kemi sapomeh. ¹⁴ Ninteh espíritus okatkah espíritus n demóniojteh. Yejwah okinchawayah wejweyi milagros, iwa okoninmoololoayah n wejweyi reyes non otlanawatijtokah ipan nin tlaltíkpaktli, para mamotekilmakakah iwa n Dios nochti weletini itech neká weyi tonati non Ye yokitlali. ¹⁵ “Xikakikah, ne san niwalkisaki kemi se ichtek. Miak pakílistli kipias neká akin kuali ijsatos iwa tlakentitos, para amo maxipetsitinemi iwa nochteh makitakah tlan kimopinawilia.” ¹⁶ Iwa okinmoolojkeh nochteh n reyes itech se weyi tlali non itech tlájtoli hebreo itoka Armagedón.

¹⁷ Non ipan chikome ángel okinoki ikopa patlawak ixko ejekatl, iwa itech yáyantli non kajki ijtki tiopa omokak se chikawak tlájtoli, non okijtoaya:

—¡Nochti yotlanki omochi!

¹⁸ Ijkuakó otlapejpétlanki, otlaikuyukak, otlatejtékuinki, iwa ottalólinki chikawak, kemi ayik tlalolintika desde ijkuak oneskeh n tlakah ipan nin tlaltíkpaktli. ¹⁹ Ijkuak otlalolinki omotajtlapo n tlali itech eyi, iwa miakeh kalmeh owejwetskeh. Dios amo okilka kitlaijyowiltis n Babilonia, iwa okoniti ikualanilis. ²⁰ Nochteh n tlalmeh non

opankistokah itech weyi atl iwa n tepemeh opojpolikeh. ²¹ Noiwa owetski wejweyi tesiwitl impa n tlaltikpaktlakah. N tesiwitl onesia kemi wejweyi temeh, sejsen tesiwitl okipiaya kemi ome pójali kilo. Iwa n tlaltikpaktlakah okiwijwikaltijkeh Dios ken okintlaijyowilti ika non weyi tesiwitl.

17

Dios kitlaijyowiltia n weyi mekatanajsiwatl non itoka Babilonia

¹ Seme de n chikome ángelteh non okimpixtokah n chikome kópjteh patlawakeh, owala iwa onechili:

—¡Xiwiki, nimitsitis n tlaijyowílistli non ika niktlaijyowiltis n weyi mekatanajsiwatl non ewatok ipan miaktikeh ameh! ² N wejweyi tlanawatijkeh itech nin tlaltíkpaktli, okimomekatijkeh n Babilonia, iwa omotlawantijkeh ika tlan pitsotik keman okinweyijkachijkeh diosmeh tekajkayajkeh non kinmachijchiwah, iwa n oksikimeh tlaltikpaktlakah noijkó okichijkeh.

³ Satepa n Espíritu notech owala, iwa onechwik kan tlaltejtéyinki. Ompa onikitak se siwatl otlejkotoka ipan se yolkatl chichiltik non okimpiaya chikome itsontekonwah iwa májtlaktli ikuauanwah. Iwa ipa ojkuilitokah miakeh tlájtolteh fierotikeh non okiwikaltiaya Dios. ⁴ Nin siwatl otlakentitoka ika itlake chichiliktik iwa mojmorado, iwa ochijchitoka ika miak oro, tetsitsinteh non mimilinh iwa ika perlas. Itech ima okipixtoka se kopa de oro non otentoka ika tlan pitsotik. Noni kijtosneki nochi tlan amokuali okichi keman okinweyijkachi diosmeh non kinmachijchiwah. ⁵ Iwa itech ixkuak ojkuilitoka se tlájtoli non amaka okajsikamatia: “N weyi Babilonia ye n tena de nochteh n siwameh non momekatijinemih iwa nochi tlan pitsotik mochiwa itech nin tlaltíkpaktli.” ⁶ Satepa onikajsikama non siwatl owintitoka ika inmessó akimeh iaxkawah Dios, iwa akimeh okinniktijkeh ken otetlapowiyah de Jesús. Saikpanoa onimotlajtlachialti ikuak onikitak nochi ni. ⁷ Ijkuakó n ángel onechili:

—¿Tleka timotlajtlachialtia? Ne nimitsajsikamatiltis tlan kijtosneki non siwatl, iwa tlan kijtosneki non yolkatl non kimpia chikome itsontekonwah iwa májtlaktli ikuauanwah non ipa ewatoti non siwatl. ⁸ N yolkatl non otikitak, ye achto yokatka, axa ayakmó onka. Pero oksepa walpankisas de kan sentlawejkatlantik, iwa yas milaktik kan kipojpoloskeh. N tlaltikpaktlakah non amo machotitokeh itech iamatlajkuilol Dios, desde ikuak opejki n tlaltíkpaktli, motlajtlachialtiskeh ikuak kitaskeh n yolkatl non yowejka onemia iwa yomikki, iwa oksepa wits.

⁹ Akin ixtlamati, kajsikamatis: N chikome tsontekomeh kijtosneki n chikome tepemeh non impah ewatok n siwatl, noiwa n chikome tsontekomeh kijtosneki chikome reyes.

¹⁰ Mákuitleh reyes yowetskeh, seme de nonteh chikome reyes axa tlanawatijtok iwa non ok se ayamó wits. Pero non sa iksemi wits, amo wejkawas tlanawatijtos. ¹¹ N yolkatl temohti non yowejka oyolitoka iwa axa kajki, ye seme de n chikomeh tlanawatijkeh. Walmokapas iwa tlanawatis oksepa, iwa yetos n chikweyi tlanawati, pero kixpoloskeh sansemi.

¹² N májtlaktli kuakuajmeh non yotikinmitak, yejwah májtlaktli tlanawatijkeh non ayamó pewa tlanawatiah. Pero sanwel se ora kipiaskeh weletílistli sansikah iwan non yolkatl temohti. ¹³ Ninteh májtlakteh tlanawatijkeh moyekkawaskeh iwa kimakaskeh inweletilis iwa intekiwajyo non yolkatl temohti. ¹⁴ Motekilmakaskeh iwan Ichkatsi, pero n Ichkatsi kintlanis. N Ichkatsi kintlanis porke Ye n okachi Weyijkatitok iwa Ye n tekowa non okachi Weletini de nochteh n tlanawatijkeh. Iwan Toteko yetoskeh nochteh itlaneltokawah porke nochipa kitlakita.

¹⁵ N ángel noiwa onechili:

—Nonteh ameh non te otikimitak, non impah ewatok n mekatanajsiwatl, kijtosnekih miakeh altepemeh, tlakah, wejweyi tlalmeh iwa tlájtolteh.

¹⁶ 'Iwa n májtlaktli kuakuajmeh non otikimitak kimpixtok n yolkatl, kikokoliskeh n mekatanajsiwatl, kikixtiliskeh nochi tlan kipia iwa kikawaskeh sa xipetstik. Kikualiskeh inakayo iwa kontlamotlaskeh ijtit tletl.

¹⁷ 'Dios yokitlali itech inyolo n májtlaktli tlanawatijkeh ijkó makichiwakah. Yika, motlapowiskeh iwa moyekkawaskeh ken kimaktiliskeh n yolkatl intlanawatilis iwa matlanawatijo impatka, asta mamochiwa nochi tlan Dios yokijo kichiwas. ¹⁸ N siwatl non te otikitak kijtosneki n weyi altepetl non kinnawatia nochteh n wejweyi tlanawatijkeh itech nin tlaltípkaktli.

18

Wetsi n weyi altepetl de Babilonia

¹ Satepa ikuak nochi yopanok, onikitak ok se ángel owaltemoaya de ilwikak ika miak tlanawátili, iwa okitlawili n tlaltípkaktli ika itlawilnextilis. ² Iwa chikaktik okijtoaya:

—Yowetski, yowetski n weyi Babilonia, axa ompa yomochachantijkeh n demóniojteh, ompa motlaatiah n espíritus amokualteh, ompa motepajsoftia nochteh n totomeh non tikinkokolia kemi tsojpilomeh. ³ Nochteh n tlaltípkaktlakah yomotlawantijkeh ika imekatanajchiwalis pitsotik. N tlanawatijkeh non tlanawatijtokeh itech nin tlaltípkaktli omomekatijtinenkeh iwa nin mekatanajsiwatl. Iwa n tlasemankeh de nin tlaltípkaktli yomotojtomintijkeh íwa.

⁴ Ijkuakó onikak ok se tlájtoli kan ilwikak non okijtoaya:

—Nomejwah akimeh onomechpejpenki, xikisakah de Babilonia, iwa amo xitlajtlakolchiwakah iwa non mekatanajsiwatl, para amo mawetsi nomopah n tlaijywílistli non ipa wits. ⁵ Ijkó kiné, tlajtlakolwah yomonenepanojkeh iwa yoajsito asta ilwikak, iwa Dios nochipa kinmilnamiktos tlajtlakolwah. ⁶ Xiktlaxtlawikah kemi ye okitlaxtla, iwa xikojpatilikah tlan ye yokitlaxtla. Xikchijchiwilikah se tlaónili ojpa chikaktik non ye okinmoniti oksikimeh. ⁷ Xiktlaijywíltikah iwa xikchochoktikah ijkó kemi ye omoweyiljtinemia iwa omopaktijtinenki itech tlan satlawel pitsotik, ken ye okimoliaya itech iyolo: "Nika niewatok kemi se Reina. Ne amo niiknosiwatl, nion ayik nichokas."

⁸ Ika noni, san itech se tonati nochi nin tlaijywílistli wetsiki ipa: mikílistli, neyolkókoli iwa apisotl. Kichichinoskeh ijtit tletl, ken weletini n Toteko Dios, iwa yokitlajtlakolmák.

⁹ N tlanawatijkeh de nin tlaltípkaktli akimeh íwa omomekatijtinenkeh iwa omopajpaktijtinenkeh iwa nin mekatanajsiwatl, moyolkokoskeh iwa kichokiliskeh ikuak kitaskeh n Babilonia sa popokatok. ¹⁰ San wejka konitoskeh porke kimawiliskeh makintlaijywíltikah noiva, iwa kijtoskeh:

—¡Ay! ¡Ay! ¡Timialma Babilonia non otikatka tiweletini! Porke san itech se ora mopa owetsiko nochi motlaijywilis.

¹¹ N tlasemankeh de nochi n tlaltípkaktli chokaskeh iwa kinyolkokos tlan omochi non altepetl, ken ayakmó yetos akin kinkuilis tlan yejwah kinamakah, ¹² n oro, plata, tetsitsinteh non tsotsotlakah, perlas, tlakemil de lino, de seda, non chichiltik iwa mojmorado. Noiwa okatka san miak kuawitl ajwiak, noiwa okatkah tlachijchiwalteh de marfil, de kuawitl non satlawel patio, de bronce, de tépostli iwa de mármol; ¹³ kanela, ajwiak xiwitl, kópali, mirra, iajwiaka n xiwitl, oktli, aseite, arina iwa trigo. Noiwa okoninnamakayah yolkameh non tlamamah, ichkameh, kabayojteh, karretajteh, iwa asta tlakah non okinnamakayah.

¹⁴ ¡Babilonia, nochi tlan moyolo okipaktiaya mach ok ayik tikpias, san semi opojpoliwik nochi tlan kualtsi de te iwa nochi tlan otiktlawelpiaya!

¹⁵ N tlasemankeh non omotlaweltomintijkeh ika tlan okwalnamakiltiayah non weyi Babilonia, san wejka konitoskeh ken kimawiliskeh noiva makintlaijywíltikah; chokaskeh, moyolkokoskeh, ¹⁶ iwa kijtoskeh:

—¡Ay! ¡Ay! ¡Mialma Babilonia! Kualtsi omotaya kemi se siwatl non otlakentitoka ika lino non kuali. ¡Okinmonakiaya itlakenwah non chichiltikeh iwa mojmoradojteh, iwa

omochijchiwaya ika oro, ika tetsitsinteh non tsotsotlanih iwa ika perlas! ¹⁷ ¡Iwa axa san itech se ora ovalpoliwik nochi tlan okitlawelpiaya!

Nochtek non kinnejnemitiyah n barkojteh, nochtek non oyayah itech barkojteh iwa nochtek non otekitiyah itech weyi atl, san wejka omokajkeh, ¹⁸ iwa ikuak okitakeh n poktli non okisaya itech n weyi Babilonia non otlatlatoka, otsajtsikeh:

—¡Mach okatka ok se altepetl kemi nin weyi altepetl!

¹⁹ Iwa omokuatlekonexwijkeh; ochokayah, omoyolkokoayah iwa okijoayah:

—¡Ay! ¡Ay! ¡Mialma Babilonia! Ika nochi tlan okitlawelpiaya, omotomintijkeh nochtek non okimpiayah inbarkojwah itech weyi atl; ¡iwa itech se ora nochi san ovalpoliwik!

²⁰ Xipakikah nomejwah akimeh nonkitlakitah Dios,
akimeh non kateh ilwikak,
ken Dios okipojpolo n weyi altepetl.

Xiyolpakikah nomejwah akimeh non tlapejpénalteh
iwa nomejwah n profetas,
ken Dios yokitlaijyowilti n Babilonia
Ika nochi tlan amokuali yokichi.

²¹ Ikuakó se ángel weletini okajkok se weyi tetl, kemi non ika tlakuechoah n molinojteh, okontlamotlak ijtek weyi atl, iwa okijo:

—¡Ijkí chikawak kitlamotlaskeh n weyi altepetl de Babilonia, iwa ayik oksepa kitaskeh!

²² Ayik oksepa motech mokakiskeh makintsotsontakah arpahteh, akatlapítsalteh, noso tlapítsalteh, nion motas aka non matekitito, nion mokakis ijkuyukatok n tetl kan ot-lakuechoayah molinojteh. ²³ Ayik oksepa motech motas maxotlato se tláwili, iwa ayik ok mokakis mailwichiwakah kan monamiktilo, maya motlasemankeh okatkah non okachi okipayah tomi ipan nin tlaltípkaktli, iwa nochtek n tlaltikpaktlakah otikinmixtlapololti ika motetlajchiwilis.

²⁴ Porke motech, Babilonia, omajsik inmesso n profetas, inmesso n nochtek akimeh iaxkawah Dios, iwa de nochtek akimeh okintoskatsontekeh itech nin tlaltípkaktli.

19

¹ Ikuak yopanok, onikak se chikawak tlájtoli kan ilwikak, miaktikeh tokniyah otlahtoayah chikawak:

¡Matikweyilikah Dios!,
ken Ye techmakixtia.

Matikweyilikah ken Ye kipia weyílistli.

² Ye tlaixkomaka ika imilajkachiwalis.

Yika, yokitlajtlakolti neká weyi mekatanajsiwatl
non ika ipitsotilis okinyolijtlako nochtek n tlaltikpaktlakah.

Yika ika tlan okijyowilti Dios yokitlaxtlawalti inmikilis itekitwah.

³ Otlanki oksepa okijokeh:

—¡Timitsweyiliah Tejwatsi Todios! Porke n weyi Babilonia ayik tlamic popokas.

⁴ Iwa nonteh sempóali iwa n nawi (24) tetajtsitsinteh, iwa non nawi non yolitokeh omotlankuaketskeh asta okitelkojkeh n tlali ika inmixkuak iwa okiweyijkachijkeh Dios Akin yayantitok, iwa okijoayah:

—¡Timitsweyijkachiwah Tejwatsi Todios Non Timoitstika itech moyayan! ¡Ijkó mamochiwa!

⁵ Ikuakó onikak se tlájtoli non ovalaya de kan oyayantitoka, iwa okijoaya:

¡Nonnochtek xiktlakuikilikah Todios
nochtek n tlaltikpaktlakah makitlakuikilikah,
akimeh kitlawelpiah iwa non próbesteh,
akimeh kitekitiliah iwa akimeh kitlakitah!

⁶ Noiwa onikak kemi yaskia miakeh otlajtojtakah, noso kemi ijkuyukatoskia miak atl iwa chikawak otlatejtekuinia, iwa okijtoayah:

¡Timitsweyiliah!, ken yopé titlanawatia Tejwatsi Toteko, Todios weletini.

⁷ Matipakikah, matiyoltemikah ika miak pakílistli iwa matikweyilikah Todios, ken yoajsiko n tonati monamiktis n Ichkatsi.

Isiwa yomotlatlali iwa sa mochixtok.

⁸ Iwa yokikawilijeh mamotlakenti ika tlakemtl de lino non kuali, chipawak iwa tsotlani. N lino non kuali, kijtosneki inyeknemilis nekateh akimeh iaxkawah Dios.

⁹ Ijkuakó n ángel onechili:

—Xikikuilo: “Mayolpakikah akimeh yokintlwijeh matlatlakuatih kan monamiktia n Ichkatsi.”

Iwa onechili:

—Nin tlájtoli milák, itlajtol Dios.

¹⁰ Ijkuakó onimotlankuaketski ikxitla n ángel para nikweyilis, iwa ye onechili:

—Amo ijkó xikchiwa. Ne san niktematiltia itlajtol Dios ijkó kemi te iwa nochteh mokniwah akimeh kiteixmatiltiah tlan Jesús okitemachti. Sanwel Dios xikweyili.

Porke akimeh kiteixmatiltiah tlan Jesús okitemachti, kimatih tlan satepa tlamochiwas.

Non tlejkoti ipan kabayo istak

¹¹ Ijkuakó onikitak n ilwikak otlapotoka, iwa owalmonexti se kabayo istak. Iwa non otlekotiaya ipan non kabayo, omonotsaya Milajkatlakatl iwa Kichiwa Tlan Kijtoa, Ye Akin ika tlan milák tlaixkomaka iwa tlanawatia, iwa motekilmaka kemi moneki.

¹² Ixtololowah oxotlayah kemi tletl, itech itsonteko okinmonakijtoka miakeh koronajteh, iwa okipiaya ijkuilitok itoka non sanwel ye okixmatia. ¹³ Itlake non okonakijtoka okatka ejestik, iwa omonotsaya Itlajtol Dios. ¹⁴ Miakeh soldadojteh de ilwikak okwaltokayah. Otlejkotiwalayah impah inkabayojwah istakeh, iwa otlakentitokah ika intlakah de lino non kuali, istak iwa chipaktsintli. ¹⁵ Itech ikamak owalkisaya se espada, non ika kinkojkos nochteh n tlaltikpaktlakah, iwa chikawak kinnawatijtos kemi yaskia kimapixtok se basto. Iwa kintlaxtlawaltis ijkó kemi ijkuak kintlajtlaksah n uvas para kimpatskaskeh, iwa kintoktis makonikah n temohti tlaijywílistli non Dios weletini kinwaltitlanilis itech ikualanilis. ¹⁶ Itech itlake iwa ipan imets, oijkuilitoka nin tlájtoli: “Ye n tlanawati non kinnawatia nochteh n tlanawatijkeh iwa Tekowa itech nochteh n tekowajkeh.”

¹⁷ Otlanki onikitak se ángel non omoketoka ipan tonati, iwa chikaktik okintsajtsiliaya nochteh n totomeh non patlantinemih itech ilwikak:

—¡Xiwihi!, ximoololokah nika kan Dios nomechmakas ximotlamajsewikh, ¹⁸ iwa xikinkualikah innakayo n tlanawatijkeh, n soldadojlayakankeh iwa tlakah non amitla kinmojtia, innakayo n kabayojteh iwa n tlakah non impah tlejkotiwih, innakayo miakeh tlaltikpaktlakah akimeh tenawak tekith iwa akimeh inselti monawatiah, non tominyo- jkeh iwa non próbesteh.

¹⁹ Ijkuakó onikitak n yolkatl temohti, iwa n tlanawatijkeh akimeh otlanawatijtokah ipan nin tlaltípkaktli iwa insoldadojwah. Omoololojkah para motekilmakaskeh iwa Akin otlekotiwalaya ipan ikabayo istak iwa isoldadojwah. ²⁰ N yolkatl okikitskijkeh, sansikah iwa n profeta tekajkaya non okinchi milagros iyakapa non yolkatl temohti. Ika nonteh milagros non okinchi non profeta, miakeh okinkajkaya para makimotekawilikah mamoixmachotikah iwa okiweyilijkeh iestatua non weyi yolkatl, non otlanawati makichijchiwilikah ijkó kemi ye. Iwa n yolkatl temohti iwa n profeta tekajkaya, okonintlamotlakah yolitokeh kan kuakualakatok tletl ika asufre. ²¹ Iwa non omokajkeh, okimiktijkeh ika espada non owalkistoka itech ikamak de Akin otlekotiwalaya ipan ikabayo istak. Iwa nochteh n tsojpilomeh oijixwikeh ika innakayo non okimijmiktijkeh.

¹ Satepa onikitak se ángel otemotiwalaya de ilwikak iwa okualikaya n yabe non tlatlapoa kan sentlawejkatlantik, iwa itech ima okualikaya se kadena. ² Nin ángel okijilpi n weyi dragón, neká koatl non yowejka nemí, ye n diablo non kinotsa satanás. Iwa n ángel okijilpi ika kadenajteh iwa ompa okika mailpito májtlaktli siento xiwitl. ³ Otlanki okontlamotlak kan sentlawejkatlantik, okitenkamatsak iwa kuali okitakatso iwa okitlalili se seyo ijkó ayakmó makinkajkayajtinemi n tlaltikpaktlakah asta mapano májtlaktli siento xiwitl. Pero satepa, oksepa kikajkawaskeh kech tonati.

⁴ Otlanki onikimitak miakeh yáyanteh, iwa itech nonteh yáyanteh oewatokah akimeh okintekiwajtlalijkeh para makijtokah akimeh tlajtlakolejkeh iwa akimeh amó. Noiwa onikimitak akimeh okinkechtsontekeh ken noiwa otetlapowiayah itlajtol Dios. Yejwah amo okiweyliljkeh n weyi yolkatl temohti nion itlachijchiwal, nion okimotekawilijkeh makinmixmachotikah nion makinesskayotikah itech inma. Oksepa omoyolitijkeh iwa otlanawatijtokah iwan Cristo májtlaktli siento xiwitl. ⁵ Yejwah ninteh non achto omoyolitijkeh de nochteh non yomikkeh. Iwa n oksikimeh akimeh noiwa omiktakah, amo omoyolitijkeh asta ikuak yopanok májtlaktli siento xiwitl.

⁶ ¡Saikpanoa yolpasilosjkeh iwa yolchipawakeh nekateh akimeh achto moyolitiskeh!, porke non ojpatia mikílistli ayakmitla weletis kintoktis. Iwa yetoskeh itiopixkawah Dios iwa n Cristo, iwa tlanawatijtoskeh iwan Cristo májtlaktli siento xiwitl.

Tlapoloa n satanás

⁷ Ijkuak yopanokeh májtlaktli siento xiwitl (mil años), n satanás kikajkawaskeh de kan tsaktok. ⁸ Iwa kisas kinkajkayawati nochteh n tlaltikpaktlakah ik tlakpawik, tlatsintlawik, kan ik kisa iwa kan ik kalaki tonati. Kinkajkayawati n Gog iwa n Magog. Iwa kinseitilis insoldadojwah non satlawel miaktikeh sa kemi xali non kajki itempa n weyi atl. ⁹ Ijkó kiné, yejwah nenemiskeh itech nochti n tlaltíkpaktli, iwa kinyawaloskeh nochteh akimeh iaxkawah Dios kan chantitokeh. Iwa owaltemok tletl de ilwikak iwa nochteh kintlatis. ¹⁰ Iwa n diablo akin okinkajkayajtoka, kitlamotlaskeh kan kuakualakatok tletl iwa asufre, ompa kan noiwa okontlamotlakeh n yolkatl temohti iwa n profeta tekajkaya. Tlajka iwa n yuak tlaijyowijtoskeh nochipa.

N iksemi tlaixkomakálistli

¹¹ Ijkuakó onikitak se weyi yáyantli istak, iwa Akin ompa oewatoka, ixpa opoliwik n tlaltíkpaktli iwa n ilwikak, iwa ayakmakah oksepa okinmitak. ¹² Iwa onikinmitak nochteh non yomikkeh, non tominyojkeh iwa non próbesteh, omoketokah iyakapan n yáyantli. Ijkuakó okintlapojkeh n amatlajkuíloli kan machotitokeh nochteh akimeh yolitoskeh nochipa iwan Dios. Non yomikkeh okinmixkomakakeh ika tlan okichijkeh ijkó kemi machotitok itech amatlajkuílolleh. ¹³ N weyi atl okintemák non omikkeh ijtk, iwa omoteixpantito iyakapa n Dios para kinmixkomakas, noijkó okichijkeh akimeh okatkah intech inmiketekochwah. Nochteh n mikemeh okinmixkomakakeh ijkó kemi yokichijkeh. ¹⁴ Satepa n mikílistli iwa n miksla, okintlamotlakeh kan mextok tletl. Nin tletl ye n ojpatia mikílistli. ¹⁵ Iwa akin amo omachotitoka itech n amatlajkuíloli kan machotitokeh non nochipa yolitoskeh, okintlamotlakeh kan mextok tletl.

N yankuik ilwikak iwa yankuik tlaltíkpaktli

¹ Satepa onikitak se yankuik ilwikak iwa se yankuik tlaltíkpaktli, porke n ilwikak iwa n tlaltíkpaktli non achto okatkah, opojpolikeh, iwa ayakmó okatka n weyi atl. ² Ne Juan onikitak n chipawak altepetl, n yankuik Jerusalén, non otemotiwalaya de ilwikak, kan moitstika Totajtsi Dios. Kualtsi ochijchitoka kemi ijkua se novia sa kichixtok akin konanas. ³ Iwa onikak se tlájtoli chikawak non ovalaya ik ilwikak, iwa okijtoaya:

—Xikita, axa Dios yochanchiwato iwa n tlakah. Dios chantitos inwah; iwa yejwah yetoskeh iaxkawah nochipa, iwa Ye inewia yetos non sanwel se Dios. ⁴ Ye kinmixay-owajwatsas nochteh, iwa ayakmó yetos mikílistli, nion chocílistli, nion neyolkókoli, nion tekipanólistli, porke nochí tlan yowejka okatka, nochí yotlatlajtlanki.

⁵ Ijkuakó Dios non oyayantitoka okijto:

—Xikita, ne nochí nikyankuulis.

Noiwa okijto:

—Xikikuilo tlan nimtsilis, porke tlan nimtsilijtok milák iwa kuali se kinneltokas.

⁶ Satepa noiwa onechili:

—Nochí yomochi. Ne nitlapewaltijtok iwa Ne nitlayakatlama, kemi Alfa iwa Omega. Akin amikis, ne nikatlitis kan améyali non kichiwa se mayolito nochipa, iwa san niktliokolis. ⁷ Akin tlatlanis ipan nochí tlan amokuali, nikaxkatilis nochí ni, iwa Ne niyetos Idios, iwa ye yetos nokone. ⁸ Pero n majmawiskemeh, akimeh amo tlaneltokah, akimeh kichijtinemih tlan pitsotik, n temiktijkeh, akimeh momekatijtinemih, akimeh tetlajchiwiah, akimeh kinweyiliah diosmeh non kinmachijchiwah, iwa nochteh non amo kijtoah tlan milák, yejwah kiseliskeh kemi yaskia intlatliokolil, kan kuakualakatok tletl ika asufre. Ompa kajsiskeh n ojpatia mikílistli.

Nyankuik Jerusalén

⁹ Ijkuakó seme de n chikome ángelteh non okimpixtokah n chikome kópajteh patlawakeh non otentokah ika n iksemi chikome tlaijywílisteh, owala onechajsiko iwa onechili:

—Xiwiki, nimtsititis n novia, non yetos isiwa n Ichkatsi.

¹⁰ N Espíritu onechmokemi, iwa ne onikitak n ángel onechwikak ipan se weyijtik iwa wejkantik tepetl. Ompa onechititi n chipawak altepetl de Jerusalén non owaltemotiwalaya de ilwikak kan Dios moitstika. ¹¹ Non altepetl otsotlania ika itlawilnextilis Dios, iwa itsotlanilis omotaya kemi itsotlanilis se tetl kuajkualtsi, kemi se tetl de jaspe, chipaktik kemi teskatl. ¹² N altepetl oyawalitoka ika se tepamitl weyi iwa wejkapa. Okimpiaya májtlaktli iwa ome kaltemeh, iwa itech nochteh n kaltemeh okatka se ángel. Iwa intokah nonteh májtlakteh iwa ome ipilwah n Israel oijkuitokah intech sejsen kaltentli. ¹³ Eyi kaltemeh okatkah kan ik kisa tonati, eyi ik tlakpawik, eyi ik tlatsintlawik, iwa eyi kan ik kalaki tonati. ¹⁴ N tepamitl non okiyawalojtoka n altepetl omotlakxilijtoka ipan májtlakteh iwa ome temeh, iwa intech nonteh temeh oijkuitokah intokah n májtlakteh iwa ome iapóstoles* n Ichkatsi.

¹⁵ N ángel non onechtlapowijtoka okipixtoka se kuawitl de oro non ika kitamachiwaskia nochí n altepetl, ikaltenwah iwa n tepamitl non okiyawalojtoka. ¹⁶ N altepetl okatka kuadrado, ijkó ken weyak okatka, ijkó patlawak okatka. N ángel okitamachi n weyi altepetl ika ikuau non de oro, iwa okitamachi ome mil iwa ome siento kilómetro. Ijkó kemi okatka weyak, ijkó okatka patlawak, iwa ijkó okatka wejkapa. ¹⁷ Satepa n ángel okitamachi n tepamitl non okiyawalojtoka n altepetl, iwa onikitak okipiaya eyi póali iwa n nawi (64) metro. Non ángel otlatamachi ika ikuau kemi tejwah titlatamachiwah.

¹⁸ N tepamitl non okiyawalojtoka okichijchijkeh ika tetl non itoka jaspe. Iwa nochí n altepetl ochijchitoka ika ajositok oro, senchipaktik kemi teskatl. ¹⁹ N májtlakteh iwa ome itlatenyo non okitlakxilijtokah n tepamitl non kiyawalojtok, okichijchijkeh ika nochí tetsitsinteh kualtsitsinteh. Non tlatsintla omantoka, okichijchijkeh ika jaspe; non ipan ome ika safiro; non ipan eyi ika ágata; non ipan nawi ika esmeralda; ²⁰ non ipan mákuili ika ónise; non ipan chikwase ika kornalina; non ipan chikome ika krisólito; non ipan chikweyi ika berilo; non ipan chiknawi ika topasio; non ipan májtlaktli ika krisopraso; non májtlaktli iwa n se ika jacinto; iwa non ipan májtlaktli iwa ome ika amatista. ²¹ N májtlakteh iwa ome kaltemeh okatkah májtlakteh iwa ome perlas, sejsen kaltentli

* 21:14 apóstoles kijtosneki tlatitlaniltih iwa tlatematiltijkeh

okichijchijkeh san ika se perla. Iwa n ojtli non okachi weyi, ochijchitoka ika ajsitok oro, senchipaktik kemi teskatl.

²² Itech nin altepetl amo kanaj onikitak se tiopa, porke n Toteko Dios weletini iwa n Ichkatsi, yejwah innewiah totiopa. ²³ Itech non altepetl amo moneki nion tonati nion metsi matlawikah, ken itlawilnextilis Dios tlawilnextia, iwa n Ichkatsi, Ye itlawil. ²⁴ Itlawilnextilis non weyi altepetl kintlawilnextilis nochteh n tlakah de nochti n tlaltípkaktli, iwa n reyes non tlanawatijtoskeh ipan nin tlaltípkaktli kiwikiliskeh nochti inweyilis iwa kiweyiliskeh. ²⁵ Iwa tlajka, ayik kintsakuaskeh ikaltenwah, ken itech non altepetl ayik tleyúas. ²⁶ Inweyilis iwa inkualtsinno nochteh altepemeh kikawatiweh itech non altepetl. ²⁷ Ayik kalakis itla tlan amo chipawak, nion se tlajtlakolchi nion se tekajkaya. Sanwel kalakiskeh akimeh machotitokeh itech n amatlajkuíloli non kipixtok n Ichkatsi, kan machotitokeh akimeh yolitoskeh nochipa.

22

¹ Ijkuakó n ángel onechititi se aweyatl chipawak kan opanotoka n atl non kichiwa mayolitokah nochipa. Non atl omextoka kanik iyayan Dios iwa n Ichkatsi. ² Non atl omotlelojtoka itlajko n weyi altepetl, iwa itejtempa non aweyatl, otooktoka n kuawitl non kichiwa se mayolito nochipa. Non kuawitl kitemaka májtlaktli iwa ome mestli itlakilo itech se xiwitl. Nochi mestli kitemaka itlakilo, iwa ixiujyo kuali motekitiltis para kimpajtiskeh n tlaltípkaktlakah. ³ Ompa ayakmaka kimawispolos Dios. Ompa yetos iyayan Dios iwa n Ichkatsi, iwa itekitwah kiweyijkachiwaskeh. ⁴ Ompa nochteh kiixtlajtlataskeh Dios, iwa Itoka ijkuitlos inmixkuak. ⁵ Ompa ayakmayik tleyúas, iwa akimeh ompa chantitoskeh amo monekis mamotlawilikh ika tláwilteh nion ika tonati, porke Dios kintlawilis, iwa yejwah tlanawatijtoskeh semijkak.

Cristo Jesúis totoka wits

⁶ N ángel onechili:

—Ninteh tlájtolteh yekmilajkameh, iwa teyolchikawah. Iwa n Toteko Dios, Ye Akin kintlajtolmaka akimeh kitematiltia itlajtol, iwa yokitítlanki iángel makinmatilti itekitwah tlan totoka tlamochiwas.

⁷ —¡Sanima niwits! ¡Miak pakílistli kipias akin kichiwa tlan ijkuitlok itech nin amatlajkuíloli!

⁸ Ne, Juan, onikitak iwa onikak nochti tlan nomechilijtok. Ijkuak nochti yonikitak iwa yonikak, onimotlankuáketski ikxitla n ángel non onechnextili nochti tlámantli iwa nikweyiliskia, ⁹ pero n ángel onechili:

—Amo ijkó xikchiwa, ne noiva san ni tékitki inawak Dios, ijkó kemi te iwa n mokniwah n profetas, iwa nochteh akimeh kineltokah iwa kichiwa tlan ijkuitlok itech nin amatlajkuíloli. Sanwel Dios xikweyijkachiwa.

¹⁰ Noiva onechili:

—Amo san te xikmato itlajtol Dios non ijkuitlok itech nin amatlajkuíloli, ken ayakmó wejkawas mochiwas tlan nika ijkuitlok. ¹¹ Yika, tla aka kichijtinemi tlan amokuali, ijkó makichijtinemi; tla kiwilita moyolijtlakojtinemis, mamoyolijtlakojtinemi. Iwa akin kichijtinemi tlan kuali, nochipa makichijtinemi tlan kuali, iwa akin Dios yokiyolchipa, okachi manemi ika iyolo chipawak nochipa.

¹² —Xikkaki, Ne sannima niwits, iwa non sejsemeh nikmakaki itlaxtlawil non okimotlanili ika tlan okichi. ¹³ Ne niachto iwa Ne niiksemi, Ne Akin nitlapewaltia iwa Ne Akin nitlayakatlamia, ijkó kemi n Alfa iwa n Omega.

¹⁴ Dios kintiochiwas, akimeh kikawah iwa ayakmó kichiwa tlan amokuali. Dios kinkawilis makikuakah itlakilo n kuawitl non kitemakah n semijkak yolílistli. Yejwah weletis kalakiskeh kan ikaltenwah n weyi altepetl. ¹⁵ Pero mokawaskeh kala, non saken chichimeh iwa kichijtinemih tlan pitsotik, akimeh kinneltokah nontetlajchiwiah,

akimeh momekatijtinemih, akimeh temiktiah, akimeh kinmotiotiah noso kintekichiwi-
iah tlamachijchiwaldiosmeh non amitla impati, iwa nochteh non nemih ika in pitsoka-
mak.

¹⁶ —Ne Ni Jesús, oniktitlanki noángel makinmatilti nochi nin tlájtoli, nochteh n
tlaneltokakeh akimeh moololoah itech Itoka n Totajtsi Dios. Ne ni walewatok itech n
rey David. Ne n sítlali non tsotlantok nochi kualka.

¹⁷ N Espíritu Santo iwa isawa n Ichkatsi kijtoah:

—Xiwiki Noteko Jesús.

Nochi akin kikaki, noiwa makijo:

—Xiwiki Noteko Jesús.

Iwa nochi akin amiki, mawiki; iwa akin kinekis sanijki makoni nin atl, non kitemaka
semijkak yolílistli.

¹⁸ Nochteh akimeh kikakih itlajtol Dios non ijkuititok itech nin amatlajuéloli; kuali
makikakikah tlan nikinmilia: Tla aka kajxtilia itla tlájtoli non ya ijkuititok itech nin
amatlajuéloli, Dios kitlaijyowiltis ika nochteh tlaijyowílisteh non ijkuititokeh itech nin
amatlajuéloli.

¹⁹ Iwa tla aka kikixtilia itla tlájtoli non yajkuititok itech nin amatlajuéloli, Dios
ayakmó kikawilis makonana itlakilo n kuawitl non kitemakah n semijkak yolílistli,
nion kikawilis machanchiwa itech altepetl chipawak, ijkó kemi yomijto itech nin
amatlajuéloli.

²⁰ Akin kitetlapowia nochi nin tlájtoli, kijtoa:

—Milák, Ne sanima niwits.

Ijkó mamochiwa. ¡Xiwalmuika, Toteko Jesús!

²¹ Iyekchiwalis n Toteko Jesús mayetia iwan nochteh nomejwah.